



BIBL. NAZ.
VIN. Emanuele III.

RACCOLTA
VILLAROSA

B

815

NAPOLI



1235

35
michele 6

ss

s

1841

60548H

Base. V. B. 815

EVERARDI OTTONIS.

Jurisconsulti & Publici Privatique Juris
Antecessoris Trajectini,

DISSERTATIONUM
JURIS PUBLICI ET PRIVATI

P A R S P R I M A.

ACCEDITIONUM TRIAS.




TRAJECTI AD RHENUM,

Apud JOANNEM VISCH, Bibliopolam.

clō. 13. ccxxiii.





NOBILISSIMIS, AMPLISSIMIS;
ac meritis in Remp. Fulgentissimis Viris,
CORNELIO QUINT, JCTO,
ET
HADRIANO STRICK;
Domino in Linschoten & Polanen,
FLORENTISSIMÆ URBIS TRAJECTINÆ
CONSULIBUS;
CETERISQUE EJUSDEM URBIS
SENATORIBUS,
ACADEMIÆ CURATORIBUS GRAVISSIMIS,
EVERARDUS OTTO F.



*D*issertationes meas, varii argumen-
ti, editas antea & ineditas, in
unum corpus colligere quum insti-
tuisssem, non diu anceps hæs, à
quorum splendore lucem iis & tu-
telam mutuarer. Occurrit mihi
euestigio Vestrum, AMPLIS-
SIMI VIRI, nomen; cui ipsæ committi ambi-
unt

D E D I C A T I O.

unt enixe , tantoque præsidio se indigere , ultro agnoscunt , & palam profitentur. Sive enim illæ ejusmodi sunt , ut Orbis litterati favorem sibi promittere non ausint ; & non apud alios magis , quam Nobilissimos Academiæ Curatores , temeritatis excusatio instituenda erat , quam tanto benignius a Vobis acceptum iri confido , quo magis scopum earum , ad decus Academiæ , & inflammandam juventutem propositum , tum repentinas occasiones , quibus magna illarum pars enata est , cognitas habetis & spectatas. Sive autem illæ ejus sunt generis , ut qualicunque diligentia & varietatis (quæ vilissimis rerum quoque gratiam conciliare solent) laude non indignæ videantur , & rursus nullos habeo , quibus justius eas inscribere debeam , aut lubentius oblatas velim. Vestrum enim , Amplissimi Viri , tam benignum de studiis meis judicium fuit , ut Juris Civilis & Publici professionem , in florentissima hac Academia Vestra , mihi mandare volueritis : cui exornandæ dum omnibus animi & corporis viribus incumbo , aliæque majoris operis & molis , diutius versata , ad prelum paro , id mihi negotii datum esse credidi , ut interrim specimina quædam , ad Juris illius utriusque cognitionem pertinentia , uno fasce complecterer , eaque , ceu totidem pignora animi devoti , & frugum primitias , in fundo Vestro natas , aut collectas , quo par est , cultu & animi submissione , Vobis consecrarem. Non equi-

dem

DEDICATIO:

dem verecundiæ fines patiuntur, ut scribendi, quem in
 iis tenui, morem omneque institutum prolixis verbis ex-
 ponam, qui indies magis magisque, quam curta mihi
 supellex sit, ad res tam arduas recte tractandas, ex-
 perior. Illud autem apud Vos, quibus negotii & otii
 mei ratio reddenda est, profiteri licebit, istam mihi-
 met legem, in omni studiorum ratione, me dixisse: ut
 missis difficilibus nugis, scholæ tantum, non vitæ com-
 paratis, ea maxime, quæ in ipsis rerum obtinent ar-
 gumentis, ex fonte naturæ inexhausto, per varios Gen-
 tium mores, & temporum intervalla confectarer; nun-
 quam vero sanctissimam Juris Publici disciplinam assen-
 tationi donarem: aut juris privati sapientiam mascu-
 lam, nudo verborum infringere cultu. Hæc vero an &
 quousque affectus fuerim, eleganti ter soque judicio Vestro
 submitto, satis persuasus, prima sequentem in secun-
 dis tertiisque consistere, apud Vos honestum censerem.
 Modum sane & viam, qua hætenus usus sum, in Spar-
 ta mea obeunda, non in totum Vobis displicere, testa-
 tum fecit recens illud beneficium, quod liberali manu,
 in me immerentem, contulistis. Huic referendo cum
 impar sim, grati tamen & memoris animi significatio-
 pars quædam remunerationis, rogo, apud Vos existimetur,
 si & calcar simul mihi additum esse sentiat, majora
 audendi, id quod re & opere magis, quam verbis præ-
 stare conabor. Quod si venerationi & observantiæ,
 * 3 quam

D E D I C A T I O.

quam eximia illa virtus, & humanitas Vestra; animo meo impressit, hic indulgere liceret, amplius sese aperiebat campus, in laudum Vestrarum præconia excurrendi. Possem enarrare egregia Urbis Vestrae ornamenta; Rempublicam equis legibus constitutam; civium amorem & prompta obsequia; cultum denique pietatis & justitiæ; quæ anchoræ gravissimæ sunt, quibus navem Reipublicæ firmatis. Sed centies illa jam dicta sunt, & animorum Vestrorum magnitudo encomia, quæ coram fiunt, adspernatur. Illam autem non præteribo gloriam Vestram singularem, quod Musarum domicilium, summa providentia, a majoribus Vestris erectum, plusquam paterno amore fovetis, partaque meritorum opulentia, & numerum & stipendia Professorum augetis. Ut cetera non commemorem, paucos adhuc ante dies, summo omnium plausu, & publica gratulatione, tam egregia ejus Curæ dedistis documenta, ut nullus nostrum, aut exterorum, dubitare possit, Vos instrumenta esse sæculi boni. Et quid, sodes, Amplissimi Viri, nominibus Vestris poterat esse gloriosius? quid publicæ magis conveniebat caritati? quid denique huic loco, natura ad id composito, ut altera velut Massilia, Sedes & Magistra Studiorum esset, accommodatum erat magis? quam illas alere artes divinas, quibus subjectorum animi ad præstantissimas facultates, rectum Dei cultum, & officia

DEDICATIO.

ficia boni civis perducuntur. Fluxa & caduca sunt reliqua humana; ceciderunt porticus, & palatiorum moles, immensis sumtibus, Athenis, & Alexandriae olim ædificatæ: sed litterarum, in Academia & Museo, excultarum monimenta sempiterna sunt, vigentque sæclis innumerabilibus. Deum Opt. Max. supplex veneror, VIRI AMPLISSIMI, ut Vos, Patriæ Vestræ Patres, publicæ rei & litterariæ, salvos diu atque incolumes præstare velit. Is Vos respiciat semper ex alto, & consiliis Vestrīs benedicat; ad Vestræ, Vestrorumque cumulum felicitatis!

Scribebam Trajecti ad Rhe-
nam a. d. xix. Junii
cib. lb. ccxiii.

ELEN.

ELENCHUS DISSERTATIONUM

quæ hac parte continentur.

- I. **D**issertatio Juris Publici Ecclesiastici, de Jure Imperatoris circa electionem Pontificis Romani. Pag. 1
- II. Dissertatio Historico-Juridica, de Nuptiis Consobrinorum. 79
- III. Dissertatio Juris Gentium, de Titulo Imperatoris Russorum. 135
- IV. Dissertatio Theoretico-Practica, de Perpetua feminarum tutela. 192
- V. Dissertatio Juris Publici & privati Romani, de Perjurio per Genium Principis; ad l. XII §. 6. D. de Jurejurando. 249
- VI. Dissertatio Theoretico-Practica, de Præstatione casuum solitorum, insolitorum & insulentissimorum; ad L. LXXVIII. §. f. D. de Contr. emt. & L. XV. §. 2. D. Locati. 295
- VII. Dissertatio Juris Gentium, & juris publici Francorum, de Unctione Remensi. 339
- VIII. Dissertatio Theoretico-Practica, de Usucapione servitutum; ad L. IV. §. 29. D. de Usurpat. & Usucap. 389
- IX. Dissertatio Philologica, de Consulibus qui extra Romam: Antiquitates Romanas & Germanicas illustrans. 437
- X. Dissertatio juris Naturalis & Civilis, de Dolo bono; ad L. I. §. 3. D. de Dolo malo. 496

A C C E D I T.

- I. Oratio Philosophico-Juridica, de Stoica veterum Jurisconsultorum Philosophia. 562
- II. Oratio juris publici Ecclesiastici, de Jure Imperatoris & Statuum Imperii circa sacra. 605
- III. Oratio Juridico-Philosophica, de Vera, non simulata, Jurisconsultorum Philosophia; ad L. 1. pr. D. de Justitia & ju-
re. 661

DISSER-



DISSERTATIO PRIMA,

DE

Jure Imperatoris circa electionem
Pontificis Romani.

Ui non dictus Hylas ? Quis non paululum curiosior de suffragiis Amplissimi Purpuratorum Collegii conjecturam fecit nuper, & nunc de novo Innocentii XIII Pontificatu ex principiis ominatur ? Laborantes vidimus omnium nationum Reges & Principes, ut faventem sibi Præsulem obtinerent. Remis velisque ad apertum Conclave undique festinarunt Cardinales Episcopi, Presbyteri, & Diaconi: ne deficiente diu Ecclesiæ Pastore rapax lupo gregem dominicum invaderet, aut viduata in facultatibus aliquid caperet detrimenti. Fortassis anicula item superstitiosa, vel rerum imperitæ plebs, ferrium quoque concepit votum, ut Orbis gubernacula dignissimo porrigerentur. In sacro autem Senatu ambitus & factionum plena audivimus omnia: unde sollicitudo multorum, ut divinam in hac creatione præsentiam probent, quam ipsis adhuc religionis auctoritas persuasit.

*An Petrus fuerit Romæ, sub judice lis est:
Simonem Romæ nemo fuisse negat.*

A

Ni.

Nihil equidem res ista ad Ediētum Prætoris, nec virium mearum esse, Pontificis mirram, aut galerum Cardinalium disturbare agnosco. Quod si autem tantum ingenii a natura mihi tributum fuerit, ut nuperam Cardinalis Paulucci exclusionem, ab oblivione hominum vindicare, & excellentius jus Carolo VI. Augusto asserere possim; non ignobilem materiam obigisse videbar, in qua excolenda horas subcivicas collocarem. Quemadmodum enim naturæ undas maris & tempestatem effugientes Diis marinis tabellas dicebant, in quibus pericula depicta legebantur: sic non ingratum nec inopportunum, opinor, erit, in hac causa, velut tabula ex maximo naufragio arrepta & servata, jus pristinum Imperatoris circa sacra eorumque summum Antistitem inueneri. Et sane gravissima est quaestio, fueritne Imperatorum Romanorum summos Pontifices creare, vel certe an ii sine Principum confirmatione coronarentur. Qua de re Viri Clar. Jacobus Pamelius ad Cyprianum, Angelus a Nuce ad Leonem Ostiensem, Bellarminus, Baronius & Contringius jam olim varie disseruerunt. A recentioribus autem juris publici scriptoribus, si paucos excipias, levè tantum brachio controversia illa excussa est; sive quod spem omnem juris amissi recuperandi decollare, ideoque frustra niti & laborando odium quærere, sapientis non esse putarunt: sive quod macrobius ille Clemens XI. tamdiu Sedem tenuit, ut annos Petri superaturus videretur, nec huic disputationi daret locum. Omnia equidem, quæ huc pertinent, nobis dicere non licebit; distincte tamen nonnulla delibabimus, & varios hujus electionis modos, ejusque fata præmittemus, quæ rei obscuræ lucem deinde accendant.

*Nec fas ulterius longas nescire ruinas,
Quas mora suspensæ multiplicavit opis!*

CAPUT PRIMUM,

DE

ELECTIONE PONTIFICIS ROMANI.

- §. I. *Electio Pontificum Romanorum multis diffidiis inde à sec. iv. laboravit. II. Etiam tum quum Pontifices summi & Papa plures essent; quorum vocabulorum usus & origo indicatur. III. Ambitus ille auctus, ex quo Romanus aut Pontifex Summus, Papa & Deus factus. IV. Quanta ejus sit, post gravissima damna, potestas in Italia civilis. V. Effectus majestatis ejus spiritualis stupendi. VI. Quanti Imperatoris interfit Papam habere a se non alienum. VII. Clerus Romanus, junctis populi suffragiis, primos Pontifices creavit. VIII. Postea tres modi eligendi, per inspirationem, compromissum & scrutinium. IX. Innocentius II. & Alexander III. electionem ad Cardinales detulerunt. X. De quorum nomine & eminentia selectiora quaedam. XI. Conclavis initia, & leges. XII. Eiusdem vitia, contra Petrum Matthæum. XIII. De nominis mutatione & sede stercoraria. XIV. De Coronatione Papali antiqua & nova.*

§. I.

PLUS semel per hos dies, quum vias ad culmen Pontificatus Romani diversas, tum varias variorum Patrum ex omni Europæ parte concurrentium inclinationes, studia, & affectus consideravi, in mentem venit, quod Cicero de priscis Romanorum comitiis dixit pro Muræna cap. xvi. 1. *Quod fretum, quem Euripum, tot motus, tantas, tam varias habere putatis agitationes fluctuum, quantas perturbationes, & quantos æstus habet ratio comitiorum?* Nullus sane Prophetas & Apostolos legendi in Historia Ecclesiastica talis occurrit modus: nec quicquam in libris sacris de Christi Prorege, aut ejus creatione Deus mandavit. Verum ut reliquorum Episcoporum, sic etiam Romani constitutio prudentiæ humanæ unice relicta, iisdemque vitiis, à multis jam retro sæculis,

A 2

ob-

obnoxia fuit: id quod maxime suspectam reddit divinam ejus institutionem. Enimvero primis ferme annis trecentis, quibus sanguine suo purpurata ut plurimum Ecclesia fuit, sanctis Romanorum Episcopis, sub jugo Tyrannorum, in cryptis & specubus latendum fuit, nec illi isto mundi typho & arrogantia utebantur. Unde Viri integri fide præstantes, & martyrium subire parati, Cleri & populi suffragiis non modo electi; sed & nomine eligendi palam proposito, omnium de eo judicia provocata sunt; quo vel malorum detegerentur crimina, vel merita bonorum prædicerentur. Singularis hanc in rem est Lampridii locus in vita Alexandri Severi cap. xlv. quem integrum appono: *Ubi, inquit, aliquos Imperator voluisset vel Rectores provinciarum dare, vel præpositos facere, vel procuratores, id est rationales ordinare, nomina eorum proponebat: hortans populum, ut si quid haberet criminis, probaret manifestis rebus: si non probasset, subiret pœnam capitis: dicebatque grave esse, quum id Christiani & Judæi facerent, in prædicandis sacerdotibus, qui ordinandi sunt, non fieri in provinciarum Relectoribus, quibus & fortune hominum committerentur & capita. Quam primum autem pax Ecclesiæ fuit reddita, & Reges terræ sceptrum suum Regi Messias submiserunt, inter nitentia culta lappæ & tribuli cœperunt succrescere, & jam medio sæculi quarti, ita sese gesserunt eligentes, ut homines pagani satis cognoverint, Spiritu hujus mundi comitia ista agitari. Ferale ejus specimen in electione Damasi, Pontificis Romani, A. Chr. 367. Valentiniani & Valentis temporibus, observavit Ammianus Marcellinus, gentilis & militaris, sed veritatis studiosissimus scriptor, lib. xxvii. c. 3. cujus verba notatu dignissima describere lubet, ut vulgus nuptia mirari desinat, & nihil novi fieri sub Sole tandem agnoscat. Sunt autem ista: *Damasus & Ursinus supra humanum modum ad rapiendam episcopatus sedem ardentes, scissis studiis asperrime conflictabantur; adusque mortis vulnenumque discrimen adjumenti utriusque progressis: quæ nec corrigere sufficiens Juvantius, nec mollire, co-*
*etus**

Aus vi magna secessit in suburbanum. Et in concertatione superaverat Damasus parte. quæ ei favebat, instante. Constat. que in basilica Sisinii. ubi ritus Christiani est conventiculum; uno die centum triginta septem reperta cadavera peremtorum, efferatamque diu plebem agro postea delin-tam. Ne vero posteris mirabile videretur, in re sacra ad cælem perventum esse, causas addit, a fastu, ambitione & insatiabili habendi studio petitas: Neque ego, pergit, abnuo, ostentationem rerum considerans urbanarum, hujus rei cupidos ob impetrandum, quod appetunt, omni contentione laterum jurgari debere: cum id adepti, futuri sint ita securi, ut ditentur oblationibus matronarum, procedantque vehiculis insidentes, circumspice vestiti, epulas curantes profusas, adeo ut eorum convivia regales superent mensas. Qui esse poterant beati revera, si magnitudine Urbis despecta, quam vitiis opponunt, ad imitationem Antistitum quorundam p ovinculium viverent: quos tenuitas edendi potandique parcissime, vilitas etiam indumentorum, & supercilia humum spectantia, perpetuo numini, verisque ejus cultoribus, ut patros commendant & verecundos.

§. II.

Quod si ergo in simpulo illo dignitatis, omni jurisdictione destitutæ, jam tot fluctus excitati, non est cur in partium studia declamitemus, ubi de mari Ægeo & immensa ista majestate conferenda nunc deliberatum. Nullus temporibus istis hujusmodi primatus universalis, vel, ut quidam non inscite vocat, Totatus erat: sed quemadmodum singulis gregibus sui pastores, sic urbis Romæ episcopus limites suæ Ecclesiæ non egrediebatur. Sæculo secundo, fatcor, jam caput extollere cœperunt Pontifices Romani, ceu Petri in sede Apostolica successores; martyrii, orthodoxias & sapientiæ laude clari. Sed prærogativa illa ultra Cathedræ honorem & dogmata quædam non protendebatur. In Romana Ecclesia Apostolicæ Cathedræ semper viguit principatus, ait Augustinus epist 162. Jam dudum ante hunc Irenæus, Lugdunensium episcopus, lib. 111. c. 3. asseruerat, omnem Ec-

clesiam huc convenire debere, *propter potentiorē principalitatem*, Urbis pura & traditionum. *Ob dignitatem Romanæ civitatis*, inquit Theodosius Nov. 24. *Intuitu Regiæ Urbis*, Leo & Anthemius AA. dixerunt in l. 16. C. de SS. Ecclesiis. Atque isthæc dignitas loci secularis, privilegia, honores, & jus ante alios residendi Episcopatui cohærens effecit, ut nonnulli studio fraudulenti artis irreperant, auctore Constantio in l. 49. C. Th de Decurion. Nec alia cauta, Symmachus Papa, sæculo quinto, studia diversa commemoravit eorum, de quibus certamen propter Pontificatum emerferat, ut fieri solet, inquit can. 10. Dist. 79. Crevit postea ambitus, quum Justinianus sanctissimum veteris Romæ Pontificem caput esse omnium sacerdotum sancivit, ejusque Ecclesiæ *regenda* & ordinis principatum firmavit, l. 8. C. de Summ. trin. Nov. 131. c. 2. Scilicet jam inde ab Apostolorum temporibus blanda dominandi cupido invaserat animos Episcoporum, ut partim ex antiquitate Ecclesiarum aut civitatum, partim vero ex Imperatorum, Regum, Pontificum privilegiis, etiam ex sola consuetudine prerogativæ peterentur. Cumque canone 17. concilii Chalcedonensis sancitum erat, civilibus & politicis formis ecclesiasticarum paræciarum ordinem conformari debere, differentia inter urbes metropoles, magnas & minores ab Antonino Pio in l. 6. §. 2. D. de Excus. tradita, apud Episcopos observata est: ut metropolitanus præ ceteris emereret, titulo Pontificis Summi vel Maximi: qui aliquot provinciis præpositi Archiepiscopi; & denique qui plurium metropolitanorum præfuiatum tenebant, Patriarchæ dicerentur; id quod ex Sidonio Apollinare aliisque erudite post Usserium docuit Norisius de quinta Synodo pag. 76. Nec tamen hisce Patriarchis, nedum uni Pontifici Romano, tota Ecclesia subiecta fuit, quod Cardinalis Peronius se unum observasse jactabat; dudum confossus & explosus ab eruditis, præsertim Gallis, qui canonem sextum Concilii Nicæni illustrarunt. Unusquisque enim gregis universi portionem sibi adscriptam regebat, actus sui rationem soli

solī Domino redditurus. *Episcopatus unus est, cujus à singulis in solidum pars tenetur*, scribit Cyprianus de Unitate Ecclesiæ. Hinc mos ille diu stetit, ut Archiepiscopi omnes, Pontifices Summi, Maximi, Archipontifices, vel Archipræsules dicerentur. Hildebaldus *Colonienſis Archipontifex* legitur in vita S. Ludgeri cap. xxi. Wittichindus lib. 11. Ann. incunte *summi Pontificatus Moguntiacæ sedis fastigium* memorat, & Hilbertum Archiepiscopum, *Pontificem maximum* vocat; per Germaniam scilicet primam, cujus Primas erat & metropolitānus. Sic Episcopi & clerici olim indistincte *Papæ*, & Archipresbyteri *Protopapæ* dicti, apud Cyprianum, Tertullianum, Gregorium Turonensem & Walafridum Strabonem: idque imitatione gentilium, quorum PATRES. SACRORUM, canitie pariter ac munere venerandi apud suos, ex inscriptionibus noti. Nam *πάτερ* Syracusiis patrem significat, ut Suidas docuit, & *πάτερ* apud Homerum est vox infantum, qui patrem vocant, Iliad. E. Latinis nutritorem notat, vel pædagogum seniore, à *pappa* cibo puerili; sicut mammatæ matres & nutrices, infantum lallantium voce, *Mammæ* apud Græcos & Latinos dictæ. *Prægustet pocula pappas* cecinit Juvenalis sat. vi. *Pappos aristasque trimentes* habet Aufonius Protrep. Vide Casaubon. ad Persii sat. 3. J. F. Gronov. ad Senec. 11. contr. 9. & Meurs. Glossar. voce *πάτερ*. Nugas aliorum de hac voce Corasius collegit lib. v. Misc. c. 15.

§. III.

Per octo autem, & quod excurrit, sæcula in evchenda Sedis Romanæ auctoritate exinde deludatum est, quæ sæculo undecimo exeunte ad summum pervenit. Tum enim Hildebrandus, Pontitex Romanus, summo Gregorii VII. nomine, armis Normannorum fretus, & opibus ac familiaritate Mathildis, Hetruriæ ducissæ potentissimæ, confusus, maximam illam & toti terrarum orbi tremendam majestatem sibi suisque successoribus acquisivit. Is omnes, quotquot fuerunt, sacerdotes longo post. & reliquit intervallo; five

sive Prophetas & Apostolos, sive summum Pontificem in Theocratia Judaica, sive Græcorum Asiarchas, aut Druidas Gallorum vel Muttios Mahumetistarum spectes. Huic uni Ecclesia Romana acceptum ferre debet, quod tot divitiis & profana ditione locupletata, Imperatores, Reges, & Principes Christianos non tantum excommunicare, sed & solio dejicere aula est, exemplo nullibi terrarum audito. Nisi fortan excipias barbarorum Meroënsium sacerdotes, quorum tam effrena fuit auctoritas, ut missō nuncio mortem Regi tuo nonnunquam imperarent, & alium ei sufficerent, auctore Strabone lib. xvii. Ab hoc Hildebrando præcipiti gradu omnia in pejus versa sunt. Nomen Imperatoris, ob investituram per anulum & baculum indigne extortam, odiosum erat, nec in diplomatibus Pontificiis amplius legabatur. Contra Episcopi *Dei & Apostolicæ Sedis gratia* se profitebantur, & *majestatis* compellatio Romano Pontifici ardebat. Nunc evecti Cardinales: nunc etiam *Summi Sacerdotis & papæ* nomen Archiepiscopis abrogari, solique Romano vindicari cœpit. Siricius Pontifex Romanus primus sese *Papam* appellarat. Leo sanctus se modo *Episcopum*, modo *Papam*, sed *Urbis*, vel *Ecclesiæ Catholice urbis Romæ*, ut in epistola xxvi. ad Theodosium Augustum, vocatur: post hinc vero Romanus, seu nullis regionibus & terminis definitus, *universalis vel Catholice Ecclesiæ Pontifex* passim nominatur. Refert Baronius in martyrol. ad 10 Jan. eundem Hildebrandum in Synodo Romana A. C. 1073. inter alia statuisse, ut Papæ nomen unicum esset in universo orbe Christiano, nec liceret alicui se ipsum vel alium eo nomine appellare. Id quod etsi non omni exceptione videatur esse majus: certum tamen est, nunc maxime invaluisse, ut Patriarcha Romanus κατ' ἐξουσίαν Pontifex Maximus, Papa & Pater patrum vocaretur. Pariter ac Justinus Paulum Apostolum πατὴρ πατέρων appellavit: vel potius, ut Jupiter a Bithyniis πατήρ, a Scythis Παπῆς dictus; & Capitolino Jovi Patris nomen Romani dederunt, auctore Virgilio 1. Georg.

Georg. 282. Satis enim erecta rum Sacerdotii majestate, Vaticanus ille Jupiter, secundum Hildebrandi Dictatus, non modo ut Episcoporum Episcopus summis honoribus cultus; sed idem quoque, ut Rex Regum, & dominus dominantium in summas qualvis potestates, earumque vitam, regna & subditos auctoritatem suam extendit; tanto illis superior, quanto Sol Luna est, *cap. solitæ 6. X. de Majorit. & obed.* Neque is fuit impudentiæ finis: nam & Deum se a Constantino appellatum gloriatur, *can. 7. Dist. 96.* nec gloriatur tantum; sed revera ut Deus hominum conscientis imperavit, ligandi & solvendi potestate sibi assera; quam & greges monachorum mendicantium, queis thronus ille fulcitur, aliique fastus proxeneræ jugiter ipsi vindicarunt. *Papa est Deus in terris*, ait Baldus in *l. ult. C. Sent. resc. non posse.* Futilem hanc & thraſonicam arrogantiam alii, quidem, Christi modestiæ & præceptorum memores, Cynico *Servi Servorum* titulo incrustare voluerunt: quem primus modestiæ causa assumpsit Augustinus, Doctor Ecclesiæ maximus; sed quem etiam Gregorius Magnus Johanni Patriarchæ Constantinopolitano, œcumenicum se vocanti, opposuit; nimis superbum esse ratus, unum Ecclesiæ Episcopum esse ceteros quasi vicarios ejus censeri. Quin omnibus sanæ mentis risum jam diu debuit ille titulus, cum quilibet peponem pro corde non habens videat, hunc viæ necisque æternæ arbitrum, Dei vice in terris fungi, sicque revelatum esse hominem illum peccati, & filium perditionis: qui sese efferet supra id quod dicitur Deus, aut Numen: adeo ut in templo Dei, tanquam Deus sedeat, ostentans se, quasi Deus sit. Pauli verba sunt 11 Thess. 11. 2: licet Hugo Grotius ea ad Cajum Caligulam retulerit; qui teste Josepho, Philone ac Dione Cassio, Deum se credi, sibi que supplicationes ac sacra fieri jussit. Quicquid ejus est, puto liquere, cur sæculo undecimo & sequentibus, vi pecuniarum & malis artibus, tot grassati fuerint ad illum Vicedatum consequendum; profusus ac Judæi antea sacerdotium summum a Præsidibus Romanis nundinabantur.

De Benedicto IX. A. 1033. ad Pontificatum erecto, Glaber Rodolphus æqualis scribit lib. iv. c. 5. *Universalis Papa Romanus, puer ferme decennis, intercedente thesaurorum pecunia, electus extitit a Romanis.* De Gregorio VI qui Benedictum excepit, idem narrat Victor III. in dialogis lib. 3. & Angelus de Nuce ad Chron. Casin. n. 1146. De aliis id genus monstris alii: ut pateat, cur in concilio Lateranensi quod Romæ A. 1059. habitum, cavendum fuerit, *ne venalitatis morbus obrepas in Pontificis Romani electione, c. 1. dist. 23.* Et quam vere Bernardus lib. iv. de confid. ad Eugenium cap. 1. hosce mores atro carbone notarit: *Quem dabis mihi, quærens, de tota hac maxima Urbe, quæ in Episcopam receperit pretio, seu spe pietii non interveniente?*

§. IV.

Stetit & in maximos auctus diffusa est nimia ista Pontificum monarchia, donec Concilium Constantiense, divino prorsus consilio, jugulum Hildebrandisni petiit: & Reformatio deinde magnam ejus partem destructum ivit, cum indulgentiarum fumo. In Gallia omnis in clericum potestas ei crepta est, pragmatica sanctione, cujus formulam Ill. Leibnitio in mantissa Codicis diplomatici debemus. Nemo quoque, nisi in temporum historiis sit hospes, memorabilem ignorat Ludovici XII. nummum, cum elogio ex Esaiæ xiv. 22. desumpto: *Ecce nomen Babylonis*, pro quo *Babylonis* legi contendit Harduinus Op. pag. 908. ab aliis jam reprehensus. Anglorum Rex Henricus VIII. idem qui edito contra Lutherum libro, titulum Defensoris fidei a Leone X. meruerat, mox exclusa Papali potestate se ipsum Ecclesiæ illius regni principem constituit. Belgas Fœderatos cum jugo Hispanico auctoritatem Papalem excussisse, immo, jam ante Fœdus illud sacrum, omnia banna & evocationes Romanas ditionibus suis arcuisse, notius est, quam ut commemorari debeat. Franciscus de Salgado Hispanus, de non admittendis Papæ legibus sine Regum consensu, libellum scripsit; nec ulla lex Papalis in Hispania valet, nisi

Rex

Rex subscripserit, placere : pareatur. Germaniæ denique Principes Protestantes, spoliis suis dudum repetitis, omne imperium sacrum, Pace Religiosa & Westphalia firmatum tenent; atque apud Pontificios quoque Imperii Status dudum proverbio locus factus: *Bullam non transire Alpes*. Divina interim delictorum vindicta mentes multorum adhuc occupantur caligine vanitatis; quæ satis idonea est eos percellere, ad infimum servitutis gradum perferendum. Livius de Bacchanalibus loquens, nihil, monuit, in speciem fallacius esse, quam prava religio, quum Deorum numen præereditur sceleribus: subit enim animos timor, ne fraudibus humanis vindicandis divini juris aliquid immixtum violetur. Post tantam enim jacturam duplici adhuc gladio Pontifex est armatus, altero spiritali excommunicationis, altero temporali, potentia propriæ & aliorum. Potentioribus blandæ palpum obrudit; infirmiores ob remunerandi materiam habet ad nutum, adjutus ubique opera Cleri, tertiam Euxoræ partem possidentis. Non sine stupore legi potest Eugubinus de temporali Ecclesiæ monarchia & jurisdictione: tot arces, castella, urbes munitas; quin integros comitatus & ducatus, in nobilissimo orbis oculo, Papa possidet, omnium rerum bonarum proventu abundantes. Horum populus avaræ habetur, variisque tributis & spurcis vestigalibus emungitur: unde nullibi minor in Principem amor aut veneratio; & Petrus Pichæus suo tempore recte notavit: Italorum partem maximam Pontificem Romanum, non uti Deum aliquem, aut Dei Vicarium, ob fulmina illa, quibus jam pene totus inermis est; sed ut Principem viris, armis, urbibus, castellis, foederibusque potentissimum revereri & observare. Notus Romæ est Nepotismus. Quum enim prius instituto senes tantum eligantur Petri successores, nullumque electo competat, in designando successore arbitrium; unusquisque Paparum quo minus viæ superest, eo majus sibi suæque familiæ viaticum quærit. Omnium, quotquot hæcenus numeramus; ducentorum septem & quadraginta

Antistitum ætas si evolvatur, non nisi octodecim reperiemus excessisse annos quindecim: ex iisque solum Silvestrum I. Hadrianum I. Alexandrum III. Urbanum VIII. & Clementem XI. annos viginti. Unus Benedictus XIII. annos quinque & viginti superavit, sed a plerisque ex albo Pontificum expunctus. Porro Fiscus Curia Romanæ, non unius Italiae, sed Europæ universæ, propter Pallia, & mille dispensationum vel confirmationum formas, vorago & gurgres insatiabilis est. Adeo ut Cinus Sigisbuldus ante annos quadringentos jam scripserit: *Curia Papæ summopere vellet, ut totus mundus in eam insueret: tanta est in ea argenti & auri sacra fames.* Non utriusque tantum Siciliae, sed plerorumque Occidentis regnorum sese dominum directum jactare audet: postquam fabula donationis Constantini fundamenta jecit principatus sæcularis; quem Pipinus & Carolus M. inconsulta liberalitate sua auxerunt. Olim non erat sic! nec ab re quæsitivus Guntherus noster lib. vi. 62.

*Num Petrus? aut Clemens? num cetera turba priorum
Sceptra Latina dabat? Romanus, tempore prisco,
Pauper erat Præsul; Regali munere crevit.*

§. V.

Longe autem major, immo sine exemplo est altera, quam venditat, Ecclesiastica majestas: quæ non in sacris modo, sed & profanis, dum vel oblique religionem contingunt, arrogantem illam Hierarchiam tuctur, divinæ institutionis prætextu. Isaacus Casaubonus in fragmento libri de libertate ecclesiastica, tria ejus præcipua notavit capita: Pontificis Romani supra omnes seculares dignitates imperium: Ecclesiasticorum ab omni potestate civili exemptionem: & Laicorum ad quodvis illorum obsequium subjectionem. Sic enim censent Romani, unius Reip. Christianæ Papam unum esse principem; a quo Reges, velut clientes, omnia sua precario possideant. Illi soli vicarium munus à Christo esse commissum, ut omnem Ecclesiam regat, ejusque bona, leges, ministros, Prælatos & Episcopos architectonice gubernet.

net. Unicum illum fidei *δακτυλόν*, & falli nescium arbitrum esse, exorientium omnium controversiarum; qui quicquid ubivis jurium est, in scrinio pectoris habeat, & judicet omnia, etiam per saltum, mediis judicibus præteritis, ipse *αντιστοιχος και αποκλογιστος* à nemine judicetur c. 7. X. de appellat. c. 1. de constit. in 6. c. sollicitæ 6. X. & c. unam sanctam extrav. de majorit. & obed. Gravi parrhesia hunc thrafonismum Cujacius aliquæ Pontificii castigant, & lepide Duarenus: *Gregorius*, inquit, *forte cum illa scribebat, multa bona jura habebat in scrinio pectoris sui. id est ventris sui. ut accidit bonis Patribus, cum bene pransi sunt. ad tit. C. ubi & apud quem cogn. rest. in int. pag. 120* Hac tamen potestate fretus, exemplo gentilium Cybeles Sacerdotum, mercede meret religiones, & ex indulgentiarum umbra versute lucrum capiat; quod ipse Lucianus in profanis risit, & Patrès Concilii Antiocheni, in Pauli Samosatani condemnatione, suis coloribus variegatum, & artificii penicillo expressum detestati sunt. Isto namque clavium Petri abusu, nox peccatis & fraudibus nubes objicitur; dum accepti sunt orantes: *pulchra Laverna! Da mihi fallere, da justum sanctumque videri.* Ex eadem auctoritate spirituali in reluctantes quosvis Imperatores, Reges, Principes, Respublicas & privatos diu vibravit fulmen excommunicationis Capitolinum, & capita hæreticorum diris devovit; haud dissimili pœnarum genere, quo Druidas Gallorum in illa cæcitatís nocte usos esse. scribit Cæsar de B. G. lib. vi. c. 13. Unde maximi Reges, tanti mali metu, stapedis lorum ei tenere, & religiosa ceremony pedis osculo cum venerari maluerunt; quum ipse nulli horum assurgat, nulli mortalium reverentiam faciat, phrasi Ceremonialis Romani. Huc pertinet, quod Anastasius Bibliothecarius de vitis Pontificum passim gloriatur, & Carolus du Frene in notis ad Cinnamum pag 470. pluribus exemplis confirmat, non modo Angliæ, Galliæ & Longobardiæ Reges, Principesque Christianos; sed Imperatores Orientales & Occidentales ea religione in Romanam

Ecclesiam fuisse, ut Pontificibus venientibus pedites occurrerent, eos adorarent, & Siratorum munia adimplerent. Vere & ex temporum superstitione! Illud autem non fero, quod addit, Germanicæ stirpis Augustos non ex mera pietate, verum necessario munere, strepam tenuisse, quia clientum & vasallorum officium hoc fuerit peculiare. Rectius longe Joannes Cinnamus lib. v. c. 10. judicavit, sic adulterari Imperatoriam Majestatem, adeoque Papam alloquitur: *Quomodo o bone, & unde tibi in mentem venit Romanorum uti Imperatoribus equisonum & stratorum vice? Haud minorem fastum pedis osculum sapit, Imperatoribus & Regibus, non permissum tantum, sed cum contemptu imperatum* Quamquam enim Erycius Puteanus Hist. Insul. lib. 111. c. xi. silere jussit linguas obstrepentium ceremoniæ priscæ, qua Magni Principes, Constantinus, Justinianus & Carolus sceptræ suæ humana divinis subjacere testati sint. Nimis tamen liquet, perinde esse focculum osculandum porrigere, ac calceum cum clavis in os impegnisse. Quapropter longe prætulerim judicium hominis ethnici, de ludibrio naturæ, Cajo Caligula, quem antea diximus honores sibi divinos arrogasse; is enim quia sinistrum pedem Pompejo Pennæ, propter vitam datam, osculandum præbuerat, Seneca lib. 11. de Ben. c. 12. ita scribit: *Qui excusant & negant id insolentiæ causa factum, ajunt focculum auratum, imo aureum, margaritis distinctum, ostendere eum voluisse. Ita prorsus: Quid hic contumeliosum est, si vir consularis aurum & margaritas osculatus est; & alioquin nullam partem in corpore ejus electurus, quam purius oscularetur? Homo natus in hoc, ut mores liberæ civitatis Persica servitute mutaret: parum judicavit, si Senator senex, summis usus honoribus in conspectu principum supplex sibi eo more jacuisset, quo victi hostes victoribus jacuere: invenit aliquid infra genua, quo libertatem detruderet. Non hoc est rempublicam calcare? & quidem dicit aliquis (nam potest ad rem pertinere) sinistro pede. Parum enim fœde furioseque insolens fuerat, qui de capite consularis viri focca-*

tus

tus audiebat, nisi in os Senatoris ingressisset Imperator epigros suos Verum ita est: nunquam in superbia magnæ fortunæ ibi consistunt exempla, ubi cœperunt; sed gradus à parvis ad majora fit; præsertim ubi præmiorum amplissimorum, divinarum atque humanarum rerum expectatio blanditur; quorum arbitrum & distributorem Pontifex se dudum esse affectavit. Non alio sane titulo Lusitani Indiam orientalem, aut novum orbem Hispani sibi solis vindicare conati sunt, quam donationis, a Nicolao V. & Alexandro VI. de Apostolicæ potestatis plenitudine, obtentæ, bullis illis enormibus apud Leibnitium Cod. jur. gent. dipl. n. 165. & 203. quas vanitatis convicit Grotius de mari libero c. 6. & 10. Recte Guntherus lib. vi. Ligurini 3. o.

*Ecce paterna fides, & magni Præsulis alma
Integritas, humilisque Petri vestigia sectans;
Jam non ferre crucem Domini, sed tradere regna
Gaudet, & Augustus mavult, quam Præsul haberi.*

s. VI.

Ex quibus liquere arbitror, quantum interfit Regum universæ Europæ, Papam habere moderatum, & a rebus suis non alienum. Per istas enim, de amplissima illa spirituali & temporali dominatione, doctrinas Principibus Romanis, nihil amplius, quam obsequii gloria relinquitur. Nullius autem res magis in electione agitur, quam Imperatoris Romano-Germanici: siue terras ejus in Italia hereditarias, siue Imperii majestatem spectes. Unus est Papa, qui a temporibus Henrici II. fidelitatis jusjurandum, & promissionem obedientiæ ab Imperatore, tanquam vasallo suo, exigere ausus est. Bonifacius VIII. Ego sum Cæsar & Pontifex superbe dixit; Julius II. Cæsar & Imperatoris titulum affectavit; Cælestinus III. coronam Imperialem ignominiosissime, non manuum, sed pedum opera imposuit Henrico, & pedibus iterum ab ejus vertice per ludibrium dejecit. Quod factum immane mirum est probari Barónio Cardinali ad A. MCXCI. immemori frigida rationis, qua antea in A. MCLXXVII. narra-

raiuunculam, de collo Friderici I. supplicis calcato, pro fabula habuerat; quod turgens fastu facinus à tanti Vicarii mansuetudine ipsi abhorrere videbatur: procul dubio & hanc rem tuiturus, si eam putasset gestam fuisse: quam puram putam calumniam esse, in odium Germanorum confectam, Reinesius ad Rupertum epist. 57. & Rupertus ad Besoldum c. 18 docuerunt. Illud constat inter omnes, neque Innocentium III. nec Adrianum IV. asserere veritos esse, nomen Imperatoris, & primum ejus inter Principes Christianos locum, Pontificiæ Sedi deberi: cui examen quoque electionis competat, & electi approbandi vel rejiciendi, approbati vero ungendi & coronandi facultas. *can. In nomine domini dist. 23. clem. Romani de Jurejurando c. Venerabilis m. 34. X de Electione.* Scilicet vitium, quod coalitis civitatibus familiare est, ut unius jura ad aliam trahantur, idem & regnum Teutonicum afflixit; partim astu Pontificum, partim imperitia juris publici, quod ante Reformationem nullum habuit lumen litterarum. Atque utinam Otho I. Imperium in Romam & regnum Italiæ cum Germania nunquam conjunxisset! Colore enim coronationis Romanæ in Cæsares Patronos, Papæ clientes sensim potestatem usurparunt; vulgique invaluit opinio, Augustos ad horum regiam, velut Imperii matrem, rationes suas potissimum referre debere. Inde axioma illud vulgatum, ad quod magna pars annalium Baronii refertur: à Pontifice Romano tam facile & institui & destitui posse Imperatorum, quam descendit imber, cum pluit. Et quis nescit hunc Servorum servum plus semel sibi facultatem summissee, Imperatores ex altissimo dignitatis gradu precipitandi? id quod Henrici IV. Friderici II. & Ludovici Bavari exempla testantur. Immo sui juris esse deponere Imperatorem, & subditos absolvere à jurejurando, insinuat Innocentius *disto cap. 24.* & alii in *can. nos sanctorum 15. qu. 6 cap. ad Apostolicæ de re jud. in 6.* idem profiteri non erubescunt. Nulli præterea incognita est arrogantia Clementis V. qui Imperii Vicariatum, tempore interregni, publica

blica constitutione sibi asserere non dubitavit, *Clem. Pastoralis §. fin. de re jud.* id quod etiam repetiit Johannes XXII. *Extravag. si fratrum. Ne sede vacante*, cujus patrocinium Hugo Grotius suscepit, tum quando exul apud Gallos fortunam novercam habebat; egregium vero, cum aliis Pontificiis parafitis, tulit præmium, ut *Grotianus sctus de Jure Belli & Pacis* Romæ publico decreto indicis expurgatorio infereretur. Quid? Carolus V. quum sceptrum deponens Imperium resignarat in manus Electorum, a quibus acceperat, annon rem improbavit Paulus IV. quod sua auctoritas non intervenisset? cui, si Diis placet, claves celestis ac terreni Imperii creditæ sint, sine quibus nec Carolus legitime imperio solutus, nec Ferdinandus recte in imperium successerit, ut narrat Thuanus lib. XXI. pag. 628. Et neminem denique latet, diu hoc saxum volvisse Curiam Romanam, ut Electores sua duntaxat auctoritate instituarentur: quem in finem Bellarminus & Baronius fabulam sparserunt, quæ in communem abiit opinionem, Septemviros jus suum beneficio Gregorii V. vel Innocentii IV. accepisse: quod figmentum Johannes Stabius primum detexit, & late Onuphrius de com. Imp. c. 6. refutavit. Quid multa? Nullum genus hominum à condito hoc universo extitit, quod Imperatoris Majestatem, & augusta Electorum Principumve jura contemserit superbius, & gravius afflixerit, quàm Pontifex ille Romanus: potissimum quando Heroes illi jura sua in Italiam vindicarunt. Simon Schardius librum singularem, plenum animi, de perfidia ac tyrannide Pontificum Romanorum adversus Imperatores scripsit. Guicciardinus in comm. pol. adagium trium refert: *Proprium Ecclesie esse, Cæsares timere & odisse*. Quibus invidiæ stimulis adversus Fridericum I. exarserit Hadrianus in Ligurino Guntherus memoravit lib. IX. v. 105. Fridericus II. apud Petrum de Vincis lib. 1. epist. 31. scribebat: *Revera Imperialis felicitas papali semper impugnatur invidia*. Sed maxime memorabilis est libellus Ulrici de Hutten, Equitis Franci, apud Goldastum & Cl. Burchardum

in ejus vita parte post. p. 134. quo longas Paparum injurias Carolo V. in memoriam revocat, & in primis avi ejus Maximiliani I. querelam, dignam quæ ibidem ab omnibus Germanis legitur. Hæc itaque ac innumera alia majorum suorum fata edocti, Leopoldus & Josephus, gloriosissimæ memoriæ Imperatores, jura sua in ducatum Parmensem, Pacentinum & Ferrariensem, aliasque territorii Italici partes, tum etiam jus primatiarum precum adversus Clementem XI. ducto exercitui, asseruerunt. Horum quoque vestigia, gloriosa æmulatione, nuper premens Carolus VI. Augustus, Cardinalem Pauluccium ex ordine Candidatorum Pontificatus exclusum voluit. De voto & jure exclusivo in Conclavi, librum elegantissimum Gabriel a Darzo Hispanus scripsit; quia hæc semper Hispanorum arcana fuit ratio, ut non facile paterentur eligi Papam, a quo sibi metuendum esset propter regnum Neapolitanum. Nobis curæ erit ostendere, plus potuisse Imperatorem: saltem ipsum meliore jure, hunc e numero eligendorum excusasse, quam olim Galliæ & Hispaniarum Reges lucos à præsepibus arcuere.

§ VII.

Hæc neque extra oleas prorsus, præmittere visum fuit; partim ut de momento causæ constaret, partim etiam ut is, de cujus electione quærimus, per omnia cognosceretur. Nunc age fata electionis, per varia temporum intervalla, ab ovo repetamus. Fuit apud Athenienses singularis Magistratus & Sacrorum præfectos constituendi modus per *χειροτονίαν*; quando populus universus dextræ sublatione & acclamatione rectorem designabat, qui *χειροτονήτης* dicebatur: quæ de re Petitus de LL. Attic. pag. 196. 220. & Pfeiffer lib. 11. Antiq. Græc. c. 5. fusius egerunt. Cicero Græcorum illa psephismata *porrigenda manu, profundendoque clamore multitudinis* facta ait pro Flacco c. vi. & apud Helychium *χειροτονία, ἐκλογή* explicatur. Item vero modus in Ecclesiam receptus videtur, Paulo & Barnaba, per singulas civitates, populi suffragio, ordinantibus presbyteros: *χειροτονήσαντες αὐτοὺς*

αἱρε-

καὶ ὅτι κατ' ἐκκλησίαι, Aëtor. xiv. 23. minimum illa Concilii Laodicensi verba can. 5. περί τῶ, μή διὰ τὰς χειροτονίας ἐπὶ παρόντι ἀκροαμένοι γινώσκαι. *Quod non oportet Electiones fieri in praesentia audientium*, eo referuntur apud Zonaram & Theodorum Balsamonem ad can. 1. pseudo Apost. Sed quia chierotonia vocabulum, pariter ac τὸ χειροτονῆναι & χειροτονεῖν, jam Apostolorum ævo, à prima & propria nozione deflecterat, ita ut interdum quamvis designationem, electionem & renunciationem; aliquando consecrationem, ordinationem & sacram inaugurationem significaret; idcirco V. Cl. Conradus Samuel Schurtzfleischius disp. 90. post Seldenum lib. 1. de Synedriis c. 14. & Hammondum ad Nov. Test. χειροτονία apud Lucam idem esse voluit, quod Titus ep. 1. v. 5. καθιστάναι vocat: χειροτονίας autem in canone laudato, secus quam Justellus, inaugurationes sacras interpretatur. Quicquid ejus est, si non sublati palmis suffragia tulerunt primi Christiani, reipsa tamen civium vota, testimonia populorum & honoratorum arbitria in electionibus Episcoporum requirebantur; sola tantum plebis sæce exclusa, ut ex voce ὁχλοῦς in can. xiiii. ejusdem concilii Laodicensi patet. Perinde enim ac Quirites Pontifices suos majores & minores in comitiis curiatis creabant, & decuriones ac sacerdotes municipiorum POSTULANTE POPULO, vel EX POSTULATIONE POPULI facti dicuntur apud Gruterum pag. 431. & 483. Sic quoque cœteribus fidelium in primitiva Ecclesia invitis non obtrudendus videbatur Episcopus, cujus nec amor, nec æstimatio: quandoquidem nil magis naturale est, quam ut qui præsuturus est omnibus, ab omnibus eligatur, aiebat Leo Magnus in epistolis. Certe populi consensus in Occidente, ad extremum usque sæculi duodecimi, in Episcoporum electione necessarius fuit; sic tamen ut populus subesset moderationi & regimini metropolitani; quemadmodum Athenis πρεσβυτεροι popularibus suffragiis præerant, & per ἀνακριται in Candidatorum mores inquirebatur, ut Pollux docere potest. Plebis autem suffragium non modo negati-

vum fuit, & in nuda comprobatione electionis jam factæ situm, ut quidam ex Cypriani verbis *præsente populo vel assistente plebe* collegerunt, sed excellentius & plenum, prout ex ejusdem Cypriani epistolis 24. 33. & 42. liquet, ac Cælestinus Papa epist. ad Episc. Narbon. prov. c. 5. non obticere innuit: *Nullus, ait, invitis detur Episcopus: Cleri, plebis & ordinis consensus requiratur*: idque variis argumentis Blondellus de jure plebis in regim. eccl. demonstravit. Apud ipsum Gratianum quædam moris ejus vestigia *can. 5. Dist. 51. can. 13. Dist. 61. cap. factus 7. qu. 1.* Nec aliunde, primis Ecclesiæ sæculis, enata fuerunt schiltmata inter Cornelium Pontificem & Novatum, inter Liberium & Felicem, Bonifacium inter & Eulalium, quam quia clerus & populus in diversa ibant, ut vidimus ex Ammiano Marcellino. Quinimo formulæ litterarum, quibus summi Pontificis confirmatio ab Exarchis Italiæ petebatur, sæculo vi. & sequentibus, satis loquuntur, populum non solum assensus, aut ferendi de probitate electi Papæ testimonii gratia, sed ut vere cum eligerent, convocatum esse: unde in libro illo diurno Pontificum Romanorum, quem Garnerius in lucem produxit, quemque Mabillon. p. 2. Musci Ital. supplevit, legitur: *Similiter totus Clerus, cum Optimatibus & Militibus seu civibus subscripserunt.* Isque mos usque ad sæculum decimum ac undecimum duravit: Agapeto enim A. 956. defuncto: *omnes Romani uno consensu unaque voluntate Clerici atque laici rogarunt Imperatorem Othonem I., ut Sanctæ Matri Ecclesiæ dignum tribueret Pontificem & pium Rectorem. Factaque sic postulatione atque petitione, universus populus tale à Domino Imperatore accepit responsum: Eligite qui dignus sit, & ego libentissime eum vobis concedam. Statimque a cunctis tam Clericis quam Laicis electus & expetitus est Leo &c.* verba sunt Petri Bibliothecarii in vita Joh. xi. Similiter Gerardus Florentinus Episcopus A. 1059. consentientibus Optimatibus Romanorum, Senis electus, & adscito Nicolai II. nomine, à Cle-

ro Romano & Populo Apostolica Sede inthronizatus est, auctore Petro Casinenſi lib. 111. Chronici cap 13.

§. VIII.

In univerſum triplex fuit forma electionis canonica, Gregorio etiam XV. in Ceremoniali conclavis Papalis probata: per *inſpirationem*, per *compromiſſum*, & per *ſcrutinium*, c. 42. X. de Elect. Per *inſpirationem* eligebatur, in quem omnes, nullo præcedente tractatu, quali divino ſpiritu aſſati conſentiebant. Hic modus ortum duxit ex *χριſποτενία*, quando non deliberatione longa, nec moroſa ſuffragiorum trutina, ſed impetu & velut manibus elatis, ut diximus, aut clamore ſubitaneo populus aſſenſum teſtificabatur. *Cunctique profanas porrexere manus*, Claudianus cecinit; & Corrippus: *Emitunt pariter dexteras, pariterque remittunt*. Talis fuit Fabiani electio, Ambroſii, Auguſtini, Hieronymi & aliorum. Talis etiam electio Epifcopi Trajectini, Theodorici de Are, quem *tota Eccleſia divinitus inſpirata, ex improviſo, nemine petente vel promovente a. 1201. in epifcopum elegit*. verba ſunt Auctoris incerti à Cl. Matthæo editi pag. 9. Vox populi Epifcopum certum poſtulantis, aut Electum approbantis apud Græcos fuit *αἴνεσ*, apud Latinos *Dignus eſt*, de qua formula elegans Euſebii locus eſt lib. vi. c. 29. & alius in vita S. Hilarii apud Henſchenium, die v. Mæji, ubi *Dignus Pontifex*. At vero quum vox populi vox Dei ſemper credebatur, inſpiratio ejusmodi, magis aliquando conſpiratio fuit, vel cæcus vulgi impetus, arte oratoria concitatus. Et valde placet, quod Ulpianus Duumviri, vocibus popularium tantum poſtulati, creationem nullam eſſe pronunciat, ſi actus ex lege habitus non acceſſit l. 12. D. de Appellat. Interim rebus deſperatis, clamor ita ſublatus, nonnunquam incrementa cepit; eaque ratione Clemens I. & Leo XI. electi feruntur. Frequentior autem ſæculo decimo texto fuit, huic affinis per adorationem eligendi modus; cum duæ partes Cardinalium, nullo factò ſcrutinio, aliquem ut Romanum pontificem adorarunt & ſalutarunt: qua via Clemens VII. Paulus III. Julius III. Mar-

cellus II. Pius IV. & V. apicem honoris adepti sunt, auctore Julio Lauto de elect. c. 9. & Pontifici a-um hoc p-cto delatum, Paulo V. Lipsius gratulatur in Senecæ sui dedicatione. Per *compromissum* fit electio, quum uni, vel pluribus, non quidem laicis Electionis arbitrium mandatur, cuius fines diligenter custodiri debent, *cap. cum dilectus X. de Elect.* In summa Cleri & plebis discordia hujus utum tuisse, docet concio habita a Sidonio Apollinare lib. vii. epist. 9. & consilium Gregorii M. lib. 2 ep. 15. Etiam Clemente V. defuncto dissidentes Purpurati in Jacobum Cothurcum, Cardinalem Pontuensem compromiserunt, ut Papam faceret, quem vellet, qui vero confestim dixit se ipsum; stupentibus tum quidem aliis. ait Nic Burgundus lib. 1. Hist. Bav. sed ejusmodi electionem sui ipsius alii ex libero suffragii jure defendunt. male! *nec enim compromissarius ex sua sententia fieri potest*, in re simili scripsit Ulpianus l. 4. D. de Tutor. & curat. dat. Denique ordinarius & frequentior electionis modus est per *scrutinium*, quando assumti quidam de collegio fide digni palam vel tabellis in urnam, arculam vel calicem receptis, cunctorum suffragia exquirunt; *kata may* in re simili Polybius dixit. Simplicior autem, quam Barciconense concilium can. 3. præscripsit, per *sortem* eligendi ratio, reprobata & damnata est ab Honorio III. c. f. X. de sortit. id quod de calculorum vel tesserarum in urnam conjectarum sortitione nonnulli tantum admittunt; caulati, quod sortem consultatoriam, qua divinum inquiritur consilium, Dion Chrysostomus commendavit, oratione in Fortunam; Cyprianus *divinum judicium* appellavit epist. 40. & multo ante utrumque Salomo Proverb. xviii. 18. Romæ virgines Vestales sorte capiebantur, Sueton. Aug. 31. & apud Virgilium 11. Æneid. 201. *Laoon ductus Neptuno sorte sacerdos* memoratur. Sed constitutioni Honorii ansam præbuisse videntur gentiliū leges apud Dionysium Halicarn. lib. 2. Et licet concursus providentiæ divinæ in sorte negari nequeat, pro certa tamen Dei revelatione, nobisque præscripta

scripta agendi norma haberi nequit; quandoquidem *καλως* in electione Matthiæ Dei voluntatem notat; pariter ac Apollinis oracula *sortes* dicuntur Maroni iv. *Æneid* 346. *Sorte & urna mores non discerni* Tacitus scribit iv. *Hist.* c. 7.

§. IX.

Jam vero eodem sæculo xi. quo supra vidimus Papalem majestatem firmam esse, Cardinalium quoque dignitas majore loco esse cœpit, postquam Nicolaus II. A. 1059. in Synodo generali, ad schismata vitanda, primas iis partes in electione Pontificum dedit, nuda fere petitione Clero, & electi approbatione extra comitia, in Ecclesia vel atrio, populo relictæ. Partem decreti servavit Gratianus *can.* 1. *Dist.* 23. & Floriacensis apud Baluz. iv. misc. pag. 62. integrum vero canon 1. Concilii Romani dicto anno habiti, subiectum legi potest. Lux illi ex Petro Damiano cœvo lib. 1. Epistola 20. quæ eo minus hic omittenda, quo distinctus Cadolao P. u. topapæ vera requisita vitiis creationis ejus opposita demonstrat: nimirum quod *electio illa per Episcoporum & Cardinalium fieri debeat principale judicium: secundo loco, jure præbeat Clerus assensum: tertio popularis favor attollat applausum: sicque suspendenda est causa, usque dum Regiæ Celsitudinis consulatur auctoritas nisi periculum fortassis immineat, quod tum quantocyus accelerare compellat.* Tria ergo hoc ævo præter suffragia Cardinalium, necessaria fuerunt; Imperatoris confirmatio; cleri assensus; & populi applausus: sed quæ mox cum nimis molesta magis magisque aboleri cœperunt, aut certe statim in umbram juris pristini conversa sunt. Cardinalibus enim Episcopis & Presbyteris non poterat non fastidium parere, quod electio sua ab Imperatorum confirmatione penderet, quum tantum de sua dignitate detrahi existimarent, quantum Cæsari auctoritatis accedebat. Hinc Leo IX. ab Henrico III. constitutus, vix admissus fuit. Cardinalibus querentibus: *Imperatorem nullam creandi Pontificis potestatem a Deo habere, sed ad Clerum populumque Romanum id pertinere: teste Platina in ejus vita.* Jus vero Cle-

Cleri & populi tum nondum penitus extinctum fuit; nam sub Henrico IV. electi approbationem ad eos pertinuisse probat decretum de electo Gregorio VII. A. 1073. conceptum hoc modo: *Nos Sanctæ Romanæ Catholicæ & Apostolicæ Ecclesiæ Cardinales, Clerici, Acolythi, Subdiaconi, Diaconi, Presbyteri, præsentibus venerabilibus Episcopis, Abbatibus, Clericis & Monachis consentientibus eligimus &c.* Immo post mortem Victoris III. 1087 Episcopi dispersi, rursum unctique coadunati, miserunt litteras Romanis Clericis & Laicis S. Petri fidelibus, ut quotquot ex iis possent prima hebdomada Quadragesimæ Terracinam venirent; quotquot vero non possent assensum suum in persona, quam ipsi concordi voto eligerent, propriis litteris repræsentarent. verba sunt Chronici Casinensis lib. IV. c. 2. ubi Angeli de Nuce notæ addantur. Verum enimvero ne abactus Imperator ob populi tumultus revocandus esset, neve is ultro jura sua repeteret, sæculo sequente Innocentius II. populum Romanum ab approbatione Pontificis omnino exclusum voluit: sine cujus interventu Cælestinus II. A. 1143. a solis Clericis primus electus fuit, auctore Cætare Raspono in descriptione basilicæ Lateranensis, & Onuphrio ad Platinæ Innoc. II. Et sane plebs Romana tot vitiis scatebat, ut non nisi ad comitia turbanda nata esse videretur, vereque de ea dici potuerit, quod Cicerone de Quiritibus suis dixit, pro Plancio cap. IV. *Non enim comitiis judicat semper populus, sed movetur plerumque gratia: cedit precibus: facit eos, à quibus est maxime ambitus. Denique, si judicat, non delectu aliquo, aut sapientia ducitur ad judicandum, sed impetu nonnunquam, & quadam etiam temeritate. Non est enim consilium in vulgo, non ratio, non discrimen, non diligentia: semperque sapientes ea, quæ populus fecisset, ferenda, non semper laudanda duxerunt.* Necdum vero populus tenax post Cælestinum II. prorsus excludi potuit; Eugenium enim III. *communi voto Cleri & Populi electum*, ait Otho Frisingensis lib. VII. Chron. c. 31. Donec tandem Alexander III. A. 1179. lata in concilio generali Lateranensi lege sancivit,

civit, ut, Clero etiam inconsulto, soli posthac Cardinales, duabus tertiis suffragiorum, Papam crearent; teste *cap. 6. X. de Electione*: atque ita a solis Cardinalibus Lucium III. primum Pontificem constitutum esse, Onuphrius Panvinus ad Alexandri vitam, sibi ex Pontificis illius diplomate, apud se asservato, constare testatur.

§. X.

De Cardinalibus, eorumque origine & dignitate, omnia jam ex Onuphrii Panvini, Ciacconii, Hieronymi Plauti, Antonii Auberii, Jureconsulti Parisini, Historia Cardinalium, Gallico idiomate scripta, & Cl. Buddei scholasticate Historico, de origine cardinalitæ dignitatis in vulgus nota sunt; ut Soli faces accenderem, si operosa diligentia multa de his dicere instituerem, id quod & titulus hujus dissertationis verat. Illud autem observari non injucundum erit, decem prioribus, à Christo nato, sæculis, frustra ejusmodi splendendum Cardinalium ordinem quæsi, qualem nostra ætas veneratur. Suos olim presbyteros & diaconos habuit Ecclesia Romana, qui cum Episcopo rei ecclesiasticæ præerant; at Cardinalium appellatio, nec Romanis propria erat, nec singularem prærogativam involvebat: quum Ecclesiæ Mediolanensis, Compustellanæ & Gallicanarum ecclesiarum Cardinales memorentur, apud du Frenium in *Abbas, Episcopus, & Presbyter*. In singulis quippe Episcopalibus Ecclesiis Cardinales erant, ita dicti, quod cardine urbis adstricti essent, ut ex *can. 3. Synodi Romanæ sub Sylvestro I. docuit Mabillon ad tom. 1. Act. Bened. pag. 437.* Neque enim vox ista hic tam est idem, quod principalis, in cardine constitutus; ut voluit Salmasius de primatu Papæ *cap. 1. & Exercit. Plin. fol. 882.* sed qui fixus & immobilis, cardinis instar, in quo janua movetur. Noti sunt *cardines cœli, & venti cardinales*. Gregorius M. additionem ad Ecclesiam passim *cardinationem* vel *incardinationem* vocat, nam *canone 6. concilii Chalced.* statutum erat, ut ne Clerici, nisi ad certam Ecclesiam ordinarentur. Quamobrem jam

saeculo iv. Sacerdotes *Cardinales* dici cœperunt, quasi Ecclesiae quique suae affixi, ordinarii, & incardinati: circa quos fideles unius tituli, templi & cœtus volvebantur, ut loquitur M. Ant. de Dominis lib. iv. de Rep. Eccl. c. 5. §. 5. Onuphrium & Baronium secutus. Horum titularum ab initio non ita magnus Romae erat numerus. Sylvester I. can. 6. refert septem tunc in Romana Ecclesia fuisse Presbyteros & Diaconos Cardinales: sed cum tempore creverunt ad octo & viginti, quibus septem ex vicinis civitatibus accesserunt Episcopi, & octodecim diaconi, qui numerum Cardinalium LIII. efficiebant. Sub Leone X. circiter lxxv. numerabantur. Sixtus V. eos lxx. esse voluit ad numerum discipulorum Christi. Antiqua eorum est eminentia; ut qui Pontifici Summo sacra facienti, in Stationibus & Processionibus aderant, & ipsi Candidati erant Pontificatus: postquam a Stephano IV. in Concilio Romano constitutum fuit, ut ex his solis, qui per distinctos gradus ascendissent, ad illum sacerdotii apicem eveherentur, auctore Anastasio. Carolus Magnus lib. 1. capit. 139. sancivit: *Diaconus in cardine constitutus in Urbe Roma, nisi xxxvii. testibus, non damnabitur.* Leo IV. P. P. eos *Presbyteros sui Cardinis* appellat in Synodo Rom. A. 853. Petrus Damiani lib. 1. ep. 20. *oculos unius lapidis, lucernas unius candelabri* vocavit. Simulac vero Urbis Episcopus, secundum Dictatus Hildebrandinos, *Papae* nomen per excellentiam sibi vindicavit, novus etiam *Cardinalium* ordo, supra omnes ecclesiasticos extulit caput. Tum enim & electio Pontificis illis solis attributa est, & sede vacante Soli Ecclesiam administrare cœperunt, ut ex Arnulpho apud Dacherium tomo 2. spicilegii c. 4. non obscure colligitur. Cum sacro hoc Cardinalium collegio Pontifex statum ex monarchia & oligarchia mixtum format; perinde ut in episcopatibus Canonici Cathedrales bonam regiminis partem habent, suorumque Episcoporum decreta probant ac subsignant. Unde Cardinales absolute *Fratres laterales & coadjutores* Pontificis dicti in cap. *excommunicatis de off.*

off. legat. cap. officii eod. tit. in 6. & pars corporis ejus, in quorum persona crimen majestatis committitur *c. felicitis de pœn. in 6.* Galerum, seu pileum rubrum, Innocentius IV. iis tribuit, in concilio Lugdunensi A. 1244. forsan imitatione Romæ gentilis, cujus sacerdotes Jovis, seu Flamines Diales albo galero utebantur, auctore Festo aliisque. Bonifacius VIII. vestes purpureas iis dedit, regii decoris insigne. Ante Urbanum VIII. titulo in Italia satis vulgari, Illustrissimi dicebantur, is vero A. 1630. *Eminentie & Eminentiissimi* titulo eos ornatum ivit. Leo X. in concilio Lateranensi eos dignitate & honore reliquos omnes antecellere asseruit; qua de re tamen ante querelæ motæ: *Quod in curia Romana Regi Hungariæ, cui inter Reges quartus est locus, sit locus intra ultimos Cardinales datus, & ipsi Electores nequaquam inter Cardinales recepti*, apud Raynald. Annal. Eccles. ad A. 1455. pag. 426. Nec tum ergo, nec postea Cardinalibus Electores loco cesserunt. Vid. Sleidani lib. vii. Freinsheimii Diatribas de Electorum & Cardinal. præced. & Leti Cærimon. Polit. tom. 4.

§. XI.

Quamquam vero eligendi arbitrium ad Cardinales solos esset delatum, ne sic tamen omni ex parte consultum fuit electioni. Conclavi opus erat, quod Viterbii A. 1270. initium sumsit, ex quo cives loci, suasu S. Bonaventuræ, Cardinales ibi moram trahentes, Palatio Pontificio incluse-
runt. Clemente enim IV. Viterbii defuncto, unusquisque Cardinalium, qui tum præsentibus erant, numero octodecim, ad Pontificatum adspirabat, adeo ut pertinaciæ dissidiis electio prope in triennium protraheretur. Lepide tum Joannes Zranciogia, Cardinalis Episcopus Portuensis, videns fratres discordes continuo Spiritum S. invocare, dixit: *Domini, disco periamus tectum cameræ hujus, quia Spiritus S. nequit ad nos per tecta ingredi*; quod Onuphrius ad Plat. Gregor. X. & Papyrius Massonus reitulerunt. Petrus autem Correttinus addit, Viterbienses, jussu Raynerii Gatti, primarii Urbis

& conclavis custodis, tectum Palatio revera exemisse, ut incommodo ac tædio affecti electionem maturarent Cardinales, qui sedecim menses in eo confecerant. Tandem per viam compromissi, in sex Cardinales facti, Gregorius X. renunciatus est; idem, qui schismatis huiusmodi in posterum vitandi causa, in Concilio Lugdunensi generali, A. 1273. formam Conclavis instituit, omnemque in eo servandum ritum præscripsit, insigni functione, quæ *cap. 3. de Elect. in 6.* tota reperitur. Dilerte in ea cautum, Cardinales absentes decem tantum dierum spatio expectandos esse; de loco item & clausura conclavis; de interdicta quacunque sive per literas, sive per internuncios communicatione; de omnimoda pactio-
num & pollicitationum diremptione diligenter cautum, quæ & alia ex canone 1. laudati Concilii desumpta, in illo capitulo legi merentur. Gregorii autem post Innocentium V. successor Adrianus V. & Joannes XXI. constitutionem istam, ambitiosis æque ac avaris molestatam, iterum abrogarunt, auctore Martino Polono: adeo ut tunc sex ordine Pontifices, extra conclave sint creati, usque ad Benedictum XI. in cuius electione, lex illa a Coelestino V. renovata & a Bonifacio VIII. confirmata demum observari coepit. Deinde cum quorundam irrepererat opinio, decretum istud Gregorii, vacante Sede, per cœtum Cardinalium corrigi vel immutari posse: Clemens V. eam in concilio Viennensi damnavit, & alia constitutioni adjecit; inter quæ illud speciale, quod Cardinales excommunicati, suspensi vel interdicti non repelluntur ab electione, ut omnis occasio discordiæ tolleretur, *clem. ne Romani 2. §. 4. de Electione.* Alia porro non magni momenti, de cibo & potu, post triduum in Conclavi exactum, constituit Clemens VI. apud Baluz. vit. Pap. pag. 261. cujus vana imitatione, Carolus IV. Electores post diem trigesimum, sine Imperatoris electione præterlapsam, pane & aqua nutrirî voluit in Aurea Bulla tit. 2. n. 5. De novis Cardinalibus, qui titulo destituti, dubitatum fuit, an vocem in electione haberent. Post obitum
Eu-

Eugenii XI. Androinus de Recha admissus est; sed postea Dominico Cupranicæ facultas negata est intrandi Conclave, in quo Eugenius IV. electus est, apud Baluz. lib. 111. Miscell. pag. 272. immo Eugenius in cum paulo commotior, sanctione edita promulgavit, eos tantum Cardinalatus jure posituros, qui præsentibus pileum rubrum, titulum, annulumque a Pontifice receperint, vel ad quos absentes Pontifex galerum rubrum miserit: neque in renuntiando novo Pontifici, ceterisve rebus iustitiam laturos, nisi postquam in consistorio promendæ suæ sententiæ acceperint potestatem. Vid. Baluz. Vit. Pap. t. 1. pag. 981. Deinde tot legibus aliis super alias coacervatis A. 1562. accessit Bulla Pii Papæ IV. quæ in Conclavibus legis absolutissimæ vim habuit; donec Gregorius XV. A. 1621. rem omnem abtulit, edito Ceremoniali, quo solennia electionis & schedularum exempla in posterum adhibenda plenissime præscripsit. Sed ejus quidem externa satis exacte observantur, cetera ad leges sine moribus dudum pertinere.

§. XII.

Non equidem inficior, multa harum electionum Conclavia exquisitoris prudentiæ civilis exempla esse; in multis divinam providentiam manibus palpari posse, dum optime cogitata, ad omnium stuporem sæpius pessime ceciderunt, & Romæ tritum in ore vulgi proverbium enatum: Illum de Conclavi Cardinalem egredi, qui Papa ingreditur. Quantum etiam satis est, animis Cardinalium religionem injicere potest ijsjurandum his verbis conceptum: *Teslor Christum Dominum, qui me judicaturus est, eligere, quem secundum Deum judico eligere debere, & quod idem in accessu præstabo.* At vero quoniam ad illud culmen tot tendunt potentes, res sine ambitu & dissidiis vix transigi potest; nec fidem habuerim Scipioni Amirato, nisi melioribus pignoribus allatis, quam istis, quibus omni ævo divinum id opus fuisse probare voluit, in dissert. polit. l. 3. c. 1. Suaviter sane ridiculus fuit Petrus Matthæi, Jurisconsultus Lugdunensis, & septimi decretalium

libri compiler, qui l. 7. decret. tit. 3. c. 3. in notis, scribere non dubitavit: *Tanta integritate inaugurationis Pontificis peragitur, ut nihil sanctius, nihil incorruptius judicetur. Quamobrem leges in Comitibus Conclavis observantur pro electione Papæ religiosissime: observatur & fides, ut elucescat omnibus, quam longe absit à fuco & ambitu tum simoniaca ambitione.* Vel sola enim legum, toties repetitarum & flexarum multitudo, vitia circa electionem arguit; cum perpetuum sit illud Platonis: legum multitudinem morum corruptelam comitari, ut egregie Hermannus Conringius in procemio Electionis Urbani observavit. Immo quemadmodum ethnicos sacerdotiorum Candidatos pungit Seneca lib. vii. de benef. c. 28. quod data pecunia populi suffragia coëmebant; sic tantum abest, ut hodie Simoniacus ambitus Romæ ignoretur, ut non alibi lues ista sæviat atrocius. Æneas Sylvius, qui & ipse postea Pontifex creatus, epist. 56. *Nil est, inquit, quod absque argento Romana curia dedat. Ipsa manuum impositio & Spiritus Sancti dona venduntur, nec peccatorum venia, nisi nummatis impenditur.* Eadem de re Baptista Mantuanus, raræ cruditionis vir, conquestus est, in decantato illo:

----- Venalia Romæ

Templa, sacerdotes, altaria, sacra, coronæ,

Ignis, thura, preces, cælum est venale, Deusque.

Magis ad rem præsentem faciunt, quæ supra dicta sunt §. 3. & maxime venalitatis ille morbus, cui occurrendum fuit constitutione singulari, quæ can. 1. dist. 23. reperitur. Blasius Outzius in Itinerario Alexandri VI. apud Baluz. lib. 3. miscell. pag. 443. *Quæ, inquit, compositiones & conventiones, si fas est foras effusire, diebus conclavis inter reverendissimos Cardinales, eorumque confæderatos ultro citroque factæ fuerint, aliis scriptoribus relinquamus, qui verius gesta secretiora intellexerunt. Sat sit nobis tot sine controversia dies elabi non potuisse.* Rursus quæ fides in Conclavi obtineat, ex iis patet, quæ Thuanus lib. 100. notavit, in Conclavi Gregorii XIV. ita Cardinales sibi mutuo verba dedisse; ut ex ea oc-

ca.

castione verba Conclavis, quasi scelestæ fidei plena, in proverbium abierint. Legantur modo Conclavia recentiora, & patebit electionem Paparum iisdem adhuc vitiis laborare, quibus olim: vitia erunt, donec homines. Levinus Nicolaus Moltkius, Eques generosissimus, Alexandri VII. conclave cum præfatione in lucem emisit, Sleswici A. 1656. Urbani VIII. & Innocentii X. Conclavia, cum erudito proœmio edidit Conringius. Urbani VI. Nicolai V. Callisti III. acta electionis, cum historia Conclavium Julii II. Leonis X. & Adriani VI. exhibuit Cl. Papebrochius in propylæo ad Acta Sanctorum Maji, in conatu Chronico-historico ad catal. Pontif. part. 2. ubi pagina 156. laudat collectionem manuscriptam pretiosissimam, in bibliotheca Laurentii van der Hem, Jurisconsulti Amstelodamensis, tum temporis, id est A. 1685. servatam; cujus tomus primus varia scripta de ratione, praxi mysteriisque Conclavium Italico sermone complexus; reliqui autem quatuor tomi historias Conclavium a Clemente VI. ad Clementem VIII. partim Latinas, partim Italicas exhibuerunt. Num Lugdunenses Gallici Conclavium quatuor sæculorum collectores eo thesauro adjecti sint, non temere dixerim. Utilissima autem est collectio Conclavium fere omnium, a Clemente V. ad Clementem XI. quæ in plurium manibus versatur. Ex Latino vel Italico sermone in Gallicum translata sunt omnia, nec Colonix, ut titulus præfert, sed hic loci typis expressa A. 1694. & iterum iterumque repetita & aucta, auspice, ut accepi, Henrico L. B. ab Huyssen, Russorum Cæsari a consiliis intimis, Viro Clarissimo. In nupero Innocentii XIII. Conclavi quid actum sit, ætas docebit. Vereor ne illis, qui prorsus superstitioni non sunt immergi, scrupulum injiciat nummus Pasquini, in cujus altera parte Roma. in altera Spiritus Sanctus, sub figura columbæ, expressus cum elogio:

*Omnia venduntur Romæ, imo Dogmata Christi:
Est ne me vendant, evolo; Roma vale.*

S. XIII.

Nunc expectabunt forsan nonnulli, ut, quo ritu electus ad pontificatum acceptandus invitetur, suscipiens populo per formulam *Annuncio vobis gaudium magnum* &c. promulgetur, idem deinde a Cardinalibus prima, secunda & tertia vice adoretur, porro a Legatis, Principibus omnique populo in Ecclesia Petri, super altari Apostolorum, adorandus exponatur, & tandem conclave disjiciatur, exponam: sed avidos ejus rei Lectores ad ipsum Ceremoniale Romanum, & Bonacinae, Wagenseilii & Mayeri de Pontificis Romani electione dissertationes remitto, quibus haec minutias, nihil in recessu habentes, professa opera sibi excutendas sumserunt. De nominis mutatione tantum pauca adjicere lubet, cujus originem Platina a Sergio II. repetiit, qui *Os porci* antea dicebatur. Albertus, Abbas Stadenfis Sergii II. decessori Gregorio IV. nominis illius deformitatem tribuit; Baronius moris initia a Sergio III. derivat, qui reverentiae causa abstinerit a proprio Petri nomine. Ditmarus lib. vi. Sergio IV. id cognominis adscripsit: *Sergius qui vocabatur Bucca porci*, apud Leibnitz tom. 1. script. Br pag. 399. Alii vero ad Simonem ascendunt, cujus nomen ipse Christus mutavit: alii gentilium *amatoris* in ea latere suspiciati sunt, quorum multa retinuerunt. Platinae adstipulantur plerique, ut auctor Magn. Chron. Belg. pag. 19. Joh. à Leidis lib. v. Hist. c. 23. & Godefridus Viterbiensis *Sergius*, inquit, *Papa fuit primus, qui nomen suum mutavit, & sequentes omnes idem fecerunt.* Verum Sergius II. patre Sergio Romano natus, ante Papatum jam ita dictus fuit, & secundum tantum cognomen, postquam Papa factus, abjecit Primus fuit Octavianus, saeculo X. qui nomen Johannis XII. assumpsit, centum & quod excurrit, post Sergium illum, annis elapsis, ut Onuphrius observavit. Nec tamen illius exemplum secuti sunt successores omnes, nec hodie mutant inviti. Nostras ille Adrianus VI. Pontifex candidissimus, & Marcellus II. quod habebant, nomen retinuerunt. Dormi-

mitavit certe Baronius a Sergio III. consuetudinem illam nominis mutandi repetens; siquidem non illi, sed Sergio IV. Petri nomen fuit; neque hic, sed Johannes XIV. primus extitit, cui Petri nomen in baptismo obtigerat: qui vero Petri successor renunciatus, præ reverentia erga Apostolorum principem, nomen mutavit; ut Papebrochius ad ejus vitam pag. 168. ostendit; cui Antonius Matthæus in notis ad veterem Johannis de Beka interpretem tom. v. Anal. pag. 471. jungatur. De sede Stercoraria, cui Pontifex in possessionem Basilicæ Lateranensis mittendus, olim imponebatur, multa hic dicere, nihil attinet; quia fabula de Johanna Pappissa; ipsis ejus auctoribus displicuit, & nunc a plurimis ridetur: postquam Lambecius lib. 11. Bibliothecæ Cæsareæ c. 8. testatus est, in quatuor codicibus manuscriptis Martini Poloni, ejus rei nec mentionem extare, nec unquam existisse. Blondellus item, ex temporum ratione docuit, Pappissam illam locum suum tueri non posse; & Sarrauius denique Anastasii Bibliothecarii locum *υποβελικιον* esse evicit, epist. 140. Byzantii, fateor, ejusmodi quid contingere potuisse, ubi Eunuchi sæpe Episcopi facti sunt: at vix credibile est, ut mulier, quæ nullum ordinem Romæ recipere poterat, summus Sacerdos & Pontifex fuerit creata. Nec Leo IX. forsitan epist. 1. c. 23. feminæ Constantinopoli electæ fecisset mentionem, si idem vitium Sedis Romanæ objici posse novisset. Genuinam sedis hujus marmoræ non pertusæ originem & usum, Joanna antiquiorem; ostendit Mabillonius tom. 1. Musci Italici p. 1 pag. 59 dum enim Pontifex in porticu Basilicæ eam occupabat ex Psalmo canebatur: *Suscitat ex pulvere egenum, & de stercore erigit pauperem, ut sedeat cum principibus & solium gloriæ teneat.*

§. XIV.

Nunc de consecratione quoque Pontificis addere juvabit, eam jam diu, licet non tanto semper apparatu, peractam fuisse; ut minime mos ille pro recente habendus sit. Duplex autem coronatio est; alia in Vaticana S. Petri, alia in Basilica

lica Lateranensi, quæ proprie inthronisatio appellatur; etsi idem ordo non perpetuo fuerit servatus, & inthronisatio aliquando præcesserit consecrationi, ut in Benedicto III. aliisque. Ita Wibertus, oculatus testis, in vita Leonis IX. a Sirmondo & Henfchenio publicata lib. 11. cap. 2. *Divina favente gratia a cunctis applaudentibus consecratur, ac dominica quadragesimalis initii, pridie Idus Februarii, Apostolicæ Cathedræ inthronizatur.* Sic etiam impostor ille antiquus, qui Constantini donationis tabulas confinxit, ad sua tempora respiciens: *Decrevimus, ait, ut ipse (Sylvester) & successores ejus diademate, videlicet corona, quam ex capite nostro illi concessimus, ex auro purissimo & gemmis pretiosis, uti debeant, & in capite, ad laudem Dei, pro honore beati Petri gestare, apud Ivonem Carnotensem & Gratianum can. 14. §. 5. Dist. 96.* Quinam consecrationis, ante sæculum XI. proprii fuerint ritus, Mabillon optime ex Anastasio, tum ex Actis Vaticanis & Ordinibus Romanis explicavit, in commentario ad Ordinem Romanum §. 18. nempe ipsa consecratio Pontificis ad Petrum; impositio ejusdem in Sedem Petri; oblatio sacrificii per novum Pontificem; mitra pretiosa, pallium, chirothecæ, & annulus Pontificalis: dein processus ad Lateranum, convivium, & munera in Senatum populumque erogata. Add. Pagius in Crit. ad A. 686. n. 5. ad A. 1049. n. 6. & junior Franciscus Pagius in præfat. breviarii Pontif. Rom. §. 7. seqq. Hodiernæ inaugurationis solennia fuscè descripta extant in Ceremoniali Romano, & si quis ea multipliciter aucta nosse cupit, cum non poenitebit adiisse ad doctissima commentaria Danielis Papebrochii, in Jacobi Cardinalis de coronatione Bonifacii VIII. ligatam orationem conscripta, die XIX. Maji. Act. Sanctorum. Ibi ritus notabiliores occurrunt, impositio triplicis coronæ, porrectio clavium, accensio fasciculi stupæ, levatio, sparsio nummorum cupreorum, quæque id genus sunt alia, in quorum rationes mysticas Thuldenus de inauguratione Alexandri VII. & Bankius in Roma triumphante, seu Innocentii X. coronatione, inquisiverunt.

Tæ.

Tædet omnem pompam persequi, quæ jam olim, cum ad istum vanitatis gradum nondum evecta, Petro Damiano non ridenda, sed gemenda videbatur. Priscis vero Pontificibus in usu fuit mitra oblonga in acumen desinens, instar faccarci panis; qualem exhibet effigies Joannis apud Ughellum Ital. sacr. tom. v. col. 1542. Et nisi me omnia fallunt, ejus usus a pilco sacerdotali gentilium Romanorum desumptus videtur, qui in coni formam corbat, ut Rubenius docuit lib. 11. Elect. c. 25. Inde apex pro Episcopatu apud Sidonium. Hormisdas datum sibi non a Clodovæo, quæ vulgaris sententia est, a Papebrochio rejecta, sed a Clodovæi filio regnum, seu coronam auream cum gemmis mitræ circumdedit; forsan imitatione summi Pontificis Ebraeorum, qui præter cidarim mitram gerebat, Exod. xxviii. v. 4 unde *μυρσεφρος* Plutarcho dictus in problem. conviv. Bonifacius VIII. coronam duplicavit, utrumque imperium saculare & Ecclesiasticum indicaturus: Joannes autem xxi. triplicatam coronam *Triregno*, fecit, ut summa quoque Imperialis dignitas significaretur. Vide Raynaudum de corona & mitra triplici Papæ tomo x. operum; Mabillon præfat. ad tom. vi. Act. Bened. & Papebrochium in conatu chron. ad catal. Pontif. pag. 208. Quod ad Pallium Pontificis rubecum attinet, singulare est, quod non ab illo, a quo consecratur, sed ab Archidiacono, velut ministri vice fungente, id accipiat, & ipse quasi in se transferat, ne superiorem habere videatur. Cereemoniale Romanum lib. 1. sect. 2. *Cum due partes in electione concordabant, Priorem Diaconorum consuevisse induere Electum mantum Papale, dicendo: Ego investio te de Papatu. ut præsis Urbi & Orbi.* A manto immantare & amantare proprie de summis Pontificibus dici, du Frene ostendit. Nescio autem, an stuppæ accentæ ab aliis observata sit elegans Petri Damiani explicatio, qui lib. 1. ep. 17. in coronatione Imperatoris Græci eandem adhibitam esse refert: *quatenus dum se simul ac sua tam vana, tam flocci pendenda considerat, de culminis ascenso fastigio nullatenus insoleseat: & dum*

dum possessor atque possessio subjacere communi omnium casui non ambigitur, jam quasi de singulari dignitatis apice, qui ad summa processus est, non insietur. Pulchrum ergo mundanae conditionis ordinem homo consideret, & dum suis usibus omnia cernit tribui, non sibi, sed suo referat gratias Conditori. & quæ sequuntur.

CAPUT II.

DE

JURE IMPERATORIS CIRCA ELECTIONEM
PONT. ROM.

§. I. Diffensiones crebrae & interpontificia Imperatores provocarunt, ut electioni partes suas interponerent. II. Sed Regii consensus verum fundamentum ex jure circa sacra declaratur. III. Confirmatio Pontificum necessaria; quia Imperatores Ecclesiam Romanam dotarunt, ejusque sunt Advocati. IV. In Oriente Patriarchæ electi & remoti ad Imperatorum nutum. V. In Occidente confirmatio novelli Papæ primum a Caesaribus, deinde a Regibus Herulorum & Gothorum data pecunia fuit redimenda. VI. Quanta hac in re Exarchi Ravennatensis, sæculo sexto & septimo, fuerit auctoritas, excutitur. VII. Carolus M. jus ordinandi Sedem Romanam adeptus ex pacto, quia illius Ecclesiæ Advocatus, VIII. tum quia Patricius Romanorum, jurisdictionem in Urbem, & defensionem Ecclesiæ per Vexillum accepit; IX. denique quia Imperator factus, Imperium in Urbem, & quævis ecclesiastica obtinuit. X. Fata hujus juris sub Ludovico Pio & Lothario; XI. diversa sub Ludovico II. Carolo Calvo & Crasso. XII. Othoni I. eadem, quæ Carolo M. facultas iurejurando firmata. XIII. Ejus successores omnes eam gressi, usque ad Henricum IV. qui tenaciter ipse retinuit. XIV. Hildebrandus frivolis rationibus Imperatores excludere est conatus. XV. Hi usque ad Ludovicum Bavarum jura sua strenue vindicarunt. XVI. Nec confirmationis necessitas ex hoc tempore per præscriptionem sublata esse videtur, XVII. sed durare ex pacto jurato, tituloque Advocati iugiter servato.

S. I.

EX his quæ superiore capite demonstravimus, inde ab initio Ecclesiæ usque ad sæculum XII. Clerum Populumque Romanum Episcopos suos elegisse, non parum lucis quæstioni principali, ad quam nunc pergimus, affusum iri opinor : quum sic vel sola eminentis dignitatis, imperii & utilitatis ratio poposcerit, Imperatoris, maxime Christiani, adhiberi consentum; cujus majestas ad frenandam populi inconsulti libidinem plurimum valebat. Quemadmodum enim in aliis rebus facile est, non omnes consentire, ita hic facillimum erat dissentire non unius animi, studii & nationis homines, quos diversus & multiplex spiritus in varias sententias agebat. Adhæc rara est electio, quæ sine privato affectu & corruptela fiat : ista autem pluribus malis fuit obnoxia, quo magis Candidati per ambitum ad illum rerum divinarum & humanarum apicem grassabantur. Inde toties populus, in studia contraria divisus, plures uno tempore Pontifices elegit, & hi quoque cum probro Sedis Romanæ, armis tales fecisse voluerunt. Ipsum Conclave tot legibus accervatis sepi non potuit, quin Cardinales Joannem XXIII. Romæ, Gregorium XII. Aramini, Benedictum XIII. in Hispania eligerent. Quod si his addamus incommoda Sedis diu vacantis, in tanto discrimine Urbem sæpe positam fuisse deprehendemus, ut funus & cadaver ex anarchia ei imminere videretur, quando Imperatorum auctoritas tepuit aut refriguit. Exemplorum plena est historia, eligentium dissidiis per annos & menses sedem sæpe desertam fuisse. Mortuo Nicolao I. Platina ait, esse qui scribant, per annos octo, menses septem, dies novem eam vacasse : utique post Gregorii VII. & Cœlestini IV. obitum amplius annum, navis illa sine gubernatore jactata est; post obitum vero Nicolai IV. Urbani IV. & Clementis V. ultra biennium Sedes rectore, & Roma principe destituta fuit.

E 3

Jam

Jam vero tralatitium est, ferocissimos quosque civium Romanorum plus semel, Pontifice mortuo, carceres effregisse, custodes necasse, omnia divina humana miscuisse; quia initiari Papæ omnia omnibus ignoscebant. Unde Bodinus lib. vi. de Rep. c. 5. observavit, ultiones & parricidia in occasum Pontificis maximi diserti solere, duosque famosos latrones hac caula, non nisi post centum & sedecim parricidia, poenas dedisse. Ne ergo publicæ quieti clades inferretur, finem tot malorum facere debuerunt Imperatores, tanquam custodes & vindices *utriusque* & legitimarum omnium ordinationum. Et cur passi fuissent, ad arma & rixas pervenire eligentes, quos sua majestate componere poterant? Non tamen assentior Pagiis eruditis, Antonio in crit. ad A. 419. n. 1. vel Francisco in præfat. breviarum §. 6. qui ex dissidiis illis, & contentionum vitandarum prætextu, unice factum putant, ut Honorius primum, deinde Italiæ Reges, post Exarchi & Imperatores sese immiscuerint electioni: dolentque id malum, a parvis initiis profectum, in grande Romanæ Ecclesiæ dedecus degenerasse. Nec magis illorum castra sequar, qui cum Petro de Marca lib. viii. c. 2. Jano a Costa, Innocentio Cironio, aliisque ad Decret. tit. de Elect. jus Regiæ vel Imperatoriæ confirmationis, ex populi consensu, olim in electione necessario, derivatum esse tradiderunt. Quanquam enim ad exemplum legis regiæ hic provocetur, quæ Principi non modo bonorum, sed corporum quoque & suffragiorum potestatem dedit; tum quando non aliud discordantis Romæ remedium erat, quam ut ab uno regeretur; inspectio tamen & *procuratio* illa simul, per aliquot sæcula, cum populi suffragiis stetit, & nititur augustiore Majestatis jure, quo Imperatores circa sacra, iisque præpositos Episcopos, summos & imos gavisi fuerunt, ex dictamine rectæ rationis, & Apostolorum doctrina Rom. xii. v. 1. 1. Petr. ii. v. 13.

§. II.

Enimvero ita proprium est Principis, curare sacra, & regere

gere electiones sacerdotum, ut plerique veterum duo munera habuerint conjuncta, Sacerdotium, inquam, & Regnum; quorum curatio tam arcto nexu cohaeret, ut divelli nequeant, nisi monstrum reipublicae in republica statuere velimus. De Aegyptiorum & Persarum Regibus certum est, sacerdotum principes egisse; quin ipsos barbaros Reges, diu lateque, & duces belli, & dominos ceremoniarum fuisse, Diotogenes Pythagoricus apud Stobaeum de Regno, Plato in Politico, & Aristoteles III. Polit. xi. testantur. Apud Ebraeos nunquam non a Regis & Synedrii arbitrio Sacerdotes pependunt; Rex enim horum exemplo unctus, sedem & jus loquendi in sanctuario; inspectionem in sacra, jus etiam eligendi & destituendi Pontificis Maximi habuit, quod vel ex unius Salomonis historia constat. Apud priscos item Romanos, qui summus Pontifex, etiam summus hominum fuit: sed quia multiplices illae curae nimis Reges distringebant, Rex sacrificulus, dicis causa, est institutus, non multum dissimilis ei, qui in mimo celebratur. Verum Augustus Pontificatum Maximum Imperio iterum junxit, quo religiones & sacerdotes in sua haberet potestate; & secuti principes, non gentiles tantum ab Augusto ad Gallienum, sed Christiani quoque id nominis gesserunt; quo in comitiis, in Senatu, domi militiaeque summo religionis jure, velut freno, contumaces coercere possent, ut praeter Zosimum l. iv. c. 36. tradit Ausonius in panegy. Gratiani c. 15. & 18. Servius ad Virgil. vii. Aeneid. 80. & priscae veraeque inscriptiones apud Gruterum p. 159. n. 7. 1052. n. 13. Dissentienti Jacobo Gothofredo III. Spanhemius de usu & praest. diss. xii. n. 4. & Joh. Andreas Bosius diss. de Pontificatu Rom. satisfecerunt. Nec audiendus est Baronius, qui Principes eum titulum adseivisse, ait, permissu Pontificis Romani, & in hujus gratiam eodem abstinuisse putat: Gratiani enim temporibus, ea Episcopi Romani nondum erat auctoritas, ut dignitatum arbiter esset, recteque Justinianus Nov. vi. Sacerdotium & Regnum ab eodem principio manare

nare dixit. Ipse etiam Baronius suos Annales tom. 3. A. 312. n. 93. & seqq. & notas ad martyrologium die xxii. Aug. quodammodo correxit, veritatis amore. Licet vero postea cum Senatus majori ex parte Christianus esset, Imperatores desierint Pontificatus titulum & stolam sumere, nihilominus tamen potestas eorum ad munera Ecclesiastica, & Romani Pontificis electionem extensa mansit. Huc pertinent leges plurimæ ad cultum Dei, & Ecclesiæ ~~sollicitas~~, & Episcoporum electiones tendentes, in utroque Codice nobis servatæ: & Augustinus pariter ac Optatus Milevitanus Donati hæresiarchæ vocem: *Quid est Imperatori cum Ecclesia?* damnarunt. Certe multum ad rem. pertinet, qui religioni præest, & qui per Episcopos & Clericos cum populo & ad populum agit, an ei cum summo Magistratu bene conveniat; an pareat Principi, an legibus sit solutus. Maxime autem Imperatoris hæc curatio esse debuit, ut tali regenda committeretur Ecclesia Romana, qui pacis & concordie esset amans, qui populum doceret jura majestatis non esse violanda; cujusque exemplo subditi non fierent deteriores: id vero quomodo præstabit, nisi in summi Pontificis electione potior ejus ratio habeatur?

§. III.

Non omne quidem jus eligendi Regibus adscribit sana ratio; & convenientius, fateor, ex Hippocratis præcepto, sancta a sanctis concedi; profanos a sacris arceri. Inde scilicet tot mala in Ecclesiam aliquando redundarunt, quod ignari & indigni homines, precibus & pretio regum consensum obtinuerunt: *Non nostrum morem, sed Regis jussa sequentes*, de puero electo cecinit Ivo ep. 67. - Plena autem confirmationis potestas, Summæ Potestati tam necessario competit, ut Respublica sine ea salva esse haud possit. Quemadmodum enim jus & æquum esse censetur, ut Pastores præficiantur, vel electi confirmentur per eos, ex quorum proprio vel avito patrimonio Ecclesiæ sunt fundatæ; sic contra absurditatis notam non caret, bona temporalia & integras pro-

provincias a Regibus Francorum & Germanorum liberaliter in Sedem Romanam collatas, ab hominibus aliquot privatis conferri, nullo prævio domini directi consensu, nulla etiam ejus infecuta confirmatione? Quanto melior auctoritas Regum Galliae & Hispaniae, qui tanquam defensores omnium in regnis suis Ecclesiarum, ob inundiburnium, *mainbournie*, ut loquuntur, jus nominandi Episcopos exercuerunt & exercent; uti perpetuum est apud Gregorium Turonensem, & præter Valquium p. 1. *Ill. contro. lib. 1. cap. 22.* Segobienfis Episcopus Covarruvias tom. 1. p. 2. *Relect. c. Possess. mal. fil. §. 10.* graviter testatur. De Anglia olim Eadmerus præfat. *Histor. Nemo in ea Episcopus vel Abbas ante Anselmum factus est, qui non primo homo Regis ac de manu illius Episcopatus vel Abbatiae acceperit investituram.* Eodem jure Hibernia, Dania, Sicilia, Polonia, & Hungaria usa est, ut Fr. Florens ostendit ad tit. de elect. pag. 151. Quin imo perpetuum fere fuit, ut Episcopi Regibus Sacramentum fidelitatis præstarent, de quo multa Jurctus ad *Epist. 35. §. 190.* Ivonis Carnotensis & Jac. Petitus ad *Pœnitentiale Theodori pag. 476.* Præterea Advocatos quoque & Patronos jus præsentandi Episcopos & Sacerdotes exercuisse, ex multis legibus constat, l. 15. *C. de SS. Eccles. l. 46. C. de Episcopis. Nov. 57. c. 2. Nov. 123. c. 18. cap. 3. X. de jure patron.* maxime autem exemplo Theodorici, Moissellanorum Ducis; qui mortuo fratre Alberone, filium suum adhuc impuberem, Ecclesiae Metensi, cujus Advocatus erat, Episcopum dedit, auctore Sigeberto ad *A 1009.* Jam vero Imperatores nostri plus juris in Pontifices Romanos, quam nudam protectionem, Advocatiam nimirum majestaticam habuerunt; quod ipsum nec Pius V. diffitetur, & deinde clarius apparebit, ubi Carolum M. aliosque Advocatos S. Petri fuisse ostendemus. Plane Henricus II. Imperator a Benedicto VIII. cum ineffabili honore Romæ susceptus, mernit fieri *Advocatus Sancti Petri*, hoc est, Protector & defensor patrimonii Ecclesiae Romanae, auctore Ditmaro lib.

vi. Sic Chunradus Imp. *Romanorum Rex & Advocatus Pacificus* dicitur apud Browerum lib. III. Antiq. Fuld. c. 17. item *Advocatus primus & defensor Romana Ecclesie* apud Chiffetium Alsatia vind. pag. 9. & ipse Alexander Papa IV. vacante Imperio *requisivit Electores, ut Advocatum Ecclesie eligerent*, apud Naucier. gener. 43. Deinceps de jure Imperatorum confirmandi Episcopos Romanos, cordatiores Pontificios laudare possem: e priscis Hieronymum Balbum de coronatione cap. *Quomodo olim delatus sit Pontificatus*. Marfilium Patavinum, de Translat. imp cap. 8. & Jacobum Pamelium ad Cypriani epist. 52. inter recentiores Mabilonium Mutæ. Ital. tom. 1. part. 2. pag. 42. & Baluzium mitcell. tom. 3. pag. 490. Sed malo vitare fatietatem. Tantum ob nudam, & veritati amicam simplicitatem, utar auctoritate Johannis Petri de Ferrariis, qui circa annum c13 cccc. tit. 50. gloss. 9. n. 4. Practicæ judiciariæ, sequentem in modum scripsit: *Scire debes, tu ignare Laice, quod Imperium aliquando habuit utrumque gladium, temporalem scilicet & spirituale: adeo quod tunc Imperatores conferebant multa beneficia & ecclesiastica, per universum orbem, & amplius eligebant Papam.*

s. IV.

Hæc generalia vel parum credulo sufficere poterant, ut causæ, quam demonstrandam suscepimus, fidem haberet: sed magis juvabit per omnia temporum intervalla justos Imperatoris titulos, ex vi imperii in Romam, & pactis jurejurando firmatis & actuum frequentia investigasse: quia non una omnium hic mens est, & diffidens ambitio mortalium aut gratiæ subscribit, aut odio tuo. Ergo exploranda erit veritas multum prius, quam animus sententiam ferat. Quamdiu sub duris persecutionibus gemuit Ecclesia, prorsus alia Episcopi Romani conditio fuit: nondum tum principem sæcularem agebat, & solus populus clero junctus eum eligere poterat; quia metus crudelissimorum suppliciorum prohibebat, ne electionis faciendæ facultas, aut factæ confirmatio

ab Imperatoribus peteretur. Nihilominus tamen, quum Paulo Samosateno episcopo fidei controversia movebatur, ejus decisio ad Aurelianum Imperatorem ethnicum delata est, qui etiam Concilii Antiocheni decretum executioni mandavit, auctore Eusebio lib. vii. 24. 30. Pleniorē vero auctoritatem sibi vindicarunt Imperatores, ex quo pax & libertas cum Republica conjuncta fuit, ipsique Christo nomen dederunt. Testantur id Constantini, Constantii, Valentiniani, Valentis, & Arcadii constitutiones de Episcopis & Clericis, in utroque Codice; maxime vero Theodosii jussus de Proclo ordinando apud Socratem l. vii. c. 40. dignumque annotatu est, quod idem scribit Hist. Eccl. lib. v. Proœm. *Ex illo tempore, quo Imperatores Christiani esse cœperunt, Ecclesiæ negotia ex illorum nutu pependērunt. Ut de Græcis primum agamus, in Oriente certum est, Imperatorem non modo, si dissentiente clero duo nominati & designati essent, unum ex his Episcopum, qualem ipse vellet, declarare potuisse, sed etiam Patriarchas Metropolitanos, Archiepiscopos & Episcopos fuisse electos, translatos & remotos, ad Imperatoris nutum. Exemplorum plena sunt omnia historicorum volumina: Cedreni, Zonaræ, Glycæ, Nicephori, Constantini Manassæ, & Contacuzeni: præsertim vero Codinus Cyropalata de off. Constant. hoc docuit cap. 20. Sane adeo parum coarctata fuit Imperatoris libertas, ut omisissis etiam Episcoporum suffragiis, quem vellet designare potuerit, quod Blastares alique a Jacobo Goar, & Gretsero in notis ad Codinum allati confirmant. Sed valde memorabilis est locus Demetrii Chomatiani in responsis ad Cæsariam: Imperator ut communis in Ecclesiis sapientum Princeps & re & nomine, Synodorum placitis præsidet, & auctoritatem ipsis largitur. Ecclesiasticas ordinationes disponit, & legem ponit vitæ atque officio eorum, qui altari inserviunt, quin & judiciis Episcoporum & Clericorum & electioni Ecclesiarum vacantium. Promovet insuper a minori dignitate ad majorem, puta ab Episcopali ad Metropolitanam, bonarem eum exhibens*

hibens aut urbi aut homini. In summa, præter sacrificandi potestatem, cetera omnia jura Pontificalia manifeste exprimit Imperator, quibus in rebus convenienter agit & legibus & Canonibus. Causa plenissimi hujus juris circa sacra non alia est, quam quod Græcorum Cæsares ora sua capistro Romano porrigere noluerunt, vel quia jugum illud cervicibus suis grave excusserunt. Inde de rebus Ecclesiasticis sancire, privilegia, titulos, dignitates Ecclesiasticas augere, minuere, tollere; ipsarumque dioceseon fines ampliare Imperatoris erat; ut vel unius Balsamonis in Nomocanonem Photii commentarii testantur. Ex eodem fonte manavit, ut Imperatores Episcoporum Synodis præsiderent, primique subscriberent; cujus specimen etiam in Imperatrice est apud Cantacuzenum sub finem libri III. Inde sine ullius metu fraudes & corruptelas, quæ in electionibus a Clero & populo solebant frequentari, coercerant, de quibus Chrysostomus lib. 3. de sacerdotibus c. 15. Sed quod maxime huc pertinet, Constantinopolitanus, Alexandrinus, Antiochenus & Hierosolymitanus Patriarchæ ^{δικαιοκρίτες}, hoc est pedum, seu sceptrum episcopale ex manu Imperatoris acceperunt, qui hæc solennia verba adhibebat: *Sacro sancta Trinitas per imperium nobis concessum constituit te Archiepiscopum Constantinopolitanos novæ Romæ*, ut planum ex Curopalata dicto cap. 20. n. 8. & 14. & pluribus erudite confirmat doctissimus Harbertus ad Pontificale Ecclesiæ Græcæ p. 430. & 470. Similiter pallium Archiepiscoporum munus Principum erat, etiam imperante adhuc Constantino Pogonato, nec tanto ære, ut Romæ, vendebatur. Liberat. Diac. Brev. c. 21. *Anthimus vero videns se sede pulsum, pallium quod habuit Imperatori reddidit.* Hinc denique omnia apud Græcos inversa, & rectiora quam Romæ: Præsules juxta scabellum pedis Imperatorum sedebant, ut Innocentius III. cap. solite X de Major. & obed. scribit, nec Princeps Patriarchæ, sed hic Imperatoris pedes per adulationem osculo prolequebatur, sive ut Corrippi verba mea faciam,

---- poplite flexo
Plurima divinis supplex dabat oscula plantis.
s. V.

Nunc ex Oriente proficiscamur in Occidentem, ubi diutius Cleri & Populi consensus retentus est in Pontificis Romani electione: sic tamen ut Imperatores, simulac Christo nomen dederunt, deinde Italiæ Reges & Exarchi eam auctoritate sua firmarent. Quum enim tempore Valentinianni inter Damasum & Ursinum schisma excitatum esset, Prætextatus, Præfectus Urbi, qua pollebat potestate, electionem Damasii tutatus est, Ursino rejecto, quod *κατὰ τὴν ἀρχαίαν* fuisset ordinatus: ut præter Socratem lib. iv. Hist. Eccl. c. 24. Rufinus, Nicephorus, Theodoretus, Sozomenus alique testantur. Ammianus Marcellinus genilis lib. xxvii. c. 9. ita ea de re scribit: *Cujus Prætextati auctoritate, justisque veritatis suffragiis, tumultu lenito, quem Christianorum jurgia concitabant, pulsoque Ursino, alta quies parata.* Similiter Honorius Augustus Bonifacii electionem, excluso Antipapa Eulalio, non modo ratam esse iussit A. 419. sed insuper lata lege sancivit, utrumque Papam pellendum Roma, si duo scissis populi studiis ordinarentur. Quam constitutionem ipsimet Papæ, Dionysio Exiguo curante, codici Canonum veteri Romano inseruerunt, unde in decretum transtulit Gratianus *can. 8. dist. 79. & can. 1. 2. dist. 96. & 97.* Cæsarum deinde per Italiam extincta auctoritate, cum Odoacer Herulorum Rex imperium Augustulo ereptum tenebat, ejus primarius Minister Romæ relictus, Basilius Patricius, & Præfectus Prætorio, Ecclesiæ non modo non molestus, sed etiam benevolus, congregatis in Basilica Vaticana Episcopis, lata lege vetuit, ut ne Papa, nisi ejus consilio & consensu, eligeretur, *can. 1. dist. 96.* cujus constitutionis mentio fit in *cap. Ecclesia 10. de constitut.* verba autem a Sigonio lib. xv. de occident. Imp. nobis servata, ita sese habent: *Quamquam studii nostri & religionis interest, ut in Episcopatus electione concordia præcipue conservetur Ecclesia, ne per*

electionis occasionem status civitatis in dubium revocetur, tamen admonitione lenissimæ Papæ nostri Simplicii, quam ante oculos semper habere debemus, hoc nobis sub obtestatione scitis esse mandatum, ut propter illum strepitum, & venerabilis Ecclesiæ detrimentum, si eum de hac luce transire contigerit, non sine nostra consultatione cujuslibet celebretur electio. Mox quum Ostrogothi, Odoacre occiso, Italiæ potiti essent, horum Rex Theodoricus, Arrianæ licet hæresi addictus, idem juris in Pontificis usurpavit, hoc onere adjuncto, ut consensus regius nummis redimeretur. Hinc Schismate A. 498. ob Symmachi & Laurentii electionem, exorto, ambo ordinati perrexerunt ad judicium Regis Theodorici, qui dum ambo introissent in Ravennam, hoc judicium æquitatis invenerunt, ut qui primo ordinatus fuisset, vel ubi pars maxima cognosceretur, ipse sederet in sede Apostolica, verba sunt Anastasii in Symmacho. Idem Theodoricus Joannem Papam in carcerem conjecit, in quo quum diem suum obiisset, Clerus populusque Romanus A. 526. designatum pridem a Theodorico Felicem IV. ab illius tum etiam defuncti nepote Athalarico suscipere coactus est, ac simul tristem conditionem subire, non habendi Pontificem, nisi quem Reges, iique Arriani, accepta pecunia probassent; quod ex Athalarici epistola liquet ad Senatum Urbis Romæ, apud Cassiodorum lib. VIII. ep. 15. Gratissimum nostro profitemur animo, quod gloriose domini avi nostri respondistis in Episcopatus electione judicio. Oportebat enim arbitrio boni Principis obediri, qui sapienti deliberatione pertractans, quamvis in aliena religione, talem visus est Pontificem delegisse, ut nulli merito debeat displicere.

§. VI.

Everso per Narsetem Gothorum regno, & Italia in provinciam Imperii orientalis redacta, quid juris Imperatores Græci in electionem Pontificis Romani sibi vindicarint, ex iis quæ supra §. 4. de potestate in Patriarchas diximus, facile conjicere licet. Plane omnia in manu eorum fuere: nec enim electionem sine venia principali susceptam, aut

cam

eam, quæ rite facta erat, solo dissensu suo tantum irritam reddere potuere; sed & eadem vœtigalis mansit, ex novo Justiniani decreto. Unde Gregorius I. ejusmodi temeritatem (sic enim vocat) acerbissime deplorat, vocatque Dei Ecclesiæ captivitatem, atque invehitur in Imperatorem talia sibi vindicantem in psalm. pœnitent. & lib. iv. ep. 4. unde eruditissimus Antonius Dadinus Alteserra; & ex eo Joh. Strauchius amœn. jur. Can. c. 18. ecl. vi. id observarunt. Nul-
lus Paparum ex illo tempore in possessionem missus, invito Imperatore Constantinopolitano, vel qui ministerium imperialis fastigii peragebat, Exarcho Ravennatensi, cujus ex A. 567. ad A. 752. terror erat magnus; quia militum robora habebat in manu, ut Italiam contra barbaros in obsequio retineret. Scaliger cum descripsit, Præfecti prætorio vicarium, qui Ravennam, cum aliquot urbibus, Imperii Romani nomine, adversus Longobardos tuebatur. Formulas litterarum humilimarum, quibus confirmatio ab Imperatoribus & Exarchis petita, habes in libro diurno Pontificum Romanorum, illustri illo antiquitatis monumento, quod Garnerius Societatis Jesu Theologus, anno demum 1680. Parisiis in lucem produxit. Principi ibi videmus lacrymabiliter cunctos famulos supplicare, ut dominorum pietas servorum suorum obsecrationes dignanter exaudiat, & concessa pietatis suæ jussione, petentium desideria, pro mercede imperii sui, ad effectum de ordinatione ipsius præcipiat pervenire &c. Exarcho autem ita: *Et ideo supplicantes quæsumus, ut inspirante Deo celsæ ejus dominationi, nos famulos voti compotes celeriter fieri præcipiat &c.* Tum ergo fuit tempus optimum, quo electis, & clero, populoque universo non modo supplicandum, sed potentes in aula, Patriarcha Constantinopolitanus, Judices & Archiepiscopus Ravennæ orandi, ut apud Principem, pro celeri expeditione negotiî, intercederent. Certe hujus consensus adeo fuit necessarius, ut Anastasius Bibliothecarius de vitis P. P. in Pelagio II. & Paulus Warnefridus de gestis Langob. l. 111. c. 20. tanquam singulare tradiderint, Pel-

la-

lagium II. *absque jussione Principis ordinatum esse*; & causam addunt, qua Archidiaconus Gregorius Constantinopolim missus, id excusavit, quod Longobardi Romam per circuitum obsiderent, nec posset quisquam a Roma progredi. Postea Constantinus Pogonatus Imperator, postulante Agathone, nummarius illum censum Exarchis ademit, relicta iis tamen confirmandi potestate, ut ex gestis Romanorum Pontificum retulit Gratianus *can. Agatho 21. Dist. 63.* & ex Anastasio constat, cujus ipsa verba adscribere non pigrabor, quia rudi licet stilo, fidelissime tamen omnia enarravit, adeo ut Baronius meliorem scriptorem in hac materia nobis deficere scripserit. Sic autem de vitis P. P. ad A. 678. *Hic Agatho, inquit, divalem jussione, secundum suam postulationem, ut suggessit suscepit, per quam relevata est quantitas, quae solita erat dari pro ordinatione Pontificis facienda: sic tamen, ut si contigerit post ejus transitum electionem fieri, non debeat ordinari, qui electus fuerit, nisi prius decretum generale introducatur in regiam urbem, secundum antiquam consuetudinem, & cum eorum conscientia & jussione debeat ordinatio provenire.* Idem mox ad A. 684. Benedictum II. ejusdem Pogonati jussiones clementissimas refert suscepisse, per quas concessit ut persona, qui electus fuerit, ad Sedem Apostolicam e vestigio absque tarditate Pontifex creetur. Quo ipso tamen necdum remissa est Exarchalis consensus necessitas; aut certe Ecclesia Romana eo privilegio frustrata fuit: ipse enim Anastasius, electo Conone A. 686. *Exercitus, Clerus, & populus, ait, missus ad excellentissimum Theodorum Exarcham, ut mos est direxerunt: & in Sergii hujus successoris vita Patchalem antipapam carpit, quod Joanni Patricio & Exarcho centum librarum auri promiserat, ut ne Sergio, sed ipsi suffragaretur.* Tandem Gregorius II. Leoni III. Maurico, propter edictum de imaginibus tollendis promulgatum, obedientiam renunciavit; coque defuncto ad Gregorium III. ordinationem jussio Exarchi ultimum postulata est A. 731. Is vero Pontifex, quia Paulum Exarchum anathematis fulmine percussit: cum pul-

fo Aistulpho, penitus abjectum Græcorum fuit imperium, & Exarchi dignitas extincta est. Vide Papebrochium in conatu chronic. Hist. pag. 116. cumque ex Garnerio supple, quem vidisse non videtur.

s. VII.

Vix dici potest, quam repente, Principum auctoritate semota, Roma viderit Cleri sui petulantiam, & magnatum intestina dissidia, populique tumultuantis rabiem, maxime in novelli Præfulis electione. Pericula intendebant alii, desiderio pristinae reip. formæ: alii stimulis avaritiæ incitabantur, ex qua audaciam erumpere Tullius scripsit. Primum igitur Langobardorum amicitiam ambiverunt Papæ, ut horum armis adversus injurias munirentur. Sed Hadrianus Papa, cum omni Clero & populo, in summas a Rege illorum Desiderio angustias redactus, communi consilio Synodi Romanæ, A. 773. celebratæ, Carolo M in memoriam beneficii, quo ipsis libertatem, pulsis Langobardis, reddiderat, Sedemque Papalem variis donis locupletarat, *omne suum jus, & potestatem eligendi summum Pontificem, & ordinandi Apostolicam sedem, dignitatemque Principatus concesserunt*: verba sunt diplomatis, quod integrum produxit Schardius Syntagm. de jurisdic. imp. pag. 249. cujusque particulam in Decretum retulit Gratianus *can. Hadrianus 22. Dist. 63.* Ut autem via & ordine nostra proficiscatur oratio, tres titulos diversos, quibus Carolo M. jus illud eligendi competiit, distincte considerabimus. Fundus hujus demonstrationis erit, Monachus Engolismensis in vita Caroli M. apud Chesnium tom. 2. *Post Pipinum Pium, inquit, regnavit Dominus Carolus, filius ejus; quem postea Romani sibi elegerunt Advocatum S. Petri, contra Reges Longobardorum. Deinde ipsum Dominum Carolum elegerunt sibi in Patricium Romanorum. Deinde elevarunt in Imperatorem & Augustum.* Primo loco ait, Carolum electum esse Advocatum S. Petri, adversus tyrannidem Langobardorum. Hujusmodi enim potente Defensore Ecclesia Romana hoc tempore potissimum indi-

digebat; qui ejus jura & facultates ferro & armis, contra validissimos hostes, tueri posset. Ejus autem electionis Symbolum fuit vexillum, cum cruce & clavibus, ad ipsum missum, ut infra dicemus. Nec tenuius tributum, in compensationem molestæ tutelæ, promitti potuit Summo huic Advocato; quam ut, exemplo plerorumque Advocatorum minorum, jus haberet ordinandi Sedem Episcopalem. Sigebertus Gemblacensis id affirmat dilerte, in chronico veteri, ante annum 1112. quo obiit, scripto: sic vero ad A. 773. *Hadrianus Papa, inquit, ad tuendas res Ecclesiæ Carolum Romam accersit. Qui pergens Papiam obsidet, ibique relictō exercitu Romam pervenit, sanctam resurrectionem ibi peregit: postea rediens Papiam cepit. Iterumque Romam rediit, Synodum constituit cum Hadriano Papa, aliisque c. lxxx. religiosis Episcopis & Abbatibus, in qua Hadrianus Papa, cum universali Synodo, dedit ei jus eligendi Pontificem, & ordinandi Apostolicam sedem, dignitatem quoque Principatus.* Bilem hic locus movit Baronio tom. 9. ad A. 774. n. 10. & A. 964. n. 22. quod Pontificiæ majestati, quam sibi extollendam sumserat, nimium adversatur: ideoque *stulte ante se id creditum* clamat, & Concilium illud Romanum a Sigeberto, *dolo malo, malisque artibus* confectum esse queritur, ut Henrici schismatici Imperatoris partes, quibus favebat, ejus auctoritate muniret adversus Palchalem. Sed Petrus de Marca, ipse licet a nobis dissentiens, lib. viii. de Concordia c. 12. fatetur, argumenta, quibus utitur Cardinalis, nimis levia esse, ad concilium hoc infringendum. Baluzius item ad Flori Diaconi librum de Elect. Episc. c. vi. & Florens ad decret. pag. 123. id agnoscunt: imo eruditissimus Mabillonius lib. 111. de re dipl. c. 3. n. 16. ex Joannis Beraldi chronico Casauriensis ostendit, Italos Sigeberti ætate Synodum illam agnovisse. Alia tamen movent Gretserus in apol. pro Baronio c. 1. & 2. Papebrochius in conatu chron. in vita Hadriani I. Pagius ad A. 774. n. 13. alique, ex quibus res nostræ minus securæ videntur. Urgent enim, in optima Sigebert-

geberti editione, a Miræo ex manuscriptis adornata, nullam ad eum annum istius Synodi mentionem fieri: Leonem quoque, mortuo Hadriano, absque ullo intervallo, suffectum esse a Romanis: & Natalem Alexandrum sæc. 8. ex ipsius Hadriani ad Carolum litteris probare, in causa Ravennatis Archiepiscopi, Regi tale quid petenti negatum esse. Verum ut mittam, quæ Goldastus, Conringius & Schilterus hisce regeſſerunt; mihi Sigeberti narratio vel ideo probatur; quia Collectores Canonum, ipsi æquales, & Gratiano superiores, eandem agnoverunt; nec quicquam Romani Correctores contra illum canonem notarunt; Monachus quoque Reicherspergensis, Sedi Romanæ alioquin non iniquus, in Chron. A. 774. idem asserit: maxime vero tabulæ, quibus Leo VIII. Othonis I. summam potestatem, *ad exemplum beati Hadriani* agnovit, hoc ipsum liquido confirmant. Quanquam a generoso & ad bene merendum Caroli animo forsitan non alienum fuerit, quod Marsilius Patavinus de translatione Imperii c. 8. & Sigonius lib. iv. de Regno Italiæ scribunt, ipsum eximia moderatione jure suo usum, & comitia antiqua, modo sine tumultu & ambitu fierent, clero & populo restituisse, salva sibi confirmandi facultate. Nam sub Italis quoque Herulorum, Gothorumque Regibus; sub Imperatoribus Constantinopolitanis & Exarchis, electus similiter assensu principali tantum confirmabatur: nec ampliora sibi fuisse Carolum, ex ejus epistola ad Leonem III. recens electum, quæ inter epistolas Alcuini, quarta & octuagesima est, non obscure colligere licet, in qua Leo *per electionis unanimitatem* designatus vocatur.

§. VIII.

Sed ut nullus dubitationi locus relinquatur, juvabit alteram *Patricii Romani* titulum, quo Carolus M. jus illud Papam eligendi, aut saltem confirmandi accepit, illustrasse: de quo tot loquuntur historiarum monumenta; ut & Lectoris & meo otio abuterer, si multos ea de re auctores cumula-

mularem. Ipse in scripta ad Leonem III. epistola, & innumeris diplomatibus, apud Dubletum, Ughellum, Puricellum, Mabillonem, Baluzium & alibi hac formula usus est: *Carolus gratia Dei, Rex Francorum & Langobardorum, ac Patricius Romanus*. Gratianus annum 774. indicat, quo *Patriciatus dignitas* Carolo concessa, *dist. 63. c. 23.* quin ipse Hadrianus in litteris ad Bertherium Episcopum Kal. Jan. A. 775. datis, epocham signat: *imperante piissimo Rege Carolo, anno primo Patriciatus ejus*, apud Labbe t. 1. pag. 109. Nec multum abludit Albericus ad A. 776. *Ab hoc anno per annos xxv. Karolus fuit simul Rex Francorum & Langobardorum, & Patricius Romanorum, antequam fieret Imperator.* Quid autem sublimioris dignitatis aut potestatis ille *Patricii character* attulerit Carolo, non una est eruditorum sententia. Nimis abjecte de ejus Majestate sentiunt, qui nudum nobilitatis Romanæ, aut officii Constantinopolitani nomen fuisse arbitrantur. Contra nimium extollit Meursius, in Glossario, quum Occidentalibus Patricios Romanorum fuisse, ait, quos nunc Reges Romanorum appellamus. Alemannus, Fresnius & Mabillon Præfecturam Urbis & circumjacentium regionum explicarunt, quæ a Patriciis Exarchis regi solebat. Verum licet ab his extinctis nomen desumptum videatur, reipsa tamen Carolus excellentius jus, supremam nempe jurisdictionem in urbem Romam, & defensionem Ecclesiæ Romanæ, obtinuit; nec auctoritatem suam ab Imperatore Constantinopolitano, ut pristini Exarchi, sed *jure victoriæ* accepit; ut Sigonius scribit. lib. 1v. de Regno Italiæ. *Dignitatem Principatus* vocat Sigebertus ad A. 773. Inde circulus aureus Patriciatus insigne; quo Carolus M. coronatus cernitur, in tabella vetere, a Petavio in lucem prolata, quo etiam, aut potius simili, Reges Galliæ primæ stirpis, & Hispaniæ olim usi fuerunt. Hinc Paulus Diaconus in dedicatione Festi, Carolo necdum Imperatori facta, *Romuleam vestram civitatem* dixit: & in libello de Metensibus Episcopis, de eodem loquens: *Romam*, ait, *duris an-*

angustiis eximens, suis addidit sceptris. Inde nunc etiam constat, quam recte Carolus M. sibi arrogarit jus ordinandi Sedem Romanam, quo Exarchi Græcorum minores ante gavisi fuerant. Neque obmoveat quis nobis, Carolum Martellum, Majorem domus, *Exarchum* dici in Chronico Fontanellensi. eundemque *Consulatum Romanum*, idest Patriciatum, a Gregorio III. obtinuisse, pro defensione Ecclesiæ Romanæ: Pippinum vero Regem, ejusque filios, Carolum & Carolomannum a Stephano II. *Patricios Romanorum* factos, nec tamen Pontificum electionibus se immiscuisse. Bene etenim monuit Mabillon lib. 11. de re diplom. c. 3. n. 9. & majore apparatu demonstravit Pagius in Crit. ad A. 740. n. 4. seqq. regno Langobardorum nondum occupato, honorarium duntaxat Exarchi, Patricii, & Consulis Romani titulum fuisse. Unde & Carolus, ante regnum illud occupatum, titulo hoc abstinuit, nec Pippinus eo sine re uti voluit, qui quicquid juris nactus in Exarchatum Ravennæ, id Ecclesiæ Romanæ manu liberali concesserat, Anastasio, Massono & Rubeo auctore. Sed Carolus, regno Langobardorum acquisito, tanti fecit Patricii dignitatem, ut eam mortuo Hadriano sibi a Leone III. & subiecto sibi populo Romano, confirmari curaverit, quemadmodum Annales Adonis; Reginonis & Auctoris incerti testantur. Annales Laurisheimenses, quos Oddo Cluniacensis Eginharto adscribit, ad A. 796. *Mox per legatos suos Leo Claves Confessionis S. Petri, ac Vexillum Romæ Urbis, cum aliis muneribus, Regi misit, rogavitque, ut aliquem de suis Optimatibus Romam mitteret, qui populum Romanum ad suam fidem atque NB. subjectionem per sacramenta firmaret. Missus est ad hoc Angilbertus, Abbas monasterii S. Richarii.* Neque tamen cum illis faciam, qui missioni Clavium & Vexilli unice inhaerent, atque ex ea maximum argumentum duci posse opinantur. Ad Caroli enim Magni avum, Carolum Martellum, jam ante Papa Gregorius III. *claves venerandi sepulchri, cum vinculis Sancti Petri, & muneribus magnis destinavit*, ut Frede-

garii continuator ait cap. 110. Solebant etenim Pontifices Romani ad Reges & Principes, de limatura catenarum S. Petri, pro ingenti dono, *cum aliis muneribus*, ait Eginhartus, aliquid mittere, & in aurea clavi, instar illarum, quibus confessio, seu sepulchrum Petri clauderetur efficta, includere, quemadmodum Vir illustris & singularis eruditionis Fresnius ostendit in voce *Claves*. Vetus quoque fuit institutum, ut Papæ Vexillum S. Petri, clavibus geminis insignitum, mitterent ad Principes Romanæ Ecclesiæ, qui in Paganos, schismaticos, aut hostes Ecclesiæ Romanæ expeditionem suscepturi essent. Formula benedictionis & traditionis extat in Ceremoniali Romano lib. 1. sect. 7. Variæque ad Reges, Duces & Comites missi Vexilli exempla collegit Philippus Mazerius in vita S. Petri Thomasi Patriarchæ CP. cap. 3. apud Boland 29. Januar. & Nicolaus Alemannus in Dissert. de Lateranensi parietinis cap. 14. & 15. An vero *Vexillum Romæ Urbis* diversum a Vexillo S. Petri, & proprium dominii in Urbem Symbolum fuerit, non satis liquet. Poeta Saxonicus lib. 111. de Gestis Caroli M. anno eodem 796. de pluribus vexillis loquitur: *vexillaque miserat Urbis Romuleæ Carolo*. Sed pictura illa, qua Leo III. triclirii, a se in Lateranensi Palatio ædificati, cameram exornavit, quamque Nicolaus Alemannus in dicto de Lat. pariet. libro cap. 10. delineatam exhibuit, satis indicat, vexillum Petri fuisse: is enim Apostolus folio insidens, dextra stolam Leoni, Carolo vexillum sinistra porrigit, ut defensor Ecclesiæ factus esse posteris indicaretur. Veram hujus musivi, a plerisque male explicati, interpretationem dedit Pagius in Crit. ad A. 796 ad quem adiisse non poenitebit. Quicquid ergo juris habuit Carolus, ex pacto illo, cum Hadriano inito, repetendum est, cujus ipse meminit, in laudata ad Leonem epistola: *Sicut enim, scribit, cum Beatissimo Prædecessore Vestræ Sanctæ Paternitatis pactum iniit, sic cum Beatitudine Vestra ejusdem fidei & caritatis inviolabile fœdus statuere desidero*. Pacto autem imperium in Urbem &

Du-

Ducatum Romanum comprehensum fuisse, supra vidimus, & firmatur ex Ceremoniali Romano, quod Mabillon tom. 11. Musæi Italici promulgavit. In eo enim n. 24. ubi de Missa, quam initio Quadragesimæ Romanus Pontifex celebrat: *Sabbato tempore I. adriani institutum est, ut steteretur pro Carolo Rege, antea vero non fuit consuetudo.* Maxime autem id patet ex memoria pacti illius versibus comprehensa, in Appendice Antiq. Lect. pag. 1163. ubi de Christo, *anonymus* ita cecinit:

*Tradit oves fidei Petro Pastore regendas,
Quas vice Hadriano crederet ille sua:
Quin & Romanum largitur in Urbe fidelis
Imperium famulis, qui placere sibi:
Quod Carolus mire præcellentissimus hic Rex
Suscipiet dextra glorificante Petri.*

§. IX.

Nunc revertamur ad monachum nostrum Engolismensem, qui tertio gradu Carolum in Imperatorem levatum ait; unde jus potissimum ordinandi Sedem Romanam repeti debet. Quum enim dignitatis Imperatoriæ titulus, cum Momyllo Augustulo, ante annos ferme trecentos defecisset, & Orientis Imperatores jampridem tutelam Ecclesiæ Romanæ deseruissent, Carolus vero magnam extincti Imperii partem possideret, ejusque ingentia merita rependi æquum esset, placuit renovare imperium, ut numismata Caroli demonstrant, in quibus **RENOVATIO IMPERII** legitur. Jus imperii armis sibi pepererat Carolus, Leo autem III. Papa, tanquam primus civium, & Senatus Populique Romani interpres, consecrationis ceremoniam peregit; pariter ac Constantinopolitani, jure ac proprie **ΘΕΟΣΤΕΦΕΙΣ**, a Deo coronatos se nominantes, a Patriarcha coronam accipiebant. Immo sicut in Germania Moguntinus vel Coloniensis; in Italia Mediolanensis; Rhemenis in Gallia; in Anglia Cantuariensis; in Hungaria Strigoniensis; in Bulgaria Trinovitani Archiepiscopi jus ungendi sibi vindicarunt: sic collator

tor muneris hujus erat *Deus omnipotens*, qui, ut verbisutar Moissiacensis Chronici, *has omnes sedes in potestatem ejus concessit*: non Pontifex, qui vero nomine possit, non datur Imperii, sed confirmator haberi, Guntherus cecinit, lib. vi. Ligurini v. 615. Tunc ergo Carolus summum Imperium in Urbem, ejusque Sedem Episcopalem, in jus denique universale a Constantinopolitanis derelictum, per transactionem vero cum Nicephoro & Michaelē abdicatum, acquisivit. Hinc antiquissimæ ejus statuæ aureæ: *ITALIA, ROMA, GALLIA, GERMANIA* inscriptum; ipse cives Romanos inter subjectos suos recenset lib. vi. Capit. & in denariis Romanis, sive ab ipso, sive, ut Vignolius contendit, a Pontificibus cufis, Caroli effigies expressa cernitur, apud le Blanc dissertation sur quelques monnoyes de Charle Magne. Hinc a Pontifice Romano, more antiquorum Principum, adoratus dicitur, in annal Franc ad A. 801. & clementissimus filius a Leone III. vocatur, in epistola v. a Conringio edita. Nunc etiam plenissimam Pontificem constituendi, aut quod nemo negabit, de ejus electione ante ordinationem cognoscendi potestatem Carolus accepit; qui testibus Annalibus Loiselianis ad A. 801. *Romanæ Urbis & Apostolici totiusque Italiæ, non tantum publicas, sed etiam Ecclesiasticas, & privatas res ordinavit*: quique adhuc Patricius, Romam venerat propter reparandum, qui nimis conturbatus erat, Ecclesiæ statum, ibi totum hyemis tempus protraxit, ac Imperatoris & Augusti nomen accepit, Eginharti verba sunt, qui tunc affuit, & Carolo a secretis, in ejus vita c. 28. ubi Cl. Schmincke videatur. Ex hoc tempore per excellentiam Tutor & Defensor Ecclesiæ, adversus infideles, hæreticos, & seditiosos fuit, & ita nominatur apud Monachum Sangallensem lib. i. de Carolo Magno c. 28. Cum autem ibidem aliquot diebus reparandi exercitus gratia miraretur, convocavit Antistes Apostolicus de vicinis partibus, quoscumque potuit, & coram positis illis, & invincibilibus gloriosi Caroli Comitibus, nihil minus suspicantem pronunciavit Imperatorem, Defensoremque Ecclesiæ

sic Romanæ. Non mirum igitur, si Carolus, Imperium assecutus, a Patricii titulo abstinuit, vel ut monachus Engolismensis apud Pithœum p. 262. ait, patricii nomen ei *ablatum* est. Licet enim Patriciatus dignitas & vis non esset extincta, insigniore tamen titulo commutata erat, & quamvis ejus potestas haud subdita fuerat Imperatoris majestati, minor tamen erat, & defensionem Ecclesiæ titulus Imperatoris continebat. Duo nihilominus loca affert Mabilion lib. 11. de re diplom. c. 3. in quibus Carolus, jam Imperator, Patricii nomine afficitur; sed Notariis ea accepta fert, qui Cancellariæ stylum non bene callebant. Palchalis & Hadriani II. Paparum epistolas in quibus Ludovicus & Carolus Calvus postea *Patricii* appellati, laudavit Frêne in *Patricius*.

s. X.

Ex hoc tempore summa Imperatorum, in confirmandis Pontificibus, stetit auctoritas; nec Caroli M. successores ante eorum inaugurationem peragi siverunt, quam ex relatione Missorum regionum constitisset, electionem rite factam esse; arque Pontifex electus jurejurando promississet, se Principi suo fore fidelem: id quod Stephanus Baluzius in notis ad epistolam Gregorii IV. quam Agobardi operibus subjicit, fusius probavit. Nos ad Stephani IV. exemplum provocamus, qui simulac Leonis III. successor designatus, ad Ludovicum legationem direxit, *quæ super ordinatione sua ipsi satisfaceret*, ait auctor vitæ Ludovici pag. 365. Inde lux ejusdem Stephani decreto, in *can. 28. Dist. 63.* quod quidem Baronius figmentum schismaticorum vocat, sed non probat. In eo autem A. 816. ad scandala vitanda & violentiam reprimendam, cavetur; *ut ab omnibus electus presentibus Legatis Imperialibus consecratur.* Verùm anno sequente 817. Ludovicus Pius juri suo renunciassè fertur apud Guillelmum Bibliothecarium, & Ivonem Carnotensem part. 5. c. 16. apud Gratianum *can. 30. Dist. 63.* Sigonium lib. 1v. de Regno Italiæ pag. 106. & Sirmondum t. 11. Concil. Gall.

pag. 443. At pactum illud cum veritate historica pugnare, post alios Viros eruditos, ait Schilterus de L. E. G. lib. 11. c. 12. multa insolita in eo observavit Mabillon lib. 11. de Re dipl. c. 3. n. 13. nec dubitavit Cl. Pagius Senior donationem istam æque commentitiam appellare, quam quæ Constantino affingitur, in Crit. ad A. 817. n. 7. Instat tamen, cum Natali Alexandro, junior Pagius in addendis ad tom. 11. breviarii Pontif. nec solum electionem, sed & consecrationem Pontificis hac ætate, inconsulto Imperatore, factam esse, probare annititur ex Floro Diacono, qui circa hæc tempora A. 820. scripsit. Verba ejus in excerptis libri de electione Episcoporum § 6. in fine operum Agobardi, & in Bibliotheca maxima Patrum t. xv. sunt ista: *Sed & in Romana Ecclesia, usque in præsentem diem, cernimus, absque interrogatione Principis, solo dispositionis judicio, & fidelium suffragio legitime Pontifices consecrari.* Multum se torset Baluzius, ut nodum hunc solveret, sed excors, & superstitioni immersum Ludovici Pii ingenium facit, ut ferme credam, ipsum juri suo renunciasse, aut saltem frigide illud exercuisse: qui, ut Theganus de ejus gestis cap. 20. refert, in sacro studio & psalmodia occupatus, nihil aliud egit, & Episcopis nimium indulgit: unde spreta auctoritas, nomenque regnantis evilit. Recuperavit autem imperii auctoritatem octo annis post, quando Eugenius II. ad postulationem Lotharii, fortioris & prudentioris imperii paterni collegæ, Clerum populumque Romanum jurejurando obstrinxit A. 825. se non nisi in præsentia Legatorum Imperatoris ratam habituros Pontificis consecrationem. Continuator Pauli Diaconi in corpore Historiæ Franc. his verbis conceptis quemlibet jurasse refert: *Non consentiam, ut aliter in hac Sede Romana fiat electio Pontificis, nisi canonice & juste, secundum vires & intellectum meum: & ille, qui electus fuerit, me consentiente, consecratus Pontifex non fiat, priusquam tale sacramentum faciat in præsentia Missi Domini Imperatoris & populi, cum juramento, quale Eugenius Papa, sponte pro*

pro conservatione omnium, habet præscriptum. Vi hujus jurisjurandi Eugenii successores Gregorius IV. & Sergius II. non prius ordinati sunt, quam Ludovicus & Lotharius per Missos suos examinassent, an rite electio facta esset, ut præter auctorem vitæ Ludovici Pii pag. 387. Annales Bertiniani disertis verbis testantur ad A. 827. In Eugenii locum Valentinus Diaconus, a Romanis electus, vix unum mensem in Pontificatu complevit: quo defuncto Gregorius Presbyter Tituli S. Marcelli electus, sed non prius ordinatus est, quam Legatus Imperatoris Romam venit, & electionem populi, qualis esset, examinavit. Iterum quum Ludovico extincto, imperialis dignitas soli Lothario cesserat, iidem Annales A. 844. de Gregorii successore Sergio II. Gregorius Romanæ Ecclesiæ Pontifex decessit: cui Sergius succedens, in eadem sede substituitur: quo in sede apostolica ordinato, Lotharius filium suum Hludovicum Romam cum Dragone, Mediomatricorum Episcopo dirigit, acturos ne deinceps decedente Apostolico quisquam illic præter sui iussionem, Missorumque suorum præsentiam ordinetur Antistes. Idem tradit Sigebertus Gemblacensis ad 844. quem ea propter schismaticum vocat Baronius, reprehensus a Mabillone præfat. ad part. 2. sæc. IV. Bened. c. ult. & lib. III. de re dipl. c. 3. §. 16. Rursus Sergii successorem Leonem IV. Romani sine Imperiali non audebant auctoritate futurum consecrare Pontificem, inquit Anastasius pag. 258. Et denique eandem fidem per omnia & in omnibus servavit Benedictus III. cujus electione A. 855. peracta, Proceres, ut consuetudo prisca exposcit, invictissimis Lothario & Ludovico destinarunt Augustis, inquit Anastasius in ejus vita; ex quo can. 31. Dist. 63. lucem mutuatur.

§ XI.

Quum Lotharius, deposito imperio, abierat ad plures, Ludovicus II. vestigiis paternis insistere voluit, nec ratam habere Pontificis electionem, cui consensum non accommodasset; sed auctoritas ejus mox infringi ac cessum ire coepit. Nicolaum I. magis manu Imperatoris, quam benevo-

lencia populi & cleri electum esse, Annales Bertiniani tradunt ad A. 858. Deinde hoc defuncto generaliter Flodoard Hist. Remens. lib. 111. c. 17. scribit: *Nicolaus Papa obiit. cui Hadrianus II. Papa, electione clericorum, & consensu Ludovici Imperatoris, in Pontificatu successit.* Sed plenius rem narrat Anastasii continuator in vitis Pontif. A. 867. ubi de Hadriano II. electo: *Missi Principis Ludovici id moleste tulere, indignati scilicet, non quod tantum virum nollent Pontificem, quem nimirum anxie cupiebant; sed quod se, dum praesentes essent, Quirites non invitaverint, nec optata a se futuri Praesulis electioni interesse consenserint. Qui accepta ratione, quod non Augusti causa contemtus, sed futuri temporis hoc omisum fuerit omnino respectu: ne videlicet Legatos Principum in electione Romanorum Praesulum mos expectandi, per huiusmodi fomitem inolesceret. Qua ratione accepta, illi omnem suae mentis indignationem medullitus sedavere, & ad salutandum electum etiam ipsi humiliter acceperunt.* Eadem verba in can. 29. Dist. 63. non modo referuntur, sed insuper ex libris Pontificalibus talia subiunguntur, ex quibus, non obscure constat, quo animo Ludovicus fuerit; & quam exigua pars pristinae auctoritatis reliqua fuerit Missis Imperatoris, licet forte in Urbe commorarentur. Plane decem, qui Hadrianum istum II. exceperunt, Pontifices proxima post electionem Dominica ordinatos esse, scribit Papebrochius, certissimo recuperatae libertatis indicio, sane verissimi, si temporis rationem habeamus. Post obitum enim Ludovici, cum Carolus Calvus vero successor, Johannis VIII. beneficio, imperium praeripuisset, insolentiores Clerici facti sunt, nec expectarunt Imperatoris confirmationem. In Epistolis suis Lupus commendat Calvum hunc, quod mortuo Ercanrado, Episcopo Parisiensi, successorem dare noluit, sed melius rem omnem clero commisit, eadem sine dubio & majora permittens clero Romano. *Renovavit pactum cum Romanis, perdonans illis jura Regni, & consuetudines illius,* ait Eutropius Presbyter apud Goldastum t. 1. Monarch. Cui Pe-
trus

trus de Marca & Natalis Alexander adstipulantur. Idem exemplum secutus est Carolus Crassus, qui prout Canonici jus constituendi Episcopum concesserat in diplomate, apud Schatenium Ann. Paderb. lib. 111. sic apud Papebrochium contentus fuisse dicitur, Joannem Ticinensem Episcopum, & electioni & consecrationi Stephani V. honoris potius, quam juris causa, tanquam Missum Imperatorium, interfuisse. Sed Annales Lambeciani ad A. 885. *Romani, Pontificis sui morte experta, Stephanum in locum ejus constituerunt. Unde Imperator iratus, quod eo inconsulto ullum ordinare præsumserunt, misit Liutwardum & quosdam Romanæ Sedis Episcopos, qui eum deponerent, quod perficere minime potuerunt. Nec mirum! quia Hadrianus III. Stephanum antecedens, jam A. 884 legem tulisse fertur: ut Pontifex designatus consecrari, sine præsentia Regis, aut Legatorum ejus posset, auctore Martino Polono in vita Hadr. pag. 364. & Sigonio lib. v. de Regn. Ital. Sed caruit illa effectû, & redditus imperio honos, postquam, Arnulpho imperante, Stephanus VI. Papa A. 897. Eugenianum jusjurandum §. præcedente memoratum renovavit, sanciendo: ut ab omnibus electus præsentibus Legatis Imperialibus consecraretur: ne Ecclesia scandalizetur & Imperialis honorificentia minuatur: ut refert Gratianus can. 28. Dist. 33. Repetiit hæc rursus Joannes IX. in Concilio Romano: quod cum Baronius non animadvertēbat, canonem illum sublestæ fidei pronuntiavit, notatus eo nomine apud Pagium ad A. 897. n. 4. & 898. n. 6. Verba canonis x Concilii Romani eadem fere sunt, quibus Stephanus IV. olim decreverat idem, in can. 28. Dist. 63. digna tamen quæ hic referantur: *Quia Sancta Romana Ecclesia, cui Deo auctore præsidemus, plurimas patitur violentias, Pontifice obeunte: quæ ob hoc inferuntur, quia absque Imperatoris notitia & suorum Legatorum præsentia, Pontificis fit consecratio, nec Canonico ritu & consuetudine ab Imperatore directi intersunt Nuntii, qui violentiam & scandala in ejus consecratione non permittant fieri; volumus ut id deinceps abdicetur, & constituendus Ponti-**

sex convenientibus Episcopis & universo Clero eligatur, expectante Senatu & populo eum, qui ordinandus est: & sic in conspectu omnium celeberrime electus ab omnibus, præsentibus legatis Imperialibus, consecratur. Illud tamen negare non ausim, per summam Caroli Crassi imprudentiam, Cæsarum jura tum jam imminuta & fracta, nec magnam Arnulphi aut Ludovici circa Paparum electiones auctoritatem fuisse. Penes illos tum promotio ad pontificatum, qui factionibus & clientelis potentiores; quia largitione & scelere dignitas quærebatur. Non ætas, nec eruditio, neque pietas attentata: cœmtis suffragiis electi præter nomen Pontificis nihil habuerunt. Scilicet ut similes habent labra lactucas, nec quicquam adeo inflatere potest sensus humanos, quam vita regentum: ita monstrofi presbyteri pares sibi creantur Præsules; homines ad mores sæculi accommodatos, doctrina putidissimos, vita turpissimos; quorum prava exempla sacerdotum & populi animos fœdarunt, maxime hac ætate, quæ sæculum ignorantie ab eruditis vocatur. Vin aliam causam? Non extabant, qui Paparum vitia coercerent, ait Platina in Sergio III. Nihil hic comminiscor, nec ventosæ sequor suffragia plebis. Auctores habeo omni exceptione majores, Abericum monachum & Luitprandum: sed præstabit ipsius Cardinalis Baronii, maximi Sedis Romanæ fulcri, ingenuam confessionem recitasse ad A. 912. n. 8. Quæ tunc facies, quærit, sanctæ Ecclesiæ Romanæ? quam fœdissima: quum Romæ dominarentur potentissimæ æque ac sordidissimæ meretrices; quarum arbitrio mutarentur sedes, darentur episcopi, & quod auditu horrendum & nefandum est, intruderentur in Sedem Petri eorum amassii pseudopontifices, qui non sunt nisi ad consignanda tanta tempora in catalogo Romanorum Pontificum scripti. Quis enim a scortis hujusmodi intrusos sine lege, legitimos dicere posset Romanos fuisse Pontifices?

s. XII.

Per integrum ferme sæculum monstris hilce Sedes fuit inquinata, donec Germanici Imperatores mediū intercesserunt.

runt. Otho I. jam ante augustali diademate ornatus, ut Romanos perjuros in futurum coereret, & foeda eorum ambitione sublata, quietem Ecclesiæ Papisque conciliaret, A. 964. cum Leone VIII. pactus esse fertur, ut ne Romani Pontificem crearent ullum, quem ipse ejusve successores non probarent; quod pactum in concilio Generali Romæ in Lateranensi habito, his verbis firmatum est: *Constituimus, confirmamus & roboramus, per manum Apostolicam, dignitatem concedimus atque largimur Domino Othoni I. Augusto, Teutonico Regi providentissimo, spirituali in Christo filio nostro, ejusque successoribus hujus regni Italie in perpetuum, tam sibi facultatem eligendi successorem, quam summæ Sedis Apostolicæ Pontificem ordinandi.* Diploma ex vetustissimo codice Florentino descripsit Theodoricus a Niem de investit. episc. & Goldastus integrum posteris servavit tom. 1. Const. Imp. ad A. 964. Ex hoc pacto *ad exemplum* priorum inter Carolum M. & Hadrianum I. ut & inter Lotharium atque Eugenium inito, jura Imperii Romani ad Germanos delati, & fundamenta juris publici a recentioribus petita sunt: quamvis eo argumento non adeo opus fuerit; quum Ludovicus Antonius Muratorius adversus Fontaninum ostenderit, non minore potestate Othonem Romæ gavilum, quam Berengarii, qui summum in Italia imperium tenuerunt. Liquet inde Othonem, & omnes ejus Augustos successores, ex victoria & regia potestate, jus nactos esse, constituendi Episcopum Romanum; vel si ejus permisso, a cuncto clero & universo populo quis eligeretur, non debuisse, nisi dicto Rege laudatum & investitum, consecrari. Pariter enim ac Carolus M. in nummis & bullis renovationem Imperii a se factam testatus est; sic in nummo Othonis apud Mabillon *supplem. de re dipl. c. x1. §. 3.* RENOVATIO IMPERII ROMANORUM legitur. Et quemadmodum Carolus contra Desiderii oppressionem; sic Otho contra Berengarii tyrannidem invitatus, suppetias tulerat Sedi: idem ergo operæ & viæ præmium merito ab ea accepit; quod jam solo Patricii titulo ipsi compe-

petebat. In privilegio enim anno præcedente 963. monasterio Laurishamensi concessio: *Otto Dei gratia Rex Francorum & Longobardorum*, ac *Patricius Romanorum* vocatur. in Chron. Laurish. apud Freherum pag. 69. & apud Meibomium ad Wittichindum pag. 123. Hoc jure Johannem XII. hominem sceleratissimum Pontificatu pepulerat, qui *totam vitam suam in adulterio & vanitate duxit*, ait Petrus Bibliothecarius: cui etiam, auctore Luitprando lib. vi. c. 17. in Concilio Romano objectum, quod in amorem diaboli vinum bibisset; quique in adulterio deprehensus interiiit, ut Platina testatur: Eadem ergo per omnia utriusque constitutionis Hadriani & Leonis est ratio; & illa, si firmo stat talo, non magna causa fuit, cur aut Baronius tom. x. Annal. ad A. 964. n. 26. hanc in dubium vocaret; aut Pagi ad A. eund. n. 6. eam sub finem sæculi septimi decimi a schismaticis confectam clamaret; aut Natalis Alexander t. vi. Hist. Eccl. sæc. 9. c. 1. eam hominibus otiosis & imperitis acceptam ferret. Decreti enim istius compendium olim sæculo xii. Ivo Carnutensis, in Gallia Episcopus, in Pannomia sua lib. viii. c. 136 & Gratianus *can. 23. Dist. 63.* dederunt: ejusque fidem Crantzius l. iv. Metrop. c. 10. Sigonius l. vii. & viii. Hist. Ital. & Petrus de Marca lib. viii. de concord. c. 12. §. 10. sunt secuti. Nec tamen diffiteor, temporibus illis diris, quibus bella inter Regnum & Sacerdotium flagrarunt, membranas & diplomata comminisci, eaque juxta caminos & loca fuliginosa squalore, tanquam antiquitatis larva, infulcare, criticum ludum fuisse. Nullum tam impudens mendacium hic est, ut teste careat, & prior fidei lapsus, quia ab utraque parte falsæ rei graves auctores existunt. Niniū certe nobis blandimur, si Iliacos intra muros & extra hic peccatum esse negemus. Attamen tanta argumentorum pondera adversus illam chartam, nondum in medium prolata sunt, ut vadium nobis deferendum sit; aut nuper mirari debuerit Vir Clarissimus, *Viros historia & critica artis peritos ejus ge-*
ne-

novis nemis fidem potuisse habere. Qualiacunque enim pacti fuerint verba, pactum initum esse omnes affirmant, & quod ad ejus tenorem attinet, acta nobis adstipulantur. Quum enim Johannes XII. adventante Othone, fuga sibi consulisset, Clerici atque Laici Romani, uno consensu atque voluntate, rogaverunt Imperatorem, ut Sanctæ matri Ecclesiæ dignum Pontificem & pium Rectorem tribueret; verba sunt Petri Bibliothecarii in vita Joh. XII. Adhæc Chronographus Farfensis tom. III. apud Duchonium refert, interempto Johanne XII. in cujus vivi locum Leo VIII. surrogatus fuerat, Romanos, antequam ad novam Pontificis electionem procederent, Othonis consensum expetiisse: Romanorum nuntii ad eum in civitate Reatina venerunt, mortemque Johannis intimantes, Benedictum ei Diaconum petierunt successorem, sed minime obtinere valuerunt. Revertentes autem Legati eundem elegerunt Benedictum, sine consensu Imperatoris. Unde Imperator magis in iram exarsit, & civitatem undique gyrauit, & in tantam penuriam adduxit, ut modius fursuris venderetur triginta denariis. Coangustati vero Romani innocentem Benedictum Imperatori tradiderunt, & dominum Leonem Papam coacti receperunt; spondentes ei & Domino Imperatori super corpus B. Apostoli Petri. Clarius Luitprandus lib. VI. c. 6. Cives, inquit, sanctum Imperatorem cum suis omnibus in Urbem suscipiunt, fidelitatemque promittunt, hæc addentes & firmiter jurantes, nunquam se Papam electuros, aut ordinaturos, præter consensum atque electionem Domini Imperatoris Othonis, Caesaris Augusti, filiique ipsius Regis Othonis. Quid mortuo Leone factum, narrat Continuator Reginonis ad A. 965. Eodem anno dominus Papa Leo obiit. Tunc Legati Romanorum Imperatorem pro instituendo, quem vellet, Romano Pontifice in Saxonia adeuntes, honorifice suscipiuntur & remittuntur. Et Otgarus Spirensis Episcopus, & Luitprandus Cremonensis, cum iisdem Romam ab Imperatore diriguntur, tunc ab omni plebe Romana Joannes eligitur. Denique quid multis opus est? Ipse Baronius tom. X. ad A. 962. Othonis diploma refert, cujus

autographum, aureis litteris exaratum, in castello S. Angeli asseruari ait, in quo decretum Eugenium, § præcedente memoratum, confirmatur Othoni, & prohibetur electus Pontifex consecrari, priusquam promissionem fecerit, qualem Leo VII. sponte fecerat. Verba ejus sunt sequentia: *Salva in omnibus potestate nostra, & filii nostri, posterorumque nostrorum, secundum quod in pacto, & constitutione, ac promissionis firmitate Eugenii Pontificis, successorumque illius continetur, id est: Ut omnis Clerus & universa populi Romani nobilitas, propter diversas necessitates, Pontificum irrationabiles erga populum sibi subiectum asperitates retundendas, sacramento se obligent, quatenus futura Pontificum electio (quantum uniuscujusque intellectus fuerit) canonice & jure fiat, ut & ille qui ad hoc sanctum atque Apostolicum regimen eligitur, nemine consentiente consecratus fiat Pontifex, priusquam talem in præsentia Missorum nostrorum, vel filii nostri, seu universæ generalitatis faciat promissionem, pro omnium satisfactione, atque futura conservatione, qualem dominus & venerandus pater spiritualis, pater noster Leo sponte fecisse dignoscitur.* Hoc vero diploma apud Severinum Binius tom. 111. Concil. gen. p. 2. pag. 1061. itidem laudatum, Melchior Goldastus supposititium esse censuit, tom. 11. Constit. imp. pag. 393. sed ejus rationes vanas pronuntiavit Pagius, contra certissimum, ut vocat, antiquitatis monumentum. tu vide Cl. Simonis Henr. Hahnii introd. in Hist. Germ. p. 11. c. 3. §. 13. juncto Papebrochio in conatu chron. hist. pag. 161.

§. XIII.

Ex ista igitur, quantum satis est nostro instituto, probata & adjurata Synodi generalis lege, non Othoni tantum Magno, aut ejus Augustæ familiæ; sed omnibus etiam ejus successoribus, & nationi Germanicæ, æternum jus in Italiam, sedemque ejus Episcopalem quæsitum est; ut Pontifices constituere, eosdemque deicere potuerint, si sceleris convicti aut impietatis. Statim sub Othone II. Germanicis & Francicis bellis implicito, quum Romani, parandæ libertatis

tatis avidi, quos libido ferebat, Pontifices creabant, Imperator in Italiam expeditionem suscepit, & præsentibus Missis suis, Benedictum VII. creari curavit: sicut Marianus Scotus, Sigebertus & Sigonius tradidere. Ab eodem S. Majolus, Abbas Cluniacensis, *ad calmen Apostolicæ dignitatis precibus impelli cæpit continuatis*, ait Syrus Monachus in vita Majoli LIII. c. 8. Jam vero Gregorium V. eoque defuncto Sylvestrum II. quis elegit, quis alius ad fastigium evexit, quam Otho tertius id nomen Imperator? Ita de eo Glaber Rodolphus lib. 1. Hist. c. 4. *Contigit*, ait, *initio imperii Othonis, ut Sedes Apostolicæ Urbis Romæ proprio viduaretur Pontifice. Ipse vero illico Imperiali usus præcepto, quenquam suum consanguineum elegit, atque ex more in sede Apostolica sublimari mandavit.* Quum deinde Crescentius Consul alium Pontificem instituisset, Otho Urbe occupata, Crescentium in trabe excelsa suspendi, Papæ autem, ab ipso electo, manus amputari, & oculos erui præcepit: quam historiam Dithmarus prolixè narravit, qui hunc quoque Othonem *Advocatum Ecclesiæ Sancti Petri effectum tradit* lib. IV pag 353 cujus summam quoque potestatem in exarchatum & ducatum Romanum Muratorius satis adstruxit. Rursus Henricus II. sub initium sæculi XI. Gregorium quendam schismaticum in ordinem redegit, atque Benedictum VIII. vi Urbe pulsus restituit: ut tamen expressis verbis sibi confirmari curaret jura decessorum; ne Pontifex aliter, quam oblenta confirmatione, in præsentia Missorum suorum consecraretur. Diploma habet Baronius ad A. 1014 & Goldastus tom. 1. Const. Imp. p. 227. sed quod genuinum non esse, Cl. Hahnus p. 11. Introd. Hist. c. VI. §. 10. ostendere voluit. Illud constat, ipsum nimis lenitate, ob quam *Sancti & Patris* Clericorum nomen tulit, Augiæ illi stabulo purgando imparem fuisse; unde recruderunt motus in Italia, quibus componendis Conradus Salicus Romam profectus est, *cum Advocatus primus & Defensor Romane Ecclesiæ.* Sed hoc vix defuncto triceps ibidem monstrum succrevit; uno schisma-

rico Papa in Laterano majore, altero ad Mariam, tertio ad S. Petrum sedente. Henrici autem III. qui alias Niger dictus, integra stetit in his, vitio creatis, deponendis auctoritas: nam Suidgerum Bambergensem Episcopum, in Sutrina Synodo summum Pontificem elegit; jurantibus tum rursus Romanis, se sine Imperatoris consensu, Papam non esse electuros. Verba diplomatis exhibet Goldastus tom. uno pag 231. rem ipsam Sigebertus Gemblacensis ad A. 1046. *Romæ*, inquit, *uno contra duos, & duobus contra unum de papatu contendentibus, Rex Henricus contra eos Romam vadit, & eis canonica & imperiali censura depositis, Suidigerus Bambergensis Episcopus, qui & Clemens, Romanæ Ecclesiæ præsidet, & ab eo Rex Henricus in Imperatorem benedicitur; jurantibus Romanis, se sine ejus consensu nunquam Papam electuros. Hunc in finem antiqua Patriciatus dignitas renovata est: necenim ipse tantum in Bullario Casinensi t. 2. sese Imperatorem & Patricium vocat; sed & Advocatus Regius in Concilio Oshoriensi, apud Frenium in patricius, inquit: Hoc negare non potes, quod pater domini mei Regis piæ memoriæ Henricus (III.) Imperator, factus est Patricius Romanorum, a quibus accepit in electione super ordinando Pontifice principatum.* Hinc ex illo tempore longe meliores Papæ ab Imperatore ex Germania missi sunt: Damasus II. & Leo IX. Viri de Ecclesia optime meriti, & in album sanctorum relati: quanquam posterior noluit oblatum sibi ab Imperatore sumere pontificatum, nisi de cleri Romani voluntate constaret; teste Ottone Frising. lib. vi. c. 33. Postquam vero Henricus III. relicto filio admodum puero, fatis concessit, Benedictus quidam in Sedem involavit; sed missus est ab Henrico IV. Nicolaus II. & illi surrogatus, qui in plena Synodo principatum super ordinatione Romani Pontificis Cæsari confirmavit, ut præter chronographum Virdunensem, fidem facit Advocatus Regius apud Baron. ann. 1059. n. 54. Decreti hujus meminit Ivo Carnotensis, & integrum ejus exemplum, in vetustissimo libro Abbatiae monasterii Farsensis litteris Lan-

go-

gobardicis scriptum, etiam apud Gratianum in *can. 1. dist. 23.* reperitur: cujus in §. 4. verba sunt ista: *Salvo debito honore, & reverentia dilecti filii nostri Henrici, qui in presentiarum Rex habetur, & futurus Imperator, Deo concedente, speratur, sicut jam sibi concessimus, & Successoribus illius, qui ab hac Apostolica Sede personaliter hoc jus impetraverint.* In Nicolai locum idem Henricus IV. Honorium suffecit, & cum corona *Patricii Romanorum* titulum sumsit, auctore Hermanno contracto ad A. 1061. Bertholdi Constantiensis ad eundem A. verba sunt ista: *Romæ Nicolao Papa defuncto, Romani coronam & alia munera Henrico Regi transmiserunt, eumque pro eligendo summo Pontifice interpellaverunt. Qui ad se convocatis omnibus Italiæ Episcopis, generalique conventu Cassileæ habito, eidem imposita corona, Patricius Romanorum appellatus est.* Mabillon tom. 1. Mus. Ital. part. 2. pag. 63 hoc ipsum ex prologo Johannis Grammatici confirmavit: cui accedat Matth. Parisiensis ad A. 1084. *Henricus tamen in Imperio restitutus est, & a Papa Clemente benedicitur Patricius Romanorum.* Sic itaque jus illud Imperatorium, in ordinatione sedis Romanæ, ab Othone ad Henricum IV. adeo constans fuit, ut quotquot illam a Leone VIII. usque ad Gregorium VII. tenuerunt, vel ab ipsis Imperatoribus constituti sint, vel a fi Clero & Populo electi, Imperatorum consensu coronati fuerint. Nunc vero omnia in pejus ruere, & Principum jura retro collapsa referri cœperunt.

§. XIV.

Simulac enim Hildebrandus, sumto Gregorii VII. nomine, in Pontificatum invasit, protinus ea meditatus est, quæ vergerent ad majestatis Imperatoris ruinam. Monstrum illud hominis, non modo jus confirmandi Papam, sed & omnem investituram Episcoporum Henrico IV. e manibus excutere conatus est. Non eum pacta decessorum jurata; non cognita satis jura Imperatorum; non sua ipsius confilio deterruerunt. Ipse nondum Pontifex, sed Subdiaconus Hildebrandus, a Romanis missus fuerat ad Henricum III.

A. 1054. ut successorem Leoni IX. peteret, quem etiam ex voto impetravit. Idem quoque veterator, & mille dolorum artifex, Cætaris pro se impetraverat consensum; quem conditis postea decretis implorandum esse negavit, iniquissimo canonum prætextu. Testis est luculentus Schaffnaburgensis ~~correspondens~~, ad A. 1073. ipsum, quod inconsulto Henrico IV. Papa electus, professum esse: *cogi se nullo modo posse, ut ordinari se permetteret, donec in electionem suam tam Regem, quam Principes Regni Teutonici consensisse, certa legatione cognosceret.* Hac ratione distulisse adhuc ordinationem suam, & sine dubio dilaturum, donec sibi voluntatem Regis, certus inde veniens nunciis intimaret. Inter arrogantes vero ejusdem Dictatus, sive, ut Baronius vocat, Privilegia Apostolicæ Sedis, egregia illa post axiomata legebantur, a nemine decessorum ejus unquam attentata: *Quod solus Papa possit uti Imperialibus insigniis. Quod Papæ liceat Imperatores deponere.* His prior status plane inversus est, tantaque mutatio inducitur, ut Pontifices, qui subditi fuerant, nunc Imperatores fierent; quique horum majestatem comiter venerari debuerant, nunc ab Imperatoribus essent adorandi. Nec deerant homini vaserimo colores, & speciosi religionis prætextus, quibus scædam ambitionum palliaret. Provocabat ad Conciliorum decreta, & Patrum statuta, quæ electionem Episcopi (sed ex vilioribus aularum mancipiis, temerario conatu) a Principe factam damnant; secundum canonem 3. Synodi Nicænæ II. quo cautum: *Si quis Episcopus secularibus Potestatibus usus, Ecclesiam per ipsos obtineat, deponatur, & segregentur omnes, qui illi communicant.* Urgebat submissionem Magni Constantini, qui in Concilio Nicæno sedere noluerit, nisi in sede humiliore, quam Episcoporum sedilia essent, nec nisi Episcopis annuentibus. Nihil indecentius videri, quam ovem Pastori, laicum Christi Vicario præesse. Quinimo pro monstro haberi, si filius patrem generet: homo Simoniacus & vitii immerfus Deum creet, aut creatum confirmet. Brevis hoc os Gregorio fuit, ut meliorem summi imperii par-

partem, quam Principi rapiebat, ipsi Petro deferri causaretur. Gregorius suis decretis dimidium Cesari tollebat, scribit Onuphrius Panvinus in ejus vita. Nec tamen jus suum, Gregorio Pontificatu exuto, vindicare desit Henricus. Sic enim Leo Ostiensis Chron. Casinensi lib. 11. c. 79. Quo facto Imperator valde letificatus, cum omnibus ejusdem Concilii Episcopis, Romam venit, & in Ecclesia beati Petri Apostoli, congregato Clero populoque Romano, primo quid Sutri actum fuisset, exposuit; dehinc tractare cepit de ordinatione ipsius Romanæ Ecclesiæ. Facta itaque discussione, quisnam in eadem Ecclesia dignus inveniretur, tanto sacerdotio fungi, cum nullus heu prob. dolor! reperiretur, demum electione cunctorum Episcopus Bambergensis, de gente Saxonum, Papa Romanus levatur, eique Clemens nomen imponitur.

§. XV.

Non permittit instituti nostri ratio, ut fata pestiferæ Gregorii doctrinæ, & sanctas contentiones, quæ sub Henrico V. inter Regnum & Sacerdotium sunt enatæ, exequamur. Illud autem præterire non licebit, minus recte clarissimum Mabillonium tom. 1. Mus. Ital. part. 2. pag. 42. calculum duxisse, ubi hunc in modum scribit: *At quo tempore abrogari cæperit, ille transmittendi Decreti ritus, nono an decimo sæculo, aliis examinandum relinquimus. Illud constat, undecimo sæculo, per illas funesti Romanorum Pontificum cum Imperatoribus dissidii tempestates, hunc morem penitus intermissum esse.* Nec magis exacte Celeberrimus Pagius in Crit. ad A. 1073. n. 6. suscepto examine illo, Gregorii VII. ordinationem ultimam esse pronunciat, quæ coram Henrici IV. Legatis peracta sit; exinde vero Ecclesiam hoc onus excussisse. Sed quum Paschale satis functo Gelasius, inconsulto Henrico V. Papa electus esset, *Horrendum fremuit Princeps*, ait Poeta in epitaphio Gelasii, eique A. 1118. Burdinum, dato Gregorii nomine, opposuit; ut ex Antelmo Abbate Gemblacensi, tum vivente, ex Eadmero, Romualdo & Olderico Vitale docuit Baluzius lib. 111. Miscell. pag. 493. Cui addi-

dimus, tantum abfuisse, ut Henricus jura hæc Imperii negligeret, ut ei fini Patricii titulum adscisceret, quemadmodum docemur a Willelmo Malmesburiensi qui lib. v. de Gestis Anglor. ita scribit: *Exeunti de camera, & suis Regalibus, exuto, occurrerunt Romani Patricii cum aureo circulo, quem imposuerunt Imperatori in capite, & per eum dederunt sibi summum Patriciatum Romanæ Urbis, communi consensu omnium & volenti animo.* Jam quidem Herculi facilius clavam, quam Cardinalibus insignem, quam semel & iterum nacti erant, libertatem excussiles: similem tamen in modum sequentes Imperatores, Lotharius & Conradus III. modis omnibus jus illud regii consensus vindicare conati sunt; unde Petrus Diacon. lib. iv. Chron. Casin. cap. 120. *Lotharius coronam Patriciatus accepturus in civitate mansit.* Præcipue autem Fridericus I. nobis memorandus est, jurium Imperii strenuus defensor, & majestatis patriæ studiosissimus Imperator; cujus auctoritatem, vere Frisingensis scribit, non solum in sæcularibus, sed & in ecclesiasticis negotiis plurimum crevisse; qui etiam idcirco *Sacrofanctæ Romanæ Ecclesiæ defensor* apud Radevicum vocatur. Is vero Hadriano IV. mortuo A. 1159. schismati auctoritatem suam interposuit; & convocata Synodo Papiensi, in favorem Octavianî, cui post Victoris nomen, pronuntiavit: cum ante publico edicto testatus esset apud Goldastum tom. 1. Const. Imp. p. 270. *Cathedram tanti regiminis aliam personam nullatenus recipere intendimus, nisi quam ad honorem Imperii, & quietem & unitatem Ecclesiæ, unanimi & concordî assensu fideles elegerint.* Iterum mortuo A. 1164. Victore, surrogatum Paschalem in odium Alexandri III. firmavit: quæ de re memorabilia sunt, quæ Aventinus lib. vi. Ann. circa finem tradit: *Imperator mense Majo, apud Wurtzburgum conventum Episcoporum Senatusque imperii cogit. Coeunt frequentes Archi-Myssæ, minores Pontifices, Præsides, Duces, Præfecti; Vidonem Pontificem Maximum legunt, Paschalemque vocant. Fit Senatusconsultum, nullum posthac fore Pontificem Maximum, nisi qui more majorum con-*

consensus Imperatoris creetur, atque nuncius duntaxat Christi, Successorque Petri, non etiam Cæsareæ potentiae pertimax emulus esse velit. A singulis exactum juramentum, haud alium aut recepturos, aut passuros Pontificem Max. perpetuo, etiam mortuo Imperatore. Sacramentumque primus dixit Christianus Meguntinus, Pontifex designatus, deinde ceteri Episcopi, postea Imperator & Principes jurarunt. Multa alia de hoc Heroe litteris mandarunt Otto Frisingensis & Guntherus in Ligurino. Videtur autem diuturnum schisma, quod Alexandrum III. in Galliam fugere coegit, concilio generali Lateranensi ansam dedisse, in quo definitum est, ad solos Cardinales electionem Pontificis pertinere debere c. 6. X. de elect. Vide Historiam concordiae inter Alexandrum III. & Fridericum I. plenius, quam apud Baronium, ex Vaticanis Codicibus, & optimis quibusque Auctoribus collectam, & a Felice Conteloro editam Parisiis A. 1632. Haud segnius, in vindicandis Imperii juribus, postea sese gesserunt Otho IV. Fridericus II. & Henricus VII. cujus mors immatura egregium propositum rupit. Maxime vero Ludovicus IV. æternum illud Bavariae ornamentum, fugientem Cæsarem in Pontificis electione auctoritatem stitit, dum convocata A. 1328. Synodo, Johannem XXII. Papam, læsæ majestatis, aliorumque criminum convictum & damnatum, exauctoravit, Petrumque Reinalucium, sub Nicolai V. nomine, Pontificem substituit. Extat ejus decretum apud Aventinum lib. VII. c. 17. & Goldastum Const. Imp. tom. 1. pag. 328. Albertus Argentiniensis pag. 124. hunc illa in hæresi fuisse, ait, quam *Maradins de Padua* & *Joh. de Jeuduno* invenerunt, scilicet quod ad Imperatorem pertinet deponere Papam, & constituere, quod ipse de facto fecit. Acta pleniora exhibuit Baluzius vit. Paphingerus ad Vitriar. lib. 1. tit. 15. §. 22. & Struvius Synt. jur. publ. c. 2. §. 4. addantur.

§. XVI.

Tepuit deinde Imperatorum industria, quum temporum
K ini-

iniquitas, & belli Turcici incommoda, intestinum etiam religionis dissidium optima consilia turbarent. Unum ergo examinandum restat, an non tanti temporis lapsu, usuque contrario extincta sint Cæsarum jura, quæ ipsi scientes & volentes perire passi sunt. Bellarminus enim possessionem octingentorum annorum quietam, & cum negligentia Cæsarum conjunctam urget. Nec diffiteri licet, a Ludovici IV. temporibus nihil memoratu dignum, pro revocando hoc jure, gestum esse: sed contra Imperatores cum Papis, sine confirmatione sua creatis, ut legitimis egisse. Naturali autem instituto, jura regnorum & rerumpublicarum sedulam requirunt curationem, & adeo parum somnolentiam ferunt; ut licet alter imperii reverentiam, nec bona fide, nec tempore longo excusserit, favore tamen libertatis pro justo ejus titulo pronuntiandum sit, ex quo derelictio innotuit. Id enim nisi admittamus, maximum sequeretur incommodum, ut controversiæ de regnis & juribus, quæ imperio cohærent, nullo unquam tempore extinguantur; quod communis gentium sensui repugnare, eleganter docuit Vir summus, Hugo Grotius de *J. B. & P. lib. 11. c. 4.* Henricus etiam Henniges ad Beckeri *Jus publ. l. 1. c. 2.* præscriptioni Pontificum favet aperte; nec ab ea sententia personatus Monzambano *c. 1. §. 14.* & Cl. Thomasius in notis alieni esse videntur. Quod ad me attinet, dubii hujus difficultatem agoosco: nec tamen cum Vasquio & Puteano dicam, præscriptioni inter gentes non esse locum. Neque cum juris publici Doctoribus defectum requisitorum, justii tituli &c. urgebo; quum gentium jura ad normam juris Romani parum apte exigantur. Quietæ autem possessioni, quam Bellarminus esse jactabat, Conringius tum nomen *Romani Imperatoris* constanter retentum, tum formulam in coronatione Cæsarum Romana usitatam: *Da servo tuo, Imperatori nostro*, aliaque opposuit; quæ libro ejus *11. de Finib. Imp. c. 21.* legi possunt. Quanquam ego post inaugurationem Romanam, a Caroli V. temporibus ulque omis-

omissam, in eo arcem disputationis non pono: ut qui didi-
ci plus nimio, in spissis illis prudentiæ civilis & juris publici
tenebris, coronationi tributum esse, ipsosque Imperatores ab
ea potissimum per errorem, jura sua derivasse. Vid. diploma
Caroli IV. apud Matthæum lib. 11. de nobil. c. 48. pag.
747. & aliud Wenceslai, Ruperto Palatino datum, apud
Tolnerum in append. Hist. Pal. n. 148. Verum enim-
vero metuo, ut sola præscriptio tranquillam reddere pos-
sit Pontificis & Purpuratorum conscientiam, si verum
est, quod in c. 25. X. de Jurej. & c. 2. de pact. in 6. dicitur;
omne jusjurandum, quod sine dispendio æternæ salutis ser-
vari potest, servandum esse: si Innocentii III. Synodalis
definitio, in verbo Dei, ut ait, fundamentum habet, qua
c. f. X. de Præscript. cautum: *Ut nulla valeat absque bona
fide præscriptio, tam canonica quam civilis. Cum generaliter
sit omni constitutioni, atque consuetudini derogandum, quæ abs-
que mortali peccato non potest observari. Unde oportet, ut qui
præscribit, in nulla temporis parte, rei habeat conscientiam
alienæ.* Multa quippe Pontificem Urbis Episcopum sic con-
stituunt in mala fide; & quominus præscribere potuerit,
obstant tot Cæsarearum confirmationum tabulæ, agnitæ sub-
jectionis documenta. Frustra utique Patroni Papales urgent
immemorabilem præscriptionem, tot actibus tamdiu interrump-
tam. Quinimo hi licet deficerent, jura tamen imperii,
quæ non habent quotidianum exercitium, sed ubi commo-
dum erit, non amittuntur negligentia decessorum; nec ali-
ter actus, qui sola voluntate & facultate agentis constant,
præscriptione tolluntur, quam ex quo tempore prohibitio
intercessit, eique paritum, cum sufficiente consensus signi-
ficatione, ut Grotius docuit lib. 11. c. 4. §. 15. Adde quod
Deus Saulem jussit in Amalekitas arma capere, quod hi an-
te trecentos quinquaginta & amplius annos, Hebræis iter
præcluserant, 1. Sam. xv. 2. Act. xii. 20. magno argumen-
to, solum temporis lapsum tollendo juri non sufficere: in
primis si duro vel iniquo tempore, alteri non licuit jure suo

uti, sed ejus vindictio in occasiones magis opportunas fuit differenda. Non alium sane contradictionis fructum masculi tulerunt Imperatores, quam

---- qui adverso vix flumine lembum
Remigit subigit; si brachia forte remisit.

§. XVII.

Fortissimum autem, pro jure Imperatoris, fundamentum in pacto jurato Leonis VIII. cum Othone I. quærendum videtur; quod exemplo Carolini non modo cum præcipuo illo Urbis membro, sed cum Concilio generali, cum Senatu Populoque Romano initum est, jurantibus tunc Episcopis, Clero & Civibus, *nunquam* se Papam electuros, aut ordinaturos, sine consensu & confirmatione Imperatoris: id quod sub eadem formula sæpius deinde repetitum vidimus. Neque Othoni tantum & filio ejus Romani fidem suam obstrinxerunt: nam *successorum & posterorum* in pacto utroque expressa sit mentio, & quamvis neglecti essent, locus tamen foret, prudenti Pedii regulæ: personas plerumque pacto inferi, non ut personale pactum fiat, sed ut demonstretur, cum quo pactum factum est l. 7. §. 8. D. de Pactis. Jam vero idem systema urbis Romæ adhuc durat, & mortuis licet paciscentibus, idem spiritus, & vitæ civilis superest confociatio. Quemadmodum enim corpus naturale idem esse non definit, particulis paulatim commutatis, donec una species manet, ut Alphenus Varus disserit in l. 76. D. de Judiciis: sic idem Clerus, idem populus Romanus est & erit, licet nullus jurantium vivat; *μαχρὸς αὖ τὴ πρὸς τὴν καὶ συνδύναταις ἐπιπλοκαῖς κοινωνία τῆς νομιμῆς διαφυλάττει. quamdiu illa, quæ populum facit & mutuis nexibus vincit, communio jûs unitatis sue servat*, eleganter ait Plutarchus de sera Numinis vindicta pag. 559. Illud præterea certum est, pacta quæ cum libero populo incuntur, sua natura esse realia; & actus majorum juratos, semper posteros stringere, si alteri populo ex iis jus quæsitum est: nam licet jurisjurandi obligatio personam tantum afficiat, promissio tamen ligat heredem, ait Grot.

Grot. de J. B. & P. l. 11. c. 16. §. 16. & egregie firmat Pufendorf. lib. iv. de J. N. c. 2. §. 17. & l. viii. c. 9. §. 6. Velim ergo, Purpurati illi Proceres animum adverterent ad grave illud Livii, at hominis gentilis, judicium; lib. iii. cap. 20. quum enim Tribuni quidam cavillabantur, quasi populus religione patrum non teneretur: *Non-dum hæc*, inquit, *quæ hoc tenet sæculum, negligentia Delim venerat: nec interpretando sibi quisque jusjurandum & leges aptas faciebant; sed suos potius mores ad ea accomodabant.* Licet etiam, quod ad alia quædam jura omissa attinet, non inficiemur, nonnullis Imperatores imbelles cecisse; frustra his asseri dominium Romæ; multa item jurium derelictorum signa apparere: animum tamen retinendi *Advocatiam* Ecclesiæ Romanæ, produnt infinita diplomata, sparsim a nobis laudata; evincunt Caroli IV. Aurea Bulla, Leges, & Recessus Imperii, in quibus Imperator a Carolo Magno, ad hæc usque tempora, *Temporale caput Populi Christiani; Caput & defensor orbis Christiani; Supremus Advocatus Ecclesiæ, & cathedræ Romanæ* appellatur. *A. B. tit. 2. §. 3. Rec. Imp. de A. 1512. 1529. §. 1. A. 1530. §. 9. & 1541. §. 19.* Hoc nomine pag. 42. supra diximus, Alexandrum IV. monuisse Electores, ut *Advocatum Ecclesiæ* eligerent. Hinc Lotharium Imp. ad tuendam Ecclesiam Romanam, adversus Siciliæ Regem Rogerium, sollicitavit Bernardus epist. 139. *Non est meum hortari ad pugnam, est tamen Advocati Ecclesiæ, arcere ab Ecclesiæ infestatione schismaticorum rabiem; est Cesaris propriam vindicare coronam ab usurpatore Siculo.* Huc etiam pertinet jusjurandum, quo Lotharius primum, deinde Otto IV. Rudolphus Habsburgicus, alique defensionem Ecclesiæ Romanæ promiserunt, quod & præstitit Carolus V. ut tamen Advocatum natura sua superiorem esse cliente ostenderet, seseque de jure tuo nihil decessurum testaretur, auctore Jovio lib. 27. & Sleidano lib. vii. Sic in omnibus Capitulationibus, etiam in novissima CAROLI VI. art. 1.

defensio & tutela Sedi Romanæ promittitur, & si res postulatur præstatur. Atqui secundum naturam est, commoda rei eundem sequi, quem incommoda sequuntur. Gaudet ergo Augustus quandoque jure Advocatiæ Majestatiæ, & si per ambitionem id licet, disceant tandem ingrati ejus clientes, ex Christi, Pontificis maximi veri & unici præcepto, *Cæsari reddere, quæ sunt Cæsaris!*

T A N T U M.



DIS-



DISSERTATIO SECUNDA,

DE

Nuptiis Consobrinorum.



Nihil in rebus mortalium perinde venerandum est, atque matrimonium, nihil utilius, & toti generi humano magis necessarium. Quod enim ad ejus originem attinet, ab ipso summo Numine in Paradiso est institutum, nec sanctiora tantum quæque gentilium mysteria ejus sanctimoniam adumbrant; sed in sacris litteris frequentissime etiam conjugii spiritualis symbolum, ad describendam Christi & Ecclesiæ unionem, adhibetur. Ad Rempublicam si oculos vertamus, fateri cogimur, liberorum procreationem omnis societatis civilis esse seminarium, omnis amoris, charitatis & benevolentiae firmamentum. Individuo quippe hoc omnis vitæ consortio uterque sexus ita conglutinetur, & clavo velut trabali conjungitur, ut duo fiant in carne una, sexusque imbecillior præsidium ex mutua societateumat: inde familiæ propagantur, regna conduntur, & frequentia redduntur. Interest ergo Reip. ut tanti momenti, &, quod caput est, indissolubile negotium, non temere, vel inconsulto affectu, sed ordine decoro ac maturato consilio contrahatur. Pleræque gentes idcirco per gradus pactorum & sponsaliorum ad nuptias procedi

L.

cedi voluerunt. Solennitatibus addidere sacrificia, mensium quoque, dierum ac temporum haud levem delectum habentes. Apud populos cultiores hoc amplius frenum aliquod lege fuit impositum, quo contrahentes personarum discrimen observare jussi; ne ut equus aut mulus, quibus non est intellectus, ad sanguinem suum hinnirent, & sceleratis amplexibus pudorem, honestatem, fas & mores calcarent. Quanquam enim promiscua & pecuina propagandi ratio ipsi naturæ hominis rationali repugnat; quo sanctior tamen lex & inviolabilior est, eo vehementius malis violandi desiderium gliscit. Immo licet jus naturale & pudor aliquando non adversetur, sepes tamen gradibus sanctioribus obijcienda fuit, & propter vicinitatem illiciti, ad quosdam ulteriores protendendi verecundiæ fines: pariter enim ac aliis contractibus, sic huic quoque conventioni Princeps modum finemque præscribere potest. Variæ hinc deducuntur nuptiarum prohibitarum classes: aliæ enim semper incestæ sunt, & nefariæ jure gentium: aliæ sic inhonestæ, ut tamen nonnunquam aliter se habere possint: aliæ indecoræ, quas ratio deteriores licet, non tamen abscisse prohibitas judicat: aliæ rursus nec inhonestæ sunt, nec indecoræ, propter rationes autem civiles vetitæ: & aliis denique neque divinum neque civile jus adversatur. Consobrinorum nuptiæ quorsum referri debeant, in diversa abierunt Imperatores, Pontifices, Theologi & Jurisconsulti, veteres pariter ac recentiores. Quamobrem operæ pretium me facturum existimavi, si ancipitis hujus quæstionis momenta & juris progressus per varias ætates, distinctis capitibus quatuor exponerem; eamque ex jure gentium & divino, tum ex priscis Romanorum moribus, ex Theodosii Magni ejusque filiorum Augustorum legibus, ceterisque ad Justinianum usque constitutionibus, a Justiniano autem ad hæc usque tempora, ex Græcorum, Gothorum, Germanorum veterum, & Canonum jure inprimis, pro virili parte illustrarem. Fastidient forsitan delicatuli cibum hunc, velut reco-

ctum,

ætum, dapesque opipare olim a Contio, Sirmondo, Flo-
tente & Gothofredo conditas esse crepabunt:

*Sed tamen & parvæ nonnulla est gratia Musæ;
Appetitur posito vilis oliva lupo.*

CAPUT I.

EXPONIT VOCES.

§. I. Nuptiarum voce ambigua cur utamur. II. Consobrini unde dicti? Caji & Pauli allusio explosa. Vox late patet. III. Sobrinorum & consobrinorum nomina confunduntur. Pauli scriptura adversus Com-
tium & Hotmannum defensa. Tacitus illustratur. IV. Consobrini
cur fratres & sorores patruales; item fratres & sorores absolute
vocantur. V. Cur patruales. l. 1. ad L. Pompejam de parr. diffi-
cultas. VI. Quantum harum observationum Grammaticarum sit usus,
ex Plauti Pænulo male intellecta ostenditur. Quis prior so-
brino.

§. I.

Priusquam ipsa spatia ingrediamur, non ab re erit,
quid Nuptiarum & Consobrinorum nomine intelliga-
mus, paucis præmisisse. Nuptias a nubendo dici, jam
tirones norunt; ad nauseam quoque illustratus est mos ille
vetustissimus, quo sponsa, cum ad maritum deducebatur,
faciem flammeo obtegebat. Lutei coloris hoc erat, ut ne
virginis pudor proderetur, aut si quid in facie appareret pu-
doris, is e velo color, non e genis, emicare putaretur.
Nec tamen caput modo, ut vulgo traditum, sed totum
corpus obvelatum fuisse, e pompa nuptiarum Cupidinis &
Psyches, in gemma Petri Ligorii sculpta, eleganter docuit
Sponius Miscell. Erudit. Antiq. Sectione I. art. 3. Nuptia
igitur prima nativitatis origine, ipsam nuptiarum festi-

vitatem denotant: hinc titulus de ritu nuptiarum in Pandectis, & *solenne vel solennia nuptiarum* apud Suetonium & Tacitum. Quintilianus declam. 306. *Vis scire quid sint nuptiae? Aspice illam virginem, quam pater tradidit, euntem die celebri, comitante populo.* Apud Plautum, Martialem & Apulejum idem vocabulum in obscænis est, ut *γυνος* apud Græcos, ipsamque corporum commixtionem significat. Inde Festo *Nupta verba*, obscæna, & Petronio *Nuptias facere* το συνμιγνύν. Venit denique hac appellatione illa maris & feminae conjunctio, mutuo consensu conciliata, quæ alias matrimonium appellatur, l. 33. D. de Negot. gest. l. 10. D. de Ritu nupt. l. 30. D. de Reg. Jur. Eaque significatio hujus est loci. Connubii vox displicuit, tum euphoniæ gratia, tum ne quis, lecto titulo, statim jus legitimi matrimonii, sine discrimine temporum, jurium & nationum, nos consobriniis tribuisse sibi persuaderet: Connubium enim est uxoris jure ducendæ facultas, definiente Ulpiano Tit. V. §. 3.

§. II.

Consobrini proprie sunt duarum pluriumve sororum liberi, ut Nonius Marcellus *cap. ult.* ex antiquis, & maxime ex Afranio, Jurisque vetustissimis scriptoribus constare ait. Cajus & Paulus in l. 1. §. 6. D. & l. 10. §. 15. de Gradibus, more Stoico, Jurisconsultis familiari, ex allusione id confirmatum ivere: *Eos & eas, qui quæve ex sororibus nati, natæve sunt, consobrinos, consobrinas, quasi consororinos*; quod repetit Justinianus §. 4. *Inst. de Grad. cogn.* Menagius autem cap. 39. Amœnitatem observat, το consobrinus non ex consororinus, sed ex το consorinus formatum esse hoc modo: a σορος est sorus, antiquum nomen Latinum, sed obscuratum: unde sorinus inusitatum quoque, pro quo deinde συνδραμι το B, sobrinus, consobrinus. Verum recepta consuetudine latius hoc nomen productum est, ut generaliter non tantum ex sororibus prognatos, sed patruum quoque, & amitæ, & avunculi filios filiasque comprehendat: qui propriis nominibus patruus & amitini vocantur. *Vulgus istos omnes communi appella-*

pellatione consobrinos vocat, ait Cajus d. l. 1. & Paulus dicta l. 10. Plerique hos omnes consobrinos vocant, sicut Trebatius. Inter patruces & consobrinos hoc intererat, quod illi agnati, hi cognati, quoniam per feminas conjunguntur. Sed quia hæc differentia in successione ab intestato tantum admissa & observata est, ideo Jurisconsulti pariter, ac alii scriptores, extra illam materiam, generali consobrinorum vocabulo usi fuerunt. Sic Justinus & Curtius Amyntam Alexandri consobrinum appellant, qui patruelis: & M. Luculum Lucii consobrinum vocat Eutropius lib. vi. c. 7. qui agnatus erat, ut Scaliger docuit ad Euseb. p. 152. Ipse Cicero, Trebatii familiaris, Ligarii consobrinum appellat, qui ex matris ejus fratre natus erat, pro Ligario cap. IV. Iliodorus quoque lib. IX. Originum cap. 6. *Consobrini vocati, qui aut ex sorore & fratre, aut ex duabus sororibus sunt nati, quasi consororini.* Generalius eos describit Glossarium Latinum: *Consobrini sunt, qui ex sorore & fratre, aut duobus fratribus, vel sororibus sunt nati.* Et mox: *Consobrinus est filius avunculi.* Atque sic omnes in quarto gradu constituti Consobrinorum voce a nobis hic designantur, pariter ac in l. 19. C. de Nupt. & alibi. Latino nomini exacte Germanorum *Geschwisterkinder*, & Belgarum *Susterlingen* respondet. Galli *Cousins germains*, Hispani *primos germanos* appellant. Vide Antonium Augustinum lib. II. Emendat. cap. 5.

§. III.

Differunt a consobrinis *Sobrini*, quod hi ex patruelibus, aut consobrinis, aut amitinis propagati, in quinto & sexto gradu, sic nominantur, auctore Gajo in l. 3. D. de Gradibus, & Ælio Gallo apud Festum, voce *Sobrini*. Consobrini *ανψιοι*, vel cum adjectione *ανψιοι προς πατρος, προς μητρος* vel *ικ πατραδελφου*, Græcis priscis: recentioribus *εξαδελφοι*, interdu *πρωτεξαδελφοι* appellati: Sobrini autem *εξαανψιοι*, vel *ανψιαδου* apud Demosthenem in oratione adversus Stephanum: minus eleganter *δισιξαδελφοι*, & *δευτεροι εξαδελφοι* dicuntur. Recte Septuaginta interpretes, in cap. ult. Numer.

ubi filia Salphaati dicuntur nupsisse filiis patris sui, red-
dunt una voce *ανψιος consobrinis*, qui *πατριωντοι* a maximo
Poetarum appellantur. Attamen consobrinorum appellatio
tam lata est, uti sobrinos quoque comprehendat, si sequi-
mur Paulum *lib. IV. Sentent. Tit. XI. §. 6. & l. ult. §. 15. D.
de Gradibus*. Non me fugit Contium *lib. 1. Subsec. lect.
cap. 10. & Hotmanum lib. 1. Observ. cap. 12.* pro *con-
sobrini* hic maluisse *Sobrini*, Cujacium simul vellicantes,
quod ad *§. 4. Inst. de Gradibus* fecerat cum Paulo: at
illi si cogitassent, quam varie nomina cognationum con-
fundantur, hac emendatione facile superfedissent. Ad Pa-
terculum notavit Lipsius *lib. II. cap. 3.* Scipionem Nas-
cam Gracchi consobrinum vocari, qui erat sobrinus. Spar-
tianus Trajanum & Adrianum Cæsares consobrinos facit,
cum tamen Ælio, Ælii Adriani Imperatoris avo uxor
fuerit, Ulpia, Trajani Augusti amita; ut observat Casaubo-
nus, ad pr. vitæ Adriani. Insolentius est, quod Josephus
Scaliger etiam admiratur, Ausonium fratrem uxoris conso-
brinum appellasse. Sed & contra Consobrini sobrinorum
nomine veniunt apud Tacitum *Annali XII. cap. 6.* *Sobri-
narum diu ignorata matrimonia*. Si enim proprie intelligas,
non valida hæc erit ratio permittendi connubii cum fra-
tris filia, quæ patruo in tertio gradu est, sobrini vero in
sexto se contingunt. Tantum quoque abest, ut horum ma-
trimonia tum fuerint ignorata, ut ipse Claudius jam ante
Valeriam Messalinam, Barbatii Messalinæ consobrini sui fi-
liam, in matrimonium acceperit, nunc supplicio affectam,
auctore Suetonio in ejus vita *cap. XXVI*. Aut igitur legen-
dum est *Consobrinarum*, aut sobrinæ cum Lipsio & Ryckio
explicandæ sunt consobrinæ. Glossæ antiquæ: *ανψιος Con-
sobrinus, Sobrinus*. Donatus ad Hecyr. Terentii *Act. III.
Sc. 5.* *Sobrini sunt ex duabus sororibus: consobrini ex fratre &
sorore*. Et in Andr. *Act. V. sc. 4.* *Sobrini sunt consobri-
norum filii: nam sic dicit Menander: Verum, ut alii putant,
de sororibus nati: ut sunt sobrini, quasi sororini*. Ergo latif-
sima

suma est consobrinorum appellatio, nec vox illa eodem ab omnibus sensu sumitur, apud Latinos. In Capitulari Pipini Regis Italiae A. 793. c. 33. de inclitis conjunctionibus, sobrinus *insobrinus* vocari videtur: *Ita ut qui uxorem consobрино aut insobрино suo uxorem duxisset.*

§. IV.

Illud porro non omittendum, consobrilinos ex fratribus vel sororibus ortos, *fratres* & *sorores* aliquando absolute, sæpius cum adjectione *patruales* appellari. L. 16. §. ult. D. de Castr. pec. l. pen. de Scto Silan. Non equidem more Ebræorum, qui omne cognationis genus fratris & sororis nomine comprehendunt: Genes. 13. v. 8. Levit. 25. v. 25. Unde filiae Elhazari dicuntur nupsisse fratribus suis, cum tamen nupsissent patruelibus suis, patrui Kischii filiis 1 Chron. 23. v. 21. 22. Sic Evangelista Matthæus 13. v. 53. ac Marcus 6. v. 3. Jacobum *fratrem Domini* vocant, qui vere Christi sobrinus aut consobrinus. *Nos fratres domini consobrilinos Salvatoris, Mariæ liberos intelligimus, materteræ Domini; quæ esse dicitur mater Jacobi minoris & Joseph & Judæ, quos in alio loco fratres Domini legimus appellatos. Fratres autem consobrilinos dici, omnis Scriptura demonstrat, inquit Hieronymus in Matth. cap. xii. Similis autem, quæ Ebræos, ratio movit Romanos: quia consobrilini per parentes uno patre natos conjungebantur, cumque illis in unius avi nonnullam domo, vel saltem ejus in potestate constituti educabantur. Cicero de Finib. V. Cicero frater noster, cognatione patruelis, amore germanus. Et II. ad Attic. 7. de filio suo: Cicero tibi mandat ut Aristodemo idem de se respondeas, quod de fratre suo (patrueli) sororis tuæ filio, respondisti. Livius lib. XXXV. cap. 10. His obtinuit, ut præferretur candidato, quem Africanus frater, patruelis scilicet Scipionis Nasicæ, deducebat. Tacitus Ann. III. 2. Drusus Terracinam progressus est cum Claudio fratre, videlicet patrueli. Suetonius Julio cap. XXIX. C. Marcello, qui fratri patrueli suo Marco in consulatu successerat, quem Cicero fratrem absolute appellat lib.*

lib. IV. ad fam. ep. 4. Sic etiam Constantius Imperator, Julianum Cæsarem designatum, *fratrem suum, patruelem* vocat, apud Ammian. Marcellin. lib. xv. quum uterque duorum fratrum filii essent. Multa alia exempla conduxit Vir Cl. Henricus Brouwerus de jure connub. lib. 2. cap. 10. & Jacobus Perizonius Animadv. Histor. cap. 3. ubi & Schottum refutat Nodor. Cic. III. cap. 2. negantem, quemadmodum *fratres*, ita & *sorores* pro consobrinis poni. Cujus vero & Paulus in l. 1. §. ult. l. ult. §. 15. D. de Gradi-
bus & l. IV. Sent. tit. 11. non minus *sorores*, quam *fratres patruels* habent. Sed absolute Cicero Philipp. II. cap. 38. M. Antonii uxorem, etiam sororem ejus vocat, quia C. Antonii, patrui ejus erat filia: *Omnibus eum (patruum) contumeliosius onerasti, quem patris loco colere debebas. Filiam ejus, sororem tuam, ejecisti, alia conditione quaesita.* Aurelius Victor in vita Theodosii cap. 76. *tanquam sororem* vocat consobrinam; Augustinus *pene sororem* dixit lib. xv. de C. D. c. 16. & Aufonius in Parentalibus Epigr. 28. de Julia Idalia consobrina:

*Quæ genita est, mihi pene soror,
Filia nam fuit hæc amicæ.*

S. V.

Verum non est quod miremur, Consobrinos fratres dictos esse, qui fraterna amicitia se amabant; quum Romæ obtinuerit, ut fraternitas non modo ex naturali, quæ hic adest, propinquitate, sed improprie ex studio, etiam ex amore & officio æstimaretur: Societatem jus quodammodo fraternitatis in se habere, dixit Ulpianus in l. 63. *pro Soc.* Et qui frater non est, si fraterna caritate diligitur, hunc recte cum nomine suo, sub appellatione fratris, heredem institui, Paulus scripsit in l. 58. D. de Hered. instit. Eleganter Quintilianus declamat. 321. *Certe quoties blandiri volumus his, qui esse amici videbantur, nulla adulatio procedere ultra hoc nomen potest, ut fratres vocemus.* Dulce ergo hoc consobrinorum cognomen usui tribuendum est, quem penes arbitrium

trium est & jus, & norma loquendi. Petrus Chrysologus *serm.* 49. *Usus*, ait, *temporis*, etiam *præsentis*, germanorum & germanarum filios fratres noscitur nuncupasse. Immo latius adhuc evagata est *fratrum* appellatio, & ad sextum usque gradum & septimum, ad sobrinos & sobrinorum filiostranilita; qui omnes consobrini fratres, *Cognatos proprios*, qui *sunt ultra fratrem*, appellat Ulpianus in *l. 1. de inoff. test.* Εξαιψιως Menander, τρισεξαδελφους recentiores Græci vocarunt. Nec minor abusus in voce *fratruelis*, quæ fratris filium quibusdam notat: veteribus autem usque adeo fuit incognita, ut Paulus negaverit, fratris sororisque filios & filias nomen speciale cognationis habere, in *l. 10. §. 14. D. de Gradib.* At Latinitate declinante, Jornandes in Geticis, & Sigebertus in chronico, ex fratre nepotem ita nuncuparunt; ab horum æqualibus etiam sobrini & consobrini *fratruelles* dicti sunt, auctore Palæmone in Glossis. Isidorus lib. 9. Orig. c. 6. *Fratruelles*, inquit, *materteræ filii sunt*. Græcis fratris filius *αδελφιδιος*, *αδελφιδης*, & sororis filia *αδελφιδη* vocatur; quo modo vocem posteriorem recte convertit Dionysius Exiguus, in can. 18. Apostolorum: perperam Haloander translulit consobrinam. In quem errorem Erasmus quoque apud Lucianum, & Valla apud Thucydidem lapsi, quos eo nomine Budæus, Stephanus, Contius & Giphanius notarunt. Pauci sane absque offensa hanc Scyllam præternavigarunt, nec apud ipsos veteres fratrum filii a consobrinis semper distincti. Quinimo ipsi Jurisconsulti, quorum maximus circa hæc vocabula labor, sibi constare non videntur. Ænigmatis instar est lex Pompeja de parricidiis apud Marcianum in *l. 1. de lege Pompeja*: Si quis, ait, *patrem, matrem, avum, aviam, fratrem, sororem, patruelem, matruelem, patruum, avunculum, amisam, consobrinum, consobrinam occiderit*. Quibus in verbis *patruelles* non licebit eos, qui ex fratribus nati, & *matruelles*, qui ex matris fratre nati sunt, interpretari, sicut in *l. 26. D. de Senat. Silan. l. 1. §. ult. D. de Grad. Paul. lib. 4. sent. tit. 11.*

M

quia

quia isti ante patrum & avunculum non possunt locum tueri, & patruales sub generali *consobrini* vocabulo patruos statim sequuntur. Cujacius cum Græcis patrualem fratrem germanum, matrualem fratrem aut sororem uterinam explicavit, lib. vi. Obs. c. 17. Ego ampliandum censeo, ut tamen hanc interpretationem præferam violentæ emendationi. Putabam trajectione verborum huic difficultati occurri posse, si legamus: *fratrem, sororem, patrum, avunculum, amitam, patrualem, matrualem, consobrino*. Sed Marcianus in l. 3. eod. tit. monet, lege Pompeja de consobrino comprehendi, non etiam eos pariter complecti, qui pari prioreve gradu sunt. *Non pariter*, id est, non nominatim ipsis legis Pompejæ verbis, sed sententia, ut Ampl. Bynkershoek explicavit lib. 1. Obs. c. 4.

§ VI.

Verum tu jam oscitas, mi Lector, & has de vocibus observationes, Grammaticorum tricas, apinasque, aut si quid vilius istis appellas; prius ergo ad rem ipsam gradum non capeßiam, quam vel unico exemplo, usum earum in hac materia liquido ostenderim. In Plauti Pœnulo nuptias consobrinorum, apud Carthaginienses, multi eruditi viri se reperisse existimarunt; quos inter Albericus Gentilis lib. v. de nupt. c. 11. Carolus Annibal Fabrotus in add. ad Cujacii notas §. 4. Inst. de nupt. ipseque Grotius in annotatis ad l. 11. de J. B. & P. c. 5. §. 14. Et quis non confestim pedibus iret in horum sententiam, qui Actus v. Sc. 3. evolvit? ubi Agorastocles Hannonem ita affatur:

AG. Audin' tu, patrue? dico, ne dictum neges:

Tuam mihi majorem filiam despondeas.

HA. Patrem rem habeto. AG. Spondeſne igitur?

HA. Spondeo.

Rurfus Sc. 6. AG. Sed patrue mi,

Tuam, ut dixisti, mihi desponde filiam.

HA. Haud aliter ausim.

Vereor autem, ne tantis viris patrui vox imposuerit; fortassis

tassus etiam, quod Hanno Jachonem, adolescentis hujus patrem, fratrem suum appellat Sc. 4. v. 27.

Quid est fratri mei gnate, mi gnate, quid vis? expedi.
Et deinde v. 86.

Vos estis ambæ filiae meæ: & hic est cognatus voster,

Hujusce fratris filius, Agorastocles.

At vero gravissimis optimorum auctorum testimoniis jana supra probatum dedimus, Consobrinos se invicem fratres appellasse, idque idiotismo Hebraico inprimis convenire. Hebraismo autem Plautus in hac Comœdia sibi magis utendum ratus, quia tota Punica erat, atque Pœnorum lingua Cananææ valde erat similis. Unde Augustinus in Epistolam ad Romanos testatur, Hipponenses rusticos, cum interrogabantur qui essent, aut quo nomine appellarentur, respondisse Cananæos. Hannonem vero & Jachonem non vere fratres, sed consobrinos fuisse, a duobus fratribus generatos, ex prologo constat:

Carthaginenses fratres patruales duo fuere.

Horum igitur patruelium liberi nuptias hic faciunt, qui in sexto gradu sibi cognati, Sobrini proprie erant, non Consobrini. Agorastocles sponsus Hannonem socerum, patris sui patruelem, Latine *sobrino propiorem* appellare debuisset, quia is uno gradu avo communi propinquior erat, patruī scilicet magni filius, remotior consobrino, propior autem sobrino. Vide Paul. l. iv. sent. tit. 11. §. 5. Cajum in l. 1. §. ult. D. de Gradibus & Festum in Propius sobrino. Diocletianus in l. 2. C. Unde legit. *propiorem sobrinum, natum consobrino* recte interpretatur: accuratius autem *propius sobrino* dixit in l. 2. C. comm. de succ. pariter ac Paulus l. 10. §. 16. D. de Gradibus: accuratissime Tacitus lib. XII. Annal. cap. 64. Lepidam Agrippinæ *sobrino priorem* vocat, quia hujus pater Germanicus & Lepida, ex duabus sororibus, Antonia majore & minore, nati erant consobrini. Cum Lipsio & Ryckio in notis ad hunc locum, Contius jungatur ad l. 1. de grad. Ex his, opinor, apparet, quod quemadmodum

Hanno Jachonem vocat fratrem, sic hujus filius Hannonem patrum appellavit, quasi minorem: simul etiam liquet, quid de Lipsii emendatione habendum sit, quam lib. II. Antiq. lict. cap. 19. argumento hujus fabulæ innixus *Æt. V. Sc.* 4 v 39. tentavit, invita prorsus poesi, invita etiam cognitionis hujus historia. Si quis vero in versu prius laudato: *Hujusce fratris filius &c.* Hotmani conjecturam disput. *de rit. nupt. cap. 9.* vel feliciorum Cl. Reinoldi *Varior. jur. civ. cap. 20.* suam facere velit, id quidem per me licebit.

CAPUT II.

JURE NATURÆ ET DIVINO VETITAS NON
ESSE CONSOBRINORUM NUPTIAS.

§. I. *Ratio naturalis prohibitarum nuptiarum inter consanguineos est propinquum sanguinis & reverentia. II. Quæ maxima parentibus, minor patris & fratribus debetur. III. Eam in consobrinis cessare ostenditur, & simili illustratur. IV. Gentium jure, in primis Græcorum & Spartanorum horum nuptia permittuntur. V. Apud Hebræos eadem non modo non prohibetur, sed etiam frequentes; ejus rei exempla & testimonia. Interpres Philonis notatus. VI. Ambrosii, Contii & Græcorum argumenta contraria refelluntur. VII. Gregorii & Innocentii rationes, de prole ex his non suscipienda, & quatuor humoribus examinata.*

§. I.

DE nuptiis autem nostris eo rectius ut constet, primum ad rationem decretoriam, quæ alia conjugia prohibet, alia permittit, velut ad Lydium lapidem, exigendæ erunt. In contrahendis enim matrimoniis naturale jus & pudor inspicere debet, auctore Paulo in l. 14. §. 2. D. de Ritu nupt. Et semper in conjunctionibus non solum quid liceat considerandum esse, sed & quid honestum sit, tradit Modestinus libro singulari de ritu nuptiarum, in l. 197. de Reg. Jur. Cause

Causam vero, quare nuptiæ nonnullis in gradibus prohibita sunt, certam & naturalem assignare, factu difficile, immo ejusmodi esse, ut præstari nequeat, haud temere affirmavit Grotius *lib. II. de J. B. & P. cap. 5. §. 12.* Quam Plutarchus in Quæstionibus Romanis attulit, de latius spargendis amicitiiis, tanti ponderis non est, ut id, quod contra fit, invalidum reddere queat. Velthufius, Pufendorfius & Huberus, cum Paulo jam laudato, ad pudorem provocant, qui insigniter intendatur adversus personas, quibus natura reverentiam debemus. Alii horrorem naturalem urgent: alii communem populorum consensum: ætatis disparitatem alii: rursus alii confusionem nominum: alii denique non constare ajunt, quomodo communio physica effectum morale producere possit; ideoque ex jure tantum divino positivo universali incestum derivant: sed non desunt, quæ his reponantur. Vide Celeberrimi Thomasi *7. J. D. l. III. cap. 2. §. 220. seqq.* ibique *Fundamenta.* Mihi verisimilior illorum semper visa fuit sententia, qui cum sapientissimo Legislatore, omnisque naturæ fonte, rationem naturalem in propinquitate carnis ponunt: hæc enim sanguinis vinculo constricta unitatem aliquam inducit, quæ non patitur, ut quis secum ipso velut coeat, & hac ratione genus humanum propaget. *Nemo vestrum ad ullam carnem suam accedet, ut nuditatem revelet,* inquit Jehova, *Levit. XVIII. v. 6.* In textu Ebræo est: *chol scheer b'scharo*, *omnem carnem carnis sue.* Sic enim Hebræi propinqua consanguinitate conjunctos vocant, ut hic observat Cl. Clericus, cujus versionem sumus secuti. *LXX. reddiderunt οὐκ ἐκ τῆς σαρκὸς, Onkelos propinquam carnis sue, Hieronymus proximam sanguinis sui,* quod eodem recidit. Adi Cl. Viri, Collegæ quondam nostri, Joannis ab Hamm, Exercitat. Philolog. *de Ara inferiore Part. II. cap. 1.* Quemadmodum igitur aqua nulla fontis sui originem repetit, nec arbor, innumeris licet frondibus distincta, propriis surculis maritatur, sic pater quasi fons & caput fluminis, unde liberi velut rivi manant; ma-

ter quasi arbor aut radix, posteri velut rami: *Stemmate quod Tusco ramum millefimo ducis*, ait Persius Sat. 3. Quinimo a natura abhorret, uti conjuncta jungantur, & cognatio vix incepta ad sua statim initia revertatur. *Nefas esse, ut radix ramum ducat, aut ramus radicem*, ajebat Moses Maimonides. Dedi unam causam. Vin aliam? Immo addam, & cum illa omnino jungendam: ne Adami exemplum, ad carnem suam accedentis nobis obmoveri possit. Pergo igitur, quod ex carnis illa unitate, a conjugibus propagata & communicata, relatio oriatur valde inæqualis, vi cujus liberi parentibus, ut vitæ suæ auctoribus, officia pietatis, honoris & reverentiæ debent. Parentes enim decorum simulacra sunt; deos conspicuos, qui ingentum Deum imitantur, vitam dando, eos Philo ad decalogum appellavit. Contra parentes dominium, potestatem & obsequium jure suo sibi poscunt: quæ omnia non pacto tantum nuptiali æqualitatem quandam naturæ legibus inducente, sed mutua inprimis pudendorum contractatione imminui, vel in totum tolli necesse est. Quid? quod maritus, si superiore lege matrimoniali dicamus, eam reverentiam, quam natura exigit, matri præstare non potest. Bene Seneca Medea: *Amor timere neminem verus potest*. Et Ovidius Heroid. XIX. v.

173.

Nunc male res junctæ, calor & reverentia pugnant.
§. II.

Ad lineam ergo rectam quod attinet, sanguinis illa necessitudo indeque fluens relatio in perpetuum salva manet, vel saltem per ingens temporis spatium propagatur. Index unitatis est maxima parentes inter & liberos similitudo; ex qua superioris Asiæ populi, quibus communio uxorum in usu, liberos distinxerunt, Aristotele auctore, lib. 11. Polit. c. 2. Unde a commixtione parentum & liberorum naturam ab horrere, res ipsa docet, & pietas, & jura parentum sacra inculcant, & præter Gentes cultiores, ipsa bruta agnoscunt, si qua Aristoteli, Varroni, Plinio & credulo

ni-

nimis Justiniano nostro est fides. Myrrha apud Ovidium x. Met. 353. *neve parentis Concubitu vetito naturæ pollue fædus. Velle puta; res ipsa vetat.* In transversa linea similis observatio est in personis, quæ immediate stipiti subsunt, licet non tanta. Scimus voluisse creatorem genus humanum propagari per conjunctionem fratrum & sororum; quod autem in se turpe est, id nulla ratione aut circumstantia temporis & necessitatis, quæ in Deum non cadit, honestum fieri potest. Conjunctionem fratrum & sororum, sanguinis parentum recens atque necdum ab extraneo turbata vis vetaret, quidem videtur; sed obscure, & per consequentiam tantum, quatenus portio parentum sunt, horumque nuditatem aperit frater, qui pubem sororis detegere non erubescit. *Ne interficiamus Josephum, frater noster, caro nostra est*, ait Juda, Genes. XXXVII. v. 27. Ortum communem fratres quasi eosdem facere, Aristoteles dixit Ethic. Nic. vii. 1. 14. Aliæ vero rationes huic addendæ sunt, ob quas jure divino voluntario inprimis nuptiæ illæ, tanquam incestæ, vetitæ sunt: inter quas eminet causa a Mose Maimonide prodita, ne convictus quotidianus & inobservatus stupris ansam daret, apud gentes libidinofas; unde non exigua civitati mala nascerentur. Hinc Plato horum conjugia *scelestæ, Deo invisa, & turpium turpissima* appellavit, lib. VIII. de LL. addita ratione: *quia nulla hujus consuetudinis cupiditas vulgi animos titillat, etsi pulcherrimæ sint sorores.* Quorsum & Comici illud referunt: *Tam pudica est a me, ac si esset soror mea.* Quamvis fratris & sororis vocabula, apud Poetas passim, inter nequitæ vocabula ponantur. vid. Brouckhus. ad Tibull. l. i. cl. 1. In patruis & avunculis, amitis & materteris accedit paternæ & maternæ reverentiæ similitudo, propter quam horum conjugium *scelestum consubernium, turpissimum consortium, & nefanda licentia* dicitur in l. ult. C. de incest. nupt. Huc pertinet quod Simplicius, interpres Epicteti rationem etymi *thiorum* reddens, ait, cum patres liberis olim fuerint quasi *dei*, metu diviniæ majestatis parentes. *desuisse deos nominari; in patruorum*

appellatione autem veteris notæ vestigia mansisse, ut *Suus* vocarentur. Horatius & Persius patrum pro gravi cenfore posuerunt, & Manilius tutoris supercilium *patruique rigorem* conjunxit lib. v. Catullus & nutrix Octaviæ apud Senecam nuptias cum fratre filia, *toros nefandos* vocant, easque *stebili face* jungi existimarunt. Sed prohibitio Romæ non fuit perpetua, & conjugia talia *aliis gentibus solennia* fuisse Tacitus indicavit, Ann. XII. cap. 6. quocum Cl. Noodtius jungatur lib. 11. Obs. c. 5.

§. III.

Ultra has personas neque relatio inæqualis, neque arctior carnis propinquitas, neque incommoda familiæ modo enarrata deprehenduntur. Nam statim in Consobrinorum parentibus duæ extraneæ personæ intercedunt, quarum sanguis duplo unum illum stipitis vincens efficit, ut patruales caro carnis esse desinant, & sic paulatim aviti sanguinis vestigia expungantur. Simili res fiet illustrior. Pictor imaginem hominis bis diverso tempore expressurus, ejus ideam mente concipit, sed quod tabulæ inscribitur, id raro exacte ideæ, multo minus corpori vivo, minime vero tabulæ tabulæ responderet. Si alii deinde pictores diversi imagines illas priores imitentur, ii quantam adhibebunt artem, nunquam tamen eas adeo perfecte sistunt, quin longius a vera imagine recedant; rursus harum imitationum imitatio si instituatur, vix lineæ similitudinem inter se habebunt. Sic natura parentum per omnia vultum raro in liberis format, ipsosque gemellos alia atque alia facies, habitus, mens, mores contrarii, vitæque genera rixantia discernunt, ut pulchre Quintilianus decl. 7. Fratres vero & sorores alienis per matrimonia familiis inserti, liberos producant & sanguine & moribus prorsus discrepantes; atque ita, præter commixtas sanguinis aviti particulas, ipsa natura in Consobrinis vix quicquam invenit & agnoscit; istæ vero tanti non sunt, ut conjugio obesse possint. Quin potius nimia diversi sanguinis confusio omnem personarum unitatem, atque naturalem

nu-

nuptiarum ἀταξίαν tollit. Ipsa porro relatio æqualis, quæ inter has personas est, societati conjugali satis patrocinator; cum in æquales reverentiæ ratio non cadat, & nuptiæ inter compares convenientissimæ existimentur. Nam & firmissima est inter pares amicitia, atque propinquitas fugiens matrimonii vinculo rursus dum alligatur, geminato sic pietas crescit amore. Sidonius Apollinaris lib. 1v. epist. 1. *Soror mihi, quæ uxor tibi; hinc inter nos summa & principalis necessitudo, & ea quidem patrueles, non germana fraternitas, quæ plerumque se purius, fortius, meracius amat. Recte idcirco Aristoteles patrueles, ceterosque cognatos eodem stipite conjungi ait, ut tamen fratres & sorores quasi eosdem vocet, in reliquis gradus simul agnoscat: ita ille lib. viii. Ethic. Nic. 14.* Ἀνέψιοι δὲ καὶ οἱ λοιποὶ συγγενεὺς ἐκ τούτων συνεισλαμβάνονται τὸ γὰρ ἀπὸ τῶν αὐτῶν ὡς καὶ γίνονται οἱ μὲν οἰκιστῆρες, οἱ δὲ ἀλλοτρίωτες. Patrueles vero & ceteri cognati conjunguntur per parentes, quatenus ex iisdem ortum habent: ita ut alii conjunctiores sint, alii minus conjuncti, pro ortus ratione. Cicero consobrinos, ex ædibus paternis & avitis, in novas velut colonias exire, elegantissima Platonis imitatione, scribit, unde stupri furtivi metus cessat. Verba ejus, lib. 1. de Offic. c. 17. sunt ista: *Prima societas in conjugio est: proxima in liberis: deinde una domus, & communia omnia. Id autem principium est urbis, & quasi seminarium Reip. Sequuntur fratrum conjunctiones: post consobrinorum sobrinorumque: qui cum una domo jam capi non possint, in alias domos, tanquam in colonias exeunt: sequuntur connubia & affinitates. Denique in hominum generatione non idem obtinet, quod Theophrastus de quibusdam plantis tradit, quæ post tertium partum similitudinem representare incipiant; quin potius in secunda & tertia sobole dissimilia multa, etiam in leguminibus, ut Virgilius lib. 1. Georg. 193. observavit:*

*Semina vidi equidem multos medicare serentes,
Et nitro prius & nigra perfundere amurca,
Grandior ut factus siliquis fallacibus esset.*

N

Et

*Et quamvis igni exiguo properata maderent,
Vidi lecta diu, & multo spectata labore.
Degenerare tamen: ni vis humana quotannis
Maxima quæque manu legeret. Sic omnia fatis
In pejus ruere, ac retro sublapsa referri.*

§. IV.

Quod si porro consensus omnium Gentium Jus Naturæ putanda est, & conscientia universi generis humani in disciplina morum haud facile aberrat, magnum momentum sententiæ huic accedet, si Consobrinos sociari, plerisque populis morem & fas fuisse, ostendemus. Paulus *Jure gentium incestum committere*, ait, *qui ex gradu ascendentium vel descendantium uxorem duxerit. Qui vero ex latere eam duxit, quam vetatur* &c. l. ult. D. de Ritu nupt. Satis commate posteriori prodens, in linea obliqua incestus mere civiles esse, vel saltem ad paucos gradus naturales; quod magis placet, propter l. 8. l. 14. §. 2. D. Eod. l. 35. §. 1. de Verb. Obl. l. 19. C. de Episc. & Cler. Plane communibus Græcorum legibus (ut impuros Ægyptios & Persas mittam) fratrum & sororum conjugia tantum inter collaterales verita fuisse, vel ex Ocello Lucano cap. IV. & Artemidoro lib. V. cap. 24. evinci potest. Solon Atheniensibus permisit ducere sororem consanguineam, non uterinam, ut multi veterum tradunt, & Cimonis exemplo apud Nepotem, tum Archeptolis Themistoclis filii matrimonio cum Mnesiptolema, sorore ex alia matre nata, apud Plutarchum, comprobatur. Genus ergo maternum, ut certius, magis attenderunt Græci cum Phœnicibus, quibus eundem morem tribuit Achilles Tatius libro 1. & a quibus Athenienses multa didicerunt. Quemadmodum autem Spartani omnia studia sua in diversa destinaverunt, & sive metu collationis, sive naturali quodam diffidio, alio quam Athenienses dicendi, scribendi, præliandi genere utebantur; sic Lycurgus permissio connubio uterinæ, duci prohibuit sororem ex patre, auctore Philone Judæo lib. de Legib. spec.

spec. pag. m. 779. cujus verba ex versione Gelenii semel adscribo: *Atheniensis Solon hoc observat in uterinis tantum, germanis eodem patre prognatis relinquit liberum. Contra Lacedæmoniorum legislator uterinis non interdicat connubio, sed solis eodem patre genitis.* Hic itaque proximus gradus. Nam Anaxandrides Lacedæmonius sororis filiam uxorem habuit, auctore Herodoto lib. V. Fratris vero filiam, qui par est gradus, Athenis ducere licitum fuisse, ostendit Isæus & in *Lysæ* vita Plutarchus; ut minus ideo de Consobrinis dubitandum sit, quorum nuptias justas fuisse Andocid. orat. 1. & Isæus orat. 7. testantur. *Æschylus Atheniensis, scio, in Danaidibus eorum conjugia vocat λαιτρεα ut θομις αιργυι, cubilia, quæ jus prohibet, existimans sic μαινεσθαι γένος, fœdari genus.* Sed Grotius ex Scholiaste ejus observavit, illegitimas tales fuisse nuptias, quod adhuc viveret virginum pater, quasi justæ fuerint comortuo, ex lege ται επικληρουι. Simile quid habes apud Hebræos, unde legis origo, Numer. cap. 36. v. 10. Confer Petijtum ad L.L. Atticas lib. VI. tit. 1. & Grotium ad Matth. 1. v. 16. In fabulis gentilium, quibus Heroum amores describuntur, multa id genus nuptiarum exempla. Hyginus de *Ægypti* filiis tradit: *impetratas sorores patruales acceperunt uxores.* fab. 168. erant enim Danai patrui sui filix. Deucalion Promethei filius ad uxorem, & item consobrinam suam Pyrrham, ex quibus genus reliquum fingitur hominum extitisse, apud Quidium lib. 1. Metam. 350.

*O soror, o conjux, o femina sola superstes,
Quam commune mihi genus & patruelis origo;
Deinde torus junxit.*

Hermione ad Orestem apud eundem Epist. Heroidum VIII.

*Quid, quod avus nobis idem Pelopeius Atreus
Et, si non esses vir mihi, frater eras,
Vir, precor, uxori, frater succurre sorori:
Instant officio nomina bina tuo.*

Agamemnon enim & Menelaus germani fratres fuerant: il-

le Orestem genuit ex Clytemnestra, iste ex Helena Her-
mionem, quæ Oresti patrueli suo nupta fuit: unde in fine
dictæ Epistolæ:

Per patris ossa tui, patru mihi &c.

s. V.

A Græcis veniamus ad Hebræos, qui non minus certa
harum nuptiarum testimonia nobis promittunt. Præscripse-
rat Deus Opt. Max. populo huic duræ cervicis, & ad in-
cesta, quæ viderat Ægyptiorum conjugia inclinanti, Leviti-
ci cap. 18. & 20. regulam, qua omnes, qui propinquo-
rum numero habendi sunt, enumerantur. Hæc vero con-
sobrinorum mentionem, fecit nullam, ne quidem si cum
Karræis paritatem gradus & argumentationem a simili, vel
a minori ad majus admittas. Itaque & ante hanc legem,
& post eam latam, Patruelium nuptias licitas, Deoque pro-
batas fuisse, confirmare in proclivi est. Præteribo Saram,
quam nonnulli censent, sororem Abrahami dici, more He-
bræo, cum non esset soror proprie dicta, sed consobrina:
plerique vero Tharæ filiam, ex altera uxore, & rectius
volunt; quales nuptias Phœnicibus & Atheniensibus per-
missas vidimus. Sed procul dubio Rebecca patrueli suo
Isaaco nupsit, *Genes. XXIV. v. 15.* Jacobus Rachelem &
Liam avunculi sui Labani filias uxores duxit *Genes. XXVIII.
v. 2.* Esavus Bosmatham, vel Machalatham, filiam Ismae-
lis *Genes. XXXVI. v. 3.* Et quemadmodum Moyses jusserat *Jeho-
va*, ita fecerunt *Tselophchadi filie*, & *Maabla*, *Thirisa*,
Chogla, *Milcha* & *Noha*, filie *Tselophchadi*, filiis patruorum
suorum nupservnt, Num. cap. XXXVI. v. 10. Sic & Hothniel
Hacsam Calebi patru sui filiam; & Rechabham Mochala-
tham, filiam Jerimothi filii Davidis; & junior Tobias con-
sobrinam suam Saram, filiam Raguelis, qui majoris To-
biæ frater erat, uxores duxisse memorantur, *Jehosch. cap.
XV. v. 17.* & 2. *Chron. XI. v. 18.* *Tob. VII.* Quid mora-
mur? Ipsum Josephum & Mariam patruces fuisse, viri
docti ex *Matth. I. v. 15.* & *Lucæ III. v. 23.* demonstrari
possent

posse existimarunt. In hanc porro sententiam Augustinus, diligentissimus legis divinæ observator, lib. XV. de Civitate Dei. cap. 16. diserte scribit: *Experti sumus in connubiis consobrinarum, quam raro per morem fiebat, quod fieri per leges licebat, quia id nec divina prohibuit, & nondum prohibuerat lex humana.* Consentit Philo Judæus in libro de Special. leg. ubi cum accuratum catalogum personarum a Mose prohibitarum instituit, consobrinos omittit. Ne quem vero interpres ejus decipiat, verba Græca adscribo pag. m. 780. *Ὁν χάριν πολλὰς καὶ ἄλλας οἰκίας ἐκλύουσ' προσαζας μὴ θυγατέρας, μὴ υἱοὺς, μὴ τῆτέρας πρὸς πατέρας, ἢ μητέρας, μὴ υἱὸν ἢ υἱήν, ἢ ἀδελφὴν γυναῖκα γινόμενης ἐγγυασθῆαι.* Vertit Gelenius: *Quapropter & aliarum nuptiæ sunt vetitæ, neptium, CONSOBRINARUM, putuum, privignarum &c.* At nulla ibi ~~ἀντι~~ occurrit mentio, nec alia vox est, quæ consobrini comprehendantur. *θυγατέρας* est neptis ex filia; *υἱὸς* est filia filii, seu neptis ex filio, eadem quæ *υἱήν*, Hesychio teste. Adstipulatur item Athanasius Synopsi S. Scripturæ in *Numeros*: *Ἰψάρων*, inquit, occasione mandatum Domini datur, & lex ponitur, qua legitima decernuntur cum consobrinis imita conjugia.

§. VI.

Hos Triumviros, cum exemplis ante allatis, opponimus Ambrosio, qui unus Epist. LXVI. ad Paternum vetitas lege Dei has nuptias contendit. Verba ejus sunt ista: *Quid enim est, quod dubitari queat, cum lex divina etiam patruelēs fratres prohibeat convenire in conjugalem copulam, qui sibi quarto sociantur gradu?* Antonius vero Contius lib. II. Lectio- num subsecivarum cap. 1. ipse fatetur, excussis omnibus omnino Bibliorum indicibus, neminem reperturum, ubi conjugium hoc nominatim prohibeatur, nec tamen id ideo concessum admittit, sed potius, ut *parum honestum & fere nefarium* damnat; quia generale præceptum Mosaiico interdicto præfixum, ut omnis homo abstinere a carne sua, consobrinos comprehendere pro certo habet. Revocare autem legem sacram, ad regulam Juris Romani, qua dicitur; si

quid in lege prohibitoria nominatim non expressum, videri permitti, non satis pronuntiat esse tutum. Idem sedit Græcis Christianis, quorum hac de re sententiam explicat Basiliius ad Diodorum, nec aliter Doctores Juris Canonici rationes suas putant; ut plenius cap. 4. trademus. At nisi generi hoc loco per species tam prolixè præscriptas, & cap. xx. repetitas, derogari dicamus, prohibitio serpet in infinitum, & vix exitus propinquitatum reperietur: quandoquidem in centesima piorum generatione aviti sanguinis reliquæ supersunt, quorum omnium nuptias prohibendas, quis unquam, nisi æger, somniavit? Nova hæc lex matrimonii libertatem, qua hæctenus Ebræi cum Ægyptiis fuerant usi, restringit; ergo pro casibus, nec expresse, nec implicite, eadem gradus ratione, prohibitis est præsumendum. Accedit, quod ita semper interpretati Judæi, eoque jure usi sunt: qui licet passim a Christo malæ tractationis legum suarum accusentur, nusquam tamen hac propter reprehensi leguntur. De dissensu inter Traditionarios & Karæos adi, si lubet, Seldenum Uxor. Ebraic. cap. 111. seqq. & Triglandium diatriba de Secta Karæorum n. 135. Quemadmodum igitur Paulus in 1. 92. de V. S. ait: *Proximus est, cui nemo antecedit*: sic in lege Dei propinquum carnis ad primas lineæ transversæ personas est restringendum.

§. VII.

Antequam hinc discedamus, duæ rationes naturales sub incudem vocandæ sunt, quibus magni auctores, Gregorius I. & Innocentius III. Pontifices Romani, ut audiunt, prudentissimi, in alia omnia ivere. Ille enim ab Augustino, Anglorum Episcopo, super hac re consultus, rescripsit: *Quædam terrena lex in Republica Romana permittit, ut fratre fratris & sororis, sive duorum fratrum germanorum, seu duorum sororum filius & filia misceantur: sed experimento didicimus, ex tali conjugio sobolem non posse succrescere*, referente Alexandro Papa in C. 2. caus. 35. q. 5. Speciosum profecto argumentum detestandi nuptias, quibus natura, sui ali-

oquin

oquin conservatrix, effectum negat; sed metus est, ut satis sit verum! Quanquam enim & his & præteritis temporibus, non desunt exempla, quibus id adjuvari queat: Brutus quippe, Marcellus & Julianus consobrinus duxerunt, nec sobolem susceperunt: Cluentiæ conjugium cum Melino consobрино subitum divortium diremit: Marcus Philosophus ex Faustina consobrina sua prole beatus est, sed infelici. Quis vero unquam ab eventu, ubi causæ potuerunt esse complures, facta notanda existimavit? Sterilia forsân sub Gregorii imperio exstiterunt quædam amitinorum conjugia, abortientibus feminis ob anathematis & æternæ pœnæ fulmina; nostræ certe feminæ nec sterilia credunt, nec experiuntur. Et quid Jacobus an non ex consobrinis suscepit prolem numerosam & felicem? Quid Sp. Ligustinus? nonne gloriatur apud Livium lib. XLII. cap. 32, *Quum primum in ætatem veni, pater mihi uxorem fratris sui filiam dedit: quæ secum nihil attulit, præter libertatem pudicitiamque, & cum his fecunditatem, quanta vel in dii domo satis esset. Sex filii nobis, duæ filiæ sunt: utraque jam nupta. Filii quatuor togas viriles habent, duo prætexati sunt.* Hæc Gregorio reposita sufficiant. Videamus quid Innocentius causetur. Is anteriorum Pontificum constitutiones ipse jam Pontifex corrigens, intra quartum gradum simul Consobrinorum prohibuit matrimonia, quia *quatuor sunt humores in corpore humano, qui constant ex quatuor elementis. C. 8. X. de Consang. & affinit.* Profunda sane Philosophia, quam vix quisquam ex Aristotelis aut Cartesii schola subtilissimus explicare valeat. Unde alto cachinno derisa, exsibilata & explosa est a viris doctis putantibus, non minus insulse ad quatuor humores, quam ad quatuor Evangelistas, totidemve cardines cœli, ventos, rotas plaustrî, vel alium quemvis quaternarium numerum provocari. Mitius autem cum ea agi jubet Bellarminus lib. 1. de *matrim. sacram. cap. 29.* ex Thoma Aquinate scribens, physicam rationem esse: sicut enim corpus ex quatuor constat humoribus: ita vim igneam absumi in prima generatione: æream in secunda: a-

queam

quæ in tertia: *terream* in quarta; ut totus ille sanguis in quarta demum generatione pereat & consumatur. Jam olim Empedoclem, refert Plutarchus, lib. V. de Placit. Phil. cap. 22. docuisse, carnes ex interna illa elementorum contemperatione nasci: sanguinem quoque, choleram, phlegma & melancholiam ex iisdem componi, vetus sententia est. Quousque vero sese extendat humorum minimorum per varias transfusiones alteratio, nescio an definierint alii, nec nostrum est inquirere; ne in Medicorum possessiones irruisse videamur. In superioribus quidem simile nobis argumentum placuit, ex sanguinis identitate & mutatione per generationes defutum: nolim tamen ab humoribus compositis transiri ad elementa simplicia, quum a singulis potius in qualibet generatione aliquid deccat. Nolim etiam exiguus, quæ in Consobrinis forte supersunt, sanguinis aviti reliquiis, tantam prohibendi vim tribui, ne ipso Deo, Naturæ auctore, castiores aut religiosiores facti videamur.

CAPUT III.

Jure Romano consobrinorum nuptias varie & improbatas, & permissas.

- §. I. *Antiquo jure Romano Consobrini jungi non potuere, donec Plebiscito id concederetur.* II. *Ulpianus ex Plutarcho vindicatus.* III. *Quando harum nuptiarum prohibitio prima & permissio caperis, ex Dionysio & Tacito disquisitum.* IV. *Varia earum exempla, stante Republica & occupata, in medium prolata.* V. *Alia ex libris Jurisconsultorum & Imperatorum rescriptis. l. 3. D. de Rit. nupt. explicatur.* VI. *Theodosius M. primus eas comminatione severissima pæne vetuit: nec tamen ejus deperditæ Constitutionis suæ for Ambrosius fuit.* VII. *Ejus filius Arcadius per Orientem pænam primum temperavit, dein omnem sustulit.* VIII. *Honorius vero per Occidentem nuptias ex rescripto peti jussit: cujus exemplum ex Symmaco illustratum.* IX. *Jacobi Sirmondi argumenta, quibus l. 19. C. de*

C. de Nuptiis a Triboniano fabricatam existimat, referuntur. X.
Eadem refelluntur.

§. I.

Major nunc rerum ordo surgit, ubi ad mores legesque Populi Romani perventum est. Satis eas commendat, & mirifice quidem, ut Calvino videtur ad Levit. 18. quod Mosaisco juri examussum respondent, & adhuc aliquanto longius verecundiam in necessitatem flectunt. Adco enim abhorrent a sanguinis mixtura, ut non modo ad serviles & meretricias cognationes, verum & eo, ubi sanguis nullus est, sed imago tantum, quemadmodum in sponsa filii & adoptivis, prohibitionem extendant. Ad Consobrinos quod attinet, varia & multiplex juris ratio fuit, unde tempora apprime sunt distinguenda. Antiquissimo jure civili matrimonio inter se jungi non potuerunt; fortassis quod, ex rigida Sabinorum disciplina, satius duxerunt Quirites, conjugis augere necessitudines, atque ab aliis uxores accipiendo, multos sibi affines comparare. Inde Virellius quaesitis undique coloribus incestus fratris filiae nuptias castas tacere annitens, apud Tacitum lib. XII. Annalium cap. 6. coram Senatu ait: *Sobrinarum diu ignorata, id est improbata conjugia, tempore addito percrebuisse.* Mutationis causam nobis retulit Plutarchus in Quaestionibus Romanis cap. VI. *Antiquitus, inquit, sanguine junctas Romani non copulabant sibi in matrimonio, ut ne nunc quidem materteras aut sorores. Sero concessum fuit ut ducere consobrinas liceret, idque ex tali occasione. Vir quidam pecunia indigens, alioqui honestus, & praeter ceteris vulgo civium gratus, consobrinam in matrimonio habere, & ex ea locupletatus credebatur. Cum autem hac de re accusatus esset, populus remissa causae cognitione illum absolvit: decreto facto: ut omnibus liceret ducere agnatas, usque ad consobrinas, superiores autem gradus prohiberentur.*

Lucem hinc feneratur elegantissimum illud Ulpiani fragmentum, quod ex Collatione Legum Mosaicarum & Romanarum feliciter restitutum extat tit. V. §. 6. in hæc verba : *Inter parentes & liberos infinite cujuscunque gradus connubium non est. Inter cognatos autem ex transverso gradu olim quidem usque ad quartum gradum matrimonia contrahi non poterant : nunc autem etiam ex tertio gradu licet uxorem ducere.* Nisi enim me omnia fallunt, particula olim ad Plebiscitum illud vetustum a Plutarcho memoratum collineat, ex quo consobrinis in quarto gradu connubium permixtum est. Inde etiam regula enata videtur, vulgo in jure, tanquam per manus, tradita : Inter cognatos quarto gradu connubium esse, extra personas, quæ parentum liberorumque locum obtinent, l. 17. §. 2. de Ritu nupt. ubi Cujas : *quamvis magna amita & matertera quarto gradu sint.* Vir Præclarus, Jacobus Cujacius, in notis ad dictum Ulpiani titulum, particulam usque inclusive interpretatus est; quasi olim inter se patruales, amitini, consobrini jungi matrimonio non potuerint : & satis scio, plerumque eam in libris nostris ita usurpari, v. gr. l. fin. §. 1. D. de Senator. l. 8. §. 14. de Inoff. test. l. 35. §. 1. D. de Legatis lib. 3. Quemadmodum vero apud alios Latinæ Linguæ auctores, sic & apud Jurisconsultos, articulus ille includit vel excludit, intendit vel remittit. Vide l. 10. D. de Dolo malo. l. 3. pr. D. de Usuris. Et bene est, quod ipse Cujacius lib. xiii. Obs. c. 16. explicationem & emendationem suam repudiavit. Non magis audiendus est Contius lib. II. subsec. lect. cap. 1. ex Manuscripto Codice Philippi Gervasii apud Ulpianum usque ad quintum gradum omnino legendum contendens : utcunque enim hoc intelligas, incommodum habebis; nec dubito corruptum fuisse codicem illum, & forsan ab Aniani manu, qui ex Theodosiana lege pro quarto gradu quintum reposuit. Nimis quoque dilutum est, quod huic lectioni præsidium ex voce Sobrinarum apud Tacitum quaerit,

rit,

rit, de cujus significato jam capite primo dicere occupavimus. Ceterum vel ex hoc loco in transitu discimus, veteres Jurisconsultos graduum computationem in tractatu de nuptiis non prorsus repudiassent, licet exemplo Dei T. O. M. aliorumque Legislatorum, plerumque & facilius quidem, personas conjungi prohibitas commemorarent, suppeditatio illa quoque ob hereditates & tutelas primario esset introducta, auctore Paulo l. 10. pr. D. de Gradibus. Ulpianum secutus est Honorius in l. un. C. Th. Si nupt exrescr. pet. & Ambrosius Epist. LXVI. ad Paternum, ubi fratres patruales, ait, sibi quarto sociantur gradu. Ovidius Metamorph. XI. 11. 142.

----- Nostri quoque Sanguinis auctor

Juppiter est, totidemque gradus distamus ab illo.

§. III.

Nunc ad Plutarchum revertamur. Is sero conditum illud populi decretum enarrat, quo consobrinorum nuptiæ permixtæ: pariter ac Tacitus diu ignoratas, ait, tempore percrebuisse. Id vero sobrie accipiendum videtur. Dionysius enim Halicarnassensis lib. IV. Antiquitatum refert, Tullias duas Regis Servii Tullii filias, Lucio & Arunti Tarquinii, Prisci Tarquinii nepotibus, consobrinis suis, matrimonio junctas fuisse: jam autem quod usque a Regum tempore obtinuit, id Plutarchus minime serum vocare potuit, ævo Trajani. Non hic ad Livii dubitationem confugiam, qui lib. I. cap. 46. parum liquere, tradit, an L. Tarquinius Prisci Tarquinii regis filius, neposve fuerit, pluresque auctores pro filia stare scribit: hos enim, qui ita sentiebant, accuratissime refellit Dionysius; minusque verisimile est, in illa morum castitate, Tullias avunculis suis nupsisse. Non etiam Græcum Halicarnassensis textum urgebo, qui τῶν ἀδελφῶν τῆς μητρὸς habet: nam Barnabas Brissotinus de Jure connubiorum jam recte docuit, ἀδελφίδης legendum esse; eaque emendatio pulchris illis exemplis confirmatur, quibus Celebrerrimus Perizonius cap. X. Animadversionum historicarum pag 436. ostendit; vix alia in vo-

cē librariorum frequentius peccasse. Quid igitur? An ex hoc demum tempore nuptias consobrinorum tacito populi consensu dicemus improbatas, quod tam infelix earum in Tarquiniis fuerat eventus? An vero legibus moribusve, quibus privati utebantur, Regum liberi fuerunt soluti? quemadmodum omni ætate Principibus hac parte plus est indultum. Optimum est quod eligas. Illud sane probabile videtur, nulla certa lege Populi Romani horum conjugia vetita esse: passim enim Jurisconsulti de nuptiis agentes ad *mores* provocant, l. 8. l. 39. §. 1. *D. de Ritu nupt.* & Tacitus apte *ignorata* dixit. Jus antiquum de castis incestisque nuptiis totum Pontificium tuit, ut ex Dione constat lib. 48. Pontifices vero cum lucri gratia, vel ex alia politica causa, difficiles essent in nuptiis his permittendis, sensim in mores id abiit, quorum deinde populus pertæsus, molestum hactenus jugum abjecit. Et bella se nunc offerebat occasio, ubi connubii hujus in conservandis familiis utilitas tam manifeste apparebat, quare *morem accommodari oportuit, quemadmodum conducebat*, ait Tacitus dicto loco.

§. IV.

Tot ac tam illustria, post Plebiscitum hoc, ejusmodi matrimoniorum occurrunt exempla, ut vere idem dixerit Tacitus, ea tempore *percrebuisse*. Jam enim anno ab Urbe condita 582. P. Licinio Crasso & C. Cassio Longino Consulibus, Sp. Ligustinus centurio uxore patrueli sua ita gloriatur, apud Livium lib. XLII. cap. 32. ac si bonum factum esset, si quis consobrinæ nuptias ambiret; unde jam pridem legem illam a Plutarcho memoratam rogatam conicere licet. Brutus utique paulo post uxorem duxit Portiam consobrinam suam, Catonis Uticensis filiam; cum ipse esset filius Serbilæ, sororis ipsius Catonis, *ἑστὸς ἀνδρός* ait Plutarchus in Bruto cap. III. M. Antonius C. Antonii Patruī sui filiam, *αὐτοῦ τοῦ πατρὸς αὐτοῦ*, matrimonio sibi copulavit, auctore eodem in vita Antonii cap. XII. Unde Tullius Philipp. II. cap. 38. *Frequentissimo Senatu, sedente patre,*

patruo; hanc tibi esse cum Dolabella causam odii dicere ausus es, quod ab eo sorori (patrueli) & uxori tue suprum oblatum esse comperisses. Idem Cicero in principio Orationis pro A. Cluentio refert, ejus filiam nupsisse A. Aurio Melino consobрино suo, illasque nuptias plenae dignitatis, plenae concordiae fuisse. Sub libera porro, an occupata republica, incertum, P. Aquius quidam cum uxore sua gemina in arca conditus, quasi posterorum interesset, titulo sepulcri hoc inscribi jussit, se consobrinam duxisse, quanquam proprie sobrini fuerint, si graduum supputatio incatur. Exstat apud Gruterum pag. CCCLX. n. 3.

P. AQVIVS. SCAEVÆ ET. FLAVIAE

FILIVS. CONSI. NEPOS

BARBI. ET. DVRICIAE. PRONEPOS

CONSOBRINVS. IDEMQ. VIR

FLAVIAE. CONSI. FILIAE. SCAPVLAE. NEPTIS

BARBI. PRONEPTIS.

Augustus filiam suam Juliam Marcello Octaviae sororis suae filio nuptum dedit, ut Dio Coccejanus lib. LIII. & Suetonius in ejus vita cap. LXIII. memoriae prodidere. Sororem Germanici Liviam, quae Dioni & Suctonio Livilla vocatur, Druso consobрино suo nuptam fuisse, a Tacito lib. II. Annal. cap. 84. relatum accepimus. Et Quintilianus filium suum immatura morte præreptum lugens, avunculo cum generum destinatum significat. lib. VI. Orat. instit. proœm. Sub Divis Fratibus Apulejus quoque lib. IV. Metam. puellam a latronibus captam hoc pacto locutam refert: *Speciosus adolescens inter suos principalis, quem filium publicum omnis sibi civitas cooptavit, meus alioquin consobrinus, votis nuptialibus pacto jugali pridem destinatus, consensu parentum tabulis etiam maritus nuncupatus.* Ipse Marcus Antoninus Philosophus, qui omnes retro imperatores pietate & sapientia vicit, quique sacratissimus princeps a Cajo in l. 9. ad Senatuse. Tertull. Providentissimus & juris religiosissimus a Papiniano in l. 67. §. fin. de Legatis lib. 2.

&c. *Φιλοσοφικότητας* a Justiniano Nov. 22. appellatur, Faustina confobrinam suam uxorem duxit, auctore Julio Capitolino. Constantius denique Imperator sororem suam Helenam, vel, ut aliis audit, Constantiam, Juliano Cæsari patrueli in matrimonium tradidit, ut Julianus Imp. ad S. P. Q. Atheniensem pag. m. 272. & Philostorgius Hist. Eccl. lib. IV. c. 2. testantur.

§. V.

Verum quid aliunde testimonia coacervamus? cum domi nostræ, Pandectæ & Codex exemplis nuptiarum inter Confobrinos contractarum abundant. Ecce enim, quam aperte Sextus Pomponius scribat, suo, id est Marci Antonini tempore, avum, qui nepotem ex filio, & neptem ex altera filia in potestate habebat, nuptias inter eos conciliare potuisse l. 3. *D. de Ritu nupt.* Suppar huic Ulpius Marcellus fratrem, eundemque confobrinum ponit, sequentem conditionem institutioni adjecisse: *Uter ex fratribus meis confobrinam nostram duxerit uxorem, ex dodrante; qui non duxerit, ex quadrante heres esto, & decedit, confobrinam qui ex his duxit, habebit quadrantem, l. 23. D. de Condit. institut.* Post hunc Q. Cervidius Scævola, sub Commodō, ex factō consultus, speciem proponit, ubi quis filiam suam heredem scripsit, & ita cavit: *Lucio Titio, fratris mei filio, genero meo, ducentos aureos relinquo, in l. 78. §. 8. D. Ad SCr. Trebell.* Hujus discipulus, Æmilius Papinianus, Severi tempore ad eundem fere casum, quem ex Marcello, vidimus, respondet, ubi duos fratres habens, ita eos heredes instituit: *Qui ex fratribus meis Titiam confobrinam uxorem duxerit, ex besse heres esto, qui non duxerit, ex triente, heres esto, l. 24. D. de Condit. institut.* Claudius denique Trypho- ninus in l. 67. §. 1. *de Ritu nupt.* avum proponit, qui tutelam gessit neptis ex filio emancipato natæ, eam nepoti ex altero filio collocare nitentem, & quia par affectionis causa suspicionem fraudis amovebat, hujusmodi nuptias concedendas definit. Ex quibus capitibus satis apparet, non qui-

quidem nuptias hasce tam sponte susceptas, quam a parentibus, matre, avo, patruo, consobрино, bonorum in familia conservandorum causa, imperatas plerumque, licitas tamen fuisse & frequentes. Antonius Faber Jurispr. Pap. tit. IX. princ. 6. illat. 6. permissas quidem agnoscit, sed non jure communi, at ita demum, si principalis rescripti auctoritas interveniret, arg. l. 3. D. de Nuptiis & l. 1. C. Tb. Si nupt. ex rescr. pet. Hoc vero nihil est frigidius! En tibi Pauli verba in dicta l. 3. Si nepotem ex filio, & neptem ex altero filio in potestate habeam, nuptias inter eos, me solo auctore, contrahi posse, Pomponius scribit, & verum est. Quæstio hic non erat de relaxatione Principis; nec vox solus excludit consensum utriusque jungendi, sed jussum patris sponsum; cui invito suus heres agnasci non poterat, secundum regulam. Facile autem hac in specie admissa fuit exceptio, quo avus, qui solus erat Princeps familiæ, solus etiam esset arbiter nuptiarum in familia contrahendarum: cæque neutri filiorum displicere poterant aut debebant, quia avus utrumque copulandum in potestate habebat & optimum pro iis consilium capere videbatur. Sic convenit, quod Antoninus Imperator probabile consilium matris vocat: cæque filio fororis suæ filiam matrimonio jungi voluerat, nec, ait, videri posse, sub specie turpium nuptiarum filiæ viduitatem indixisse. l. 2. C. de inst. & substitut. Non minus Imp. Alexander legatum a patruo fratris filiæ relictum sub conditione si filio suo nupsisset probat, sed tum demum id non deberi rescribit, si mortuo filio, priusquam matrimonium cum eo contractum, conditio defecisset. Diocletianus deinceps & Maximianus in Constitutione sua, Tusco & Anulino Cff. promulgata, quæ e lib V. Codicis Gregoriani in titulum VI. Collationis Legum Mosaicarum & Romanarum migravit, profitentur, Edicto se complexos esse personas, tam cognatorum quam affinium, cum quibus contrahi non liceat matrimonium, at consobrinorum nuptiæ inter illicitas ibi non numerantur.

§. VI.

Flavius Theodosius, cognomento Magnus, Princeps religiosissimus, & honestatis in conjunctionibus amantissimus, primus Consobrinorum nuptias prohibuit, circa annum Domini, ut videtur, trecentiesimum octogesimum quartum, quum jam per sex sæcula a summis & imis Romæ, ab Ethnicis & Christianis, sine pudore contractæ fuissent. Ipsa Constitutio nuspiam hodie exstat, sed ab Honorio, Theodosii filio, in *l. un. C. Th. Si nupt. ex rescript.* expresse memoratur. Eandem indicat Libanius, Orator Antiochenus, in Oratione ad ipsummet Theodosium scripta, *ὅτι οὐκ ἔστιν ἔτι παρὰ τοῦ Λαλαρίου*, cujus verba ex Jacobi Gothofredi, Viri Cl. qui primus eam edidit, versione sunt istæ: *Edixisti etiam, ne Consobrinorum nuptiæ essent, cum id passim liceret: neque tuis, quæ tibi iusta videbantur, temporis observantiâ validior fuit.* Meminit ejusdem Ambrosius Mediolanensis Episcopus, in Epistola ad Paternum lib. vi. n. 48. & altera ad Cynegium lib. viii. n. 62. quæ in editione Basilæensi recte conjunguntur. Verba epistolæ ad Paternum adscribo: *Sed si divina, inquit, te prætereunt, saltem Imperatorum præcepta, a quibus amplissimum accepisti honorem, haudquaquam præterire te debuerunt: Nam Theodosius Imperator etiam patruales fratres & consobrinos vetuit inter se conjugii convenire nomine, & severissimam pœnam statuit, si quis temerare ausus esset fratrum pia pignora: Et tamen illi invicem sibi æquales sunt, tantummodo quia propinquitatis necessitudine & fraterne societatis jugantur vinculo; pietati eos voluit debere, quod nati sunt.* Cœperat nimirum Ecclesia, jam quodammodo superstitionior, ab hujusmodi conjunctione abhorreere, sive quod usu bis aut semel compertum, eam infecundam fuisse & infaustam: sive quod Episcopi conscientias onere nimis scrupuloso gravantes, factum licitum propter vicinitatem illiciti horrebant: sive etiam, quia nominum confusio eam sequebatur: Sic enim Ambrosius dicta epistola: *Quanta deinde etiam reliquorum confusio vocabulorum? Idem avus & socer*

sacer vocabere : ea quoque tibi neptis & nurus diverso nomine nuncupabitur. Potissima vero prohibitionis ratio, quod a dici ad esse consequentiam ducentes, eos, qui vulgo fratres & sorores patruales dicebantur, fratrum & sororum loco habebant. Hanc utique rationem adfert Victor, in vita Theodosii de hac Constitutione scribens, Epit. cap. 76. *Tantum pudori tribuens & continentiae, ut Consobrinarum nuptias vetuerit, tanquam sororum.* Nec abludit Augustinus lib. XV. de Civit. Dei cap. 16. qui anno Christi CDXX. florebat, cujusque verba sunt, quæ sequuntur. *Experti autem sumus in connubiis Consobrinarum, etiam nostris temporibus, propter gradum propinquitatis fraterno gradui proximum, quoniam raro per mores fiebat, quod fieri per leges licebat; quia id nec divina prohibuit, nec adhuc prohibuerat lex humana Verum tamen factum etiam licitum propter vicinitatem horrebatur illiciti, & quod fiebat cum Consobrina, pene cum sorore fieri videbatur; quia & ipsi inter se, propter tam propinquam consanguinitatem, fratres vocantur, & pene germani sunt.* Pœnam legis hujus novellæ transgressoribus dictatam Arcadius, Theodosii filius, nobis retulit, in l. 3. C. Th. de Inc. nupt. Designato, inquit, *lege supplicio, hoc est ignium & proscriptio- nis.* Ambrosius modo laudatus pœnam *severissimam* vocat. Et nimis profecto dura est, ac a juris antiqui lenitate longius recedit; quo vere incestuosos ea tantum pœna, quæ adulteros ex Lege Julia, manebat. l. 38. §. 1. D. ad Legem Jul. de adult. l. 5. de Quest. Paulus lib. II. Sent. tit. 19. §. 5. Baronius in Annalibus Ecclesiasticis ad A. D. 390. gentiles tam acerba sanctione, ab inveterato consobrinorum conjugio deterritos arbitratur, cum Christiani jam ipsi satis abstinere: alii e Gothico jure flammæ supplicium dictæ l. 3. asilutum existimant: verum nemo mirabitur, qui ingenium Theodosii recte noverit. Habebat naturæ impetum, quem si quis leniret, pronus erat ad misericordiam, ut nemo magis; si quis in majus exsuscitaret, ita exacerbabatur, ut, teste Victore in ejus vita, sæpius *severe præcepta modica*

dilatione emollienda essent. Et quantæ hic poenarum minæ fuerint, nullus sane earum atrocitate affectus, sed hæcenus lex sine moribus fuisse videtur, quod contracti, non contrahendi hujusmodi matrimonii veniam faciebat Imperator, excusatione erroris allata. Hoc enim, ut credamus, suadet clementia Imperatorum, qua rigorem legum de incestis nuptiis facile minuebant poenasque remittebant *l. 57. D. de Ritu nupt. l. 38. §. 6. D. ad l. Jul. de adult.* tum etiam, quod Ambrosius in dicta ad Paternum epistola testatur, quibusdam *relaxatum* esse; idque deinceps vel inde constat, quia Theodosii filii, pro nuptiis his *supplicari* apud Patrem mox licuisse, multos etiam *quoquomodo absolutos*, aut *punitos* quidem, superstites tamen mansisse testantur, *l. 1. C. Th. Si nupt. ex rescr. l. 3. C. Th. de Inc. nupt.* An vero, quod Albericus Gentilis, Brouerus, Wissenbachius, & qui non alii? credere, Ambrosius constitutionis hujus suasor fuerit, non satis liquet. Quanquam enim apud Theodosium is summæ habitus auctoritatis, & vetitas lege Dei has nuptias defendit, ejusque consilio famosa illa & decantata *l. 20. C. de Pœnis* de differenda in tricesimum diem poena, post cladem Thessalonicensem, lata feratur: Jacobus tamen Gothofredus ad *d. l. un.* ex temporum ratione animadvertit Imperatori cum hic imponere non potuisse: quandoquidem Constitutio illa condita promulgataque fuit, circa annum Christi 384. quo Theodosius Constantinopoli moratus, ubi Nectarius Episcopus Constantinopolitanus forte, vel alius, eam suggerere potuit: post vero non nisi, Maximo Tyranno devicto, fine anni 388. Mediolani consistere coepit. De *l. 20. C. de Pœnis* vide quæ contra Gothofredum disputat Pagius in Crit. Ann. ad a. 390.

§. VII.

Defuncto Theodosio, filiorum ejus varia admodum & desultoria legislatio circa nuptias has fuisse videtur. Secundo enim imperii sui anno, Arcadius & Honorius patrum interdictum confirmarunt: post, mutato consilio, Con-

Consobrinorum conjugia probarunt: rursus sui velut immemores, nova Constitutione edita, paternam legem revocarunt. Cujus mutationis rationem & causam, cum non satis perciperent, hilarioris etiam famæ interpretes, alii Principibus, alii Triboniano, Aniano etiam alii audacius insultarunt. Omnia autem plana erunt, modo hic in memoriam revocemus, quod omnes norunt, Orbem Romanum a Theodosio inter Arcadium & Honorium divisum, illique Orientis, huic Occidentis Imperium cessisse. Morem autem hunc tenuisse ipsos pariter, ac Principes anteriores, ut divisis licet Imperii partibus regnarent, atque adeo quamvis ab uno tantum Imperatore revera scripta lex esset, ex æquo tamen omnium nomina præferret. Quemadmodum in operibus etiam publicis omnium Imperantium nomina inscripta, quamvis ab uno tantum opus confectum esset. Sic igitur Arcadius partium Orientalium Imperator, in constitutione sua A. D. 396. ad Eutychianum PP. Orientis data, patris exemplo, Consobrinorum nuptias illegitimas quidem pronuntiavit, clementius autem, abolito ignis & proscriptionis supplicio, pœnam ita temperavit, ut uxor tantum uxor non esset, filii ex ea spurii nascerentur, dos item fieret caduca, & conjuges extraneis testamento nihil relinquere possent: ne scilicet, sub specie atrocioris judicii, aliqua in ulciscendo crimine dilatio nasceretur. Ipsa verba Constitutionis, quia sex locis mutilata in Codicem Justinianeum relata est, ex l. 3. C. Th. de Incestis nuptiis, apponere non gravabor:

Impp. Arcad. & Honor. AA. Eutychiano PP. P.

Manente circa eos sententia, qui post latam dudum legem quomodo absoluti sunt aut puniti, si quis incestis posthac consobrinæ suæ, vel sororis aut fratris filiæ, uxorisve, vel ejus postremo, cujus vetitum damnatumque conjugium est, sese nuptiis funestavit, designato quidem Lege supplicio (hoc est ignium, & proscriptionis) careat, proprias etiam quamdiu vixerit teneat facultates: Sed neque uxorem, neque filios ex ea editos habere

credatur; ut nihil prorsus prædictis, ne per interpositam quidem personam, vel donet superstes, vel mortuus derelinquat. Dos, si qua forte solenniter aut data, aut dicta, aut promissa fuerit, juxta jus antiquum, fisci nostri commodis cedat. Testamento suo extraneis nihil derelinquat; sed sive testato, sive intestato legibus ei & jure succedant, si qui forte ex justo & legitimo matrimonio editi fuerint, hoc est de descendantibus filius, filia, nepos, neptis, pronepos, proneptis: de ascendentibus pater, mater, avus, avia: de latere frater, soror, patruus, amita. Testandi sane ita demum habeat facultatem, ut his tantum personis pro juris ac legum, quod voluerit, arbitrio relinquat, quas succedere Imperialis præcepti tenore mandavimus: Ita tamen ut hereditate defuncti penitus arceatur, si quis ex iis, quos memoravimus, in contrahendis incestis nuptiis participatum, atque consilium inisse monstrabitur; successuro in locum illius, qui post eum gradum proximus invenitur. Id sane quod de viris cavimus, etiam de feminis, quæ prædictorum se consortio commaculaverint, custodiat: memoratis vero personis non extantibus, fisco locus pateat. Ad cujus legis nexum & conditionem pertinere jubemus, si qui forte jam dudum, hoc est ante promulgationem hujusce legis, illicitis memoratarum nuptiarum sceleribus commaculati, quoquomodo latere potuerunt. Dat. VI. Kal. Dec. Constantinop. Arcad. IIII. & Honor. III. AA. COSS. Clara legis est sententia, sed in qua haud diu perstitit Arcadius, siquidem novem post annis, A. D. 405. hoc genus conjugii prorsus legitimum, & liberos ex eo natos parentum successores haberi voluit; revocato jure antiquo, quod stante & occupata Republica, in primis tempore Jurisconsultorum, supra observavimus viguisse. Verba Constitutionis correctoriæ ad eundem Eutychianum in l. 19. C. de Nuptiis sunt, quæ sequuntur:

Imp. Arcad. & Honor. AA. Eutychiano PF. P.
Celebrandis inter Consobrinos matrimoniis licentia legis hujus salubritate indulta est: ut revocata prisca juris auctoritate, resinctisque calumniarum fomentis, matrimonium inter Consobrinos
ba-

babeatur legitimus: sive ex duobus fratribus, sive ex duabus sororibus, sive ex fratre & sorore nati sunt: & ex eo matrimonio editi, legitimi, & suis patribus successores habeantur. Dat. Stilicone II. & Anthemio Coss. Elegans est conjectura Jacobi Gothofredi, Viri Eruditissimi, Arsacium Episcopum Constantinopolitanum hujus legis ferendæ auctorem fuisse, qui amoto, & anno superiore 404. in exilium pulso Joanni Chrysostomo nunc successus, omnia in contrariam sententiam commutavit: adeoque & hanc Constitutionem, quæ ad religionem & honestatem pertinere videbatur, suo consilio suavit, quam Chrysostomus proculdubio probaturus non fuisset. Simile quid observavit idem in l. ult. C. Tb. de Ufuris.

§. VIII.

Hæc Arcadius in Oriente. Videamus quid Honorius, frater & collega ejus, per Occidentem. Is post editam utramque hanc Constitutionem A. D. 409. patris interdictum probavit, ita tamen, ut Consobrinis permiserit, nuptias a sua indulgentia per Rescriptum impetrari. Ipsa verba Constitutionis, multum in Codice Justiniano interpolatæ, rursus apponere lubet. Sunt autem sequentia in l. un. C. Tb. Si nupt. ex rescr. pet. ad Theodorum Præf. Prætorio Italiæ directæ:

Impp. Honor. & Theod. AA. Theodoro PF. P.

Quidam vetusto juris ordine prætermisso, obreptione precum nuptias, quas se intelligunt non mereri, de nobis asstimant postulandas, se habere puellæ consensum consingentes: Quapropter sale sponsaliorum genus præsentis legis definitione prohibemus. Si quis igitur contra hanc definitionem, nuptias precum subreptione meruerit, amissionem bonorum, & pœnam deportationis subiturum se esse non ambigat. Et amisso jure matrimonii, quod prohibita usurpatione meruerit, filios se jussu hac ratione susceptos non habiturum, nec unquam postulatæ indulgentiæ adnotationisve Principis indulto efficacem se veniæ effectum meruisse. Exceptis his, quos Consobrinorum, hoc est quarti gra-

duſ conjunctionem, lex Triumphalis memoria, Patris noſtri exemplo indulſtorum, ſupplicare non vetavit. &c. Dat. Kal. Febr. Ravennæ DD. NN. Honorio VIII. & Theodoſio III. AA. COSS. Ecce Principis interventu Conſobrinæ duci permittit expreſſe, id quod ſevera Patris ſanctione, nec vetitum erat, nec permiſſum. Mos autem ille antiquiſſimus fuit, nuptias ex Reſcripto petendi. Herodotus in Erato narrat, apud Spartanos, ex quorum moribus jus civile Populi Romani conſlatum conſtat, jus fuiſſe, ut Princeps de virgine ſtatueret, ad quam tota hereditas perveniſſet, quis illam uxorem ducere deberet, ſi a patre non eſſet deſponſata. Sub libera Republica ipſe Populus legum impedimenta remittebat, inque ejus arbitrio erat, illicitarum nuptiarum gratiam facere. Cujus poteſtatis elegans admodum & ſingulare exemplum habet Livius lib. XXXIX. cap. 19. in Hiſpala Fecenia libertina, cui, ob Sacra Bacchanalia detecta, inter alia præmia, Scito indultum fuit: Uti ei ingenuo nubere liceret, neu quid ei, qui eam duxiſſet, ob id fraudi ignominiaſſe eſſet. Poſt vero cum omnia populi jura & commoda ad ſiſcum traducta eſſent, Principes beneficio ſuo omnem injuſtarum nuptiarum indulgentiam vindicarunt: v. gr. in Senatore libertinam ducente l. 31. D. de Ritu nupt. in nuptiis tutoris vel curatoris cum pupilla l. pen. C. de Interd. matr. cum ea, quæ impar dignitate, l. ult. D. de Senator. l. 23. C. de Nupt. & ſic quoque Conſobrini, non niſi impetrato Reſcripto, conjungi potuerunt. Egrege hoc declarat Symmachus, Vir Conſularis, qui Theodoſii & filiorum tempora ingenio ſuo illuſtravit, lib. X. Epift. XI. his verbis: Per amicum communem Gaudentium propinqui mei Valentinii preciculas miſi, ſane ad fidem meam & conſcientiam pertinentes. Nam frater ejus Boſerius, cum premeretur extremis & præſentem me, & per epistolam ſummis precibus obſecravit, ut impetrata ſacri auctoritate Reſcripti, filia ejus fratris ſui filio copuletur, quod multis eſſe conſeſſum manifeſta teſtantur exempla. Quare pie ſupplicationi adjumentum meum negare non poſſum,

sum, quoniam fidem meam super his nuptiis voluntas propinqui morientis adstrinxit, ut epistola precibus connexa declarat. His ita distinctis, in fumum abit, quicquid Interpretes de triplici, intra tredecim annos, variatione Arcadio & Honorio Imperatoribus affricuerunt: quando quidem hac in re, non satis, quod Claudianus de fratribus his cecinit:

Conspirant Gemini frenis communibus Orbes.

Barnabas etiam Brissonius & Antonius Contius, dum hujusmodi levitatem ab Impp. removeere studuerunt, si curatius hæc perpendissent, in tanta salebra & errore plane contrario non hæcissent. Ille enim hoc argumentum in libro de Jure connubiorum tractans, legem *Celebrandis* probat; duas autem illas Constitutiones, quas ex Codice Theodosiano attulimus, non sic ab auctoribus suis scriptas existimat, sed quemadmodum in Codice Justiniani repetitæ prælectionis reperiuntur in *l. 6. C. de Incest. nupt.* & *l. 1. C. Si nupt. ex rescr.* ubi clausulæ illæ de nuptiis consobrinorum absunt, quas ab Aniano, Alarici Regis Cancellario, e Gothorum jure, accommodatas censet. Contius vero, quid statueret incertus, lib. I. *Lect. subf. cap. 9.* culpam transfert in Tribonianum, falsi eum accusans, quod *legem 19. C. de Nupt.* Arcadio & Honorio in Codice Justiniano adscripserit; qui legem paternam super hujusmodi nuptiis severissime tuiti sint: mox Protei in modum mutatus, lib. II *Lect. c. 1.* legem illam revera auctores Arcadium & Honorium habere; sed tamen, vel non sic ab iis scriptam, vel eam rursus ab Honorio lege singulari *Si nupt. ex rescr.* abrogatam pronuntiat. Utrumque autem quam inane sit, textus verborum ejusdem coloris, & temporis ordo supra discretus, & Placentini atque Azonis summæ in Codicem satis ostendunt, ac pluribus argumentis docuit Jacobus Gothofredus ad *l. 3. C. Th. de incestis nuptiis*, ut minus ideo causæ fuerit, cur Brouerus lib. II. *cap. 12. n. 5.* Brissonii partes sequeretur.

§. IX.

Necdum tamen res nostræ securæ sunt. Vehementer enim de nuptiis consobrinarum suo tempore dubitatum fuisse, refert Franciscus Florens; ideoque utriusque partis momenta, in crudita de *nuptiis consobrinarum prohibitis aut permixtis* dissertatione, ad Henricum Memmum, Parisiensis Senatus Præsidem, A. 1636. scripta, recensuit, examinavit, & legem *Celebrandis* omnes peræque tenere, non vero specialem aliquam indulgentiam largiri, eamque germanam & veram, non supposititiam esse ostendit. Contra Jacobus Sirmondus, Societatis Jesu presbyter, eodem tempore clarus, & optima fide de litteris meritis, in libello, quem vocat *Quæstio triplex*, quique Operum ejus tom. IV. pag. m. 388. editionis Paris. novissimæ reperitur, famosam illam Arcadii l. 19. c. de *nuptiis*, qua Consobrinorum nuptiæ in totum legitimæ declarantur, plane novam, falsam, & a Triboniano, ex suo sensu & sæculi disciplina, in Codice repetitæ prælectionis suppositam esse contendebat: cujus argumenta strictim exponemus, quia in singulis hæcere longum esset. Primum, quod Virum hunc eruditissimum movit, præjudicium est; quod in antiquis nonnullis Justiniani Codicibus Constitutio illa, Cujacio teste, non reperitur. Dein titulum falsi accusat, quia nec in Codice Theodosiano extat, in quem relatæ sunt Arcadii & Honorii leges, atque ita relatæ, ut quæ in eo desunt, falsitatis nota dantur, ex Novella Theodosii I. Veritati porro minime consentaneum arbitratur, duos istos Principes, qui secundo Imperii anno, Theodosii patris exemplo, Consobrinorum nuptias veterant, suam ipsorum legem post novem annos rescidisse; atque iterum, quarto post anno, Honorium, mutato leviter consilio, legem paternam comprobasse. Et quis, fodes, quod quartum est, nobis persuadeat, inquit, abrogasse filios legem Theodosii, quam centum post annis in usu fuisse, formulæ Cassiodori testantur? Augustinus item lib. XV. de civitate Dei cap. 16.

tum

tum quoque, cum libros illos scribebat, hoc est annis amplius viginti, post alterum Stiliconis Consulatum, quo data Lex ista dicitur, prohibitionem Theodosii stetit affirmat: *Verum tamen quis dubitat, honestius hoc tempore etiam Consobrinarum prohibita esse conjugia?* Ipsa denique lex sibi repugnare adversarique videtur, inscriptioni subscriptio. Missa enim dicitur ad Eutychianum Præfectum Prætorio, & data Stilicone II. & Anthemio Consulibus. Atqui si Anthemio Consule data est, ad Eutychianum mitti non potuit, quia quo anno Consul Anthemius fuit, non Eutychianus, sed Anthemius ipse, illius successor, Præfecturam Prætorianam una cum Consulatu gessit, quem utrumque honorem ipsi gratulans Chrysostomus scribit epist. 147. *Alii quidem tibi & Consulatus & præfecturæ nomine gratulantur. Ego vero dignitatibus ipsis tua causa. Neque enim exornaverunt te ille, sed a te ipse ornata sunt.* Hæc sunt fundamenta, quibus eruditus ille Presbyter legem *Celebrandis* a Triboniano fabricatam existimavit, haud levis quidem ponderis, nec etiam tanti, ut vadimonium nobis deferendum videatur.

§. X.

Vix autem in dias luminis auras prodierat *Questio* illa *triplex*, & divino velut sidere afflatus, Jacobus Gothofredus, maximus Jurisprudentiæ vindex, tecto Sirmondi nomine, Dissertationem ad l. *Celebrandis* ei opposuit, A. 1642. quæ editioni ejus Philostorgianæ adjecta, ideoque Jurisconsultis, ut video, eruditissimis quibusdam fuit ignota, & nunc quoque non in omnium manibus versatur. Non equidem facile excusari posse Tribonianum, ibi largitur, quod legibus recisis, mutatis, additis quæ liberet, in suam sententiam plerasque effinxit; immo aliena nomina, seu titulos, signa, aliosve temporis characterismos adnotavit: quod vero novam prorsus finxerit legem, falsamque supposuerit, id neminem hæcenus, ait, demonstrasse. Et cui bono adscripsisset Justinianus hisce Imperatoribus falso hoc jus? qui gloriam
Q novi

novi juris condendi & innovandi nimis aucupabatur, cuique in promptu erat, nova constitutione facta, jus vetus revocare, abrogato Theodosii interdicto, quod a paucis Imperatoribus erat approbatum. Per singulas etiam verborum formulas ostendit, brevitatem & elegantiam sæculi Arcadiani ubivis hic pellucere, nihilque esse, quod auctorem & architectum sapiat Tribonianum. Dein singula argumenta accurate diluit, obscuriora in clarissimo lumine collocat, & difficillimas rerum ac temporum vices feliciter exponit. Primum enim nihil officere monstrat, quod in mēdosis quibusdam Justiniani codicibus lex illa non reperitur; cum abunde sit, meliores eam habere; & quamvis in his etiam deesset, inde non effici, ut Triboniano magis, quam Arcadio tribuenda, verum ut universa, tanquam rejicula, expungenda videatur. In Codice Theodosiano eodem fato lex ea intercidit, quo aliæ Constitutiones quamplurimæ, ex libris quinque prioribus, ubi & titulus de nuptiis occurrit, deficiunt: hi enim integri ad nos non pervenerunt, sed exiguum tantum eorum breviarium, a Gothorum manu confectum. Sic *legem 25. C. de Nupt. l. 4. & 5. C. de Incest. nupt.* aliasque Codex Theodosianus non habet, quas tamen inde spurias nemo appellavit. Non etiam ita absurdum videtur, Arcadium legem paternam, antea a se mitigatam, post novem annorum decursum prorsus sustulisse: quia ipse Theodosius, data venia, & supplicatione concessa, satis agnovit, nec jure naturali, nec divino, nec gentium moribus, severitatem illam defendi posse; multisque insuper exemplis confirmat, Arcadium leges fixisse & suas refixisse, prout Consiliarii novi hortabantur. Theodosianæ porro legis usus nullus fuit, tempore Augustini vel Cassiodori: in Oriente Arcadii, in Occidente Honorii constitutiones valere; ille suas Constantinopoli, hic Ravennæ dedit; ibi permissæ fuerunt Consobrinorum nuptiæ, hic vetitæ, ut tamen principali, rescripto eas impetrare liceret. Quod denique ad sub

scriptionem;

scriptionem attinet, scimus, eam in multis Codicibus vitio librariorum deesse; scimus Russardum eam male ex l. 3. C. Tb. de inc. nupt. supplevisse: habemus etiam gratias Cujacio & Contio, qui genuinam restituerunt. Gratis autem dicitur, inscriptionem subscriptioni repugnare: Anthemius enim hoc anno idem Consul & Præfectus Prætorio, a mense tantum Julio fuit, teste l. 1. C. Tb. Ne quis in palat. man. unde ad Eutychianum ex anno præcedente, ad hoc usque tempus, in Præfectura persistentem, Anthemio a Kal. Jan. Consule, legem hanc esse missam fidei historici non refragatur. Nec sera nimis gratulatio Chrysostomi sic videtur, qui in Armenia secunda, Cucusi, loco a via publica remotissimo, & continuis Isaurorum excursibus exposito, exul degebat; ut vel citius nuncium de Consulatu non acceperit, vel de accepto citius non potuerit gratulari. Addo & hoc, quod teste Procopio Histor. arcan. cap. XXVI. alter Consul hoc tempore Romæ, alter Byzantii creabatur, unde eveniebat, ut unus, vel uterque, pro situ regionum aliquandiu essent ignoti. Sic, anno, qui cum, de quo hic agimus, præcedit, 404. Synesius Epist. XXXII. scribit Nudius tertius, novis Consulibus, quorum alter est Aristænetus: Το γὰρ συναγὼντα ἄνθρωπον, collegam enim ignoro. Alemannus ad Procopium, si vacat, videatur.

CAPUT IV.

De Jure Græcorum, Gothorum, Francorum, Alamannorum, Canonico & Moribus.

§. I. Tempore Justiniani nuptiæ Consobrinorum permixtæ in Oriente. Lezio affirmativa §. 4. I. de Nupt. quatuor argumentis adstruitur, Marcilius notatus. II. Fabri, Hotmanni & Sirmondi rationes contraria refelluntur. III. Theophilus fidelissimus paraphrastes & Tribonianus socius; misori redditus, & a calumniis vindicatus. Variorum

viornum errores & fraudes castigantur. IV. *Sæculo nono & sequentibus Consobrinorum nuptias a Græcis Imperatoribus prohibitas, ex Basilicis, Harmenopulo, Cedreno, Anna & aliis demonstratur.* V. *Per Occidentem Honorii constitutio viguit. Apud Gothos sæculo sexto nuptia hæ ex Rescripto impetratæ; una formula ex Casiodoro prolata. Cajus ab Aniani manu interpolatus, Augustinus & Hotmannus notati.* VI. *Sæculo octavo & deinceps Conciliis Ecclesiasticis & legibus Francorum, Alamannorum, Bajuvariorum, Langobardorum rursus vetita.* VII. *Maximum Juris Canonici studium coercendarum nuptiarum non impedivit, quominus Pontifex in consobrinorum conjugiiis dispensavit.* VIII. *Gentium hodiernarum fluctuatio.*

§. I.

CEntum viginti & novem annos jam condita & usu recepta fuerat Arcadii Constitutio posterior, quum Justinianus eam integram, suisque numeris absolutam, in Codicem repetitæ prælectionis referret. Hoc ipso autem indicare voluit Imperator, quam nihili faceret rationes hominum substitutorum, qui Theodosianæ legis fuerant suasores, quique eam nunc, tanquam religiosam & piam, commendabant. Quam parum quoque moratus sit Honorii decretum Occidentale, ex eo desumpta *lex 1. C. Si nupt. ex rescr.* satis ostendit; cui integra, quæ de Consobrinis agebat, clausula abest: non alia ratione, quam quia eorum matrimonia, sine ulla rescripti impetrandi necessitate, prorsus legitima esse volebat. Nec sane incestas ipsi fuisse hujusmodi nuptias, in Institutionibus testatus est, in quas jus certum, & quod in rerum tum obtinebat argumentis coniecit: *Duorum autem fratrum, inquit, vel sororum liberi, vel fratris & sororis jungi possunt. §. 4. Inst. de Nuptiis.* Affirmativam hanc lectionem probant editiones Vulgata, Haloandri, Russardi, Charondæ, Cujacii. Probant tot Responsa Prudentum & Principum rescripta §. *V. cap. præced.* a nobis allata, quæ cum omnia Consobrinorum nuptias admittant, contrarius sibi fuisset Justinianus, si eas
in

in Institutionibus, seu medio tempore inter Pandectas & Codicem compositis, improbasset. Probat eandem ratio, quia quarto gradu sunt, inquit Cujacius, notatus eo nomine a Theodoro Marcilio ad h. §. his verbis: *Hoc quemadmodum dicat, ipse viderit. Nam fratrum & sororum liberi jure civili non quarto, sed tertio sunt. Gerræ Siculis vaniores! Vide §. 4. I. & l. 1. §. 6. D. de Grad. cognat.* Probat denique idipsum Gregorius in responsionibus, ad consultationem Augustini Angliæ Episcopi, tam aperte, ut nullo juris loco permissio clarius exprimatur: *Quædam lex terrena in Romana rep. permittit, ut sive fratris & sororis, sive duorum fratrum germanorum, sive duarum sororum filius & filia miscantur. C. 2. caus. 35. quest. 5.*

§. II.

Attamen non desunt, quibus hanc lectionem infirmatum iverint Viri eruditi, quos inter & acutissimus est Antonius Faber *Jurisp. Papin. tit. IX. pr. 6. illat. 6.* Titus enim Cajus, ex cujus præcipue Commentariis Institutiones suas Justinianus compositas proficitur, *lib. I. tit. 4. §. 6.* scribit: *Consobrinos in matrimonium jungi, nulla ratione permittitur.* Theophilus item, doctus earundem paraphrastes, hunc locum negative transtulit: *ἐναντιόφροι & ἀδελφαί.* Concius præterea in duobus exemplaribus manuscriptis Latinis, & Hotmanus in libro Tigurino negativam lectionem se deprehendisse fatentur: nec aliter legit Ivo Carnotensis *Pannomias part. 9. c. 1.* ubi Molinæus notavit: *Ex hoc loco restitui potest. §. Duorum autem fratrum Inst. de nuptiis, qui passim corruptus legitur.* Denique Damianus in epistola ad Rusticum suo tempore, id est ante sexcentos annos, particulam non in omnibus exemplaribus fuisse testatur. De Cajo & Theophilo videbimus postea. Manuscriptos autem Codices ad sæculi sui morem accommodatos & interpolatos putamus. Verum gravissima, ad lectionem negativam defendendam, conjectura videtur Hotmani, ex serie & ductu verborum desumpta. Sic enim Justinianus totam

illam de permissis prohibitisque nuptiis hoc titulo orationem contexit & distinxit, ut siue generis ejusdem aliæ alias subsequantur, siue diversi, notas ubique interponat, *Sed* & *Item*, vel *Sed*, *Vero*, *autem*, quæ singularum inter se vel cognationem denotant vel discrimen. In fine autem §. præcedentis cum dixerat, filium non impediri ejus mulieris, quam pater adoptaverat, filiam ducere uxorem, statim subjungit: *Duorum autem fratrum*, quod sententiam negativam necessario inferre videtur. Sed hæc sunt argutæ nimis argutæ, quæ nobis minime probantur. Vocula adversativa *autem* non respicit ad finem, sed initium prioris §. quod negativum est, fratrisque filie matrimonium prohibet: mox incidenter conceditur cum adoptivæ sororis filia, cui ut accessorio non respondet sequens oratio, sed priori, ut principali. Recte insuper reponit Huberus, non semper particulas relativas referendas ad periculum proximam, sed aliquando ad remotiorem, quæ præcipua est: nec distinctionem textus in versiculos, quam habemus, antiquam esse, ut nihil adeo discrimen initii & finis paragraphorum juvare possit. Concidit sic etiam divinatio Sirmondi, ipsum Tribonianum negationem sustulisse, ut ne Institutiones a posteriore Codice, & lege *Celebrandis* in eum relata discreparent; eum antea, secundum Theodosii legem, in Codice priore approbatam, *jungi non possunt* scripsisset.

§. III.

Nunc ad Theophilum veniamus, quia de Cajo infra, ubi de Gothis, commodius agetur. Convertit ille dictum §. 4. in linguam Græcam, sed simul unica particula adjecta, in contrarium sensum: *Δυσ ἀδελφῶν ἀρσένων, ἢ θήλων παίδες, ἢ ἀδελφῶν, καὶ ἀδελφῆς, ἀλλήλων ἢ θυγατρὶς πρὸς γαμῶν συνάπτεσθαι. Duorum fratrum vel sororum, aut fratris & sororis liberi non re. Ete inter se nuptias contrahunt.* Varii varias ingressi sunt conciliandi vias. In editione Lovanicensi ex officina Rutgeri Rescii, anno 1536. particula *non* expressa est, sed ab ipso

ipso Rescio ablata, ut Petrus Nannius annotavit. Non majore fide Jacobus Curtius, interpres Latinus, contra scripturam Græcorum exemplarium, in editione Pictaviensi, quæ prodiit anno 1639. & sequentibus aliis, vertit, *re-
ste inter se nuptias contrahunt*: eodem rursus colore, quod minime par sit a Justiniano dissentire paraphrasten. Albericus Gentilis lib. V. de Nuptiis cap. 11. quem Marcilius, Vinnius & plerique alii sequuntur, non ait istum Theophilum socium fuisse Triboniani, sed alium quendam recentiorem, qui de peculio suo negationem adjunxerit, ex jure, quo post tempora Justiniani nuptiæ inter Consobrinos incestæ haberi cœperunt. Alii rursus in Theophilum inveniuntur, ut privatum & imperitum Jurisconsultum, qui pariter ac Tribonianus, jus in quo versabatur sæpe ignorarit. Et sane ejus solœcismos atque errata quædam, vanus sim, si tegere coner; quæ Viglius in præfatione, Fabrotus in notis, & passim Merillius, juratus quasi Theophili censor notavit, cujus verba ex l. 2. Obs. cap. 27. in gratiam eorum, qui sic sentiunt, proferre lubet. *Scetet*, inquit, *Theophilus plerisque aliis erroribus, & ineptis interpretationibus, quas præter verba Justiniani de suo interjicit, quasque, si Deus faciat, suis quibusque locis indicaturi sumus.* Hoc amplius negari non potest, familiare ipsi fuisse, omittere particulas & voces maxime necessarias; ut fere in §. 36. d. Rer. div. articulum quasi in §. 3. de Susp. tut. & vocem *ta-*
citam in §. 23. de legat. Quid igitur vetat; quominus contraria negligentia hic particulam non addidisse videatur? Verum enim vero de his, & aliis ejus farinæ conciliationibus, judicare licet, quod Eunomia Plautina, de feminis in Aulularia: *Optima nulla potest eligi, alia alia pejor est.* Fuit Theophilus fidelissimus & Juris peritissimus Institutionum interpres, idem cujus opera Justinianus in componendis Institutionibus usus est: citatur enim a Thalelæo, quem unum ex Pandectarum architectis fuisse constat. Nævus habet, sed ut pulcherrimæ facies: & optima vina facces
suas

suas habere solent. Graviora autem, cum Fabroto, non ejus, sed studiosi alicujus esse putem, qui hæc in ora libri sui primum scripsit, unde in ipsum dein contextum irrepserunt. Atque Theophilum ideo hunc §. affirmative legisse & transulisse, verissimum & persuasissimum habeo; sed qui posteriori ævo, mutatis moribus, in libello hoc quotidiano, & in usum scholarum Græcarum, ut videtur, adhibito, transfiguratus est. In duobus Theophili Codicibus regis negationem reperiri, in tertio deesse Fabrotus testatur. Manifestum quoque hujus manganii indicium præbet §. præcedens, cui extra oleas idem ineptus glossator hanc sententiam Theophilo affinxit, ne quid in sequenti §. depravasse videretur: *ἐξ ἡ βωθρῶν ἡ δύναμις λαμβάνει πρὸς γάμον οἷον τῇ θύτῃ θυγατέρα τῆς θύης ἢ τῆς θύιας.* Nec minus inepti sunt hic interpretes Latini, Curtius & Gothofredus, quos Bachovius ad §. 4. *de Nupt.* reprehendit.

§. IV.

Non multis post Justinianum annis, Gregorius Magnus Arcadii constitutionem rejecit; sensum quoque, recedente linguæ Latinæ usu, libri Justiniani obsolescere cœperunt, donec tandem recentiorum Imperatorum Constitutiones, conspirantibus Conciliorum Ecclesiasticorum canonibus, pristinam harum nuptiarum prohibitionem in usum revocarunt. In præstantissimo enim Basilicorum corpore, quod Basilus Magnus circa A. D. 870 inchoavit, ejusque filius Leo Philosophus a. 880. perfecit, quodque repurgatum Constantinus Porphyrogenneta, Basilii nepos, circa A. D. 910. edidit, Confobrini inter se jungi vetantur. Ipsa adscribam verba ex lib. XXVIII. tit. 5. qui est de prohibitis nuptiis. *Καὶ μεταξὺ δὲ τῶν ἐκ πλαγίου προσώπων εἰς τὴν κολυτίαν. Τῶν γὰρ τῆς ἀδελφῆς μου ἢ τῆς τῆς ἀδελφῆς μου θυγατρὸς λαμβάνειν πρὸς γάμον οὐ θέμις, ἀλλ' οὐδὲ τῆς θύττης ἐγγύτης. Ομοίως καὶ τῇ θυγατρὶ τῆς θύιας ἢ τῆς θύιας, τῆς ἐκ τῆς ἀδελφῆς μου. Vertit Fabrotus: *Quin & inter eas personas, quæ ex transverso sunt, est quedam prohibitio. Fratris enim mei, aut sororis meæ filiam ducere fas non est,**

est, sed nec horum neptem. Similiter nec patruī aut amitæ filiam, hoc est consobrinam meam. Eadem fere exhibet Constantinus Harmenopulus, Nomophylax & Judex Thessalonicensis, Promptuarii lib. IV. tit. 6. qui non sæculo duodecimo, quod Freherus, Suarefius, Brocus & Gothofredus censuere, sed sub imperio Annæ Palæologinæ filiique ejus Joannis Palæologi, circa A. C. 1345. vixit, ut præclare observat Lambecius in comment. Biblioth. Vindobon. lib. VI p. 1. p. 39. Sæculo autem undecimo, Georgius Cedrenus, Consobrinorum nuptias *incestissimas* habitas, in Heraclio prodit. Sæculo sequenti Nicetas Choniates in vita Manuelis, conjunctionem Andronici cum Eudocia, ~~conjugii abipso~~, *nefariam conjunctionem* vocat, cum tamen hæc patruelis filia esset, in quinto gradu. Latius namque tunc serpebat interdictum, ut semper Græca natio superstitionior fuit, ipsique Imperatores inani timore capti, plus vatibus & Patriarchis, quam rationi obtemperabant. Refert Anna Comnena, sub finem Alexiados lib. 8. Comnenum Isaacium Sebastocratorem filiam suam Theodori Gauræ filio despondisse: cum autem Gaura non multo post, defuncta uxore, Sebastocratoris conjugis sororem patruelem duxerat, irrita facta sponsalia; quod & *legibus & canonibus copulatio ista prohibita videbatur*. Quin etiam Demetrius Chomatenus, Alexius Patriarcha & Matthæus Monachus Quæst. matr. tit. de grad. sept. consang. lib. 8. Juris Græco Romani pag. 482. magno consensu tradunt, jure Orientali, in Synodo sub Patriarcha Cæsare Luca habita, atque mandato Principis Manuelis Comneni confirmata, a quinto gradu hæctenus vetito, ad septimum usque gradum nuptias interdictas fuisse. Immo Pachymeres lib. vi. c. 6. scribit, Synodum in gratiam Michaelis convocandam fuisse, ut ducere posset Annam, filiam Imp. Michaelis Palæologi, cujus consobrinam, natam ex sorore ejusdem Imperatoris, frater ejus Nicephorus in matrimonio habebat. De poena Consobrinis imposita, Harmenopulus lib. VI. tit 4. vertente

Mercero : Qui matrimonio copulantur, inquit, aut alioqui mutuo complexu junguntur, fratrum sororumve filii, & ex his pro-
geniti liberi, iique vel soli, vel pater & filius cum filia &
matre, non dirimantur tantum, sed & fustibus cadantur. Adde
Leonem & Constantinum in εκλογη των νομων tit. XII. Mi-
chaelem Attaliatem *Synopsi jur. tit. 26.* & Jus Græco
Romanum, quod Bonifidius & Freherus edidere, lib. III. pag.
204.

s. V.

Ex Oriente nunc pergamus in Occidentem, ubi Honorii
constitutio : post annos centum, & quod excurrit, sexto
a nato generis humani Servatore sæculo, intemerata, me-
dios inter barbarorum furores, stetit. Cum enim Ostro-
Gothi finibus suis egressi, Italiam a Zenone sibi concessam,
Romanasque provincias armis occupassent, hanc erga
victos Romanos humanitatem exercuerunt, ut cuique li-
berum permitterent, sua lege vivere, ipseque Theuderichus
Rex in Edicto, quod Petrus Pithæus publicavit, diserte
caveret : *Edictum illud promulgari, salva juris publici reveren-*
tia, & legibus omnibus cunctorum reverentia servandis : qui-
bus verbis haud dubie Romanas leges indicari, recte ob-
servavit H. Conringius de orig. Jur. Germ. cap. 4. Sæpius inde
eveniebat, ut nuptiæ a Consobrinis ex Rescripto peteren-
tur, cujus formulam, velut quotidianam & frequentem,
nobis conservavit Cassiodorus, Theoderici Gothorum Re-
gis Cancellarius, lib. VII. Variarum 46. quam integram
referre non pigebit. Verba formulæ : *Institutio divinarum*
legum humano juri ministrat exordium, quando in illis capitibus
legitur præceptum, quæ duabus tabulis probantur adscripta.
Sacer enim Moses, divina institutione formatus, Israelitico po-
pulo inter alia definivit, ut concubitus suos a vicinitate pii
sanguinis abstinere : ne & se, in proximitatem redeundo,
polluerent, & dilationem providam in genus extraneum non
haberent. Hoc prudentes viri sequentes exemplum, longius pu-
blicam observantiam posteris transmiserunt : reservantes Prin-
cipi

cipi tantum beneficium, Consobrinis nuptiali copulatione jun-
 gendis. Intelligentes rarius posse præsumi, quod a Principe
 jusserant postulari. Admiramur inventum, & temperiens
 rerum stupenda consideratione laudamus, hoc ad Principis fu-
 isse remissum judicium. Ut qui populorum mores regebat, ipse
 & moderata concupiscentia fræna laxaret. Et ideo supplica-
 tionum tuarum tenore permoti, si tibi illa tantum consobri-
 nis sanguinis vicinitate conjungitur, nec alio gradu proximior ap-
 probaris, matrimonio tuo decernimus esse sociandam, nullam-
 que vobis exinde jubemus fieri quæstionem, quando & leges
 nostra permitti voluntate consentiunt, & vota vestra præsen-
 tis auctoritatis beneficio firmaverunt. Erunt vobis itaque;
 Deo favente, posteri solenniter heredes, castum matrimonium,
 gloriosa permixtio, quando quicquid a nobis fieri præcipitur,
 necesse est, ut non culpis, sed laudibus applicetur. Alia We-
 stro Gothorum sive Wisigothorum fuit ratio: hi enim cum
 sequente, vel, si Pagium sequimur, eodem, quo Hono-
 rius Ravennæ legem tulerat, anno Romam ceperant, ac
 directis Italiæ spoliis, mox onusti in Galliam concesser-
 ant, sua lege vel more usi videntur. Sub initium sæcu-
 li sexti, deinde Anianus, Alarici Regis Referendarius,
 ex Codice Theodosiano, Gregoriano, Hermogeniano,
 Pauli sententiis & Caji Institutionibus Corpus aliquod
 Romanum composuit, sui que ævi jus & barbariem orbi
 trusit. At breviarium ejus *l. un. C. Th. Si nupt. ex rescr.*
pet. satis docet, Theodosii magis, quam Honorii legem
 Gothis placuisse; unde & in ipsis eorum legibus, ab Eu-
 rico compositis, usque ad sextum cognationis gradum nup-
 tiæ prohibentur. Nec alia ratione interpolatus Caji lib.
 I. Instit. tit. 4. §. 6. *Fratres enim amitinos & consobrinos in*
matrimonium jungi nulla ratione permittitur. Ubi Anianus
 non Caji, sed temporis sui doctrinam tradidit; quod post
 Cujacium, Brissonium, Fabrotum, Aleander, Oisellius &
 novissime Clarissimus Schultingius in notis observant.

Floruit Cajus sub Marco Antonino, quem ipsum Faustinae consobrinam duxisse notavimus supra: & fallitur omnino Augustinus, quum in libro de propriis Nomin. Pand. Cajum Justiniani æqualem facit, nec melius Hotmanus eum Theodosii ætate vixisse & Græce Institutiones composuisse putavit ad §. 4. *I. de Nupt.* & l. 8. *Obs. cap. 4.*

§. VI.

Legum Wisigothicarum usus in Hispania & Gothia, id est Narbonensi Gallia, sæculo sexto & deinceps fuit maximus, ut fortassis non errarit, qui prohibitionem conjugii Consobrinorum ab his ad Francos, inde ad alios Germaniæ populos dimanasse putet. Quamvis enim in Lege Salica tit. XIV. §. 16. Consobrinorum nuptiæ disertis verbis prohiberi videantur; Hieronymus tamen Bignonius in notis observavit, non modo illud caput a regiis manuscriptis codicibus abesse, sed idem, ex Synodo Turonica II. sub Chariberto Rege habita, in ceteros codices irreplisse. Eadem certe Synodi, quæ vulgo legis Salicæ, sunt verba: *Si quis sororis aut fratris filiam, aut certe alterius gradus consobrinam, aut fratris uxorem, aut avunculi sceleratis nuptiis sibi junxerit, huic pœnæ subjaceat, ut a tali consortio separetur. Atque si filios habuerint non habeantur legitimi heredes, sed infamia sint notati.* Sub Gothorum autem imperio Legum Romanarum, & maxime quidem Codicis Theodosiani, in Gallia usus esse cœpit; unde Agathias lib. 1. de rebus Justin. Francos, in contractibus & matrimoniis, leges Romanas servasse testatur, & Corporis Theodosiani, Marculphus meminit, form. 138. Ex hoc etiam, vel si mavis, ex interpretatione Aniani legis 3. C. *Tb. de inest. nuptiis*, prima sunt vetita consobrinorum conjugia Narbonensibus, & deinceps per Galliam universam. Eodem quippe anno 502. quo Codex Theodosianus promulgatus est, in concilio Agathensi c. 61. mox Epaunensi c. 30. Aurelianensi 111. c. 10. Arvernensi c. 11. Aurelianensi 14. c. 27. & tandem in di-

dicto Turonensi can. 21. ea matrimonia vetita fuere. Vid. Innocentius Cironius lib. v. Obs. c. 6. Deinde Concilium Maguntiacum anno salutis 813. jussu Caroli M. celebratum canone 54. vetuit: *ne quis in quarta generatione amplius conjugio copuletur, & si post interdictum inventum fuerit, separetur.* Idem in Additione Capitul. Ludovici 32: *Si quis consobrinam duxerit, anathema sit.* Pœnitentia publica imponebatur illis, qui in quarto gradu nuptias contraxerant, qui in tertio separabantur, ex Capitul. Synodal. Pipini Regis c. 1. Eisdem quoque leges jam Clotharii tempore, Alamanni & Bajovarii, Francorum Austrasiorum Regibus subiecti, acceperunt. Apparet id ex cap. XXXIX. Legum Alamannicarum, ubi hæc leguntur: *Nuptias prohibemus incestas. Itaque uxorem habere non liceat socrum, nurum, privignam, novercam, filiam fratris, filiam sororis, fratris uxorem, uxoris sororem. Filii fratrum, filii sororum, inter se nulla præsumptione jungantur. Si quis contra hæc fecerit, a loci iudicibus separetur, & omnes facultates amittat, quas fiscus acquirat. Si minores persone sunt, quæ se illicita conjunctione polluerunt, careant libertate, & servis fiscalibus aggregandæ sunt.* Idem continetur LL. Baiwar. tit. VI. cap. 1. & Langobardi ex Papæ, ut dicitur, literis ordinariam incestus pœnam habuerunt l. 2. tit. 8. l. 4. & 11. *Consobrinam, neptem, novercam, fratris uxorem, vel etiam de propria cognatione, aut quam cognatus habuerit, nullus audeat in conjugio copulare. Si quis huic tali nefario conjugio se junxerit, & in eo permanserit, sciat se Episcopali auctoritate anathematis vinculo esse innodatum; ut nullus sacerdos ei tribuat communionem. Si vero conversus divisusque fuerit ab illicita copulatione, dignæ pœnitentiæ submittat, ut sacerdos loci consideraverit.*

§. VII.

Jure Canonico nihil certius, quam Consobrinorum conjugia multis Constitutionibus Ecclesiasticis prohibita esse & damnata. Pontifices namque, pariter ac olim Judæi, *sepimentum* legi divinæ expressæ ponendum rati, quod ge-

nerali illo Dei praecepto Levit. XVIII. omnigenos consanguineos inter se nuptiis arceri credebant. Juris quoque civilis licentia immoderata (ut quidem erat eorum opinio) temperanda & cohibenda videbatur, quo latius cognationum necessitudines protenderentur. Initium variat. Constantinum laudat Eusebius, quod Licinii audaciam represserit, qui jus civile de nuptiis abolere voluit. Vix certe ante Synodum sextam, illud abrogatum esse, ex ejus can. 54. colligi potest. Alii Fabianum jam saeculo tertio duos gradus addidisse ferunt: alii ipsorum Apostolorum Canonem 18. crepant, ubi: *Qui duas sorores duxit, aut consobrinam clericus esse non potest*: Verum, ut de horum fide nihil dicam, Contius recte observavit, Haloandrum *αδελφίδης* male hic *consobrinam* transulisse. Gregorius Magnus, sub Mauricio Imp. incunte saeculo septimo, primus ad septimam usque generationem, gradus cognationis observari voluit, c. 1. *caus. 35. q. 2. 3.* cujus & bellam rationem supra examinavimus pag. 19. Eum deinde Alexander II. Callixtus, Nicolaus, Julius, Innocentius III. aliis quidem atque aliis rationibus, haec tamen omnes secuti; quod ad nimiam in nuptiis coarctandis severitatem inclinarunt. Sed ipse Gregorius I. qui muros posuit, ipse sustulit: nam dispensationem in Consobrinorum nuptiis fecit Anglorum genti, cum adhuc essent neophyti, id est recens ad fidem Christi venissent. Eadem ratione Norwegis, novellis Christianis se accommodavit Papa, eorumque infirmitati veniam dedit, ut docet Cujac. *ad c. 3. d. cons. & affin.* Immo illustribus & maximi nominis viris Pontificem nuptias has permittere solere, ait Mornac ad l. 14. & 42. *D. de Rit. nupt.* Sic olim Maximiliano, ejusque filio Alberto, dispensatione sua indulxit Pontifex: quod habet rationem. Ludovico autem VII. Francorum Regi aqua & igni omnibusque sacris Innocentius interdixit, quod consobrinam sibi sociarat. Mirum! si Angelus ad l. 78. §. 8. *ad Scit. Treb.* de hoc matrimonio vere scribit: *Licitum olim de jure civili. Sed hodie est*

est ab Ecclesia interdictum. Et ideo, quia solum Ecclesia interdicit, eadem in talibus merito dispensat, & potissimum inter regales. Sed hodie Ecclesia est ita vexata, quod usque ad farnarias Papa permittit.

§. VIII.

Atque ita tandem emensi sumus varium & difficile tractationis iter. Multa de moribus addi possent, nisi modum dissertationis jam migrassemus. Sunt, qui legis divinæ & naturalis simplicitati inhærent, nec ut foedas damnant nuptias, quas Auctor Naturæ & omnium perfectissimus Legislator foeditatis non accusavit. Ita apud Belgas & Zelandos testatur Brouerus de Jure connub. lib. II. cap. 12. n. 8. nihil obesse, quin cognatio longe distita & propemodum sublata, nova conjunctione colligatur. Plerique autem Europæ populi jus Pontificium sequuntur; alii simpliciter, alii ita, ut accedente Principis Rescripto legitimæ fiant. De Anglis & Helvetiis vide P. Martyrem 2. loc. comm. 10. De Brandenburgo-Marchicis Brunnemann. ad l. 19. C. de Nupt. De Saxonibus Carpz. Jurispr. consist. lib. II. tit. 5. def. 78. n. 8. De Hassis Kitzelium in Synopsi matrim. cap. 3. theor. 8. lit. d. De Gelris Goris tract. 4. Advers. §. 6. De Transilvanis Landrecht van Overysseel part. 2. c. 1. art. 14. De Danis, Palatinis, Wurtenbergis, Meclenburgis, Prussis & Pomeranis Gisebertum Justin Harmon. lib. I. tit. 10. §. 4. qui & varia poenarum genera recenset. Relegationem dictarunt Jenenses apud Lynckerum dec. 995. Si quis heres institutus fuerit, sub conditione, si consobrinam duxerit, iis in locis, ubi prohibitionis relaxatio ære vel precibus obtineri nequit, conditio pro non adjecta habetur. Vide Schilter. Exerc. ad Pand. 38. §. 101. Ceterum si quæritis, Consobrini, quid in hac jurium fluctuatione consilii sit? Alii vos ad Paulum in l. 14 §. 3. in f. de Ritu nupt. alii ad Paulum majorem 1. ad Corinth. XI. v. 13. alii ad Calvini epist. 386. ablegabunt. Id autem

tem vobis in aurem , Augustinum patres , ut religiosos, laudasse , quibus curæ fuerat , propinquitatem fugientem conjugio liberorum revocasse. Ex hujus itaque sententia

*Felices, quibus ista licent! humana malignas
Cura dedit leges: & quod Natura remittit
Invida jura negant.*

F I N I S.



DIS-



DISSERTATIO TERTIA,

DE

TITULO IMPERATORIS
RUSSORUM.

Uæ hominum, eæ Imperiorum sunt vi-
ces ; nascuntur , crescunt , senescunt,
moriuntur : omniũ lex est , non du-
rare semper , nec manere vestigio co-
dem. Quo plurium vero salus , aut
infelicitas , a conversionibus civitatum
suspenditur , eo magis sunt conspicuæ,
& vincunt plerumque sapientiam hu-
manam. Nihil hic numeris Platonicis tribuimus. Fatuum
est Stoicorum fatum ; nec Geniis regnorum tanta apud nos vis
est atque potestas. Unum cognovimus Deum , qui ex Oriente
volucrem , e terra longinqua effectorem consilii sui vocat.
Is omni ævo excitavit viros Hercule valentiores , qui do-
mitis barbariei monstris , cultum sacrorum , litteras , mores,
& urbanitatis lumen , ad rudes subjectos suos transtulerunt.
Hoc in Historia prisca qui non miratur , præcipuum ejus
haud percipit fructum : id qui hodie in Moschorum impe-
rio

S

rio non videt, rerum omnium est ignarus. Non obscurum modo sæculis recentioribus fuerat Russiæ nomen, sed fame, peste, seditione aulica, & Tatarorum iugo turbatum: immo gentes Europæ cultiores, ipsam immanitatem ab ea formidabant, & ignorantiam; quæ ibi pro instrumento fovebatur extinguendi sensum impositæ servitutis. At Petrus Alexius, Russiæ Principum, quotquot fuerunt, sapientissimus, postquam multorum urbes & mores, velut alter Ulysses, providus inspexit, quicquid ubivis egregium est, litterarum, siderum, ventorum doctrinam, peritiam rei navalis, morum elegantiam, paucis, belli & pacis artes, in usum gentis suæ, satis cautæ naturæ, convertit, eique stupenda celeritate nominis claritudinem conciliavit. Non repetam victorias a natione fortissima partas, erecta terra marique trophæa, fines propagatos, provincias commercio ditatas, & munimentis firmatas. Vel unicum modo apparatus navalem & militem numerosissimum intueamur, quocum Heros ille novæ militiæ tirocinia exhibuit Europæ, tantique esse exercitum, quanti Imperator est, ostendit. Sic factum, quod Livonorum animus, ante hos annos ferme ducentos, præfagebat, apud Thuanum lib. xxxiv. *Moschos, qui maximam Septentrionis partem tenerent, ubi classis potestas fieret, Narvæ condito emporio, & extructo armamentario, non solum in Livoniam, sed etiam in Germaniam, effuso exercitu penetraturos.* Post bellicos itaque sudores, & invidiam rerum gestarum magnitudine superatam, is Victor & Triumphator a populo suo assentante, & Regni proceribus, Cæsar, Imperator, Augustus salutatus est; ipseque professus inanum osor, summa illa principatus nomina haud invitus adoptavit. De his qualicunque exercitio Academico, sine ira, studio, aut adulatione, quorum causas procul habeo, commemorare consilium est. Non alius enim nobis propositus est finis, quam ut Juvenes, ad egregium publicum nati, & in Academiis formandi, specimen habeant Notitiæ Regnorum & Rerumpublicarum Europæ, quam anno proximo,

ad

ad succinctas positiones, quoad ejus a nobis fieri potest, trademus. Omnia, quæ de pulcherrimo hoc argumento dici possunt, nemo hic expectet. Satis enim didici, in causa invidiæ plena, privatum non decere judicis aut advocati personam induere, sine jussu Superiorum. Scio etiam Principes gladio potentes, non magis metuere calamos privatorum, quam aquilæ in proverbio muscas haud captare, dicuntur. Alia igitur servabimus domi: alia relinquemus: his, qui in ipso rerum exercitio, talia perspiciunt felicius.

CAPUT PRIMUM.

Titulorum, quibus Russiæ Principes usi,
rationem & fata exponit.

§. I. *Russorum antiquitas, sedes & nomen. Cur Dromitæ, Moschi, Scythæ, Tauro Scythæ, Ruzi, Normanni, Rugi dicantur. Ezech. c. 38. illustratur. II. Roxalani, eorum propago, commercia cum zibellinis exercuerunt. Pelles Babylonica & Parthica in l. 16. §. 7. de Publican. unde petita. Tabula de Vellere aureo origo. Regibus Roxolanorum stipendia solverunt Romani. III. An Constantinus M. Russorum Principem Dapiferum Imperii creavit? An is auctor tituli Magni Ducis, disquiritur. Nicephorus Gregoras & Freherus notantur. IV. Russorum bella, commercia, & sacra communia cum Byzantinis, a quibus Græci dicti. Kiowia olim metropolis sacra & profana. V. Russiæ quondam divise Principes foris Reges, domi Duces magni dicti. Totus titulus enarratur. VI. Regium diadema propria, non Papali auctoritate a Basilio susceptum: contra Jovium, Piafeciū, Raynaldum, aliosque. VII. Czar Ruthenica lingua Regem notat; sed Russis, vicinis & remotis Casarem significare visa est. VIII. Basilius & Joannes Basilius ab Anglis, Gallis, Germanis, Belgis Fœderatis & Persis publice privatimque Imperatores dicti. IX. Litteræ Maximiliani I. ad Basilium, contra Herbersteinium vindicantur. X. Quibus rationibus Petrus Alexius titulum Imperatoris sibi nunc arrogavit, conjicitur.*

§. I.

Russorum appellatione populum ad Septentrionem amplissimum intelligimus, qui eas Sarmatiæ vel Scythiæ Europæ regiones tenet, quas olim Roxolani, Bastarnæ & Borysthenidæ inhabitasse videntur. Nomen gentis a *Rossicum*, dispergere derivant, linguæ Slavonicæ periti; majore veritatis colore, quam qui a commentitio ducere Russo, cos nomen tulisse putant. Simcon enim Magister Logotheta in Annal. n. 46. a studio migrationum, ipsis *Dromitarum*, quasi palantium, & cursu velocium cognomen tributum esse, testatur. Hodie vulgo Moschos vel Moscovitas appellamus, a metropoli regni Moscua, quæ a fluvio id nominis dicitur. Qui a Moscho Sidonio Philosopho; vel a Mosynæcis Apollonio memoratis; vel a Moloch denique, sive Meschech sexto Japheti filio, ex Genes. cap. 10, natales repetunt, nimis antiqua amant; licet magno consensu in posteriorem sententiam itum fuerit. Parum equidem laudis habet, gentium laudēs fabulosis originibus commendare: attamen quia hæc venia dari solet antiquitati, ut miscendo humana divinis, primordia civitatum augustiora reddantur: age, videamus, annon a terris *Rhos* & *Mosoch*, apud Ezechielem cap. 38. v. 2. ultima Russorum & Moschorum memoria repetenda sit? Huc sane Græcorum posteriorum tendit sententia, & Socratis, pariter ac Nicephori, locus notatu dignus est, lib. vii. Hist. Eccl. cap. 42. Non vacat repetere, quæ Vir elari nominis, Bochartus, huic sententiæ firmandæ, attulit argumenta, lib. iii. Geograph. sacræ c. 13. Juvabit eandem autem, nisi fallor, antiqua *Moschorum* memoria apud Herodotum, Strabonem & Plutarchum, & iis quidem in sedibus Iberiæ Asiaticæ, & Albanæ, quas Propheta, optimus sui interpres, cap. 27. v. 13. in vocibus *Thubal* & *Mesches* conjunxit. Diserte Plinius lib. vi. Hist. Nat. c.

10. *Habitant & Moschorum tractus, ad Iberum amnem, in Cyrum defluentem.* Ad sinum Hircanum Moschicos montes Mela locavit lib. 111. c. 5. Sarmatarum vicinos fecit Lucanus lib. 111. Pharf. v. 270. *sevisque affinis Sarmata Moschis.* Sic ergo cenfeo, Moschos Scythici juris fuisse, aut a Scythiis Asiaticis, populo antiquissimis post diluvium proximo, oriundos. Asia enim prima hominum, statim a Noacho, sedes ac tot gentium proma conda fuit. Sed exire domo, alienasque occupare regiones summa Scythiis voluptas; qui diversis nominibus adscitis, in Europam late se transfuderunt. Plinius lares eorum instabiles fuisse, vidit & monuit lib. vi. c. 17. *Nec in alia parte major auctorum inconstantia: credo propter innumeras vagasque gentes.* Rhossios utique ad Cyrum fluvium, vel Araxem, olim habitasse, eoque transmissio Tauricam Chersonesum occupasse, & de suo nomine dixisse, ex Josepho, Ben-Jorion & Tzetze Bochartus docuit. Sed addamus, quod Cinnamus lib. v. Hist. c. 16. & Zonaras lib. xvii. Rhossios diserte *Tauro-Scythas* vocant; quodque Leo Diaconus, in vita Joannis Tzimiscis, circa A. 970. Graece scripta, Rossiorum patriam tunc temporis Cimmerium Bosphorum facit. En tibi Leonis verba: *Cum Splendostlabo, Rossici exercitus duce, gentisque Principe, ineunda pacis foedera, missis ad eum fecialibus putavit. Missis itaque ad eum Legatis denunciat, ut pacta cum Nicephoro Imp. mercede recepta, ad suas sedes ac Cimmerium Bosphorum se recipiant.* Graecis scriptoribus voce indeclinabili *oi Ρως*, ut hodie Slavis *Rus*, interdum *Ρωροι*, dicti: *oi Σκυθαι ται' ειπ' οι Ρωροι*, scribit Michael Glycas p. 1v. Annal. Terra eorum *Ρωριν* & *Ρωρεια* vocatur, apud Constantinum Porphyrogenetam de admin. imp. c. 2. 4. 9. aliosque. Helmoldus presbyter, circiter A. 1168. clarus, inflexis nonnihil, ex Slavica loquendi ratione, apicibus *Ruzos* appellavit, in Chron. Slavorum lib. 1. *Littus Australe Slavorum incolunt nationes, quorum ab Oriente primi sunt Ruzi, deinde Poloni.* Adamus quoque Bremenensis, *Ruzzie regnum, Polanis connexum me-*

morat, de situ Daniæ n. 221. Simili ratione, qua idem Prussios, Russorum accolæ, *Pruzzos* dixit lib. 2. H. E. c. 13. quaque Leunclavius in Pandectis Turc. Hist. c. 37. Serbos & Sorabos, qui cum Rossis lingua communi utuntur, *Rascios* & *Razios*: Bonfinius vero a *Ρωξ* *Roxianos* vocavit. Sic etiam Lambertus Schafnaburgensis Russios, *Ruzenos*, Photius *Rhutenos*, Luitprandus *Nortmannos* appellarunt lib. v. c. 6. quia in regionibus Aquilonaribus habitabant. Russiam item *Rugiam* dici apud infimos latinitatis scriptores, eruditus Mabillon ad vitam S. Adalberti, observavit Act. Benedict. sec. V. pag. 576. Eisdem *Lublinenses* subinde vocatos esse, Stanislaus Sarnicius monuit Anal. Polon. lib. 1. c. 2.

§. II.

Rossorum natio, per vastissimas Asiæ & Europæ regiones extensa, jam mature in notitiam Romanorum pervenit. Ut enim Moschos Asiaticos a Pompejo debellatos mittam, Roxolanorum frequens in historia Romana fit mentio: quos Matthias a Michou, Canonicus Cracoviensis, in tractatu de duabus Sarmatiis, ipsos Rossorum majores esse existimavit. Cum enim literæ X. asperitas pronuntiatus esset molesta, factum putat, ut primum Rossolani, dein Rossi appellarentur. Nisi quis Roxolanos Rossorum propaginem credere malit, ex Rossis & Alanis compositam; quemadmodum Harduinus ex Plinii membranis *Rbox Alanos* scripsit. Hoc liquet, easdem his fere sedes, in Ukraina & Tartaria citeriore, quæ Moschis, fuisse; pariter enim ac Lucanus hos Sarmatarum vicinos fecit, in verbis ante laudatis: sic Spartianus in Hadriano c. 6. & Trebellius Pollio in Aureliano c. 33. Sarmatarum, Alanorum & Roxolanorum conjunctim meminerunt; Tacitus Sarmaticam gentem appellavit, 1. Hist. 79. Dio Cassius Jazyges per totum latus Mæotidis habitantes, per Daciam, ait, *commerciorum causa* ad Roxolanos adiisse, quoties id Princeps eorum permetteret lib. 71. Hist. Id quod, simulac legi, ad pellium, præsertim Zibellinarum, mer-

mercaturam referendum censui; quæ sola apud hos viguit, terra bellis frequentibus inculta. Seneca Scythiis terga murium tribuit, quæ tactu mollia sint, epist. 90. etiam Justinus ex Trogo lib. 2. c. 2. *Mures Ponticos* Plinius, *sylvestres* Ammianus appellavit. Hæ fortassis sunt inter *pelles Babylonicas*, & *pelles Parthicas*, quas ex solo Barbarico, in Imperium Romanum invectas, vectigal solvisse, tradit Marcianus in l. 16. §. 7. *D. de Publicanis*. Russi enim pellicea pretiosiora, ex Siberia in Armeniam, inde ad nundinas Babylonicas deferebant, ut Ælianus testatur lib. xvii. Hist. anim. 17. Sic etiam facile intelligi poterit Græcorum de Vellere aureo fabula, cujus gratia Jason Argonautarum Princeps in Colchos, Moschorum patriam, profectus est; auro enim contra Sabellinas permutavit. Nam quod Strabo & Appianus conjecerunt, vellera villosa, in rivos demersa, auri ramenta interceptisse, nihili est, & cum Chymico auro inter nugas a Vossio relatum, ad Catulli epithalamium Thetidis & Pelei. Idem ergo olim fuit Moschorum institutum, quod de recentioribus tradidit Michalo Lithuanus, de moribus Moscov. fragm. 2. *Esti Mosci Soli sobelis, aliarumque ferarum genere abundant, tamen vulgo Sobolos pretiosos non ferunt, sed missos in Lituaniam, molles mollibus, aurum pro eis auferunt.* Ceterum Rhoxolanorum meminit elegantissimum marmor, Vespasiano imperante, dicatum honori Plautii Silvani, cujus verba colubentius refero, quia & vicinos, & regiam recip. Roxolanorum formam ostendit. Extat apud Gruterum pag. 453. *Ignotos ante, aut insensos P. R. Reges, signa Romana adoraturos, in ripam, quam tuebatur, perduxit. Regibus Pasiarnarum & Rhoxolanorum filios Dacorum fratrum captos, aut hostibus ereptos remisit. Ab aliquis eorum opsidem accepit, per quem pacem provinciæ & confirmavit, & protulit. Scytharum quoque regem Acherontensi, quæ est ultra Borusthenem, opsidione summo-*to. An postea Romani pacem a Roxalanis, sicut ab aliis barbaris, annuo tributo, quod mitiore vocabulo stipendium appellabant, redemerint, non facile dixerim. Videtur id autem

autem indicare Spartianus in Hadriano c. 6. si vulgata[m] lectionem sequimur: *Cum Rege Roxolanorum, qui de imminutis stipendiis querebatur, cognito negotio, pacem composuit.*

§. III.

Hæc dum scribo, in mentem venit, quod apud Nicephorum Gregoram olim legi, Rossorum Principem a Constantino M. *Dapiferi* dignitate ornatum esse. Quæ narratio, si veritate nititur, jamtum aliquo loco apud Imperatores Romanos, Rossium fuisse, sequetur. En tibi ejus verba ex lib. VII. c. 5. ο δι Ρωσικῆς τῆς το καὶ το αξίωμα τῆς ἐπὶ τῆς τραπίζης παρὰ τῆ μεγάλης κακληρωθείς Κωνσταντίνῃ; ο δι Πελοποννησιακῆς το τῆ περιγίτης; ο δι τῆς Ἀττικῆς, τῆ καὶ τῶν Ἀθηνῶν ἀρχαίος το τῆ μεγάλης Δυκῆς, καὶ ἄλλης ἄλλῃ. *Magni Constantini temporibus, Rossicus locum & dignitatem Dapiferi: Peloponesi Rector Principis; Attica & Athenarum Magni Ducis; alii alios titulos obtinuerunt.* Non equidem me fugit, multa apud Nicephorum reperiri, ab aliis prætermissa, quia res externas etiam Historia sua complecti voluit: attamen recentior est, (quippe A. 1359. defunctus) quam ut ei soli in re tanta fides sit habenda, de qua altum apud Constantini æquales, omnesque alios est silentium. Codinus Curopalata de offic. Constantinop. c. 2. inter Palatii ministros laudat *Domesticum mensæ, & Præfectum mensæ*, iisdem quibus Nicephorus verbis: ο ἐπὶ τῆς τραπίζης. In historia Francorum & Germanorum, *Senescalli, Inferiores, Truchfessi*, satis etiam primos inter Ministros sunt noti, per quos palatium disponebatur. Sed cujus inventum hoc αξίωμα sit, non liquet: certe viri Principes hoc ministerio honoris causa functi non videntur; nisi recentiori ævo, quod in talibus excogirandis fecundum fuit. Vide Zonaram in Alexio Commeno. Nullus præterea Rossorum Princeps, Constantini ætate, ab ullo scriptorum nominatur; & si qua fuit, dapiferi titulum ipse fastidivisse; ab aliis vero illo honore non decorandus fuisse videtur; quia in panegyricis conventibus, & actibus

augu-

augustioribus, ubi præsens sese ostendebat majestas, munus obire non poterat, tot locorum intervallis remotus. Deinceps *Barbaræ nationes, neque facundia pollent, aut dignitatibus illustrantur*, scripsit Anonymus auctor Theodosiani temporis. Hæc paulo-prolixius demonstranda fuerunt, tum ut Juris Publici Germanici studiosos munirem adversus Marquardum Freherum, qui ex hoc loco vetustatem & nobilitatem Dapiferatus in Germania repetere voluit, Orig. Palat. part. 1. pag. 106. tum etiam ut simul appareret, quid de *Magni Ducis* titulo habendum sit, quem Nicephorus statim addit, a Constantino M. institutum fuisse; id quod Cangius in notis, Seldenus aliique recte ad fabulas aniles retulerunt. Alii quidem Duces, aliis erant majores; & potentiores *μεγαλοι κριοι*, propter vastiorem dominationem vocabantur. *Δουξ* autem Byzantinis scriptoribus fuit classis præfectus. *Δουκα τῷ τολμῳ*, Nicetas Constantinum appellat in Isacio lib. 111. n. 4. Summus classis præfectus, qui supra duces, *Μεγας Δουξ*, vel *Δουκας* apud Annam & Codinum dicitur. Tyrius, contractis & corruptis vocabulis: *Alexius Megaloducas, qui classi erat Præfectus*, lib. 22. cap. 11. Et sane *Weliki Knesi*, hoc est *Ducis Magni* titulus, privata auctoritate a Russorum pariter, ac Lituaniæ Principibus, & ferius quidem, sumtus videtur, ad eminentiam præ ceteris *Knesiis*, seu Ducibus, quorum ditiones non tantæ, indicandam. Aliter Austriaca domus in Germania, *Archiducis* titulo eminet, ex diplomate Friderici III. Cosmus vero Mediceus, Florentinus, *Magni Ducis* prærogativa a Pio V. Pontifice insignitus est.

§. IV.

Nunc ad temporis seriem revertamur. Sæculo demum octavo vel nono Russorum nomen, per bella & commercia, frequens fuit apud Constantinopolitanos, a quibus dein sacra, & characteres litterarum acceperunt. Quapropter ex Byzantinis scriptoribus, maxime ex Cedreno & Zonara, eorum Historia media illustrari debet: quos tamen

T

ho.

homines leves & vanos, negligentiae hac in re, nec injuria, accusavit Thuanus lib. XXI. Quomodo cum lintribus, ex ulteriore Russia, Constantinopolim venerint, Constantinus descripsit dicto cap. 9. Expeditionem, quam *Rhossi*, gens *Scytharum*, a *Ponto Euxino ad Stenum*, id est fretum Constantinopolitanum susceperunt, memoravit Nicetas. Qua ratione *Rossi*, *Bulgarorum* provincia subacta, illic imperii sedem figere decreverint, impulsu *Calocyri*, *Chersonesi Tauricae* Principis filii, & qui *Rossica* classis 15000. navium interierit, *Joannes Zonaras* litteris mandavit, lib. XVI. c. 19. *Photius* denique laetatur, in epistola ad *Patriarchales* sedes *Orientis* apud *Baronium* ad A. 863. n. 41. *Ruthenorum gentem, quae crudelitate & cadibus omnes superabat, & NB. infinitos sibi populos subjecerat*, sacrum baptismum suscepisse. Enimvero pars diffusae hujus nationis, postquam Graecorum imperium graviter diuque affixerat, A. 861. Christo nomen dare coepit; alii rursus A. 876. religionem simul & cultum susceperunt. Sed his ad votum reversis, Russia omnis demum Christiana facta est, postquam *Uladimirus*, excisis fratribus suis, monarchiam adeptus, & suscepto Constantinopolim itinere, *Annam*, *Basilii Porphyrogeniti* filiam, uxorem duxit. Is, quod *Kioviae*, sub fulminis figura cum argenteo capite, & aureis auribus, coluerat *Peruni* deastri simulacrum, in *Borysthenem* abjecit, anno instauratae salutis 988. vel, ut *Moschi* computant, Anno a condito mundo 6469. Haec vera caeremoniarum Graecanicarum apud Russos causa est & origo, non illa, quam curiae Romanae proxenetae proferre solent. De tempore conversionis contra *Baronium*, accurate disputavit *Pagius* in crit. ad A. 959. & 987. quocum *Ephemerides Graecorum & Moschorum* tomo 1. Sanct. mensis *Maji*, *Papebrochii*, nec non fragmentum de conversione *Rusforum*, quod *Anselmus Bandurius*, notis suis ad *Constantinum* de adm. imp. pag. 113. inseruit, conferantur. Abhinc *Metropolita Moscorum*, usque ad medium saeculum quintum

quintum decimum, a Patriarcha Constantinopolitano amissus, aut confirmatus est. Cinnami eam in rem est locus pulcherrimus lib. v. Hist. c. 16. quem brevitatis amore semel apponam: *In Tauro-Scythica regione civitas est, nomine Kioviam, quæ omnes alias illic sitas præcellens metropolis est totius gentis. Episcopus Byzantio missus illis præfici solet, gaudetque ceteris omnibus, quæ ad excellentiorem conferunt prærogativam.* Ubi in transitu notari meretur metropolis Russiæ antiqua, sacra & prophana, quam Cinnamus corrupte *Κίονα*; Constantinus de adm. imp. c. 9. *Κασσιον το Κίονα*, & *Κίονα*; Ditmarus *Kioviam*, civitatem magnam appellavit lib. vii. Nomen accepit a *Kig* conditore, & vulgo ut *Kiof* pronuntiatur. Hæc vero postquam a Cosaccis penitus everfa est, thronus Archiepiscopalis, una cum Principis domicilio, primum Volodimiriam, deinde, ante tria circiter sæcula, Moscuam translata fuit: Ex quo tempore Moschorum nomen a Russis diu occupatum & oblitteratum renovari, aut (quæ Pauli Jovii, Oderbornii, Thuani, & Conringii sententia est) primum in hac gente audiri cœpit. Quicquid est: Sidonius, sæculo V. *Sarmatam Moscho* bis junxit, *carm. 5. 7.* Nunc antequam ab his prolegomenis ad rem ipsam veniamus, operæ adhuc pretium erit inquirere, cur Adamus Bremenensis Russiam *Græciam* nominarit lib. 11. Hist. Eccl. c. 13. *Rusciæ metropolis*, inquit, *civitas est Chive, æmula sceptri Constantinopolitani, clarissimum decus Græciæ.* An forte quia Russi a multis infamati, quod in fœderibus & commerciis Græca fide aliquando usi fuerunt? An quia *οι τῆς Ταυρικῆς οἰκουμένης Ἕλληνες*, in *Taurica* habitant *Græci*, ex Scylacis ævo? An quia Heraclea Pontica, Tauricæmater, Græcanica civitas fuit, secundum Strabonem? An vero Russi a Græcis subacti, iisque tributarii facti? Id enim colligi posset, ex litteris Sultani Ægypti, Mahumedani ad Imperatorem Constantinopolitanum, quem inter alia *Βασιλεῖ τῶν Ρωσῶν*, *Rofforum Regem* vocat, apud Cantacuzenum lib. iv. c. 14. Sed quia barbarus iste, quicquid potuit titulorum in litteris illis con-

gessit, malim Russos a suprema jurisdictione Ecclesiastica Patriarchæ Constantinopolitani, in Archiepiscopum & electum Russorum, tum propter communia sacrorum jura, Græcorum nomen accepisse. In ejus enim pietatis memoriam, Czarii Patriarchis illis, etiam ex quo a tyrannide Mahumedana oppressi sunt, quotannis elemosynam mittere consueverunt. Sed hæc quidem, quia non cuivis obvia videbantur, hætenus: nunc quod agimus, agamus.

§. V.

De Moscoviæ regimine politico, & Knesiorum auctoritate, in medio ævo, nil definire ausim: adeo ignota & tenebris, plusquam Cimmeriis, immerfa sunt omnia. Hodie forma regni, ex genio populi, satis herilis est, & ad modum Turcici imperii, composita cernitur. Cum enim Russi libertatem non gustarint, ignorantia dulcedinis ejus in officio summos & imos continet, ut cognita dubiis, præsentia melioribus anteponeere malint. Quod si ad initium Reipublicæ oculos convertimus, in magna illa gentium migratione, variae nationes, animis & studiis diversæ, ut fons aut nemus placuit, sine legibus aut Magistratibus, hæc coa-luerunt, mutuisque cladibus diu sese discerpserunt, donec c finitimis Vareghis, Triumviri Reip. constituendæ arces-siti sunt, in quorum fidem & auctoritatem sese tradiderunt. Hi Duces potius, quam Reges fuisse videntur, suadendi magis, quam jubendi auctoritate, ut referunt Russorum annales. Sæculo decimo, omnes Russi, citeriores & ulteriores, uni Principi paruerunt, qui domi Ducis titulo contentus, exteris Rex dictus fuit, ob magnitudinem terrarum, quibus dominabatur. *Ruzzia regnum* vidimus supra apud Adamum Bremensem. Luitprandus *Ingerem Regem Russorum* vocat lib. v. c. 6. quem Constantinus *Алхана Парис* nominavit de adm. imp. c. 9. Ditmarus Merseburgensis *Russorum Regis Vlodomiri*, alias Wolodomiri, actiones iniquas perstringit, ejusque *poteslate* inter filios divisa, Christi dictum affirmatum, ait: omne regnum in se divisum, desolabitur, extremo lib.

VII. Eundem hunc Ulodomirum, regalem titulum non adsumpsisse solum; sed etiam honores iterum Regios ab Imperatoribus Constantinopolitanis accepisse, satis verisimiliter scribit Anonymus Florentinus de reb. Moscovit. c. 8. Is vero hoc defuncto non diu servatus videtur, ob filiorum discordiam; donec nepos Wolodimeri, cognomento Monomachus, universam Rusliam iterum in monarchiam redegit, & *Zari nomen* ab Imperatore Constantinopolitano accepit; si fides est Genealogiæ Magni Moscoviæ ducis, ex Mstis Ruslorum annalibus excerptæ, editæque Colonix apud Maternum Cholinum. Hinc sæculo undecimo, *Mauricius ad Regem Rusiæ perveniens*, ab eodem Rege ac Principibus urbis ditissimæ *Cbios*, de ferinis pellibus pretiosis centum accepisse dicitur, in vita S. Mariani c. 4. apud Bolandum ad 1x. Febr. pag. 369. Mox vero duos fratres *Russerum Regis* inter se contendisse, refert Sigebertus Gemblac. ad A. 1073. atque alterum eorum, a regni consortio pulsum, Henrici Imperatoris auxilium implorasse; adeo ut se & Regnum suum ei submiserit, si ejus opera restitueretur. Dilaceratas igitur provincias Jaroslaus rursus collegit, ac solus Rusiæ principatum obtinuit; sed cujus filii iterum, ac ex filiis nepotes, quia ditionibus suis non contenti, in mutuum exitium sine modo ruebant, non nisi a Tataris oppressi, & vestigiales facti, senserunt, omnibus perire, quod singuli amittebant. Varios illos Rusiæ Principes, atque in his Uladimerum, Primislaum, Rosilaum, Uladislaum recenset Joannes Cinnamus, duodecimi sæculi scriptor elegantissimus lib. v. Hist. c. 16. Sub isthoc Tatarorum jugo, trecentorum ferme annorum, gens indies magis magisque ad barbariem composita fuit, omni libertatis vestigio deleta. Sed Joannes III. stimulos addente conjuge Græca Sophia, vel Zoe, Thomæ Palæologi filia, non modo molestum illud onus cervicibus suis abjecit, sed ex divulsis quoque Rusiæ membris integrum civitatis corpus composuit: nomen *Magni Ducis*, & universæ Rusiæ Principis capropter sortitus.

tus. Istius filius Basilius III. ante imperium Gabriel appellatus, quum subacta Plefcovia, & principatu Smolecensi potentior esset factus, *Czaris* titulum adscivit. Ast filius ejus Iwan Vasilowitz, hoc est Johannes Basilides IV. toto orbe notissimus, & propter tyrannidem a plerisque culpatus, ab aliis autem defensus, adjectione regni Casanensis & Astracanensis, titulum auxit, nomenque *Cesaris* & insignia affectavit. Integri tituli initium, ex stilo aulico, qui tempore Basilii fuit, expressit Paulus Jovius, de Moscovit. legat. hoc modo: *Magnus Dominus Basilius, Dei gratia Imperator*, &c. Rectius Guagninus in descript. Moscov. c. 5. *Nos magnus Dominus, Joannes Basilius, Rex & magnus Dux totius Russiae* &c. Optime vero Adamus Olearius, Mathematicus accuratissimus, quique in repetitis per Moscoviam itineribus omnia curiose notavit p. m. 25. titulum sequentis tenoris recenset: *Magnus Dominus Czar, & Magnus Dux, Michael Fædorowitz, omnium Russorum Autocrator; Volodimarie, Moscovie, Nowogardie; Czar Casani, Czar Astrakan, Czar Siberie; Dominus Plefcoviae: Magnus Dux Twerski, Jugersky, Permski, Wadski, Bolgarski, Rosanski, Rostofski, Gereslaffski, Boloferski, Udorski, Obdorski, Condinski* &c. &c. demum haud procul fine: *Kartbalinorum & Grufinorum Czarium Dominus & Dominator.*

§. VI.

Diximus Basilium III. Ducale nomen cum Regali circa A. MDXV. in perpetuum commutasse: nunc sua auctoritate, an aliorum auspiciis diadema suscepit, videamus. Qui enim Pontificem Romanum ceu Christi Vicarium, & omnium dignitatum fontem venerantur scriptores, velut ex compacto id agunt, ut hac etiam parte Sedis auctoritas salva sit. Horum antesignanus Paulus Jovius sibi non constat, dum in Legat. Moscovit. pag. 120. script. rer. Mosc. narrat, Clementem VII. regalia ornamenta ultro obtulisse Basilio, si rejectis Græcorum dogmatibus ad gremium Ecclesiæ Romanæ se conferret. Mox Protei in
mo-

modum mutatus subjungit, cupivisse Basilium regii nominis titulum concessione pontificia promereri; eo quod ipsos Cæsares Imperii insignia a Pontificibus accipere cognovisset. Rursus dubitans ait, famam tulisse, quod ab Imperatore Maximiliano titulum cum postularit. Hæc Jovius. Odericus autem Raynaldus Tom. XIX. Annal. Eccl. ad A. 1484. pag. 337. ex Ms. Archivi Vaticani refert, Joannem Basilium III. quem satis crasse cum filio Basilio confundit, a Sixto IV. regium vel Imperiale nomen poposcisse, contra nitente tum Casimiro Poloniæ rege: *Sixtus vero, inquit, Polono rescripsit, se illius consulturum juribus, nec eo inconsulto, Moscovitam totius Russiæ Regem Imperatoremve se dicturum.* Aliter rursus Paulus Piafecijs tradit, Theodorum, magnum Moscoviæ Ducem, de impertiendo Regis titulo, Pontificem Romanum sollicitasse. Verba ejus in Chron. Gest. in Europa sing. ad A. 1593. p. m. 112. sunt ista: *Solicitatus Pontifex Clemens VIII. pro Theodoro, Duce Moscoviæ, ut illum Regio titulo donaret, constanter recusavit: nisi schismate Græco relicto, ad consortium Ecclesiæ Romanæ Dux ille cum suis disionibus rediret.* Denique Joannes Antonius Gabbutius, in vita Pii V. ad calcem tomi I. mensis Maji in Actis SS. relata, Pium Papam scribit, consilium, cepisse, legationem ad Moschos destinandi, qua eos ad Catholicæ pietatis cultum revocaret: *Ejusque rei spem injectam esse, quod olim ad Romanos Pontifices, Antecessores suos, Clementem VII. Paulum, & Julium, utrumque ejus nominis Tertium, a Moschorum Principibus legati missi fuissent, qui certa munera, regia videlicet insignia, ab Apostolica sede postularent, & ut Sacerdotes alique pii viri, civilium artum opifices in Moschoviam mitterentur.* Optabat enim Basilius, Moschorum Princeps, Regii nominis titulo per ipsum Clementem decorari; cum id dare sacrosancti juris, & Pontificiæ Majestatis esse judicaret. Verum hujus non major, quam vacillantis Pauli Jovii apud me est auctoritas; cujus verba Gabbutius testis nomine sua fecit; longèque præ:

prætulim unius Herberstainii judicium, decem istiusmodi parasitis; per quos adeo vanæ finguntur species, ut nec caput, nec pes uni formæ reddatur. Nunquam enim Moschi suprematum Ecclesiæ Romanæ, multo minus jus Papale, Reges appellandi agnoverunt; sed typhum potius & dominatum Jovis illius Capitolini semper detestati sunt. Sub Joanne autem Basilide alienissimi fuerunt a Latinis, eorumque caput ne quidem verum pastorem esse affirmarunt; id quod vel ex illis, quæ Antonius Possevinus, Jesuita, cum aliis ex causis, tum ob Legationes, quas A. 1581. Gregorii XIII. nomine, ad memoratum Joannem obiit, celeberrimus, in commentariis de rebus Moscoviticis, ad religionem spectantibus retulit, abunde constat. Non equidem negarim, semel & iterum quosdam Russorum unionem optasse cum Ecclesia Romana: id enim arguunt, quæ Papebrochius in præfat. ad Ephemeridas Græco Moscas n. 13. & 14. collegit. Quod autem Cardinalis Baronius in append. ad tom. VII. Annal gloriatur, Isidorum Metropolitam Kioviensem, totiusque Russiæ Archiepiscopum, sub Eugenio Papa IV. decretis Concilii Florentini subscripsisse, id quidem siluisse præstabat: quia eriscundus iste miscellio Constantinopolim duntaxat missus, propria auctoritate Florentiam se contulerat, & in patriam redux captus, bonis spoliatus atque in carcerem conjectus fuit, auctore Herberstainio & Guagnino. Vanum præterea esse, quod idem Cardinalis tradit, Russiæ Regnum A. 1074. Sedi Romanæ donatum, & a Czare Demetrio ab ea receptum esse, Siricius ostendit in diss. de Relig. Moscovit. c. 4. Nunc Baronem Herberstainium audiamus in comment. rer. Moscovit. pag. m. 12. *Scribunt quidam Moscum a Pontifice Romano & a Cesare Maximiliano nomen expetivisse, & titulum Regium. Mihi verisimile non videtur: Præsertim, cum nulli hominum infensor sit, quam summo Pontifici, & quem non nisi Doctoris titulo dignatur. Cæsarem autem Romanum non majorem se existimat,*

ut ex litteris suis apparet, in quibus nomen suum Imperatoris titulo præponit. Huic pulcherrimum Renati Choppini locum comitem dabo, quem Celeberrimo Ludewigio in tract. de auspicio Regum acceptum fero; Renatus enim lib. II. de Doman. Franc. tit. I. n. 15. ita scribit: *Audacius Moscovita Basilus, Ruthenorum Dux, qui cum Tartarorum subesset imperio, primus Regios Moschorum fasces sibi arrogavit, auctore nemine, A. 1526.*

§. VII.

CZAR, vel ut alii scribunt TZAR, lingua Slavonica Regem sonat, non autem per crasin a *Cæsar* derivatur. In omnibus enim Russorum scriptis, & sacris & prophanis, *Czar* Regem, *Kesar* vero Imperatorem notat. Qui linguæ Hebraicæ sunt periti, fortassis radicem suppeditabunt, unde vocis origo ducatur: mihi vero idem in hoc studiorum genere accidit, quod ajunt de elephantis, amatores fluminum esse maximos, sed imperitos natandi. Certissimo autem ejus, quod hoc loco demonstrandum est, argumento nobis esse potest versio Bibliorum Slavonica, a multis Hieronymo, ab aliis Methodio tributa, in qua *Czar David, Czar Salomo*, & locus iste: *Non habemus Regem nisi Cæsarem*, per CZAR & KEZAR explicatur. Sic etiam in pane liturgiæ destinato, Præcuram Russi appellant, in circuitu supra crucem ista verba, *Iesus Christus Czar glorie*, leguntur. Tatarî item Præcopenles Reges suos *Czares* nuncupant, auctore Guagnino in descript. Mosc. cap. 5. Vicini autem Poloni, Bohemi & Slavi, quia Regem suum *Krol, Kral, Krail* vocant, ignorantia Ruthenicæ linguæ Czarem, Cæsarem interpretati sunt. Enimvero licet Moschorum lingua, non minus quam Bohemica & Polonica, Slavonicæ linguæ dialectus sit: ita tamen confusione nationum a ceteris discrepat, ut Slavus Russum, Russus Bohemum vix intelligat, Herbersteinio auctore. Non melius igitur ad cubile veri, & fontem erroris pervenimus, quam si linguas istas, in hac voce, comparare lubet. Moschis

R gnum significat *Czarstwo*, *Czratbie*; Polonis *Krolestwo*; Bohemis *Kralowstwo*; Slavis *Krailestwo*. Cujus rei obviam probationem depromam, ex petitione secunda Orationis Dominicæ Matth. vi. v. 9. quæ sequentem in modum convertitur in lingua

Russica,	Polonica,	Bohemica,	Slavonica,
<i>Pridet zratbie</i>	<i>Przyde krolestwo</i>	<i>Príde kralowst-</i>	<i>Prídid tvoje</i>
<i>tvoje.</i>	<i>tvoje.</i>	<i>twiitwe.</i>	<i>krailestwo.</i>

Verum non vicini tantum, sed ipsi etiam Russi, plus in Czaris, quam in Regis titulo majestatis inesse existimarunt. Sive id æmulationi antiquæ cum sceptro Constantinopolitano, quam Adamus Bremensis supra indicavit; sive subjectorum ac exterorum adulationi; an vero ambitioni Joannis Basilidis peculiari tribuendum sit, haud satis scio. Vix alium autem in finem Johannes fabulosa illa, & nescio unde petita gentis suæ primordia, de Prusso, Octavii Cæsaris fratre, cuius ipse decima propago sit, in vulgus sparsisse videtur; quam ut hisce coloribus augustius redderet nomen suum, & prætextum quæreretur, terras vicinas occupandi. Oderbornius hoc non obscure indicat in ejus vita pag. 252. Et quorsum alias duplex Aquila, cum duabus coronis, in sigillo & insignibus ejus expressa? quæ Adamus Olcarius in Itin. delineavit pag. 149. Jam patris ejus Basilii epistola, (de cujus tamen fide vehementer dubito) apud Jovium, & apud Raynaldum, Imperatoris nomen præfert: *Clementi Papæ, Pastori ac Doctori Romanæ Ecclesiæ, Magnus Dominus Basilus, Imperator ac Dominator totius Rusiæ* &c. Post ipsum Demetrius a. d. 28. Dec. 1605. litteris salvi conductus *Demetrius Imperator* subscripsit, quod testis AUTENTICUS, Seldenus testatur de tit. honor. p. 1. c. 2. Huc etiam pertinet, quod scriptor Mercurii Gallici tom. 3. litteris mandavit, quam confidenter Michaelis Fedrowitzii orator, apud Matthiam Imperatorem pronunciarit, Czares ex antiqua Cæsarum prosapia oriundos esse. De cujus commemorationis fide, si prius dicta conferantur, nil causæ est, cur adeo dubitarit Schurz-
scheisch

Heischius in dissertat. de Stephano Razino Cosaco § 5. Optime Czaris vocabulum, & rem omnem exposuit Sigismundus Baro Herbersteinus, vir linguæ Slavonicæ peritissimus, in comm. rer. Moscovit. pag. xi. cujus ipsi verba & hic legisse non pœnitebit: Czar Rbutenica lingua Regem significat: cum autem communi Slavonica lingua, apud Polonos, Bohemos & alios omnes, sumta quadam consonantia, ab ultima & ea gravi quidem syllaba Czar, Imperator seu Cæsar intelligatur: unde omnes, qui Rbutenicum idioma seu litteras non callent, item Bohemi, Poloni, atque etiam Slavi regno Hungarico subditi, alio nomine Regem appellant, nempe Kral, alii Kyrall, quidam Koroll: Czar autem solum Cæsarem seu Imperatorem dici existimant: unde factum, ut Rbuteni interpretes audientes Principem suum ab exteris nationibus sic appellari, cœperunt & ipsi deinceps Imperatorem appellare, nomenque Czar dignius esse, quam Regis (licet idem significant) existimant. Ceterum si evolvas omnes eorum historias, atque sacram scripturam, ubique Regis nomine CZAR, Imperatoris vero KESSAR reperies. Eodem errore Imperator Turcarum Czar appellatur, qui tamen non alio eminentiore quam Regis, hoc est Czar titulo ab antiquo est usus. Hinc Constantinopolim Czarigrad, quasi dicas Regiam Urbem, Turcæ Europæi, qui lingua Slavonica utuntur, appellant.

§. VIII.

Quod si ergo vicini, eadem lingua matrice utentes, ipsique Russi Czaris vocabulum *царь* Imperator; non mirum est, reliquas Gentes Europæas hos duces secutos esse. Multos laudare possem, omnium nationum scriptores, etiam prudentiæ civilis peritos, & professa opera de titulis honorum agentes, quibus certum fixumque sedit, Russorum Dominum Imperatorem esse: sed brevitatis amore quatuor tantum privatis, totidemque publicis testimoniis defungar, in quæ non cadit exceptio. Priinas dabo Germano, Davidi Chytræo lib. xxii. Chron. Saxon. ad A. 1570. p. m. 595. In feriis Pentecostes, Magnus Holsatiæ Dux, Derbato morvens, ad Moscorum Imperatorem, in urbem Mosquam profe-

Etus est; ubi omnibus captivis Germanis Moschus libertatem ipso petente donavit. Et Magnum Regem Livoniae publice renunciare jussit, eumque in Livoniam cum exercitu remisit. Hunc Britannicus Strabo, Guilielmus Cambdenus excipiat, in vita Elizabethæ ad A. 1567. hunc in modum scribens: Venerunt sub hoc tempus in Angliam, Stephanus Twerdico & Theodorus Pogorella; a potentissimo illo Joanne Basilide, Russorum & Moscoviæ Imperatore. Magis expresse Bodinus, æternum Gallix suæ decus, lib. 1. de Republica c. 9. Primus quidem Pasilius, qui se Magnum Dei cubicularium & Moschovitarum Regem appellabat, ab Imperio Tartarorum defecit: hic vero, qui nunc imperat, Maximi Imperatoris appellatione utitur: & certe potentia finitimos Reges, excepto Rege Turcarum, aut superavit, aut exæquavit. Quaternarium hunc numerum claudat Nicolaus Siccensis, Illyricus Clementis VII. Papæ interpres, qui litteras Basilii, in hanc sententiam Latinis verbis transtulit, apud Paulum Jovium de legat. Moscovit. p. 121. Clementi Papæ, pastori ac doctori Romanæ Ecclesiæ, Magnus Dominus Pasilius, Dei gratia Imperator ac dominator totius Russiæ &c. Si vero doctiorem & recentiorem Italum quis postulet, Janus Vincentius Gravina, nuper Antecessor Romanus clarissimus, in oratione secunda, pro Romanis Legibus, Petrum, Moschorum Regem, plus semel Magnum Moschorum Imperatorem compellavit. Atque hæc quidem privatorum testimonia hoc loco sufficiant, ne nimium iis tribuisse arguamur. Nunc publica producenda erunt: nec ægre inveniam; plura autem occurrent his, quibus ad æquum aditus pater. Elizabetham Magnæ, Britannix Reginam, Imperatoris titulum Joanni Basilidi, juveni supino, & propter subactum Casanenſe regnum, clavo adscriptisſe, certum est ex ejus litteris apud Hackluit part. 1. pag. 339. nec dubito, id genus exempla plura in Actis ejus ævi publicis, reperiri apud Riemerum aliosque. Præpotentium Fœderatorum Belgarum amplum mandatum Aitzema publici juris fecit tom. 1. lib. 10. pag. 1045. quo Legati eorum in Mosco-

Moscoviam - profecturi A. 1630. Czarem *Cæsaream Majestatem* vocare, eumque sequentem in modum alloqui jubentur : *Den Doorluchtigsten , Grootmachtigsten Vorst , ende Heere , Michailo Pheodorowitz , aller Russen Keyser ende Groot-Vorst , selfs Beboeder tot Volodimir , Moscou , ende Keyser tot Casan , Astracan ende Siberien , Heere tot Plesecou , Groot-Vorst tot Smolensko &c.* Haud multo post , Gallæ Rex A. 1654. *Au tres haut & tres magnanime Prince , Grand Seigneur , Empereur de Russie & Moscovie* , scripsisse fertur , in Electis juris publ. t. xi i. pag. 903. Rex Persarum denique , ante hos annos sexaginta , Alexio Michaelowitzio , sellam gemmis exornatam , quæ in palatio Moscovitico servatur , dono dedit ; in cujus fulcro dorsali Czar POTENTISSIMUS ET FELICISSIMUS RUTENORUM IMPERATOR appellatur. Cujus rei auctorem oculatum habeo , Anonymum recentissimum , in *Verandert Russland* pag. 148.

§. IX.

Notatu autem dignissimæ sunt litteræ Maximiliani I. Imperatoris Romano-Germanici A. 1514. ad Basilium Iwanowitz , eundem quem supra diximus , in Czaris nomen se ipsum adoptasse , lingua Teutonica exaratæ , cum bulla aurea appenta , & subscriptione Maximiliani : in quibus non semel , sed novem iteratis vicibus : *Basilius Dei gratia Imperator (Kayser) & Dominator omnium Russorum* nominatur. Dignum est monumentum , in cujus veritatem curatius hic inquiramus. Notum quippe est , Sigismundum Herbersteinium in comment. rer. Moscovit. pag. 12. & 13. jam olim tempore Ferdinandi I. vehementer doluisse , a viris Principibus sibi exprobatum , quod ipse Orator Maximiliani hujusmodi litteras ad Basilium pertulerit , in quibus Imperatoris & Regis nomen ei tributum sit. Hoc autem quomodo refellere conetur , melius ex ipsis ejus verbis apparebit ; quæ , quia multa huc pertinentia continent , adscribere non pigrabor : *Cur vero* , inquit , *hunc titulum ab Imp. Maximiliano peteret Moschus , qui antequam quicquam inter eos negotii esset , non modo*

se ei parem, sed superiorem videri voluit, nomen suum & titulum semper Imperatorio præponens, siue loqueretur, siue scriberet; quod nunc quoque, ut dictum est, seu mordicus retinetur? At regium nomen, ne ad Poloniæ quidem Regem scribens, post meum ex Moscovia reditum usurpavit. Hæc quidem in confesso est, quod ad Imperatorem, aut summum Pontificem scribens, se Regem & Dominum totius Russiæ vocat. Quin ne Imperatorio quidem nomine abstinet, si quas forse litteras, ex Ruthena lingua in Latinam versas, adjungit: nimirum ipsis interpretibus vocem Czar, quæ Regem significat, Imperatorem vertentibus. Atque hunc in modum idem se & Regem & Imperatorem facit. Sed quod ab Imperatoribus Maximiliano, ejusque nepotibus, creatus sit Rex, in Poloniæ Regum injuriam, id nemo crediderit. Quorsum enim attineret eum Regiam dignitatem, ut fama est, a summo Pontifice petere, si eam ab Imperatoribus accepisset? Non me fugit, quantum fidei Sigismundo hac in re debeamus, Viro cum natalibus claro, tum egregiis animi dotibus ornat, Equiti aurato, Consiliario Augustorum, Camerario & Fisci Austriaci præfecto: sed qui præterea, quod caput est, ablegatus a Maximiliano Imperatore, ejusque nepotibus Carolo V. & Ferdinando, Oratoris munere apud Russos, Hungaros, & Polonos plus semel functus est, & toti Rutheno foederis auspex fuit, ipsaque ejus fundamenta jecit, ita ut, magnifico Caroli V. elogio, nemo in eo, ipsi nedum non præferri, sed ne conferri quidem possit, in epist. ad Ferdinandum fratrem, Toletio scripta A. 1526. Tentemus autem, num ex temporum distinctione lucis aliquid affulgere, & dissidium hoc placari possit. Litteræ Maximiliani ad Basilium datæ sunt A. 1514. Heberstainius commentaria sua, Ferdinando dicata, A. 1549. in lucem emisit. Tum vero controversia, de Czaris titulo, inter Moschos & Polonos recens enata erat; adeo ut Joannes Basilides ab his aut Czar appellari, aut omnes pactiones irritas esse voluerit. Fusc hanc concertationem descripsit Albertus Kajalowicz, in historia Lithuanicæ, ad A. 1548. & seqq. ubi sic ait: *Slavonica vox Czar, non Cæsarem*

farem significat, aut Imperatorem (quemadmodum exterorum aliqui ignoratione idiomatis, adulatione mixta lapsi, vocitare solent Magnum Ducem Moscoviæ) sed Regem: Legati autem Poloniæ Regis, quod homo arrogans privata auctoritate insolentem titulum invasisset, Rege suo inscio, recusabant constanter, eum fœderis tabulis inferere. Provocabatur ei finis ad agnitionem Maximiliani ejusque Oratorem Herbersteinium; cui non levis invidia, hoc pacto apud Regem Poloniæ, & Ordines Lithuaniæ confabatur, quam modis omnibus a se amoliri studet in verbis allegatis. Nec quicquam video, cur tanti viri asseverationem increpemus; quem haud necesse est, litteras in Russiam attulisse, aut Brundenavii præsentem fuisse, quando ex Russorum legatis tradebantur. Notum est, circa A. 1514. exarsisse simultates, inter Maximilianum Imperatorem, & Sigismundum Poloniæ Regem; illius ergo intererat, Moschum, juratum quasi Polonorum hostem, sibi conjunctum habere; id quod ut obtineret, ultro, non rogatus aut sollicitatus, palpum ei obtrusit, titulo Cæsaris adscripto. Accedebat communis interpretatio non Russicæ tantum, sed etiam Cæsareæ Aulæ. Quam in rem memorabilis locus extat, in epistola de Religione Moscovitarum, jussu Ferdinandi, Regis Romanorum, & ad ipsum scripta, a Joanne Fabri, qui tum in aula degens, eidem a sacris confessionibus, postea Episcopus Viennensis fuit. Verba ejus Freheri Collect. rer. Moscovit. pag. 132. sunt ista:

ies in præsentiarum vel per Oratorem, vel per epistolam Moscovitarum Imperator insinuat, hoc titulo uti consuevit: Basilius Dei gratia Imperator, totius Russiæ &c. Atque certe ille est titulus, quo anno proximo elapso xxiv. mense Augusto, dum in inclita Vienna tua, te ex magni Basilii nomine salutarent, sunt orationem suam exorsi. Denique quid multis opus est? Ipsum Herbersteinium, si superstes esset, in alia omnia nunc rurum fore, confido: postquam intimus Gloriosissimi Petri Secretarius, Schaphirot, litteras Maximiliani authenticas A. 1718. e situ & pulvere scrinii Legationum, in lucem

lucem produxit, easque Legatis ibi præsentibus ostendit, & lingua vernacula donavit. Thucelius integras inseruit tomo xii. Electorum juris publici pag. 905.

§. X.

Ex quibus satis, opinor, intelligitur, titulum Russorum Imperatoris non recens esse commentum, sed jam ante duo circiter sæcula usurpatum a Principibus Russorum, iisque tributum a Regibus & Rebuspublicis Europæis. Basiliius ejus fundamenta jecit; Joannes Basilides, longa vitæ & Imperii mora, ad statum redegit. Hunc utique animum testatus est, tum aquila duplici inter insignia regni sui relata; tum etiam, quod Andreæ Apostolum genti suæ Evangelium prædicasse gloriatus est, apud Pollewinum; ne Romanis in fide Christiana posterior haberetur. Idem quoque, ætate provectiore, aliquantisper litigioso Czaris titulo abstinens, se *Autocrator*, seu *Monarcham universæ Russiæ appellare cæpit*, auctore Kajalowiczio ad A. 1572. Theodori, filii ejus, non eadem fuit fortuna, quia ingenii simplicioris erat Princeps; sed mage sub Demetrii impostoribus gloria regni imminuta est; dum furentibus per annos quindecim civilibus turbis, fortuna ludum insolentem ludere pertinax, incertos transmutabat honores, nunc huic, nunc illi benigna. Pristinæ tamen magnificentiæ vestigia, in titulis, sensim temporis decursu firmatis, atque in legatis mittendis, & recipiendis jugiter manserunt, ut capite sequente ostendemus. Petrum manebat hæc fors, ut gentis suæ sospitator, & Imperii formator esset. Is una cum populo suo indignum ratus est, intra Magni Ducis, aut Czaris Turcicum nomen, atque a minorum gentium regulis occupatum consistere, qui tot regna possideret, triumphos numeraret, & novo incremento terminos protulisset. Hanc maximam laborum, itinerum, periculorumque mercedem ab exteris desideravit, subjectis autem imperavit, ut *Petrus primus, Russorum Imperator*, in sæcula irret, & seris annalibus infereretur. Narrat Justinus ex
Trogo

Trogo lib. 1. c. 1. qui olim bella gesserunt, non Imperium sibi, sed suis gloriam quaesisse, & contentos victoria, abstinuisse imperio: is autem, ex utroque Cæsar, bellicum titulum, nec prece nec pretio redemptum, jure victoriæ adscivit, & decus majorum, temporum injuria intermissum, redintegravit. Inter proprias ejus laudes sæpe illa celebrata est, quod inanum titulorum, gemmarum & vestium fastum perpetuo damnavit, & cognatum Moschorum imperio Magni cognomen averfatus est: nunc autem monstravit, quam bene simul edoctus sit illud Tiberii apud Tacitum IV. Annal. 40. *Ceteris mortalibus in eo stare consilia, quid sibi conducere putent. Principum diversam esse sortem, quibus præcipua rerum ad famam dirigenda.* Sive autem multitudinem terrarum & Regnorum, in Asia & Europa; sive amplitudinem populorum; sive apparatus navalem, & absolutam majestatem; sive prompta oblequia; vim divitiarum; commerciorum robur; rerum deinceps gestarum magnitudinem intuebatur, multis Europæ Regibus videri sibi poterat major, & regni mensuram potentia excessisse. Totus titulus, quem in libellis & litteris, ad se mittendis expectat, epistolis historicis, quæ Gallico sermone singulis mensibus prodeunt, ad mensem Martium insertus est, pag. 307. & ita fere sese habet. *Petrus I. Dei gratia, Imperator & Dominator totius Russiæ, Moscoviæ, Kiowie, Volodemiriæ, & magne Novogardiæ; Rex Casani, Astrakani & Siberiæ. Dominus Plefcoviæ; Magnus Dux Smolenskii; Dux Estoniæ, Livoniæ, Kareliæ, Tuveræ, Tugoriæ, Permiæ, Viatkæ, Bulgaræ, aliorumque regnorum: Dux Basnovogardiæ Czernigoffiæ, Resani, Rostowiæ, Jaroslawiæ, Prielo Ozero, Udoræ, Obdoniæ, Kandæ. Imperator omnium partium septentrionalium. Dominus terrarum Iwer & Castaliæ. Dominus hereditarius & possessor terrarum Georgiæ, Cabardiæ, Czerkassæ, & Ducatus Gorkyensis.*

CAPUT II.

DE

Jure Gentium, circa titulum Imperatoris.

§. I. *Quelibet Civitas, domi suæ, titulum imperantis augere potest. Probatur id rationibus.* II. *Tum exemplis veterum & recentiorum, qui nomina, etiam nimis superba, Principibus suis imposuerunt.* III. *Vox Imperatoris, in bello nata, cum Regio nomine aliquando paria fecit, apud Romanos & Francos.* IV. *Eadem in significatu bodierno, pariter ac Caesaris nomen, sine injuria Augusti, adscisci potest.* V. *Varii Hispaniarum Reges titulum Imperatoris sumserunt.* VI. *Anglia item, Gallia & Dania Reges, quibus usus non assurrexit.* VII. *Exteri Principes hujusmodi titulum, eique annexam prerogativam conferre non tenentur, nisi conventio, vel possessio antecedit.* VIII. *Reges sunt fratres, & Rectores civitatum aequales, licet disparia iis sint fortuna bona.* IX. *Agnitus Imperator, jure gentium, Rege agnoscente est superior. Corona ejus clausa, Regis aperta.* X. *Titulus Imperatoris, Caesaris & Autocratoris Russorum, ad hæc principia expenditur.* XI. *Cur Majestatis appellatio Czari in Cancellaria Imperatoris sit negata, ab aliis tributa.* XII. *Eminentia Caesaris Augusti, præ aliis quibusque Imperatoribus, unde repetenda sit.* XIII. *Coronis de titulo Semper Augusti, cum aliis non communicando.*

§. I.

Superiore capite quæ facti sunt vidimus, nunc sequitur, ea ad Lydium juris gentium lapidem exigamus. Duo autem principia nobis pro fundamento erunt, quibus Reges & Respublicæ, in statu naturali viventes, reguntur; alterum: *Licere, quod non est vetitum*; alterum: *Pares ut pares tractandos esse*. Ex illo conclusionem ducimus, quamlibet Civitatem sui juris, uti formam imperii, sic titulum quo-

quoque Imperantis mutare atque augere poffe, eo effectū, ut apud omnes cives pro tali haberi debeat: ex hoc autem conſequitur, exteris liberum eſſe, an novum titulum eidem tribuere velint; ſi expreſſus eorum, aut tacitus conſenſus non intervenit. Quod ad prius attinet, liquere arbitror, conferre nomen & titulum penes eos eſſe, qui rem ipſam, ſeu ſummum imperium tribuere poſſunt. Adeoque populus, nulli mortalium obnoxius, vel ipſe arbitriam ſummæ poteſtati ſuæ notam imprimere, aut huic facultatem concedere poteſt, inſignibus decentibus ſaſtigium ſuum exprimendi. Enimvero gentes, ſimulac diſcerni, & regna condiſceperunt, ſummi quoque honoris ſigna conſtituerunt, quos *titulos* vel *tituli*, titulos appellamus; ut tamen ſingulis innoxia mutandi facultas eſſet, ſi Reipublicæ ſtatus, & potentia aliquando augerentur; aut honos vocabuli, manante latius exemplo, imminueretur. Nulli litterarum ductus natura ſummum civitatis rectorem notant; tituli uſu valent, ut nummi. Quem puerum vidimus formoſum, hunc alii deformem vident in ſenecta. Tertium ſæculum non videt hominem, quem vidit primum. Sic vetus verborum ætas interit, & recens nata, juvenum ritu, floſcunt. Scite Freinſhemius nomina dignitatum cum veſtitu comparavit: quemadmodum enim illuſtrium pompam nobiles imitantur, ſic tituli ſummis hominum tributi, tractu temporis ad inferiores devolvuntur. Nam ut quiſque propior cuiſdam dignitati ſibi videtur, ita nomen ejus affectat; & cum hoc a multis fit, tanquam ſede ſua emotum, transfertur ad viliores; quique ordine ſe antiſtare putat, nova vocabula fingit, quibus a ceteris diſtinguatur. Non hic ad Paulum provocabo, qui liberum cuiſvis hominum eſſe pronunciat, quodcunque velit, nomen ſibi ſumere, modo alium ea re in fraudem non inducat, aut quid alieni car interceptum; *lib. V. Sent. tit. 25.* De alio enim, quam nobis eſt ſermo; nomine loquitur, & conſtat inter omnes, ſummi imperantis eſſe, gradus dignitatis civibus assignare. Qui autem

nulli extraneo imperium suum debet, nullius cliens, vassallus aut ærarius est; intra fines suos pro tali se gerere potest, qualem ex collatione virium propriarum & alienarum, ex temporis ratione, & vicinorum usu se esse putat. Iusta causa existimandi facit, ne ipse sibi causam possessionis mutasse videatur. Nec quicquam est, quod alii hic querantur, in pari dignitatis gradu constituti. Sustulit hic ædes altius, tollant illi in cœlum suas, si modo stabile tantæ molis jecerunt fundamentum, & præsens id poscat utilitas, vel ad futuram tutelam spectet. Nemo prodesse sibi, dum alii non nocet, hic prohibetur: nullus dolo facit, qui jure suo utitur: nec juris sibi competentis executio injuriam habet. Quin licet nomen hoc novum officiat luminibus vicini, nulla tamen ei prohibendi facultas est: quia alter nil contra legem facit, nec publica servitus huic est constituta. Non equidem is sum, qui controversias illustres pulvere scholastico adspargendas putem; sed evidentissima libertatis hujus naturalis, apud privatos vestigia supersunt, a priscis nostris Jurisconsultis, ex dictamine rectæ rationis, prolata. Si quis enim in suo ædificans, obscurat lumina vicini, cui non debet servitutem, jure fecisse intelligitur; pariter, ac si puteum fodiendo in suo, venas aqueas, quæ alterius puteo aquam adducunt, rescindat; quia non videtur is damnum sentire, qui eo veluti commodo, quo adhuc usus, privatur; multumque interest, utrum damnum quis faciat, an lucro, quod adhuc faciebat, uti prohibeatur *l. 24. §. f. l. 26. D. de Damno infecto. l. 1. §. 12. de Aqua & aq. pluv.* Eleganter Cicero Officiorum tertio: *Nec tamen nostræ nobis utilitates omittendæ sunt, aliisque tradendæ, cum his ipsis egeamus; sed suæ cuique utilitati, quod sine alterius injuria fiat, serviendum est. Siste Chrysippus, ut multa, qui stadium, inquit, currit eniti, & contendere debet, quam maxime possit, ut vincat; supplantare eum, quicum certat, aut manu depellere nullo modo debet: Sic in vita sibi quemque petere, quod pertineat ad usum, non iniquum est; alteri deripere jus non est.*

§. II.

Jam porro omnes gentes, & veteres & recentiores, quarum contentiens judicium ſperni non debet, videmus ita libertatem illam naturalem explicaffe, ut cuique Principum, qui alterius nexu aut fiducia non tenebatur, integrum fuerit, honores judicio arbitrioque ſuo adſciſcere, ſibiſque anteriorem locum arrogare. *Regis Regum* appellatione, quid eſt arrogantiſſimum, aut quid propius accedit ad titulum Imperatoris Romani? qui apud Martialem l. vi. ep. 4. nec non vetuſtiſſimos Rabbīnorum *Princeps Principum* appellatur. Antiquiſſimi tamen Ægyptiorum Reges, apud Diodorum; Nabuchodonſor, apud Danieleſem, ea ornati leguntur; & hic quidem, quod omnibus Aſiæ Regibus imperabat. Artaxerxes Mne-mon ſe ipſum *Regem Regum* vocat, in epiſtola ad Eſdras; quia Reges Armeniæ, Cypri, Cariæ alioſque Perſæ in obſequio ſuo habebant. Ab his ad Arſacidarum romen ſuperbum migravit; nec veritus eſt Veſpaſianuſid Vologeſo tribuere, & Romani ſcriptores privati aliis. Ex Auctoriſibus, Mar-moribus & Nummis, Vir immortalis nominis, Ezechiel Spanhemius hoc docuit, Diſſertat. viii. de Præſtant. & uſu numiſm. cap. 2. Rediit honos ad Perſas, quum Arſacidarum ſolium occuparunt. Nec hoc tantum, ſed ampliore faſtu cumulatur Saporis ii. vel iii. epiſtola ad Conſtantium, apud Ammianum Marcellin. lib. xvii. c. 5. *Rex Regum Sapor, particeps ſiderum, Frater Solis & Luna, Conſtantio Cæſari, Fratri meo ſalutem.* Eundem vero titulum, quo, velut peculio, Perſæ delectabantur, Beſſolus regulus, ad Saporem ſcribens, jactare auſus eſt, teſte Pollione in Valerianiſ c. 4. Potiore jure Conſtantius Cæſar id nominis ſibi vindicaſſe, aut ab aliis delatum accepiſſe videtur, apud Gregorium Nazianzenum Orat. i. in Julian. Imperatores quoque Conſtantinopolitani idem ſuum fecerunt, & ad Turcas deinde tranſtulerunt; auctore Bryennio lib. i. c. 9. Rex Francorum, licet unum *illuſtris* nomen tantum ceteris præferret, & a Pippini temporibus *Chriſtianiſſimus*

vocaretur; tantæ tamen existimationis, apud plerasque nationes, habitus est, ut non a Græcis modo *Rex Regum* dictus fuerit, sed & solus inter Europæanos Principes, per excellentiam indicatus, ob prærogativam, quam supra ceteros Monarchas obtinebat. Βασιλεὺς Βασιλεῖν, Hugo, Francorum Regis frater, apud Annam Comnenam appellatur, Alexiad. pag. 288. ubi Carolus du Frêne, præter alios, Matthæi Paris. locum A. 754. laudat: *Dominus Rex Francorum, qui terrestrium Rex Regum est, tum propter cœlestem ejus inunctionem, cum propter sui potestatem, & militiæ eminentiam in medio sedebat.* Hispaniæ Regibus eundem titulum tributum esse, Ludolfus observavit, comment ad Hist. Æthiop. lib. 2. n. 12. Nec minus Angliæ Reges eum sibi vindicasse, Seldenus evicit de tit. hon. p. 1. c. 3. Ex quibus satis liquere arbitror, apud cunctas gentes, veterem ac jam pridem receptum fuisse morem, ut Principes, aularumque cultores, ob fortunam imperii splendidius loquerentur. Non alio autem elogio excellentiore magnitudo potentiae exprimi posse videbatur, quam si *Reges Regum, Principes Principum, & Dominos dominantium* sese ostentarent, qui Reges habebant copiis sibi & tributis inservientes: sive ex fœdere, nexu, subjectione, sive ex alia causa. *Instrumenta servitutis*, Tacitus in Agricola c. 14. regulos illos vocavit. Præterea alia divina epitheta, quibus Principes eminentes majestatem suam hominum venerationi commendarunt, nullo Principum vicinorum consensu implorato. Divinitatem, numen, oracula cœlestia, adoranda rescripta, sacras constitutiones, in utroque Codice ingeminant Imperatores Romani; ipsique Christiani, Θεοταται, αγιοι, μεγαλει; Divinissimi, Sancti, Sacratissimi, Maximi Principes passim dicuntur. Hadrianus *Olympius* appellatus: Commodus *Hercules Romanus*: Diocletianus *Jovium* se dici voluit, auctore nemine. Ipse Papinianus, prudentissimus juris antistes, Severum & Antoninum, cognomine Jovis Capitolini, *Optimos Maximosque Principes* suos nominavit, in l. 22. *D. de Accusat.* Jam vero

vero Chofrois factum quis ferat? qui inter titulos regni alios, hos quoque ridendos sibi apponit, in epiftola ad Varatum fcripta, apud Theophylactum Simocattam lib. 1v. Hift. Mauric. c. 8. *Rex Regum, Dominus dominantium, Gentium dominus. Princeps pacis, hominum falus. Inter Deos quidem homo bonus & æternus. Inter homines autem Deus illuſtriſſimus. Viſtor longe glorioſiſſimus: cum ſole exoriens & noſti lumina largiens, &c.* Non minus insolentes ſunt Regis Æthiopix, ſive Abyſſinorum tituli, apud Ludolphum in Hiftoria Æthiopica: ambitioſiſſimi vero, & omni vanitate pleniffimi, quibus Principes Mahumedani ſe alioſque onerant: id quod antiqua pariter ac recentia, fœderum & conventionum Turcicarum exempla teſtantur, apud Seldenum de tit. hon. p. 1. c. 7. n. 4. Leonem ab Aitzema p. 6. pag. 650. alioſque plures, qui epiftolas & relationes Turcicas ſcripſerunt.

§. III.

Tot ac tam variis, omnium ætatum & nationum, exemplis præjudiciorum nebulas pulſas eſſe puto, ut quæſtioni principali plus lucis aſſurgere poſſit. Nullus autem dubitandi ſupererit locus, ſi in natales & ſignificatum vocis *Imperatoris* plenius inquiremus. Trifariam illa accipitur in Hiftoria Romana. Vigente enim republica, qui exercitui cum imperio præerat, a ſingulis militibus dicebatur Imperator: ab univerſo autem exercitu, a Senatu Populoque Romano non niſi, qui res magnas bello geſſerat, & hoſtium numerum, lege definitum, vel minorem occiderat, nomen illud, ſed uſque ad peractum triumphum, ferebat. Hinc Cicero, poſt Pindeniffas ad Amanum ſuperatos, ſe *Imperatorem* appellatum eſſe gloriatur, lib. v. ad Attic. ep. 20. & lib. x. ep. 8. recitat exemplum epistolæ, ſibi a Cæſare ſcriptæ, cum titulo: *Cæſar Imp. Ciceroni Imp. S.* Julius autem Cæſar. cum armis Rempublicam occupaffet, inter alios nimios honores, recepit prænomen *Imperatoris*, auctore Suetonio c. 76. Atque ex hoc tempore, Imperator idem fere

fere ac Rex significare cœpit; odioso tamen Regis nomine, diademate, & reliquis regni insignibus, invidiæ declinandæ causa, prætermisiss. Augustus nomen Imperatoris, semel & vices partum, utroque sensu, pro Principe & victore usurpavit. At πολυκινητατος Tiberius tanquam prænomen adspersum est, dictitans se *Dominum* servorum, *Imperatorem* militum, *Principem* ceterorum esse, ut auctor est Dio lib. 57. Idem Blæso hoc tribuit, ut *Imperator* a legionibus salutaretur, *prisco*, inquit Tacitus 111. Ann. 74. *erga duces honore, qui bene gesta Rep. gaudio & impetu victoris exercitus conclamabantur: erantque plures simul Imperatores, nec super ceterorum æqualitatem. concessit quibusdam & Augustus id vocabulum; ac nunc Tiberius Blæso postremum. Ait postremum: sed Casaubonus ex Appiano observavit, cum honorem sub Hadriano, privatis exercituum ducibus, nondum penitus ademptum fuisse. Labefactat etiam Taciti sententiam, vel si mavis Lipsii emendationem, Suetonius in Tito cap. 5. & lapis Vicentinus, in quo A. Cecinna felicissimus exercitus Vitelliani Imperator appellatur, apud Reinesium lib. 1. var. lect. c. 17. juncta Ruperti ad ipsum epistola 21. & 23. Sic ergo Imperatoris nomen initio non fuit tanti, quam quidem plerique sibi persuadent, & Principis titulo superabatur; Regis autem nomen utroque erat majus; Augusti omnium maximum inter fastigia humana. Unde Suetonius scribit, non multum abfuisse, quin Cajus Caligula diadema sumeret, speciemque principatus, in regni formam converteret, in ejus vita cap. 22. Scio Græculos scriptores, ad adulationem compositos, jam mature Imperatores βασιλεις, & Imperatoriam dignitatem βασιλειαν appellasse: verum primus Latinorum est Statius Papinius, qui Domitianum Regem magnum vocare ausus est, l. iv. carm. 1. v. 46. Deinde regis, regni, legis regiae, sedilis regii, & ornamentorum regiorum, secundo & tertio sæculo, crebra occurrit mentio, maxime apud Tertullianum lib. 1. ad nat. c. 10. l. 2. c. 10. de spectac. c. 30. donec Aurelianus chlamydi*

mydi purpuræ, unico hæcenus imperii insigni, *regium diadema*, Constantinus autem *coronam auream* adiecit, ut Victor & Cedrenus testantur. Egregie rem omnem exponit Synesius de regno; ubi Imperatoris vocem, ceu moderationis argumentum, in veræ Monarchiæ Romanæ administratione interpretatur; atque militaris imperii esse nomen, jam olim in Republica Atheniensium receptum. Nos, inquit, *Regis nomine vos dignamur, & appellamus, & scribimus: vos autem, sive scientes, sive inscientes, consuetudini id tribuentes appellationis hujus invidiam declinare velle videmini, Imperatores vos appellando*. Plura de *Basilios* & Regis titulo, Romanis Imperatoribus tributo, dabit *παύ*, Ezechiel Spanhemius, de Præst. & usu num. diss. xii. cujus scrinia compilare haud est necesse. Illud autem non prætermittam, quod licet Francorum Princeps, ante inaugurationem Romanam Rex, post eam Imperator Augustus communiter appellaretur; in multis tamen diplomatibus & formulis Imperator *Regis*, Augusta *Regine* nomine donetur, & ex adverso *Imperatoris* nomen Regibus tributum sit; ut præclare docuit Mabillon de re diplom. l. ii. c. 4. n. 1. 2. & cap. 26. n. 12. 14.

§. IV.

Ceterum ex hac vocabulorum origine prima, & subsecuta confusione, nolim quenquam suspicari, quasi altius quicquam in nomine Regis, quam in *junctis* Imperatoris, Cæsaris, & Augusti nominibus Romæ olim comprehensum fuerit, aut in præsens contineatur. Adco enim tituli hi, usu totius orbis, supra omnes alios, sensim oppressa magis magisque republica, ascenderunt, ut quicquid ubivis sublime, sanctum & illustre erat, cum summo in Orbem Romanum imperio, & absoluta potestate, illis inesse crederetur. Quamobrem Aurelius Victor Octavium, scribit, *pro Rege Imperatorem, vel sanctiore nomine Augustum vocatum*. Et Prudentes Caligulam, diadema affectantem, monuerunt, *eum & Principum & Regum fastigia excessisse*, apud Suetonium cap. 22. Hinc etiam Hadrianus *Augustus*

Maximusque Princeps, in SCto de hereditatis petitione appellatur l. 20. §. 6. de Hered. petit. Vile profecto Regis nomen præ illis Imperatorum factum, postquam collapsio Imperio Occidentis, Franci, Gothi & Vandali regna diversis in locis constituerunt, regisque nomen novi dynastæ usurparunt: tum enim Orientis Imperatores Αυτοκρατορις appellari voluerunt, exterarum vero gentium Principes, βασιλες, non Αυσιλιος salutarunt. Dudum hoc observavit Casaubonus ad Spartiani Hadrianum, illustri exemplo Theodorici, Gothorum Regis, qui Romam, & universam propemodum Italiam obtinebat, de quo Procopius 1. Goth. Romanorum Imperatoris neque habitum, neque nomen usurpare contendit. Sed regi appellatus transiit ætatem. Sic enim barbari principes suos appellare solebant. Illud autem addo, quod eadem ratione Justinianus Augustus, primus eorum, qui Constantinopoli sedem imperii fixerunt, Ρωμαίων Αυτοκρατορ, Romanorum Imperator, re & nomine, tum fuerit renunciatus, auctore Agathia lib. vi. Is scilicet labefactatum, imo extinctum cum Momyllio Augustulo, imperii Romani decus e ruinis restaurare tentabat; quemadmodum, post aliquot sæculorum intervalla, idem rursus Caroli M. & Othonis I. fuit institutum: in quorum nummis RENOVATIO IMPERII ROM. elogium ab aliis quidem Imperatoribus usurpatum, cum majore tamen emphasi legitur, apud Mabilion. de re dipl. supplem. c. xi. Satis diu autem Orientis Imperatores cum Principibus Occidentis de titulo hoc vitiligarunt; non aliter, ac si proprietatis jure, cum tenuerint novæ Romæ & mundi domini; qui cum injuria sua conjunctum existimabant, si Latini quoque dignitate βασιλεως, id est Imperatoris, coruscarent, quos avito quodam odio, βασιλεω, seu Regum nomine, tantum dignabantur. Sic Henricus IV. Germanicus Imperator, βασιλεως Αλμανιας, apud Annam Comnenam lib. 1. Alex. vocatur, & Joannes Cinna-mus. τῆς Κορδαῖς τε Αλμανων βασιλεως σκηνον memoravit, lib. 11. Hist. c. 12. Qui tamen ipse, Imperatoriam majestatem, non

non obscure in Germanicis Principibus mox concedit, eosque supra Reges locando satis agnoscit, contentionem magis de titulo Imperatoris Romani, quam de nomine Imperatoris fuisse. Diserte Willelmus Tyrius lib. XVI. c. 21. *Molestè siquidem ferunt, quod Theutonicorum Rex Romanorum se dicit Imperatorem: in hoc enim suo detrabi videtur Imperatori, quem ipsi Monarcham, id est, singulariter principari omnibus dicunt, tanquam Rômanorum unicum, & solum Imperatorem.* Quod si vocem Imperii, ad usum loquendi hodiernum exigamus, summam notat potestatem, nemini in terris obnoxiam, quæ regni mensuram excedit, & sua potentia adversus omnes niti potest: Quamvis enim majus & minus non variet speciem, dictuque difficile sit, quænam civitas reliquas magnitudine vincat: obtinuit tamen, ut regna excellentiora, quæ aut pluribus regnis constant, aut plurium regnorum viribus respondent, imperia appellemus: quo ita quæ re differunt, etiam nominibus distinguantur. Sic præter Romano-Germanicum, Magni Mogolis, Sinicum, & Fessia-Maroccanum Imperium dicitur; Turcarum verò Sultanus omnium Imperatorum ter maximum se appellat, eaque honoris prærogativa ab ipsis Christianis Principibus sæpe affectus est; quia solus usus hac in re dominatur. Neque vero Pasquierii regulam sequimur, existimantis Imperatorem, ut talis sit, quatuor Regibus imperare debere; Regem quatuor habere oportere Duces; Ducem quatuor Comites; Comitem quatuor Barones. Redolet enim hæc doctrina commentum Quaternionis imperii, apud Panvinium, & Goldastum; nec plus solidi in recessu habet, quam quod Petrus Pithœus duodecim Comitatus Ducatui, velut necessarios adstruxit, Aimoinum Monachum secutus. Quicumque autem Rex sui juris, fallaci atque externo tituli splendore, non pellectus, sed intenta virium suarum & temporis consideratione, Imperatoris nomen affectat, tantum abest, ut censura vexandus sit, ut potius, velut rectus & magnificus sui iudex, laudandus videatur. David Blondellus,

in præfat. apol. adversus Chifletium, quædam huc pertinentia scripsit; & ego vivendum quidem moribus præteritis, verbis autem præsentibus utendum esse putem. Nisi enim me omnia fallunt, imperium bellis quæritur, victoriis propagatur, foederibus & benevolentia sociorum fulcitur. Deus est, qui regna dispensat; qui civitates extollit, aut deprimat, qui erigit e pulvere tenuem, & vices dominationum moderatur. Homerus peculiarem hanc^o Jovis, in sceptris dandis & adimendis, curam jam olim agnovit, cujus verba eo nomine Dion Chrysostomus in orat. de regno tertia laudavit & explicavit. Romani etiam hoc ipsum indicarunt tot nummis inscriptis: PROVIDENTIA DEORUM; & singularis Severi est nummus apud Tristanum, in quo JUPITER IMPERATOR. Titus *principatum fato dari*, agebat apud Tranquillum c. 3. *Grande Imperatoris nomen est, quod a Deo traditur*, inquit Tertullianus Apolog. c. 33. Inde Copronymus, Alexius Comnenus aliique Imp. Græci passim *Θεοτετοι*, & Carolus M. Ludovicus Pius, ceterique Occidentis Augusti toties *a Deo coronati* appellantur. Quotquot ergo Reges summa Majestatis jura omni obligatione vacua habent, certique norunt, terras suas reliquis potentia & viribus superiores esse, Imperatoris titulum, ad populum, cui imperant, restrictum, ex eodem fonte depromere possunt, unde Romani, Græci, Franci, Germani, ceterique recentiores suum hauserunt. Nec aliud de *Cæsaris*, vel ut Germaniæ superioris populi, pariter ac Græci, prolata littera C. efferunt, *Kaysers* appellatione dicendum videtur: licet Feltmannus ad solos, nescio quos, Julii Cæsaris, successores eam pertinere contendat, lib. 1. de tit. hon. c. 34. Boeclerus etiam, quemvis Principum, facilius Augustum, quam Cæsarem dici posse existimarit; quod vox illa jura vere regia, & monarchica; & imperii amplitudinem significarit, in dissert. de Sacro Imp. Rom. pag. 40. & 41. Sive autem a cæsarie, sive a cæso matris utero, sive ab elephanto, qui Maurorum lingua *Cæsar* dictus, vocis originem

nem repetas, nihil eminentiæ peculiaris ei inest. Deinde Dio Cassius lib. 53. de titulis Imperatorum differens, testatur, appellationem Cæsaris *nihil peculiaris potentie*, sed tantum *successionem stirpis* indicasse. Et tirones norunt, principio hereditarium Augustæ Domus hoc fuisse cognomen, dein ad destinatos in Imperio successores, mox ad ipsos Imperatores, sed Byzantinos maxime, esse translatum, in quorum nummis sæpius ΚΑΙΣ ΑΡ occurrit. *Qua de causa, apud omnes terræ populos, nominatissimum Cæsaris nomen est, & nos, præter omnes alias Imperatorie majestatis notas, eo gloriamur*, scribit Justinianus præf. Nov. 30. Germani vero, quia proprium nomen non habebant, quo Imperator a Rege discerneretur, Cæsaris vocem, prout a Græcis acceperant, civitate donarunt, & Otfridus jamdum *Keisores* voce usus; Anglo-Saxones *Casere* scripserunt, & per *Imperatorem* Latine reddiderunt. Rarius utique, inde a Carolo M. Cæsaris nomen in titulis Augustorum Latinis, publico nomine scriptis, legitur: nec tamen omnino nullum fuit; quemadmodum Goldastus in præfat. tom. 3. Constit. putabat; Ottonis enim & Friderici II. diplomata pauca *Cæsaris invicti* meminerunt. At Ludovicus Bavarus perpetuum ejus usum, ex ratione civili, introduxit.

§. V.

Quamdiu stetit Imperii Romani decus, Reges victi, cæderati, aut beneficiis obstricti comiter observarunt Augustorum Majestatem, nec affectare ausi sacros Imperatoris aut Cæsaris titulos, quibus orbis dominium coherere credebatur. Plena quippe est historia Regum, quibus Senatus Populusque Romanus sceptræ & diademata dono misit, quivæ regnandi auspicia ab Augustis petierunt, aut domo extorres in patriam ditionem restituti sunt Aquilis Romanis. Hæc est *Latia quæ servit purpura ferro*, apud Lucanum vii. Pharsal. 228. & Seneca sub persona Neronis, de his lib. 1. de clem. c. 1. *Quas nationes funditus excindi, quas transportari, quibus libertatem dari, quibus eripi, quos Reges mancipia fieri, quorumque capiti Reginum circumdari decus oporteat,*

teat, quæ ruant urbes, quæ oriantur, mea jurisdictio est. Verum ex quo orbis Romani partes, aliæ bellis, aliæ pactio-
nibus & derelictione in gentium & regum jura transierant; nihil vetabat, quin hi eadem sibi nomina arrogarent. Sic Herulos, Hunnos, Langobardos gentile quidem regis nomen magis delectabat, quam e mentita Cæsaris & Augusti familia: quin Gotthorum Principes, judices, quam reges dici malebant, quia hæc potentia, illa sapientia vox, auctore Themistio orat. x. in Valentem. Theodoricum autem Gothorum Regem Procopius lib. 1. Hist. Goth. Verbo invasorem, reipsa Imperatorem, vocat, & clarissimis, quibus id nomen obtigerat, parte nulla minorem. Immo Goldastus in præfatione ad Jacobum Britannia Regem, tom. 3. constit. Imp. observavit, in publicis Edictis & Rescriptis Latinis, eos subinde Imperatoris & Imperii majestatem, Augustam dignitatem, purpureæ adorationem sibi tribuisse; Attilam mundi Imperatorem dictum, Odoacrem Cæsarem Ottnitum, Theodoricum Imperatorem Ravennensem: & quæ id genus plura, sine auctore, ibidem traduntur. Hoc certum est, odio plus quam Vatiniano Gothos utrosque adversus Imperii rudera flagrasse, unde barbaræ, id est Alaricianæ vastitatis & feritatis meminit l. 20. C. Th. de tiron. & l. 2. C. Th. de littor. & itin. cust. qua viribus omnibus id agebant, ut sua dignitatis vocabula, in locum pristinorum subvherentur. Audiamus Athaulfum, apud Paulum Orosium, ejus temporis scriptorem, ita loquentem: Postquam imprimis, inquit ardentem inhiavimus, ut oblitterato nomine, Romanum omne solum, Gothorum imperium & faceremus & vocaremus; essetque Gotbia, quod Romania fuisset: fieretque nunc Balthus, quod quondam Cæsar & Augustus. Hic autem Ataulfus, Veligothorum Rex, quem nos Adolphum vocitamus, postquam Italia ac Urbis Romæ spoliis onustus, una cum uxore sua Placidia, Theodosii Imp. filia, primum in Galliam Narbonensem, inde in Hispaniam transgressus, ibique regiam fortunarum suarum sedem liberam, nullique mortalium obnoxiam delegit, se-
mina

mina dignitatis Imperialis jeciffe videtur, quæ sub ejus ſucceſſoribus nimum quantum, etiam ad ipſum Imperatoris nomen increvere, ut ex LL. Wiſigoth lib. 12. tit. 2. §. 13. colligi poteſt. Hieronymus etiam Hivera in no- tis ad Luitprandi Chron. n. 10. tradidit, Veſigotho- rum Reges, imitatione Imperatorum Conſtantinopolitano- rum, Flavios ſe appellaffe, & curru eburneo, purpura, iis- demque domus & aulae officiis uſos; parem quoque in mo- dum coronatos, inunctos & Majeſtatis veneratione decora- tos; denique nihil omiſſiſſe, quo magnificentiam ſuam au- gerent. Pauca eorum diplomata ſincera nobis reliquit Mau- rorum infeſtatio: ſed a ſeptem retro ſæculis documenta Imperatorii nominis, ab Hiſpaniæ Regibus ſumti, ſuper- ſunt. Sancium Magnum, *Hiſpania Imperatorem* ſe nomi- naſſe, quia Caſtellam, Aragoniam, Navarram & Canta- briam, ſummo jure poſſidebat, ſcribit Albericus in Chron. A. 1031. Dein Alphonſus VI. eandem dignitatem ſibi vindicavit: nam Synodus ſub ipſo celebrata dicitur, *regnante glorioſiſſimo Adeſonſo Imperatore*. Et quinque hujusmodi chartas, a ſe viſas, Sandovallius in ejus hiſtoria teſtatur. De Alphonſo VII. Rodericus Toletanus Archipræſul lib. VII. c. 7. *Rediens Legionem impoſuit ſibi imperii diadema, & ro- catus fuit deinceps Imperator*. Plura alia teſtimonia, quibus idem decus, & huic, & Alphonſo VIII. & Ferdinando III. & Alphonſo X. aſſeritur Chiffetius vindic. Hiſpan. c. XI. & du Frene in gloſſario voce *Imperator* collegerunt. Qui- bus addendum eſt Alphonſi IX. memorabile diploma, quod integrum, ex archivo Dionyſiano, eruditiffimus Mabillon ſuppeditavit lib. v. de re diplomat. tab. 45. cum ſubſcri- ptione: *Ego Adeſonſus, Dei gratia, totius Hiſpaniæ Impera- tor*.

§. VI.

Angliæ porro, vel Magnæ Britanniæ Reges, inde a pluri- bus ſæculis, Imperatoris titulum ſibi ſumſiſſe, vel ex eo patet, quod Edgarus, aliique Anglo-Saxonici Principes,

Al-

Albionis & Anglorum Basileos se passim scripserunt; quæ vox tum Imperatorem sonabat. Chartam de Clericis uxoratis, ita subscriptam: *Ego Eadgar, Basileus Anglorum, & Imperator Regum Gentium*, laudavit du Frene d. l. alias in voce *Basileus*; quocum Seldenus jungatur part. 1. de tit. hon. c. 2. §. 5. Antiquæ hujus eminentiæ memoriam servarunt Reges, ab Eduardo Confessore omnes, qui in sigillis & nummis globum, Imperatoris insigne, manibus suis tenent. Ipsum nomen resuscitare conati sunt mercatores Londinenses, in monumento *Carolo II Cesari Britannico* posito; magis autem ipse Rex Jacobus; dum in Edicto *Imperialem coronam* ad se devolutam, & se pro *Imperiali potentia* statuere scripsit, nec non nummum argenteum cudi curavit, cum hac inscriptione: JACOBUS PRIMUS BRIT. CÆ. AUG. HÆ. CÆSARUM, quod ex litteris Mss. Lingelshemii, Hertius memoriæ prodidit in elem. prud. civ. p. 1. f. 2. §. 3. De Galliæ Regibus præstat silere, quam pauca loqui; adeo frequenter, non privati tantum rerum Francicarum scriptores, sed Græci etiam Imperatores *Augustorum & Imperatorum* titulum ipsis tribuerunt, id quod Auctor *des lettres d'un Francois*, ex priscis Dagoberti, Ludovici, aliorumque chartis ostendit. Imo ipsosmet Reges, Romanorum Principes, & *Romane terre Imperatores* sese dixisse, ex Andrea de Quercu, docuit clarissimi nominis Jurisconsultus, Jac. Gothofredus in proleg. C. Theod. c. 7. & de jure præced. p. 1. c. 3. n. 25. Apud Zyllesium, in Sancto Maximino, Pipini sigillum (vix tamen genuinum) laudatur, in quo PIPINUS IMPERATOR. Ludovico XII. post occupatum Ducatum Mediolanensem Lugdunenses nummum obrulerunt, cum hac epigraphe: FÉLICE. LUDOVICO. RÈ. GNANTE XII. CÆSARE ALTERO. Sed Turcicus & Fessa-Maroccanus Imp. titulum Imperatoris, *Bodeshair*, Gallorum monarchis tribuunt, uti præter recentiorum temporum historiam, docet Limnæus Notit. Regn. Franc. l. 2. c. 1. Verum reges omnes memorare labors foret, qui Im-

peratoris nomen & insignia usurparunt, ad summam imperii & dignitatis plenitudinem indicandam. Ipsi Byzantini Bulgarorum Regi ^{Βασίλειος} titulum detulere, uti est apud Scyllitzem pag. 623. & Luitprandum in Legatione, ubi *Petri Bulgarorum Vasilei* meminit. Justinianus Arethæ, Saraceno- rum duci, idem dedit, teste Procopio lib. 1. belli Persici. Rabanus etiam in epistola ad Notingum Veronensem, statim sub initium, Ludovicum, Germaniæ Regem, Imperatorem vocat: *Nuper quando ad serenissimum Imperatorem Ludovicum, in transitu expeditionis hostilis, in pago Logana venisti.* Heraldus denique, Daniæ Rex, jam olim in saxo Jutico, non longe ab urbe Vedila, Cæsarem se appellavit, apud Steph. Stephan in not. ad Saxon pag. 204. Hodie autem rarius est, ut horum regnorum Principes sibi id nominis tribuant, quia usus, optimus ambitiosorum magister, non nisi apud populos, qui nec modum nec finem titulorum norunt, assurrexit.

§. VII.

Causam hujus rei, si quis requirat, in promptu est: quia exteri Principes ejusmodi titulos conferre non tenentur, nisi conventio expressa, vel longa possessio antecedit. Cum enim major apparatus ceremoniarum, & Legatorum existimatio, aliæque prærogativæ ejusmodi nominis mutationem comitari soleant, non poterit sane quis sola tituli usurpatione, exteris gentes invitas, ad eum sibitribuendum, adigere, aut ejus denegationem injuriam interpretari, ut contra Pufendorfium, Titius recte observavit ad lib. 11. de offic. c. 6. §. 13. Enimvero licet regnorum potentium & præstantissimorum per se justior & magis intensa sit existimatio, nil tamen inde, nisi jus imperfectum & aptitudo quædam, foris honorem titulumque majorem recipiendi, minime autem prærogativa producitur; ob regulam, pares ut pares tractandos esse. Quemadmodum paterfamilias domesticis suis legem compellationis, & notas honoris præscribit, sic Princeps subjectis: at sicut illius præceptorum

Z

vis

vis intraxædes, sic regionum titulorum modus intra territorium terminatur. Honos extra commercium positus est, & omnem respuit coactionem, ut liberalitas, misericordia, aliaque ejusmodi; quæ ex amore virtutis affectuque interno proficisci debent: hunc vero regere penes alios non est. Et quamvis plerique honorum aucupes titulis, signis & ceremoniis externis, coactis licet, frigidis, & tantum non mortuis contenti esse, & velint & debeant; sufficit tamen, quod inter eos, qui in statu naturali vivunt, ordo arbitrariorum sit, nullaque lex obtineat, ex qua alter alteri loco cedere teneatur. *Si quid ipsi a Cæsare opus esset, sese ad eum venturum: si quid ille se velis, illum ad se venire oportere.* Ariovistus, Germanorum Rex, Cæsaris legatis respondebat. I. d. B. G. c. 24. Unicum titulorum, & derivatarum ex iis præcedentiæ, inter Gentes & Respublicas, fundamentum est consensus tacitus vel expressus: quicquid ab hoc declinat, superbiam & morum corruptionem olet, maximamque ordinis & decori perturbationem parit, & bella minatur. Sæpe metus potentiae, spes lucri, fœdera, superstitio, aut adblandiens commerciorum incrementum consensum expressum extorquent. Aliquando consuetudo instar legis est; & ex longæva possessione tacita reliquorum approbatio elicitur. Ille demum titulus vere est titulus, qui non domi tantum utentis arbitrio sumitur, sed ab exterorum primis & secundis, in litteris, legationibus, actu & scriptura formali tribuitur. Hac regula, tanquam Ariadneo filo, intricatas quasvis id genus controversias feliciter explicare licebit, de quibus acerrimis studiis huc usque certatum fuit. Qui ante Jacobum Gothofredum, hoc argumentum, eique vicinum, de præcedentiâ, tractarunt, certis principiis non sunt innixi; sed prout libido iis auspiciis fecit, aut amor patriæ, vel spes præmiorum, ita acti sunt in transversum. Plerisque fraudi fuit, quod contentiones de dignitate fœdas sæpe, & insipientes eorum, qui superiorem habent, a controversiis Principum, qui in statu naturali soli Deo subjecti,

non

non fatis diffinxerunt. Quod fi ad praxin refpiciamus, Hobbeſii ſententia non ſpernenda videtur, qui omnia honoris & titulorum fundamenta ad potentiam revocavit, in Leviath. c. 10. Haud parum enim momenti adfert, ſi jura e vagina derivari, & cedere nolentibus, triginta legiones monſtrari poſſunt. Sed quia omnis metus cum odio eſt conjunctus: quem autem quis odit, cum perire cupit; igitur ſolus armorum terror, pro honoris exhibendi argumento, venditari non poteſt, quemadmodum Diaboli exemplo Puſendorf monſtravit lib. viii. de Jure nat. c. 4. §. 13. & 18. Obſignabo hanc demonſtrationem verbis Senatus Lithuaniz, apprime ad argumentum noſtrum ſpectantibus, apud Albertum Kojalowicz ad A. 1550. *Quod Czaris titulum conferre, neque eſſet Ivani eum ſibi arrogantis, neque unius alteriusve Principis aſſentantis, neque arbitrii regii: indigere omnino eam rem concordie omnium Principum conſenſu.*

§. VIII.

Ut vero paritas illa Regum & Rerumpublicarum, magis appareat, talis eorum ſtatus naturalis menti proponendus eſt, qualem antiqui fabulantur in cœlo fuiſſe, antequam majeſtas oriretur. Tunc enim par erat omnis honor, & unusquiſque pro lubitu primum locum occupabat; ut Polyhymnia apud Ovidium lib. v. Faſt. eleganter proponit:

Sæpe aliquis folio, quod in, Saturne, tenebas,

Auſus de media plebe ſedere Deus.

Quæ vero prælationis fundamenta vulgo allegantur, ab amplitudine ditionum, regni antiquitate, ſplendore titulorum, aut qualitate poteſtatis petita, admodum fragilia & lubrica eſſe, docuit Puſendorf lib. viii. c. 4. §. 15. ſeqq. Pariter enim ac navis ad eam magnitudinem pervenire poteſt, quæ regi nequeat; ſic latifundia regionum, & hominum numerus adeo augeri poſſunt, ut unum regimen non ferant. Auguſtus, in libello poſt mortem ejus in Senatu lecto, prudens conſilium dederat Romanis, coercendi intra terminos imperii: id quod quum ſucceſſores e-

jus negligerent, eo magnitudinis excrevit, ut viribus suis conficeretur. Profecto ut manus nostræ expeditius recipiant, quam continent: ita difficilius est, provincias tueri, quam facere; viribus parantur, jure retinentur. Grotium vide lib. 11. c. 22. §. 13. & lib. 111. c. 15. §. 7. Adeo autem jus *regium* inter Rectores civitatum cessat, ut nec civitas popularis, seu summæ ejusdem potestatis & majestatis compos, in se videatur dignitate inferior esse civitate monarchica; licet in illa nemo unus reperiat, qui cum Rege comparari possit. Ex eodem æqualitatis principio manat, quod Reges se invicem & Respublicas fratres appellitant hodie, & frequenter olim nominarunt, licet consanguinei non essent. Notus est lapis vetustus, avorum ætate, e ruinis armamentarii prope Catwicum erutus, cum epigraphe: GENS. BATAVORUM. AMICI ET FRATRES ROM. IMP. Achabus etiam, Rex Israelis, Benhadadum Syriæ Regem *fratrem* vocat 1 Reg. 20. v. 32. Constantinus M. Saporem, Persarum Regem, *fratrem* compellat apud Euseb. lib. 14. de vita Constant. sicut vicissim, Sapor Constantium Cæsarem, *fratrem suum* salutavit, apud Ammian. Marcellinum l. xvii. c. 5. Valesius ibi in notis, du Frenius ad Annam pag. 274. Bignonius ad Marculf. lib. 1. c. 9. & Mabillon lib. 11. de re dipl. c. 2. n. 15. tam ex sacris, quam profanis scriptoribus, multa exempla consignarunt; ad quos, horum studiorum principes, adire licebit, junctis Ampl. Cuperi in Lactantium notis pag. 141. Ad nostrum institutum inprimis pertinet, quod Moschorum Reges, ad alios scribentes, jam olim eodem dulci fraternitatis nomine, delectati fuerunt. Refert enim Sigismundus Baro, pag. 12. comment. rer. Moscov. eos titulis tribus circulis triangulo inclusis pro insignibus usos: quorum primus in supremo circulo continebatur, his verbis: *Deus noster Trinitas, quæ fuit ante sæcula; pater; filius & Spiritus sanctus, non tamen tres dii, sed unus Deus in substantia.* In secundo erat titulus Imperatoris vel Regis italicus,

his, cui scribebatur, cum adjectione *Fratri nostro*. In tertio titulus Magni Ducis Moscoviae, quo se Regem & heredem, ac dominum totius Russiae orientalis & meridionalis dicebat. Quod attinet titulum Fraternitatis, ille Germanorum si-
lo communi ignotus, nec nisi inter illos usitatus fuit, qui ut in conviviiis nostris fieri solet, hanc velut singularis amicitiae tesseram sumserant. Sed apud externos transit ille in formulam, usque adeo ut etiam inter Caesarem & Moschum usurpetur, scribit Caesarius Furstenerius, sive Ill. Leibnitzius de jure su-
prematu c. 24. Cujus etiam in sequenti cap. 34. propo-
lita observatio hisce temporibus expendi meretur; non esse in Regum & potentissimorum Principum potestate, ut vul-
go credi solet, uni Principum, quantos velint, honores, titulos, & praerogativas tribuere, easque alteri paris condi-
tionis petenti negare: licet enim hujus imperfectum jus sit honores postulandi, non tamen publicam inaequalitatem, cum dignitatis suae contemptu, ferre tenetur, quia honos in
comparatione consistit. Omnes Reges pares esse, ac si quae Gallo honoris ac ordinis praerogativa tributa sit, id a Pontifici-
bus Rom. profectum, quorum auctoritati pridem Anglia renun-
ciaverit, Gallico legato, Pontificis Romani concessionem ja-
ctanti, Anglus reponebat apud Pufendorf lib. vii. Rer. Succ. §. 137. ad A. 1635.

§. IX.

Verumenimvero licet Rectores civitatum, in statu mere naturali considerati, pares sint, jure gentium tamen inaequalitas introducta est; qua turbata, rerum & nominum fœda confusio oriatur oportet. Plinius hacpropter lib. ix. epist. 5. Tironem suum laudat; quod eum modum tenebat, ut discrimina ordinum dignitatumque custodiret; quæ si confusa, turbata, permista sint, nihil, ait, ipsa equalitate esse inaequalius. Jus gentium, appellamus, cum Jurisconsultis, quod necessitate exigente, & mutuo quasi consensu, ratio constituit, ac usus firmavit. *Ευγενία βίη και Χρητις, Inventum usus &*
temporis Dio Chrysostomus descripsit orat. 76. Hujus sciencia

tia aulica hætenus fuit, nec satis exculta in umbris scholarum; adeo autem scitu necessaria est, ut de bello, & pace; de fœderibus & legationibus sine ea prudens iudicium ferri non possit. Ab hoc tota etiam quaestio, utrum Imperatoria an Regia dignitas sit maior? ut omnis alia inter diversos Principes, pendet. Sunt qui nonnisi soni differentiam statuunt, inter Imperatoris & Regis nomen; prorsus ac Marcianus aiebat, inter pignus & hypothecam, nominis tantum sonum differre. Galli inter hos familiam ducunt; sed Advocatus Parisiensis, Auberius impudentissime omnium, Augustissimi Cæsaris Majestatem & titulum Imperatoris deprimere conatus est, in libro Gallice scripto: *De Præcedentia Regum Franciæ, Impératorem supra & Regem Hispaniæ.* Cramben autem aliorum recoxit adulator, & præter convitia, vix quicquam adjecit; quibus repellendis jam homines docti diligenter elaborarunt, nobisque otium fecerunt. Inde enim usque a nato Salvatore, Cæsaris, Augusti & Imperatoris tituli, auspicio divini, elogio maximi fuerunt; ex qua tot sæculorum consuetudine & constante Romanorum, Francorum, & Germanorum possessione, jus inter gentes enatum est, quod argutis nugis, & etymologiis Grammaticalibus haud quaquam tolletur. Contrarium præterea res ipsa loquitur, quando omnium nationum, etiam barbarorum, ut vidimus, & Gallorum Reges potentiores, Imperatoris nomen summis desideriis affectarunt; non alia de causa, quam quod venerabilius & eminentius quid, in eo esse arbitrabantur. Vid. Steph. Baluzius in not. ad Petrum de Marca de concord. Sac. & Imp. p. 927. Accedit & hoc, quod alia Imperatorum, quam Regum, supremæ dignitatis insignia fuerunt. Erat hæc ambitio Cæsarium gentilium, ut in nummis cum orbe seu globo se describi curarent, quo universi orbis imperium indicaretur. Christiani vero utriusque Imperii Augusti, in pietatem id convertentes, globo crucem imposuerunt, in quam oculos defigerent. At quotquot Imperatoris titulum adoptarunt

Re-

Reges, pomum inter imperii sui symbola adsciverunt. De Regibus Aragonensibus Gesta Innocentii III. de Anglis Walsinghamus; de Danis Hogembergius, de aliis alii id testantur. Certum denique est, Imperatores inter & Reges, hanc differentiam intercessisse, quod illorum diademata clausa, horum aperta. Sic enim Anna Comnena lib. III. Alexiad. *Imperatorium diadema plane instar hemisphæri, undique concavi ac clausi, omni æque ex parte, caput amplectebatur, margaritis partim subsidentibus, & quasi operi intextis, partim extantibus, & foras pendulis, speciosissime ornatum. Nam utrimque ad tempora, ex margaritis ac gemmis pluribus compacta monilia pendebant verberabantque: atque id eximium & proprium insigne Imperatorie potestatis erat.* Similia habet Auctor Ceremonialis Romani, qui Pio II. Papæ fuit a secretis, lib. I. sect. 5. c. ult. *Differt forma coronæ Imperialis ab aliis: nam ea sub se tiaram quandam habet, in modum fere Episcopalis mitræ; humiliorem tamen, magis apertam, & minus acutam: estque ejus apertura a fronte, non ab aure: & semicirculum habet per ipsam aperturam aureum; in cujus summitate crux parvula eminet. Eam tiaram aliæ Coronæ non habent.* Rursus antiquum Chronicon Flandriæ, Gallico sermone scriptum c. 57. ubi de coronatione Imperatoris Henrici Lucelburgensis *sa couronne*, inquit, *surmonte toutes les autres: car entre celles des autres Rois, elle est seule couverte par dessus.* Quænam discriminis hujus sit origo, & ratio, quidve hodie intersit, non valde facit ad rem; quia Russorum Princeps, non corona, sed mitra purpurca utitur, adeoque in symbolica, quam diu meditor, Jurisprudentia id excutendum erit. Interim Carolus Paschalius lib. IX. Coron. c. 17. & 18. videatur. Nec tamen omitto, quod hujus formæ coronam, Reges quicunque, una cum Imperatoris titulo sibi imposuerunt. Antiquorum & Austriacorum Hispaniæ Regum coronas, globo cum cruce fastigiatas, clausasque expressit Chiffletius Vind. Hisp. pag. 165. Angliæ coronam ab Henrici IV. temporibus, arcu vel sphaera clausam,

lam, (*archée en croix*, ait Froissardus,) quæ nunc etiam in parlamentis recentioribus, *imperialis* vocatur, Seldenus delineavit p. 1. de tit. hon. c. 8. pag. 179. Franciscus I. Galliarum Rex, simile diadema sibi regnoque suo conciliavit: sive ut a Ducibus & Comitibus discernetur, qui coronati in nummis ejus apparent ævi: sive æmulatione Regum Angliarum, quos dignitate inferiores censebat, quæ Frenii sententia est, diss. 24. ad Joinvillam pag. 299. sive deinceps, ut paria faceret cum Carolo V. orbique ostenderet regnum se possidere absolutum, de quo dicere liceat, quod Corippus lib. 3.

- - - - - *medias inter super omnia gentes,*

Regna micat, claro tantum uni subdita cælo.

Atque hæc quidem sufficere poterant, ad prærogativam Imperatorio titulo vindicandam; auctarii tamen loco, singularem subjectionem Joannis Cinnami locum lib. 11. cap. 12. cujus verba, ex versione du Frenii, sunt quæ sequuntur: *Gaudent singulari sua prærogativa ejusmodi dignitates, ab Imperatorio fastigio, quod ceteris præeminet, & a quo profluunt, quodammodo secretæ. Comitem enim Dux præcellit; Ducem vero Rex, Regem Imperator: & cum illis, quod minus est, suapte natura potiori subjaceat, belli cum eo partitur onera, in ejusmodi rebus cetera subditus. Quapropter quem Græci *Βασιλεα* vocant, Latini Imperatorem appellare solent, supremam illius potestatem innuentes: Reges autem, quotquot secundum sortiti sunt ordinem. Hæc apud illos habetur distinctio.*

§. X.

Quod si nunc ea, quæ diximus, ad Russorum monarchiam applicemus, statim constabit apud omnes, ipsum libertatis naturalis, titulos augere, & Imperatoris nomen, in regnis terrisque suis, adsciscere potuisse. Neque enim sui tantum juris est, servitute Tatarorum excussa; sed tria regna, cum multis ducatibus & provinciis ditione sua tenet, Regesque finitimos uno Sultano excepto, potentia superavit. Subiectos adeo habet obsequentes, ut vere, & sine

CX-

exemplo Regum Europæorum, tanquam certus rerum ac personarum dominus, iis imperare dicendus sit. Qui scripto ipsum adeunt, diminutiva nominis appellatione se insigunt, loco Petri Petruske, Iwaske pro Joanne se vocantes. Omnes fatentur, Dei voluntatem per Principem promulgari, quem Dei clavigerum, & cubicularium appellare solent. Si quis porro dotēs illas quatuor in ipso requirat, quas Cicero pro Lege Manilia cap. 10. in belli Imperatore inesse oportere existimavit; scientiam rei militaris, virtutem, auctoritatem, felicitatem; tanta sunt in hoc uno, quanta in barbaris Imperatoribus Mahumedanis, quos aut vidimus, aut audivimus, non fuerunt. Quam ridiculis titulis & nugis bullatis vicini ejus Persæ turgescant, supra dictum. Tataři Principes suos Cham vocant, id est Imperatores, ut auctor est Vincentius Belyacensis lib. 32. c. 32. *Qui est Gog Cham, id est Imperator, vel Rex dicitur, sublimatus est in regno Tartarorum Caanus.* Ut adeo inter has tumidas nationes, & pleraque ex superbia tituli metientes, vix tutum fuerit in magni Knesii, vel Czaris nominibus consistere, quæ Principes, Optimates, & Toparchæ sua fecerunt. Knes enim, lingua Slavonica, idem valet, ac dominus. Князь & Князь apud Pachymerem l. 3. c. 25. & lib. 10. c. 25. *Canesius* apud Magistrum Rogerium de destruct. Hungariæ c. 33. nuncupatur. *Beleknegini* est pulchra domina, apud Ditmarum lib. vii. *Czaris* autem vocabulum, licet Regem significet, regulis tamen tribuitur; unde Michael Fœdorowitzius se *Karthalimicorum* & *Grufinicornum* Czarium dominatorem scripsit. Lithuanix etiam Senatores, ex alia ratione, vocem minus aptam esse censuere; *Czaris* appellationem profiteri solos sectæ Mahometanæ Principes: Lithuanos contra dignitatem Christiani nominis facturos, si communes cum barbaris honores ei tribuant; scribit Albertus Kajalowicz ad A. 1550. Quanquam nimis abjecte tum temporis de Moschorum Principe, ejusque pristino Magni Ducis titulo senserint. Poloni, Regis titulum vel regio similem ei negantes,

Aa

quem

quem ante tot sæcula eorum majores tulerant, in universa Europa. Dixi capite præcedente §. 5. sæculo decimo Russorum Principes, domi Ducis Magni titulo contentos, exteris autem Reges visos fuisse: sed quia dies prior posterior est discipulus, atque alios inter labores ordinarios tumultuaria opera & cursim hæc scribenda sunt, fugiebat me tum insignis locus, in Annalibus Francorum Bertinianis, ad A. 839. ex quo genuinum nomen, quo Rossorum Reges sæculo nono uti sunt, depromam: *Misit etiam cum iis quosdam, qui se, id est, gentem suam Rhos vocari dicebant: quos Rex illorum Chacanus vocabulo, ad se amicitiae, sicut asserabant, causa direxerat.* Cagani vel Cacani vox occurrit passim apud scriptores Byzantinos, quos du Frenius in glossario mediæ Græcit. in ΚΑΓΗΣ, ΚΙΖΗΣ, & Latinit. in *Caganus* laudavit. Gregorius Turonensis, & Paulus Warnefridus Hungarorum Regem, sua lingua, *Cacanum* appellari scribunt. Eadem autem Avarum, quæ Russorum patria fuit Taurica Chersonesus, in qua & hodie *Chaanes*, *Chanes*, & *Magni Canes* dominantur; quam vocem *Imperatorem* notare Pachymeres opportune testatur, . de ΚΑΓΗΣ, ΒΑΣΙΛΕΥΣ, lib. v. c. 4. Latius autem manavit hoc nomen, per crebras terrarum divisiones, & fracta potentia, in Magni Ducis, seu *Knesii* appellationem convertum. Rediit deinde sub Joanne Basiliense cumulatione honos, & agnitione plerorumque Principum, ad statum redactus videbatur, si digniorem successorem reliquisset. Evenit tum, quod Machiavellus prudenter ad Livium notavit: si præpotentem principem alius excipiat, qui non sit tantus, posse eum vel decessoris umbra imperium conservare; sed si vel ipse diuturnioris vitæ fuerit, aut post ipsum alius succedat, qui non insistat vestigiis primi, ut ruant omnia necessum esse. Plane Rudolphus II. Imperator, easdem causas honorandi filium, quas Maximilianus I. ad patrem scribens, habuisse non videtur; quia *Serenissimo ac Potentissimo Duci Theodoro Ivanowitz, Czaro, & Magno Duci Russia &c. salutem & animum benevolum, ac gratulam*

siam suam *Cæsaream* nunciat, in Edicto A. 1594. apud Goldastum tom. 3. Const. Imp. pag. 579. In curia Pontificis Romani, tantum abest, ut Cæsaris titulus sit tributus, ut ea ipsum Czaris nomen perpetuo negarit: Quum enim Alexii Michaelidis legatus, Paulus Meneses, A. 1673. Romanam attulisset litteras Clementi X. non aliter, quam *Romane Ecclesie Doctori* inscriptas, is in responsi epigraphæ *Viri nobilis* compellationem Mosco reddidit: dolentibus tum quidem optimis Cardinalium, spem ingentis fructus præcidi; sed in injuriam Romani Imperatoris id nomen vergere, a Palatinis prætexebatur. Vide Papebroch præfat. ad ephem. Græc. §. 17. De Gallorum more, Carolus Paschalius, Regis in Consistorio, sub initium sæculi præcedentis, Consiliarius, loquatur lib. IX. de coron. c. 22. *Moschum excipio, qui se æquat Regibus, atque adeo se super Reges collocat, cum a nobis sola censeatur appellatione Magni Ducis.* Russi contra satis tenaces fuerunt, tituli Cæsaris, semel obtenti conservandi; nec quicquam temere de prærogativa & honore remiserunt, ut omnes legationes testantur. Fletcher in suo de Rufforum Rep. libro Anglice scripto. c. 5. stilum publicum in coronatione Theodori Juanowitzii observatum, fuisse refert: *Dei Gratia Magnus Dominus & Imperator totius Ruffie.* Supra laudatus etiam Paulus Menesius a Birfodels, Baro Scotus, cum Legati munere fungebatur, *Serenissimi Potentissimique Czaris, omnium Ruthenorum Autocratoris, ablegatum se, ad Imperatorem Romanum, & Electores,* litteris eo datis docuit, auctore Schurtzleischio disp. 45. §. 4. Duo litterarum exempla, in quibus *Michael Federowitz, Dei gratia, Rex, Imperator & Magnus Dux Moscovie* appellatur, sunt apud Victorium Siri tom. 2. lib. 1. pag. 294. & 297. Plane quod in Legatorum suorum receptione foris, & ab exteris domi suæ multa postularint singularia, studiumque conservandi prærogativam domini sui prodiderint, Comitæ Carleolensis, Heinsii, multisque aliorum exemplis ostendi posset. A. 1631. infra dignitatem Principis sui videbatur Duums

viris Russis, si litteræ ejus sacræ, more solito, coram studentibus Belgarum Ordinibus recitarentur; ut Aitzema observavit, p. 1. lib. 11. pag. 1121. Magis lepidum est, quod Pufendorpius narrat in Rebus gestis Friderici Wilhelmi Magni, lib. XIX. §. 54. ad A. 1687. *Legatus Moscoviticus importune circa ceremonias tricabatur, quod præter omnem morem, dextram suam Electoris dextræ jungere vellet. Et quia Elector tunc graviter Potssami decumbebat, nec tanti videretur, Moschum tamdiu detinere, quoad is e morbo se recreasset, proponebatur, ut Elector, in lecto decumbens, ipsum audiret. Quod Moschus non alia conditione admittere volebat, quam ut & sibi lectus juxta sterneretur; in quo ipse mitratus & ocreatus jacens mandata expositurus sit. Solvit tamen hunc nodum, vindice dignum, remittens Electoris morbus, ut plus satis scrupulosum hominem audire posset. Plura id genus addi possent, sed non valde pertinent ad titulum Imperatoris. Ad novum tamen Regum Europæ, quodque difficilimum erit, Cæsaris Augusti & Polonorum consensum impetrandum, quæ non profunt singula, juncta juvant.*

§. XI.

Majestatis titulum omnibus Regibus deberi, nemo facile negaverit, qui didicit, supremam potestatem & dignitatem eo vocabulo exprimi solere. *Amplitudinem ac dignitatem civitatis* Cicero: *regimen in omnia civitatis* Tacitus appellavit. Compellatio ista, primum Reip. Romanæ quasi propria fuit; postea ad Imperatores transiit; deinde Regibus ac Principibus, Pontifici Romano, Archiepiscopis & Episcopis, rarius tamen ante sæculum undecimum, tributa, auctore Mabillone lib. 11. de Re diplom. c. 7. §. 6. Recepta autem Germaniæ consuetudine, non nisi inferior superiorem Majestatis appellatione coluit; unde Imperator Romano-Germanicus, ad externos Reges ipse scribens, non nisi *regiæ dignitatis*, & *Vestræ dilectionis* titulo eos ornare suctus; in foederum autem & pacis tabulis, per Legatos sanctitis, ægrè quidem, sed tamen Ludovico XIII. & XIV. id honoris.

noris concessit. Vid. Instr. Pac. art. 1. & Recueil des traites de paix tom. 111. p. 304. 317. At Leopoldi tempore, non sine fervore, a Petri Alexii legatis, postulatam fuit, ut idem clogium, Principi suo in curia Viennensi conferretur. Et sane Præpotentes Belgii fœderati Ordines, in epistola a. d. 16. Jun. 1663. *Czaream Majestatem*, cum præpotentissimi titulo, Mosco adscripserunt. Eundem honorem ei exhibuit Elector Brandenburgicus in litteris A. 1686. a. d. 22. Febr. apud Lundorp tom. 11. c. 128. pag. 506. & ipse Imperatoris Orator, Baro de Blumberg, Czares fratres ita salutavit, A. 1683. a. d. 28. Maji, apud eundem Lundorp. tom. eod. c. 151. pag. 553. Novissime Anna, Magnæ Britanniae Regina, in litteris A. 1709. Windforii datis, Czarem *Votre Majesté Imperiale* compellavit: ejusque Legatus extraordinarius, Carolus Whitworthius, elegantem suam orationem sic exorsus: *Tres-haut & tres-Puissant Empereur*, & quæ sequuntur. Vide Mercure Historique & Politique A. 1710. p. 375. 378. Polonorum vero Rex non nisi *Serenitatis* vocabulo usus, A. 1688. apud Lunig. tom. 2. negot. publ. pag. 355. & quibus rationibus, gloriose memoriae Leopoldus Augustus, Majestatis titulum negarit, juvabit ex litteris ejus Recredentialibus A. 1685. die 5. Maji, Russorum Ministro exhibitis, intellexisse, quas integras exhibet Cl. Pfeffingerus ad Vitriar. lib. 1. tit. 5. Verba huc pertinentia sunt, quæ sequuntur: *Ut autem Majestatis, titulus, Serenitatibus vestris, etiam per litteras nostras Cæsareas adscribatur, adeo extra Nostram est potestatem, tantique in Imperio Romano momenti, ut sine ejus Electorum, Principum & Statuum offensione nec minui, nec a Romano Imperatore cum Regibus communicari queat: utpote unico Imperiali fastigio, ad quod Nos soli in orbe Christiano per divinam Clementiam evecti sumus, ab omnibus mundi rectoribus, tot ab hinc seculis, sine vicissitudine, summa semper cum veneratione debitus ac attributus &c.* Deinde quoque ex Latinis litterarum ad Nos, a Serenitatibus Vestris datarum ac Plenipo-

tentiae translationibus, animadvertimus, *translatorem linguae, seu Rutenaë, seu Latinaë, non satis gnarum, Imperatoris compellationem, ob jam enarratas easdem, quæ Majestatis titulum, reliquis mundi universi Potentatibus & Regibus communicare prohibent, rationes, nulli in orbe Christiano, nisi unico & soli Romanorum Imperatori debitum, Serenitatibus Vestris attribuisse; verbisque Imperialis ac Imperii, consuetomote, hinc inde usum. Quod quidem etiam, citra Serenitatum vestrarum præscitum accidisse, nulli dubitamus. Attamen cum nec nobis desint, qui linguam Ruthenicam in Latinam aut Germanicam vertant, haud prætereundum duximus, satius in posterum, expeditiusque fore, cum Serenitates Vestrae litteras suas ad Nos in lingua sua Ruthenica, sine translatione transmiserint, ne, quod itidem gravissime ferremus, ejusmodi translationes, ad evitandam præjudicii sequelam alioquin remittere necesse foret.*

§. XII.

Satis ex his conjicere licet, quid spei in Aula Viennensi reliquum sit: quod si autem, mutata rerum facie, aliquando eveniat, ut Sacra Cæsarea Majestas, Russorum Cæsarem agnoscat, nemo ambiget; illum per excellentiam Imperatorem, Cæsarem, Augustum mansurum, & reliquis porro Imperatoribus prælatum iri. Fundamenta hujus prærogativæ a priscis Juris publici Doctoribus, in bestiiis Daniclis, & quarta Monarchia; vel in dominio orbis & continuato Imperio Romano quærebantur; sed his saniores diu repudium misere. Multum profuit superstitio, a Pontificibus Romanis injecta; qui Imperatoris majestatem augendo, suæ inserviebant. Hinc *imperium sacrum*, & Imperator *caput orbis Christiani* dictus, ut dominium Ecclesiasticum universale stabiliretur. Ex hoc capite jus Concilia convocandi, & ducendi exercitum adversus infideles, Imperatori tributum. Sed & multi Europæ Reges, ex Germania trahunt ortum, Burgundiæ, Bohemiæ, Hungariæ atque Daniæ principes regiam dignitatem ab Imperatoribus Germanicis consecuti sunt: nec mirum ergo, si clientes & Vassalli patronum suum

co.

coluerunt, nullumque illustrius nomen, immo in rebus humanis unum hoc, plus quam humanum, censuere. Tanta sane illius Imperii fuit reverentia, ut exteri etiam Reges, nullo nexu devincti, ejus dignitatibus & honoribus honestari cuperent, & Clodovæus, Pippinus ac Carolus M. Consulis & Patricii nomine superbi memorentur. Accedebat vasti Imperii potentia, satis metum incutere apta; quia ex tot Electorum, Principum & Statuum potentissimorum viribus componitur. Augustiorem præterea, ceteris Europæ regnis, imperialem dignitatem fecit sacræ unctionis character; & nominis Romani cultus; Petrique beati memoria & sedes, quæ in capite imperii & provincia matrice sita credebatur. Quam in rem notatu digna sunt verba Concilii Romani, habiti sub Agathone, in epistola synodica ad Constantinum Pogonatum, relata act. iv. sextæ syn. A. 680. *Nos autem licet humillimi, summis viribus innititur, ut Christiani Imperii respublica, in qua beati Petri Apostolorum Principis sedes fundata est, ejus auctoritatem omnes Christianæ nobiscum nationes venerantur, & colunt, per ipsius B. Petri Apostoli reverentiam, omnium gentium sublimior esse monstretur.* Hinc præcessit omnes Reges; etiam Imperatore Græcorum major habitus Romæ, ejusque exemplo apud alios Europæos. Auctor Vitæ Urbani V. apud Baluzium vit. Pap. Avcn. pag. 388. *Anno 1369. ad Urbanum Papam Romæ existentem accessit Johannes Palæologus, Imperator Græcorum; fuitque receptus honorifice, ac tractatus per dictum Papam, & Cardinales paulo minus, quemadmodum si fuisset Imperator Romanorum.* Ipsi Turcæ Imperatorem Augustum, ex Principibus Jesus nomen profitentibus primarium, & gentium Christianarum defensorem, & administratorem justitiæ appellant, ut Busbequius & Leunclavius testantur. Nec opus est, ut Bartolum ad partes vocemus, qui hærescos infamia notare non dubitavit eos, qui imperandi jus in omnes populos Imperatori negarent: aut ad Baldum provocemus, cui Augustus, tanquam stella matutina, in medio nebulae meridio-

na-

nalis, inter omnes Reges eminere dicitur. Vel sola enim septingentorum annorum possessione, Cæsarum Germanicorum prærogativa clara in luce collocatur; neque id, opinor, agit sapientissimus Russorum monarcha, ut eam diminuat, aut in dubium vocet. Animus ejus excelsus maximarum rerum species appetit, nec lente generositatis indicia promit; at impossibilia sectari, ut Bias aiebat, morbum animi esse, agnoscit, & quancunque quis se ipsum æstimet, tanti tamen haberi, quanti ab aliis æstimatur. Ejus utique & omnium moratiorum calculo damnatus est Johannis Basilidis fastus, qui non modo se Imperatoribus parem, sed etiam superiorem videri velut, nomen suum & titulum semper Imperatorio præponens, sive loqueretur, sive scriberet, ait Sigismundus comm. rer. Moscov. pag. 13. Imagini ejus A. 1551. pictæ; versus sequentes inscripti leguntur apud eundem:

*Russorum Rex & Dominus sum, jure paterni
Sanguinis: Imperii titulos a nemine, quavis
Mercatus prece vel pretio: nec legibus ullis
Subditus alterius, sed Christo credulus uni,
Emendicatos aliis aspernor honores.*

§. XIII.

Coronidis loco, una *Semper Augusti* nota, Imperatori Romano Germanico vindicanda erit, quam Reges, quotquot intra vel extra Europam, Imperatoris titulum affectarunt, & usu obtinuerunt, necdum suam fecere. Idem enim adhuc obtinet, quod suo tempore Orosius scribebat lib. vi. c. 20. *Hoc nomen cunctis antea inviolatum, & usque ad nunc ceteris inausum dominis, tantum orbis licite usurpatum apicem declarat Imperii.* Uni quippe Imperatori Romanorum, præcipui indicio, hoc nomen deberi visum fuit, quo aliud non est sanctius, excelsius aut veneratione majus. Nec alia appellatione magis commoda, a dominatoribus barbaris distingui poterat Principum Christianorum sacratissimus, idemque augusta dignitate summus, & maximus Imperator. Cohæret etiam illa

illa firmiter imperio Romano; cui per Octavium est acquisita, & ad omnes ejus successores, valido & sempiterno jure, propagata. Tiberius, Cajus, Claudius, Severus & Caracalla, vix semel & iterum, in nummis *Imperatoris* titulum admiscere, rarissime in Constantinopolitanorum nummis conspicitur; sed *Augusti* cognomen omnibus placuit; quo jamtum, dum colebant terras, consecrati, & quasi Deorum numero adscripti, supra communem naturam æstimabantur. *Semper Augusti* nomen paulo recentioris usus est, nec ultra Diocletiani ævum; cui tamen assentatores, inter alias voces, per quas hi tempore tanto, mentiti dominis, *Æternitate* & *Perpetuitate* Augustis adscripta, præluferunt. Tritum autem est, per ^{non} voces illas copulatas fuisse, ut *semperlenitas*, apud Comicum; *semper-parens*, apud Nasonem; & alia quæ Schottus collegit lib. 1. nodor. Cic. c. 16. & 17. Præterit quidem illud tempus, pagana caligine involutum, quo templis & flaminibus Principes culti, nec tamen ideo necesse erat, ut Germanico idiomate, eum qui *perpetuo augeret imperium* interpretarentur: quia Christiani Augusti, nostra etiam ætate, præ ceteris sunt venerabiles, auspicio divini, re sacri, exemplo sanctissimi; & tam proprium *Semper Augusti* nomen habent, quam *Christianissimi* Galliarum, & *Catholici* Hispaniarum Reges. Unicum quoque hunc esse titulum, quo inter cunctas nationes, sine ambitione, Imperii caput gloriari possit, singulari dissertatione Schurtzschischius ostendit; ipsique Augusti hoc decus, in tractatibus pacis Westphalicæ, fortiter sibi, contra Gallorum cavillationes, asseruerunt. Finiam verbis Ausonii in panegy. ad Gratian. *Nulla est quidem contumelia secundi, sed ex duobus gloria magna prælati.*

T A N T U M.

B b

DIS.



DISSERTATIO QUARTA, DE PERPETUA FEMI- NARUM TUTELA.



Omnis materia, de Tutelis impuberum, satis diligenter, ex jure Romano & moribus, excussa est & adornata; hodie- nus etiam mulierum curator decora Saxorum ingenia exercuit: at feminas viripotentes, & annis viginti quinque majores, in perpetua tutela Romæ vi- xisse, in vulgus cognitum esse, non puto; certe qui opera professi id ostenderit, nemo adhuc repertus fuit. Ipse Guilielmus Budæus, at quantus vir, in commentariis linguæ Græcæ pagina 50. fluctuans scri- bebat; *Ut autem Atheniensium jure, sic etiam fortasse Roma- norum, feminis tutores olim dabantur, sine quorum auctoritate, nihil constituere dotis poterant.* Quapropter operæ pretium esse duxi, si nobile hoc antiquæ Jurisprudentiæ caput sub incudem vocarem; Sexusque infirmioris privilegium, an onus sepultum, ex veterum ruinis restaurarem. Quamvis enim id egerit Tribonianus, ut tutelæ hujus vestigia e Pandectis eliminaret; nonnulla tamen manus ejus evaserunt, quæ Vir summus, Jacobus Cujacius sagaci ingenio investi- gavit.

gavit. Alii alia subsidia attulerunt, quos suis locis laudabimus. Ingenui enim pudoris plenum videtur, fateri per quos profeceris. Ad me quod attinet, duas res sedulo vitare studui, tum ut ne quid diligentiam meam effugeret; tum etiam ne cum coquo Plautino, diversa jura confunderem; quapropter Græca a Romanis, Romana a patriis distinxī. Si quis morosior antiquitatis patronus, tutelam matronarum Romanarum tantum explicandam fuisse opinetur, ei hoc unum reponam, studiosos in scholis stultissimos fieri, si nihil ex iis, quæ in usu habemus, aut audiunt, aut vident, aut ipsi tentant: hoc enim tantum proficiunt, ut, cum in forum venerint, in alium terrarum orbem se delatos esse putent. Igitur capite primo jus Romanum, altero jus Germanicum exponetur.

CAPUT I.

EXPONIT JUS ROMANUM.

§. I. Tutela juris civilis est, & curatur a Magistratu, usque ad terminum legibus definitum. II. Plerique Latores ad annos respuerunt, etiam Romani, minus tamen prudenter. III. Feminae duodennes, aut minus natæ, Romæ nubebant, vel in perpetuam tutelam transibant: hinc mares puberes dicti, illæ viripotentes. IV. Tutela mulierum alia ætatis, alia sexus, quæ describitur, & V. Ciceronis, Livii, Apuleji, marmorisque antiqui auctoritate probatur. VI. Origo ejus ex moribus populi Romani petita. VII. Apud Græcos similis tutela fuit, sed diversa tamen. VIII. Mores feminarum Romæ corrupti. IX. Ulpiani duæ rationes, a sexus imbecillitate & rerum forensium ignorantia petita illustrantur. X. Tutor muliebris non administravit, sed auctoritatem interposuit. Sine eo femina recte solvi potuit, quæ lassa vix restituebatur. XI. Tutor assistebat mulieri, si lege ageret, vel judicio, aut quando se obligabat, non si alios sibi. XII. Eo auctore femina nupsit, & dotem dixerunt. XIII. Sine eo mulieri non licuit condere testamentum, XIV. nec manumittere, XV. neque hereditatem adire, mancipare, usucapionem pati, tutelamve suscipere. XVI. Differen-

tie muliebris & pupillaris tutela. Femina habebant tutores & curatores simul. XVII. Tutores ab ipsis mulieribus electi. Livii & Ciceronis diffœilia loca explicantur. XVIII. An & quando maritus uxoris tutor fuerit, vel non. XIX. Tutela hæc alia legitima, alia Prætoria. Num tutor ex inquisitione datus? an se excusare potuerit? XX. Ei permissum tutela se abdicare, vel eam in jure cedere proximo. XXI. Ulpianus in fragmentis infelicitè a Cujacio correctus. XXII. Lex Claudia cessitiam tutelam sustulit, & quare. L. 3. C. de Leg. tut. & l. 2. C. Th. de Tut. creand. explicantur. XXIII. Soluta tutela muliebris omni capitis diminutione, ut arrogatione, & conventionè in manum. XXIV. tum juritrium vel quator liberorum; ex privilegio virgines Vestales, aliaque illustres. Plutarebus reprehensus. XXV. Quando & quibus de causis tutela illa desierit inquisitum. Ejus vestigia in Pandectis paucæ, in Codice nulla. Senatusconsulti Vellejani necessitas & origo.

§. I.

OMnis Tutela Juris Civilis est, & mere positivi, si-
ve ejus originem, sive formam spectes; & tamen
æquitati naturaliconvenit, ut lubricum ætatis, aut
sexis, certo subsidio fulciatur, quique se ipsos tueri non
possunt, aliorum judicio regantur. Parentibus ipsum jus
naturæ liberorum educationem injunxit, quemadmodum ex
Creatoris sapientissimi intentione, & naturali gignentium
stimulo, brutorum que exemplo satis apparet. His vero de-
functis, officium succedit Magistratus & Legis, quo defe-
ctus ille suppleatur, illisque qui ob judicii imbecillitatem
rebus suis superesse non possunt, tutores vel curatores con-
stituantur. Et fuit profecto Legislatoribus semper curæ
& cordi tutela infirmorum. Testantur id præter litteras
divinas Plato lib. XI. de LL. & Justinianus in Novella sua
constitutione 72. Athenis lex jubebat, Archontem curam
gerere pupillorum & pupillarum, auctore Demosthene in
Macartatum; & Arcopagus juventuti præfectos dabat, qui
morum rationem haberent, ut insignis locus Isocratis in
Arco-

Areopagitica testatur. Romæ tutor primum a Prætoꝛe, & majore parte tribunorum plebis, post a Consulibus petendus fuit. At M. Antoninus Philosophus creavit hanc in rem novum Prætoꝛem Tutelarem; de cujus officio Ulpianus librum singularem composuit, a Modestino citatum in *l. 6. D. de Excusat. tut.* Severus Imp. quoque Ulpio Rufino scribens, gloriatur, omnibusque liquere desiderat, se maximam rationem habere subveniendis pupillis, & iudicio infirmis; cum etiam id ad curam publicam pertineat, in *l. 3. D. Qui pet. tut.* Ætas vero incundis pactis, aliisque negotiis sine tutore expediendis idonea, mero jure naturali haud est definita; quum in quibusdam citius, in aliis tardius iudicium maturescat. At Leges civiles certius eam determinant; varie tamen, prout indolem nationis suæ solertem aut hebetiorem deprehendunt. Alii cives suos, donec nuptias celebrarent, alii donec inter viros adscriberentur, tutelæ subesse voluerunt. De Solonis, Pittaci & Charondæ legibus, videtis Dionys. Halic. *l. II. cap. 27.*

§. II.

Prudentiores tædiosam ac lubricam hanc æstimationem ex annis certiores reddidere. Apud Hebræos valebat promissio, quam fecisset adolescens, qui annum ætatis tertium decimum, puellæ, quæ duodecimum impleisset. Persæ pueritiam ad annum usque decimum & septimum, adolescentiam vero ad vigesimum & septimum impletum porrexerunt. Indi ab anno decimo octavo pubertatem metuebantur. Apud Romanos lege Lætoria antiquissima, annis quinque & viginti finis ætati minori impositus, unde Plautus in Pseudolo scite eam *quinam vicenariam* vocavit. Noverant equidem Quirites fragile tamdiu consilium esse hominum, multisque captionibus & insidiis expositum, post hoc tempus autem virilem vigorem compleri, vel firmissimæ juventutis fieri ingressum, *l. 1. D. de Minor. l. 4. D. de Serv. export. l. 1. C. Th. de His qui ven. æt. impetr.* Sero tamen, & non nisi per partes, maribus auxilium subministrarunt.

Ad annum usque decimum quartum completum eos tantummodo tutelæ subiecere; inviti autem adolescentes curatores non accipiebant, nisi quorum apud Prætorem accusata erat petulantia, vel ingenii infra communem sortem hebetudo, unde varii variorum lapsus, cum patrimonii ruina. Profecto si quæ alia ætas, hæc sane rectore indiget, quia humores tum maxime ebullientes, in prava facile defecti possunt. Nota est Horatiana *Imberbis Juvenis* descriptio: & pulcherrime Isocrates, in orat. prius laudata docet, quam turbulentis affectibus adolescentia jactetur, quantisque cupiditatibus abundet. Vehementi quippe impetu fertur plerumque ætas ista, in promissa facilis, spei plena, diffidere nescia, & liberalitatis famam ubique captans. Hinc Prætor tandem, post causam vulneratam, in integrum restitutionem minoribus ætate lapsis Edicto concessit, & adversus captiones opitulationem: quum longe præstitisset, intacta eorum jura servasse, atque prudentiorum consensum in contrahendis obligationibus requisivisse, donec inconsultus ille juventæ impetus deferbuisset censeretur. Sed masculorum tutelam, de qua nil nobis est propositum, mitamus.

§. III.

Feminarum longe alia fuit conditio. Quanquam enim Leges, propter votorum festinationem, biennio eas citius, quam mares, tutela liberabant, alio tamen modo ipsarum imbecillitati consultum ivere. Scilicet ex Numæ præscripto, puellæ annos duodecim aut *N.B. minus natæ* nuptui dabantur, ut mores castos incorruptosque ad sponsum deferrent, auctore Plutarcho in Numa pag. m. 135. Unde Pomponius *minorem annis duodecim nuptam* memorat in l. 4. D. de Ritu nupt. sicut Papinianus *minorem annis 12 deductam* in l. 68. D. de Jure dot. Decennem utique munia comparis æquasse, constat ex elegantissima inscriptione apud Fabretum Cl. VIII. inscript. n. 186.

D. M.

D. M.

VALERIAE. PROCLAE. CONIVGI. DUL.
CISSIMAE. QVAE. VIXIT. ANNIS. XXII.
CON. COIVGE. VIXIT. ANNIS. XI. DIEB.
XXX. FECI. COIVGI. BENE. MERENTI
SEXTVS. NERIANVS. FELIX.

Nisi chartæ parceremus, ex aliis lapidibus apud Gruterum pag. 751. 752. 813. n. 8. & 815. n. 13. demonstrari posset, frequens & quotidianum Romanis fuisse, feminas duodennes ducere uxores. Hæ igitur nubendo transibant in potestatem mariti, nec tutore sexus egebant: Aliæ viripotentes factæ, in nexu patriæ potestatis manebant, si vero emancipatæ, aut patre orbatæ essent, in tutelam muliebrem, post finitam pupillarem, incidebant, sed per conventionem in manum mariti deinceps illa liberabantur. Illæ vero, quibus viro maturis sponsus non obveniebat, quæve toro per divortium aut mortem rupto, tædis viduatæ erant, muliebri tutelæ perpetuæ subijciebantur. Hinc puellarum, quæ duodecimum annum impleverunt, tutela non *finiri*, sed tutores pupillares *desinere* dicuntur, in l. 13. §. ult. de Tut. & cur. dat. Nec Jurisconsultis tantum, sed & aliis Latinis Auctoribus placuit, ut mares quidem *puberes* nuncuparent, eosque *in suam tutelam venire*, & *sue tutelæ effici*, & *recipere tutelam* dicerent: Feminas autem non sic vocarent, sed *viripotentes* tantum proprio nomine, licet communis utrique sexui pubertas. l. 7. §. 1. l. 9. §. 1. D. de Adm. tut. l. 5. §. 2. Quib. ex caus. in poss. l. 51. D. de Legat. lib. 3. l. 13. de V. S. Cujus rei non alia ratio dari potest; quam quod mulieres in perpetua erant tutela, atque hoc tantum in nuptiis earum agebatur, an oneri ferundo pares essent. Verius apud Festum: *Pubes* & *qui pubem generare potest, is incipit a quatuordecim annis: femina a duodecim viripotens, sive patiens, ut quidam putant.*

§. III.

Sed quia parum accurate hoc verborum discrimen obfer.

servavit Tribonianus in *pr. Inst. Quib. mod. tut. fin.* & in-
 distincte pupillos pupillasque, quum puberes esse cœpe-
 runt, tutela liberari scribit: dein etiam subjicit, se anti-
 quitatis normam, in feminis bene positam relinquere, ut
 post duodecim annos completos viripotentes esse credantur:
 id quod multis cum Rævardo lib. II. Varior. cap. 10. du-
 bium vel obscurum videri possit, si cum antiqui juris mo-
 numentis conferatur. Quapropter sciendum est, duplicem
 olim fuisse mulierum tutelam, aliam *ætatis*, aliam *sexus*.
 Illa cum maribus sexui sequiori erat communis, in hanc ve-
 ro per ætatem duodecim annorum, a tutoribus pupillaribus
 liberatæ, recidebant. De tutela autem ætatis tantum loqui-
 tur Imperator, simulque juris antiqui non usum indicat,
 quia isto ævo tutela sexus non erat in usu, ut infra ple-
 nius dicemus. Utriusque meminit Aulus Gellius lib. V.
 Noct. Att. c. 13. ubi hæc verba recitat Mafurii Sabini, ex
 lib. 3. juris civilis, prout ea emendavit Guil. Ranchinus
 lib. 1. Var. lect. cap. 4. *In officiis apud majores ita observa-
 tum est, primum tutelæ, deinde hospiti, deinde clienti, tum co-
 gnato, postea affini. De qua causa femina viris potiores sunt
 habitæ, PUPILLARIQUE tutela MULIEBRIS prælata.*
 Et Macrobius signanter tutelæ *puerilis* mentionem facit, quia
 aliam feminarum esse sciebat. Verba ejus ex lib. in Somn.
 Scip. cap. 6. sunt hæc: *Tutela puerili quasi virile jam robur
 absolvitur, de qua tamen femine, propter votorum festinationem
 maturius biennio legibus liberantur. Non legibus Julia & Pa-
 pia, ut Cujacius volebat, sed Responsis prudentum, &
 Rescriptis Imperatorum in l. 5. D. Qui test. fac. l. 4. C.
 eod. quæ & Leges dicuntur, ut docet Modestinus in l. 1.
 D. de Excusat. tut.* Describi potest Tutela sexus, quod sit
 jus & obligatio mulieris, quæ sui juris est, negotia obli-
 gatoria dirigendi, iisdemque valorem consilio & auctorita-
 te sua conciliandi, sive in judicio sive extra judicium expe-
 diantur. Aliis forsân Servii definitio tutelæ paululum mu-
 tata magis placebit, sed hos sensu suo abundare facile pati-
 mur.

mur. Masurius apud Gellium, verbis modo laudatis, *muliebrem*, Boetius in Topica Cic. eam *perpetuam mulierum tutelam* appellavit.

§. IV.

An usitata Romanis fuerit talis, qualem definivimus, Tutela, prius demonstrari necesse est, quam ad alia veniamus. Tiraquellus ad Plauti Aululariam actus III. sc. 5. v. 14. nos ablegat: at de viris, non de feminis loquitur, nec scæna illa Romæ, sed in Græcia fingebatur. Auctores igitur locupletiores, & in quos non cadit exceptio, dabo. Primas teneat M. Tullius, disertissimus inter Jurisconsultos Orator, & Jurisconsultus inter Oratores eruditissimus, cujus quatuor habemus testimonia in Topicis, pro Flacco, pro Cæcina, & pro Muræna, sed ultimum hoc loco recitasse sufficiat, ex capite ejus orationis XXVII. *Mulieres omnes, propter infirmitatem consilii, majores in tutorum potestate esse voluerunt; Hi, Jcti formularii invenerunt genera tutorum, quæ potestate mulierum continerentur.* Alterum ferret M. Porcius Cato Consul, apud Livium lib. XXXIV. cap. 2. is enim pro lege Oppia, de finiendis matronarum cultibus, retinenda disserens gravi oratione, ait: *Majores nostri nullam, ne privatam quidem rem, agere feminas sine auctore voluerunt: in manu esse parentum, fratrum, virorum.* Cui respondens L. Valerius Tribunus plebis cap. 7. ita Quirites alloquitur: *Si legem Oppiam abrogaveritis, non vestri arbitrii erit, si quid ejus vetare volueritis, quod nunc lex vetat. Minus filiæ, uxores, sorores etiam quibusdam in manu erunt. Nunquam salvis suis exuitur servitus muliebris, & ipsæ libertatem, quam viduitas & orbitas facit, detestantur. In vestro arbitrio suum ornatum, quam in legis malunt esse: & vos in manu & tutela non in servitio debetis habere eas: & malle patres vos aut viros, quam dominos dici.* De recentioribus, Antonini Pii, ac fratrum Antonini Philosophi & Veri temporibus, testem addo Apulejum, Oratorem, Philosophum & Jctum doctissimum, in Apologia coram Lol-

liano Avito, Bithyniæ Præsidi dicta. De Pudentillæ uxoris suæ tutore ibi: *Adest etiam, inquit, tutor, auctor mulieris, vir gravissimus & sanctissimus, omni cum honore mihi nominandus, Cassius Longinus. Quære, Maxime, cujus emtionis auctor fuerit: quantulo pretio mulier locuples agellum suum præstinarit. Huc etiam pertinet lapis antiquus apud Gruterum pag. MC. n. 6. quem eo lubentius adferam, quod totus ad sacra nostra pertinet, & Falcidiæ meminit:*

L. SEPTIMIO. LIBERALI

VI. VIR. AVG. VICANI. VICI. GERMALI

OB. MERITA. EIVS

QVOD. DECVRION. ET. VICANIS. VICOR. VII.

SING. IN. ANNOS. V. III. IN. PERPET. REDD.

ET. IN. EAM. REM. FVNDOS. OBLIGARI. IVSSIT

QVORVM. PARTEM. VI. LEGIS. FALC. NOM.

DEDVCTAM. AB. TVTORIBVS

SEPTIMIAE. PRISCAE. MATRIS. SVAE

LEPIDIA. SEPTIMIA. POPVLO

CONCESSIT

§. V.

Quod ad originem hujus Tutelæ attinet, in diversa abeunt Antiquitatum Romanarum auctores, quia Cicero & Cato in locis allatis tantum ad *maiores* provocant, Plutarchi auctoritate innixi: qui Numam id privilegii Vestalibus largitum ait, ut a tutela essent immunes. Alii ad Romuli & Numæ Pompilii leges Regias ascendunt. Hotmanus, Marcilius & Rittershusius Legibus XII. Tabularum de Tutela hac cautum suspicantur: Schilterus ex moribus Græcorum ad Romanos eam translatam pro certo habet, Exerc. XXXVII. ad D. §. 227. Rectius putem, ad mores & instituta populi Romani, quæ ante LL. XII. Tabularum fuerunt, eam referendam esse: sicut Tacitus XIII. Annal. c. 32. *prisco instituto*, & Suetonius in Tiberio cap. XXXV. *mori majorum* acceptum fert illud jus, ut maritus una cum *propinquis* de capite famaque uxoris adulteræ cognosce-

gnosceret, & Ulpianus, Prætorianum tutorem moribus mulierum dari, ait tit. XI. §. 24. Nec enim in Legum Regiarum aut Decemviralium fragmentis, ullum hujus Tutelæ vestigium superest, ut Jacobus Gothofredus in præfatione legibus XII. Tabb. præmissa observavit: adhæc multa in leges XII. non relata, quæ usu tamen valuerunt; ut Cicero lib. II. de LL. his verbis significat: *Et si quæ forte hodie a nobis rogabuntur, quæ non sint in nostra Republica, nec fuerint, tamen erant fere in more majorum, qui tum ut lex valebat* Confirmat Livius, quando lib. VI. c. 1. præter XII. Tabulas, Regias quoque leges separatim Romæ habitas servatasque scribit. Pari ratione, qua donationes inter virum & uxorem majores prohibuisse dicuntur, in oratione Antonini in l. 3. D. de Donat. int. vir. quas vero moribus & jure veteri vetitas esse, tradit Ulpianus l. 1. & l. 32. §. 10. eodem. Nec tamen prorsus refragabor, si quis e lege Regia vetusta, morem illum per consequentias, Prudentum interpretatione, elicitum esse contendat: quemadmodum alia luxuriae muliebri coercendæ, vel imperitiæ adjuvandæ, moribus introducta, dein Legibus, Plebiscitis vel Senatusconsultis confirmata leguntur. Neque enim novum est, aliquid jure mixto, id est, scripto & non scripto introductum fuisse. Vide Paul. V. Sent. tit. 4. §. 6.

§. VI.

Non me fugit, apud Græcos feminas, etiam puberes, auctoritati alienæ subfuisse, earumque tutores omnibus actibus intervenire oportuisse. In universum de Græcis testem laudo Ciceronem, in oratione, qua L. Flaccum, adversus Decianum, qui in Apolondienfium civitate, a socru Amyntæ, prædia falso tutore Polycrate emerat, defendit. Verba ejus cap. 30. sunt ista: *Nam emtiones, falsas prædiorum præscriptiones, cum mulieribus aperta circumscriptione fecisti: tutor his rebus Græcorum legibus adhibendus fuit.* Prostat apud Demosthenem, oratione adversus Neæram, Lex Attica, qua *αὐτοὶ τῶν γυναικῶν*, tutor mulieris, soluto per divortium ma-

trimonio, repetitionem dotis, & actionem pro alimentis, coram Archonte, instituere potest: *Si uxorem dimiserit, dotem reddito, ni reddat in novem obolos menstruos fœnus pendito, adversus eam in Odeo, de victu uxoris, illius tutori actio dator.* Nec dotis tantum causa, sed & aliis negotiis obeundis datus fuit; quia Lex prohibebat feminam, pariter ac puerum, sine tutore pacisci, de re, quæ medimni hordei pretium excederet. Ita Harpocration: Παιδί, καὶ γυναῖκα, ἢ ἐξ ἑστὸς συμβαλλομένη πρὸς μεδίμνον ὀρίων. *Puero & femina non licet contrahere supra medimnum hordei.* Id quod ex Isæo, Suida & Aristophanis Scholiaste amplius confirmat Meursius lib. II. Them. Att. cap. 9. & post Salmasium cap. 10. de modo usur. pag. 425. illustrat Schilterus Ex. 37. §. 223. 224. Præterea cum lis intentabatur mulieri, præco clamabat Ἡ ΔΕΙΝΑ, καὶ ὁ ΚΥΡΙΟΣ. Id est, *Hæc mulier accusatur cum Domino, cum tutore suo.* Et hac propter Comicus Smicythen perstringens, parumque virilem ostendens, κυρίως illi dat:

Κεῖνός τις ἐστὶς Σμικυθῆς, καὶ κύριος.

Certum ergo manet, mulieres jure Attico in perpetua fuisse tutela, sed a qua Romanorum tutela sexus, si ordinem, quo delata, respicias, longe differebat. Ibi tutores fiebant hoc ordine; pater, avus paternus, qui dotem dederat, frater ex eodem patre, liberi qui ex ephebis excessissent; si horum nullus esset, maritus, & hoc deficiente, quemcunque Magistratus idoneum judicabat. Maritus erat ipse uxoris κύριος, non bonorum ejus, sed filii ex priorē matrimonio, si nati essent annos viginti. In horum vero, tanquam dominorum, potestate erat vidua mater, ut nec nubere, nec bona alienare, nec vix quicquam posset, sine eorum consensu: id quod Romæ inauditum; Athenis autem obtinuisse, vel ex oratione priorē contra Stephanum colligitur, qua Dēmosthenes contendit, se cum fratre debere esse κύριον τῆς μητρός, & demensum ei admetiri, unde vivat. Horcratis, Isæi & aliorum testimoniis hoc firmavit Meursius lib. III. Att. lect. cap. 24. Salmasius cap. IV. de Modo usu-
rar.

rar. Ubbo Emmius in *descript. Reip. Athen. tit. leges matrim.* Anton. Matthæus *miscellan. exerc. cap. 7.*

§. VII.

At vero non est cur a Græcis tantum natales hujus tutelæ repetamus, quia & Gallis & Germanis, ut infra videbimus, fuit in usu, & vel sola ratio Romanos ejus necessitatem docere potuit. Patebit hoc, si in causas, quæ legeslatores moverunt, diligentius inquiramus. Dio Chrysostomus orat. *πρὸς ἀθηναίους* 75. mulieres Athenis, ait, contrahere non potuisse, ultra modum hordei, *διὰ τὸ τὰς γυναικας ἀδυνατεῖν* propter judicii imbecillitatem. Eandem dedit Cicero, in verbis supra prolatis: Propter infirmitatem consilii. Et Isidorus lib. XI. Orig. in fin. Ideo feminae sub viri potestate consistunt, quia levitate animi plerumque decipiuntur. Unde & æquum erat, eas viri auctoritate reprimi. Proinde & veteres voluerunt feminas innuptasque, quamvis perfectæ ætatis essent, propter ipsam animi levitatem, in tutela consistere. Non equidem maligne cum muliebribus ingeniis egit natura; par illis sæpe vigor, par ad sapientiam facultas. Henricus Cornelius Agrippa, de nobilitate & præcellentia sexus feminei, imperfectiones ejus, ab educationis neglectu, & consuetudine vitæ solitariae, derivare conatus est. Anonymus Gallus accuratius æqualitatem utriusque sexus naturalem demonstravit. Sed undecunque animi impotentia oriatur, pleræque sane magis, quam viri, affectibus indulgent, magnaue consilii inopia laborant, & ut omnium imperitorum animus, maxime tamen muliebris, in lubrico est. Vere Comicus in Hecyra Act. III. Sc. 1.

Itidem illæ mulieres sunt ferme, ut pueri, levi sententia.

Ad feminas Romanas quod attinet, priscae quidem, ob tristem & tetricam Sabinorum disciplinam, erant lanificæ, domifedæ, virique magis ac familiæ curandæ, quam rerum gerendarum studiosæ; unde tutorem ipsæ optasse videntur, qui in conventibus virorum, negotia earum expe-

Cc 3

habiles,

habiles, multisque insidiis obnoxias esse comperiebantur. Euripides Supplicibus: *παντα δι' αρετων γυναικων περὶ τας οικας, ατις ερεπον. Omnia per viros agere decet mulieres, quæ quidem sapiunt.* Posterioribus autem luxuriosis & deperditis, etiam invitis, tutores præponendi fuerunt, ne furiosum libidine, gula & conviviis patrimonii sui exitum facerent. Seneca in mores illarum suo ævo corruptos invehitur vehementer, cum alibi, tum inprimis epist. 95. *Maximus ille Medicorum, & hujus scientiæ conditor, feminis nec capillos desuere dixit, nec pedes laborare. Atqui hæc jam & capillis desituuntur, & pedibus ægræ sunt. Non mutata feminarum natura, sed vita est. nam cum virorum licentiam æquaverint, corporum quoque virilium vitia æquaverunt. Non minus pervigilant, non minus potant, & oleo & mero viros provocant: æque invitis ingesta visceribus per os reddunt, & vinum omne vomitu remittuntur: æque nivem rodunt, salatium stomachi æstuantis. & quæ sequuntur. Sed elegantissimus, & quam maxime ad rem præsentem faciens, est locus Ulpiani in fragmentis tit. IX. Tutores constituuntur tam masculis, quam feminis. Sed masculis quidem impuberibus duntaxat, propter ætatis infirmitatem: feminis autem tam impuberibus, quam puberibus, & propter sexus infirmitatem, & propter forensium rerum ignorantiam.* Duplicem, ecce, adfert rationem, alteram a sexus imbecillitate, alteram ab ignorantia rerum forensium depromptam. Utraque effecit, ut in multis juris articulis, qui juris privati & domestici sunt, deterior habeatur feminarum conditio, quam masculorum. l. 9. D. de Statu hom. nec alia etiam causa est, cur sequior sexus, apud plerasque gentes, tam speciosis jurium beneficiis munitus est: de quibus Carpzovii, Benckendorffii, Pruckmanni & Wibeli libri singulares adeantur.

§. VIII.

Juvabit tamen utramque rationem paucis adhuc illustrasse. Varii siquidem sunt casus, quibus læditur luditurque impensissime mulierum genus, propter sexus infirmitatem, ut dici-

dicitur in l. 9. pr. de Juris & fact. ign. Hinc Senatusconsultum Vellejanum opem tulit mulieribus, propter sexus imbecillitatem, multis hujusmodi casibus suppositis atque objectis, ait Ulpianus in l. 2. §. 2. D. ad SCt. Vellej. Aristoteles lib. 1. Polit. c. ult. *Femina*, inquit, *habet quidem consultandi facultatem, sed irritam & imbecilem.* Quintilianus declamat. 338. *Per se imbecilla res est femina.* Nec alia ratione *Sexum natura invalidum* vocat Tacitus lib. V. & *imbecillum feminarum animum* definit lib. VI. Annal. cap. 49. *Infirmiorem & fragilitatis conditionem* iis adscribit Arnob. lib. VII. Varium præterea & mutabile semper femina, Virgilio audit l. IV. *Æneid.* v. 569. *Ter eas in hora mutari*, docet Baldus in l. *quoties. versu dic quæ mulier C. de suis & legit. hered.* & blanditiis eas facile commoveri, late deducit Tiraquell. de *LL. Connub.* lib. 1. n. 71. Hæc itaque ratio est, cur feminae sine tutore esse non possint; alia est, ne debeant, propter forensium rerum ignorantiam. Plato in sua Republica non tam mulieres, quam vetulas; ad causas agendas admisit *Lib. XI. de Leg.* Et Romæ olim quoque, ante Q. Afraniam, improbissimam feminam, postulandi potestas feminis fuit, postea non item, docente Ulpiano l. 1. §. 6. de *Postul.* Quintilianus decl. 6. ad feminas: *non militaris vos, non forensis ratio deducit. Atque semper essis intra domum, quo plurimum in loco, levibus officiis affixæ.* Plane Judices dari haud potuerunt, non quia non habeant judicium, sed quia receptum est, ut civilibus negotiis non fungantur l. 12. §. 2. in f. D. de *Judic.* Similiter in l. ult. C. de *Recept. arb.* feminae in se arbitrium suscipere vetantur, *sue pudicitiae memores & operum, quæ eis natura permisit, & a quibus eas justè abstinere, & ab omni judiciali agmine separat.* In universum hue pertinet, quod Cato apud Livium lib. XXXIV. cap. 2. feminas *impotens natura & indomitum animal* appellat. Nec mitius Seneca *impudens animal, & nisi scientia accessit, ac multa eruditio, ferum, cupiditatum incontinens*, in libro de const. sap. cap. 14.

His igitur rationibus omnes mulieres, quæ nec in parentum, nec in maritorum manu, perpetuæ tutelæ subiectæ fuerunt. Nunc age, ut intentius institutum nostrum persequamur, tutelam pupillarem cum nostra conferamus, sic enim brevi conspectu natura tutelæ nostræ apparebit. *Facilius latent, quæ non comparantur*, scite ait Seneca III. contr. 5. Hoc pacto etiam plus quam manifestum fiet, neque tutoris officium, neque curatoris nomen, nostro tutori, ex regulis artis, aut dari posse, aut convenire, quod jam olim Zasius lib. 2. Resp. 17. animadvertit. Differunt autem hi tutores non uno modo, sed maxime si potestatem intueamur. *Non, quod mulieri, idem pupillo*, hac propter recte scripsit Quintilianus lib. V. Inst. Orat. cap. 10. ad Ciceronis locum mox proferendum alludens. Pupillorum pupillarumque tutores & negotia gerebant, & auctoritatem interponebant, & quantum ad providentiam pupillarem attinet, domini loco habebantur, l. 27. D. de Adm. tut. l. 7. §. 3. *Pro emt.* Mulierum autem tutores negotia non administrabant, sed auctoritatem duntaxat interponebant, auctore Ulpiano tit. XI. §. 23. Mulier etenim adulta, licet iudicium infirmum, iudicium tamen habet, ut antea diximus. Pupillus vero non modo infirmo animi iudicio est, sed nullo §. 1. *Inst. quib. non est perm.* nihil scire posse intelligitur, l. 10. D. de Juris & fact. ign. Quid? quod melius, quam mares puberes, rem familiarem callent feminae; sunt tenaces, & ad rem attentæ, unde biennio citius quam mares, a duodecim annis, postquam viripotentes esse cœpere, ad negotia mittebantur, ut scribit Tertullianus de veland. virgin. cap. 12. vel ut idem lib. de anima ait: *rebus gerendis attemperabantur.* Ipsæ, non earum tutores gerebant, ait Scævola l. 26. de Tut. & cur. dat. Hinc est, quod pupillo si debitor solvat, ut liberetur, necessaria est tutoris auctoritas, sine qua nec velle, nec nolle in ea ætate creditur l. 15. l. 22. D. de solut. At mulieri adultæ recte solvi

solvi poterat, quia nihil amittit, sed acquirit, vel saltem suum recipit, qua parte potissimum solutio spectatur. Testis Cicero in Topicis cap. XI. *Non, quemadmodum, inquit, quod mulieri debeas recte ipsi mulieri sine tutore solvas, ita quod pupillæ aut pupillo debeas, recte possis eodem modoolvere.* Quæ verba Severinus Boetius egregie illustrat, & simul indolem hujus tutelæ exponit. **Locus** non indignus, quem integrum hic adferamus. Verba Boetii: *Mulieres antiquitus perpetua tutela tenebantur: pupilli item sub tutoribus agunt; sed mulieribus, si quid debitum fuisset, sine tutoris auctoritate poterat solvi, pupillis vero minime. Ergo si quæretur, an id quod debeatur pupillo cuilibet, renuente tutore possit exsolvi, a differentia sumitur argumentum sic: non sicut mulieri sine tutoris auctoritate debitum possis exsolvere, eodem modo, nisi tutoris auctoritas accesserit, pupilloolvere, quod debeas, possis. Illæ enim perpetua tutela, etiam provecta jam ætate continentur: illorum tutelæ, certus annorum numerus terminum facit: atque idcirco solvi pupillo sine tutoris auctoritate non poterit. Differt enim persona mulierum a persona pupillorum, vel in eo, quod pupilli non perpetua reguntur tutela: mulieres vero perpetua. vel quod pupillus nullum suæ etiam ministrandæ utilitatis judicium habere potest: cum sit aliquis mulieribus, etsi non firmus, in explicanda familiari re intellectus. Quid si læsa sit mulier majorennis auctore tutore contrahens, an in integrum restituitur? Id quidem ratio Edicti in l. 1. D. de Minoribus allata suadere videtur, præsertim quia idem Ulpianus eam ad mulieres applicat l. 2. §. 2. ad Sct. Vellej. & alii omnes, qui Curatores habent, eo beneficio fruuntur l. 8. §. 1. l. 11. D. de Rebus eor. qui sub tut. Sed quia femina, perinde ac mares, usu rationis gaudent, ac res proprias possident, sine lege loqui erubescimus; quæ tutorum regimine sexui satis consultum esse, censuisse videtur, uti infra cap. II. §. 8. dicemus.*

§. X.

Si quæras, ad quæ negotia igitur feminis auctoritate tutoris opus fuerit, non diu cunctabor, sed præcuntem laudam.

dabo Ulpianum dicto titulo XI. §. 25. *Tutoris auctoritas necessaria est mulieribus quidem in his rebus, si lege aut legitimo iudicio agant, si se obligent, si civile negotium gerant, si libertæ suæ permittant in contubernio alieni servi morari, si rem mancipi alienent. Pupillis autem hoc amplius, in rerum nec mancipi alienatione, tutoris auctoritate opus est.* Primum, ait, tutoris auctoritatem interponi debere, si mulier lege vel legitimo iudicio agat. Latius patet lege agere, quam legitimo iudicio agere, quia sine iudicio lege agi potest, cum adoptiones, manumissiones, aliæque id genus solennitates imperio Magistratus fiunt. Unde in famosa l. Barbarius 3. D. de Off. Præf. scriptum est: *apud eum egerunt vel lege, vel quo alio jure.* Legis enim actiones erant solennes actiones ex XII. Tabulis aliisque legibus descendentes, de quibus peculiari capite Brissonius lib. IV. *select. antiquit. cap. 20.* Iudicium autem legitimum dicitur, quod vetere & antiqua lege introductum receptumque est, cujusque formula a Præatore secundum leges impetratur: veluti de pastu pecoris, de pauperie, damni injuria, &c. *Legitimas actiones* Pomponius in l. 2. §. 6. de O. F. *Judicia prodita* Papinianus appellavit in l. 1. D. de Præscr. verb. Hæc autem discrimina, postquam extraordinaria iudicia facta, sublata quoque sunt, & res judiciaria eo redacta, ut possimus cum Paulo dicere, in extraordinariis iudiciis, ubi conceptio formularum non observatur, subtilitas supervacua est. Interim mulier non temere iudicium suscipere debebat, sed tutore auctore, propter forensium rerum ignorantiam, & sexus levitatem, & stolæ matronalis decus. Deinde tutor adhibendus mulieri, si se obliget. Lex Lætoria vetabat minorem annis XXV. stipulari, *συνεργάζει*, passive, id est, spondendo se obligare, quemadmodum Priscianus lib. VIII. Suetonium interpretatur. Hæc vero tam feminas, quam mares, complexa videtur, quia utriusque sexus legitima ætas est & mansit 25. annorum. Sed hoc amplius mulier annos Lætorix legis egressa, sine tutore moribus Romanis sese firmiter obligare & conditionem

nem suam deteriozem reddere non potuit; ob sexus infirmitatem. Cicero pro Cæcina cap. 25. *Quod mulier sine tutore auctore promiserit, deberi, non est aditus ad hujusmodi res asserendas, neque potentiae cujusquam, neque gratiae.* Sed contra, feminam minorem 25. annis absente tutore sibi stipulari, suamque conditionem meliorem facere posse & potuisse, non ambigitur l. 7. C. de contr. stipul.

§. XI.

Porro tutoris auctoritas necessaria mulieribus, si civile negotium gerant, pergit Ulpianus. Alia nimirum negotia juris civilis sunt, alia juris gentium l. 17. §. 1. D. de Pænis. l. 15. D. de Interdict. In illis tutor adhibendus jure ordinario, sicut ad omnia, quæ solennitatem juris desiderant l. 19. de Auct. tut. l. ult. C. de In lit. dand. tut. quia jus legitimum tutorem, non curatorem novit. Ad civilia autem negotia pertinebat, nuptias contrahere, dotem dicere, testamentum facere, manumittere, hereditatem adire, rem mancipi alienare, & tutelam liberorum gerere: de singulis singularim. Tribus olim modis nuptiæ contrahebantur, consarreatione, coemtione & usu: nullo autem sine tutoris auctoritate in manum viri conveniebat uxor. Ulpian. tit. XI. §. 22. & Cicero pro Flacco, de Valeria Andronis Sextilii uxore: *In manu, inquit, convenerat. Nunc audio: Sed quaero utrum usu, an coemtione? Usu non potuit. Nihil enim potest de tutela legitima sine omnium tutorum auctoritate diminui. Coemtione? Omnibus ergo auctoribus: in quibus certe Flaccum fuisse, non dices.* Nuptiæ autem, ut rectius curarentur, Lege Julia de maritandis ordinibus cautum, ut ad dotem dandam, dicendam, promittendam, si legitimum tutorem non habeat, a Prætoribus urbano in Urbe, a Præsides in provinciis tutor constitueretur. Ulpianus tit. XI. §. 20. Eoque pertinet Terentii Clementis l. 61. D. de Jure dot. ut inscriptio docet. Cicero pro Flacco cap. 35. *Doti, inquit, Valeria pecuniam omnem suam dixerat. Nihil istorum explicari potest, nisi ostenderis, illam in tutela Flacci non fuisse. Si fuit,*

quæcunque sine hoc auctore est dicta dos, nulla est. Idem pro Cæcina cap. 25. de Fidiculanio Falcula: *Isse vester testis, qui ausus est dicere, fecisse videri eum, de quo ne cuius rei argueretur quidem scire potuisset, ipse nunquam auderet judicare, deberi viro dotem, quam mulier nullo auctore dixisset: Ait dixisset: Lex enim dotis dictionem, promissionem, dationem, discrevit: quia dicere dotem, est absque stipulatione promittere, solennibus verbis, sine interrogatione: si quis autem promittebat, stipulationem ut adungeret erat necesse!* Dicendo tres tantum personæ, mulier ipsa nuptura, vel ejus jussu debitor, vel parens virilis sexus, velut pater & avus paternus; at promittendo omnes obligabantur, *Cajus lib. 2. Inst. t. 9. §. 3. Ulpian. tit. VI. §. 2. l. 41. D. de Jure dot.* Dari autem dos dicebatur præsens, cum pridie nuptiarum, vel circiter, consignata apud auspices deponeretur, in crastinum nuptiarum viro tradenda: quemadmodum in Messallinæ cum Silio nuptiis factum, Tacitus & Suetonius memoræ prodidere.

§. XII.

Testamenti factionem mulieres antiquitus; cum in comitiis vel in procinctu testamenta fierent, non habuisse constat; eas etiam quæ per farreationem, vel per æs ac libram in viri potestatem venissent, testari non potuisse, æque certum est: loco enim filiarumfamilias erant, earumque bona omnia mariti fiebant: At iis, quæ sui juris erant, testamentum, & Ciceronis & Ulpiani ætate condere licuit, modo tutoris auctoritatem adhiberent. Actus enim testandi causa subtilissima est l. 28. C. de Testament. si libra, asses, mancipationes, aurium adtrectiones, testes, signa, tabulæ & cetera actu continuo adhibenda considerentur. Adde fraudes & falsa, quibus reprimendis lex Cornelia ferri debuit, quam testamentariam vocat Cicero *Verr. I. cap. 42. & Paulus lib. V. sent. tit. 25.* his vero odorandis sola mulier non satis erat versuta. Ideo Ulpian. tit. XX. §. 15: *Femine post duodecimum annum ætatis testamenta facere possunt,*
infors

tutore auctore, donec in tutela sunt. De suo tempore testatur Cicero pro Cæcina cap. VI. sed maxime in Topicis cap. IV. Si ea mulier testamentum fecit, quæ se capite nunquam dimittit, non videtur ex edicto Prætoris, secundum eas tabulas possessio dari. Quidam ex his verbis colligunt, eam mulierem tantum, quæ convenit in manum, testari potuisse; rectius Boetius ea explicat de muliere, quæ testamentum fecit, sine tutoris auctoritate: hanc etenim necessariam fuisse Livius docet lib. XXXIX. c. 9. ubi meminit cujusdam Hispalæ Fecenæ, meretriculæ & libertinæ mulieris, testamentum facientis Romæ, tutore a Tribunis & Prætorè petito, & amatorem suum Æbutium heredem instituentis.

§. XIII.

Sequitur manumissio, quam in censum negotiorum civilium referendam esse, vindicta, colaphi, rapismata, circumactiones, & verba solennia satis evincunt, a Constantio demum sublata. Lege Ælia Sentia ne minor quidem, licet testamentum facere, & heredem instituere, & legata relinquere possit, libertatem servis conferre poterat; ne horum fraudulentis adulationibus ac dolosis artibus circumscriberetur. Iisdem insidiis mulieres earumque facultates, Romæ in mancipiis magnam partem consistentes, expositæ erant, unde Ulpianus tit. 1. §. 17. *Mulier, ait, quæ in tutela est, item pupillus & pupilla manumittere non possunt.* Cum quo convenit fragmentum lacerum quidem, sed pulcherrimum, a Claudio Putcano Senatore Parisiensi erutum, & Collationi Mosaicarum & Romanarum legum a Pithæo subjectum, cujus verba ex §. 15. subjiciam eo lubentius, ut pateat, auctoritatem horum tutorum, pariter ac pupillarium, confestim in ipso negotio interponi debuisse: *Mulier sine tutoris auctoritate (manumittere non potest) nisi jus liberorum habeat, tunc enim & vindicta sine tutore manumittere potest. Unde si mulier absens liberum esse jusserit, quæ jus liberorum non habet, quæsitum est, si tutores ejus auctoritatem accommodent eo tempore, quo epistula scribitur servo a domina,*

Pupillis autem hoc amplius etiam in rerum nec mancipi alienatione tutoris auctoritate opus est. Id est, in vestibus, metallis, gemmis, aliisque quæ pondere, numero & mensura constant, de quibus Amplissimus Vir, Cornelius van Binckershoek de rebus mancipi c. 5. Ad alienationem & *Ufucapio* pertinet: vix est enim, ut non videatur alienare, qui patitur ufucapi, inquit Paulus l. 28. D. de V. S. Jam autem uti res pupilli immobilis ufucapi non potest, l. 48. D. de A. R. D. quod Cicero etiam novit, qui in l. ad Attic. epist. 5. ait: *De tutela legitima, in qua pupilla fit, nihil ufucapi posse.* Sic idem in Oratione pro Flacco testatur, nihil posse de tutela mulierum legitima sine omnium tutorum auctoritate deminui, atque adeo Valeriam ipsam usu uxorem fieri, sive ufucapi matrimonii causa non potuisse, sine Flacci auctoritate, qui unus erat ex tutoribus mulieris. An & *Donatio* huc pertineat, minime ambigendum: est enim alienatio, &, ut ceteri actus inter vivos, mancipationis solennitatem requirebat. At parum usitatas fuisse olim donationes apud Romanos, etiam in personas conjunctas, ostendit Polybius in *Excerpt. Peiresc. pag.* 154. ne dicam mulierum genus avarum esse l. 4. §. 1. D. ad SCt. Vellej. adeo ut miraculi loco habeatur, cum mulier donet, arg. l. 33. §. 1. D. de Donat. int. vir. ait Mascard. de Probat. c. 10. n. 29. Quæ forsan ratio est, cur Jurisconsulti de donatione nihil memoriæ prodiderunt. Illud denique manifestum est, mulieribus, si *Tutelam* filiorum a Principe impetrarunt, tutoris auctoritate fuisse opus l. fin. D. de Tutel. quia tutela civile munus vocatur in l. 6. §. 15. D. de Exc. tut.

§. XV.

Quibus in negotiis mulieri tutoris auctoritas necessaria sit, vel non sit, vidimus hactenus, ex quibus simul, quatenus muliebris hæc tutela cum pupillari conveniat, vel ab ea distet, apparet: Sic quod ad potestatem attinet, eas differre diximus §. 9. quoad res item quarum alienationi auctoritas accedere debet. §. 14. At aliæ adhuc supersunt differentiæ, sicco pede

pede hic minime prætereundæ. Ac primum quidem Regula Juris antiqui est; una, tutorem habenti tutorem non dari: & altera; certæ rei vel causæ tutorem pupillarem non dari. *l. 27. D. de Testam. tut.* neque enim lex, quæ tutelam stabilivit, ejusmodi casibus extraordinariis eam accommodaverat, neque a Jurisconsultis eo ab initio produci poterat; quod tamen deinde factum esse, primus egregie ostendit Vir Excellentissimus Gerh. Noodt lib. 1. Probabil. cap. 2. Dudum vero, & inde ab Augusti ævo, ex lege Julia & Papia de maritandis ordinibus, secutisque Senatusconsultis mulieri, cum tutore suo agere volenti, etiam ad dotem constituendam, & hereditatem adeundam tutor dabatur, auctore Ulpiano *tit. XI. §. 20. 22. & 24.* Quæ species sub titulo Codicis, In quibus causis tutorem habenti tutor dari potuit, non reperiuntur. Hinc & aliud discrimen emergit: Pupilli omnes sub tutela testamentaria, vel legitima, vel dativa erant constituti: Mulieres autem viripotentes in nuptæ auxilio curatorum, ad annum 25. saltem post D. Marci constitutionem, res suas administrasse videntur, nec tutores sibi elegisse, nisi aliorum interesset, actusque inter vivos vel mortis causa talis celebrandus, ad quem tutoris auctoritate esset opus; tum vero, sicut impuberi, etiam invitæ puberi, tutor ex juris ratione petendus. Argumento est Hispala Fecenia, quæ post patroni mortem, quia in nullius manu erat, demum cum testamentum faceret tutorem a Tribunis & Prætoribus petiit, auctore Livio Lib. XXXIX. c. 9. Atque inde est, quod Jurisconsulti & Imp. tot locis Curatoris mulierum meminere, in *l. 36. l. 37. l. 66. §. 1. l. 67. §. 2. 3. 4. D. de Ritu nupt. l. 5. §. 12. D. de Jure dot. l. 7. D. ad L. Jul. de Adult. Paul. lib. II. sent. tit. 19. §. 9. l. 3. l. 7. & ult. C. de Interdict. matr.* In quibus aliisque textibus Jac. Rævardus lib. II. Varior. c. 10. ex Prudentium intentione & sententia, vocem *tutores* reponendam existimat, quam Tribonianus in *curatores* mutavit, ex sæculi sui usu: at huic plus una ratione satisfecit Vir Clarissimus An-

Antonius Schultingius ad d. l. Paul. qui tamen cum Vertranio Mauro de jure liber. cap. 31. in l. 60. & l. 61. D. de Jure dot. & l. 7. de Tus. & cur. dot. hujusmodi emblemata agnoscit. Ceterum ad hos curatores Cujacius lib. XXVI. Obs. c. 7. retulit l. 8. D. de Adopt. sed non satis feliciter! Nec enim de feminis loquitur Modestinus, sed laudat D. Claudium, quod curatoris auctoritatem jussit intercedere in arrogatione adolescentum, quæ antea necessario non requirebatur. Illustrius Noodtius comm. ad ff. pag. 48. quomodo lucem faceret huic loco, ad liquidum deducere se necdum potuisse, ait. Vide Acta eruditorum Lips. anni 1717. mens. Maji pag. 197.

§. XVI.

Pergo ad aliam differentiam, notatu haud minus dignam. In pupillorum arbitrio non erat, quem sibi tutorem vellet; & inutiliter his daretur tutoris optio, quorum nullum judicium est: at lege speciali omnibus feminis, vel matrifamilias testamento viri optio tutoris dari potuit, ut ipsa sibi tutorem eligeret, quem vellet. Auctor est Livius lib. XXXIX. cap. 19. ubi de Hispalæ præmio, ob indicata Bacchanalia, Scitum factum esse refert, ut Tribuni ad plebem ferrent: *Uti Fecenia Hispalæ datio, diminutio, gentis enuptio, tutoris optio item esset, quasi ei vir testamento dedisset.* Locus insignis est. sed in cujus interpretatione multis, imprimis autem Guthério lib. II. de Jure Pontif. c. 7. aqua hæsit. Tentavit eum Alciatus lib. IX. parerg. c. 19. sed feliceiore successu Turnebus lib. XXX. Advers. c. 25. Hotmanus lib. III. Obs. c. 16. Cujacius lib. VII. Obs. cap. 11. & Livii hospitator Joh. Fred. Gronovius in notis, veros ejus sensus eruerunt. Nos quæ huic pertinent tantum persequemur. Constat Legem XII. Tabularum fuisse, *Paterfamilias uti legasset super pecunia tutelave sua, ita jus esto;* camque a Jurisconsultis ita extensam, ut latissima potestas & heredis instituendi, & legata relinquendi, & tutelas constituendi tributa videatur: ait Pomp. l. 120. D. de V. S.

-do

Ee

Fa-

Facili negotio igitur eadem, in fori disputatione, a liberis ad uxorem est translata : sic ut quemadmodum pater testamento filiis familias tutorem dare poterat, ita & maritus uxori, quia in manu mariti erat, & sui heredis jure utebatur. Non semper autem rigide istud jus exercebat, sed uxori tutoris optionem beneficii loco aliquando legabat. Et hic tutor est, quem Cicero pro Murena cap. XII. ait, potestate mulierum contineri. Jurisconsultos enim exagitans : *Mulieres, inquit, omnes propter infirmitatem consilii majores in tutorum potestate esse voluerunt : hi invenerunt genera tutorum, quæ potestate mulierum continerentur.* Alcinius dicto loco qualem hoc sit, invenire desperat. nisi dicatur, mulieres servos suos actori publico concessisse, & postquam publici effecti essent, procurasse, ut sibi tutores darentur. At hæ sunt nugæ, refutatione indignæ ! Schilterus Ex. XXXVII. §. 218. Tullium reprehendere putat illud tutorum genus, quando mater & vitricus tutelam gererent, sic enim tutorem potestate mulieris contineri, quæ ipsa in tutela esse deberet. Verum nec hoc placet. Genuinus sensus vel hic est : Mulieres tales sibi optasse tutores, quibuscum ob conditionis vilitatem, animive bonitatem facile transigerent : vel cavillatorie dixit, eos in potestate mulierum contineri, quorum diligendorum mulieri esset potestas ; vel denique ridet Jurisconsultos, quod auctores fuerint muliebris tutelæ, nec tamen efficere potuerint, ut mulieres in tutorum essent potestate, quippe quæ libere res suas administrarent, & solennitatis causa auctoritatem negotiis adhiberent. Viripotentes enim quodammodo in suam tutelam perveniebant, prout explicandus Paulus in l. 51. D. de Legat. lib. 3. nec his, quæ pag 4 tradita sunt, contrariari videatur.

§. XVII.

In quæstione, an maritus ab uxore tutor eligi, aut tutelam conjugis, ab aliis sibi impositam, suscipere potuerit, ut vitato multorum errore recte versetur, primum quidem, quod ad personam uxoris attinet, ubivis fere gentium ob-

obtinuit illud Pauli ad Ephes. v. οτι ο αιδρ επι κεφαλη της υιοι-
 κας, quo sensu Philo Judæus, maritum instar curatoris esse
 dixit, επι πατρικειως αρχωντες. Verum si de rebus quærat
 apud Romanos, probe distinctio observanda est, quam ex
 vocum antiquarum enarratoribus, Aulus Gellius indicavit
 lib. XVIII. Noct. Att. c. 6. inter matresfamilias & matro-
 nas; sive inter uxores, quæ in manum & mancipium ma-
 ritorum convenerant, & eas, quæ tantum in matrimonio
 erant, sui juris cetera, & rerum suarum dominæ, præter
 dotem, quam viro attulissent. De illis Livius, a nobis lau-
 datus, affirmat, in manu maritorum fuisse. Hæ vero non
 in mariti, sed in alterius tutela extitere. Plures autem mu-
 lierculæ, jam inde ab occupata republica, in matrimonio,
 quam in manu esse maluerunt, Tacito auctore lib. IV. Ann.
 c. 16. Ipsa Livia, Augusti conjux, sic nupserat: eoque
 Vir Cl. Schultingius referendam putavit inscriptionem apud
 Gruterum pag. 552. n. 2. ubi mulier aliqua monumentum
 fecit SIBI. CONJUGI. ET. TUTORI. suo. Nec alia
 ratione Pudentilla, Apuleji uxor, quam quod in manum
 non convenerat, tutorem habuit. Verba ejus in apolo-
 gia circa finem ita sese habent: *Dixistis, inquit, me ma-
 gia, de pecunia mulieris, pulcerrimum prædium meo nomine emis-
 se. Dico, exiguum herediolum sexaginta millibus nummum:
 id quoque non me, sed Pudentillam suo nomine emissey Pudentilla
 nomen in tabulis esse: Pudentilla nomine pro eo agello tri-
 butum dependi: præsens est Quæstor publicus, cui depensum est,
 Corvinus Celer vir ornatus: adest etiam tutor, auctor mulieris,
 vir gravissimus & sanctissimus, omni cum honore mihi nomi-
 nandus, Cassius Longinus. Quære, Maxime, cujus emtionis au-
 ctor fuerit: quantulo pretio mulier locuples agellum præstinavit.*
 Sub Imperio Antonini Pii, ut supra diximus, Apulejus
 magis accusatus, Carthagine ad Maximum Claudium, A-
 fricæ proconsulem, præsentem Avito, hanc orationem habuit.
 Tum ergo alius tutor mulieris fuit, alius maritus, si in
 ejus manum non convenisset. Sed quia cœmctiones quoque

E c 2

erant

erant rariores, & licentiæ ditiorum molestæ; mariti autem bonis uxorum tenellarum, sub honesto curatoris nomine inhiabant: ideo Divus Marcus, oratione singulari, quam Senatusconsultum secutum est, vetuit maritum uxoris minorennis, vel furiosæ, esse curatorem: in tantum, ut sciens prudens, datus infamia notaretur. *l. 14. D. de Cur. fur. l. 4. l. 17. C. de Excus. tut.* Vir Cl. Bertr. Argentæus in comment. ad cons. Britann. art. 483. non satis rationis esse putat, cur Marcus sic constituerit; quandoquidem nulla cærior persona rem uxoris curare potuerit, quam maritus; nec donatio valuerit de rebus ad curam pertinentibus; uxor denique in viri potestatem tum non transierit, sed ex omni contractu virum obligare, & obligari ipsa vicissim potuerit. Sed Marcus legem hanc in republica tulit, quæ summam divortiorum fovit licentiam, & in qua feminis, maxime minorennibus insidiæ tendebantur. Vera ergo; quæ ipsum movit, ratio videtur fuisse, quam Accursius ad *l. 2. C. qui dar. tut.* vidit, ne maritus, re male gesta, rationes per blanditias interverteret, vel earum redditio materiam jurgii inter conjuges, cum uxor majorennis facta, præberet. Ceterum bonorum dotalium maritus erat dominus, *l. 30. C. de Jure dot.* paraphernalium regulariter custos & administrator *l. 9. §. 3. D. de Jure dot. l. 95. ad. L. Falc.* ut tamen sine consensu uxoris, solus hic nihil posset *l. 8. C. de Pact. conv. sup. dot.* Reliqua bona uxor non minus, ac vir, extra intercessionis causam, jure novissimo, postquam scilicet tutela mulierum extincta fuit, libere obligabat, ac alienabat, *l. 6. C. de Rev. donat. l. 12. C. de Pign. l. 2. C. ad Sc. Vellej.* Ut tamen si perfectæ ætatis esset, & sanæ mentis, marito rerum omnium, quas extra dotem habebat, administrationem concedere valuerit, & si non prohiberet, tacite consensisse intelligeretur *l. ult. C. de Pact. conv. l. 21. C. de Procur.* ubi rationem addit Constantinus: *Ne femine, persequende litis obtentu, in contumeliam matronalis pudoris irreverenter irruant, & conventibus virorum vel judiciis interesse cogantur.*

§. XVIII.

Hi juris progressus, in tutela mariti, non divellendi videbantur; nunc ad tutelam nostram revertamur. Ulpianus tit. xi. §. 2. *Tutores, ait, aut legitimi sunt, aut Senatusconsultis constituti, aut moribus introducti.* Legitimi mulierum tutores erant adgnati: his deficientibus Prætor, cum majore parte Tribunorum plebis, tutorem ex lege Atilia dabat. Verum ex lege Julia de maritandis ordinibus, solus Prætor Urbanus tutorem dedit ei mulieri virginive, quam ex hac lege nubere oportebat, ad dotem dandam, dicendam promittendamve, si legitimum tutorem pupillum habebat. Præterea Senatus censuit, in locum muti, furiosi vel absentis tutoris, alium dandum esse ad dotem constituendam, vel ad hereditatem adeundam: denique moribus tutor Prætorianus dabatur mulieri, quæ cum tutore suo lege aut legitimo judicio agere volebat, ut plenius hæc tradit Ulpianus dicto tit. xi. §. 3. 18. 20. & seqq. Ex his autem lucem fœneramur Scævola in l. 26. D. de Tutor. Et curat. dat. & novum inde simul discrimen tutelarum in lucem proferrimus. Verba ejus sunt, quæ sequuntur: *Sejæ egressæ annos XII. decreto Prætoris ex inquisitione datus est tutor, quasi minori: quero an excusare se deberet? Respondi, secundum ea quæ proponerentur, neque excusationem necessariam esse, neque obligari, quod non gereret.* Sensus est: tutorem decreto Prætoris ex inquisitione femina viripotenti dari inutiliter, neque excusationem necessariam esse, neque obligari eum, si negotia non procuravit: nam et si mulieribus ac pupillis hoc erat commune, quod Prætor utrisque, tutores non habentibus, tutores daret: id tamen discriminis intercedebat, quod pupilli a Magistratibus majoribus cum inquisitione, a minoribus cum satisfactione tutores quoslibet idoneos, licet minus ipsis acceptos accipiebant: feminae autem viripotentes tutores quidem acceperunt invitæ, verum illæ tantum, quibus talia negotia gerenda, ad quæ tutoris auctoritas esset necessaria: neque tum ex Prætoris arbitrio hunc vel illum

tutorem admittere coactæ, sed facultas unum eligendi ipsis salva fuit. Et hæc quidem electio pro inquisitione fuit; nec satisfactio erat opus, quia tutela oneri non erat, neque tutelæ actionem directam vel utilem, nec hypothecariam pariebat; eo quod nihil gerere, sed tantum auctoritatem præstare solitus esset feminarum tutor. Ad dolum tantummodo & fraudulentum consilium præstandum obligatus fuisse videtur. Vide Cujac. *lib. XXII. Obs. c. 20.* Num vero tutela hæc necessariæ fuerit susceptionis, id quidem temere neque affirmarim, neque negaverim. Plane tutela in rerum actu, vel in Reipublicæ tractatione, ut loquitur Seneca 1. *de Tranquill. cap. 3.* seu πολιτικὴ διαίρεσις ut Plato *lib. V. de Rep.* ait, nulla consistit; nec Reipublicæ, sed civile munus est l. 6. §. 15. *D. de Exc. tut.* pertinet enim ad utilitatem unius domus: favore autem pupillorum receptum est, & placuit Jctis, tutelam vel curam inter munera publica numerari, civesque invitos ad eas suscipiendas adigi. *pr. Inst. de Excusat.* Tantus autem muliebris tutelæ, quantus pupillaris, non est favor, & plerumque ex voluntate ipsius mulieris, tutor volens & consentiens datus esse videtur.

§. XIX.

Magis hæc apparebunt, si in memoriam revocemus, & hoc proprium isti tutelæ fuisse, quod sicut invitus eam non suscipere, ita susceptam abdicare, aut in jure alii cedere tutori liceret. De abdicatione Ulpianus tit. XI. §. 17. *Si tutor testamento datus se abdicaverit tutela, definit esse tutor. Abdicare autem est, dicere nolle se tutorem esse. In jure autem cedere tutela testamento datus non potest, nam & legitimus in jure cedere potest, abdicare se non potest.* De cessione idem §. 8. titulo eodem: *Quantum ad agnatos pertinet, hodie cessitia tutela non procedit: quoniam permissum erat in jure cedere tutela feminarum tantum, non etiam masculorum: feminarum autem legitimas tutelas lex Claudia sustinet.* Res nova videtur Juris studiosis, qui fragmentis Pandectarum tantum sunt as-

assueti, tutelam susceptam deponi, aut in jure cedi potuisse, cum excusationis tantum a suscipienda in iis fiat mentio, ne *per* autem de abdicatione susceptæ. Certum nihilominus est, in feminarum tutela id obtinuisse, nec sine ratione. Tutela pupillaris pubertate desinebat, nec invitus tutor ad curæ continuationem cogi poterat: muliebrem autem hoc onus peculiare comitabatur, quod esset *perpetua*, nulloque tempore circumscripta & definita. Querelas igitur movebant tutores, & legitimi, & dativi, si sero aut plane non nubebat femina sibi commissæ; quamobrem remedium illis per abdicationem & cessionem quæsitum est, etiam alia speciali excusationis causa non allegata. *Abdicare* se Magistratu, consulatu, Ciceroni & Jctis est, munus nondum confectum deponere; ἀπομαρτυρεῖν, vel ut Aristoteles, ἀπαρτύνει τὸ ἀρχόν. Abdicatur filius, qui omni jure abscisso, a familia alienatur. Sic & abdicare se tutela, est dicere, nolle se amplius tutorem esse. Cicero lib. VI. ad Att. epist. 11. *Itaque aut tutela cogito me abdicare, aut, ut pro Glabrione Scævola, fœnus & impendium recusare.* Sicut autem Diocletianus & Maximianus abdicationem filiorum, ex Græcorum moribus diu apud Romanos usitatam, sustulerunt, l. 6. C. de Patr. pot. ita & legitimis tutoribus, non licuit se abdicare tutela feminarum, quæ sibi proximitate sanguinis conjunctæ. Testamentariis & dativis id permixtum, agnatis non item: qui tamen alteri a se proximiori eam in jure cedere poterant, quæ *cessitia* tutela dicebatur; indeque *cessicus* tutor vel *cessitius*, ut Ulpianum emendat Turnebus lib. VII. Advers. cap. 21. & Vir Clariss. Joh. van de Water lib. III. Obs. cap. XI. Non hic repetam cessionis solennia a Galvano cap. 38. de Usufr. & Contio lib. I. Disp. jur. civ. cap. 12. quantum satis est pertractata. Vix tamen mihi tempero, quin locum Ulpiani adscribam, quam maxime huc pertinentem. Inquit ille tit. XIX. §. 11. *In jure cedi res etiam incorporales possunt, velut ususfructus, & hereditas, ET TUTELA LEGITIMA, & libertas.* Exercitium
igi-

igitur hujus tutelæ coram Prætorē in cessitium transibat; sed hac lege, ut si is mortuus fuerit, siue capite minutus, siue alii rursus tutelam cessierit, rediret ad legitimam tutelam; quia personæ industria erat electa, nec nisi viro industrius, rerumque suarum satagenti vices commissæ? Quin adeo tutela hæc ex persona cedentis legitimi pendebat, ut si is decesserit, aut capite minutus fuerit, cessitia quoque extingueretur; quia non plus juris in alium transferre potuit, ac ipse habuerat, auctore Ulpiano *tit. XI. §. 7.*

§. XX.

Verum enimvero quia feminarum intererat, retinere potius pristinos tutores, sanguinis vinculo nexos, quam in novorum, forsitan & hominum malorum, nequam & luxuriosorum tutelam transferri, quorum moribus polluerentur, & ad sordidum vitæ genus, in suam & Reip. perniciem, traherentur; ideo Claudius Imperator vetuit, tutelas cedi, *feminarum autem legitimas tutelas lex Claudia sustinet*, inquit Ulpian. *tit. XI. §. 8.* Anceps horum verborum, & crebris eruditorum disputationibus jactata est sententia. Cujacius in notis hic & lib. XXVI. Obs. cap. 7. pro *sustinet*, reposuit *sustulit*, omnes legitimas feminarum tutelas lege Claudia sublatas statuens, ita ut testamentaria & dativa tantum fuerit relicta; Constantinum vero patruis hoc oneris iterum imposuisse in *l. 2. C. Th. de tut. creand.* qua haud fuisset opus, si jus antiquum vigeat, ex quo ad patruum, ex jure agnationis, tutela erat perventura. Constantini legem moribus contrariis sopitam rursus novasse Leonem A. C. 469. in *l. 3. C. de Leg. tut.* sed quam interpolatam, & voce *pupillarum* auctam, Codici suo inseruerit Justinianus. Verba Leonis sunt ista: *Constitutione Divæ memoriæ Constantini, lege Claudia sublata, pro antiqui juris auctoritate, salvo manente agnationis jure, tam consanguineus, id est frater, quam patruus, ceterique legitimi ad pupillarum feminarum tutelam vocantur.* Cujacii sententiam probavit Brissonius, Hotmanus & Giphanius in *C. de tut. legit.* Huberus lib. III. *Digr. cap.*

cap. 4. & professâ opera eam defendit Schilterus *Exerc. ad D. XXXVII. §. 231. & seqq.* At vero, quia emendatio isthæc veteris libri auctoritate caret, merito eam rejecerunt Rævardus, Marcilius, a Costa, Jac. Gothofredus, Noodtius, Gravina, Schultingius alique; quorum tamen non una circa explicationem horum verborum est sententia.

§. XXI.

Rævardus primum auctoritatem Cujacii veritus, suppresso nomine, hanc emendationem explosit, & quibusdam exemplis ostendit, *sustinere* sæpius accipi, & hic accipiendum esse, pro *differre*, lib. 1. Varior. c. 10. Secutus hunc est Jacobus Gothofredus, hilarioris famæ Jurisconsultus, in comment. ad l. 2. C. *Tb de tut. & cur. tom. I. pag. 317.* sed clarius mentem expressit, ac sublatam tantum censuit a Claudio cessitiam tutelam, ne quod onus semel agnatus subierat, deponere unquam posset: quæ explicatio, si quis attendat, tam intentioni Ulpiani, quam voci *sustinere* convenit, quæ sæpius pro *continuare*, *prorogare*, *retinere* accipitur, auctoribus Latinis. Ovidius Epist. 1. v. 113.

Respice Laerten, ut jam sua lumina condas,

Extremum fati sustinet ille diem.

Sic Mæcenæ, in turpissimo voto, vitam *sustinere*, pro spiritum *prorogare*, inhibere ne abeat, morari, dixit apud Seneccam epist. 101.

Vita dum superest, bene est,

Hanc mihi, vel acuta

Si sedeam cruce, sustine.

Atque hoc ipsum dignitas familiarum, & summa juris providentia suadebat, ut quo hereditas pervenit, eo tutela rediret, & qui sperabant successionem, iidem bona tuerentur, ne dilapidarentur l. 1. D. de Legit. tut. & l. 73. D. de Reg. Jur. nam hoc *artificio* reciprocum est, ut qui commodis fruitur rei cuiuspiam, cum & incommoda perferre conveniat l. 10. D. eod. Decepit Cujacium ejusque affeclas, quod legem illam Claudiam in *dist. 1. 3. C. de legit. tut.* memoratam,

ratam, cum nostra eandem fuisse putarunt, id quod nec ipse abnuo: at certum est, varia ejus legis fuisse capita, prout de re tutelari sollicitus valde fuit Claudius, nam & de tutore dativo caput ejus legis memorat Suetonius in *ejus vita cap. XXIII.* & de curatore Modestinus in *l. 8. D. de Adopt.* Quid vetat igitur, quominus, præter hoc nostrum de cessitia tutela, quartum caput fuisse credamus? quo mulieres impuberes tutela patruorum exemptæ, quorum asperitas proverbio locum dedit apud Persium Sat. 3. *Ne sis mihi patruus oro.* ut Gravina observat, cui addo Manilium lib. V. in superciliosa pædagogorum genitura:

- - antiqui laudabunt verba Catonis,
Tutorisve supercilium, patruique rigorem.

Hoc certe temporum illorum conditio, & mulierosum Claudii ingenium satis confirmant. Constantinus vero imperium patruorum, suscitato jure antiquo, restituit: Leo confirmavit: neuter autem tum temporis forsan de muliebri tutela cogitabat. Hæc ita quantum ad agnatos pertinet. In patronis autem, etiam post legem Claudiam, cessitia tutela processit, ut exceptio ab Ulpiano subjecta ostendit, de qua Janus a Costa Vir Cl. *ad. tit. Inst. de legitima Patron. tut.*

§. XXII.

Tempus est modos videamus, quibus feminae tutela liberantur, atque naturalis libertas, quam & sexus infirmitate, & rerum forensium ignorantia amiserant, ipsis restituta est. Communes illos, ut utriusque mortem, delictum, consensum, & ejusmodi alia hic enarrare instituti ratio non fert; sed duos selectos dabimus. Primus est capitis diminutio feminae, quæ licet minima sit, omnes tutelæ tollit, non tantum pupillarem §. 4. *Inst. quib. mod. tut.* sed & perpetuam, auctore Ulpiano *tit. XI. §. 9. & 20.* Contingit autem minima illa vel adoptione, vel in manum conventionem, ut idem scribit §. 13. *tit. eod.* Adoptionis nomen generale est, & arrogationem comprehendit; de qua hic queritur, quia tutela tantum erat feminarum sui juris. Jure veteri quidem mulier

mulier arrogari non poterat, quoniam nulla cum ea comitiorum erat communio, Gell. lib. V. cap. 19. Post vero ex rescripto Principis arrogari potuit, auctore Cajo in l. 21. D. de Adopt. § l. 8. C. eod. Tutoribus pupillaribus tanta in pupillos non erat auctoritas, ut caput liberum fidei suæ commissum alienæ ditioni subjicerent; quemadmodum ex Gellio discimus, dicto loco: At mulieri arrogandæ tutores sic utiliter auctoritatem præstabant: quæ differentia superioribus addi potest. Arrogata igitur, ne in duorum potestate esset, tutela exhibat. Pariter & quæ in manum convenerat, maritum parentis loco habebat, ejusque potestati soli subjiciebatur. *Manus* Latinis pariter, ac Hebræis & Græcis, pro imperio & potestate usurpatur; unde in manum convenire, est in potestatem ac familiam mariti transire. Fiebat id tribus modis, farre, coemptione, & usu. Sive enim solenni farris sacrificio Diis nuptialibus facto; sive per æs & libram coempta; sive per integrum annum usucapta, in familiam mariti commigraret; se suæque omnia ad eum transferebat uxor, ita ut in dominium ejus veniret jure mancipii, & capite minueretur, & sustineret speciem liberalis servitutis, ut Servius ad IV. *Aeneid. vers. 103.* & Gellius lib. IV. cap. 3. memoriæ prodidere. Exhibat ergo ex patris potestate, cum in duorum manu simul esse non posset, Tacit. IV. *Annal. cap. 16.* Hoc vero mortuo, nubens solvebatur etiam tutela, quæ in libero homine tantum insistit, & quavis capitis diminutione perimitur. Hinc Cato apud Livium lib. XXXIV. c. 2. ex instituto majorum, feminas in manu parentum, fratrum, virorum esse ait. & Boetius illa Ciceronis verba in Topicis: *Si ea mulier testamentum fecit, quæ se capite nunquam dimittit, non videtur ex Edicto Prætoris secundum eas tabulas possessio dari*, illustrans, ad rem scribit: *Mulieres antiquo jure tutela perpetua continebat. Recedebant vero a tutoris potestate, quæ in manum viri convenissent: itaque fiebat eis prioris status permutatio, & erat capite diminuta, quæ viri convenisset in manum.* &c. De hac in manum conventionem egisse Præ-

torem in l. 2. D. qui satisd. cog. & Ulpianum in l. 2. §. bis D. de cap. min. Cujacius sibi persuadet lib. IV. Obs. cap. XI. nescio an aliis.

§. XXIII.

Alter modus, quo feminae ab hac tutela liberatae, est jus trium liberorum; quod variis privilegiis, Augusti lege Julia & Papia, in honoribus adipiscendis, in munere immunitate, in jure Quiritium adipiscendo, etiam in liberatione a tutela fuit ornatum. Auctor enim incertus in fragmento supra §. 13. relato, testatur: *Mulierem, jus trium liberorum habentem, sine tutoris auctoritate manumittere posse.* Cui accedit Plutarchus, Trajani Imperatoris æqualis, qui in vita Numæ cap. XVIII. ubi præmia & honores Vestalium exequitur, hoc modo scribit: *Τίμας δὲ μεγάλας ἀπέδωκεν αὐταῖς, καὶ ἐστὶ καὶ τὸ διαδοῦναι ζῶντες ἕξαι πατέρας, καὶ τ' ἄλλα πρᾶττιν, αὐτὴν προσετὴ διαγινώσκας, ὑπὲρ αἱ τριταῖδες.* *Honores magnos Numa iis tribuit, in quorum numero est, quod vivo patre testari possint, atque alia facere, sine tutore, eo modo & jure, quo matribus trium liberorum id permiffum.* Verum non Numa illis hoc privilegii dedit, cujus tempore jus illud erat ignotum, sed Augustus, ut ex Dione Cassio bene observavit Justus Lipsius de Vesta & Vestalibus cap. XII. Is etiam ex privilegio speciali Octaviae & Liviae concessit, ut res suas sine tutore agere possent. Dio Cassius lib. 49. *τῇ Ὀκταβίᾳ τῇ τε Λιβίᾳ καὶ ἑκατέρᾳ, καὶ τὸ τὰ ὑφ' ἑαυτῶν κυρὴν τίνας διακίαν, τότε ἄδεις καὶ τὸ ἀνυβρίσκειν ἐκ τῆ ὁμοῖα τοῖς δαμάρχοις ἴδωκεν.* *Octaviae & Liviae statuas dedit, utque sine tutore res suas agerent, & eodem jure sacro sanctae, quo tribuni plebis essent.* Ait Plutarchus, Vestales jure trium liberorum subnixas, testamentum facere potuisse, καὶ τὰλλα & alia, ea scilicet, ad quæ alias tutoris auctoritas requirebatur, præcunte Ulpiano fufius a nobis explicata §. 10. & seqq. In his §. 14. enarravimus alienationem rerum mancipi, cui necessario tutor adhibendus, nisi mulier tres liberos superstites haberet, eosve amisisset, vel beneficio Principis jus liberorum esset consecuta. Talis erat STATIA IRENE,

NE, quæ JUS LIBERORUM HABENS, M LICINIO TIMOTHEO DONATIONIS MANCIPATIONISQUE CAUSA monumentum sine tutore, H. S N. I. MANCIPIO DEDIT in lapide apud Gruterum pag. 1081. quem erudite illustravit Doctissimus Brummerus ad Legem Cinciam cap. XIV. Discrimen autem hic, ut alibi in Scto Tertuliano & successione liberorum, servatum est, inter ingenuas & libertinas, illæ per tres, hæ per quatuor demum liberos tutelam evadebant. Ulpianus tit. XXIX. §. 3. *Lex Papia Poppæa libertas, quatuor liberorum jure, tutela patronorum liberavit, & cum intulerit, jam posse eas sine auctoritate patronorum testari &c.* Et hoc addam, ex his discrimen muliebris tutelæ a cura notasse, Jac. Gothofredum in *Notis ad L. Jul. & Pap.* pag. 324. quod mulieres propter liberos a tutela liberantur, minores a cura nequaquam, ut ad L. Juliam scribens Ulpianus in l. 2. D. de Minor. testatur.

§. XXIV.

Quousque muliebris hæc tutela apud Romanos in usu fuerit, non facile dictu est. Nisi quod, crescente muliebri licentia, & labascentibus illius Reip. moribus, hæc quoque prudentiæ civilis pars feminarum impudentiæ sensim succubuisse videatur. Rarior item facta, ex quo steriles & orbæ jus trium liberorum, beneficio Principum, frequentius impetrarunt. Imperatores enim & aulici, sexui femineo plus, quam par erat, indulgebant, ut arcana virorum expiscarentur. Ipsæ etiam, cum maritis imperium domesticum extorsissent, rebusque civilibus se immiscerent, tutorum impatientes factæ. Plane vigente hac tutela, magna causa non fuisset, cur Augusti & Claudii Edictis interdiceretur, ne feminae pro viris suis intercederent, utque Senatus-consulto Vellejano feminis omnibus subveniretur. l. 2. D. ad St. Vellej. Sed quia matronæ passim abdicabant tutores, aut eos vilipendebant, alio modo earum imbecillitati erat succurrendum. Papinianus quidem in l. 13. §. 2. D. de Tut. & curat. datis. sic respondet, quasi nullus suo ævo mulierum

lierum tutor; quando patronum tutorem esse desinere scribit, si puella duodecimum annum impleverit, ac tum dari curatorem desideranti feminae minori eundem, qui fuerat tutor. Nollem tamen cum Cujacio inde quis colligat, Severi Augusti tempore, tutelam nostram prorsus cessasse; cujus Apulejus & Ulpianus, tanquam aetate sua usitatae, adeo crebram mentionem fecere. Adhuc curatores simul cum tutoribus habuisse mulieres viripotentes, & loca Jurisconsultorum multa a Triboniano ad jus novum inflexa esse, diximus supra; & summus Cujacius varia tutelae hujus vestigia, in Pandectarum fragmentis, se reperisse putat *lib. VI. Obs. cap. 11. & lib. XXII. cap. 20.* Nec tamen inficiabor, ex eo tempore, quo feminis minoribus, etiam bene rem suam gerentibus, promiscue curatores dari praecepit Antoninus Philosophus, indices magis magisque, jam ante Papiniani aetatem, mutasse tutelam: quia ad ea, quae ante tutore tantum auctore fiebant, velut ad dotem dicendam, etiam simpliciter curator dabatur, *l. 7. D. de Tut. & cur. dat. l. 60. & seqq. de Jure dot.* quae & alia loca a Triboniano esse mutata, vix dici posse, causatur Bachovius *ad pr. l. Quib. mod. tut. fin. n. 4.* Plane post Constantini tempora, feminae puberi curator dandus esse dicitur in Codice *l. 7. C. Qui pet. tut.* ut vix muliebris tutelae vestigia supersint, in *l. 3. C. de legit. tut. & l. 2. C. Th. de tut. creand.* quod multi veterum pariter ac recentiorum sibi perscrutasse. Malim etiam in *l. 7. C. de Susp. tut.* vocem *tuarum*, in omnibus codicibus non currentem, in spongiam incumbere, quam cum Celebrerrimo Voetio *ad tit. D. de Susp. tut. n. 4.* eam de tutela sexus interpretari, id quod vel sola *administratio*, bis tutori illi tributa, vetat. Ceterum id mirum videri possit, cur Justinianus, Imperator oppido mulierosus, & rei uxoriae, in gratiam reverendissimae suae Theodoraе, valde intentus, in usum non reduxerit tutelam hanc, ad praesidium sexus infirmioris repertam; nisi forte ipsum movit, quod dubia varia inde oriuntur, & actibus bona fide gestis, quibus indiffe-

differeus sæpe solennitas defuit, evertendis malevoli ea abuti possint & abutantur: feminæ item absque curatore læsæ quandoque, exemplo minorum, in integrum restituantur l. f. C. de Juris & facti ign. l. 3. C. Tb. de in integr. rest.

CAPUT II.

JUS GERMANICUM EXPONIT.

§. I. Tutela perpetua, apud nationes Germanicas, *Mundium dicta*; tutor mundualdus, mundiburnus, mundiburdus; unde mainbour, momber. Harum vocum natales examinantur. II. Cum Græcorum tutela sexus convenit, quod viduæ in tutela filiorum. III. Differt ab ea, quod mariti, apud Germanos præcos, per omnia uxorum tutores: quæ coemtae, per nuptias patria potestate liberabantur. IV. Maritalis tutela apud Gallos, Hispanos, Belgas, & Frisios utrosque. V. Eadem apud Bremenses, Hamburgenses, Lubecenses; non tamen per Germaniam universam. VI. Maritus est tutor uxoris legitimus, cælibum dativi. Charta antiqua Alamannica excussa. VII. Auctoritas tutorum muliebrium an hodie ex intervallo interponi possit? quis interpositæ sit effectus. VIII. Quatuordecim differentie, inter tutelam hanc Germanicam, & tutelam ac curam Romanorum. IX. Curatore ad litem opus est, si mulier in judicio agat. Ineptiæ Speculi Sax. ejusque interpretis. X. Mulier hodie sola personam standi in judicio non habet; sed marito, vel curatore opus. XI. Extrajudicialia negotia alia curatorem postulant. XII. Alia non item, quæ ad 18. classes revocata. Beyer de hujus tutelæ usu judicium. XIII. Modi, quibus tutela dativa & legitima finitur, antiqui & novi.

§. I.

DE prisca Romanorum sexus sequioris tutela, prolixius aliquanto egimus hætenus; sicut currente rota, quæ urceum instituerat, amphora sæpius exire solet. Nunc instituti ratio ad Germanos nos vocat, quorum tutelæ longius inhærendum foret, nisi a recentioribus, Mevio, Carp-zovio,

zovio, Bergero, Beyero, aliisque Saxonice Jurisconsultis passim, magis quam isthæc Romana, esset exulta atque illustrata. Selectiora igitur quædam, & non pertrita, nec Pragmaticis ingrata dabo. Ad hæc autem antequam perveniamus, a primis incunabulis, & velut ab ovo, res repetenda erit; ut non heri aut nudius tertius tutores apud nos exortos, sed ab ultima gentis nostræ origine, eos jam in usu fuisse patecat. Tacitus equidem de Mor. Germ. cap. VIII. memoriæ prodidit, sanctum aliquid & providum inesse feminis, nec aut consilia earum aspernanda, aut responsa negligenda, credidisse Majores nostros. Maris tamen naturam digniorem, atque imperantem esse, simul agnoverunt, sexumque infirmum, cui valde metuebant, suæ custodiæ atque curæ subjiendum existimarunt: sicut vetustissimi Galli, uxores suas, earumque fortunas in potestate & tutela sua habuisse, traduntur a Cæsare lib. VI. de Bello Gall. cap. 18. Mansit hic mos diu apud Gentes origine Germanicas omnes, ut feminæ nuptæ in maritorum, viduæ & puellæ parentibus orbatae in agnatorum aliorumve tutela essent. Langobardorum Rex Rotharis lib. 2. tit. 10. circa annum 640. constituit: *Nulli mulieri liberæ sub regni nostri ditione, lege Langobardorum viventi, liceat in suæ potestatis arbitrio, id est, sine mundio vivere; nisi semper sub potestate viri, aut potestate curtis Regiæ debeat permanere: nec aliquid de rebus mobilibus aut immobilibus, sine voluntate ipsius, in cuius mundio fuerit, habeat potestatem donandi, aut alienandi.* Mundium notat tutelam, nomenque accepisse fertur a *mund*, ore, sive ab orando & loquendo, quod pupilli causam in iudicio & extra iudicium agere debebat. Hinc *pupillus onmund*, & majores *selfstmonden* dicti. Ita Voss. lib. 2. de vit. ferm. Lat. c. 12. & Schilterus Exerc. ad ff. 36. §. 64. sed qui sententiam suam, curis secundis, in glossario Alamannico, rejecit. Goldastus in disc. de repræs. in primog. *munde* potestatem, auctoritatem, & dominium actuale Germanis fuisse scribit: prorsus ac Rotharis, in laudata lege Langobard.

bardorum *sine mundio vivere*, suæ potestatis esse interpretatur. Alii a *mund*, quod cogitare, curare notat. Ælfrédus Rex in præfatione, tractatui de lingua Gotthorum a Vulcanio subjuncta: *tha gemunde ick, tum cogitabam*. Alii rursus a *munto*, quod tueri significat, apud Otfridum 3 Evang. 1. *Suntar sie imo munto*, hoc est: *ita mater infantem tuetur*. A *mundio* dicta *mundiata* mulier, quæ in tutela est. In Legibus Luitprandi Regis Longob. rubrica tit. 68. est: *De mundiata in sacramentum missa*. Inde & *mundualdus* tutor constitutus, qui mundi curam gerit, a *walien, wahren, warten*, vel *walt* potestas. Tabularium Casauriense: *Ego Adelberga filia quondam Laponi, consentiente mihi Sigolfo filio, & mundualdo meo, concedo ad usum fruendum vobis*. Eadem notione *Mundiburnum* dixit Burchardus Wormaticensis in lege Familiæ: *Si quis filiam alterius vi rapuerit, cuncta vestimenta, quibus tunc induta fuerat, quando rapta est, singulariter in triplum patri ejus vel mundiburdo restituat*. Rursus in formula effectuationis A. 1335. scripta, quam exhibet Freder. a Sande in comment. de effectuatione c. 2. *Constitutus in judicio, dominus Jacobus, dictus Vos, investitus Ecclesiæ de Duffelwerde, & Hilla ejus uxor legitima, cum suo electo Mundiburdo, & sibi judicialiter dato*. *Mundiburdus* est onus tutelæ, a *mund* & *burde*. Hinc in capitularibus Caroli M. & apud Marculfum 1. form. 24. pro quavis defensione accipitur, quod Hieron. Bignonius ad dictam formulam, aliique pluribus docuere. A *mundiburni* etiam voce depravata & contracta, Gallorum & Belgarum *Mainbour, Momboir, Munbour, Momboor, Momber, Voormomber* fluxere, non a *Mondborg* fidejussor, quod Grotius volebat lib. 1. manud. cap. 4. Videatur Kilianus in Diction. Menagii pag. 320. Tutor vocatur in antiquissima lege Saxonum cap. VII. apud Leibnitium tom. 1. Script. rerum Brunsvicens. pag. 79. *Qui viduam ducere vult, offerat tutori pretium emtionis ejus, consentientibus ad hoc propinquis ejus. Si tutor abnuerit, converstat se ad proximos ejus*.

Satis testimoniorum de perpetua Germanorum tutela. At modus ejus, & ratio deferendi non omnibus eadem. Quod enim supra singulare apud Græcos fuisse demonstravimus, viduas matres filiorum subjici tutelæ, idem apud Germanos obtinuit; qui viduas non in suorum, sed in defuncti mariti agnatorum manu esse voluerunt. Vetus charta, de A. 874. ex chartario Casauriensi, apud Mabillon. de re diplom. lib. vi. n. 105. & apud Baluzium in Appendice ad Agobard. Respondit ipse Sisenandus: Vere ipsam Gundi ego uxorem habeo, eo quod mihi eam ad legitimum matrimonium tradidit Amalfredus, filius ejus, cum Mundualdo suo. Et illud, quod dicitur, quia veste religionis induta post mortem Justonis, qui fuit anterior vir ejus, non est veritas. Et statim: Et ipse Sisenandus dedit quadiam (cautionem) ipsam Gundi uxorem suam, ad placitum adducendam, una simul cum Amelfredo, filio & Mundualdo suo, quem dicebat ei ad uxorem eam tradidisse, posito inter eos constituto. Item: Et dixi, quod mihi eam ad uxorem tradidisset Amalfredus filius ejus, & Mundualdus ejus. Apertius id constat ex alia charta Tabularii Casauriensis, apud Cangium in voce *Mundium*; cujus verba sunt ista: Ego Helegrina, filia quondam Caroli - consensu & voluntate, de filio meo Aliperto, in cujus mundium ego permaneo, venundavi. Eodem spectat lex antiqua Langobardorum lib. 2. tit. 6. §. 1. tit. 37. §. 4. & clarior Saxonum tit. VII. Qui mortuus viduam reliquerit, tutelam ejus filius, quem ex alia uxore habuit, accipiat: si is forte defuerit, qui frater est defuncti: si frater non fuerit, proximus paterni generis, vel ejus consanguineus. Eleganter docuit Schilterus Exerc. XXXVII. §. 241. rationem hujus juris ex jure familiæ pendere, quod maritus, veteri Germanorum more, sibi ac familiæ suæ acquirebat; hoc effectu, ut si vidua ad secunda procederet vota, novus maritus emtionis pretium tutori solvere teneretur. Idem vetusti hujus juris vestigia in jure Provinciali Saxonico & Suevico latere ostendit. Sic enim

enim lib. I. art. 23. *Wo die Soehne binnen ihren Jahren seind, ihr ältester ebenbürtiger Schwertmagt, nimt das Heergewes allein, und ist der Kinder Vormund daran, bis sie zu ihren Jahren kommen.* Et in fine: *Er ist auch der Witben Vormund, bis dass Sie einen Mann nimt, ob Er ihr ebenbürtig ist.* Jus Suevicum similiter cap. XXVII. nisi quod viduæ arbitrio committat: *Er ist auch der Witben Vormund, dieweil Sie ohn Man ist, ob Sie will, und ob Er ihr ebenbürtig ist.* Sed hoc jure non amplius utimur.

§. III.

Mulieres nuptæ autem, apud Græcos & priscos Romanos, certo modo & fine, in manu maritorum fuere; ut præter ea, quæ capite præcedente allata sunt, Callicratis Pythagoricus apud Stobæum c. 83. ostendit. At Germani, plenius & per omnia eas maritorum consilio regi voluerunt: quo viris obnoxie essent & subjectæ, neve quid aliud agerent, quam ut illis in omnibus obsequerentur. Lege Attica, uxores hæcenus minorennibus æquiparatæ, ut non possent contrahere, nisi usque ad medimnum hordei. Sed arctius quid Hertius in notis ad Pufendorf. lib. III. c. 6. §. 5. apud nationes Germanicas observavit. Jure Suetico enim, maritus contractum, ab uxore sine ejus consensu initum, rescindere potest, si pretium solidi summam excedat. Jure Lubecensi autem uxor nihil aliud, quam linum & telam, ad usum rei domesticæ, comparandi facultatem habet. lib. III. tit. 6. art. 13. Plane majorum nostrorum ætate, Tacitus scribit, sic unum feminas accepisse maritum, quo modo unum corpus, unamque vitam; ne ulla cogitatio ultra, ne longior cupiditas, ne tanquam maritum, sed tanquam matrimonium ament: quin ipsis incipientis matrimonii auspiciis admonitam, venire se laborum periculorumque sociam, idem in pace, idem in prælio passuram ausuramque. Inde in hunc diem pro lege observata bonorum omnium communio descendit, observante Grotio de Antiquit. Reip. Batav. c. 2. Nuptiis quoque filia patria

potestate liberabantur; unde quos Cæsar *lib. VI. de Bell. Germ.* impuberes dixit, Græcus ejus interpretes *αἰνῆτες* vertit, idque vox Freyen, *matrimonium inire*, satis indicat. Maritus vero sponsam coemebat pariter, ac apud Romanos, quod potestatis maritalis erat indicium. Fredegarius enim in Gregorii Turonensis historia epitomata *cap. XVIII.* testatur, apud Francos sponsum sponsalia initurum, sponsæ obtulisse solidum & denarium, idque secundum legem Salicam *tit. IV. cap. 1.* Per annulum quoque manus, per calcamenta pedes sponsæ vinciebantur, in subjectionis signum; auctore eodem Gregorio *in vitis Patrum cap. XX.* Hinc maritus uxoris mundium ab ejus parente acquirere dicitur in *Lege Alem. tit. 54.* & Rex Rotharis, cum in *L. Longob. lib. 2. tit. 10.* mulierem in Selbstmundo vivere prohibuisset, subjicit limitationem, *nisi semper sub potestate viri.* Inde & Speculum Saxonicum *lib. I. art. 45. §. 5.* sancit, maritum esse tutorem uxoris legitimum, post thalami consecrationem: Adde Constitutionem Augusti Electoralem XV. parte II. quam sex & triginta definitionibus illustravit Carpzovius, & Jacobi Diss. *de Curat. mulier. Sax.* habita Lips. 1688.

§. IV.

Eadem hæc curatela maritalis, variis etiam locorum consuetudinibus & Statutis, tum ob sexus fragilitatem, tum ob mariti honorem, tum denique propter utriusque utilitatem resuscitata est & confirmata, ita ut maritus hodie sub nomine Curatoris uxorii, *Des Ehevogts, oder Ebelichen Vormundes*, in plerisque regionibus venire soleat. Vid. Brunnem. *ad l. 4. C. de Excusat. n. 3.* Jure Gallico *Mari & Bail* vulgo appellatur tutor muliebris, in consuetudinibus municipalibus: idque ex prisca maritorum potestate, cujus meminit Cæsar l. VI. d. B. G. c. 6. Vid. Charondas *ad conf. Paris art. 223.* & Baquetus *du Droit d'aubaine c. 17. n. 5.* De Hispanorum tutela perpetua & generali, testatur Alphonsus de Alzeved. *ad Reg. const. Hisp. lib. V. tit. 3.* Florentiæ,

tiae, Papiæ, Ticini, Eugubii, Mediolani, & in aliis quam plurimis Italiæ locis, sine mariti consensu, uxorem testari, aut contrahere non posse, docet Baldus *lib. 1. cons. 488.* & in *l. velles C. de Revoc. donat.* & Pancirolus *lib. 1. var. lect. cap. 92.* Apud Belgas, Flandros & Brabantos, contractus, sine mariti auctoritate initus, non sortitur effectum. Burgundus ad *consuet. Flandr. tr. 3. n. 1.* & Voetius ad *tit. de judic. n. 14-19.* & *de ritu nupt. n. 41. ad 62.* In antiqua Frisionum lege *tit. 9. §. 8.* & *9.* qui puellam virginem rapuerit *tertium Vueregildum patri, sive tutori pupillæ* componere jubetur. De hodierno tutore in Frisia Occidentali Sande *lib. II. tit. 4. def. 1.* & Herbajus *Rer. quotid. cap. 13.* videantur. Frisiæ Orientalis hoc est Statutum: *Alle unjabrige olderlose Kinder, und alle Frauens Personen schoelen hebben einen gebornen ofte gekornen Vormund. Eene Jonckfroue, Maget, ofte Weduwe, ofte ander Frouens Personen schoelen nicht moegen versetten, verkopen, verpanden Hues, Erse ofte Werse, dann die Froue mit verloewe oehres Mannes, und die Jonckfroue und Weduwe mit orlof des Richters.* At noviori consuetudine ad jus civile reditum esse, compluribus supremæ Curiae provincialis præjudiciis comprobatur Cl. Eyben in *Disp. de tutela fam. p. 1. membr. 1.*

§. V.

Jure Bremensi tutoris auctoritas olim adeo necessaria fuit mulieri, ut ne quidem testimonii dictio ei permitteretur sine curatore. Ita in Ordehl 38. *Dar en mag neen Paape, edder jonge Frouwe jeemand vortuegen, ver unsen Herren Vagade, idt sy alme elrovet, edder entsangen mit Vormündern.* Id quod nunc quidem usu non servatur, & plerisque rationem habere non videtur: at infra ostendemus hunc, vetustissimum gentium Germanicarum fuisse morem, ne mulieres personam standi in judicio haberent. In Statuto Hamburgensi *part. I. tit. 9. art. 5.* expresse dicitur: *Der Frauen Vormund ist ihr Mann, so lange er lebet.* De Jure Lubecensi & praxi communi, Mevii verba addam ad *lib. 1. tit. 7. art. 4. n. 4.*

G g 3

Mori-

Moribus nostris, in universa fere Germania, jus illud antiquum receptum reperitur, nam ex istis feminae perpetuae tutelae ferme subjacent. Cum quo facit Gifanius in comment. ad l. 3. C. de legit. tut. Moribus nostris jus vetus fere invaluit, ut mulieres vere sint in perpetua tutela; maritae quidem in mariti, coelibes vero aut viduae in agnatorum, aut a magistratu datorum potestate. His accedat tertius Brunnemannus ad l. 2. C. Qui daretur. Hodie non tantum jure Saxonico, sed etiam consuetudinario, passim ubique locorum mariti sunt tutores ac curatores uxorum legitimi. Nec tamen inficiari ausim, introducto semel jure Romano; quasdam provincias juri patrio, maxime quod ad virgines & viduas, repudium misisse; sive quod prisca feminarum simplicitas cessare, sive quia curatela illa litium nimis ferax esse videbatur. In Gallia feminas innuptas, si iustae aetatis sint, nullius viri auctoritate regi, scribit Duarenus ad tit. de Ritu nupt. pag. 245. Apud Hollandos & Trajectinos similiter marito destitutae, siquidem minores reguntur auxilio curatorum, si majores suae tutelae relinquuntur. Grot. i. manud. 4. in fin. Rodenburg in proleg. de jure conj. n. 11. Licet Notarii quidam, in instrumentis suis, tutoris mentionem facere soleant, quos ignorantiae fratres Anton. Matthæus ad §. 1. Inst. de tutelis perstrinxit. In Pomerania Mevius part. V. dec. 99. narrat, arbitrio mulierum relinqui, utrum Curatorem petere velint, nec ne, & illas nihilominus sine ejus consensu agere & contrahere posse. Quin hodie in dubio pro jure civili standum, & marito de receptiis curatorio nomine agenti, exceptionem legitimationis valide opponi posse, scribit Hahn. ad Wesf. de tutel. n. 5. & Esbach. ad Carpz. p. 2. c. 15. def. 1. Quibus junge Mev. p. III. dec. 335.

§. VI.

Liquet ex his, tutorem mulierum alium esse legitimum, alium dativum. Legitimus uxoris fuit maritus, L. Langob. l. 2. tit. 55. n. 2. Si quis dixerit de uxore aliena, quod mundum de ea ad ipsum pertineat, non ad maritum. Virginum autem

autem & viduarum tutores adgnati. L. Langob. l. 2. tit. 11. n. 2. *Si quis mundium de muliere libera aut puella in potestatem habens, excepto patre aut fratre &c.* Maritus hodie statim ex nuptiis, postquam thorum conjugalem est ingressus, sine decreto, ipso jure sociæ suæ curator efficitur, licet ipse minorennis sit, eo quod tum ex patria & curatoria potestate exit, atque ex statuto majorennis efficitur. Mulier vero contractis intra minorennitatem nuptiis, cura pristina liberatur, & in hanc transit. Si vero majorennis nubir, hoc ipso velut in minorennium classẽ rejicitur, & marito, tanquam tutori suo, incipit esse subjecta. Vigente enim communione bonorum, aut jure statutorio, ex quo maritus mobilium heres est, & fructus sibi vindicat rei muliebris, nil vetat, maritum uxoris suæ curatorem esse, imo utilius id esse videtur, ad tuendam mulieris fortunam, quæ communicatione fit mariti quoque communis. Ut adeo cessante juris Romani ratione, a redditione rationum desumta, id jus, meliore Germanorum sensu, non receptum videatur. Vid. Landrecht l. 1. art. 45. & lib. 3. art. 45. Argentor. ad conf. Britann. art. 410. Carpzov. p. 3. c. 23. def. 30. n. 5. Stryck. *Us. mod. Pand. ad lib. 27. tit. 1. §. 7.* Dativi tutores a Magistratu jurisdictionem, etiam inferiorem, habente ex officio, vel ad petitionem feminae, dato curatorio constituuntur, postquam manu stipulata, vel tactu baculi judicialis, fidem promissere. In ducatu Guelferbytano corporale jusjurandum præstandum est, Beyer *Spec. Jur. Germ. c. 27. §. 15.* Dantur Curatores omnibus feminis, virginibus & viduabus, etiam extraneis in Saxonia negotium gesturis. Personæ tamen illustres jurisdictionem habentes, & Ecclesiasticæ jam jure Germanorum mediæ ævi fuerunt exceptæ, & nunc excipiuntur. Vid. Schilterus *Ex. X. §. 18.* Nescio tamen an ad has referam chartam antiquam, ab Alamannis Rege Carolomanno scriptam, in qua Cotauvina, ancilla Dei donat, tutore aut non adhibito, aut certe ejus nomine non indicato, quod hodie tamen requiritur,

tur, si donatio rata esse debeat. Indicavit eam Goldastus in notis ad Dositheii fragmenta, & digna est, quæ hic legatur: *In Dei nomine: ego Cotaovina ancilla Dei, dono atque trado monasterium Sancti Galloni, ubi ejus sacrus requiescit corpus. Et hoc est, quod ego in Lutinach visura sum habere, & in alio loco, quæ dicitur Bessindorf, & in locis, campis, silvis, & omnia, quæ inibi visura sum habere, & casatos tres his nominibus, Ragingerius cum infantes suos, his nominibus Reghero, Wantilone, Waltricho, & uxore sua Fastrata, & filio eorum Wolfrido, & servo ejus Isamberto, & alio servo nomine Woto & Haccone, qui est in concambio cum Wichardo, si redimere se vult, det alium mancipium XL. manuum longum. Hi sunt testes, qui præsentés fuerunt & signaverunt. Sig. Cotaovine, qui hanc traditionem fieri rogavit. Sig. Wichardi SIG. TUTO. sig. Wotahar, sig. Amalger, sig. Theutbald, sig. Malcrot, sig. Tuslo, sig. Wolfberti, sig. Asihari.*

Ego itaque Albuinus clericus rogatus ab Cotaovina hanc cartam scripsi sub die VII. Kal. Octob. in anno 1. Regnante Carolomanno Rege.

§. VII.

Officium tutoris dativi (maritus enim dominus & legitimus administrator est) pariter ac apud Romanos, non consistit in rebus administrandis, sed interponenda saltem auctoritate, sive integranda persona mulieris fragilis & multis captionibus obnoxia. Consensus ille apud Saxones (1.) specialis esse debet, (2.) non verus tantum, sed & expressus, (3.) tempore celebrati negotii interpositus; anticipatus vel ex intervallo per ratihabitionem additus nil operatur. Carpov. p. 2. c. 15. def. 30. 31. Quæ sententia licet juris Romani subtilitatibus conveniat, ab ea tamen non immerito recessit Berger. in *Elect. proc. execut.* §. 18. p. 22. Rivinus ad *Ord. Proc.* t. 8. enunc. 38. & Titius in *Jure privato lib. VI. c. 19. §. 9.* quos in responso secuti sunt Jurisconsulti Halenses apud Stryck. in *Uf. mod. lib. 26. tit. 8. §. 3.* Haud dubie enim illa tantum apud Germanos obtinent; quæ ex æqui-

æquitate naturali, & indole officii curatorii deducuntur; Actus autem legitimi pariter ipsis incogniti fuerunt; quam regula, quod nullus tertio acquirere, nec tertium obligare queat. In Hollandia plane & Trifia, ubi consensus mariti solennitatis causa non adhibetur, sufficit maritum in universum uxori potestatem rerum suarum fecisse; aut scientem & præsentem non contradixisse; vel negotium rati habitione sua firmasse *arg. l. 5. C. de Nuptiis. l. ult. C. ad Sc. Maced. Sande lib. 2. tit. 4. def. 4. Rodenburg de Jure conjug. tit. 3. cap. 1. n. 15. Herbaj. rer. quot. cap. 13. §. 18.* Ceterum negotia consensu curatoris celebrata valida sunt, ex iisque femina efficaciter conveniri potest. Sine curatore celebrata nulla sunt, nec naturaliter obligatur mulier: quia par ejus & pupilli est ratio; cujus obligationem naturalem, si quæ subest, lex positiva reprobatur; ut tamen fidejussores teneat obstrictos, & ipsa, si locupletior facta, civiliter teneatur. *arg. l. 5. pr. D. de Auct. tut. l. 41. D. de Cond. indeb. Carpzov. d. c. def. 7. Grot. Manud. ad Jurispr. l. 1. c. 5. n. 38.*

§. VIII.

Verum, quo magis indoles hujus tutelæ Germanicæ elucescat, age, eam cum tutela, & cura illa, cui jure Romano minores, prodigi, furiosi, & his similes subjecti sunt, componamus; sic enim diversa longe potestas se ipsam ostendet, nec a tutela Romana, nec a cura ad hodiernum jus maritorum vel curatores sexus recte trahi argumentum, liquabit. Æquiparantur quidem hoc respectu mulieres minoribus, adeo ut in Statuto Hamburg. P. 1. tit. 9. art. 1. dicatur; omnes uxores & virgines pro minorennibus haberi: certum tamen est, in multis feminas a minoribus differre. *Mevius ad Jus Lubecense l. 1. tit. 7. art. 4.* quatuor tantum differentias dedit, at plures, nisi fallor, dedisse oportebat. I. esto, quod minor curatorem non habens valide contrahit, femina sive habeat nec ne, nihil agit, sine curatoris consensu. II. Curator cum minore contrahere non potest: noster mobilia recte a muliere emit; maritus etiam

H h

quem-

quemadmodum Romæ ab uxore capere & commodato accipere poterat, sic magis jure hodierno: Novi tamen curatoris auxilio sic eam indigere vult Carpz. *dist. c. 16. def. 23. 2.* III. Bona minorum non nisi urgente æris alieni necessitate & decreto Magistratus alienari possunt. At mulier majorennis solo tutoris, vel mariti consensu valide vendit, donat, alienat. Carpz. *p. 2. c. 23. dec. 31. Mev. ad Jus Lub. d. l. n. 8.* IV. Curatores sub finem administrationis ad rationes reddendas, minoresque indemnes præstandos tenentur: Noster autem tutor ad neutrum tenetur; nec quidem officii nomine, si dolus absit, conveniri potest. Argentræ *ad consuetud. Britan. art. 410. gl. 2.* Unde post Christineum *ad Leg. Mechl. tit. 9. art. 1.* & Mornacium *ad l. 21. C. de Proc.* Neostadius scribit: Rem pupilli salvam esse debere, mariti vero, qui liberos suscepit, potestate rem mulieris universam absorberi posse, si pactis nuptialibus aliud non sit cautum, *de pactis antenupt.* *Obs. 9.* Hinc V. fuit, nec ad inventarium teneri tutorem, quia non administrat. Adeo ut nec in marito repertorii sit usus, si dos certa sit, & testibus aut instrumentis probari queat; sin secus, catalogum illatorum negare uxori foret iniquum. VI. Bona curatorum minoribus pignore legali devincta sunt: mulieri tacitum pignus non competit; nec in bonis mariti, pro dotis restitutione. Sande *lib. 2. tit. 4. def. 1.* Frantzk. *p. 1. ref. 17. n. 68.* Berlich. *p. 1. concl. 67. n. 25.* VII. Curatores inviti ad curam suscipiendam coguntur, hoc munus regulariter invitis non deferretur. Muller *l. 4. Semestr. c. 23.* Carpzov. *dicta c. XV. def. 28.* Porro VIII. si pupillus condemnatus, non sit executio in bonis tutoris: in bonis mariti executio fieri potest; nisi aliter ante nuptias conventum. Abrah. a Wefel *ad nov. const. Ultraj. art. 6. n. 16.* IX. Sequi tutorem, qui domicilium mutat, pupillus non tenetur: uxor maritum, quocunque migret, sequi debet. Covarr. *de matrim. p. 2. c. 7. n. 5.* X. Curator alieno tantum negotio adest, maritus suæ utilitatis causa, ut dominus vel usufructuarius

Etuarius Carpz. p. 3. c. 25. d. 6. XI. Hinc actum invalidum reddere potest sua auctoritate, non ille, qui solennitatis gratia tantum adest. Minores præterea læsi XII. ex suis contractibus consentiente curatore initis, in integrum restituantur. At mulieres majorennæ non restitui cum Mollero, Rauchbar & Berlichio existimat Carpzov. d. c. def. 33. Faber in C. l. 4. t. 21. d. 4. & Mevius ad Jus Lub. d. l. n. 11. In alia omnia tamen abiit A. C. Jacobi, necessitatem habendi curatorem opponens, qua femina minoribus exæquantur, in *diff. inaug. de in integr. restit. mul. cap. 2. habita Witteb. a. 1671.* Adstipulatur huic Cl. Schilterus *Exerc. ad D. XI. §. 9.* & ostendit, non tantum Imperatores Honorium & Theodosium in l. 3. C. *Tb. de in int. rest.* quæ a Justiniano in l. 8. C. *de in int. rest. min.* castrata est, mulieribus consultum ivisse, sed & ex Rogerii Regis & Friderici Imperatoris constitutionibus, eas, si non modice & in judicialibus læsæ fuerint, in integrum restituendas, id quod moribus ad extrajudicialia sit extensum. Vid. Richter *dec. 27. n. 33.* & *vol. 2. conf. 484. n. 9.* Carpzov. *proc. 13. 1. 194.* & *p. 1. c. 26. D. 23.* Abusum tamen restitutionis in feminis, non ferendum esse, docuit Mev. *p. 1. dec. 134. & 218.* Lyncker. *dec. 453.* & verius est, a minore ad mulierem illationem non valere. XIII. Minor curatore eodem in omnibus uti debet: mulier vero, quamvis Curatorem generalem habeat, ad hunc illumve actum eligere specialem potest. Lynck. *dec. 1466.* XIV. Denique multarum feminarum curator quis esse potest, etiam ætriciæ & reæ; non vero plurium maritus. Lynck. *dec. 512.*

§. IX.

Missis differentiis, nunc ad negotia progrediamur, in quibus Curatoris consensus requiritur, vel non. Apud Romanos, supra vidimus, mulieri auctoritate tutoris opus fuisse, si lege vel iudicio agat, si se obliget, si nubat, dotem dicat, testamentum condat, manumittat, hereditatem adcat, rem mancipi alienet, tutelam liberorum suscipiat, & ut genera-

neraliter dicam, si quodvis civile negotium gerat. At quia mores Germanorum his per omnia non respondent, Curator mulierum *ad litem*, ab eo, qui *ad negotia* datur, & n hoc rursus Jus Saxonicum commune, ab Electorali probe distingui debet. Ad negotia judicialia indistincte Curator olim requisitus est. Speculum Saxon. lib. II. art. 63. *Es mag kein Weib Vorsprech sein, noch ohne Vormunden klagen. Das vorwirckte Ihn allen Calphurnia, die vor dem Richter misbarte vor Zorn, do ihr Will an vorsprechen nicht mogt fortgeben.* Ineptit Auctor Speculi, Ecco de Repkaw, vel quod proprium ejus nomen, Eyke van Ribikouwe, quando originem hujus prohibitionis ex l. 1. §. 5. D. de Postul. petit. Verba Ulpiani: *Origo introducta est a Carsania, improbissima femina, quæ inverecunde postulans, & Magistratum inquietans, causam dedit edito.* Sic Florentiæ legitur. Alciatus C. *Afrania* restituit ex Valerio Maximo lib. VIII. cap. 3. §. 2. in antiquis autem libris fere *Calphurnia* habetur. At non ex Jure Romano Saxones hoc recepere, nam & diu, ante ejus receptionem, Longobardorum aliarumque Gentium Germanicarum hoc fuit institutum, ut mulieres sine curatore personam standi in judicio non haberent, quod vel ex unico *K. und K. Land-Recht. IV. art. 58.* constat. Adhæc Prætoris edictum tutorem non exigit, nec mulierem pro se posulantem repellit. Magis autem ineptit interpretes illorum verborum Latinus, quod verbum *misbarte* explicat: *Quæ sexus verecundiam coram Rege ostendit*, id est partem, qua mulier erat, quam Pontifex alicubi similiter *pudentiam* appellavit. Pudet nugarum! Vel sola sexus imbecillitas, & litis pericula, tum cura rei familiaris, pudor item & verecundia (unicum & optimum feminarum ornamentum) castos movere potuit Germanos, ut a tribunalibus filias uxoresque arcerent. Quibus alia adhuc ratio accedebat, quod mulier negans dicta aut pacta esse, quæ confessâ erat auget coram judice, non poterat convinci, neque ex protocollo, neque per testes, aut Scabinos; quia jus non al-

julle,

luisse, & in circumstantiis facti sine Curatore læsa fuisse præsumebatur. *Spec. Sax. l. 1. art. 46.* quem illustrat Schilterus *Exerc. X. §. 20.*

§. X.

Jure Saxonico hodierno expeditum est, feminam ne pro se quidem postulare, nec se defendere sine curatore posse. *Carpz. p. 1. c. 1. def. 30. & de jure fem. sing. dec. 3. pos. 1.* Idem Jure Wurtembergico cautum tradit Schutzius in *comp. Lauterb. pag. 98.* De jure Lubecensi Mevius ad *p. 1. tit. 7. art. 1. n. 18.* De Gelria, Transilvania & vicinis provinciis Sande *lib. II. tit. 4. def. 3.* De Gallis, Hispanis aliisque Wibelius de *Contract. mulier c. I. n. 36. 47. & cap. 3. n. 253.* ubi plures laudat, & imprimis ex Budio confirmat, moribus Germaniæ pleræque & Belgicæ, postulare pro se non posse mulierem, nec ad actum voluntariæ quidem jurisdictionis, eam legitimam standi in judicio personam habere. Adde *Coler. l. decif. 12.* *Maurit. p. I. conf. 2. n. 13.* *Lyncker. decif. 1208.* ubi præjudicium. Aliquando autem mulier negotia judicialia sine curatore tractat, ut causas criminales & matrimoniales. *Voet. ad tit. de judic. n. 17.* *Mev. p. IX. dec. 16.* & maxime *Berger ad Ord. Proc. tit. 3. Obs. 4.* Sine eo quoque condit in judicio testamentum, fert testimonium, offert se ad jurandum, jusjurandum præstat, & appellationem interponit. *V. Jacobi dict. diff. c. 4. §. 15. 16. 17.* Quod si etiam copia curatoris haberi non potest, actus judicialis, sola muliere præsentē, celebratur *Mev. p. 2. dec. 206.* *Lynck. decif. 1398.* Ceterum mulieri, curatorem ad litem non habenti, judex ex officio dat: quod si maritus uxorem heredem instituit, & curatorem testamenti nominavit, is confirmatus a judice ad litem admittitur. *Mev. p. 2. dec. 168.* Quod ad maritum attinet, jure Romano uxor sine eo, in causis propriis, in judicio subsistere potuit; sic ut maritus pro uxore, & contra non conveniretur, *tit. C. Ne uxor pro mar.* hinc uxor litem suam marito mandasse proponitur. *l. 14. C. de Procur.* At jure Longobardi-

co actus mulieris in judicio susceptus, tum demum stabilis erat, si consenserat maritus, quemadmodum glossa explicat *legem 2. tit. X. lib. 2.* Et praxis quotidiana abunde docet, maritos sive actio intentanda, sive per alios mota excipienda sit, sive jus agendi stante matrimonio competere coeperit, sive nuptiis vetustius, uxores a maritis defendi, sicut æquum id putavit Justinianus. *Myns. c. 3. Obs. 53. Brunn. ad l. 21. C. de Proc. Goris Advers. tract. 1. c. 4. n. 5. Christineus ad conf. Mechlin. tit. 9. art. 1.* Apud Saxones autem prius a Magistratu curator dandus, cujus interventu lis vel causa ab uxore marito demandatur. *Carpz. p. I. c. 1. D. 31. 32. Richt. I. dec. 27. n. 21.* quod culpatur Mev. ad *Jus Lub. lib. I. tit. 10. art. 3. n. 18.* & rectius Ziglerus uxorem, una cum marito in judicio presentem, lites expedire posse tradit, ad *Ord. Proc. tit. 8.* Alibi etiam, ubi jus civile viget, nisi statutum vel consuetudo specificè probetur, causas suas absque curatore in judicio mulieri peragere licet. De Marchia Stryck. *Us. mod. lib. III. tit. 1. §. 5.* & de Ducatu Brunsvicensi in *notis ad Laut. tit. de pactis.* Tantum de judicialibus.

§. XI.

Quod ad extrajudicialia, jure Saxonico communi, uxores ubique curatoris consensu indigent, viduæ & virgines non item, quod retentum videtur ex jure Saxonum antiquo, lib. 1. art. 45. *Möge oder unbemante Weiber mögen wol verkaufen ihr eigen, ohne ihres Vormunds Urlaub, er sey dann Erbe dazu.* In Electoratu Saxonico autem, ut & apud Lubecenses, Hamburgenses, aliosque innuptæ pariter ac nuptæ hætenus minoribus comparantur, quod nullum actum sive contractum, quo patrimonium minui solet, sine Curatore celebrare possunt. Prohibentur ergo vendere, permutare, donare, bona hereditaria aut alias communia dividere, juribus suis renunciare, mutuam pecuniam accipere, debitum creditori solvere, aut debitorem suum ab obligatione liberare, compromittere, transigere, pactum de

de non petendo facere, fidejubere, res suas pignori dare, aut hypothecæ subjicere, in simultaneam investituram aliquem recipere. Mevius *ad Jus Lub. lib. I. tit. 10. art. 3. n. 13. & part. V. dec. 190.* Carpzov. *p. 2. c. 15. d. 2. 3.* Lyncker. *dec. 1016. 1041. 1141. 1406.* Adeo ut ex hujusmodi contractibus neque maritus neque uxor, stante aut soluto matrimonio conveniri queant, sed contractus sit ipso jure nullus. Carpz. *d. C. d. 1. 4. 5.* Sande *lib. 2. tit. 4. def. 3.* Lecuwen *conf. for. p. I. lib. 1. c. 7. n. 6.* Licet mulier renunciaverit formæ a Statuto inductæ, vel juraverit; nec enim juri publico totius sexus sequioris favorem concernenti, renuntiatione privata aut jurejurando derogari potest, *arg. l. 5. C. de LL.* Canones tamen religionem jurisjurandi tuentur Gail. *2. O. 39.* sed quia hujus vis personam jurantis tantum afficit, ejus heredibus nullitatis querelam concedit Carpz. *p. I. G. 15. def. 1.* quod præjudicio eodem firmat Philippi *ad decis. 59. Obs. 1.*

§. XII.

Est tamen ubi uxor sine marito, & mulier soluta sine expresso Curatoris consensu contrahit, se obligat, & de extrajudicialibus negotiis valide disponit. Nam si (1.) ab alio stipulata sit, aliove modo obligationem unilateralem acquisiverit, exemplo pupilli sibi emolumentum parabit: *pr. l. de auct. tut. l. 14. C. de Procur. Myns. c. 2. Obs. 34.* (2.) Ad actus ultimæ voluntatis curatore non est opus, quia nullus læsionis est metus, & dispositio fit in casum mortis, post quam re nulla eget. Berl. *p. 2. concl. 17. n. 18.* Singulari tamen Niverniæ consuetudine, mariti auctoritas in testamento uxorio requiritur, quam miratur Mornacius *ad aub. Sive a me C. ad. Sct. Vellej.* Sed satis eam ratione niti, Molinæus *ad conf. Alex. 155.* existimavit, & similem Eugubii, in Italia, obtinere Pancirol. *1. lect. 92.* testatur. (3.) Cessat auctoritas in donatione mortis causa, siquidem hæc liberalitas ob revocandi potestatem gravius præjudicium non parit, quam testamentum, legato comparatur, & morte demum

demum confirmatur. *l. 15. l. 32. l. 37. D. de M. C. donat.* Muller. *ad. C. Sax. p. 2. c. 15. n. 74.* Dissentit Schilter. *Eccl. 43. th. 31. Sande lib. 2. tit. 4. def. 4. ibique allegati.* Præterea (4.) vitium habet regula in muliere mercatrice, sive principaliter contraxerit, sive fidejusserit intuitu amercaturæ, sive delegari se ob mercaturam passâ sit, sive mutuum ad mercaturam acceperit, sive merces in quibus negotiatur pignori obligaverit; sive minorennis, sive majorennis sit. Ita jure Bremensi, Coch *in synopsi. Stat. Reip. Brem. tit. 3. n. 1. Lubecensi lib. 1. tit. 10. art. 1. ibique Mevius n. 57. seqq.* Hamburgensi *p. 2. tit. 8. art. 1. Saxonico, Novell. Elect. Augusti l. 2. consl. 15. Prussico l. 1. tit. 24. art. 13. Bavari- co apud Schilter. Ex. 28. §. 6. lit. a. Prussico, lib. 1. Ord. tit. 2. §. 2. Belgico, Regner ad tit. de Scit. Vellej. Norico, Rittershus. ad Novell. p. 1. Femine (5.) in rebus ad œconomiam pertinentibus libere negotiantur, valideque sine curatoris aut mariti consensu obligantur. Wibel. *de Contract. mul. c. 4. n. 292. Grotius Manud. l. 1. c. 5. n. 38.* Personæ item illustres (6.) quæ territoria gubernant, & a Consiliariis sunt instructæ, curatore non indigent, Carpz. *p. 2. c. 15. def. 9. Lyncker. dec. 797. Ludolph de jure fem. illustr. Sect. 1. §. 25. Excipiuntur (7.) mulieres sine curatore dolum committentes vel delinquentes, licet poena pecuniaria solvenda sit, l. 2. §. 3. ad Scit. Vell. Herbj rer. quot. c. 23. §. 15. Carpzov. dict. c. 15. def. 17. Idem est, ubi ex re venit obligatio, Huber ad tit. D. de tutel. n. 17. Rata (8.) firmaque mulieris est promissio, ad pias causas, vel in id interposita, ut a captivitate vel carcere maritus liberetur, arg. *l. 21. in f. C. de SS. Eccl. Lyncker. dec. 783. Mev. ad Jus Lub. lib. 1. tit. 10. art. 3. n. 45. Si curator (9.) id quod mulier utiliter & ex re sua gessit, nolit ratum habere, æquum est, judicem auctorem fieri, nec curatoris aut mariti malignitas ferenda est, sine causa recusantis: alius etiam curator, ad consentiendum magis proclivis, peti potest. Sande lib. 2. tit. 4. def. 4. Mulier sine curatore (10.) recte*
*matri-***

matrimonium init, Carpz. *Jurispr. Eccl. lib. 2. tit. 3. def. 46. 74.* Moller. *lib. 3. Semestr. 35. n. 2.* adeoque etiam (11.) pacta dotalia, tanquam accessoria, conficit Carpz. *diff. c. def. 10. 11. & p. 3. const. 20. def. 2.* Mev. ad Jus Lub. *lib. 2. tit. 2. art. 12. n. 385.* (12.) jus patronatus exercet. (13.) ex pacto retractus, vel præcepto testatoris res vendit. Tiraquell. in *LL. connub. gloss. 8. n. 104.* Valet etiam (14.) contractus præsentibus cognatis, vel secundum morem regionis initus, Lynck. *dec. 1053.* Carpz. *d. 18.* Tusch. *Pract. concl. tom. 7. lit. S. concl. 599. n. 27.* nec non (15.) inter matrem & liberos celebratus, Lyncker. *dec. 10. 9.* (16.) Virgo vel vidua majorennis alienare potest mobilia infra 500. aureos Carpz. *d. c. def. 15.* marita vero consensum mariti adhibere tenetur. Kœppen *l. 1. O. 100. n. 21.* (17.) Jure Saxonico communi virgines vel viduæ sine curatore libere contrahere possunt. Coler. *decis. 67. n. 41.* Richter. *dec. 27. n. 22.* ubi præjudicium, ut & apud Lyncker. *dec. 1414.* Denique (18.) quamdiu Statuto vel consuetudine, juri communi Romano derogatum fuisse non apparet, extra Saxoniam; contractum mulieris, ex defectu curatoris, impugnari haud posse, tradit Mev. *p. III. dec. 335.* Ut adeo ex hoc exceptionum cumulo constet, vere scripserit Beyerrum in *Specim. jur. Germ. l. 1. c. 27. n. 39.* Totum hoc curæ muliebris negotium, cum magno apparatu suo, propemodum in ludibrium abiisse, ejusque abrogationem in universum optasse Status Provinciales Saxonicos, ex rationibus gravissimis.

§. XIII.

Nihilominus ut telam cœptam pertexamus, modos subicere necessum erit, quibus curatorum nostrorum potestas finitur. Quomodo Mundualdus olim, si mulierem invitam desponsaverat, aut vim ei inferri passus fuerat, aut crimen adulterii intulerat, mundium amiserit, in *LL. Langob. lib. 2. tit. 11.* traditur. Hodie dativi desinunt (1.) morte mulieris vel curatoris (2.) delicto graviore, quo illa vel hic ciyitate ejicitur, aut infamiam incurrit (3.) perfidia (4.)

mutuo consensu (5.) novo adscito curatore, (6.) legitima excusatione (7.) finito negotio, ad quod quis specialiter datus (8.) Nuptiæ proprie non solvunt curam, sed ejus solvendæ occasionem præbent. Vide Jacob. *d. differt. c. 7.* Cura maritalis cessat (1.) morte alterutrius (2.) matrimonio per divortium dissoluto, vel (3.) propter incestum, impotentiam, similemve causam nullo declarato (4.) si marito publice bonis interdicitur (5.) durante separatione thori & mensæ, Rodenburch *de Jure conj. tit. 3. c. 1. n. 14.* (6.) Furore superveniente, nuptias aut maritalem potestatem non quidem perimi constat, *l. 22. §. 7. D. Sol. matr.* nec tamen uxor invita curatori marito subjiçietur, *arg. l. 25. C. de Nupt.* sed vel alio curatore interim adscito, sua negotia seorsim curabit; vel petet, ut sola, aut cum aliis proximis sanguine junctis, bonorum mariti curatrix creetur publica auctoritate, *arg. l. 4. C. de Cur. fur. & aliis* Christineus ad Mechlin. *tit. 9. art. 4. n. 24.* Tiraqu. *de LL. connub. gloss. 8. n. 32. seqq.* Quid si (7.) pactum de minuenda potestate maritali initum? Ad bona quod attinet, valere dicendum videtur, veluti *ne vir sit curator uxoris*, quod jure civili esse non potest. Si vero id agitur, *ut auctoritas maritalis cesset*, qualia in Hollandia pacta dotalia concipi, testatur Huberus *ad tit. de Pact. dot. n. 4.* impe-randi ac parendi ordinem everti dicendum est: nisi forsan marito cesserit matrimonium in servitutem pœnæ, quæ capitis diminutionem inferre solet. Ego vere monitos a Catone putem viros, ne frænos dent impotenti naturæ, & indomito animali, extemplo enim, simul ac pares esse cœperint, superiores erunt.

T A N T U M!

DIS.



DISSERTATIO QUINTA,
DE
PERJURIO PER GENIUM
PRINCIPIS,

AD

L. XIII. §. 6. D. de Jurejurando.

DE perjurio per Genium Principis, anceps & late diffusa est disputatio, quam attigerunt pauci, universum ac certo ordine tractavit nemo. Bonum itaque factum putavi, si in hac nobilissima Juris Romani, publici pariter ac privati parte, pro virili aliquid elaborare conarer. Una enim face non modo pulcherrimum Ulpiani caput, binasque Principum constitutiones sic illustrari; sed & variis, maxime Historiæ Augustæ auctoribus, lucem accendi posse judicabam. Liquebit item ex his, nisi fallor, quam erronee multi, cum Innocentio Cironio, putarint, Romanis fas non fuisse, per Principis Genium, Salutem & Imperium jurare. Evincemus etiam, quam parum accurate Grotius & Pufendorfius, diras in Principem hac formula comprehendere existimarint. Quam revera *ex quo perjurio*, gravissimum Principatus Romani mysterium fuerit; quod foeda adulatio genuit, & Imperatorum fastus evexit. Prima nobis cu-

mutuo consensu (5.) novo adscito curatore, (6.) legitima excusatione (7.) finito negotio, ad quod quis specialiter datus (8.) Nuptiæ proprie non solvunt curam, sed ejus solvendæ occasionem præbent. Vide Jacob. *d. dissert. c. 7.* Cura maritalis cessat (1.) morte alterutrius (2.) matrimonio per divortium dissoluto, vel (3.) propter incestum, impotentiam, similemve causam nullo declarato (4.) si marito publice bonis interdicatur (5.) durante separatione thori & mensæ, Rodenburch *de Jure conj. tit. 3. c. 1. n. 14.* (6.) Furore superveniente, nuptias aut maritalem potestatem non quidem perimi constat, *l. 22. §. 7. D. Sol. matr.* nec tamen uxor invita curatori marito subjiçietur, *arg. l. 25. C. de Nupt.* sed vel alio curatore interim adscito, sua negotia seorsim curabit; vel petet, ut sola, aut cum aliis proximis sanguine junctis, bonorum mariti curatrix creetur publica auctoritate, *arg. l. 4. C. de Cur. fur. & aliis* Christineus ad Mechlin. *tit. 9. art. 4. n. 24.* Tiraqu. *de LL. connub. gloss. 8. n. 32. seqq.* Quid si (7.) pactum de minuenda potestate maritali initum? Ad bona quod attinet, valere dicendum videtur, veluti *ne vir sit curator uxoris*, quod jure civili esse non potest. Si vero id agitur, *ut auctoritas maritalis cesset*, qualia in Hollandia pacta dotalia concipi, testatur Huberus *ad tit. de Pact. dot. n. 4.* impetrandi ac parendi ordinem everti dicendum est: nisi forsan marito cesserit matrimonium in servitutem pœnæ, quæ capitis diminutionem inferre solet. Ego vere monitos a Catone putem viros, ne frænos dent impotenti naturæ, & indomito animali, extemplo enim, simul ac pares esse cœperint, superiores erunt.

T A N T U M!

DIS.



DISSERTATIO QUINTA,
DE
PERJURIO PER GENIUM
PRINCIPIS,

AD

L. XIII. §. 6. D. de Furejurando.

DE perjurio per Genium Principis, anceps & late diffusa est disputatio, quam attigerunt pauci, universim ac certo ordine tractavit nemo. Bonum itaque factum putavi, si in hac nobilissima Juris Romani, publici pariter ac privati parte, pro virili aliquid elaborare conarer. Una enim face non modo pulcherrimum Ulpiani caput, binasque Principum constitutiones sic illustrari; sed & variis, maxime Historiæ Augustæ auctoribus, lucem accendi posse judicabam. Liquebit item ex his, nisi fallor, quam erronee multi, cum Innocentio Cironio, putarint, Romanis fas non fuisse, per Principis Genium, Salutem & Imperium jurare. Evincemus etiam, quam parum accurate Grotius & Pufendorfius, diras in Principem hac formula comprehendendi existimarint. Quam revera ^{etiam per principem} gravissimum Principatus Romani mysterium fuerit; quod foeda adulatio genuit, & Imperatorum fastus evexit. Prima nobis cu-

li 2

ra

ra erit, ut indolem perjurii recte eruamus. Deinde Jusjurandum per Genium Principis pressius considerabimus: postremus vero locus poenam perjurii, satis obscuram, per distincta temporum intervalla, complectetur.

Favete, adeste æquo animo, & rem cognoscite.

CAPUT I.

NATURAM PERJURII EXPONIT.

§. I. Perjurii vox unde. *Pejere* & falsum jurare diversa. II. In quibus speciebus perjurium fiat, in quibus non. Hugo Grotius notatus. III. Sceleris hujus fœditas & rationibus, & testimoniis demonstrata. IV. Cur Romæ id frequens apud mercatores, testes, amantes, immo omnes. l. 8. D. de Cond. & dem. illustratur. V. Nec tamen abusus jurisjurandi sustulit ejus usum, Reip. necessarium. Paulo Apostolo & Cajo lux. VI. Religio & metus sacer jurantibus injectus. Quid sit corporaliter jurare. Manus levanda antiquitas. VII. Stante Republica per Deos, sed maxime per Jovem, post vero per Genium Principis juratum.

§. I.

Hominis perjuri indolem, ut recte percipiamus, prius nosse oportebit, unde perjurii nomen descendat. Ipsa enim vocis compositio falsum quiddam ac præposterum nos cogitare jubet: nam ut apud Græcos *παρὰ* in compositis virium aliquando notat; sic & ab eo derivata præpositio per Latinis, rarius tamen, pravitatem indicat, ut in *perfidus*, *perfuga*, *perversus*: similiter ac *ver* apud Germanos, in *Verschwören*, *Verkehren*, *Vermachen* & ejusmodi aliis. Plautus *jusjurandum malum* appellavit; Horatius *sacramentum perfidum* & *jus pejeratum*. Græcis *παρανομία* & *παρανομία* vocatur; *ἀνομία* διαβασίς est jurisjurandi fidem violare, perjurum fieri. In diversa autem abierunt Porticus magistri, quid sit *παρανομία*; Cleanthes illum perjurare docebat,

cebat, cui propositum non esset id efficiendi, quod jurato promiserat. At longe aliud sedit Chrysippo, nam Ser-mone de perjurio, distinxit inter *πιορκιν* & *ψευδορκιν*; qui enim jurat, duo, inquit, præstare debet, primum ut verba animo respondeant, quod *αληθορκιν* vocat; alterum, ut factum congruat verbis, quod idem *ευστασιν* appellat, apud Stobæum ferm. 28. Qui in illo peccat *ψευδορκιν*, qui in hoc *πιορκιν* dicitur: satis distincte! quanquam confundi interdum hæc solent, ait Grotius lib. II. de J. B. & P. c. 13. §. 13. & ad Matth. V. 33. Cicero lib. III. de Offic. c. 29. inter falsum jurare & pejerare discrimen ponit, Chrysippum secutus: *Non enim falsum jurare, inquit, perjurare est: sed, quod ex animi tui sententia juraveris, sicut verbis concipitur, more nostro, id non facere, perjurium est.* Similem ferme in modum Nigidius Figulus inter mentiri & mendacium dicere distinguit, apud Gellium lib. XI. Noct. Att. c. 12. & Polybius lib. XII. Hist. c. 5. *Δυο τροποι φασιν ειναι επιιδυς, οα μω τον κατα αγνισια, επιραν τον κατα προαιρησιν.* Duplex esse mendacii genus dicimus: unum, quod ab ignorance veri proficiscitur: alterum, quod a certo animi proposito mentiendi.

§. II.

Describi posset perjuria, quod sit provocatio vindictæ divinæ, sub conditione mendacii aut perfidiæ facta, ubi mentimur, aut fallimus, aut fallendi propositum habemus. Quamdiu inter homines non constat, mentitum aut perfidum esse jurantem, jusjurandum est: ubi vero perfidia detecta perjuria habetur. Utrosque & qui veritatem non loquuntur, & qui promissa non præstant, in crimen hoc incidere manifestum est. Falsi testes, & circa singularem actum jurejurando se adstringentes, quique relaxationem sacramenti, ex causa justa præstiti, a Superiore petunt, huc pertinent omnino. Plaut. in Querulo: *Pejerat sepe qui tacet. Tantum est enim tacere verum, quantum & falsum dicere.* Qui servatis verbis expectationem eorum, quibus juratum est, decipiunt, perjuri sunt. Sed & si per falsos Deos suos

quis pejerat, ut Mahummedanus per Mahometem, in suam injuriam Deus verus id factum interpretatur. *l. 5. §. 1. D. de Jurej.* Non enim, Liber Sapientiae cap. XIV. v. ult. ait, *juratorum virtus, sed peccantium poena perambulat semper injustorum praevaricationem.* Econtrario cum jusjurandum requirat, ut animo deliberato de re licita & possibili sit susceptum, consequitur eos, qui mentis compotes non sunt, aut animum jurandi non habent, perjuros non esse. Qui enim ex animi sui sententia jurarunt, & scientes fallunt, demum perjuri sunt, *l. 26. D. de Jurej.* Cicero Acad. Quæst. *Quam rationem majorum comprobat diligentia, qui primum jurare ex animi sui sententia quemque voluerunt, deinde ita teneri, si sciens falleret.* Plane jurata stipulatio dolo, vi metuve elicita, ob defectum consensus, jure naturali nulla est: nec enim errans, si scivisset, rem ita se non habere, erat juraturus; nec injuste coactus obligatur; quia latro v. gr. jus acceptandi non habuit. Secus est, si hostibus publicis, licet ob vim majorem, aliquid promissum; his enim in statu naturali collocatis, ob defectum judicis, metus exceptio opponi non potest. Repudianda igitur est Viri Summi, Hugonis Grotii doctrina, *lib. II. cap. 13 §. 15.* existimantis, conscientiam ejus, qui metu majoris mali juravit, coram Deo obstringi; licet perjurus in piratam aut latronem ab hominibus non puniatur. *lib. III. c. 19 §. 5.* Velim namque aliquis mihi dicat, quo colore Deo, tanquam testi & vindici tertio, aliquid hic promittatur? Et nonne vinculum accessorium ex valore rei principalis est dijudicandum? Nonne tota jurisjurandi vis cadit, ubi obligatio nulla est? Nonne sic alias rapinae stabiliuntur, & via ad quævis scelera munitur? Grotium tamen Huberus, Stravius, Carpzovius sequuntur; etiam Schilterus *lib. 1. Instit. Jur. Canon. tit. 5. §. 8.* juramentum dolo obtentum tenere; ex 2. *Sam. XXI. 1. 2.* constare putans. Verum Josua & Primores, cognita Gibconitarum fraude, post triduum jusjurandum irritum prius ratihabuerant, id vero deinde a Saule non fuerat

fuerat violandum. Egregie Cicero III. de Offic. 29. *Est autem jus etiam bellicum, fidesque jurisjurandi sæpe cum hoste servanda. Quod enim ita juratum est, ut mens conciperet fieri oportere, id servandum est: quod aliter; id si non feceris, nullum est perjurium. Ut si prædonibus pactum pro capite pretium non attuleris, nulla fraus est, ne si juratus quidem id non feceris: nam pirata non est perduellium numero definitus: sed communis hostis omnium; cum hoc non fides debet esse, nec jusjurandum commune.* Si quis tamen in hujusmodi opinione sit, ut ob reverentiam Dei, jacturam rei promissæ facere, quam juratam fidem destituere malit, hunc culpandum non esse putem: sicut idem Cicero dicto libro, laudavit Pomponium Tribunum, qui terrore coactus juraverat: *Tantum, inquit, temporibus illis jusjurandum valebat.* Ex superioribus porro colligitur, peccati non esse reum, qui promissionem juratam, at naturæ jure, vel divino, aut humano illicitam vel impossibilem adimplere recusat: absurde quippe a Deo postularetur, uti jurantem ejusmodi puniret, si rem injustam & bonis moribus noxiam, talem, quæ nec sine scelere servari, nec sine impietate confirmari potest, intermitteret. Et nulli^o sane jus quæritur ex comminatoriis ejusmodi juramentis, quæ animo non satis deliberato, sed in iræ furore plerumque præstantur. Unde perjuri non erant, qui Benjamins raptores cum raptis vivere permiserunt, Judic. XXI. 7. Et David pœnæ obnoxius fuisset, nisi pepercisset Nabali, quem se occisurum juraverat 1 Sam. XXV. Liquido hoc ostendit Dionysius Halicarnassensis lib. X. *Si consensum aliquem & fidem invicem dedistis, Deos fidejussores facientes, irritum & non sanctum puta, si sit contra cives & patriam, piusque, si illud violaverint. Dii enim in honestis & justis actionibus solent accipi, non autem in turpibus & injustis.* Incautum denique jusjurandum vinculum iniquitatis esse non debere, Hippolyti exemplo discimus apud Euripidem. Is enim, cum jurasset Phædræ se facturum, quod ipsa peteret: Phædra autem incestam consuetudinem postu-

postularet, se ad hoc facinus non obligari respondit, & utur lingua jurarit, mentem tamen de adulterio & incestu injuratum tenuisse. Alia dabit Grotius *diſt. cap. XIII.*

§. III.

Ceterum gravissimum scelus esse Perjurium, nemo forsitan expectat, ut prolixè ostendam. Quemadmodum enim jurans ad cœli, terræ, omniumque rerum creatarum tribunal tremendum constitutus, universam naturam contra se ciet, atque beneficiis Dei præsentibus & futuris renunciat, æternis autem cruciatibus se devovet, si sciens fallat: sic non potest non ejusmodi homo, propter Iudibrium, sanctissimo Numini esse infensissimus, & violatæ religionis graves dare pœnas. Accedit quod Jusjurandum totius status politici quidam est nervus, & vinculum quasi veritatis postremum; cujus ope assertionis nostræ confirmamus fidem, & non fallendi necessitatem imponimus aliis; hoc vero qui flocci facere non veretur, is nec tollere fœdera, rempublicam evertere, summa inis confundere dubitabit. Certe non tanta est ejus, qui Deos omnes negat, quanta hominis perjuri, impietas: hic enim & esse Deum, & rebus humanis prospicere, & vindicem habere oculum confitetur, jurisjurandi tamen simulatione, dum homines metuit, Deum immortalem irridet. Antiquæ tum Græcorum, apud Demosthenem, Euripidem & Æschinem, tum Romanorum formulæ satis ostendunt, plenum jusjurandum invocationem numinis & imprecationem sui continere. Plutarchus in Quæstionibus Romanis cap. 44. *Omne jusjurandum ait, in execrationem perjurii desinit.* Cum Jovem Lapidem jurabant, auctore Polybio lib. III. Cicerone lib. VII. *Epist. 1.* & Festo in *Lapidem*, hæc erant solennia verba: *Si sciens fallo, tum me Diespiter, Urbe Arteque salva, bonis ejiciat, ut ego hunc lapidem.* Gravem quoque pœnam perjuris imminere singulis temporibus crediderunt gentes, vel mediocriter bonæ: adeo ut posteros etiam majorum delicta luere, secundum comminationem Jehovæ, domosque perfi-

perfidorum cum stirpe omni vastari pro certo haberent. Zacharias Propheta, furti atque perjurii nomine, peccata adversus utramque tabulam complectitur, cap. V. v. 4. *Hanc execrationem profero, dictum Jehovæ exercituum, ut invadat domum furis, & domum jurantis per nomen meum falso: commoransque in domo ejus consumat eam, & ligna ejus & lapides ejus.* Hesiodus in *opis* vers. 804. Orcum inferorum Deum conjungit cum Furiis, & natum dicit ab Eride, in perjuro- rum pœnam. Homeri quoque locus singularis est, Iliad. T. v. 258. cujus verba, quia Hesiodum illustrant, ex editione Stephani Bergleri, semel apponam:

*Testis sit nunc Jupiter primum, Deorum summus & optimus,
Terraque & Sol, & Furie, quæ sub terram*

Homines puniunt, quicumque perjurium jurarit:

Mox v. 264.

Si vero quid horum perjurium est, mihi Dei dolores dent

Multos admodum, quot dant ei, qui in eos peccavit jurando.

Latinorum plura mihi sunt testimonia, sed illud in hujusmodi elegantiss apprime necessarium est, ne quid nimis. Unico itaque Tibullo contenti simus. lib. I. Eleg. 9.

Ab miser! & si quis primo perjuriam celat,

Sera tamen tacitis pœna venit pedibus.

§. IV.

Quam monstrosus autem peccatus sit perjurium, nimis tamen verum est, quod Ulpianus in l. 8. pr. D. de Condit. institut. scribit: *Faciles sunt nonnulli hominum ad jurandum, contemptu religionis; alii perquam timidi, metu divini numinis, usque ad superstitionem.* Semper enim fuerunt, qui vel fortunæ successibus elati, vel mala educatione corrupti, jusjurandum exigui fecerunt; ipsumque adeo Numen Sanctissimum ludibrio habuerunt, summa ejus benignitate; & pœnarum tarditate abusi. Lysandrum Lacedæmoniorum Ducem, referunt Plutarchus & Ælianus, adeo nullam jurisjurandi religionem habuisse, ut suis auctor fuerit, Viros jurejurando fallendos, sicut pucros talis. Apud Ro-

K k

manos

manos Laberius jusjurandum nihil aliud esse censuit, quam *emplastrum æris alieni*; Pacuvius *mantile*, quo *quotidianæ noxæ* extergeantur. Graviter Livius, de corruptis ævi sui moribus, lib. III. c. 20. *Nondum hæc, quæ hoc tenet sæculum, negligentia Deum venerat, nec interpretando sibi quisque jusjurandum & leges aptas faciebant, sed suos potius mores ad ea accommodabant.* Apud Plautum Ballio in Pseud. Actus I. sc.

3. §. 118.

CA. *Quid ais, quantum terra tegit, hominum perjuriſſime,*

juraviſſin? te illam nulli venditurum, niſi mihi?

BA. *Fateor.* CA. *Nempe conceptis verbis.* BA. *Etiā conſultis quoque*

CA. *Perjuraviſti ſceleſte.* BA. *At argentum intro condidi.* Causas impictatis hujus detestandæ Hierocles in aur. carm. Pythagoræ pag. 28. ſeqq. varias adfert, maximam autem a jurisjurandi frequentia & Dei timore exuto petit. Et sane fatui Deos esse negabant; alii esse, sed res humanas curare non credebant, nec gratia tangi, nec ira commoveri, nec sibi exhibere negotium, nec aliis, ut Epicurus dicebat. Quorsum Ciceronis jocus pertinet ad Trebatium: *Quomodo tibi placebit Jovem Lapidem jurare, quum ſcias Jovem iratum eſſe nemini poſſe?* Plurimi vero Deum ſi & ſit, & irascatur, exiguis hoſtiis multisque blanditiis ita conciliari ſibi poſſe exiſtimabant, ut poenæ gratiam faciat, ſibi vero liceat ſine metu pecuniam extorquere. Mercurio plane, fraudis præſidi, unumquemque mercatorum has preces fuſiſſe, tradit Ovidius lib. V. *Faſt.*

Ablue præteriti perjuria temporis, inquit,

Ablue præterita perfida verba fide.

Sive ego te feci teſtem, falſove citavi

Non audituro numina vana Jovi:

Sive Deum prudens alium, Divamve ſeſelli;

Abſtulerint celeres improba verba Noti

Et pereant veniente die perjuria nobis,

Nec curent ſuperi, ſi qua locutus ero;

Da

Da modo lucra mihi, da factio gaudia lucro,

Et fac ut emtori verba dedisse juvet.

In testibus hoc vitium detestatur Juvenalis Sat. XIV. y.
218.

Falsus erit testis, vendet perjuria summa

Exigua, & Cereris tangens aramque pedemque.

Omnes accusat Petronius Satyr. cap. 82. *Nemo cælum putat, nemo jusjurandum servat, nemo Jovem plaris facit.* Inprimis vero amatores perjuria sua, aphrodisæa, Venerca & volatica, Jovem ex alto, & Venerem simplicesque Nymphas, velut irrita, ridere credebant; qua de re obvia sunt Ovidii, Horatii & Tibulli loca, quibus accedat Ariadnæ questus apud Catullum:

Tum jam nulla viro juranti femina credit;

Nulla viri speret sermones esse fideles,

Qui dum aliquid cupiens animus prægestit apisci;

Nil metuunt jurare, nihil promittere parcunt,

Sed, simul ac cupidæ mentis satiatâ libido est,

Dicta nihil metuere, nihil perjuria curant.

§. V.

Contra singulæ etiam ætates homines tulerunt, ut Ulpianus ait, perquam timidos, metu divini Numinis, usque ad superstitionem. Ut enim de Pelagianis, Samosatæniis, Anabaptistis, Mennonistis, Quakeris & Socini schola nihil dicam, jam olim Plato jusjurandum e judicii & foro eliminandum esse censuit, atque in iis tantum causis admittendum, ubi nullam utilitatem ex perjurio jurantes assequuntur. lib. XII. de LL. Philo item Judæus *πρὸς τοὺς δικαστικούς*, utilissimum putabat fore, & naturali rationi convenientissimum, omnino a jurejurando abstinere, & sic sermoni assuescere, ut simplex sermo vim juramenti habeat. Eadem Pythagoræ sententia fuit, & Stoicorum, & Patrum Ecclesiæ, de quibus Grotius ad Matth. V. 34. adatur. Legge Otonis IV. in Romaniola, de Principum Italorum sententia cautum, non refragante Papa Johanne XIII. Synodo.

Kk 2

doque, quæ tum Ravennæ convenerat, ne deinceps controversiæ jurejurando, propter metum perjurii, sed per certamina, disceptarentur. *Longob. tit. 55. l. 34. lib. 2.* Romani vero mediam viam ingressi, non tam in bonis, quam in necessariis juramenta habuere. Nec enim judicem, nisi in probationum inopia illud deferre, nec extra judicium, nisi delata conditione præstitum, & ex conventionem partium valere jusserunt. Moris hujus initia jam a Numæ temporibus repetit Dionysius Halicarnassensis lib. II. *Si qua lis inter duos esset coorta, super contractu sine testibus inito, Magistratus & Judices plerasque controversias dirimebant ex jurejurando bonæ fidei, quæ sola scilicet instar erat juramenti.* Enimvero apud vetustissimos Romanorum innocua simplicitas vigebat, quod pectore clausum, idem & lingua promptum erat; adeoque bona fides pro summo legum & poenarum metu civitatem regebat. At postquam pro frugalitate avaritia, pro veritate mendacium incescit, & injuriarum, fraudum atque rixarum plena facta sunt omnia, Deum testem vindicem accedere oportuit, & singulorum conscientia fortioris jurisjurandi metu fuit arctanda. Sensim experiebantur Quirites, cor hominum esse pravam & investigabile, ideoque *diffidentiam* remedium hoc postulare. Sed & mentis *inconstantia*, ad lapsus & mendacia proclivis, injecto Numinis metu cohibenda, & *lites* denique sæpe ita sunt dubiæ, ut tortura hac spiritali, velut delphico gladio, secundæ videantur. Tria sunt remedia sopiendarum litium jure civili recepta; Judicium, Transactio, Jusjurandum. Sed quia judicium longum est, multasque molestias secum adjunctas habet; per transactionem vero non facile homines adducuntur, ut de jure suo decedant; ideo paratissima videbatur esse via per delationem jurisjurandi, vel præstationem delati controversiam finire. Cajus hoc eleganter observat in l. 1. D. de Jurej. *Maximum, inquit, remedium expediendarum litium in usum venit, jurisjurandi religio, quæ vel ex passionem ipsorum litigatorum, vel ex auctoritate judicis deciduntur contra-*

tra.

troverſiæ. Quocum ex aſſe convenit, quod Gentium Doct̃or Paulus jam dudum ſcripſerat ad Hebræos cap. VI. §. 16.

Λιθῆνται μὴ κατὰ τὴν μείζονος ἡμῶντι, καὶ πάντες αὐτοῖς ἀπολογίᾳς πῶς τις βιώσιν οὐ ἔρκος. *Nam homines quidem per eum jurant, qui ſit major, atque iisdem omnis controverſiæ terminus eſt juſjurandum, ad confirmationem.*

§ VI.

Tantæ utilitatis conſideratio, uti apud alias Gentes, ſic quam maxime apud Romanos, uſum juſjurandi promovit. Magiſtratum, niſi qui juraſſet in leges, plus quinque dies gerere non licebat: jurabat Imperator, Senatus, nauta & miles. Judices obſtricti religione judicabant: partes juratæ contendeabant, ſeſeque provocabant. Nubentes item liberorum procreandorum cauſa ſe matrimonium inire jurati aſſerebant: & pacta denique conventa juſjurandi religione in Capitolio facta, ut ſanctiora eſſent. Ad rem Cicero III. de Officiis cap. 31. *Nullum vinculum ad ſtringendam fidem jurejurando majores arctius eſſe voluerunt. Id indicant Leges in XII. Tabulis, indicant ſacra, indicant fœdera, quibus etiam cum hoſte devincitur fides: indicant notiones & animadverſiones conſorum, qui nulla de re diligentius, quam de jurejurando judicabant.* Ut vero jurantibus religio injiceretur, in ædem ſacram deducebantur, quo numen ibi præſens, terrore & metu tacito, mentem improbam a ſcelere perjurii revocaret. Hinc religio juſjurandi in l. ult. D. de Lib. cauſ. l. 21. D. de Dolo. religio judicum, teſtium, militum; quia judices jurati judicabant, teſtes jurati teſtimonium dicebant, milites ſacramento rogabantur. Religio eſt conſcientiæ ſcrupulus, ex divini Numinis teſtatione. Vid. Budæus ad l. 1. D. ad Edilit. Edict. Idque eſt tacitis aris jurare, de quo ritu tam prolixè alii, ut ſolus Virgilius nobis ſufficiat Æneid. XII. v. 201.

Tango aras, mediosque ignes & numina teſtor.

Singularis ara, quæ judicibus & litigantibus data in comitio, Putcal Libonis dicta, non domus aut tribunal, ut quibusdam

cruditis persuasum fuit, sed ara, ad quam Judices sacramentum præstabant, omnimodo sese cum veritate & legum observatione judicium esse disposituros, ut ait Justinianus, in famosa *l. 14. C. de Judiciis*, ab Erycio Puteano singulari schediasmate illustrata. Pertinet huc egregius Symmachi locus, a Rævardo *lib. V. Var. cap. 8.* & Spanhemio *Diff. VI. de Præstant. & usu num.* observatus, sed qui & hic legi meretur, ex libro ejus *X. epist. 61.* ubi aræ hujus a Gratiano destructæ restitutionem his rationibus petit: *Ubi in leges vestras & verba jurabimus? qua religione mens falsa terrebimur, ne in testimoniis mentiat? Omnia quidem Deo plena sunt, nec ullus perfidis tutus est locus. Sed plurimum valet ad metum delinquendi, etiam præsentia religionis urgeri.* Hinc & jusjurandum corporaliter præstitum in *l. 1. C. Si advers. vend. l. 2. l. 3. C. Si minor se major.* vetustissimi interpretes a corpore, quod jurans tangit, a signis & aris, dici volunt. Ego tamen non refragor, si quis non Alexandri, aut Diocletiani & Maximiani, gentilium Principum, sed Tribonianum illud verbum esse contendat: Christiani enim jurantes, Evangelium, vel sacram Scripturam, vel Crucem, vel Sanctorum reliquias tangebant, & ejusmodi jusjurandum potentius esse censebant, renitente Gregorio Nazianzeno *epist. 219.* Unde eadem loquendi figura utitur D. Gregorius *lib. VII. Epist. 13.* & *σωματικοὶ ὀρκεῖς, σωματικοὶ λόγοι* apud Balsamonem aliosque distinguuntur ab iis, quæ fiunt instrumento prælecto aut subscripto; ubi os ceteraque corporis membra ad decus invocandi numinis non componuntur. Vid. Merill. *viii. Obs. c. 40.* ubi Cujacium, qui corporaliter jurare, *manu levata* interpretatur, refellit. Nolim tamen quenquam existimare, noviter inventum esse jurantium gestum, digitos dextræ priores, tanquam fidei symbolum, elevandi; nam ex insigni nummo Imp. Diocletiani & Maximiani, apud Illustræm Spanhemium ad Juliani *Orat. 1. p. 60.* is non obscure colligi posse videtur. Olim quoque manum integram ad cælum, velut Numinis divini

vini sedem, sublatam esse, eleganter Innocentius Cironius probavit lib. II. Obs. c. 10. cui adde Genes. XIV. §. 22. ubi jurans Abrahamus dicit: *Levo manum meam ad Dominum Deum excelsum*, & apud Virgilium lib. XII. Æneid. §.

174.

*Sic prior Aeneas: sequitur sic deinde Latinus
Suspiciens cælum, tenditque ad sidera dextram,
Hæc eadem Aeneas; Terram, mare, sidera juro.*

§. VII.

De Diis pauca addenda sunt, per quos dicta & promissa sua firmarunt tam Græci, quam Romani. Socrates, Zeno aliique Philosophi res quasque, etiam vilissimas, ut anserem, canem, quercum, hircum, brassicam & capparim sibi delegerunt, quo minor esset summos Deos offendendi occasio. In judiciis autem per Deos juratum, qui utrique fere populo fuerunt communes, & publice approbabantur. Hinc apud Demosthenem Atheniensibus non licebat jurare per homines, sed per Deos: & Ennius jusjurandum, quasi *Jovis jurandum* dicens, indicabat speciem fuisse cultus divini. Inde etiam per Deastros novosque Deos jurans, Romæ non magis obligabatur l. 5. §. 3. *D. de jurej.* quam qui apud Hebræos idololatriam committebat, *Deut. VI. §. 13. Jer. V. §. 9.* Masculi per Herculem, per Castorem feminae, Milites per Martem, Medici per Apollinem & Æsculapium dejerabant, ut ex solenni illo Hippocratis jurejurando liquet, quod Vir Cl. Johannes Henricus Meibomius doctissimo commentario illustravit. Nonnunquam vero per caput suum l. 3. §. 4. *D. de jurej.* per salutem suam l. 33. *Eodem.* per superos, cælum, terras, maria, vel per liberos & parentes jurabant, ne ipsis ad rerum omnium auctorem & parentem statim procurrere necesse esset. Formulas abunde concessit Barnabas Brissonus lib. VIII. de form. Atque hoc improprium jusjurandum erat, quo sanctos etiam viros, in divinis litteris, usos legimus, ut Grotius lib. II. c. 13. §. XI. & Henclius Ot. Uratiss. cap. 2. docuerunt, Verum

Verum stante Republica sanctissimum & solenne jusjurandum plerumque per Jovem Optimum Maximum, Deorum supremum, atque unum rerum omnium Patrem, perinde ac apud Græcos, concipiebatur. Is *οφεινός*, idcirco apud Hesychium, & *εφεηνός* dictus. Pausanias in Eliacis sive lib. V. *Ante Horcii Jovis pedes aenea tabula est, in qua incisi elegi sunt, ad pejerantium terrorem compositi.* Gellius lib. 1. Noct. Att. cap. 21. *Jovem Lapidem, quod sanctissimum jusjurandum est habitum, sum paratus jurare, Virgilium hoc nunquam scripisse.* Apulejus de Deo Socratis: *Nam & jusjurandum Jovis jurandum dicitur, ut ait Ennius. Quid igitur censes? Jurabo per Jovem Lapidem, Romano vetustissimo ritu.* Postquam autem Principes Rempublicam occuparunt, honor divinus, cum omni reliqua potestate, in ipsos translatus est, usque adeo, ut mos invaluerit, per eorum Genios, Salutem, Fortunam, Vitam & Caput jurandi. Vestigia hujus ritus innumera apud scriptores, maxime Historiæ Augustæ; duo in Codice habemus in l. 2. C. de Reb. cred. & l. 41. C. de Transact. Unus, sed pulcherrimus locus, in Pandectis superest, ex Ulpiani lib. XXII. ad Edictum, in l. XIII. §. 6. D. de Jurejurando; cujus verba, tanquam Dissertationis hujus fundum, adscribo. Sunt autem hæc: *Si quis juraverit in re pecuniaria, PER GENIUM PRINCIPIS, dare se non oportere, & pejeraverit; vel dari sibi oportere; vel intra certum tempus juraverit se soluturum nec solvit: Imperator noster cum Patre rescriptis, fustibus eum castigandum dimittere, & ita ei superdici: ΠΡΟΠΕΤΩΣ ΜΗ ΟΜΝΥΕ, id est, Temere ne jurato.*

CAPUT II.

DE JURE JURANDO PER GENIUM PRINCIPIS.

§. I. *Genium cuique suum credidisse Pythagoreos, Stoicos, Græcos, Romanos, Ecclesiæ Patres, & quosdam recentiorum. II. Principis Genius ceteris excellentior, sicut Juno Augustarum. Fortuna & genius τὸν διέτι; differunt tamen. III. Privatorum genii sacri; ex decreto Senatus autem primum per Cæsaris, deinde per Successorum Genium publice juratum. IV. Cur Sacramentum hoc sanctissimum, domi militiæque, etiam sub Principibus Christianis. V. Mos ex Oriente ad Romanos translatus. Genes. c. 42. illustratur. Grotius & Pasendorfius notantur. VI. Principibus divini honores, una cum nominibus Deorum, tributi. VII. Christiani non per Genium, sed per Vitam, Caput, Sanktem Principum jurarunt, ad tempora usque Caroli Magni, qui prohibuit.*

§. I.

Geniorum apud Veteres infinitus fuit numerus. Cuilibet enim rei suum assignarunt Genium, Regnis, Provinciis, Urbibus, Senatui, Populo, Collegiis, Municipiis, Pagis, Exercitibus, Fontibus, Horreis, Stabulis, nec ullus angulus hac umbra vacare fingeatur. Vide Turnebum *lib. XIII. Adv. c. 12.* Petrum Fabrum *lib. 1. Semestr. c. 9.* & Sponium *Miscell. erud. ant. Sect. III. pag. 101.* Inprimis vero singulis hominibus duos Genios sive Dæmonas, alterum bonum, alterum malum agnasci credebant, qui omnium actionum & cogitationum essent testes, & nunc ad bona, nunc ad mala, eos hortarentur. Utriusque exemplum in historiarum monumentis. Bonus Cæsari, quando Rubiconem trajiciebat; malus Bruto apparuit, & Philippis, dixit, me videbis. Censorinus de Die natali cap. III. *Genius est Deus, cujus in tutela, ut quisque natus est, vivit.*

vivit. *Hic sive, quod ut genamur curat, sive quod una genitur nobiscum; sive etiam quod nos genitos suscipit ac tuetur, certe a genendo Genius appellatur.* Hæc opinio quamvis pluribus & recte refellatur a Prudentio lib. 2. contra Symmachum; non hodie tamen aut nudius tertius nata est. Cui enim non dictus Genius Socratis? jam olim a Plutarcho & Apulejo libris singularibus, & nuper a Cl. Viro, Gottfrido Oleario eruditissima dissertatione illustratus, quæ inserta est Historiæ Philosophiæ Thomæ Stanleji p. III. c. 6. pag. 130. Homerus passim Genios forma humana se hominibus miscentes, cumque illis loquentes introducit. Hesiodus lib. I. de Operibus & diebus, & Plato lib. X. de Republica, eos Custodes vitæ vocant, & adjutores eorum, quæ quisque elegisset. Seneca Pædagogos hominum, & de plebe Deos facit, eorumque inventum Stoicis tribuit, Epist. CX. *Memineris Majores nostros, qui crediderunt hoc, Stoicos fuisse; singulis enim vel Genium, vel Junonem dederunt.* Genium scilicet Viris, Junonem feminis. Non repetam hic, quæ præclare eam in rem observavit Justus Lipsius lib. I. *Physiol. Stoic. dissert. 18. & seqq.* Memini autem Clementem Alexandrinum Stoicos alicubi Hebraicæ veritatis fures vocare; fortassis & hanc persuasionem & a Pythagoreis, & e sacris voluminibus hauserunt, eamque, tot figmentis deformatam, postea ad Patres Ecclesiæ transmiserunt. Hominum enim plus semel fit mentio, qui angelis ducibus usi fuere. Eusebius lib. IV. Demonstrat. Evangel. c. 7. verba Moysi *Deut. XXXII. v. 8. 9.* ad Genios transtulit, & Hieronymus *Micæ cap. VI. v. 12.* Præ ceteris autem Origines principem Tyri, & principem Persarum, & principem Græcorum, quorum mentio fit *Ezech. XXVIII. & Daniel. X.* Homilia XXXV. in Lucam, Gentium Dæmonas interpretatur, cuique etiam hominum geminos adesse angelos, bonum & malum, discernit lib. 1. in *Epist. ad Romanos.* Idem credidit Isidorus Pelusiota lib. II. ep. 85. Augustinus in Psalm. 88. & Bernardus Serm. 12. in Psalm. 91. *In omni loco, ait, in omni an-*

angulo reverentiam habe Angelo tuo, neque illo præsente facias, quod me præsente erubesceres. Quæ ipsa fere verba sunt Epicteti Stoici apud Arrianum lib. I. cap. 14. De Cardani Genio nihil addam, de quo ipse multa habet, in libro, quem de vita propria scripsit, etiam Thuanus, & Thuanorum elogiorum compiler Antonius Teissierius. Nec in Johannis Bodini, vel potius amici Bodini, bonum genium inquiram: monitorem hunc ei de rebus faciendis & fugiendis fuisse, pluribus narrat Guido Patinus in *Patinianis pag. 3.* Henricus Morus in Antidoto adversus Atheismum, non minus fidei se huic narrationi habere, ait, quam Livio & Plutarcho, quascunque res olim gestas narrantibus. Adde Scaligerum patrem, de Genio suo differentem, *Poetices lib. III. cap. 26.* & de Raymundi angelo, Chiflet. *pro archit. jur. c. 6.*

§. II.

Suum autem cuique Genium cum tribueret Romana superstitione, alium tamen alio excellentiorem esse existimarunt. Privatorum Genios nunc Deos, nunc Dæmonas, nunc Lares, nunc angelos, mentes, & divini spiritus particulas appellabant. Principum vero natales a Diis deducebant; ergo & potentior ipsis Genius assignandus erat, felicitatis perpetuæ mystagogus, & Fortunæ observator inviolabilis. Huic omnes Ducum & Magistratum successus adscribebat adulatorum natio: statuas etiam, aras & templa ei ponebant, cum inscriptione GENIO CÆSARIS: eidem thura dapesque die natali offerebant. *l. 233. §. 1. D. de V. S.* Spartianus in *Adriano cap. 8.* Affinis ei erat *Fortuna publica*, quæ, ut Florus ait, Imperium Romanum ad Principes transfudit, quæque inter Imperii insignia, aurea figura, a Galbæ temporibus, in horum cubiculo servabatur, auctore Suetonio in *vita Galbæ cap. IV.* Capitolino in *vita Antonini c. XII.* Spartiano in *Severo cap. XXIII.* In nummis hinc *Fortuna* cum cornu copiæ & temone conspicitur, addita inscriptione DIS CUSTODIBUS; quia & ipsa inter genios custodes locum obtinebat. Apulejus in loco mox laudando,

fortunas geniosque conjungit. Ammianus lib. XXX. Valentiniani *Fortunam* memorat, cum *tetro habitu*, mox *discessuram*. Græci utrumque *Τυχη* vocant, & Sosipater Charisius Genium *της τυχης* exponit. Dissertunt autem primo, quod *Fortuna* rebus omnibus dominatur; *Genius* vero singulis hominibus præsidet, auctore Philostrato lib. 2. de vit. Soph. in Herode Attico. Dein *Genius* apud Adolphum Occonem, in nummis Commodi, Licinii & Maximini, forma adolescentis cernitur, tenentis dextra cornu copiae, sinistra pateram, cum inscriptionibus: *Genio Populi Romani*; *Genio Augusti*; *Genio Imperatoris*; *Genio Aug. & Caesarum*; *Genio Caesaris*. At *Fortuna* habitu muliebri, tenens cornu Amaltheæ, & remonem navis, effingitur. Vide Plutarchum de *Fortuna Roman.* Galenum in *Suasoria*, & Frene ad Zonaræ XIV. Ann. n. 4. Apud Gruterum Opere æterno, crebra *Geniorum* Impp. fit mentio: pag. 9. n. 6. I. O. M. ET GENIO IMP. AVG. pag. 106. n. 6. LARI-BVS AVG. ET GENIIS CÆSARVM. Rursus pag. 1085. n. 6.

GENIO. AC. MAIESTATI
IMP. ANTONINI. PII. FELICIS. AVG.
M. AVRELIVS. AVRELIANVS. DEVOTISS.
NVMINI. EIVS

Quamvis ergo omnibus viris suus *Genius*, *Genio* Principis tamen, velut *Jovis* particulæ augustiori, divini quid magis inesse credebatur. Sic omnium mulierum *Genius* erat *Juno*, Plin. l. II. Hist. nat. c. 7. *Singuli quoque ex semetipsis totidem Deos faciunt, Junones Geniosque adoptando sibi.* Augustæ vero Imperatorum, vel horum sorores & filiae, per excellentiam *Junones* dictæ. In lapide apud Gruterum pag. 24. n. 4. IVNONIBVS AVG. SACR. *Tristanus* tom. I. pag. 243. numisma exhibet, cum hoc titulo: SABINÆ POPPÆÆ AVGVSTÆ IVNONI. In alio apud *Spanhemium* Dissert. X. de Præstantia & usu numism. pag. 273. *Liviæ* caput expressum, cum hac epigraphe. . . .

HPAN

HPAN AIBIAN, *Liviam Junonem*. Idque Ovidius confirmat lib. III. de Ponto Eleg. 1.

*Cum tibi contigerit vultum Junonis adire,
Fac sis personæ, quam tuare, memor.*

§. III.

Jam vero si privati Genios suos, velut Naturæ Deos, habuerunt sanctos; floribus & mero eos coluere, per suos etiam, & dominorum, & amicorum Genios jurarunt, mirandum sane non est, Principum Geniis tantos honores fuisse attributos. Multa hujus generis coacervare liceat, si lexica & virorum eruditorum observationes, maxime Lambini ad Horatium, Brouckhusii ad Tibullum, & variorum ad Petronium notas transcribere placeret. Apud Gruterum in antiquo lapide pag. 108. n. 1. GENIVS SANCTVS dicitur. Horat. lib. II. Epist. 1. *Silvanum lacte piabant, Floribus & vino Genium memorem brevis ævi*. Seneca Epist. XII. *Jurat per Genium suum, (alii meum) se omnia facere*. Apulejus lib. VIII. *Metam. Per fortunas vestrosque Genios, sic ad meæ senectutis spatia validi letique veniatis, decepto seni subsistite*. Lygdamus servus apud Propertium lib. IV. Eleg. 8.

Exiit, Geniumque meum prostratus adorat.

Juvenalis lib. II. Sat. 98. de molli & pathico domino, qui novo more feminam se exhibebat:

Et per Junonem domini jurante ministro.

Ante Julii Cæsaris autem tempora, forte nec publice nec privatim, per alicujus Genium jusjurandum est præstitum. Dio Cassius, inter alios honores, a Senatu ei decretos, & hunc memorat, *ut quotannis vota pro salute ejus publice fierent, utque una vox esset per Genium ejus jusjurandum conciperetur*. Lib. XLIV. Eo occiso, populus furibundus, paricidas requirens, Senatores accusat, quod passi essent, cum virum interfici, *per cujus salutem & Fortunam jurassent*. lib. XLVII. Idem honor mansit Augusto: nam & Reges, Romanorum amici atque focii, ædem Jovis Olympii Athenis Genio ejus dedicare voluerunt, Sueton. in vita ejus cap.

LXXX. & Rubrio crimini datum, violatum perjurio no-
men Augusti, apud Tacitum I. *Annal.* 73. Horatius lib. II.
Epist. 1. ad Augustum:

*Præsentī tibi maturos largimur honores,
jurandasque tuum per nomen ponimus aras.*

Tiberius verò, ut se popularem populo præberet, neque præter consuetudinem quicquam fieri natali suo, neque per Genium suum jurare cuiquam permisit, neque si quis eum jurasset, ac perjurii reus ageretur, punivit. scribit Dio Cassius lib. LVII. At post Sejani cædem Senatus Romanus decrevit, ut ne fierent deinceps juramenta, nisi ea Imperatoris nomine conciperentur, auctore Xiphilino: *μετα τους ορκους επ' αλλον τιος, πλην του Αυτακρατορος ποινιζουσι.* Sed quod de Tiberio dicebamus, idem de Nerone memoriæ prodidit Tacitus l. XIII. *princ.* Contra, Cajum Caligulam multos honesti ordinis, deformatos prius stigmatum notis, ad metalla aut ad bestias damnasse, quod nunquam per Genium suum dejerassent, auctor est Suetonius in vita ejus cap. XXVII. Apulejus tempore Antonini Pii, ac fratrum M. Antonini Philosophi & Veri clarus, lib. IX. *Metam.* *Milites ibi, nec uspiam illum delitescere, adjurantes Genium Principis, contendebant.* Sub iisdem Principibus, quorum in lege nostra meminit Ulpianus, florens Tertullianus ad Scapulam c. 11. *Sed iidem ipsi, qui per Genios eorum in pridie usque juraverant, qui pro salute eorum hostias & fecerant & voverant, hostes eorum sunt reperi.* Claudianus Paneg. in IV. Conf. Honorii:

- - - - juratur Honorius absens.

§. IV.

Non equidem adeo hebetes erant Romani, quin fictum hunc Deum sentirent; at quia Senatus decreto semel ita vi-vo Cæsare cautum erat, ipsi quoque magnam partem Stoicam Philosophiam sequebantur, & genius denique Jovis minister esse ferebatur, ideo per ipsum Jovem, cujus particula erat mens Augusti, perque eum, a quo Salus & Fortuna Cæsarum pendeat, sese dejerare existimabant. *Deus intus,*

intus, Genius vester intus est. Huic Deo & vos tale iurandum dare oportebat, quale milites Cæsari, inquit Arrianus lib. I. cap. 14 Marcus Genium cujusvis particulam a Jove avulsam vocat lib. III. §. 3. Et ipse Ulpianus noster in l. 33. D. de Jurejurando: Qui per salutem suam jurat, per Deum jurare videtur, respectu enim divini numinis ita jurat. Sed optimus locus est Plinii in Panegy. c. 52. Simili reverentia, inquit, Cæsar, non apud Genium tuum bonitati tue gratias agi, sed apud numen Jovis Optimi Maximi pateris. Illi debere nos quicquid debeamus, illius, quod bene facias muneris esse, qui te dedit. Sic igitur accedente adulatione, cum in privatis, tum in publicis actibus, hoc sacramenti genus solenne & sanctissimum evasit: & prorsus erronee Innocentius Cironius in paratitlis ad lib. V. Decretalium tit. 24. nefas fuisse contendit, per Genium Principis jurare, propter divinitatem, quæ ei inesse crederetur. Tantum enim ab eo abest, ut de Claudio scribat Suetonius cap. XI. eum iusjurandum neque sanctius, neque crebrius instituisse, quam per Augustum. Inde fideicommissis vinculum juris accedit, quod per salutem Augusti rogatus quis diceretur, inquit Theophilus in §. 1. Inst. de Fideicomm. ber. nam per salutem Principis rogare, est velut cum iurisjurandi religione rogare, ut ait Papinianus, in l. 77. §. 23. D. de legat. lib. 2. Arcadius Imp. suo ævo duas iurisjurandi species memorat, quibus pactiones confirmarentur; primam, si quis promissa sua invocato nomine Dei Omnipotentis solidaverit; deinde si Nomen Cæsaris pactis inseruerit, & Salutem Principum initarum pactionum juraverit esse confirmationem in l. 41. C. de Transact. Verum hic Princeps Christianus erat, igitur primo loco perjurium per Dei nomen, post per Principis nomen commissum plecti jubet. Similiter Vegetius in Epitome rei militaris, ad Valentinianum II. Augustum scripta lib. II. cap. 5. in locum formulæ, per Genium, per Fortunam Principis, aliam ait, a Christianis Cæsaribus receptam esse: Jurant milites per Deum & per Christum, & per Spi-

Spiritum Sanctum, & per Majestatem Imperatoris, quæ secundum Deum generi humano diligenda est & colenda. Nam Imperatori, cum Augusti nomen accepit, tanquam præsentis & corporali Deo, fidelis præstanda est devotio. Sub Gentilibus autem Principibus major in Principem, quam in omnes Deos religio fuit. De jurejurando militari sub Vespasiano confer Tacitum IV. Hist. cap. 31. Maximus Imperator *ἡγεμόνων ὅσοι, τῆς Ρωμαίων ἀρχῆς τιμὸν μυστήριον* vocat, apud Herodianum lib. VIII. c. 19. nam stipendium capientes jurabant, Cæsaris salutem omnibus rebus anteferre, auctore Arriano dicto lib. 1. c. 14. Generaliter Tertullianus in Apologetico cap. XXVIII. *Majore, inquit, formidine & calidiori timiditate Cæsarem observatis, quam ipsum de Olympo Jovem. Citius denique apud vos per omnes Deos, quam per unum Genium Cæsaris pejeratur. Quinimo sub Christianis, & Arcadii quidem supra laudati temporibus, eadem fuit adulatio, quam ut impiam iis exprobrat Zosimus gentilis lib. V. Hist. cap. 51. Narrat enim ibi de Jovio P. P. Italiæ, eum, ut suspicionem omnem elevarer, per salutem Principis jurasse, se nunquam cum Alaricho pacem facturum, eique fini, cum aliis militum Ducibus, Honorii caput tetigisse: id vero jusjurandum sanctius ab his habitum, quam quod per Deum præstaretur. Quippe si Deo præstitum fuisset jusjurandum, fortasse negligi posse, permittendo benignitati divine facinoris impii condonationem: sed quando per caput Imperatoris jurassent, non jam eis fas esse, contra tam grave jusjurandum delinquere. Usque adeo cauta mens illorum erat, qui Dei cura destituti, rempublicam id temporis administrabant. Adde Sozomenum Hist. Eccl. lib. IX. c. 7.*

§. V.

Johannes Seldenus in notis ad Marmora Oxoniensia, ubi Smyrnæorum Decreti, & Fæderis cum Magnesiis iæti verba explicat illa, *καὶ τῆς τῆς βασιλεῖς Σελίουκ τυχόν*, pag. 43. erudite observavit, morem istum jurandi, primum in Oriente natum, inde ad Romanos dimanasse. Vetusissimum

excm:

exemplum est Geneleos cap. XLII. §. 15. ubi Josephus per Salutem, seu per vitam Pharaonis jurat; *Sic vivat Pharaon*. Cujus sensum feliciter ita expresserunt eruditiores interpretes: *Ut verum est vivere Pharaonem, sic vere hoc vestri sumam experimentum*. Vel, *ut vere salutem Pharaoni precor, ita vere &c.* Simili formula usus Urias Chettæus jurans Davidi II. Samuelis XI. §. 12. *Ut vivis, & ut vivit anima tua, non sum facturus rem hanc*. Et ipse David ad Jonathanem I. Sam. XX. §. 3. *Certe ut vivit Jehova, & vivit anima tua*. Quanquam autem Josephi pictas in Deum unum sic salva sit, Ægyptii tamen, quos inter debebat, pariter ac Chaldæi, Afri, Medi ac Scythæ tantæ levitatis fuerunt, ut per salutem, solia ac sceptrâ Regum suorum, tanquam Numinum terrestrium, jurarent. Nebucadnezar ipse per thronum & regnum suum sacramentum præstat, Judith I. §. 12. Afri per Reges & viros excellentes jurarunt, sicut & Æthiopes, Diodorus lib. IV. c. 1. Scythæ per regium solium: Herodotus lib. IV. c. 68. *Est Scythis mos plerumque jurandi per regium solium, cum maximum volunt interponere juramentum*. In Armenia hujusmodi jusjurandum αἰνός βασιλέως dictum, auctore Strabone l. XII p. 557. De scepro Fectus: *Feretrius Jupiter dictus a ferendo, quod pacem ferre putaretur, ex cujus templo sumebant sceptrum, per quod jurarent*. Sic apud Virgilium Latinus per sceptrum jurat lib. XII. Æn. 206. usitato more antiquo, cujus Homerus & Aristoteles meminerunt. Atque sic ex hac origine apparet, quam parum accurate Hugo Grotius lib. II. de J. B. & P. c. 13. §. xi. eumque secutus Pufendorfius lib. IV. de J. N. & G. c. 2. §. 3. jusjurandum per Genium Principis ita explicarint, ac si jurans in Principe puniri deposcat, eumque diris devoteat, si sciens fallat. Quo jure enim subjectus Domini sui innocentis caput & salutem oppignorabit? An non consensisse Principem in mala prius oportebit? Et nonne saniores ethnici, tanquam vanos risissent deos, qui actionem iniquissimam parata executione confirmarint? Amor ergo

& adulatio formulam hanc invexit, Imperatorum astutia firmavit. Idem enim notat, quam si jurantes dixissent: Quam vere vita Augusti mihi cara est, tam vera est mea affirmatio. Se, patrem, matrem, liberosque potius dejcebant, quam ut Principi publice mala imprecarentur. *Neque me liberosque meos cariores habeo, quam Cajum & Sorores ejus*, formula erat a Caligula præscripta apud Suetonium c. 15. Ad quam etiam respicit Tertullianus lib. II. ad Nationes c. 9. *Atqui Romanis magis detestandus, qui pro salute Principum, & domus eorum, adversus liberos & conjuges, & omne pignus suum dejerant.* Magis ergo est, ut dicamus, eos summum Jovem gravissimo hoc jurejurando, pro Cæsarum salute, magis invocasse, quam in eorum capita malum provocasse. Martialis VII. epigr. 59.

*Tarpeje venerande rector aulæ,
Quem salvo duce credimus tonantem;
Cum votis sibi quisque te fatiget,
Et poscat dare, quæ Dei potestis:
Nil pro me mihi Juppiter petenti,
Ne succensueris, velut superbo.
Te pro Cæsare debeo rogare:
Pro me debeo Cæsarem rogare.*

§. VI.

Cum his si, conferre placet, quot artibus Imperatores Romani Majestatem suam augustiorem reddere tentarint, quantoque adulandi studio plebs, populus & Senatus effigie Numinum eos per Flamines & Sacerdotes coli jusserint, tum omnia plana videbuntur. Cæsari natales hujus jurisjurandi deberi, vidimus supra: huic vero simul Jovis Julii cognomentum Senatus imposuit palam, templumque ei Clementiæ dedicari jussit, sacerdotioque ejus Antonium quasi flaminem dialem aliquem præfecit; auctore Dione lib. XLIV. Certe divinos cum honores affectasse, dum inter homines ageret, tanquam aliquid supra mortale fastigium, notat Suetonius cap. LXXXVI. Ab eodem origo colendi

lendi Cæsares in signis militaribus cœpit, utquemadmodum ante per Aquilas & simulacra Deorum, exinde per vultus Cæsarum sacros, sacramentum militare præstaretur. Eleganter Manilius:

- - - Venerisque ab origine proles

Julia descendit cælo, cælumque replevit,

Quod regit: Augustus socio per signa Tonante

Cernit & in cætu Divum, magnumque Quirinum.

Augustus, inquit, Divum Julium Patrem videt intra & extra Urbem religiose coli. Intra Urbem cum solo Romulo; extra Urbem & in castris, ejusdem Julii & Jovis Tonantis imagines per signa cohortium. Vegetius de prima cohorte legionis, quæ milliaria dicebatur, lib. II. cap. 6. *Hec imagines Imperatorum, hoc est divina & præsentia signa, venerantur.* Tertullianus item in Apologetico: *Religio Romanorum tota castrensis signa veneratur, signa jurat, omnibus Diis præponit, omnes illi imaginum suggestus insignes monilia crucium sunt.* Eadem Augusti mox fuit conditio. Quamquam enim, ut Tacitus animadvertit, Deum honores Principi publice non ante haberentur, quam agere inter homines desierit, & per apothecosin inter Divos esset collocatus; Augustus tamen, cum pacem Italiæ provinciis intulisset, oppidatim inter Deos tutelares consecratus est, teste Appiano lib. V. de Bell. civ. pag. 746. Post, victo Antonio, cum Romanum orbem occupasset, totus orbis cœlestes ei honores decrevit, templa, fana, lucos, & porticus, ut opera nulla pulciora viderentur, ait Philo Legat. ad Cajum. Vivus & audiens Deus appellatus est a Manilio lib. 1.

Nunc mihi tu Cæsar, patriæ princepsque paterque,

Qui regis augustis parentem legibus orbem,

Concessumque Patri mundum Deus ipse mereris.

Ovidius lib. II. Tristium ad eundem:

Per mare, per terras, per tertia numina juro,

Per te præsentem conspicuumque Deum.

Atque ita ceteri successores passim, nunc Dii appellati,

Mm 2

DEO

DEO ET DOMINO NATO AURELIANO. DEO ET DOMINO CARO in nummis apud Spanhemium *Diff. XII. de Praest. num.* Nunc Deorum nominibus honorati ab aliis, vel ipsi, ut iis insignirentur, affectarunt Apud Gruterum JUPITER AUGUSTUS in 10. pag. 17. APOLLO AUGUSTUS 7. 8. 9. p. 26. HERCULES AUGUSTUS 3. pag. 46. MERCURIUS AUGUSTUS 10. pag. 53. Hadrianus *Olympii* nomine cultus a Græcis, teste Spartiano: Commodus *Hercules Romanus* dictus, auctore Lampridio: Diocletianus JOVIUS vocatur in nummis. Caligula, *Ζεύς Περσεύης υἱός*, & *Ζεύς Λατριάσιος* dici voluit, Zonara & Dione testibus. Trajanus & Adrianus cognomine OPTIMI MAXIMI, quod Jovi Capitolino proprium, superbiunt in faxis literatis apud Gruterum pag. 247. n. 5. 249. n. 2. Quid multa? Ipse Papinianus, homo prudentissimus, Severum & Antoninum, *Optimos Maximosque Principes* vocare non erubuit, in l. 78. §. 1. *D. de Legat. lib. 2. l. 22. D. de Accusat.* Hi autem sunt, quos Ulpianus in capite, quod explicamus, intelligit, quando ait: *Imperator noster cum Patre rescripsit.* Quoties enim apud Ulpianum, Paulum & Modestinum legimus *Imperator noster*, toties Antoninum Caracallam, Severi Augusti filium, exaudiendum esse, sexcentis exemplis ostendi potest. Sic quod in l. 6. §. 6. *D. de Excusat.* ex Ulpiano Modestinus refert, *Imperator noster cum Patre rescripsit*: idem in l. 11. §. 3. *D. de Muner.* his verbis extulit: *D. Magnus Antoninus cum Patre rescripsit.*

§. VII.

Hæc *ἀπειθήναι* Imperatorum & viventium & demortuorum movit quam maxime Christianos primitivæ Ecclesiæ, ut per Genium & Fortunam Principis jurare nefas esse existimarent; quia isti voci inerat falsi numinis sensus, & Genius pro dæmone sumebatur; per Salutem Principum autem jurare non verebantur. Vulgatus ea de re, sed insignis est locus Tertulliani in Apologetico cap. XXXII. *Sed*
 ΕΞ

Et juramus, inquit, sicut non per Genios Cæsarum, ita per Salutem eorum, quæ est augustior omnibus Geniis. Nescitis Genios daemones dici, & inde diminutiva voce daemonia? Nos iudicium Dei suspicimus in Imperatoribus, qui gentibus illos præfecit. Id in eis scimus esse, quod Deus voluit; ideoque & saluum volumus esse, quod Deus voluit, & pro magno id iuramento habemus. Scilicet, ut Iosephi pietas reprehendi non potest, quod per vitam Pharaonis dejeravit, sic & vetis omnibus Christiani saluum & incolumem Principem suum optabant, quamvis Gentilem. *Salus Augusta* pro maxima Dea colebatur a Romanis, eique Flaminicæ dabantur; sed & *Salutis* vox pro vita usurpatur sæpius apud Nepotem aliosque. Philotas Craterum & Cænum *per Alexandri salutem* jurare volebat, apud Curt. lib. VI. c. xi. Plinius lib. X. epist. 17. ad Trajanum: *Flavius Archippus, per Salutem Aternitatemque tuam petit a me.* Et singulis annis, ut nummorum inscriptiones ostendunt, S. P. Q. R. VOTA PRO SALUTE CÆSARIS AUGUSTI suscipiebat. Vide Andreæ Schottum lib. V. Obs. Philos. c. 31. Deinde affirmationem illam, non tam ut iurjurandum, quam ut obtestationem religiosam considerabat Basilii in Psalmum 14. qua hominum diffidentia tolleretur. *Sancti non tam per creaturas jurabant, quam per. auctorem creaturarum, nec in creaturis aliud, quam creatorem ipsarum venerabantur,* ait Gratianus *Caus. 22. qu. 1. can. 16. §. 2.* Implicite igitur continebatur Deus, qui Principis salutem subjectis sacram & inviolabilem esse voluit, atque violentibus illorum reverentiam graves minatur pœnas. Breviter; Princeps non fidei testis, sed perfidiæ vindex esse videbatur. Testium magna nubes est, Athanas. in pop. Alexandr. Prudent. *per. v. q. p.* Sozom. lib. IV. cap. 7. Codin. in orig. Constantinop. p. 200. Gesta Regum Francorum c. 13. etiam his antiquior Marcellinus Tribunus & Notarius, in invitatione ad Collocationem Carthagine habitam, anno Domini 411. cap. 5. *Per admirabile mysterium Trinitatis, per Incarnationis dominicæ*
Mm 3 *sacra;*

sacramentum, & per salutem Principum, Honorii scilicet & Theodosii, promittit, se secundum allegationes partium judicaturum. Græci item interpretes notant, hoc ipsum esse jusjurandum, ab Episcopis præstitum, cujus in Concilio Chalcedonensi mentio fit. Nec aliud esse per Imperatoris caput in alio can. ejusdem Synodi, & apud Schylitz. pag. 601. Arcadius denique pactiones, suo tempore, jurejurando per Salutem Principum confirmatas refert in l. 8. C. Th. de Pactis & transact. ubi Doctissimus interpres Jacobus Gothofredus in commentario, ex Tertulliani libro 1. ad Nationes c. 17. observat, inter cetera obstinationis Christianæ crimina, haud postremum fuisse, quod per Salutem, non per Genium Principis juramenta concipere vellent. Hinc solennis persecutorum formula: *Tantum jura per Genium Cæsaris*, in agone Polycarpi apud Eusebium lib. IV. Hist. Eccl. c. 15. Eoque Trajani imago pertinet, quam Plinius cum simulacris numinum Christianis proposuit, lib. X. epist. 97. Ceterum ritus ille jurandi per Salutem Principis, quia ab Ethnicis acceptus, & plus æquo a Christianis usurpabatur, a Carolo Magno sublatu est: primum A. 789. in Capit. de divers. rebus, c. 10. *Conjuraciones per Reges vel eorum filios vetite*: dein A. 803. in III. Capitular. cap. 22. *Ut nullus presumat per vitam Regis & filiorum ejus jurare*. quod caput in libro tertio Legis Langobardorum tit. 24. repetitum est. Apud Hispanos vero jurejurando per vitam Regis & Reginæ nihil sanctius esse, refert Nicolaus Henelius Otior. c. 2.

CAPUT III.

DE POENA PERJURII PER
GENIUM PRINCIPIS.

§. I. *Sub libera Rep. perjurium nulla lege notatum, sed ad Censuram, non ad Pontificum notionem pertinuit. II. Imperatores Deorum injurias diis curæ esse voluerunt. Quibus & quo modo. III. Qui per Genium Principis pejerasset, fustibus casus. Cur tam varie conjicitur. IV. Vera ratio differentie indicatur. V. De præconis elogio inter fustium ictus dicentis: Petulanter ne jurato. VI. Cur id Græce in foro Romano? VII. Non omne perjurium per Deum Romæ impanitum. VIII. Non necessarium, aut cum crimine falsi conjunctum. IX. Perjuria inconsulta & volatica ad Deum vindicem missa. L. 2. C. ad leg. Jul. Maj. & l. 2. C. de Reb. cred. explicatæ. X. Tempora distinguuntur. XI. Varia pœnarum genera perjuris apud alias gentes dictata: Quæ hodie obtineat strictim ostensum.*

§. I.

QUOD in universum scribit Livius lib. I Histor. cap. 28. *Nulli gentium mitiores placuisse pœnas, quam Romanis, ejus rei testimonium singulare hoc caput dabit. Maximum enim crimen esse Perjurium, non minus agnoverunt Romani, quam ceteræ gentes, vix tamen leniorem pœnam alibi statutam legas. Quum prælio Cannensi Hannibal decem captivos Romam dimitteret, postquam jurejurando promiserant, in castra Punica se redituros, duo autem commenticio consilio eadem die in castra regressi, non reverterentur, hæc eorum fraudulenta calliditas tam turpis existimata est, ut contemti vulgo ac velut intestabiles, sannisibilisque discerpti, haud aliam autem senserint pœnam, quam quod Censores eos omnium notarum & damnis & igno-*

ignominii affecerunt, quoniam quod facturos dejeraverant non fecissent. scribit Gellius lib. VII. Noct. Att. c. 18. Duplex Censorum erat nota: ob causas leviores, ut si paulo indecentius oscitassent, Senatores Senatu movebantur; Equitibus publicus adimebatur equus, si esset macilentus; plebei in Ceritum tabulas referebantur. Graviorum autem scelerum reis notam quandam infamem & ignominiosam adscribebant, auctore Livio lib. 39. cap. 42. Prior ignominia levis tantum erat, facile eluenda, qui publica judicia aut testimonia pro se haberet; alii namque Censores sæpe motos Senatu rursus probabant, ut ad honores iis aditus, & in Curiam reditus esset. Vide Ciceronem *pro Cluentio* & Livium lib. XL. cap. 51. Altera nota gravior, nec tamen extrema infamia fuit. Hoc enim tenendum in sceleribus grandioribus Censuram non intervenisse, quia Legibus & judiciis servabantur, ut probabant exempla Cenforiarum animadversionum apud Valerium Max. lib. II. cap. 4. Quum igitur, præter Gellium, Cicero *notiones & animadversiones Censorum de jurejurando diligentes* memorat lib. III. de Off. cap. 31. certissimum argumentum est, nullam tum fuisse poenam adversus perjurium constitutam. Ipsa Lex, quam idem Tullius Libro II. de Legibus, ex moribus ævi sui format: **PERJURII POENA DIVINA EXITIUM, HUMANA DEDECUS ESTO**, hoc ipsum ostendit. Decus enim eam significat infamiæ notam, quæ est in re, & honestorum hominum opinione, non illam, quæ legibus aut Edicto irrogatur, hæc enim in usu juris absolute infamia vocatur. Vide l. 2. D. de Obseq. par. Censor igitur, & solus quidem, stante republica perjurii cognitor fuit atque judex. Neque fidem habuerim Jacobo Gothofredo, qui in notis ad Tertullianum pag. 107. ad figmenta mera, legem istam de Cenforia nota refert: Cicero enim non modo in libris de Officiis, Cenforibus hanc provinciam dedit, sed & solius divinæ poenæ meminit pro Roscio Comædo cap. 16. *Quæ poena a Diis immortalibus perju-*

ro, hæc eadem mendaci constituta est. Quod item Rævarus lib. II. Var. cap. 3. Doula ad Horat. c. 6. Hansenius de jurej. c. 2. aliique per Jovem pejerantes Pontificibus pœnas dedisse volunt, id quidem ex Plauti verbis in Rudente Act. V. Sc. 3. *Tun' meo Pontifex perjurio es?* non satis probatur; longoque commodius ea verba ad criminis expiationem, quam ad ultionem & jurisdictionem referri possunt: expiationes enim ex Pontificum decreto factas, ex Livio docet Jacobus Gutherius lib. II. de *Vet. jur. pontif. cap. 2.*

§. II.

Subacta Republica Principes reliqua Censorum munera privatis exercenda dedere, ipsi vero Præfecturam morum sibi vindicarunt, ut de Cæsare notavit Suetonius cap. 76. de Claudio Tacitus XII. Ann. 4. de Vespasiano lapides Gruteriani pag. 89. n. 10. & 176. n. 1. testantur. Tum vero, sublata illa severitate, discrimen servatum; utrum quis per Jovem ceterosve Deos, an per Genium Principis pejerasset. Perjurii per Deos nullum crimen proditum, nulla accusatio, nulla pœna; sed callido invento, ne suam tantum injuriam ulcisci viderentur Principes, Diis vindictam reliquere, certo eam exacturis & tarditatem supplicii gravitate pensaturis. Tiberium Consulibus rescripsisse ait Tacitus lib. I. Annal. cap. 63. *Jusjurandum perinde æstimandum, quam si Jovem fefellisset. Deorum injurias Diis curæ.* Horatius lib. II. Ode 8. *Ulla si juris tibi pejerati pœna.* Juvenalis Sat. XIII. v. 174. *Nullane perjuri pœna?* Diserte Alexander Imperator Tiberii sententiam modo laudatam suam facit, totamque rem Dei judicio relinquit in l. 2. C de Rebus cred. *Jurisjurandi,* ait, *contempta religio satis Deum ultorem habet.* Consulebatur Imperator a Felice, forsan illo, quem prætorianis cohortibus postea præposuit Gordianus tertius, an nulla esset perjuri pœna humana, & si nulla esset, quamobrem hoc placeret? Ad hoc apposite responderet Alexander, nullam esse constitutam; nec mirum id videri

Nn

de.

debere, quia contemptus iste ultorem habeat. Deum, quantum est *satis*; hanc unam sufficere, quia gravior alia dictari non possit. Idem loquendi genus usurpat, quod cum dicitur, *satis* poenæ subire eum, qui non defenditur, quia mittitur adversarius in possessionem bonorum: hoc enim dici intelligimus, ita hanc esse poenam, ut non alia adjiciatur, l. 19. *D. de In jus voc.* Quem vero Deum ultorem habebit? Nobis equidem facilis est responsio, qui per Dei gratiam, ex tertio præcepto novimus: *Ne usurpes nomen Domini Dei tui temere: neque enim Dominus dimittet eum impunitum, qui nomen ejus vane usurpaverit.* Verum Alexander religione paganus erat, nec unius, sed plurimorum Deorum cultor, quippe qui præter illos, quos vulgo Theologia in censum retulerat, Christo etiam, & Abraham, & Orpheo, & Sanctioribus animabus in larario suo rem divinam faciebat, ut Ælius Lampridius habet. Igitur ad Jovem respicit, pariter ac Tiberius apud Tacitum nominatum, a quo hanc sententiam est mutuatus. Jovem vero trifulco fulmine pejerantes tangere solitum, Græci & Romani, naturæ tacita lege, cordibus hominum divinitus inscripta, intellexerunt. Ita Homerus *Iliad.* r. v. 279. Virgilius *XII. Æneid.* v. 200. quibus adde Aristophanem & Lucianum apud Turnebum *lib. XXIII. Advers.* c. 9. Vulgaris insuper persuasio erat, eos, qui pejcrassent, insigni aliqua nota in corpore deturpari, eorumque linguas in summitate pustulam producere, vel unum dentem nigrum fieri, aut unguem turpiorem reddi, aut oculorum lumina tolli, teste Theocrito *Idyll.* IX. Horatio *diſt. lib. II. Od.* 8. & Juvenale *Sat. III.* Quorsum etiam illud Nasonis perinet:

*Esse Deos credanne? fidem jurata fefellit,
Et facies illi, quæ fuit ante manet,
Quam longos habuit nondum perjura, capillos,
Tam longos, postquam Numina læsit, habet.*

Mi-

Mirabilia quoque de Indiæ, Siciliæ & Sardiniaë fluminibus memorant Philostratus *lib. I. cap. 6.* Macrobius *lib. V. Sat. c. 19.* & Solinus *cap. 10.* quæ perjuris & infidis palam ad-versantur, ita ut oculos manusque eorum pustulis inquin-ent, cæcos, reddant, quin & extinguant confestim. Vide Jacobi Lydii *Dissertat. de Jurejurando in fine.*

§. III.

Hæc autem miracula dum non expectabant Imperatores Romani, mox stabiliendæ & tuendæ Majestatis gratia, per Genium suum pejerantes extra ordinem punivisse videntur, donec Severus & Antoninus in lege nostra rescripserunt, fustibus castigatos eos dimittendos esse. Militaris hæc pœ-na videri posset, quia Polybius *lib. VI.* tradit, qui falsum dixissent testimonium hoc supplicii genere affectos, & aliquando ad mortem cædi solitos, id vero hic prohiberi, dum *dimittere* vivos & superstites castigatos jubent. Verum longe diversa fuit *εὐλεκεπία* illa militaris, ab ictibus fustium, inter pœnas civiles dudum tum receptis, quemadmodum ex Lipsii *Dial. V. de Re mil. cap. 18.* cuivis apparebit. *Admonitio fustium* vocatur in *l. 7. D. de Pœnis.* quod satis pœnæ lenitatem indicat: flagella erant atrociora; unde homines liberi, & hi quidem tenuiores, fustibus, servi vero flagellis rumpebantur, ut docuit Brissionius *lib. III. Antiq. cap. 9.* At absurdum est, dicat aliquis, fustibus coerceri petulantiam ejus, qui per Principem jurasset, injuriam vero, eodem genere Deo factam, non coerceri. Invertendam potius videri pœnam, quia jusjurandum est affirmatio religiosa; tum vero contemnitur religio, quando per Deum pejeratum est, cum pejeratur per Principem, non violatur religio, sed Princeps. Immo qui per Genium Principis jurat, per ipsum Deum, cujus pars erat Genius, jurasse videtur. Speciem hæc, fateor, habent, sed præter auctores supra laudatos rotunde hanc differentiam tradit Tertullianus *lib. I. ad Nationes cap. 10.* Imo jam per Deos

*dejerandi periculum evanuit, potius habita religione per Cæsarem dejerandi, quod & ipsum ad obfuscationem pertinet Deorum vestrorum: facilius enim per Cæsarem pejerantes punirentur, quam per ipsum Jovem. Hunc more suo imitatur Minucius Felix in libello, qui Octavius inscribitur pag. 283. edit. Ouzel. Sic eorum numen vocant, ad imagines supplicant, Genium, id est demonem implorant, & est eis tutius per Jovis genium pejerare, quam Principis. Nec deerant colores, quibus discrimen stabiliretur. Nam si inter homines hoc jus valet, ut permittatur privatis, qui injuriam passi, eam aestimare; quanto justius est, in injuria Deo illata hanc estimationem illi relinqui, qui solus ad eam noscendam est sapientissimus, & ad expendendam æquissimus, & ad vindicandam potentissimus: ut in re non absimili Grotius ait lib. 11. de jure bellic. c. 20. §. 20. Dii perjuratorum vindices dicti apud Justinum lib. XIV. c. 4. & Tertullian. ad nat. lib. 1. c. 10. Adhæc ultio Diis relicta, quia non satis digne ac merito ab hominibus videbatur puniri posse tam immane crimen, in Majestatem divinam commissum. Pœna perjurii (si qua omnino est pœna) contra eum, qui jusjurandum exigit, convertenda, inquit Justinianus Nov. 51. Hugo Grotius ad Matth. c. 23. v. 16. cum jurejurando per Genium Principis comparavit juramentum *καῖς*, quod Hebræorum magistri supra sacramentum per Templum & altare aestimabant; per hæc enim si quis inconsulto calore pejerasset, gratiam facile faciebant, illius non item; quia ad quæstum, & ditandum gazophylacium pertinebat. Eleganter etiam Petrus Perennionius lib. II. Variar. cap. 8. huc Senecæ locum retulit, qui est de ingratis, lib. III. de Beneficiis cap. 6. Hoc frequentissimum crimen nusquam punitur, ubique improbatur. Neque absolvimus illud: sed cum difficilis esset incertæ rei aestimatio, tantum odio damnavimus, & inter ea reliquimus, quæ ad vindices Deos mittimus.*

§. IV.

Econtrario Principes Majestatem suam recentem, in civitate libertatis amante, acriter vindicandam censabant; quamobrem statuis eorum major, quam Jovis Olympii, religio & reverentia fuit exhibenda, auctore Philostrato de vita Apollonii lib. 1. c. 15. sed qui legibus obmurmurasset, qui licentius esset jocus, qui statuas violasset, aut Principis imaginem loco minus honesto admovisset, minutæ Majestatis erat reus, ut præter Senecam, Suetonius vita Tiberii c. 58. testatur. Locupletabant fiscum non tam Vocationæ & Juliæ leges, quam Majestatis, *singulare & unicum crimen eorum, qui crimine vacarent*, ait Plinius Paneg. cap. 42. Tacitus *omnium accusationum complementum* vocat, III. Annal. 38. Specie ergo læsæ Majestatis perjurium per Genium Principis fuit vindicatum, ut tamen perjuri *sustibus castigandi dimitterentur*, seu ordinaria pœna, qua humiliores bestiis objecti, vel vivi exusti, honestiores capite puniti, non obtineret; quia magis veneratio Principi debita, quam Majestas læsa videbatur, l. 2. C. ad Legem Jul. Maj. Quotquot Cæsarum clementes erant & justî, satis sciebant, nihil magis bonum Principem decere, quam placide ferre maledicentes, nec facile admittere quæstionem Majestatis: *Longe sit in suis Princeps, quam in alienis, exorabilior injuriis. Nam quemadmodum non est magni animi, qui de alieno liberalis est; sed ille, qui quod alteri donat, sibi detrahât; ita clementem vocabo, non in alieno dolore facilem, sed eum, qui cum suis stimulis agitatur, non profilit; qui intelligit, magni animi esse, injurias in summa potentia pati, nec quicquam esse gloriofius Principe impune læso*, Senecæ monitum erat, lib. primo de clementia c. 20. Sed & innumera clementiæ ejusmodi Principalis exempla prostant apud Tacitum, Suetonium ceteroque Historiæ Augustæ scriptores; ex quibus liquet, quod in se, vel in eos qui potiore loco erant, jactata verba, convitia & maledicta generoso contemptu spreverint,

verint, nec ad cognitionem trahere voluerint. Maxime vero cminet Theodosii, Arcadii & Honorii indulgentiæ plenissima sententia, qua gratiam maledicti illis pollicentur, qui aut levitate, aut infamia, aut injuria convitium Principi, vel temporibus ejus, seu sæculo, fecerint in *l. un. C. Si quis Imp. maledix.* Verumenimvero quia Principes existimabant, interpretationem hujus jurisjurandi ex auspicio regio repeti oportere, providendum esse censuere, ne quid fastigio Principali indignum in mores abiret, & indies pejerando Principis Genius & majestas magis magisque vilipenderetur. *Quodnam erit tutum, si in nostra peccatur effigie?* aiebat Theodoricus Rex apud Cassiodorum *lib. VII. Var.* idem de Genio dici posset. Videatur Boecler. de auspicio regio c. *IV. pag. 199.*

§. V.

Sequitur præconis elogium videamus, quod interea, dum fustibus caditur perjurus, Severus & Antoninus superdici jubent: *Et ita ei superdici*, *περιπτως μη ομνεις*, id est, petulanter vel perperam ne jurato. Enimvero cum finis poenarum sit delinquentis emendatio, & territio aliorum, apud Romanos causa supplicii interdum tabulæ inscribebatur, nonnunquam vero præconis voce palam, ut ab omnibus audiri posset, prædicabatur, ad circumstantium emendationem. Ex hoc more imposita fuit inscriptio cruci Jesu Christi Servatoris nostri, quam nomine juris Romani *τιτλος* appellat Johannes *cap. XIX. v. 10. αιτιας* Matthæus *cap. XXVII. v. 27.* Verum hic titulus albo seu tabulæ gypsatæ erat inscriptus, *επιγραφη της αιτιας*, ait Marcus *cap. XV. v. 26.* alias *elogium* vel *titulus* vocabatur apud Suetonium & Tertullianum. Nobis vero hic sermo est de superdicto, quod præco ore pronuntiabat. Usus ejus non solis Romanis proprius; nam & apud Hebræos lapidandus prodibat, antecedente præcone, qui hujusmodi verba alta voce exclamabat: Vir iste, N. N. filius N. N. exit lapidandus ob delictum hoc vel illud,

illud, suntque ejus facti testes, ille vel ille, qui noverit aliquid ad ejus innocentiam probandam, veniat & loquatur pro eo, ut est in Sanhedrin *cap. VI. §. 1.* Plato venditorem adulterinæ mercis fustibus jubet cædi, præcone dicente causam, propter quam id pati meruit *Lib. XI. de Legibus.* Romanorum morem eleganter discimus ex *l. 16. C. Ex quib. caus. inf.* ubi Gordianus *Fustibus cæsum*, inquit, cui per præconem ita dictum est, *ισχυροφαιτεστας*, i. e. calumniatus es, ut calumniatorem videri notatum, manifestum est. Similia id genus exempla plena manu conduxerunt Cujacius *lib. VIII. Obs. 7.* & *lib. XIII. Obs. 3.* Brissonius *de formulis lib. V.* Faber *lib. II. Semestr. cap. 6.* Heraldus *ad Apolog. Tertull. c. 2.* Rævardus *lib. V. Var. cap. 7.* Fornerius *lib. 1. rer. quot. cap. 13.* & qui illorum scrinia suppressio nomine, magnam partem, compilavit, Janus Langlæus *lib. XI. Semestr. c. 1.* nec non Gothofredus pater ad nostram *l. 13. §. fin. de Jurej.* ubi & Duareno aliquid affingit, quod nunquam ipsi in mentem venisse patet ex Diatriba *de in lit. jur. §. 54. pag. operum 226.* Hoc addo, Alciatum, legem nostram non satis intellexisse videri, quando *lib. IV. Dispunct. c. 2.* proverbii loco Græca illa usurpata existimat, & a præcone reum admonendi gratia tantum prolata. Inprimis vero huc pertinet, quod idem Septimius Severus, cum adhuc legatus esset Proconsulis Africæ, cumque præcedentibus fascibus, ut antiquum contubernalem, Lepitanus quidam plebejus amplecteretur, fustibus eum cædi jussit, sub elogio præconis: *Legatum P. R. homo plebejus temere completi noli*, auctore Spartiano *in ejus vita cap. 2.*

§. VI.

Quid autem causæ est, dicat aliquis, cur sermone peregrino, *προπητιος μη ομιλος*, elogium superdici voluerit Imperator? nam Græco uti sermone haud quaquam in judiciis Romæ receptum, nec provinciarum Præsides nisi Latine decreta sua interposuerunt. Vide Suctonium *in vita*.

Ti.

Tiberii cap. 71. in Claudio cap. XVI Val. Maximus lib. II. cap. 2. Sed meminerimus, Romam hoc tempore fere Græcam fuisse, pueros Græce nugatos, adultiores Græce prius, quam Latine declamasse. Ex Spartiano item liquet, Severum Athenas propter litteras Græcas petiisse, & Antoninum filium Euripidis amantissimum fuisse, tradit Dio. Quin ipsos etiam Imperatores rescripta sua, lingua Græca concepisse argumento est *l. 9. D. de L. Rhodia de jactu*; ubi libello Græco Eudæmonis Nicomediensis Imperator Antoninus Græce rescribit. Quid obstat igitur, quominus & hoc rescriptum ad Græcos directum, vel Græcum adagium, amore linguæ omnibus tum notæ, præconi injunctum credamus? Idem quippe Impp. in *l. 6. §. fin. D. de Officio Proc. Vetus*, ajunt, *proverbium est: ὅτι πάντα, ὅτι πάντα, ὅτι πάντα, ὅτι πάντα πάντα*. Ceterum mos ille proclamandi in pœnis irrogandis necdum penitus obsolevit. Gonzalez enim Tellez *ad lib. V. Decretal. tit. 26. cap. 1.* observavit, in Hispania a præconibus præcuntibus delictumque manifestantibus ad finem adjici: *Quiental hace, que tal pague*. Ad eundem modum Vasconix quibusdam regionibus, dum publice traducuntur fures, & cæduntur, præire præconem clamitantem: *Talia patietur, eadem qui feceris, imo graviora*, testis est Cujacius *Lib. VIII. Obs. c. 7.* Nec tituli scripti usum prorsus cessare, consuetudo Gallix & Frisix apud Mornacium *ad h. l. & Huberam, Prælect. D. de Cess. bon. §. 3.* docebit.

§. VII.

Hæc quidem ad illustrationem legis nostræ hæctenus: & necdum tamen res nostræ securæ sunt. Quod enim cum Cujacio, Donello, Fabro, aliisque Viris Clarissimis distinximus I. inter pœnam, quæ tempore Reip. fuit, & quæ sub Principibus obtinuit; tum II. inter perjurium per Deum, & per principem commissum, rem omnem exhaurire non videtur. Quid enim si per aliud quid juratum? Plu-

Plures namque erant modi jurandi, præter duos illos, etiam Jure Romano approbati *l. 3. §. ult. & seqq. D. de Jurej.* Sed hos forte omnes, vel ad obtestationes extrajudiciales, vel ad implicitum jusjurandum per Deum referri posse, aliquis dixerit, præcunte Ulpiano in *l. 33. D. de Jurejurando.* Major difficultas, quod non omne perjurium, quo numinis violata religio, impunitum dimitti videtur ex *l. 22. D. de Dolo malo*, ubi Paulus sine distinctione ait: *Nam sufficit perjurii poena.* Insuper Modestinus libro singulari de poenis, in *l. ult. D. Stellionatus*, exilii ad tempus meminit: Arcadius infamia perjuros notat, in *l. 41. C. de Transact.* Zeno dignitate exuendos sancit, in *l. 18. C. de Dignit.* & Justinianus denique in *l. 2. C. de Indicta viduitate toll. legum*, quæ perjuria puniunt, mentionem facit. Quæ tot loca ad perjurium per Principem nullo colore restringi possunt, cum generaliter loquantur. Vix dici potest, quam variaz extent opiniones eorum, qui hac de re scripserunt. Illud equidem certum est, quod perjurus, licet frivola sua provocatione directe in Deum peccet, in civitate tamen secundum prudentiam legislatoriam, puniri possit & debeat: ne si scelus illud quilibet impune ferat, omnis fides, & maximum expediendarum litium remedium e foro hominum tollatur. Vir maximus, Jacobus Gothofredus, in notis ad Tertulliani libros ad Nationes pag. 107. Jurisprudentiam Romanam a nævo liberare conatus est, quo hæcenus ob neglectam perjurii divini poenam laboravit; ideoque Tertulliani & Minucii Felicis loca, superius a nobis allata, indicia sæculi appellat, ad Principum adulationem conversi. Rem omnem autem una distinctione absolvi posse censet, inter juraamenta volatica, seu quotidianæ incurfationis, & seria, in contractibus & re pecuniaria præstita: Illa tam crebra fuisse & occulta, ut non nisi Deum vindicem habere potuerint, *l. 2. C. de Reb. cred.* hæc vero a magistratu civili punita esse *l. 13. D. de Dol. malo.* Verum idem

Gothofredus alibi ad *l. 8. C. Th. de Pactis & transact.* aliam conciliandi viam ingressus est; per calorem admissio perjurio, poenam, ait, non imponi; at judiciali, seu in iudicio admissio, imponi omnino; *d. l. 22.* ut & si in instrumento falsum iusjurandum admissum fuerit. *l. ult. D. Stellion.* & in specie *l. 4. C. si minor se maior.* Nullam vero legem occurrere, de poena perjurii, admissi adversus iusjurandum; quod de re aliqua praestanda vel facienda, pacto vel religione comprehensum fuerat; etsi hoc casu iurisjurandi religionem observandam, Alexander Imperator inculcarit, etiam minori quinque & viginti annis *l. 1. C. si advers. vend.* Hæc ille.

§. VIII.

Verumenimvero si præter allatas antea a nobis distinctiones binas, alias adhuc quatuor adsciscamus, iis demum expositis, facillimum erit jura concordare, quæ prima fronte pugnare videntur. Intererit ergo III. an litis decisorium voluntarium præstitum fuerit extra iudicium; an vero iudiciale, aut necessarium. Illius, si pejeratum per Deum, nulla est poena, nisi divina: quia de eo nec inquiri convenit §. 4. *Inst. de Except. l. 5. §. 2. D. de Jurej.* nec est dolus, quo nemo decipitur: non decipiuntur autem, qui sciunt & consentiunt; multo minus qui iusjurandum ab alio exigunt; hoc enim servandum est, quia transactum videtur *l. 21. D. de Dolo malo.* maxime vero propter conventionem conditionalem, qua deferens promittit, se ab ulteriore persecutione destitutum, si modo reus juraverit, rem suam esse, quæ petitur, vel se nihil debere; unde plus uno loco *conditio jurandi* deferri, referri, suscipi dicitur in *l. 3. l. 26. §. ult. l. 34. §. 7. D. de Jurej.* At si quis in iudicio, adversario vel iudice deferente pejeraverit, & *absolutus sit*, Labeo actionem de dolo in eum dandam; Pomponius & Marcellus, stare religioni debere; Paulus perjurii poenam sufficere censebat *d. l. 21. & 22. D. de Dolo malo.* Quamquam non

non facile liquere possit de perjurio ; nam etsi qui juravit, testibus postea aut instrumentis vincatur , esse potest , ut testes corrupti, instrumenta conficta sint, evidens autem calumnia detegi debet arg. l. 65. §. 1. *D. de condict. indeb.* Vide Hilliger. ad Donell. lib. 24. cap. 17. Deinde IV. discrimen constituendum puto, inter perjurium merum, & id quod cum alio crimine est conjunctum. Qui falsum testimonium dixisse convictus erat, ex L.L. XII. Tabularum e saxo Tarpeo dejiciebatur, auctore Cæcilio apud Gellium lib. XX. Noct. Att. c. 1. Quæ pœna, utpote durior, deinde in exilium conversa fuit, aut relegationem in insulam, quam perpetua infamia, aliæque pœnæ a judicis arbitrio pendentes, interdum & capitales, comitantur, l. 1. *D. Ad Legem Corn. de Sicar.* l. 16. *D. de Testibus.* Paul. l. V. *Sent. tit. 15.* Sic debitor si instrumento juraverit, sua esse pignora, quæ sciebat esse aliena, ad tempus exulare jubetur in l. ult. *D. de Stellationatu* : non quia pejeraverat, sed quia in stellationatum incidit, cujus pœna, licet absit perjurium, locum haberet. l. 3. §. 2. *D. l. 2. C. Eodem.*

§. IX.

Præterea V. multum refert, num quis consulto juraverit, an calore iracundiæ, errore, temeritate, vel alio effervescente mentis motu. Sæpe enim evenit, ut quis in rixa iratus juret, se aliquid facturum, in quo tamen nemini præjudicium fit, si pejeret, aut promissa, si servantur, scelere sunt adimplenda. In priore specie, ubi de dirimenda controversia, vel contractu firmando quæritur, fide opus est, ne alter lædatur, & perfido sufficit pejurii pœna. Signanter Ulpianus noster rei pecuniariæ meminit, & explicat, dare se non oportere, vel dari sibi oportere, vel intra certum tempus juraverit, se soluturum, nec tamen solverit, tum enim fustibus castigandus erat, qui per Genium Principis pejerasset; alia vero, & leniore pœna, si per Deum. Neutra harum autem obtinebit, si quis in malis promissis mutat de-

cretum, & leve votum rescindit. Eleganter & pie hanc in rem Alexander Faustiano rescribit: *Alienam sectæ meæ sollicitudinem concepisti, quasi crimen Majestatis suslineris, si servo tuo iratus esse non perseveres, quod semper te facturum INCONSULTE juraveris, in l. 2. C. Ad Legem Juliam Maj. Eodem pertinet ejusdem l. 2. C. de Rebus creditis, quam integram adscribo, ut lucem afferat & foeneretur: Jurisjurandi contempta religio satis Deum ultorem habet. Periculum autem corporis (id est fustium ictus) vel Majestatis crimen, secundum constituta Divorum parentum meorum (Severi & Antonini in nostra l. 13. §. fin. D. de Jurcj.) etsi per Principis venerationem QUODAM CALORE fuerit pejeratum, inferri non placet. Nil clarius, si bina hæc rescripta conjungantur: quod in priore inconsultum jusjurandum vocat, in posteriore per calorem quendam expressit; calor vero est inconsultus quilibet animi motus, ut ex legibus docuit Cujacius lib. II. Obs. cap. 19. & patet ex Quintil. II. cap. 15. Juvenili calore Populus inconsideratior. Nec Samueli Petito accedo, ad Jus Arcticum lib. IV. tit. 6. existimanti, hac l. 2. Severi & Antonini rescripto esse derogatum. Quasi vero hi adeo rigidi fuerint, ut calorem juvenilem (sic enim Græcam eorum formulam explicat, *προπεινός μὴ οὖτος, cum calore ne jurato*) & lubricum linguæ inconsultum, & extrajudiciale quidem, fustibus plecti voluissent. Quinimò particula *etsi* in hac l. 2. contrarium potius nos credere jubet, quæ sui natura ampliativa est: nec fidiculis quidem calorem illum ex d. l. 13. §. fin. extorserit Petitus: in re enim pecuniaria juratum dicitur diserte. Et nonne sic omnis perjurii poena fuisset sublata, cujus tamen Paulus, Alexandri consiliarius, mentionem fecit l. 22. D. de Dolo malo. Plane si Felicis consultatio superesset, quæstionem hic de eo, qui in rixa, calore iracundiæ motus, per Genium Principis pejeraverat, Alexandro propositam fuisse, certo nosceremus.*

§. X.

Denique VI. tempora probe sunt discernenda. Ætate Jurisconsultorum per Deum pejerans infamia nuspian legitur notatus. Certe nihil de eo expressum est edicto de infamibus, quod exstat in *l. 1. D. de his qui not. inf.* nec alia ulla lex ejus tituli hujusmodi quid prodit. Arcadius vero & Honorius infamiam primi irrogant, nec cuivis pejeranti, sed ei, qui adversus pacta & transactiones jurejurando confirmatas veniat. in *l. 41. C. de Transact.* Jam antea Alexander Imp. contractus jurisjurandi religione firmatos, etiam minori servandos inculcarat, in *l. 1. C. Si adv. vendit.* nulla vero constituta pœna, si quis hac parte pejerasset. Arcadius vero perjurio hujusmodi, a majore 25. annis commissio, quatuor varias & atroces imposuit pœnas, adeo ut post Alciatum, Molinæus, Menochius & Wiffenbachius hanc constitutionem, tanquam ab Arcadii tutore Rufino, turpi legum cauponatore, expressam, & iniquiorem, moribus receptam vel recipiendam non fuisse existimarint, quibus Gothofredus filius *ad d. l. 8. C. Th. de Pactis*, & Brunnem. *ad dist. l. 41. n. 13.* contradicunt. Ast quotquot pro legis hujus usu pugnant, tot limitationibus eam restringunt, ut regula prope absorbeatur. Bene monuit Beyerus *ad tit. de transact. §. 8.* Pactum, licet juratum, jure Romano, non produxisset actionem, sed exceptionem tantum; quod si quis ergo nudo pacto transigens, aliquid se daturum præstito jurejurando promitteret, quia nulla ad promissum exigendum actio prodita erat, aliis pœnis, ut infamia, opus fuisse, quæ hodie, ob diversam juris rationem, cessat. Post Arcadium Zeno quoque aliquid immutavit, dignitate perjuros exui jubens, in *l. 18. C. de Dignitat.* Non quemlibet autem coercet novella hæc constitutio, sed illustres viros, neque hos passim & quacunque in causa pejeraverint, sed tunc solum, cum criminali judicio conventi, cautioni juratæ non steterunt. Atque ad

varias hæc pœnas, ante tempora sua dictatas, Justinianus dig-
gitum intendit in *l. 2. de Indicta viduit.* Ipse etiam pœ-
nas quasdam in eos statuit, qui se nihil cuiquam judici de-
disse vel promisisse jurant, *Nov. 124.* quæ pœna tamen
non tam perjurii erat, quam corruptelæ. Denique ex *Nov.*
117. Tribunus militum vel chartularius militia exaucto-
ratur, si mulieri de marito suo inquirenti falso juraverit,
cum decessisse.

§. XI.

• Coronidis loco varias variarum gentium pœnas adjicere
lubet, quibus perjurii crimen coercere placuit. Ab Ægy-
ptiis ordiemur, quia primi hominum Deorum notitiam per-
cepisse olim credebantur, auctore Luciano de Dea Syria.
Hi perjuros capite mulctarunt, ut qui duas humanæ socie-
tatis res sanctissimas violarint, pietatem in Deos, & inter
homines fidem, ait Diodorus Siculus *lib. II.* Testatur
etiam Rabbi Abenesdra in Decalogum, suo adhuc ævo ca-
pite plectendum fuisse, qui apud Ægyptios per caput Re-
gis pejeraverat, nec tanto auro, quantum ipse pendebat,
redimendum. Scythæ si quem hominem per vaticinos con-
vicerint, pejerasse per Regis solium, sine mora caput ex-
cidunt, ejusque facultates inter se partiuntur, scribit He-
rodotus *lib. IV. pag. 108.* Athenis qui per Apollinem
vatem non mendacem, pejeraverat mutilatus, ex lege
Solonis, cujus meminit Lysias *Orat. VIII. pag. m. 128.*
Apud Græcos recentiores, qui ex sententia judicis, vel ad-
versario postulante, jusjurandum in Ecclesia præstiterat,
tactis Sacrosanctis Evangeliiis, ei perjurii postea convicto,
ex Novella Leonis & Constantini, lingua abscissa, ut tra-
dit Harmenopolus in *Proch. lib. 1. tit. 7.* & Attaliates *Sy-
nopf. tit. 18.* utraque etiam manus aliquando amputata, quo
sic, qua corporis parte peccasset, eadem & puniretur,
Procop. de *Bello Gotb. lib. I.* Similiter apud Francos, cum
perjuria invaluisse ex consuetudine jurandi, & multitu-
dine

dine conjuratorum, Carolus M. anno 779. cavit: *De eo qui perjurium fecerit, nullam redemptionem det, nisi manum perdat*, in Capitularibus *cap. 10.* apud Baluzium *Tom. 1. pag. 197. 860. & 1220.* quod & repetitum est *Legge Lango-bard. tit. 58. lib. 2. & Frifionum tit. 10.* Mahumedanis vero ridiculam & leviculam perjurii expiationem exprobrat Joannes Cantacuzenus *Orat. 2. κατὰ τὴν Μουσῆν*, §. 7. licet in Alcorano gravior etiam, quoad Deum poena proponatur, Vid. Selden. de Synedr. Vct. Ebr. *lib. II. cap. xi. §. 5.* Inter judicii Westphalici causas Vehmfrogicas perjurium relatum fuisse ex Henrico de Hervordia, Ænea Sylvio, aliisque monumentis Meibomius *Rer. Germ. tom. III. Tract. de Irmensula cap. XII. & Datte de Pace publ. lib. IV. c. 3. n. 45.* docuerunt. Nam & Saxonum lege antiqua *lib. 2. c. 8.* qui sciens pejerasset capite punitus, qui nesciens, manum redimere debuit. Regio Hispanorum jure quinta pars dentium testi falsum asserenti olim adempta *l. fin. tit. 16. partit. 3.* Ungarorum legibus de perjurio convictus omnia bona amittit, & disparibus vestibus indutus, zona cannabia succinctus, discalceatus pedibus & nudato capite semper incidere cogitur, juxta *tit. 30. jur. consuet. Hung.* apud Stephanum Werbeuzum. At secundum Stephani I. *lib. 11. decretor. c. 15.* perjurio addictus, perditam manum luit, aut quinquaginta juvencis eam redimere tenetur. Opes enim Ungarorum olim in juvencis constitutæ. Jure Canonico perjurus homicida pejor habetur, & infamiam incurrit, & a testimonio arcetur, *cap. constituimus 9. qu. 5. c. infames qu. 1. caus. 22. qu. 4. can. 7.* Cui adstipulatur Constitutio Carolina *art. 107.* & Jus Lubecense *lib. IV. tit. 14.* Item Speculi Saxonici Glossator *lib. 3. art. 83. n. 4.* Ex eadem Nemese Carolina, qui pecuniæ nomine vel lucri consequendi gratia, in judicio perjurium commisit, vel urphedam, de non redeundo, aut carceris injuria non ulciscenda, ruperit, amputatione duorum digitorum punitur,
dist.

dist. art. 107. & 108. Quæ pœna & Indis usitata fuit, auctore Strabone *lib. XV.* Apud Belgas frequentior est arbitraria coercitio. Vide Groenew. *ad l. 2. C. de Reb cred. n. 6.* & Matthæ. *de crimin. lib. 47. tit. ult. c. 1.* Praxi tamen Germaniæ invaluit, ut articuli digitorum priores, quibus in cœlum elevatis juratum fuit, abscindantur. Vide pluribus Carpzov. *Prax. crim. qu. 46. & 47. n. 11. seqq.* Lyncker. *dec. 179.* De mulieribus Richter *dec. 93. n. 28.*

F I N I S.



DIS-



DISSERTATIO SEXTA,

D E

PRÆSTATIONE CASUUM
SOLITORUM, INSOLITORUM, ET
INSOLENTISSIMORUM.

A D

*L. LXXVIII. §. f. D. de Contrah. emt. &
L. xv. §. 2. D. Locati.*



Ateria hujus dissertationis non eget commendatione, ipsa enim se ostendit; quia & rerum varietate pulchra, & usu quotidiana est. Merus autem, ne Juris studiosis nebulas offundant, duo Pandectarum capita, de quorum intellectu, primi nominis viri, Claudius Salmasius, & Desiderius Heraldus odiose inter se contenderunt. Meum forsitan non erit, tantas componere lites; symbolam tamen conferam, & quid aliis visum fuerit, quid ipse sentiam tecum, Lector Benevole communicabo. Prius autem quam rem ipsam aggrediar, Jurisconsultorum verba præmittenda erunt. Alterum caput in l. 78. §. f. *D. de contrahenda emtione*, Labeonis est, ex lib. IV. Posteriorum: *Frumenta, quæ in herbis erant, cum vendidisses, dixisti, te, si quid vi aut tempestate factum esset,*

Pp

præ.

præstaturum: ea frumenta nives corruperunt: Si immoderate fuerunt, & contra consuetudinem tempestatis, agi tecum ex empto poterit. Altera l. 15. §. 2. D. Locati ex Ulpiani lib. xxxii. ad Edictum petita est, & ita sese habet: Si vis tempestatis calamitose contigerit, an locator conductori aliquid præstare debeat? videamus. Servius omnem vim, cui resisti non potest, dominum colono præstare debere ait: ut puta fluminum, graculorum, sturnorum, & si quid simile acciderit, aut si incursus hostium fiat. Si qua tamen vitia ex ipsa re oriuntur, hæc damno coloni esse: veluti si vinum coacuerit, si rauris, aut herbis segetes corruptæ sint. Sed & si labes facta sit, omnemque fructum tulerit, damnum coloni non esse; ne supra damnum seminis amissi, mercedes agri præstare cogatur. Sed & si uredo fructum olæ corruperit, aut solis fervore non assueto id acciderit, damnum domini futurum. Si vero nihil extra consuetudinem acciderit, damnum coloni esse. Idemque dicendum, si exercitus præteriens per lasciviam aliquid abstulit. Sed & si ager terræ motu ita corruerit, ut nusquam sit, damno domini esse: oportere enim agrum præstari conductori, ut frui possit. Ecce! uterque locus plenus est æquitatis, ac rerum naturalium tanta abundat copia,

Labori faber ut desit, non fabro labor!

CAPUT I.

NATURAM CASUS, EJUSQUE DIVISIONEM EXPONIT.

- §. I. Providentia divina regantur omnia, etiam adversa. II. Ethnicorum vulgus sortita Deæ Fortune adscripsit, quæ denudatur. III. Fatum Stoicorum fatum, velo providentiæ amictum. IV. Vis alia divina, alia naturalis Jurisconsultis. Tempestates divinæ. V. Quid sit casus, exponitur: aliquando culpam notat. VI. Ejus exempla innumera: quid labes & vis calamitose tempestatis. VII. Incendium non promiscue ad casus refertur. VIII. Furtum & factum, Prin.

Principis an casus fortuiti, & quando. IX. Quæ ex re ipsa veniunt vitia ad casus non referenda. X. Nec opera providæ & solertis naturæ. XI. Quid sit casus solitus. XII. Quid insolitus. XIII. Quid insolentissimus exemplis declaratur. XIV. Distinguendas esse regiones. XV. Civitates terrestres item a maritimis, magnas a parvis. Cui Romæ lapsus tectorum assidui. XVI. Fontes errorum & dubia remouentur. Salmasii & Heraldi inanes conuersationes ad l. 78. §. 3. de Contr. emt. explosæ.

§. I.

DEi providentia regi hoc universum, & omnia quæ in Deo vere subsistunt, non ratio tantum, & verbum revelatum, sed & ipse quodammodo sensus evincit. Minus quippe gloriosum foret Summo Opifici, tot præclara opera edidisse, quæ ejus potentiam & sapientiam ostenderent, nisi & curam haberet eorum, quæ produxit, eaque, etiam minima, pro infinita bonitate & scientia sua, ad fines certos moderaretur. Ipsum os Sapientiæ Christus nos edocuit, capillos omnes capitis nostri esse numeratos, nec passerulum quidem sine Patris voluntate in terram cadere. Paulus in Deo nos vivere, moveri & esse, ait, ejusque potente nutu sustineri omnia. Quin imo singuli anni, menses, & dies, tum imperiorum ortus & occasus, miracula item & somnia, prædictiones quoque futurorum arcanam illam & vigilem curam lucidissime ostendunt. Quocunque oculos animumque convertas, animata & inanimata clamant & loquuntur, quiddam supra nos esse, quod hæc tam multa, tam mira creavit & creata conservet. Nec læta tantum & bona, sed tristitia quoque & mala, quæ certis personis damni aliquid inferunt, in poenam vel ad emendationem, a Dei gubernatione proficisci, certum est. Quod enim iste in latrones incidit, ille naufragium facit, hujus ædes vento dejiciuntur, illius fulmine percutuntur, unius Dei opus est. Is gratiam suam testatur, & favorem paternum, quoties rore & pluvia terram irrigat; iram vero præsentem

sentem & vindictam, quando cœlum, ferri instar, obdurat, vel pluvia intempestiva fruges corrumpit. Lucem & tenebras, pacem & bellum, quicquid denique boni malive præter spem in civitate accidit, unus unus efficit Jehova, *Amos. III. 6. Is. XLV. 7.* Sed quoniam mentis humanæ rarditas rationem, ordinem & finem in Dei consilio mirabili latentem apprehendere nequit, fortuita nobis videntur, quæ ex certa Dei voluntate promanant, atque oculatissimæ ejus providentiæ sunt adscribenda: quo sensu apud Ecclesiasten sæpius vox *eventus* reperitur. Vide B. Calvini Instit. Chr. Rel. I. 1. c. 16. §. 9.

§. II

Gentiles vero religionis lumine destituti, cum summum aliquod, quo res humanæ aguntur, esse scirent, ecquid tamen illud esset, an in Deo, an extra Deum positum, ignorarent, adhæc optime deliberata pessimum aliquando exitum sortiri, bonos ubique jacere, pravos ad honores evehi observarent, in varias iverunt sententias, quas breviter recenset Arrianus *lib. I. ad Epiet. c. 12.* Multi eam in opinionem adducti sunt, temerario aut cœco *Fortune* impetu volvi & rotari plerasque res humanas. Hinc vetus illa sententia, cujus ipse Theophrastus, longo rerum usu edoctus vir, auctor habetur: *Τυχὴ τὰ θνητῶν πνεύματα, καὶ τυβήλια.* Quin toto mundo, & locis omnibus, omnibusque horis, omniumque vocibus *Fortuna* invocabatur. Prosperam laudabat, adversam arguebat vulgus, & cum convitiis iniquam colebat. Huic omnia expensa, omnia accepta ferebantur: a plerisque vero & cœca existimata, vaga, inconstans, incerta, varia, indignorumque faultrix. Adeo obnoxii sumus sorti, ut *Sors ipsa pro Deo sit, qua Deus probatur incertus!* exclamat Plin. I. 11. H. N. c. 7. Sanioribus item Philosophis, pariter ac Plinio, absurdum videbatur, Fortunam esse Deam, cum potius velamentum esset ignorantie gubernationis divinæ Cicero V. Tusc. *Vexatur Theophrastus & libris & scholis omnium Philosophorum, quod in Callisthene suo laudavit illam*

illam sententiam : *Vitam regit Fortuna, non sapientia.* Ancus tamen Marcius ei, velut Dæ potentissimæ, templum posuit Romæ, Servius Tullius plura extruxit : & indolem ejus explicat Tullius in Topicis cap. XVII. *Latent, quæ subiecta sunt Fortunæ, cum enim nihil sine causa fiat, hoc ipsum est Fortunæ eventus; obscura, quod latenter efficitur.* Nec Rhetores tantum & Poetæ, sed & Jurisconsulti usurparunt, ut vocem mediam. Tryphoninus thesaurum fortunæ donum dici ait, l. 63. D. de A. R. D. id est, munus divinum l. 1. C. de Theaur. *Dei donum.* Nov. Leon. 61. Contra Ulpianus fortunam & casus tristiores conjunxit l. 3. §. 1. D. de Muner. *Miserima naufragiorum fortuna est apud eundem in l. 3 §. f. de Incend. ruin. naufrag.* Accurate vero casus a Fortuna distinguitur, ut effectus a causa. Cicero IV Tusc. 17. *Quemcunque casum fortuna invexit.* Quintil. XXVII. Inst. c. 1. *Casum tam indignæ fortunæ miserantis.* Vide Celeberrimum Burmannum ad Quintilian. decl. 4. eique junge Gutherium de jure manium lib. 1. c. 3.

§ III.

Non equidem inficior, Platonicos pariter ac Stoicos providentiam Deo asseruisse, & hos quidem tam crebro, ut ludus fuerint Epicureis, qui eam *anum fatidicam Stoicorum* appellarunt : nec minus Aristoteles Deum in orbe idem esse agnovit, quod in navi gubernator, in curru auriga. Sed tamen quia eam de Diis opinionem habebant, eos non posse non prodesse generi humano, etiam indignos juvare, nunquam irasci, ideo culpam omnium malorum in materiam conjecerunt, & *Fatum* commenti sunt fatuum sive *τυχη* & connexam rerum seriem, per quam mundus administretur. Sæpe fatum cum fortuna confunditur, etiam apud Orientales, Gad & Fortunam & ipsum Jovem notat; sive *τοῦ ἀγαθοῦ τυχεῖς*; cum proprie fortuna respectu hominum, fatum intuitu Dei dicatur. Hujus vinculis ipsi Deus Stoicorum irretitus est, ut nascæ piscis, ab omni ævo materiæ immersus : cum tamen ille liberrimus rerum omnium re-

Etior transcendat, cum libuit, & rumpat implexa illa agmina & volumina fati. Occupatus in eo fuit Lipsius, ut asperum de fato sermonem benigna interpretatione juvaret, ipse nec sibi constans, nec satis fidens. Chrysippus item apud Gellium *lib. VI. cap. 1.* omnia fato fieri explicare conatus est: sed Cicero judicavit, cum non satis se expedivisse. *Anile & plenum superstitionis fati nomen ipsum vocat II. de Divin.* adimit certe fatum homini libertatem, omnipotentiam Deo. Jurisconsulti vero, quemadmodum a Stoicis imbuti, inopinatos quosvis casus, quasi rerum serie & ordine inviolabili contingentes, Fato adscripserunt, velo providentiæ divinæ amictō. Hinc *fatalia damna* vocat Ulpianus, quæ imprudentibus accidunt *l. 52. §. 3. Pro soc.* id est insciis, non opinantibus, non providentibus, vel quæ in prudentissimos quoque cadunt, prout explicat Ampl. Senator van Bynkershock *lib. II. Obs. c. 10.* Detrimēta *fatalium l. 3. D. de Instr. vel instr. leg.* quæ non inconsulte, sed *fato* eveniunt *l. 11. §. 4. D. de Minor.* Idem vero Domitius violentiam ventorum *vim* habere *divinam* agnoscit in *l. 24. §. 4. D. de Damn. inf.* quam a *fatali damno* separat in *l. 2. §. 1. D. de Per. & comm.* Cajus *Vim majorem* vocat, quam Græci *Θεῶν βία*, *vim divinam* appellarunt *l. 25. §. 6. D. Locati.*

§. IV.

Balbutiebant scilicet cum magistris suis in materia de providentiā, & quasi per nebulam eam videntes, sententiæ incerti, nunc Deo, nunc fato, mox Fortunæ, iterum naturæ, vel ordini aut fatali necessitati fortuita imputabant. *Vis* autem duplex iis fuisse videtur, alia *major & divina*, quæ non ab hominibus aut brutis, sed mirabili quadam cœli potentia huic vel illi infertur, quæque *Ira cœlitum invehitum malum*, Ciceroni IV. Tuscul. quæst. *Jovis ira* Ovidio l. XV. Met. *Vis sacra Jovis* Capellæ lib. 1. vocatur, ut imbres, fulgura, locustæ, pestis. Alia vis est *naturalis*, quæ ex naturalibus & physicis causis promanat, ut terræ,

re motus, si vi naturali, velut terræ motu, ait Sabinus apud Javolenum in l. 59. D. Locati. Huc refero vim fluminis l. 9. §. 1. de Damn. inf. vim latronum l. 30. ad L. Falcid. nimios imbres, hiemis rigorem & cœli intemperantiam, quæ apud Senecam de const. sap. c. 74. forte accidentia, apud Tacitum naturæ mala appellantur IV. Hist. 74. Audiamus Senecam lib. VI Quæst. nat. c. 3. Illud proderit præsumere animo, nihil horum Deos facere, nec ira numinum aut cælum concuti aut terram. Suas ista causas habent, nec ex imperio seviunt, sed ex quibusdam vitiis, ut cum corpora nostra turbantur. Adde Theophrastum apud Alciat. l. 2. præterm. Budæum ad l. 25. loc. & Hotman. l. IV. Obse. 16. De vi majore multa prostant veterum loca, Pauli apud Pariatorem LL. Mos. tit. X. § 9. Prudentii in Psicom. Sidonii lib. IV. ep. 5. Donatus ad lib. IV. Æneid. Amor, inquit, vocatur vis major, urget vis intolerabilis. Eadem est vis divina, quam egregie Plinius lib. XVIII. H. N. c. 28. explicat. Ante omnia duo genera cælestis injuriæ meminisse debemus: unum, quod tempestates vocamus, in quibus grandines, procellæ, ceteraque similia intelliguntur: quæ quum acciderint vis major appellatur. Columella l. c. 7. Nam ubi sedulo colitur ager plerumque compendium: nunquam, nisi si cœli major vis aut prædonis incessit, detrimentum adfert. Inscriptio Grut. pag. 94. 5. VI. DIVINÆ. SACRVM. Cæli vitium vocat Imp. in l. 8. C. Locat. & Pontifex in cap. propter X. cod. Cicero commotas tempestates vim fortune dixit lib. II. d. inv. Horatius Deorum iram vim acriorem: Virgilius vim superum vocat. Sed Jupiter, omnium tempestatum velut præses, ut lapis indicat apud Sponium miscell. pag. 76. JOVI. O. M. TEMPESTATIUM DIVINARUM POTENTI. Hinc etiam in nummo Sequini, dextra pluviâ comprimens, altera fulmen gestans repræsentatur. Nec alia causa Tempestates populi Romani ritibus consecratæ sunt. In vetustissima inscriptione, quam Hieronymus Alexander brevi commentario explicavit, L. Scipio,

Scipio, Barbati filius, DEDET TEMPESTATEBVS.
AIDE. MERETO.

§. V.

Jurisconsulti vero, quanquam omnia fati legibus subiecta esse crederent, sic tamen in arte sua populari versabantur, ut de quacunque re sermo esset, omnia transferrent ad usum, & ex humana scientia vel ignorantia, quicquid homo homini deberet, aestimarent. Eleganter hoc docuit *van Bynkersh.* l. IV. Obs. c. 15. ex Pauli l. 28. §. ult. *D. de Jud.* ubi: *Non naturam rerum intuendam, in qua omnia certa essent, cum futura utique fierent, sed nostram inscientiam aspici debere.* Illustro ex Quintil. decl. 4 *Utut providentia regantur cuncta, non posse tamen humana scientia deprehendi.* Atque sic etiam in dirimendis civium controversiis, missis Philosophorum simulatorum contentionibus, casum fortuitum accipiebant pro quolibet inopinatio rei eventu, qui humana diligentia prævideri, aut evitari non potest, sive extrinsecus, sive a facto alicujus non voluntario promanet. In Legibus XII. Tabb. *casus* pro negligentia acceptus videtur, ut Contius l. 1. *lest. c. 14.* observavit ex Cajo in l. 9. *D. de Inc. ruina.* juncta l. 28. §. 12. *D. de Pæn.* ex aliis Petrus Burgius l. 1. *Elect. c. 5.* Eruditus etiam Joh. van de Water l. 1. *Obs. c. 16.* Paulum notavit, in Collatione LL. Mos. tit. xii. n. 6. insulam casu incendere pro culpa, & *fortuita incendia* pro his, quibus culpa causam dedit, dixisse. In eadem Collat. tit. i. n. xi. Celeberrimus Schultingius *casu delinquere* recte interpretatur, quod non fit dolo, sicut in l. 1. §. 3. *D. ad L. Corn. de Sicar.* At nostro significato Ulpianus in l. 2. §. 7. de Adm. rer. ad civ. pert. *Fortuitos, inquit, casus nullum humanum consilium providere potest, id est vitare, cavere: ut apud Ciceronem IX. Epist. fam. 19. Attum est de te, nisi provides. & Terent. Andr. l. Sc. 3. v. 4. Quæ si non astu providentur, ibique Donatus. Dantur enim casus noxii, qui possunt provideri, nec tamen præcaveri, ut incen-*

cen.

cendium quod late evagatur, & sæpius vis, cui resisti non potest l. 15. §. 1. D. Locati. casus, cui humana infirmitas resistere non potest l. 1. §. 4. de O. & A. fortuiti casus, adversus quos caveri non potuit l. 4. C. de Peric. tut. Aliis contra potest resisti, si modo possent prævideri, ut vis latronum, piratarum & hostium. Hinc Alexander Imperator in l. 6. C. de Pignor. act. *Quæ fortuitis casibus accidunt, cum prævideri non potuerint - nullo bonæ fidei iudicio præstantur.* Cicero II. de Divinat. *Potest ne igitur earum rerum, quæ nihil habent rationis, quare futuræ sint, ulla esse præsentio? Quid est enim aliud Fors, quid fortuna, quid casus, quid eventus, nisi cum sic aliquid cecidit, sic evenit, ut vel non cadere atque evenire, vel aliter cadere atque evenire potnerit?* Licet vero nihil sit a casu, ubi maxime casus apparet, nec Christiani casum aut Fortunam in hoc pulcherrimo mundi corpore dominari, quævis autem, etiam subita, occulto Dei consilio dirigi sciamus; nulla tamen ratio est, cur casus vocabulum respuatur; modo ejus prava significatione, ut Basilii Magni monuit, piorum mentes non occupentur, sed omnia ad divinam providentiam revocentur. *Nihil aliud in rebus casum vocamus, nisi cujus ratio & causa ante secreta est,* ait Augustinus I. *Retract. c. 1.* Adde Elmenhorst. ad Minuc. cap. XI.

§. VI.

Exempla casuum fortuitorum, proh dolor! innumera sunt, & potiora enarrarunt Jurisconsulti in l. 15. §. 2. D. Locati l. 23. de R. J. Huc pertinet incendium, naufragium, ruina, aquarum inundatio, impetus prædonum & piratarum, hostium incursum, rapina, tumultus, terræ motus, labes, chasma, alluvio, mortes animalium, murium & locustarum examina, sturnorum aut graculorum perniciæ, vis fluminum, grando, nix & glacies immoderata, naufragium, ruina, sententia injusta, falsum testimonium, mentis aut corporis infirmitas, & cetera, quæ sine hominum culpa accidere solent. Summus Cujacius l. XV. Obs.

c. 28. species nonnullas casuum in d. l. 15. relatorum illustravit ut solet, pulcherrime. Recte etiam vindicavit vocem *lubes* contra Budæi mutationem in *tabes*, quæ ad Medicorum quæstus spectat, arboribus tamen tribuitur apud Plinium XVII. cap. 24 & sæpius has voces confudisse librarios, Viri Clarissimi Gronovius ad Liv. 33 c. 38. Burman. ad Quintil. decl. 13 & Drakenb. ad Siliu Italici VIII. 21. monuerunt. Sed *graculorum* appellatione, picas illas glandularias, quas *gaios* appellant Galli, quasque Græci *μυλαιοκρανίς* dixerunt, non intelligi, sed *corvorum* genus, idem Cujacius observavit, at strictim, & ante ipsum Bellonius Ornithologiæ lib. VI. c. 7. ac Julius Scaliger Exerc. 222. quorum sententiam Menagius pluribus confirmavit Amœnit cap. 38. Videamus autem quid sit *calamitosæ tempestatis vis* in ead. l. 15. Calamitatis vox proprie vitium notat in calamis, seu culmis quasiatis & fractis, quod grando plerumque causatur; post autem ad omnem frugum perniciem, quæ colonum pauperat: dein ad omne fortunarum detrimentum translata est, ut contra P. Nannium crudite docuit Gronov. l. III. Obs. c. 9. Hinc ager ejusmodi calamitatibus obnoxius *calamitosus* vocatur Catoni de R. R. c. 1. & 35. Plinius hordeum ex omni frumento minime *calamitosum* appellat l. 18. c. 7. quia ejus calami, ex quibus stant spicæ, sunt flexibiliores & demissiores, quam ut imbrium violentia facile confringi queant. Cicero III. Verr. 38. pariter ac Ulpianus, *calamitosam tempestatem* dixit, pro ea, quæ segetes prosternit & corrumpit. Non ergo grandines tantum earumque verbera, sed & agros torrentia sidera, & hiemes iniquas, flatus ventorum, pluviarum incursum, passerum & gruum agmina, uredinem ex rore concreto, rubiginem ex rore putrefacto, carbunculum ex nebulis æris & quodvis cœli periculum, quod arva depositum fallere jubet, vis illa comprehendit. Plinius lib. XVIII. H. N. c. 28. *Tempestates aliæ ab horridis sideribus exeunt, veluti Arcturo, Orione, Hadis. Aliæ sunt, quæ*

que silente cælo serenisque noctibus sunt, nullo sentiente, nisi cum jam factæ sunt. Publica hæc & magnæ differentie a prioribus, aliis rubiginem, aliis uredinem, aliis carbunculum appellantibus, omnibus vero sterilitatem. Horatius lib. III. Ode 1. ubi docet, animi tranquillitate vitam beatam effici, neque adeo rebus necessariis contentum ullis perturbari incommodis, sic inter alia canit:

Desiderantem quod satis est, neque

Tumultuosum sollicitat mare.

Nec sævus Arcturi cadentis

Impetus, aut orientis Hædi:

Non verberatæ grandine vineæ,

Fundusque mendax; arbore nunc aquas

Culpante, nunc torrentia agros

Sidera, nunc hiemes iniquas.

Horatius comitem habeat Ovidium lib. V. Metamorph.

- - - *primis segetes moriuntur in herbis,*

Et modo Sol nimius, nimius modo corripit imber,

Sideraque & venti nocent, avidæque volucres

Semina jacta legunt, lolium tribulique fatigant

Triticeas messes, & inexplicabile gramen.

§. VII.

Hic admonendi sumus, quod modo *incendium* diximus casibus fortuitis annumerari, non promiscue accipiendum esse, sed si per vim extrariam, non vero intrinsecus facto inhabitantium, id fuerit obortum. Quod si enim cœlitus misso igne icetæ consumantur ædes, vel furor hostium focos privatos flamma disturbet, aut ignis, ex ædibus alienis vento citus, magnam urbis partem hauriat, minime ambiguum habemus, quin casus fortuitus incendii causam intulerit l. 18. D. Commod. l. 9. §. 3. D. l. 15. §. 3. D. Locati. l. 22. de Neg. gest. l. 1. §. 4. de O. & A. Proinde Claudius Cæsar Puteolis & Ostiæ singulas cohortes, ad arcendos incendiorum casus disposuit, auctore Suetonio in vita ejus cap. 25. Sin vero domini, aut inquilini vel domesticorum vitio in-

cendum cœperit, ut si fornacarius ad fornacem obdormivit, vel qui secundum parietem communem furnum habens sic injectit ignem, ut paries inde exustus sit: aut si quis sclopetum dispoſerit in avem tecto stramineo insidentem, calibus fortuitis minime annumeratur, *l. 26. §. 7. 8. 9. 10. 11. D. ad L. Aquil.* sed culpæ, quam plerumque adesse, ait Paulus *l. 3. §. 1. D. de Offic. præf. vig.* Seneca eleganter lib. VII. de benef. c. 16. *Quid tu tam imprudentes judicas majores nostros fuisse, ut non intelligerent iniquissimum esse, eodem loco haberi eum, qui pecuniam, quam a creditore acceperat, libidine aut alea absumsit, & eum qui incendio, aut latrocinio, aut aliquo casu tristiore, aliena cum suis perdidit? nullam excusationem receperunt, ut homines scirent, fidem ubique præstandam.* Sane, prioribus speciebus exceptis, incendium sine culpa fieri non posse, docet Alphenus Varus *l. 11. D. de Peric. & comm. juncta ejusdem l. 30. §. f. D. Locat.* nec lata tantum, & levis, sed & levissima præstatur *l. 44. D. Ad L. Aq.* hac ratione, quod in igne custodiendo summa diligentia opus est, etiam ne quid omittatur *l. 27. §. 9. l. 30. §. 3. D. ad L. Aquil.* Vid. Gail. 2 *Obs. 22.* Sande lib. 3. tit. 6. n. 9. Brunn. ad *l. 27. & 44. ad L. Aquil.* S ryck. de incend. casuali pos. 6. Quis autem culpam probare debeat, huc non pertinet. Videſis Duaren. ad tit. de Probat. c. XI. Cujac. XVII. *Obs. 29.* Schilt. Ex. XII. §. 25. & Hert. lib. 1. paræm. 22.

§. VIII.

De furto minor dubitatio, inter casus fortuitos non esse recensendum: quamvis enim damnis annumeretur, ideoque rapinæ & mortibus servorum accenseatur in *l. 30. pr. D. ad L. Aq.* gregis item abactio casibus adscribatur *l. 9. §. 4. Locat.* quæ furto proxima est *l. 1. §. 1. D. de Abig.* nimis tamen liquet, diligentem patremfamilias furtum cavere posse, & vix esse, ut sine possessorum lata vel levi culpa committatur, *l. 78. D. de Furt. l. 52. §. 3. D. Pro soc.* Ideoque si res vendita nondum tradita furto perierit, ven-

venditorem manet periculum *l. 14. §. 1. de Peric. & comm.* Quamquam pignora creditori, vel aliis res alienæ, quas ex contractu possident, sine culpa aliquando furripi possint, *l. 35. §. 4. D. de Contrab. emt. l. 9. C. de Pign. act.* maxime a faculariis & apertulariis, quorum ars in furando adeo subtilis, ut nihil tam obseratum, oclusum aut obsignatum sit, quod illi non aperiant latenter, velut a Gygis annulo instructi. Itaque cum Ulpiano in *l. 14. §. 6. D. de Furt.* distinguendum erit, an de ejusmodi circumstantia aut vi adhibita non constet, & culpam furtum comitari dicemus, donec contrarium probetur. Gomez. *l. 2. var. ref. c. 3. n. 22. Clud. de cond. furt. c. 20. n. 27.* an vero effractio, vel violentia aut similis nequitia fuerit probata, & furtum inter casus fortuitos referetur Carpz. *p. 2. c. 26. def. 15. Farinac. Oper. crim. p. 4. conf. 60 n. 9. Stryck. vol. 1. disp. 3. de Saccular. & direct.* Illud item inter omnes nunc constat, quod factio Principis sit, ut si rem ad fortalitium extruendum ex plenitudine potestatis auferat, pro casu fortuito haberi, neque emtori ad evictionem adversus auctorem suum actionem dari. *l. 15. §. 2. d. R. V. l. 11. & § 1. D. de Eviēt l. fin. C. d. A. E. V. MCV. p. VI. dec. 34. Stryck. de C. C. sect. 2. c. 8. §. 40. L. B. de Lyncker. dec. 238. & 715.* nisi via juris & ordine processus consueto auferat, vel manifesto de justitia causæ ejus constet Brunn. *ad d. l. 11. n. 2. Berl. p. 1. d. 139. n. 11.* vel etiam venditor sciverit, Principem hoc facturum esse, & nihilominus hoc reticuit. Ita judicatum in causa Claudii Centumali apud Valerium Maximum *lib. VIII. c. 2. n. 1.* summa quidem cum æquitate, quia bonæ fidei venditorem nec commodorum spem augere, nec incommodorum cognitionem obscurare oportet. Adde Mangil. *de Eviēt. qu. 17. n. 18.* & Stryckii *disp. de Principe evincente vol. 6.*

§ IX.

Verum, ut propius ad id, quod agimus, accedamus; vitia, quæ ex ipsa re veniunt, ad classẽ casuum fortuito-

rum non pertinent : veluti si vinum coacuerit, si raucis aut herbis segetes corruptæ sint, ait Ulpianus in l. 15. §. 2. D. Locat. Frequens in Italia erat, vinum coacescere vel evanidum fieri, quia sui natura vetustatem non ferebat. l. 9. §. f. de contrah. emt. l. 1. de Per. & comm. l. 85. de leg. 3. Hinc in ejus emtione vulgaris formula apud Catonem de R. R. c. 148. *Vinum quod neque aceat, neque muceat*; & vinum fugiens, quod cedit ætati, est apud Ciceronem III. d. Off. c. 23. Horatius *vappam* vocavit, Æolica voce. Pro raucis Alciatus 7. Par. 5. apud Ulpianum substituebat *erucis*: sed raucas retinent Budæus, Cujacius, Brodæus lib. X. Miscell. 20 & vermiculos explicant, sulti naturalium scriptoris Plinii auctoritate l. XVII c. 18. *Olea, ubi quercus effossa sit, male ponitur, quoniam vermes, raucæ vocantur, in radice quercus nascuntur.* Vid. Cl. Vir Dukerus de Lat. 7. Ctor. pag. 399. Herbas autem hic intelligimus inutiles, nocivas, & steriles, carduos, lappasque, quæis parens natura noverca facta pingues & pulchras segetes sæpe corrumpit aut extinguit. *Inexplicabile gramen* vocabat Ovidius l. c. Virgilius Georg. I. 5. 150.

*Mox & frumentis labor additus: ut mala calmos
Effet (cederet) robigo, segnisque horreret in arvis
Carduus. Intereunt segetes: subit aspera silva,
Lappæque tribulique: interque nitentia culta
Infelix lolium, & steriles dominantur avenæ.*

Hæc vero ad casus fortuitos minime erant referenda, quia sibi imputet colonus, quod matura venditione periculum acoris amolitus non est, vermes non collegit, herbas non evulfit, quæ vitio agri nascuntur & cultorum ignaviam produnt. Horatius lib. 1. sat. 3. 5. 37.

Neglectis urenda filix innascitur agris.

Eadem ratione qui damni infecti nomine vicino repromissit, præstat quod vitio ædificii & infirmitate factum est: sed si tanta vis venti fuerit, ut quamvis firma ædificia convelleret, quod aut vento aut omnino aliqua vi extrinsecus ad-

mota

mota cadit, pro casu habetur Alphenio Varo in *l. 43. D. de Damn. inf.* Huc item pertinet, quod propter vinearum vetustatem colono remissionem denegavit Divus Antoninus in *l. 15. §. 5. D. Locat.* Vitium enim ex re oritur, sibi-que imputet colonus, quod causam damni apertam non perspexit, cum fundum conducebat, *arg. l. 13. §. 6. D. de Damn. inf.* & poterat propaginum depreffione ex vetula vite novas facere. Vide quæ contra Menagium hanc in rem disputat Vir elogio nostro major van Bynkershoek *lib. II. Obs. c. 13.*

§. X.

Haud magis denique ad casus inopinatos pertinent, quæ non quidem ex vitio rei, sed extrinsecus, ita tamen contingunt, ut, præter solitum & consuetum naturæ ordinem, nihil inde aut parum damni colonis inferatur. Talia sunt opera omnia providæ solertisque naturæ, pluvix, venti, nives, æstus, pruina, frigus, quæ, nisi contra consuetudinem tempestatis & immoderata sint, ut nivis magnitudo tempore æstivo sata corrumpens, æquo animo ferre debet colonus, nec ea causa remissionem sibi audebit polliceri. Auctorem rursus laudo Ulpianum in *d. l. 15. §. 2. D. Locati.* *Si uredo fructum oleæ corruperit, aut Solis fervore non adsueto id acciderit, damnum domini futurum, si vero nihil extra consuetudinem acciderit, damnum coloni esse.* Pari ratione idem non aquas, sed *aquarum magnitudines* ad casum refert in *l. 23. d. R. l. non flumina, sed vim fluminum. l. 9. §. 2. de R. C. vim aquæ. l. 2. §. 5. de Aqua & aq. impetum fluminis. l. 14. §. f. quemadm. serv. ex quo scilicet inundationes, naufragia, chasmata & hiatus oriuntur, de quibus Imperator in *§. 3. l. de Emt. vend.* Seneca *lib. VI. Nat. quæst. c. 9.* & Plinius *lib. VII. Epist. 17.* Præclara hæc observatio Josepho Averanio debetur, in libris interpretationum, qui beneficio Clarissimi Brenkmanni lucem adspexerunt, *lib. II. cap. 26.* Firmatur autem exinde, quod ejusmodi naturæ opera communiter bona sunt, uti nives moderatæ frugibus per hiemem non*

non nocent, & licet singulis fere annis ab uredine, vel nimia pluvia aut grandine incommodum sentiant fata in hoc illove fundo, id tamen ubertate alterius fundi compensatur; imo damnum istud ab prudentibus agricolis prævideri potest & debet, casus vero regulariter sunt *inopinati fortune impetus* l. 4. Ut in post. leg. *Subita vis venti* l. 30. §. f. ad L. Aq. *vis major inopinatae cladis*, Novell. Theod. 47. atque *ex improvise accidere dicuntur*, in Collat. LL. *Asos. tit. 1. §. 9. & l. 1. C. ad L. Corn. de sic.* Levium deinde & incertorum ejusmodi rationem non habent Legislatores, sed *vim calamitosæ tempestatis* requirunt: *fortune insidias* l. ult. C. de Nec. serv. her. inst. *fortuitam eversionem* l. 2. §. 2. Si quis caut. *εὐρυφία* Græci vocant. Sic non omnis morbus locum facit redhibitioni, non levis lippitudo, aut levis dentis auriculæve dolor, vel mediocre ulcus l. 4. §. 6. *D. de Ed. ed.* Nec quadrupes pauperiem fecisse dicitur, nisi *contra naturam* generis sui aliquid fecerit l. 1. §. 7. *Si quadr.* Pariter & hic *extra consuetudinem* aliquid accidisse debet, *contra consuetudinem tempestatis* ait Labeo l. 78. §. 3. *D. de Contr. emt.* Cicero II. de Divinat. præter consuetudinem dixit. *Quicquid oritur quaecunque est, causam habeat a natura necesse est: ut etiamsi præter consuetudinem exstiterit, causam habeat a natura necesse est.*

§. XI.

His ita præmunitis, non difficilis erit explicatio casuum solitorum, insolitorum & insolitissimorum, qui tot cruces fixerunt Bartolo, Corneo, Alexandro, Alciato, Ripæ, Tiraquello ceterisque, ut Menochius sex diversas eorum sententias retulerit. *A. 7. Q. cas.* 80. quas cum serio perlegeris, idem tibi evenire senties, quod Demiphoni Terentiano, qui consultis tribus Oratoribus, *Probe*, inquit, *fecistis, incertior sum multo, quam dudum!* Causa ineptiarum fuit, quod bimembrem tantum divisionem fecerunt, in solitos & insolitos, cum omnino trium generum sint casus tempestatis sequioris, *frequentissimi, rariores & rarissimi*, uti

vocat

vocat Brunneman ad l. 78. D. de Contrah. emt. n. 8. Nimirum omnium rerum, quæ gradus habent, quos juxta ^{æpistolar} Mathematicam dimetiri non licet, tres gradus constituendi sunt, duo extremi & tertius, qui inter utrumque sit; sin plures facias, difficultates erunt infinitæ, nec ubi alter incipiat, alter desinat definire licebit. Quanquam vero omnes casus fortuiti, cum his comparati, quæ cottidie naturaliter accidunt, sint insoliti, inter se autem si conferantur, alii frequenter accidunt, alii raro, alii nunquam fere, ne centum aut mille quidem annis. Soliti ergo sunt, qui præter consuetudinem, & extrinsecus, & inopinate, sæpius tamen & ferme quotannis vel tertio aut quarto labente, accidunt, ita ut quilibet paterfamilias eas cogitare aut metuere possit. Quæ plerumque eveniunt ea dicimus solere fieri, quæ raro, vix solere. Quod autem fieri solet, non semper fit necessario, & certo anni tempore, sed & incerto, fortuito, & præter expectationem. Atque hi sunt casus soliti, quos accidere non est necesse, sed qui evenire & contingere possunt. Exemplis res fiet illustrior. Naufragium in mari sæpius accidit, nec tamen, si hominum providentiam spectes, mare turbari necesse est; ut navis salva redeat aut frangatur, a casu pendet, qui nec prævideri nec declinari potest l. 18. D. Commod. Tempestas autumnæ inæqualis morbos crebriores gignere solet, ut facere Horatius *Libitine questum* appellaverit, ex funerum frequentia; nec tamen id certum nec perpetuum est, nec sciri potest juvenis an senex, validus an infirmus naturæ debitum sit redditurus. Mors æquo pulsat pede pauperum tabernas, Regumque turres. Hinc mors *fatalis casus necessitas* appellatur in l. 5. C. de Appellat. & *fatum* pro morte, *fati diem funeri*, in *fatum* concedere, *fati munus* explorare sexcentis locis. In emporiis porro quid frequentius, quam mercatores facultatibus labi, atque bonis cedere: & tamen id quia præter consuetudinem mercatorum fit, nec humano consilio semper prævideri potest. (frons enim prima decipit multos) de-

bitorum nomina pejora facta casibus annumerantur l. 30. pr. D. Ad Leg. Falc.

§. XII.

Jam si comparatio instituatur, quid sit casus *insolitus* apparebit. Is nempe qui raro, & non nisi longi aut longissimi temporis spatio accidit, quemque adeo prudentes denique, & aliquali rerum usu periti patresfamilias cogitare possunt. Panschman. lib. 1. qu. 8. per tot. Multum hic judicis arbitrio relinquendum, nec tam ad tempus, quam ad casus naturam respiciendum esse, docet Menoch. d. A. J. Q. dist. cas. 80. n. 9. Quod ad vocem attinet, Servius illud Virgilii 1. Georg. v. 475. *Insolitis tremuerunt motibus Alpes explicans*, ait: *aut novis, id est nunquam antea in Alpibus factis, aut magnis, aut majoribus solito*. Ulpianus Principem, qui sententiam dixit, perraro ait permittere restitutionem, idque *insolitum esse* l. 18. §. 1. & 3. D. de Min. Sic grandine segetes prosterni, sæpius accidit, atque inter casus solitos refertur: at si amplioris magnitudinis grando cadat, cujus lapides gallinarum ova superantes longe lateque devastent omnia, casus insolitus erit. Livius lib. XXV. c. 7. *Tempestates fœdæ fuere. In Albano monte biduo continenter lapidibus pluit. Reate saxum ingens visum volitare, Sol rubere solito magis, sanguineoque similis*. Crebrum hoc portenti genus apud eundem & Julium Obsequentem, etiam Valerius Maximus in *Piceno lapidibus pluuisse* tradit l. 1. c. 6. Non quasi vere lapides ceciderint, sed grandines insignioris duritiei, & magnitudinis grandioris, quæ lapideam naturam repræsentare viderentur. *Lapides immanis grandinis*, Ezech. XXXVIII. 22. Adde Jos. X. 11. ibique Lyranum, & Licetum de *Lapide Bononiensi* cap. 9. & 10. Similiter exundationes fluminum ad casus solitos pertinent; si vero tanto impetu alveos excedant, ut nemora frangant, subruant montes, decutiant tecta, homines & armenta obruant, quis neget damna casibus insolitis esse adscribenda? Sane Augusti ætate Horatius queritur, flavum Tiberim retortis violenter undis

undis, ire dejectum monumenta Regis Templaque Vestæ lib.
1. Od. 2. Aliam Tiberis inundationem, sub Othone descri-
psit Tacitus, qua rapti e publico plerique, plures in taber-
nis & cubilibus intercepti, fames in vulgus l. 1. Hist. 86.
Aliam rursus Tiberis & Anienis, Trajani tempore, narrat
Plinius, qua opera prorupta, quasiata & decussa monimen-
ta, multi debilitati, obruti, obtriti, & aucta luctibus da-
mna l. VIII. epist. 17. Huc item ingentem tempestatem re-
fero, quam Poeta in Georgicis describit l. 1. v. 316.

*Sæpe ego, cum flavis messorum induceret arvis
Agricola, & fragili jam stringeret bordea culmo,
Omnia ventorum concurrere prælia vidi:
Quæ gravidam late segetem ab radicibus imis
Sublime expulsam eruerent; ita turbine nigro
Ferret hiems, culmumque levem stipulasque volantis,
Sæpe etiam immensum calo venit agmen aquarum,
Et sædam glomerant tempestatem imbris atris
Collectæ ex alto nubes: ruit arduus æther,
Et pluvia ingenti sata læta boumque labores
Diluit. Implentur fossæ, & cava flumina crescunt
Cum sonitu, fervetque fretis spirantibus æquor.*

§. XIII.

Deinceps *insolitissimus* casus est, qui rarissime, & velut mi-
raculose, centesimo v. gr. aut millesimo anno vix semel con-
tingit, ut cum Bartolo definit Jason vol. 1. conf. 107.
Carpz. p. 2. c. 26. def. 8. quique adeo in omni hominum
memoria est inauditus, ut ne prudentissimi quidem toto
animo de eo cogitare possint. Greve l. 2. concl. 23. confid. 4.
Huc referendum infortunium, quod patitur navis in ba-
lænam sub fluctibus latitantem incidens; vel currus, qui
violentia ventorum de ponte in flumen præcipitatur Struv.
dec. Sabbath. c. 16. d. 16. sterilitas item agrorum universa-
lis, unde fames magna, qualem in Ægypto & regionibus
vicinis describit Moyses Genes. XLI. aliam sub Claudio Cæ-
sare memorat Lucas in Actis c. XI. 28. majore Samaria ob-
fessa

fessia laboravit, cum caput asini esset octogenum siclorum
 argenti 2 Reg. VI. 25. merentur etiam legi, quæ de fame
 per Germaniam, habent Annales Metenses ad A. 850. Ursper-
 gensis ad A. 898. & Hermannus Contractus anno 896.
 Graphica ejusmodi caritatis descriptio est apud Quintilianum
 declam. XII. *Non vulgaris illa labe frumenti fuit, nec, qua-
 lis alias ab agricolis accusari solet, perfidia terrarum, & ingræte
 messis irritus labor. Nova & inaudita & abominanda lues, quæ
 nihil homini reliquit præter hominem.* Nec minus locustæ huc
 pertinent, quarum appulsum fames comitatur & pestis, si
 putrefactæ. Earum examina, propter multitudinem, *locu-
 starum nubem* vocat Livius lib. XLII. c. 10. & Orosius lib.
 I. c. 10. ubi de decem Ægypti plagis insolitissimis loquitur,
 ex Exod. X. v. 13. Plinius *Deorum ira* pestem eam adscribit
 lib. XI. cap. 29. Namque & grandiores cernuntur, &
 Solem obumbrant, multa contractu adurunt, quicquid ve-
 ro herbidum aut frondosum est ambedunt, Tacitus XV.
 Annal. c. 5. Hinc edaci locustarum perniciæ sterilitatis vitium
 intercessisse, ajunt Dioclet. & Maxim. Imp. in l. 18. C.
Locati. Multa de his Bochartus in Hierozoico p. 2. l. 4. c.
 1. seq. cujus serinia compilare non vacat. Memorabile exem-
 plum habet Nicolaus Burgundus in vita Ludov. IV. de
 Gallia. Aliud Gregor. Turonens. lib. IV. Hist. Franc.
 cap. 20. ubi Clothario regnante, scribit: *duæ locustarum
 acies apparuerunt, quæ per Avernum atque Lemovicinum trans-
 euntes, ut ferunt, Romanicum campum venerunt, in quo præ-
 lio maximo inter se actò, maxime sunt collisæ.* Rurfus lib. VI.
 c. 33. *Legati Principis Chilperici de Hispaniis nuntiaverant,
 provinciam Carpitaniam graviter a locustis vexari, ut non arbor,
 non vinea, non silva, non fructus aliquis, aut quicquam viride
 remaneret, quod non a locustis everteretur.* Aliud denique Anna
 Comnena Alexiad. lib. X. pag. 284. & Abbas Ursperg A. 1091.
*Visti sunt per multas regiones vermiculi nimis ignoti, non longe
 a terra volantes, hoc est, ut vel manu vel virga tangi possent,
 grossitudine quidem muscis æquales, sed longitudine satis deductio-
 res,*

res, quorum tam infinitus existit exercitus, ut unum pene mili-
tarium in latitudine, duo vel tria in longitudine viderentur oc-
cupare, densitate vero sua ipsam solis lucem terris negare.

§. XIV.

Quod si vero alibi, hic certe valet, quod Ulpianus ait,
interest nostra scire nationem l. 31. §. 21. *D. de Edil. Edict.*
Quæ enim in illa provincia sæpius contingunt, in ista rarius,
in alia rarissime evenire solent. Locustæ Ægyptum maxi-
me & Cyrenaicam infestant, etiam in Africa frequentes
sunt, unde in Italiam venerunt, sæpe populum cogentes
ad Sibyllina remedia confugere, inopiæ metu, auctore Pli-
nio, loco modo allato: quem vellem inspexisset Menochius
quando lib. 2. *A. J. Q. cas. 80.* fluctuans scribebat; *In Ita-*
liam advolavit innumera quantitas locustarum, quæ in hac re-
gione visa est nunquam, & si visa est, jam mille annis elap-
sis visa est, & licet cogitari potuit de locustis, ut in l. 18.
Locati, non tamen de tam ingenti quantitate, quam illa fuit,
quæ advolarit anno 1542. In legibus Wisigothorum 2. tit.
2. l. 11. locustarum vastatio assidua occurrit, & in Scythiæ
regione, quam nunc Cosacci tenent, tanta earum est co-
pia, ut domos & lectos ingrediantur, atque in mensas in-
siliant, auctore Thevenotio p. 1. *Itin.* In Judæa & aliis
regionibus Orientis edules fuerunt, nam & beatus Jesu
Christi præcurzor quotidiano locustarum esu victitavit in
eremo *Matth. III. 4. Marc. I. 9. 6.* id quod Vir summus
Iaacus Casaubonus *Exerc. XIII. ad Annales Baronii c. 7.* evi-
cit contra Cujacium, qui Johannem *ta arpidum, fructus ar-*
borum, non autem *arpidus locustas* esitasse putavit. Innume-
ra alia sunt, quibus hoc discrimen locorum ostendi potest.
Quis tumidum guttur miratur in Alpibus? quis incendia
apud Moscovitas? Alia agrorum, circa Vesuvii & Aetnæ hor-
renda, est facies, quam apud nos. Vide Senec. *VI. quæst.*
nat. & Plin. VI. Ep. 16. In Arabia vicinisque provinciis
Scopelismi crimen notum erat, non perinde Romæ & in
Germania. Late & eleganter de eo explicat Ulp. l. 9. *D.*

de Extr. crim. & Cæl. Rhodigin. l. 18. *Let. ant. c. 35.* Pineda in comm. ad *Jobi V. 23* huc retulit Eliphæ verba ad Jobum, *cum lapidibus agri erit fœdus tuum.* Recte an secus, viderint alii. Porro Cajus in l. 18. *D. Commod* hostium incursum casibus annumerat: at ubi arena Martis sæpe diuque fuit, ut in Belgica Hispanica, Alsatia & Palatinatu, cives ac rustici belli incommodis magis fucti sunt, quam si in diuturna pace, ne fando quidem hostium furores percepissent. Intererit quoque, num quis cœpto jam bello casus fortuitos in se receperit, an dudum ante: illo casu de rerum statu conqueri non debet, quia volenti non fit injuria. *arg. l. 13. §. 6. d. Damn. inf.* Vid. *Mev. p. IV. dec. 199.* & in *confid. jurid. de pensionar. qu. 1. n. 145.* *Wesfel de remiss. merc. c. 11. n. 1. seq.*

§. XV.

Inundationes & terræ motus inter casus fortuitos vidimus supra. Hæc autem propria civitatum maritimarum mala sunt, & diluvium quidem, ubi terra est depressior mari: motus in locis paludinosi, nam *maritima maxime quatuntur*, ait Plinius *II. H. N. c. 80.* & junior *lib. VI. ep. 20.* *Tremor terræ Campaniæ solitus.* Oceani exundantis pericula Frisiam sensitse, nisi recente omnibus exemplo constaret, quod animus meminisse horret, Ubbo Emmius variis calamitosi casibus docere posset *lib. VII. IX. X. XI. & XII. Histor. Frisic. rer.* In Hollandia famosum est diluvium anni 1570. in festo omnium Sanctorum, quo quater centies milia hominum periisse dicuntur, & illud anni 1682. non minus horrendum. Vid. *Matth. Vossii Annal. Holl. ad ann. 1422.* Quam mirabiles ex diluviis illis ædium translationes & agrorum avulsiones, quamque arduæ inde controversiæ contingant, Gerhardus Felmannus singulari dissertatione *de accessione memorabilibus immani aquarum vi vel terræ motu factis* docuit: cui Annales Bertiniani A. 860. jungantur. Jam vero quid terræ motus commemorem? qui non domos solum, aut familias, aut urbes singulas hauserunt, sed

sed gentes totas regionesque in altam voragine[m] condidere, aut magna etiam terrarum spatia de loco in locum moverunt. Quorsum pertinet, quod Kircherus de mundo subterr. T. 1. pag. 221. refert, terræ motu in Basilicata, Neapolitani regni provincia, exorto, integrum montem, vinctis superbum, ultra tria passuum millia translatum, nullo in locis intermediis sui vestigio relicto. Similiter agros binos, e loco suo emotos, aliorum agris impositos esse, Cambdenus in vita Elisabethæ A. 1571. & 1583. retulit, & ex Richardi Bakeri historia Anglicana Huberus lib. IV. digressionum c. 22. Plura civitatum exempla, quæ terræ motibus eversee perierunt, memoravit Antoninus l. IV. de reb. suis §. 48. ibique in notis Gatakerus. Ut vere locum habeat, quod Ovidius cecinit lib. XV. Metamorph.

- - - Sic toties versa est fortuna locorum :

Vidi ego, quod fuerat quondam solidissima tellus,

esse fretum : vidi factas ex æquore terras.

Servius Sulpitius, cum ex Asia rediens Megaram versus navigaret, & regiones circum circa prospiceret, oppida quondam florentissima, Æginam, Megaram, Piræum, Corinthum, prostrata atque diruta ante oculos habebat, quemadmodum ad Tullium scribit lib. IV. epist. Cic. 5. Seneca Tyrum ruinis infamem fuisse testatur lib. IV. Quæst. nat. c. 1. De universa Syria idem Justinus l. XL. Hist. c. 2. In Sicilia, nostra adhuc memoria, terræ motus non florentissimas modo urbes concussit, sed & ultra centies mille homines neci tradidit. Contra Plutarchus in libro de superstitione c. 3. nec terræ motum in Gallia, nec fulmen in Æthiopia, formidari dixit. In Urbe vero urbium & gentium domina frequentissima erant incendia, frequentissimæ ruinæ, ut miserum esset horrere incendia, lapsus testorum affiduus Juvenal. sat. III. Quapropter Augustus Cæsar contra incendia cohortem libertinorum constituit, quæ opitularetur : utque ruinæ caverentur edixit, ne novum adificium ad viam publicam factum, ultra septuaginta pedes altolleretur, auctore

Strabo

Strabone lib. V. cui adstipulatur Dio lib. LV. Sueton Aug. c. 30. Adde Tacit. XV. Ann. 43. Sext. Aurel. Vict. Epit. c. 13. Juvenal. dict. Sat. III.

*Respice nunc alia, ac diversa pericula noctis;
Quod spatium tectis sublimibus, unde cerebrum
Tessa ferit, quoties rimosa & curta fenestris
Vasa cadunt, quanto percussum pondere signent
Et lædant filicem. Possis ignavus haberi,
Et subiti casus improvidus, ad cœnam si
Intestatus eas: adeo tot fata, quot ista
Noctæ patent vigiles, te prætereunte, fenestræ.*

§. XVI.

Hæc licet adeo plana sint, ut nemo præjudiciis vacuus contra hircere possit; multi tamen, quia veram casus indolem non assecuti, tam vitia ex rebus venientia, ut zizania & herbas pestilentiores, quam opera providæ & solertis naturæ, ut imbres & pluviam moderatam, ad casus solitos & fortuitos retulerunt. Sebastianus Medices *tract. de fort. cas. p. I. qu. 12. n. 10* distinctionem inter casus fortuitos & improvisos commentus est, & hos definit, quando intervenit culpa aliqua, quæ casui occasionem dedit; verum jus civile hanc distinctionem ignorat; fortuitus est improvisus per l. 6. de pign. act. si vero culpa præcedit, tum casum non esse, docebit caput sequens. Idem qu. 13. n. 10. bimembrem tantum divisionem, in casus solitos & insolitos, cum Pragmaticis fere omnibus, male agnoscit, nec melius explicat, *insoliti, inquit, casus sunt, qui rarissime contingunt, ut fuit inundatio fluminis Arni in hac civitate Florentina de A. 1557. qua nec major, neque terribior fuit in illa unquam.* At vero quod *rarissime* contingit, non insolitum, sed insolitissimum esse, vel illi vident, qui nondum ære lavantur. Alii rursus, ne quidem casus divisionem in solitum & insolitum admittunt, causati, fortuitum nihil aliud esse, quam insolitum, quia captu humano prævideri non potest l. 18. pr. D. Comm. l. 1. §. 2. Locat. l. 1. §. 4. D. de O. & A. Nec Juris.

Jurisconsultos uspiam nec Imperatores casus ita distinxisse, erubescendum sine lege loqui. Nobis vero sufficit rationem juris hanc divisionem postulare, ut species dubiæ eo felicius dirimantur *l. 6. de V. S.* Qui positivum, comparativum & superlativum gradum ignorat, ad Orbilii ludum remittendus est. Deinde omnis quidem casus insolitus est & improvisus; respectu eorum, quæ per consuetudinem, aut statis anni vel dierum temporibus fiunt, ut quatuor anni tempestatum, Solis ortus & occasus & similia: at si casus inter se conferantur, alios aliis magis frequentes esse declaravimus supra, atque naufragii, incendii, terræ motus exemplis constat, quæ nonnullis in locis fieri solent & sæpius fiunt; non tamen minus fortuita sunt, ratione hominum, quibus id incertum fuit & improvisum. Jam olim Claudius Salmasius *e. XXIV. Obs. ad Jus Att. & Rom.* recte monuit, observatione naturali certum esse, nives moderatas, ventos modicos, aut tempestates solitas non nocere frugibus, immo potius sata ab his per hiemem conservari, & fecundissimum annum esse, quo diutius in terra durarunt nives, ideoque has & reliqua ejusmodi ad casus solitos referenda non esse: minus recte autem casus fortuitos omnes dicit insolitos; pejus omnem tempestatem ad casum insolitum refert; pessime quod contra consuetudinem tempestatis est, tempestatem esse negat; reprehensus eo nomine satis acerbè ab adversario suo perpetuo, Desiderio Heraldò *lib. I. animadvers. ad Jus Att. c. 15.* sed qui ipse tempestates ordinarias & secundum consuetudinem evenientes casibus adscribit minus accurate. Utriusque error manavit ex sinistra explicatione & intempestiva emendatione *l. 78. §. 3. D. de Contr. emt.* de qua nunc plenius dicendum erit.

CAPUT II.

DE

PRÆSTATIONE CASUUM
SOLITORUM, INSOLIT. &c.

§. I. *Quid sit præstare casum. II. Jure naturali, Divino, Romano & Germanico nemo casum præstat. III. neque in stricti juris judiciis, neque in rebus commodatis, contra Donellum, Grotium, Pufendorfium aliosque. IV. Vicia regulæ quatuor a culpa, mora, debito speciei & casus receptione. V. Quæ sit in Assesuratione, Bodmeria & Socida expresse. VI. Aliquando & tacite, aestimatione & suscepto periculo. VII. Obligatus ad casum, quem præstare debeat, variæ Dd. sententiæ. VIII. ex male intellecta l. 78. §. 3. de Contr. emt. exortæ; ea illustratur. IX. Qui casum recepit solutum & insolutum præstat. X. Non vero insolentissimum. XI. Quod applicatur ad remissionem mercedis ob sterilitatem, XII. & ad condonationem vectigalium. XIII. Cautela practica.*

§. I.

Verbum *præstare* varia significat apud Latinæ linguæ auctores: hic autem, phrasi Jurisconsultorum propria & figurata locutione, notat eventum alicujus rei in se recipere, & luere, implere, sarcire, si quid ex casu fortuito male eveniat alteri. Alii antiphrasin, alii πλοκην, hypallagen alii, alii syllepsin, rursus alii ellipsin subesse volunt, quod Grammaticis discutiendum relinquimus. Nos verba Pomponii ex l. 11. D. de Neg. gest. quia huc apprimè faciunt, adscribemus. Ait autem: *Si negotia absentis & ignorantis geras, & culpam & dolum præstare debes. Sed Proculus interdum etiam casum præstare debere, veluti si novum negotium, quod non sit solitus absens facere, tu nomine ejus geras.*

ras. Cicero non minus eximius Jurisconsultus, quam Oratorum Princeps, sæpe hac voce usus est: *casum præstare* dixit V. epist. 17. *culpam*, l. VI. epist. 1. *Simus ea mente, ut nihil in vita a nobis præstandum putemus, præter culpam.* Idem l. de Oratore: *Quicquid fuisset incommodi in mancipro, id si venditor scisset, neque declarasset, præstare debere.* Rurfus III. de Offi. *Quod enim scire debuit de sanitate, de fuga, de furtis præstat edicto Edilium.* Varro II. de R. R. c. 5. *Illosce juvencos sanos recte, deque pecore sano esse, noxisque præstare?* Quintilian. l. VII. Inst. orat. c. 4. *In tutelæ judicio solet quæri, an alia de re, quam de calculis cognosci oporteat: an fides præstari debeat tantum, non etiam consilium & eventus.* Hinc vox *præstationis* solennis est Jurisconsultis, quando quid cujusque contractus natura & status obligationis postulet, vel quæ ultro citroque contrahentibus debeantur, decidunt. l. 1. D. de Rer. perm. l. 5. D. de Usur. l. 152. §. 3. de R. 7. Quæ pars, quemadmodum ad officia humano generi debita pertinet, & late patet, & ex intentione contrahentium æstimanda est, difficilis semper visa fuit & subtilis, ut Scævola dixerit, *magni judicis esse de ea cognoscere, & Cicero magnum in his usum esse Jurisconsultorum.* Seneca III. de Benef. c. 7. *Melior videtur conditio causæ bonæ, si ad judicem, quam si ad arbitrum mittitur: quia illum formula includit, & certos, quos non excedat, terminos ponit; hujus libera & nullis adstricta vinculis religio, & detrabere aliquid potest, & adicere, & sententiam suam, non prout lex aut justitia suadet, sed prout humanitas & misericordia impulsit, regere.*

§. II.

Jam vero vel ex solo dictamine juris naturalis patet, neminem ad reparationem damni, quod alteri casu fortuito illatum est obligari. Ea enim nobis demum imputantur, quæ a scientibus & volentibus, mediate vel immediate sunt profecta: seu, quæ ut fierent, vel non fierent, penes nos fuit. Nulla autem ratio est, cur mihi imputen-

tur operationes naturæ & eventus, quorum ego non magis, quam ille qui damnum acceperit, auctor haberi possum. Supra diximus, casus omnes vel propter extrinsecam circa res contingentem vim, vel propter ignorantiam hominum invincibilem seu justam evenire, ideoque eos prævideri vel saltem præcaveri non posse: at quæ vires nostras excedunt, vel lumine intellectus non percipiuntur, nemini imputari debent. Casus est vis divina, vis fortunæ, quæ obstat hominum voluntati & consilia eorum eludit: absit autem fortunam convertamus in culpam, aut voluntatem ex necessitate interpretemur. Unde tritum illud: impossibile nulla est obligatio; nemo ad impossibilia se obligasse censetur: impossibilia pro non adjectis habenda. Fufius hoc exsequuntur Grotius *l. II. de J. B. & P. c. 16. §. 26. 27.* & Pufendorf *de J. N. & G. l. I. c. 5. §. 5. 6.* quibus addemus locum Ciceronis elegantissimum, lib. V. epist. 17. *Communem & incertum casum, neque vitare quisquam nostrum, neque præstare ullo pacto potest.* In Republica Mosaica idem sancivit Deus T. O. M. *Exod. XXII. 9. 10. 11.* & sexcentis locis inculcarunt Jurisconsulti, casus fortuitos, vim majorem, quod vi latronum ereptum, quæ senectute vel morbo contingunt & similia, in emtione, societate, mandato, deposito, pignore, tutela, ceterisque bonæ fidei judiciis, alienæ rei possessori imputanda non esse. *l. 32. D. de Neg. gest. l. 13. §. 1. de Pign. act. l. 26. §. 6. Mand. l. 15. §. 2. D. Locati. l. 1. §. 11. de Mag. conv. l. 6. de Dam. inf. l. 4. C. de Adm. & per. tut. l. 1. C. Depositi. l. 5. 6. 8. 9. C. de Pign. act. l. 12. & 28. C. de Locat.* Seneca IV. de Benef. c. 39. *Vadimonium promittimus; tamen deferitur. Non in omnes datur actio, deferentem vis major excusat.* Apud Germanos adeo certum est casum nemini imputari, ut in proverbium abierit: *Gottes Allmacht ist allezeit excipiet*; de quo Clariss. Hert. *de Paræm. lib. 3. n. 5.*

§. III.

Quod de casu fortuito non præstando diximus, non tantum

tum ad bonæ fidei contractus, uti Donellus rescripto Alexandri Imperatoris in *l. 6 C. de Pign. act.* deceptus existimabat, sed etiam ad negotia stricti juris pertinet. Eadem quippe horum est ratio, & Ulpianus generaliter loquitur in *l. 23. de R. J.* & textus sunt aperti in *l. 5 D. de R. G. l. 91 pr. §. 3. de V. O.* Jurisconsulti vero hisce pactum accessorium in continenti adjici requirunt *arg. l. 7. §. 5. D. de Pact.* quod mores hodierni, simplicitatem juris naturalis sequentes, non præcise observant, Huber. *de Pact. n. 11.* Stryck *C. G. f. 3 c. 6. §. 4.* Quid autem? si diligentiam exactissimam adhibuit commodatarius, & forte contingat res commodato acceptas latronum incurfu, piratarum insidiis, naufragio, incendio aliisque casibus, quibus resisti non potest, perire, an rerum æstimationem, aut aliam generis ejusdem restituere tenetur? Negant Jurisconsulti & Imperatores Romani, in *l. 5. §. 4 l. 18. pr. D. l. 1. C. Commod.* Ex lege Dei autem sic demum absolvitur, si dominus rei commodatæ adfuerit, cum corrumpebatur, quia tunc ipse suam diligentiam præsumitur adhibuisse, neque rem a custodia dimisisse *Exod. XXII 14. 15.* Grotius vero & Pufendorf distinguendum putarunt, utrum res omnino apud dominum fuisset peritura, si vel maxime commodato non foret data, an minus: priore casu cessare restitutionem, posteriore non item. Ille *l. II. de J. B. & P. c. 12. §. 13.* hic *l. V. de J. N. & G. c. 4. §. 6.* At rationes eorum, quamvis Schiltero *Ex. XXV. §. 16* & Thomasio in *Uf. bnd. D. tit. commod.* sint probatæ, haud sufficere pronuntiavit Titius, nec mihi persuadent: utique enim prægnans apparet ratio, cur commodans magis, quam commodatarius infortunium ferre debeat, quia ille dominus est; cui res sua perit *l. 12. C. de Locato.* Adhæc commodatarius præbuit quidem occasionem, ut res periculo exponeretur, aut commodans in idem consensit, cum sciret, aut certe ignorare non deberet, casus ejusmodi accidere posse. Et licet durum videatur, domino benignitatem suam tanti constare, du-

rius tamen foret, si commodatarius beneficium acceptum tanto pretio redimere cogeretur. Interim Carolus M & Lud. Pius in Capitularibus suis legislationem reipublicæ Hebræorum secuti sunt *l. V. c. 23*. Vetere quoque jure Germanorum, Visigothorum & Scotorum commodatarius casum præstare tenebatur, Schilt. *d. Ex* § 16. 17. Hodie autem ubivis prævalet juris civilis ratio, ut dominus casum ferat. Coler. *dec. VII. 15*. Carpz. *p. 2. c. 26. d. 6*.

§. IV.

Maneat ergo fixum, Casus fortuitos, ex contractuum bonæ fidei vel stricti juris natura, non præstari. Quatuor autem hujus regulæ sunt vitia, vulgata quidem, hic tamen minime omittenda. (1.) enim damna fatalia ei nocent, cuius culpa ad casum ordinata, & talis quidem præcessit, quæ pro subjecta materia præstari debet. §. 3. *I. qu. mod. re contr. obl. l. 1. §. 4. & l. ult. Commod.* Quævis enim mala alteri obvenientia isti imputari debent, qui eorum causam & occasionem cum posset & deberet non subtraxit: quia sic fit casus mixtus, & factum cuique suum, non adversario nocere debet *l. 155. de R. J.* Exempla sunt in *l. 22. D. de Neg. gest. l. 12. de Peric. & comm. l. 3. C. de Peric. tut.* Carpz. *p. 2. const. 26 d. 4. & l. 6. Resp. 107.* Brunn. *ad l. 9. C. de Pign. act. L. B. de Lyncker dec. 443. & 573.* (2.) Post moram periculum est morosæ, si res debito tempore restituta eodem modo non periisset apud creditorem, vel iusta causa moram non excuset *l. 47. §. ult. D. de Leg. 1. l. 14. §. 1. D. Depos.* ibique Brunnem. (3.) Debitor speciei interitu ejus liberatur *arg. §. 3, Inst. de Emt. vend. l. 23. D. de V. O.* (4.) Rei alienæ possessor si casum in se recepit, de iniquitate queri non potest, quia apud ipsum fuit, onus sibi aliquod imponere, quo nisi voluntate sua opprimi non poterat *l. 1. §. 23. D. Depos. l. 1. C. Comm. l. 5. C. de Pign. act. rei item suæ liberrimus fuit moderator & arbiter l. 21. C. Mand. & quicquid in contrahendo exceptum fuerit, id servari debere Paulus ait in *l. 43. D. de Pass.**

Pañ. cui præverat Julianus apud Ulpianum in l. 9. §. 2. *D. Locat.* scribens: *Si quis fundum locaverit, ut etiam, si quid vi majore accidisset, hoc ei præstaretur, pacto standum esse.*

§. V.

Ex pacto igitur inprimis quia contractus formantur legemque accipiunt, sæpius fit, ut periculum omne sustineat, qui contrahit; puta si nominatim id convenerit, vel tacite; determinate vel indeterminate; pure vel sub conditione. Inter conventiones expressas nihil in emporiis frequentius est *affecurationibus*, quæ hoc fine a mercatoribus contrahuntur, ut receptor sive averfor periculi, *der Affecuradeur*, rerum, quæ alterius sunt, terra marive transportandarum periculum incertum, pro certo suscipiat pretio (præmium vocant) quod ratione loci, temporis & periculi majus aut minus est, etiam ultra centesimam. Vid. Stypman *de jure marit. p. 4. c. 8. n. 348.* Formulas hujus contractus Latinas, Belgicas & Italicas Marquardus, Straccha & Schottelius dederunt, & illustrarunt tam copiose, ut soli facem accenderem, si eis diu immorarer. In jure civili equidem nulla hujus negotii vestigia reperiuntur, nec tamen id Romanis prorsus incognitum fuisse, ex Livii *lib. XXIII. c. 49. & l. XXV. c. 3.* ut & Suetonii *Claudio cap. 18.* Loccenius observavit. De justitia si quæras, favor commerciorum, & æstimatio periculi, fœnus nauticum, conventioni huic vicinum, tum emtio spei, ludi fortunæ, sponsiones & usus denique frequentissimus affecurationem satis defendunt. V. Grot. *l. 11. c. 12. §. 3. in fin. & introd. lib. 3. cap. 24.* Werlhof *de instrumento affecurationis, vulgo Polizza.* Stryck. *C. G. Sect. 3. c. 5. §. 27.* Maximam cum hac conventionem affinitatem habet *Bodmeria*, Germanis *Bodmery*, sive *Bodemeny*, quæ est mutuum navarcho vel domino navis ea lege datum, ut cum fœnore convento reddatur, & navis, quamdiu superest, pro ea obligata sit, ea vero perditâ, sors & fœnus creditori intereat. Dissert. ab affe-

assicuratione, quod in ea mercium alienarum, hic pecuniæ creditæ periculum, & ibi quidem sine hypotheca, hic cum ea suscipitur. Plerique bodmeriam cum nautico fœnere confuderunt; etiam, quod mirere, Batavi, Groenewegius ad l. 26. §. 1. *C. de Usur* & Huberus ad tit. de naut. fœn. cum tamen in illa præcise in usum navis credatur, & nummi navis Patrono dentur, & hypotheca in fundo navis *dem Schiffs-Boden* constituatur, quibus cancellis fœnus nauticum non continetur. Stryck. *Uf. mod. tit. de naut. fœn* §. 3. Utrique autem commune est, quod creditor contra naturam mutui periculum in se suscipit, Paul. *V. Sent.* 14. id quod male negabat Schilterus *Ex.* 35. §. 14. Majores hic rursus usuris consuetis permittuntur, partim ut *periculi pretium*, ait Scævola in l. 5. *D. de Naut. fœn.* partim quia navium exercitium ad summam reip. pertinet l. 1. §. 19. *D. de Ex. aff.* Cicero II. de Nat. Deor. *Navigio: um cursibus sup-
peditantur omnes undique ad vitam copie, plurimisque rebus ma-
ritimis fruimur atque utimur, propter nauticarum rerum scientiam.* Plura dabit Schottelius de *ing. & antiq. in Germ. jur. c.* 22. Huc item pertinet contractus *Socida*, quo colono oves, vaccæ & instrumenta rustica certo pretio æstimated, hoc pacto locantur, ut fructus fiant communes, & conductor periculum vaccarum in se recipiat; unde pecora ferrea, *Eisern Vieh.* Pacion. de locat. cond. c. 12. Carpz. p. 2. c. 37. d. 19. Richt. p. 2. dec. 81. n. 41. Quidam originem hujus negotii ex conventionione inter Jacobum & Labanem, etiam vocis natales ab Hebræis petunt; sed Cangi-
us in *glossario.* & Schilt. *Ex.* 31. §. 9 jam dudum docuerunt, vocis notionem ab Italicorum *societa* derivari debere: dicunt enim *dar le pecore in socida*, itemque *socida* & *soccio*, uterque sociorum. Professæ opera de *jure Socidæ* egit Tabor, ad quem, ne actum agam, B. Lectorem remitto.

§. VI.

Vidimus tres species, quibus expressè casus fortuiti recipiuntur.

cupiuntur, age, nunc totidem illustrem exempla, quibus tacite idem agunt contrahentes. Primum petemus ab æstimatione rei in conventionem deductæ: ea enim, sæpius dominium in accipientem transfert, nec tum ambigendum est, periculum transire. *l. 10. §. 4. D. de Jure dot.* Distinctione autem hic opus est, an æstimatio venditionis, an taxationis gratia adjecta fuerit: illud communiter ajunt Dd. factum cenferi in contractibus, quibus dominium transferretur, ut in dote, *l. 16. D. l. 10. l. 21. C. de Jure dot.* Hoc illis in negotiis, quibus translatio domini non intenditur: sic enim magis, ut re deteriorata vel corrupta facilius sit decisio, res æstimata videtur. *l. 50. D. Sol. matr. Burgund. de Peric. & culp. c. 12. Mev. ad §. L. l. 1. tit. 5. art. 8. Fab. G. lib. 4. tit. 41. def. 9. Carpz. p. 2. c. 37. d. 26.* Quod autem Constantinus Harmenopulus scribit: *Semper æstimatio augeat materiam contractus, etsi natura sua postulat summam curam, addit enim periculum in fortuitis casibus*, non leviter quidem juvari videtur per *l. 5. §. 3. D. Commod.* sed quia hæc satis commode de periculo expressio pacto suscepto explicari potest, & æstimatio plerumque taxationis gratia facta cenferi debet, nec in dubio a natura conventionis discessum præsumitur, odia item restringenda sunt, hinc Græculi doctrina mihi suspecta est, arg. *l. 8. D. Mand. l. 80. §. f. D. de Contr. emt.* nisi expresse accipiens alternative se obligaverit, ad rem incorruptam, vel rei pretium præstandum *l. 1. §. 1. de Æstimat.* Lauterb. *G. Th. Pr. de æstim. §. 17.* Schœpf. *Synopf. tit. commod. n. 61.* Altera quæstio esto, si quis periculum in se suscepit, an etiam de casu fortuito teneatur? Nimis generaliter Bartolus hanc negat ad *l. 4. Si quis caut. in jud.* Periculi enim vox, pariter ac custodiæ & diligentiae, ex substrata materia interpretationem capit, designatque detrimentum culpa vel casu fortuito contingens, cujus causa aliquis periclitatur & tenetur. Textus apertus in *l. 5. §. 7. D. Commod.: Dico periculum, quod culpa contingit.* Hinc phrasæ periculum cul-

T t

pæ,

pæ, custodiæ subire, periculo contumaciæ vel negligentiae subijci in *l. 39. §. 12. l. 40. D. de Adm. tut. l. 49. D. Locat. l. 1. 3. C. de Per. tut.* Artifex vero, qui pacto periculum in se suscepit, de casu fortuito tenetur *l. 13. §. 5. D. Locat. juncta l. 25. §. 7. eod.* Idem est, si omne periculum rei susceptum, maxime ex formula Germanica, *Ich stehe vor alle gefahr*, arg. *l. 7. l. 8. D. Comm. l. 35. §. 7. D. de Contr. emt.* Bach. ad Treutl. V. 1. d. 20. th. 14. lit. D. Vinn. §. 2. *l. qu. mod. re contr. n. 4.* Tertia species sit, quod dominus territorii, accipiendo vectigal pro securitate, tacite promittat, se damnum a latronibus datum refarcire velle, *R. I. de anno 1559. arg. l. 3. l. 13. pr. de Off. Præs. l. 1. §. 12. de Off. Præs. urb. modo viatores via regia fuerint usi*, Gail. *l. II. O. 64. n. 11.* & Imperans in inquirendo, puniendo atque restituendo negligentiae argui queat Carpz. *qu. crim. 91. n. 70.* Rationes ex pristino statu Germaniæ adduxit Schilt *Ex. 42. §. 53.* Quod si vero potens territorii dominus ultro damnum præstare nolit, læsus de eo non valde gaudebit. Quis enim litigare vellet cum Principe, quem majestas & ferrum tuetur? Euclio Plautinus *Aulul. act. 3. sc. 4.*

*Dii immortales! Facinus audax incipit,
Qui cum opulento pauper homine cæpit habere negotium
Aut rem.*

§. VII.

Proximus nunc locus est, ut sive expressè sive tacite casus susceptus sit, quis præstandus sit, videamus. Variarunt in hac quæstione Glossatores antiqui, & Doctores hodierni, adeo ut Salicetus *ad l. 1. C. Commod. n. 10.* sex diversis sententiis prolatis subjecerit: *His opinionibus sic recitatis tremisco eligere: sed quia propter mandatum mihi a matre nostra factum, de qua in exordio, cogor eligere.* Quidam eum, qui recepit casus fortuitos, non nisi de communiter contingentibus teneri voluerunt; quia non præsumitur esse promissum, de quo non esse cogitatum verisimile videtur. Adeo
ut

ut licet jurejurando pactum de casu fortuito simpliciter initum sit, paciscentem tamen de insolito non teneri autument; tum quod jusjurandum non auget obligationem *l. 5. C. de Leg.* tum quod illud ad non cogitata non extenditur *c. veniens X. de Jurej.* Alii contra, recipientem non ad solitos, sed ad insolitos tantum præstandos obligari existimarunt; quia magis fortuita sunt, quæ præter expectationem nostram accidunt. Alii denique casu generaliter suscepto ad omnes obstringunt; quia genus tantundem, quantum enumeratio specierum operari debet. Priori sententiæ favet Bartolus, Medices, Mantica, etiam Bockelmannus, eamque communem dicit Gailius *l. 2. Obs. 23. n. 18.* & Klock. *t. 2. conf. 72. n. 76.* Alteram Baldus, Gratianus, Jason, & alii amplexi apud Pinellum *ad l. 2. C. de resc. vend. p. 1. c. 3.* & Brunnemannum *ad l. 78 §. 3. de Contr. emt.* Tertia Martini fuit & Accursii opinio, quibus calculum adjecit Salicetus *d. 1.* Struvius autem omni periculo suscepto, quoslibet casus, non attenta distinctione interpretum, præstandos esse inculcat *S. I. C. Ex. XX. §. 44.* Verum Jasonem & Bartolum sibi non constare, dudum observarunt alii, & mihi plerorumque disputatio in meram logomachiam abire videtur. Adeo ut incertas ceterorum distinctiones si quis postulet certas facere ratione, nihilo plus agat, quam si det operam, ut cum ratione insaniat.

§. VIII.

Origo tot errorum & dissensionum ex male intellecta *l. 78 §. 3. D. de Contr. emt.* petenda est: Verba Labeonis: *Frumenta, quæ in herbis erant, cum vendidisses: dixisti, te si quid vi, aut tempestate factum esset præstaturum. Ea frumenta nives corruerunt, si immoderate fuerunt, & contra consuetudinem tempestatum, agi tecum ex emto poterit.* Bartolus ejusque affectæ caput hoc directe contra sententiam ac verba Labeonis interpretati sunt, & magno conatu magnas nugas egerunt; adeo ut hic locus vel unicus supinam patrum commentandi rationem arguat palam, eosque non tam juris ex-

plicatione, quam Accursii implicatione occupatos fuisse ostendat. Criticorum quoque principes hic textus non parum exercuit: Desiderius quippe Heraldus *c. 30. Obs. pro si immoderate* legendum contendebat *eissi*; quem confutans Salmasius *c. 24. Obs. ad jus Att.* unius literulae mutatione pro *tempestatis* emendat *tempestatEs*. Hunc more suo laudavit Vinnius *2. Sel. quest. c. 1.* reprehendit Heraldus *animadv. in Salmas. obs. lib. 1. c. 15.* Ego item licet sciam librarium Florentinum saepe E & I permutare, hic tamen nihil mutandum puto; quod si enim voce *tempestatis* non imbres, nimbos, procellas, turbines, sed tempus ipsum intelligas, res plana est; ita Plautus, Cicero, Livius, Sallustius, ejusque imitator Tacitus plus semel. Quod si autem, Labconem in praecedentibus, *si quid vi aut tempestate factum esset*, de tempestate horrida & adversa locutum, quis urgeat, hunc scire velim, unam eandemque vocem, eodem verborum ambitu variam saepe significationem praebere. Vide Wiffenbachium *ad l. 23. de R. 7. §. 46.* Et sane Labeonis genius a Gellio descriptus *l. XIII. Noct. Att. c. 10* & intentio ejus hoc suadent; nec enim de variis tempestatibus, sed de solis nivibus *questio* erat: haec vero si immoderate fuerint, & contra temporis consuetudinem favientes, tum demum pronunciat ex emto agi posse, adversus venditorem. Is nisi promississet, si quid vi aut tempestate factum esset, se praestaturum, nullo modo teneri poterat; quia perfecta emtione periculum est emtoris, proin ea tantum, quae receperat, quaeque vi & tempestate contigerant, praestat, non quae secundum consuetudinem facta: haec aequo animo ferre debebat emtor, quia ad casus fortuitos non sunt referenda. Nimirum ex rei rusticae auctoribus didicerat Labeo, & ab ipsis agricolis acceperat procul dubio saepius, quando sex mensibus quotannis secedebat, & ex urbe, tanquam ex vinculis, rus evolabat, mediis aquilonibus nives adversus vim frigoris magis prodesse frumentis, quam ea vitare: hinc tempora distinxit, & nives

ves immoderatas hibernas, modicas vero vernaes aut autumnales, ad casus fortuitos pertinere respondit. Videatur Columella *lib. II. de R. R. c. 8.* & Prudentius *l. 2. Adv. Symm.*

*Post Zephyros gelidi glacies Aquilonis inurit,
Ambustumque caput culmi fuligine tingit:
Seminis aut teneri turgens dum germinat herba,
Continuis nimisque perit constricta pruinis,
Nec potis est tenuem telluri affigere fibram.*

Minime autem Anton. Rub. in *l. vinum n. 80. Si cert. pet.* contra rationem & fidem omnium exemplarium, in fine legis particulam *non* inserere, nec Antonius Faber cum Accursio ex ea regulam formare debebat, cum, qui se obligat ad casus insolitos, non ideo teneri ad solitos; & contra, qui se obligat ad solitos, de insolitis non teneri: id enim non egit Antistius, ut casus solitos ab insolitis distingueret, sed casum fortuitum ab eo damno separavit, quod frumenta secundum consuetudinem a tempestate moderata accipere solent. Damnum ex nivibus immoderatis contingens venditorem suscepisse præsumi debebat, non ex modicis & consuetis, quia in obscuris quod verisimilius est, aut quod plerumque fieri solet, inspicere debet *l. 114. D. de R. J. Erudite*, ut solet, Excellentissimus D. Noodt *lib. III. probab. c. XI.* quem evolvisse non poenitebit.

§. IX.

Quemadmodum ergo subductis columnis tecta ruunt, sic in fumum abit, quicquid regularum ex prave explicata lege 78. plerique recentiorum, pariter ac veterum, sibi finxerunt. Nobis omnino fixum sedet, eum qui casum in se recepit, & solitum & insolitum præstare teneri. Illum, quia de solitis inprimis cogitant partes; hunc, quoniam quod rarius contingit magis appellatione casus fortuiti continetur, adeoque generalitati vocis tamdiu insistentum, donec contraria probetur exceptio, *l. 8. D. de Publ. in rem act. l. §. 1. 1. de Leg. præst.* Maxime, quia ab insolito mi-

nus periculi est, atque ideo regulæ bonæ interpretationis non patiuntur, ut pro recipiente pronunciemus, cum is in rarius contingentes omnino consensisse videatur, sibi que imputare debeat, quod legem pactioni apertiore non dixerit *l. 28. D. de Pact.* Natura igitur pactionis hoc suadet, & jurisprudentia *l. 7. §. 6. de Pactis l. 39. D. Mandati l. 9. §. 2. D. Locati.* & consensus meliorum quorumvis Doctorum. Ita Vinnius *l. 2. Sel. quæst. c. 1.* & Clarissimus Collega noster Dn. van Eck *ad tit. Commod. §. 34.* Præjudicia dabit Carpzov. *p. 2. c. 26. def. 8. & p. 2. c. 37. d. 17. Faber. C. l. 4. tit. 41. d. 2. Græve l. 2. concl. 23. conf. 4. Mev. p. 2. d. 90. Zigler de casu fort. §. 10.* Qui in diversa cunt, nituntur inprimis *l. 4. §. 4 Si quis caut. jud. fift.* ubi Ulpianus negat valere, renunciationem exceptionum, quæ contra vadimonium desertum excusent, nisi specialiter fuerint casus fortuiti expressi. Quotquot in hanc legem inciderunt Pragmatici, id quod quærebant, se invenisse putarunt: at pro thesiuro carbones! Aliam pactorum conventorum, aliam stipulationis Prætoris esse indolem, hi considerare debuissent: deinde renunciationes esse stricti juris, nec ad ea extendi, quæ non sunt in contrahentium potestate, neque brevi verborum compendio expressa & cogitata videntur. Minorem speciem habet, quod ex Papi-niani *l. 10. §. 1. D. de Ann. leg.* obmovetur: certior enim crogationum annuarum, quam casuum fortuitorum forma est, hi enim, inde quod incerti sunt, nomen acceperunt. Ceteris, quæ ex *l. 12. D. de Pign. act. & l. 13. §. 1. D. de Usur.* petuntur, non immorabor, Vinnius *d. c. 1.* videatur, & Struv. *Ex. XXVI. §. 17.*

§. X.

Alia insolentissimorum est ratio, qui per hominis memoriam vix centesimo aut millesimo anno semel contingunt. Hos enim, qui casum generaliter recepit, non præstat; cum vix probabile sit, virum prudentem de iis cogitasse, propter raritatem *arg. l. 6. D. de Pign. l. 15. §. 26. D. de Ju-
rej.*

rej. Conventiones autem, quantumvis generales, nunquam trahuntur ad incogitata, sed ad ea, quæ jam apparent, referri, non vero ultra intentionem contrahentium operari debent *arg. l. 5. D. de Transact. l. 35. D. de Pact. l. 77. D. de Contr. emt. l. 34. de R. 7.* Atque ita in praxi observari Carpzovius auctor est *p. 2. c. 26. d. 8. Brunn. ad l. 78. D. de contr. emt. n. 4. & 9. Gail. l. 2. O. 23. n. 18. Zanger. de Except. p. 3. c. 23. n. 10.* & quos alios, ad elegantem facti speciem, laudat Crespus de Valdaura *tom. 2. observat. 94. n. 21. seqq.* Fac ergo, conductorem prædiorum rusticorum, qui excursus fluminum marisque, & sterilitatem ex aeris inclementia metuendam, similiaque aliquoties expertus est, periculum casusque fortuitos in se recepisse, de edaci autem locustarum perniciæ in omni vita nec audivisse neque cogitasse, an dicemus pactum esse, de quo non cogitavit, nec cogitare potuit? Certe non patitur natura pacti, paciscentem ultra id teneri, quod promissit *arg. l. 2. §. 1. D. de Her. vend. l. 26. de Acq. poss.* Hinc Diocletianus & Maximianus, in *l. 18. C. de Locato*, Anno rescribunt, tempus, quo edaci locustarum perniciæ sterilitatis vitium intercessit, excipiendum esse. Et neminem sui ordinis dubitare, quin locustarum examina, ad casus rarissimos exceptos pertineant, confirmat Mornacius *ad l. 15. D. Locati.* Valasc. *de Jur. emphyt. q. 27. n. 25. Amaya lib. III. Obs. c. 3. n. 8. Hopp. disp. de edaci locust. pernic.* In omnibus tamen contractibus inspiciendum est, quid actum sit; adeoque si verba omnino enixam voluntatem demonstrantia adhibita, vel omnes casus sive soliti, sive insoliti, sive insolentissimi recepti, aut principalibus enumeratis generalis clausula subjecta sit, nil causæ est, cur ejusmodi pactum invalidum dicamus; quia de promittentis intentione constat, isque damnum præter expectationem emergens suæ facilitati imputare debet, alter vero, in cujus utilitatem clausula tendit, citra hanc conditionem se contrahere noluisse obtendet. Ita Fab. *G. l. 4. tit. 41. d. 53. Burgund. de peric. & culp.*

c. 8. n. 10. Struv. *Ex. XIX. §. 44. Et dec. Sabb. c. 16. §. 14. Rittershus. ad l. 23. de R. J. c. 18. p. 236. & recte!* Nam qui omne dicit, nihil excludit, sed omnia & singula, quæ apta sunt, comprehendit *l. 68. pr. D. de leg. 3 l. 13. C. Mand. Cravetta conf. 294. Strauch. lex. part. voc. omnia.*

§. XI.

Dux istæ regulæ ad omnia negotia, in quibus expressè vel tacite casus recipitur, applicari possunt; sed ne limites dissertationis egrediamur, contenti erimus ad sterilitatem & frumentorum pericula hæc retulisse, de quibus & utrumque caput, quod explicamus, conceptum est. Noti juris est, conductori prædiorum mercedem totam vel pro parte remitti, si ager incurfu hostium vel latronum occupatus est, aut propter pestem bellumve superveniens coli non potuit. *l. 9. §. 1. l. 33. Et 34. D. Locat. l. 18. D. Commod. l. 12. §. 2. de Reb. aut. jud. poss.* idque rationem habet naturalem, quia merces determinata fuit secundum usum, quem per id tempus locator non præstitit, ut debebat: nam *oportere agrum præstari conductori, ut frui possit*, inquit Ulpianus *l. 15. §. 2. fin. D. Locati.* Et Cicero de provinc. Consul. *Qui publico frui non potuit, hic tegitur ipsa lege Censoria.* Idem vero obtinet, si in fructibus nondum perceptis absque culpa conductoris extrinsecus, ut lue tempestatis, nimio fervore, vel alio cœli vitio, calamitas contigerit insolita & plus quam tolerabilis, tum enim, ex benignitate juris Romani, locator arbitrio judicis mercedem pro parte vel in totum remittere jubetur. *l. 15. §. 2. l. 25. §. 6. D. l. 8. C. Locat.* Quod si jus strictum sequamur, sterilitas damno conductoris est, cui facultas utendi præstita; & sicut exuberans proventus ipsius commodis servit, ita casum malignum eodem animo accipere debet, præsertim cum unius anni sterilitas alterius ubertate soleat pensari. Ita Grotius *l. 2. c. 12. §. 18. & Pufendorf l. V. c. 6. §. 3.* Accedit quod Deus T. O. M. fructibus intuitu personarum benedicit, aut

aut eos grandine verberat in pœnam, quemque autem suum peccatum ferre æquum est, Gen. XXX. 27. Exod. XXXII. 33. Quomodo sterilitatem, aut nimios imbres, & cetera naturæ mala, ita luxuriam dominantium tolerandam, inquit Tacitus IV. Hist. 74. Recte tamen Jurisconsulti & Imperatores temperamentum adhibuerunt in hoc bonæ fidei contractu, ne colonus, ultra damnum seminis amissi, mercedem præstare cogatur, ait Ulpianus noster in l. 15. §. 2. D. Locati. Aliam rationem a magnitudine damni petit Cajus in l. 25. §. 6. eod. Vis major non debet conductori damnoſa eſſe, ſi plus, quam tolerabile eſt, læſi fuerint fructus: alioquin modicum damnum æquo animo ferre debet colonus, cui immodicum lucrum non aufertur. Ad bonam fidem & æqualitatem, in contractibus onerosis observandam, provocat Imp. Alexander in l. 8. C. de Loc. Higinio reſcribens: Si quæ evenerunt ſterilitates ubertate aliorum annorum reſenſatæ non probabuntur, rationem tui juxta bonam fidem haberi, recte poſtulas. Pictati adſcribit Caſſiodorus, ut agrorum fructibus enudati ſubleventur onere tributariæ functionis, & in quantum poſſeſſoris laboravit utilitas, ſublevetur. lib. IV. Var. Epist. 50 & rursus lib. X. ep. 27. Cultor agri ad futuram famem deſeritur, niſi ei, cum neceſſe fuerit, ſubveniat, & nimis impium eſt, pleniffimis cellis vacuos eſurire cultores. Ex quibus conſtat, ſat validis momentis ſubnixum eſſe juris noſtri temperamentum, quo locator caſus fortuitos cum conductore partiſi tenetur, ut ille penſionis, hic ſeminis & laboris jacturam ferat. Rationem diſparitatis, cur immodicum lucrum colono relinquitur, ſi altero tanto plus fructuum, quam ſolebat, percepit, ex diverſa ubertatis & ſterilitatis, diverſa locatoris & coloni cauſa, dedit Cujacius lib. XXVI Obſ. 36. Quid autem, ſi conductor remiſſioni renunciaverit, & ſolus quod vi majore fructibus extantibus accidiſſet, ſuſceperit? Pacto ſtandum eſſe, Julianus ait, ſive ſolitus ſive inſolitus caſus ſecutus ſit l. 9. §. 2. D. Locati. rariffimus autem, de quo non

cogitavit, damno non erit colono, sed mercedis remissionem conciliabit. Carpzov. p. 2. c. 26. d. 8. n. 7.

§. XII.

Quod de remittenda vel non remittenda mercede colono, ob sterilitatem, dixerat Ulpianus in §. 2. d. l. 15. illud mox in §. 4. Papiniani verbis, ad vectigalium conductionem pertinere monet; ut si forte publicani animose vectigalia conduxerunt, & inopinata mala inceserunt, per quæ solvere non possint, non nihil pecuniæ ipsis remittatur; nisi aliud nominatim pactis, locationi vectigalium adjectis, cautum fuerit. *Hoc idem & in vectigalis damno respondit.* Perperam Gothofredus pater, quique cum sequuntur, de agro vectigali, seu emphyteuticario hæc acceperunt; quum ne ^{per} quidem de agro; nec ob sterilitatem quicquam damni obveniat fundo, sed fructibus; & emphyteuta denique solus omne damnum ferat. Igitur respublica, quæ vectigalia locat, conductoribus præstare debet, ut frui possint; sique ob bellum, seditionem, aut morbum epidemicum, nihil ad ipsos vectigalium redierit, æquum est, ut summa minuat. Idem erit, si hostium copiæ non longe absuerunt, licet irruptio facta nulla sit: Sufficit enim pecora relicta metu instantis periculi, & agriculturam desertam esse. auctore Ciccone *pro Lege Manilia*. Multo magis id obtinebit, si mercium importatio aut exportatio, vel tota navigatio interdicta sit. Atque ita Senatum Romanum, si quæ calamitas intervenisset, publicanos mercedum parte levasse, Polybius scribit *lib. VI. Hist. c. 15.* Et Cicero publicanos colonis pares facit, *lib. III. de Off. c. 22.* *Ego, inquit, cum Catone meo sepe dissenſi: nimis mihi præſtante videbatur ærarium, vectigaliaque defendere; omnia publicanis negare, multa sociis; cum in hos beneficii esse deberemus, cum illis sic agere, ut cum colonis nostris solemus.* Verissime & hic, & ad Atticum *lib. 1. ep. 17.* 18 queritur Cicero de rigore Catonis, quo Cæsari & Pompejo fenestra aperta est, rempublicam

oc-

occupandi. Et Cæsar, secundum Ciceronis benigniorem sententiam, tertia mercedum parte publicanos liberavit, ut Suetonius c. 10. testatur. Moribus hodiernis, eandem æquitatis regulam respublicas, civitates & iudices sequi debere, multis auctoritatibus & constitutionibus probari posset. Vide Responsa J. C. Holl. p. 3. vol. 2. conf. 105. 106. Abraham a Wesel *de remiss. merc. c. 7. n. 14.* Voet *ad tit. D. de publican. c. 7.* & unum, instar omnium, Antonium Matthæum *de auction. l. 2. c. 5. & c. 11.*

§. XIII.

Colophonis loco cautelam practicam adjiciamus, qua in tanto opinionum conflictu contrahentes magnam perplexarum litium segetem amputare queant. Sine hac enim metus est, ne partibus nostris recte functi videamur, quia is demum M. Antonio, vel potius Tullio iudice l. 1. d. Orat. vere juris Studiosus nominatur, qui legum & consuetudinis ejus, qua privati in civitate utuntur, & ad respondendum, & ad agendum, & ad cavendum peritus esse cupit. Consultum autem est, ut qui ad quosdam tantum casus se obligare vult, illos nominatim exprimat, sic enim de non expressis haud tenetur: vel si ad casus insolitos tantum, non autem ad solitos se adstringi velit, hos specialiter exprimat. V. gr. piratarum incursum, naufragium, incendium, mortes animalium &c. In contractibus enim semper contrarium, qui legem contractus potuit dicere apertius, interpretatio facienda est l. 172. de R. J. Atque ita in affectionibus mercatorum, in securitatis apocha, seu Pollice, fieri solere, ex formulis & quæstionibus patet apud Scacciam *de commerc. §. 1. qu. 1. n. 141.* Stypman. *de jure marit. p. 4. c. 8. n. 335.* & Santern. *de Affecurat. p. 3. n. 61.* Contra qui alium ad præstandos casus fortuitos obligare intendit, caute facit, ut enumeratis casibus omnibus, qui forte prævideri aut metui possunt, generali clausula reliquos omnes solitos, insolitos & insolentissimos complectatur. Mar-

guard. de Jure mercat. l. 2. c. 13. n. 67. Stryck. caut. contr.
S. 2. c. 9. §. 26. Nulla heic cautio nimia est, nam se-
cundum Plauti illud :

*Qui cavet ne decipiatur, vix cavet, etiam cum cavet.
Etiam cum cavisse ratus, saepe is cautor captus est.*

T A N T U M !



DIS-



DISSERTATIO SEPTIMA,

DE

UNCTIONE REMENSI.

DUm excita sedibus suis Gallia, in Regis unctionem, velut publicæ felicitatis spectaculum, oculos intendit, & per cunctas late provincias, demisso obsequio, vota facere paravit, mihi in umbroso museo, natum est consilium, pauca concinnare, ex quibus solennis illius cærimoniæ origo, fata & effectus, si non omnes, saltem quidam haud pœnitendi illustrarentur. Sic enim censebam, neminem fere esse supra vulgus, cujus animo curiosi Persici apparatus, cum cœlesti Ampulla, ceterisque regni Cimmeliis, hoc tempore non obversentur: quorum adspectus, florem Europææ juventutis, illicis in modum, sollicitavit. Bonifacius præterea, Trajectensis Archi-Episcopus, aurcm mihi vellebat, qui ante hos annos circiter mille, primum Francorum Regem Pippinum, oleo consecravit. Quid? quod prima hæc ab unctione dies, exercitiis Academicis sacra, prætermittenda non videbatur, quin specimen hoc qualecunque in pulpita protruderem; ut, quod minus erat apparatus, temporis opportunitate commendaretur. Qui Remos profecti, pars maxima, pompa externa satientur; artifices de gemmarum pretio ibi in consilium eant; nos arcana dominationis & piæ fraudes exercebunt, quæ sub involucri consecrationis teguntur. Quid Marlotus in libro

V v 3

de

de sacra Regum Francorum unctione singulari præstiterit juxta cum ignarissimis scio, quia libri ejus copia non fuit: nullus autem dubito, quin formularum præco sit, & eadem religione, qua ceteri, vasculum Remense complectatur. Nec forsan genuinam is ausus est tradere causam, cur Franci libertatis olim amantissimi, & nomen ab ea ferentes, nunc Regum suorum Numini & Majestati devoti, non eis modo enixissime pareant, sed & ipsos, ceu mortalibus angustiores, venerentur, ut Jovius scribit lib. xv. Hist. Duobus capitibus quicquid hujus argumenti est absolvemus. Primo originem, fata & effectus unctionis generaliter expendemus: alterum, quæ ad unctionem Remensem pertinent, complectetur. Omnia quæ hac occasione dici possent, congerere nec volui, nec potui: prodiret enim nobis ingens

*Telephus, & summi plena jam margine libri
Scriptus, & in tergo, necdum finitus Orestes.*

CAPUT PRIMUM.

DE

UNCTIONIS REGIÆ ORIGINE, FATIS ET EFFECTU.

§. I. Inaugurationes Regum haud necessariae, quare fiant; cur symbola, corona & insignia adhibeantur? II. Regum unctio antiquior est Saulo; ejus ultima origo a Jacobo Patriarcha: lapides & victimæ unctæ. Genes. xxxiii. 18. & Judic. ix. 8. illustrantur. III. Reges Judeorum quam ob causam unguento sacrati. Quantum auctoritatis eis sacra carimonia conciliaris; diversa a Sacerdotum unctione, IV. Persarum Regum inauguratio similis Ebraicæ. Romani mortuos Imperatores unguento consecraverunt, vivos non item. V. Primis sex a Christo nato seculis, nullus Regum in Occidente unctus; plerique more Germanorum, scuto militum levati. VI. Impe-

peratoribus Gracis, præter coronationem, eadem solennitas. Palma prima unctionis in Regem Christianum, Vesi Gothis Hispaniæ regibus offeritur. VII. Unctio Pipino, Pontifex Romanus Angliæ aliorumque Regum unctiones, per Archi-Episcopos promovit. Cur Henricus Auceps eam recusavit? VIII. c. un. x. de S. Unctione explicatur. Olei & unctionum in jure Canonico species diversæ: Regum caput hodie pariter ungitur, ac sub Vetere Testamento. IX. Effectus unctionis, alii Ecclesiastici, quod Reges consecrati communicant sub utraque; Canonici fiunt. &c. X. Alii effectus civiles, quorum veri, a simulatis distinguuntur. De Regum iurajurando ante unctionem quædam.

§. I.

Quibus lex aut electio sceptrum porrigit, ut solenni ritu in possessionem mittantur, nihil necesse est. Unica imperii constituendi causa consensus est, quo cives rectori suo obsequium promittunt. Quicquid huic adjicitur, de cori & prudentiæ civilis rationem habet, ad juris vero argumentum non valde pertinet: nisi Rex competitorem habeat, & lege regni constitutum fuerit, ut ne, ante iurandum sollemniter præstitum, regios actus exercere possit; id quod de Polonis Piascius memoravit. Prorsus ac matrimonium mutuo consensu perficitur; deductio autem in domum, & ritus sacri, ad parerga pertinuerunt: sic coronatio non est causa regni, sed symbolum ejus translati. Neque ideo quisquam Rex est, quod coronatur; sed coronatur, quia Rex est. Et tamen omnium gentium, etiam barbararum, ab omni ævo, consuetudo fuit, Reges & Principes suos eximio aliquo ornamento honestare; tum ut augusta imperii majestas Regi novo ob oculos poneretur; tum etiam, ut populo reverentia & obsequium injiceretur. Eam sane ingenii humani indolem quotidie experimur, ut si res incorporales pollicemur, vel exhibemus, id commodius fieri putemus corporalibus signis: quia per aures demissa segnius animum irritant, quam quæ fidelibus oculis subjiciuntur. Sapientes igitur ad res qualvis majoris momenti,

menti, non perfunctorie, aut per simplex instrumentum, sed cum apparatu solennitatis, procedendum esse rati sunt; in nuptiis confarreatio, in testamentis æs & libra, in fœderibus dextra, in traditionibus varia symbola adhibebantur, & talia maxime, quæ cum re tradita affinitatem aliquam haberent. Plane decora & insignia, quibus imperii dignitas eminet, cum ipsis statim regibus enata esse videntur; simplicia primum, ut hasta, gladius, &serta ex herbis aut floribus contexta: quibus deinceps, crescente luxu & ambitione, unguenta, sceptræ, coronæ, diademata, mitræ, tiaræ, solia, aliæque multæ mysteriorum secretissimorum imagines accesserunt. Dionysius Halicarnassensis *συμβολα της ηγεμονιας*: Appianus *συμβολα της αρχης*: Herodianus *συμβολα της βασιλειας*: Dio Coccejanus *κοσμηματα της ηγεμονιας*: Dio Chrysostomus *βασιλειας σημεια* appellavit. Virgilius VIII. *Æneid.* 505.

*Ipse oratores ad me, regniq̃ue coronam,
Cum sceptro misit, mandatq̃ue insignia Tarchon.*

II.

Inter varias autem Regum inaugurandorum solennitates, præcipua & antiquissima est Unctio; cujus vestigia, jam ante Saulis ævum, in vetustissimo apologo occurrunt, Judicum IX. v. 8. *Iverant arbores, ut sibi inungerent Regem, & dixerant oleæ, noster Rex esto. Eis vero olea, an, inquit, paterer deficere meam pinguedinem, quam in me Deus & homines magni faciunt.* Quibus in verbis Jothamus testatur, suo tempore, Reges Orientis, Ebræorum vicinos unctos esse, & rationem addit, quod magnus, in rebus sacris, Deoque sacrandis, olei fuerit usus. Quin apud Ægyptios, Persas, Græcos atque Romanos, in suffitu & victimis oleum sit adhibitum, antiquitatis monumenta nos dubitare non sinunt. Forte, quos thure placabant, Deos ejus odore delectari crediderunt homines, superstitioni immeriti. Certe animalia, quæ Diis consecrata, quæve in admiratione erant, unguento delibuta fuisse, Calaubonus ad Suetonii

iii librum primum cap. 80. aliquot exemplis probavit; pluribus alii, qui de sacrificiis scripserunt. Ipsi lapides, *unguento delibuti* religiosam moram viatoribus objiciebant, auctore Apulejo *lib. 1. Florid.* Clemens Alexandrinus *λεπταὶ λίθοι*; pingues lapides vocat, Stromat. 7. Arnobius *lubricatum lapidem*; & *ex olivæ unguine delibutum*, lib: 1. adv. gent. Sículus Flaccus lapides terminales *unguento, velaminibusque & coronis ornatos fuisse*, scribit de condit agror. p. 5. Qui universam gentilium Theologiam ab Ebræis petitam contendit, Vir Cl. Petrus Daniel Huetius, morem hunc idololatricum, a lapide, uncto in Bethel, dimanasse censet: Jacobus enim Patriarcha in itinere lapides, quibus innixus scalam in somnis viderat, *erexit in statuam, & effudit oleum in summitatem ejus*, Genesi XXVIII. & 18. Et sane Judæos pariter, ac Chananæos, ceterosque gentiles superstitioniosiores, lapidem hunc deduxisse in speciem cultus divini, eique similes alios, successu temporis, fecisse ex 1 Reg. XIV. 23. conjicere licet, atque illustris Scaliger, ex traditione Rabbiorum, ante Huetium, in animadversionibus ad Eusebium firmavit pag. 216. Apud Ægyptios olei usum maximum, in victimis fuisse, quæ Isidi mactabantur, sed majorem in festo celeberrimo, quod Herodotus *λυγροκαίη* vocat, Vir Cl. Joannes Clericus docuit ad Jud. IX.

§. III.

Num Ægypti Reges, tempora oleo delibuta, vitta, fascia & diademate velarint primi, an vero alibi gentium ritus unctionis primum natus fuerit, in tanto veterum silentio, vix dici potest. Hoc scimus, legem datam esse Israelitis, ut Tabernaculum, Arcam, utrumque Altare, Candelabrum, Vasa Sacra, Pontificem, & Sacerdotes, unctione solenni consecrarent, & ab usu communi separarent, quo populus sensu majestatis divinæ fortiore tangeretur, Exodi XXX. 23. juncto Levit. VIII. 10 & Numer. VII 1. Oleum hunc in finem, Mosis jussu, a Bezaleele confectum, sanctorum sanctissimum fuit; quicquid illo tangebatur, non mo-

X x

do adversus injurias munitum, sed & sacrum erat; cunctosque reverentiæ Deo debita admonerat. Cum igitur Ebraei, *κατοχιδιν* studio abrepti, vicinorum exemplo, Reges sibi splendidos dari postularent a Samuele, hic sanctos quoque & inviolabiles constituit: ne illi servitutis periculi, & mutabiles semper, hostili animo Rectores olim persequerentur. De unctiōe Regum Israelis res vulgata est, librisque integris ab Huberto Moro de *sacris unctiōibus*, Balthasare Scheidio de *oleo unctiōis*, & Fortunato Scaccho in *myrothecio* excussa. Ego illud inprimis hic observandum puto, oleum Regis, si non aliud, ut quidam volunt, ritum certe diversum fuisse ab eo, quo Sacerdotes consecrabantur. Illius vertici unguentum illitum in orbem, ut coronam referret; his figura literæ x. vel crucis, ut vocant, Andreanæ inter supercilia, imprimebatur. Rex ergo, sacerdotum exemplo unctus, inspectionem habebat in sacra, & *εφημερις* Sacerdotum; ipse Sacerdos non erat: jure loquendi in sanctuario, at sacra faciendi non pollebat. Absit tamen credamus, hac propter Regem in illorum ditione & clientela, a quibus tantum acceperat munus, extitisse; nil minus! Unum Deum suspiciebat Rex, cujus auspiciis regnabat, ceteri subditi erant omnes, etiam summus Sacerdos; qui Rege sedente stabat, locumque illi suum cedebat, a quo institui, destitui, etiam morte puniri poterat, si capital fecisset; ut Moses Maimonides, Rabbiorum facile doctissimus, ex Talmudicis notavit. Summam ergo unguenti illius sacri delibatio majestatem, domi militiæque, Regibus conciliavit, imo tantam, ut jus & potestatem in res divinas exercerent, ac dum colebant terras, re & symbolo Augusti, non augurio, sed oleo divino consecrati haberentur. Præterea illud etiam discrimen ad rem nostram pertinet, quod Pontifex, Pontificis filius, ungi debebat, usque in decem generationes, id est in perpetuum: Rex autem novitius tantum ungendus esset, Regis filius non item; quippe cui sine populi suffragiis regnum debebatur; nisi exortâ controversia eam adhiberet,

beret, ad majorem cautionem, ut Vatablus ad IV. Reg. 11. & Seldenus de success. in Pontif. lib. 11. c. 9. ex Gemara observarunt.

§. IV.

Usui poterat esse hoc sapientissimi legislatoris institutum gentibus aliis; nec satis definitio, a Judæis, an ab aliis, Persæ caerimonias inaugurandi Reges mutuati sint. Refert enim Plutarchus, moris apud eos recepti fuisse, ut Regibus, magorum disciplina probe imbutis, in bellicæ Deæ fano, prius diadema non imponeretur, quam terebinthum & caricæ gustassent, lactisque poculum ebibissent: symbola ad medicandum, vel ad delectandum, olei instar, comparata. En tibi Plutarchi verba in Artaxerxe cap. 2. interprete Xylandro: *Non multo post Darii mortem tempore, Artaxerxes Pasargadas profectus est, ut a Persicis sacerdotibus Regiis mysteriis initiaretur. Templum ibi est Deæ cujusdam bellicæ, quam Minervam esse conjicere liceat. Eo intrare oportet eum, qui initiatur, suoque amictu deposito, eam stolam induere, quam Cyrus ille Magnus, antequam acciperet regnum, gestaverat: siccum quoque pallatham & terminthum comedere, & lac accito temperatum bibere jubetur; fortassis & alia quædam ignota aliis facere. Non equidem Chæronensis meminit unguentorum, sed hæc tam frequentia Persis luxuriosis, iis ut maduisse ferantur; & præsto nobis sunt succenturiati duumviri, Plutarchus lib. VII. Sympos. & Athenæus lib. II. Deipnos. c. 9. narrantes, Artaxerxem Antalcidæ Lacedæmonio coronam croco unguento intinctam misisse. Ex alio ejusdem Athenæi & Helychii loco, Barnabas Brissonius, Cidarim Persicam, regis majestatis insigne, myrrha & labyzo delibutam fuisse ostendit, de regno Persarum lib. 1. n. 33. Ad Romanos quod attinet, Plinius auctor est, Persicæ gentis unguentum, ante Alexandri victoriam, a Dario obtentam, Græcis & Italis non innotuisse; postea vero ejus voluptatem, inter laudatissima, atque etiam honestissima vitæ bona, admissam esse, lib. XIII. Hist. nat. c. 1. Id vero de pri-*

X x 2

vato,

vato, non de publico unguentorum usu accipi debere, ut moneamus, haud necesse est. In potum Romæ addita esse unguenta exotica, manus & pedes odoribus peregrinis lotos, Vir Oeleberr. Petrus Burmannus ad Petronium observavit. Neque voluptatis tantum, sed & valetudinis causa ungebantur Quirites; *Feminas vero, quo elegantiores essent & mundiores, nardo puro unctas*, Pomponius scivit in l. 21. §. 1. D. de *Auro arg. mund.* qui etiam *velis*, seu corpus odorum *costis* odoribus fieri in l. 27. §. 1. D. de *Acq. rer. dom.* memoravit. Eruditore luxuriæ paratu, & Artaxerxis imitatione, coronæ convivales, e rosis vel nardi folio fuitiles, mergebantur unguentis, ut gratiæ florum, voluptas olefactus accederet. *et quædam* Græcis; coronæ unguentis madidæ apud Plinium vocantur. Sed inter publicæ Principum insignia, nullus unguentis vel coronæ locus. Romulus togam fumisit prætextam, diadema, sellam curulem, lictores quoque duodecim, cum securibus & virgis. Consulibus fasces prælati, quibus, præter secures, coronæ erant illigatæ. Notum quoque, inter dona, quæ vulgo ad amicos & socios Reges mittebantur, aureas coronas fuisse. Imperatores vero capitis insigni abstinuerunt, hæcenus civibus in speciem se æquantes, quibus nihil gratius esse sciebant. Ipse Augustus, sponcione populi Romani, tantum electus, non vero actu solenni inauguratus est. Nerva Trajanum adoptavit in templo Capitolino, ante pulvinar Jovis Optimi Maximi, sed absentem Purpuram sumere, & imperium sumere, idem erat. Caligula primus diademate uti voluit; sed Elagabalus domi, & ut patrii numinis sacerdos; publice Aurelianus sibi annexuit. Florus *distinctam radiis coronam* Cæsari decretam ait, lib. IV. c. 2. sed *in theatro*; ubi populus *coronatus* ludos spectabat; nec satis scio, an Florus erroris arguendus fuerit; quandoquidem multa unius fidentur, & titulus *Divi*, Principibus etiam vivis fuit tributus: radiatum vero caput originem ex Deo aliquo notabat: Virgilius *Solis avi specimen* vocat; quod Cæsare defuncto,

Et, in consecrationis Imperatoriae symbolum fuit conversum. Consecrabantur autem Principes mortui demum ad rogum, accedente unctione, non per servum libitinarii vilem, & pollinctorem, ut Ulpianus vocat, in l. 5. §. 8. D. de Instit. act. sed per pollinctum Sacerdotem facta, auctore Tertulliano in Scorpi. c. 7.

§ V.

Dum aliud ex alio feritur, diutius, quam institueram, in Romana Republica commoratus sum; nec tamen est, cur poeniteat: quia nullus populus, post Hebraeum, nec major, nec exemplo ditior fuit Romano: ideoque ejus ritibus perspectis, quod propositum erat, facili negotio demonstrabimus, sex primis post Christum natum saeculis, nullum Regem Christianum oleo delibutum, sed alia Principatus solennia in usu fuisse. Hæc inter eminebat castrensis ritus, quo Imperatorem, suffragiis aut clamore subitaneo electum, milites scuto imponebant, & plaudentibus cunctis sublimem humeris per castra circumferebant. Ammiani Marcellini locus est pulcherrimus lib. XX. c. 4. de Juliano: *Impositus scuto pedestri, & sublatius eminens, nullo silente, Augustus renuntiatus, jubebatur diadema proferre: negansque unquam habuisse, uxoris colli vel capitis poscebatur. Eoque affirmante, primis auspiciis non congruere aptari muliebri mundo, equi phalera querebatur.* Mos ille purus putus Germanicus est, & a Francis, ad milites Romanos translatus; illi enim ante in Palatio Prætorianis, nunc a Juliano legionibus adscribebantur, auctore Zosimo lib. III. c. 8. Unde Salii inter Palatina auxilia in Notitia Imperii recensentur. Maximi & Balbini temporibus, necdum ad Romanos ea consuetudo pervenisse videtur, quia *cespitium tribunal*, in Probi inauguratione Vopiscus: *tribunal ad altiore suggestum erectum* Ammianus lib. XV. memoravit. Quapropter non asum, cum aliis, huc referre Capitolini verba in Maximo c. 14. Gordianum Cæsarem *sublatum a militibus*, Imperatorem factum, ait; milites enim illos Germanos non fuisse, quæ:

Xx. 3.

præ-

præcedunt & sequuntur, docent. Germani vero, ut Martios spiritus gerebant, ira armis ducum orationes probabant, ex armis auspicia captabant, ad concilia procedebant armati, & Duces quoque suos hunc in modum creabant. *Impositus scuto more gentis, & sustinentium humeris vibratus, Dux deligitur*, de Brinione, nobili Caninefate, Tacitus scribit IV. Histor. c. 15. Clypeo dux impositus *vibrabatur*, id est ter in gyrum agebatur, auctore Gregorio Turonensi lib. VII. c. 10. *Parmæ superpositus, rex est levatus: sed, cum tertio cum eodem gyrarent, cecidisse fertur, ita ut vix manibus circumstantium sustentari potuisset.* Ritum hunc seculi etiam Ostro-Gothi Germani: unde Vitigis Rex apud Cassiodorum X. Var. 31. ait: *sibi parentes Gothos, inter provinciales gladios, more majorum, scuto supposito, regalem contulisse dignitatem.* Præterea ex optimo scriptore eum indicavit Chronographus innominatus: *Valentiniano VIII. & Anthemio Coss. levatus est Imperator in Galliis Avitus.* Vestigium ejus in gladiatorum collegiis, notavit Hadrianus Junius in Bataviæ historia c. xyi. Alii phrasæ mediæ ævi, *in regnum elevatus, in regem sublimatus*, pro inauguratus ostenderunt. Sed professa opera ea de re Petrus Pithæus lib. II. Advers. c. 6. & Henelius Otior. Uratislav. c. 46.

§. VI.

Latus scripsit mos ille militaris, & per manus, ut videtur, Romanorum ad Constantinopolitanos etiam pervenit. Codinus Curopalata de officiis Constantinop. c. 17. n. xi. Ο ιος Βασιλεὺς ἐπὶ ἐκουταρίῳ καὶ θύρῳ παρῆται ὡς ὤψας; *novus Imperator, in scuto sessitans, tollitur in altum.* Zonaras in Justiniano, Theophanes in Mauricio, aliique optime de hoc more; etiam Corippus Africanus lib. 2. de Justini minoris laudibus:

*Quatuor ingentem clypeis sublimibus orbem
Attollunt lecti juvenes, manibusque levatus.
Ipse ministrorum supra stetit.*

Verum præter hunc ritum, apud Græcos, alius etiam ob-

ser.

servatus fuit civilis, quo Imperatores renunciati, insignibus imperii, corona, sceptro & chlamyde coram populo & Proceribus ornabantur. Huic Marcianus, vel potius casta illius uxor Pulcheria, Anatolium Patriarcham adhibuit, ut divino suffragio datus Imperator censeretur. Justinus etiam & Justinianus quum in Palatio coronati, Mauricius dum in Palatii tribunali. Tiberius Constantinus quoque, cum augustalem coronam accepturus esset, *vocato ad se Pontifice urbis, cum Consulibus ac Præfectis*, Palatium ingressus, indutus purpura, diademate coronatus, throno imperiali impositus, cum immensis laudibus in regni gloria confirmatur, ait Paulus Warnefridus de gestis Langob. lib. III. cap. 12. Verum initio sæculi septimi Phocas omnium primus, regia corona redimitus est in æde Joannis, quo tyrannidem pietate tegeret. Ejus successoribus vel pater Imperator, vel Patriarcha in templo regium stemma imposuit, ac piis votis & precibus benedixit. Idem Corippus lib. 2. c. 5. de Justino:

*Pontificum summus plenaque ætate venustus,
Astantem benedixit eum, cælique potentem
Exorans Dominum; sacro diademate jussit,
Augustum sancire caput, summoque coronam
Imponens apici.*

Unctionis serius tantum fit mentio apud Cantacuzenum, in descriptione coronationis Andronici junioris, lib. 1. Hist. c. 41. nec miror: quia Orientalis Ecclesia, ne quidem in consecratione Episcoporum, sacra unctione utebatur, quod Innocentii III. decretalis epistola ad Thomam Maurocenum declarat, in c. un. X. de S. Unct. Cantacuzeni totum caput ante laudatum suum fecit Codinus de offic. Constantinop. c. 17. n. 18. Ο πατριάρχης χρίει τανρτοις τῇ κεφαλῇ τῶ βασιλέως τῶ θίμω μωρ, ἐπιτίθειν μεγάλη τῇ φωνῇ το Ἁγίου. Patriarcha Crucis in formam caput Imperatoris divino unguento inungit, accinens elata voce illud: **SANCTUS**. Vixit autem Codinus sub Manuele, Andronici junioris nepote, qui antepenultimus Imperator Constantinopolitanorum fuit A. 1378. Ut satis appareat, frustra

stra Onuphrium Panvinium tempore Justiniani, alios vero, sæculo septimo unctionis vestigia apud Græcos quævisse; quam nec Euchologii textus, aliis minutis recensitis, præcipit, sed oratione prima in transcurso de ea memorasse contentus est, ut Jacobus Goar in notis plenius explicat, & præclaro Manassis loco Seldenus de tit. hon. p. 1. c. 8. confirmat. Verisimilius ergo Johannes Jacobus Chiffletius in disquisitione de ampulla Remensi, cap. 16. Recare-dum, Vesi-Gothorum Hispaniæ Regem, omnium totius or-bis Regum Christianorum primum, unctum & coronatum scribit, sed non probat. Pro Wamba, Vesi-Gothorum rege A. 672. Toleti, a Quiricio Archiepiscopo uncto, stant plures: quia Joannes Magnus Gothus lib. VI. c. 22. *eum non passum esse*; inquit, *se Regem nominari, donec, Sanctorum Re-gum exemplo, per manus Pontificum inunctus, & coronatus es-set* Julianus, Toleti Episcopus, in historia ejusdem Wam-bæ, æqualis sui, tomo IV. Hisp. illustrat. *Adfuit in die-bus nostris Wamba Princeps, quem digne principari dominus vo-luit, quem sacerdotalis unctio declaravit.* Forſan autem sa-crûm hunc ritum revocavit Wamba, quia Vesigothis per-sona Regum non satis sancta erat; quamobrem, ut vitæ eorum consuleretur, alia quoque in conciliis Toletanis san-cita sunt, de quibus Alteserra ad Gregor. Turonens. lib. III. c. 30. & Cointius ad A. 584.

§. VII.

Sic prodito semel & iterum exemplo, Judaicum morem, a vicinis renovatum, suum quoque fecit Pippinus, Franco-rum Rex gloriosissimus; & bis ungi voluit, primum a S. Bonifacio, rursus a Stephano III. Papa, ut titulum, quo regnum adeptus erat, sacris confirmaret. In Anglia anti-quiora Regum unctorum testimonia extare, & vel a Saxo-num ævo, existimat Seldenus de tit. hon. p. 1. c. 8. sed initium definire non ausus. In Germania, Gallia, Scotia, Arragonia, Hungaria, Bohemia, & Polonia res nota, quod Reges serius, heic ibi maturius uncti. Ad fabulas autem vulgo

vulgo refertur, quod Canonistæ de quatuor Regibus, Hierosolymitano, Francorum, Anglorum, & Siciliae, tantum ungendis tradunt; inde tamen lux Henrico, Cardinali Hostiensis, in summa tituli de S. Unctione §. 8. *Si quis Rex inungi nova consuetudine velit, usus & mos obtinuit, ut id a Romano Pontifice petat, sicut fecit Rex Aragonum.* Nimirum Pontifex, cujus ille Vicarius & consecrator erat, medio sæculi tertii decimi, illud dogma inprimis propagabat, sedem Romanam fontem esse omnis dignitatis: unius scilicet Christianæ se unum esse Principem; quos Reges appellari, quos privatorum numero censeretur oporteat, suæ jurisdictioni esse tributum. De vetere Roma Virgilius lib. VI. *Æneid.* 848. & 852.

Excudent alii spirantia mollius æra:

*Tu regere imperio populos, Romane, memento,
(Hæ tibi erunt artes) pacique imponere morem,
Parcere subiectis, & debellare superbos.*

Eadem Innocentii III. philosophia fuit, in c. venerabilem 34. X. de Elect. ubi de Imperatore ita loquitur: *Sed & Principes recognoscere debent, & utique recognoscunt, sicut iidem in nostra recognovere præsentia, quod jus & auctoritas examinandi personam electam in Regem, & promovendam ad imperium, ad nos spectat; qui eum inungimus, & consecramus & coronamus. Est enim regulariter & generaliter observatum, ut ad eum examinatio personæ pertineat, ad quem impositio manus spectat.* Nec alia mens fuit Clementis V. in clem. un. de jurej. quam Bonifacius VIII. satis etiam testatus est, in oratione, apud Stephanum Baluzium, in notis ad Petrum de Marca de concordia sac. & Imp. lib. 11. c. 3. in f. At vero Reges, qui sui juris, Dei gratia tales sunt; regni autem pignus & sacramentum, per primum suorum subiectorum, populi vice fungentem, accipiunt, ut ritus inaugurationis augustior fiat, non vero ut Papæ vel consecratori subjiciantur. Hinc Constantinopolitani Imperatores jure ac proprie ΘΕΟΣΤΕΦΕΙΣ, a Deo coronatos se nominabant, licet a Patriarcha coronam

accepissent. Sic Archiepiscopus Cantuariensis in Anglia; in Italia Mediolanensis; in Hungaria Strigoniensis; in Bulgaria Trinoviensis, unctionem exercent, salvo suo obsequio, & regis majestate. Nec dignitas illorum inde major fit, quam Regum; quod reges in culmen regum eorum manu sacrantur, Archiepiscopi vero a Regibus ungi non possunt, ut inepte Innocentius III. ratiocinatur in *c. un. X. de S. Unct.* Nisi me omnia fallunt, propter hanc rationem, Persis olim in more positum fuit, ut non ministerio sacerdotali, sed Surenæ, cui id juris hereditarii erat, diadema Regi imponeretur, auctore Plutarcho in Crasso. Hispani vero, cum de legitima Regum suorum successione certi sint, superfluum existimant, Reges inungi; & Henricus Auceps, Germaniæ Rex, denique, anguem in herba metuens, unctionem sibi in actu coronationis oblatam recusavit, auctore Ditmaro lib. I. annal. pag. 325. *Episcopalis unctionem benedictionis a Herigero Archiepiscopo exhibitam, antecessorum more priorum, non desideravit, nec suscipere voluit, sed prorsus ad hoc indignum se affirmavit.* Summa is prudentia facilius ostendit esse, excludere periculosa, quam regere; & non admittere, quam admissa moderari: cum enim se in possessione posuerunt, rectore potentiora sunt, nec recidi se, minuive patiuntur.

§. VIII.

Si jus Canonicum sequimur, non modo ungendi sunt Reges, Pontifices & Sacerdotes, sed omnes Christiani, in baptismo; qui tunc per unctionem spiritualem, regni & sacerdotii spiritualis compotes fiunt: genus electum, sacerdotium regale, ut Innocentius III. exponit, in *c. un. X. de sacra unctione*. Jam sæculo secundo exeunte, Tertullianus *c. VII. de baptismo*, *benedictæ unctionis* meminit, qua egressi e lavacro, de pristina, id est Judaica disciplina, fuerint delibuti. In synodo Laodicensi, can. 152. Codicis canonum institutum: *Quod oportet eos, qui baptizantur, post baptismum, inungi cælesti Chrismate, & regni Christi participes esse.*

esse. Unguentum aliud *simplex* oleum olivæ est, ab Episcopo consecratum, quo catechumeni, infirmi & energumени unguuntur; aliud *principale*, per excellentiam *Chrisma* dictum, quod Episcopus, precibus & signo crucis, quotannis ex oleo & balsamo conficit, & ad subditos sibi sacerdotes mittit; ut qui baptizantur, in vertice; qui confirmantur, in fronte; denique ordinandi eo inungantur, *can. 122. de consecrat. dist. 4.* Jam vero Reges oleo catechumenorum tantum ungendi sunt, ex præscripto canonum: Pontifices principali. Regum unctio in brachio dextro tantum facienda, non in capite. Solius pontificis caput & manus unguuntur, imitando Dominum, qui caput Ecclesiæ est, unctus præ confortibus. Unctio Episcopi est sacramentum, quo imprimitur character indelebilis. Principum unctio cærimonia est, qua fiunt augustiores & tutiores ab insidiis nefariorum. *Refert inter Pontificis & Principis unctionem, quia caput Pontificis Chrismate consecratur, brachium vero Principis oleo delinitur, ut ostendatur, quanta sit differentia, inter auctoritatem Pontificis, & Principis auctoritatem,* inquit Innocentius III. *cap. un. X. de sacra unctione.* Verum neutra differentia semper observata est: non prima, quia Carolum Calvum inunxit *Hincmarus Archiepiscopus* de chrismate, *ad dextram auriculam, & in capite.* est in Capitular. Baluzii tom. 11. pag. 304. Non altera, quoniam Julianus, Toleti Episcopus, in historia Wambæ Regis: *Curvatis genibus, oleum benedictionis, per sacri Quirici Pontificis manus, vertici ejus refunditur, & benedictionis copia adhibetur.* Constantinus Manasses & Cedrenus, Carolum, nomine rebusque gestis Magnum, a Leone, Pontifice Romano, oleo unctum, ajunt, a capite ad pedes: *χρῆμας ελαιῶν ἀπὸ τῆς κεφαλῆς ἕως ποδῶν.* De Regibus Angliæ, Rogerus Hovedenus, in Henrico II. & Matth. Parisiensis in *Hist. Angliæ ad A. 1166.* ex epistola Thomæ Cantuariensis Archiepiscopi: *Inunguntur Reges, in tribus locis, in capite, in pectore, & brachiis, quod significat gloriam, potentiam, & fortitudinem.* Idem de Impera-

peratoribus Romanis Theophanes in Chronico tradit. Ad illam autem recentiore Innocentii constitutionem, respexit Hubertus Morus *l.* 3. c. 5. ubi scribit, in Regum Franciæ consecratione singulare esse, quod ipsi in vertice, & cœlesti oleo, Chrismati immixto, liniantur. De Rege Poloniæ, *unctus inter scapulas*, ait Cromerus. Sed constitutio illa unice ad Pontificis unctiones pertinet: actus enim coronationis potentissimi Borussorum Regis, FRIDERICI I. gloriøsæ memoriæ; & recentior CAROLI VI. Imperatoris Semper Augusti, loquuntur, utriusque unctionem in vertice aliisque corporis partibus factam esse. Vide Antonii Fabri, sive qui sub eo nomine latet, Christophori Leonardii Leuchtii *Staats-Cantzley tom. xviii. pag. 615.*

§. IX.

Effectus regiæ unctionis, alii sunt ecclesiastici, alii civiles. Ad illos quod attinet, novimus cærimonias Cruci esse affixas, iisque nihil sanctitatis aut prærogativæ cuiquam, in novo Testamento conciliari. Obtinuit tamen, ut Reges, virtute sacræ unctionis, quodammodo consecrati, sancti & venerandi habeantur; ne quis tantum apparatus suscipi putet, sine fructu, qui precibus piis obtineri possit. Ita prolixè Petrus Damiani *serm. lxxv.* alique recentiores. At Zosimus Principibus Romanis, Christianis pariter ac gentilibus, simulac summum imperium acceperissent, amictum sacerdotalem, ait, oblatum esse, & continuo eos Pontificis Maximi titulum usurpassè, citra unctionem, *lib. iv. Hist. c. 36.* Apud Græcos vero recentiores, Patriarcha, dum caput Imperatoris ungebat, *μεγαλη τη φωνη το Αγιος* exclamabat, auctore Cantacuzeno *lib. 1. Hist. c. 41.* atque Curopalata *c. 17. §. 18.* *το Αγιος ανακραζει*, Sanctus exclamat Patriarcha: declarans quod ab uno sancto sanctus efficitur: & quod Christi sanctificatorum est, ut ex iis quispiam consecratur Imperator, scribit Symeon Thessalonicensis, in *lib. de sacram.* Atque hinc etiam, Trullanum Synedrium, condito canone 69. Imperatori suo ferme omnia, etiam Episcopalia & sacerdotalia

italia munera tribuit: ut jus Bema, seu locum in Templo, ubi consistebant sacerdotes, ingrediendi, quem nulli Laicorum ingredi fas erat; jus sacram mensam thure vaporandi; trifulco cereo benedictionem Ecclesiæ impertiendi; sacros sermones ad Proceres & populum habendi; etiam ingressum ad altare. Id quod Jacobus Grefserus in notis ad Codini caput 14. ad palpum adulatorium refert, & mordaci aceto perstringit; sed eruditus Goarus, Theodosii & Valentis exemplis, hunc morem defendit: quocum Du Fresnoius in descriptione S. Sophiæ §. 42. jungi potest, ubi accurate, de Imperatorum sede, intra vel extra Bema, dum sacra peraguntur. Ex eodem fonte manat, quod Imperatores ungendi & uncti, ambas species panis & vini, separatim acceperunt, sacerdotum more, cum plebs tubulo in calicem immisso biberet, vel panem vino intinctum, sacerdotis manu sumeret, ex cochleari, *λαβύς*, vocato. Docet Cantacuzenus lib. 1. Hist. c. 41. & ex eo Codinus de offic. c. xvii. n. 43. *Imperator, deposita de capite corona, tradit eam Diaconis. At Patriarcha, postquam pretiosum Domini corpus sumit, tradit quoque Imperatori in manus Domini corporis particulam, qua sumta, sumit etiam vivificum sanguinem: communicat autem, Patriarcha sanctum calicem tenente, ipse vero os ad calicem applicat, quemadmodum sacerdotes solent.* In Occidente etiam Augustinus Patricius, in libello de Friderici III. Imperatoris in Urbem adventu, tanquam insolitum refert: *Communicavit summus Pontifex altaris sacramentum cum Imperatore, Diacono & subdiacono, de pane tantum. De calice autem, etsi consuetudo est, communicantes cum Pontifice participare; propter insurgentem tamen Hussitarum & Boemorum damnatam heresin, quæ calicis potum ad salutem necessarium putat, præter Pontificem, bibit nemo.* Denique ad unctionis effectus sacros est referendum, quod Reges, a collegiis Ecclesiasticis, in primores Canonicos adfociscuntur, licet *κατὰ* non sint, nec vere ordinem sacrum, aut potestatem spiritualem acquirant. Sic auctor Cerimonialis Romani re-

fert, lib. 1. sect. 5. Imperatorem, summa Romæ coronam cum suis ad Lateranum pergere, ibique *recipi in Canonicum, & in fratrem Ecclesiæ Lateranensis*. Extat diploma Conradi III. apud Wilhelmum Hedam *Hist. Traj.* p. 164. in quo sequentia: *Attendentes etiam nos, & Antecessores nostros, Reges & Imperatores, in dicta Ecclesia a fundatione ejus, inter Canonicos, primum locum obtinere, nostramque præbendam in eadem duos deservire sacerdotes. &c.* Hoc modo Carolus V. Imp. unctionem suscepturus Aquisgrani, Trajectum ad Mosam prius adiit, ibique in majore S. Servatii Ecclesia, almucia & superpellicio indutus, cum ceteris Canonicis, Ecclesiastica munia obivit, ut Joann. Placentinus in *Catal. Episc. Traject.* scribit. Eadem facultate in Ecclesia Aquisgranensi cathedrali gaudet. Jusjurandum, quod ibi præstandum, Joannes Noppius in *Chron. Aquisgran.* l. 1 c. 12. descripsit. Alios ejusmodi Canon cos honorarios, qui non ex unctione, aut ex jure patronatus, sed ex privilegio, Canonicorum catalogis sunt adscripti, dedit eruditissimus Frenius in *gloss. voc. Canonici*.

§. X.

De effectibus unctionis civilibus si quæras, non est dubitandum, quin sacer actus Imperantibus, ex hominum opinione, decus, successum & securitatem largiatur, quodque ad symbola & pignora *auspicii regii* pertineat, quo Tacitus, in summa fortuna plus, ait, agi, quam manibus atque telis. Omnes reges, vel ipso nomine, sunt sancti, primum ut eximie colantur, deinde ne ullatenus violentur. Sed nihil, ad eorum sanctitatem & magnificentiam demonstrandam, priscis videbatur efficacius, quam si *Uncti Domini* essent & appellarentur. Vulgus in titulis stupet, nec parum ad pompam rerum & nominum caligat. Hic vero gratiam & curam Numinis singularem sibi imaginatur: neque ejus judicium, in talibus sperni debet. Velut muro enim perpetuo salus Principum vallatur, si animis civium alte repositum sedet, quod David Sauli, cum poterat, manum non infecit.

inferens, dixit : *non extendam manum meam in Dominum meum : nam, Unctus Jehovah est* 1. Sam. xxiv. 11. & xxvi. 9. Huc pertinet, quod interpretes Bibliorum sæpissime vocem Græcam *χριστος*, significatione magna & gravi, retinuerunt, cum alibi, tum in Psalmis : *Nolite tangere christos meos. Salvavit Dominus christum suum.* Nicephorus etiam Callistus Christi imaginem Regibus ab unctione petit. lib. 1. c. 4. *Divino enim spiritu dum Reges ungebant, ii, quibus id negotii datum, Christus per imaginem & faciebant & appellabant. Siquidem & Regibus omnino typi quidam & figuræ inerant veri regni & potestatis, quam Servator noster, Jesus Christus in omnes habet.* Sed major inaugurationis utilitas sese exserit; si in re ancipiti, plures de regno electio contendunt : tunc enim, ceteris paribus, pro illo erit pronuntiandum, qui symbola regni publice accepit. Apud Romanos Fortuna aurea, quæ in cubiculo Principum poni solebat, pignus erat Imperatoris majestatis, teste Capitolino in Pio c. xii. In tumultuariis Principum creationibus, de vexillis aut simulacris deorum, purpuram sæpe direptam esse, ut electi, adhibitis insignibus, jure Romano firmati viderentur, magnus Casaubonus docuit ad Capitolini Gord. c. 8. Multos recentiorum persuasio tenuit, Reges per initiationem in jus & possessionem mitti, sicut vasalli de feudis investiantur. Helmodus lib. 1. Chron. Slavor. c. 32. *Fac nobis reddi coronam, ceteraque ad investituram Imperialem pertinentia.* Apud Germanos, amplam regnandi spem præbebat insignium possessio, auctore Wittechindo lib. 1. pag. 636. Sigeberto ad A. 1002. & Alberto Stadenfi Chron. ad A. C. 1126. Adde diligentem & anxiam clenodiorum custodiam, in castello firmissimo, vel templo, apud Abbatem Ursperg. in Chron. A. 1224. 1209. 1221. Prorsus ac Ancilia & Palladium, secreta quondam Imperii pignora, rem Romanam conservare videbantur. ARCA NA. URBIS. PRÆSIDIA. QUORUM. NUTU. ROMANO. IMPERIO. REGNA. CESSERE, appellantur in marmore apud Gruter. pag. 83. n.

n. 15. In summa, donec subiecti erunt homines, erunt autem semper, unctio sacra Regibus magis prodesse, quam nocere potest. Antequam autem hoc caput finiam, monebo, quod a magni nominis Philosopho dictum refert Diogenes Laertius lib. 11. n. 76. & Seneca de benef. c. 25. *Aristippus, unguento delectatus: Male, inquit, istis effeminatis, qui rem tam bellam infamaverunt*, idem & hic locum habere. Verus enim unctionis usus a simulato discerni debet, & cavendum est probe, ne opinio, de immediata a Deo origine majestatis, per unctionem fulciatur; neve summum imperium per sacerdotes in Principem conferri; aut hunc per consecrationis characterem indelebilem numen & Deum fieri, aut divinitatis participem reddi, cum sæpe vulgi credamus. Gabriel Naudæus hæc & similia dominationis arcana pluribus illustravit, *Consid. polit. sur les coups d'Etat cap. 4.* Illud etiam obiter hic addam, promissionem expressam, de regno bene gerendo, quæ ante actum unctionis, præstito jurejurando, fieri solet, non tollere, nec minuire summum imperium, maxime si generalis sit; ob vulgatum axioma: quæ tacite insunt, si expresse adjiciantur, nullum producant juris effectum. Apud Hebræos populus promittebat, Regis salutem sibi curæ fore: ut Rex populo promitteret, moris non fuit. At Ægyptiorum, Persarum, & Æthiopum Reges, licet cum summo imperio essent, tamen jurabant cum regnum adirent: verum si contra fecissent, vivi non poterant accusari, mortuis solennis sepultura denegabatur, ut Grotius eleganter *ad 11 Reg. xi. v. 17. & lib. 1. de J. B. & P. c. 3. §. 16* Hodie jusjurandum generale inutilis fere cautio est, & Pontifex absolutionem sæpe concedit; si vero specialis promissio fiat, & clausula commissoria vel cassatoria expresse addatur, effectus maximi producuntur. De Polonia confer Hartknoch *l. 2. de Polonia. c. 2. §. 24.* de Imperatore Romano Germanico Pufendorf. *lib. vii. Rer. Brand. §. 26. 37. 40.*

CAPUT II.

DE

UNCTIONE REMENSI.

§. I. *Rex Gallia ipso jure succedit in regnum, ut suus heres, nec eget unctione, more majorum vero inauguratur. II. Franci sagati Reges prima stirpis clypeo extollebant; togati hastam eis porrigebant, circulum pro corona. III. Clodoveus non aliter ad regnum evectus; in baptismo chrismate unctus. Ampullæ Remensis forma. Pro caelesti ejus origine argumenta enarrantur. IV. Eadem refelluntur. Hincmarus & Vertotus notati. V. Pipinus primus Regum Francorum bis unguento sacratus, & quas ob causas. VI. Regis ungenti jus Remorum Archiepiscopo a quibus datum? cur is Regem eligere dicatur. VII. Quidam Franciæ Reges alibi, quam Remis sacrati. Henricus IV. unctus ex ampulla Martini. VIII. Insignia Regni a Paribus Franciæ Ecclesiasticis & Laicis feruntur. De Liliis Francorum & Aurisflamma. IX. Cerimoniarum breviter recensio, Regis iurjurandum. X. Ejus prerogative præ ceteris Regibus foris. Rex Regum dictus, propter unctionem caelestem. XI. Eminentia Regis in suo regno, per indicem explicata, effectus unctionis. XII. De Regis itinere ad sanum S. Marculphi; ejus virtus sanandi strumosos. XIII. De tutela regia, & annis ætatis majoris.*

§. I.

GAlliæ Reges annos regni sui olim numerarunt a tempore inaugurationis; hodie numerant a momento regni delati, id est, quo obiit decessor. Illico in vacuum jus succedunt proximi quique regiæ stirpis, etiam infantes, atque in cunis vagientes, licet suæ tutelæ ante legitimam ætatem non committantur. Quemadmodum sui heredes, jure Romano, quasi domestici & familiares heredes sunt, sic ipso jure, Rex successor statim existit, non Senatus populique decreto. Non ille heres patris est, sed coronæ:

Zz

ronæ:

ronæ : puncto temporis perfectus Rex est : nascitur, non fit, vi & potestate juris Francici, quod Prudentes Galli *jus instantaneum & momentaneum* appellarunt. Notum est proverbium, vulgi sermonibus tritum : *Regem Francorum immortalē esse*. Jam olim Agathias Scholasticus lib. 1. Hist. scripsit, apud Francos regnum a patre semper in filium transiisse, ideoque *Theudibaldum puerum, quamvis sub custode, ad principatum lege patria vocatum*. Et profecto, si apud Gallos privatos valet regula : *Le mort saisit le vif*, quanto magis ea in ipso Rege, ad incommoda interregni vitanda, valere debet. Quum Franciscus Rex A. 1560. nondum finitis comitiis, diem suum obiret, Ordinesque deliberarent, num priora mandata sufficerent, dicebatur : *quod lege regni vivus mortuum excipiat, & regnum continuata possessione, sine interruptione, transmitti videatur*, apud Thuanum lib. 27. *Hist.* In tantum vero linealis successio, apud Regii sanguinis Principes attenditur, ut repræsentationi semper locus sit; adeoque ex propiore linea natus, aliis, quamvis gradu vel ætate prioribus, præferatur, secundum Henrici III. constitutionem, in comitiis Blesensibus latam A. 1576. Vetus moris hujus Salici testimonium ex Agathia lib. 2. laudavit Grotius lib. 11. de J. B. & P. c. 7. §. 23. atque linealem successionem agnaticam, marium duntaxat ex maribus, ex nobilissimi regni exemplo, *successionem juris Francici* vulgo, ait, appellari. Ex quibus satis apparet, hodierno Regi Galliarum, ut sceptrā capefferet, minime necessarias fuisse unctionis ambages, si antiquam ei legem imitari placuisset, ex qua sacer ille ritus ad Hispanos, inde ad Pippinum manavit. Apud Hebræos namque, filii Regum in patribus erant uncti, nec ipsi ungebantur, nisi controversia de Regno esset, aut metueretur. Erit igitur operæ pretium, præter causas generales, superiore capite allatas, alias speciales investigasse, cur mos unctionis, apud gentem, minime superstitionis, tam religiose custodiatur : & tamen Regi, simulac factus aut natus est, majestas adhæreat, vel ut

Ovidii verba *V. Fastor.* 26. mea faciam, simulac regii parentes

*Corpora legitimis imposuere thoris,
Jam sata Majestas, Gallos quæ temperat omnes,
Quoque die partu est edita, magna fuit.*

§. II.

Nec temporis series rumpatur, primam causam petemus, ab inveterata consuetudine Regum stirpis Merovingicæ, qui duplici solennitate, militari & civili inaugurabantur. Ritus militares Franci, cum ceteris Germanis, communem habuerunt, ut armati in campo, & velut in procinctu, Regem scuto impositum sursum elearent, quo ab omnibus salutaretur. Gregorius Turonensis lib. iv. Hist. c. 46. de Sigeberto: *Collectus est ad eum omnis exercitus, impositumque super clypeo sibi Regem statuunt.* De Gundovaldo, qui Clotharii Regis filium se ferebat, optimus locus est Aimoini lib. 111. de Gestis Franc. c. 61. *Evocatum Gundwaldum, more antiquorum Francorum, Regem proclamantes esse suum, elevarunt eum clypeo. Cumque tertio totum cum eo circumvisissent exercitum, clypeus repente ruens cum Rege, vix a terra elevari potuit.* Alter ritus, domi & pacis tempore observatus, in eo consistebat, quod Optimates Francorum ad Regem inaugurandum convocabantur, singuli vero homagium præstabant, ac Regem, folio excelsio impositum, tenentem in manu hastam pro sceptro, debito honore prosequabantur, ut Hadrianus Valesius tradit, lib. 21. *Rer. Franc. p. 259.* cui addo Auctorem Historiæ, jussu Childebrandi scriptæ; qui, Chilperico Rege mortuo, *Theodericum, ait, presentibus nobilibus regnorum, Neustriæ scilicet & Burgundiæ, solenniter in Regem sublimatum esse, cap. 101. & sedem regni, locum solii regalis obtinuisse cap. 107.* Ad hastam quod attinet, ea jam a vetustissimis temporibus potentiar, divinitatis & Regiæ potestatis insigne fuit: *Reges hastas pro diademate habebant, quas Græci sceptra dixere.* Nam & ab origine rerum, pro Diis immortalibus veteres hastas coluerunt;

ob cuius religionis memoriam, adhuc Deorum simulacris basta additur, inquit Justinus lib. 43. c. 3. Idem vero regiae maiestatis symbolum placuit Francis. De Guntramo Rege, Gregorius Turonensis lib. vii. c. 33. *Data in manu Childeberti basta, ait: Hoc est indicium, quod tibi omne Regnum meum tradidi.* Aimoinus de eodem lib. iii. c. 68. *Hastam, quam gerebat nepos tradidit, inquit: Hoc amantissime nepos indicio noreris, te mihi successurum in regno.* Coronarum ex auro & gemmis nullus adhuc usus erat, quapropter apud Gregorium Turonensem aliosque altum de iis silentium est. Simplici autem linea margaritarum, aut nuda tænia, caput Regum, in nummis quibusdam, cinctum conspici, locuples auctor est Valesius lib. xix. ad A. 636. Ejus quoque stirpis Principes, circulo ex auro, simplicioris coronæ species, usurpasse, & cassidi superposuisse, Marcus Wolfonius *scient. Heroic. cap. 37.* observavit. In vita S. Conwoionis apud Mabillon. *Act. Benedict.* tom. vi. pag. 192. *Salomon Rex (Britonum) appellatur, non quod revera esset, sed quia circulo aureo & purpura, concessione Caroli Augusti utebatur, idcirco hoc nomine censebatur.* Corippus de Justino juniore lib. 2.

- *Armatis manibus, sacrati circulus auri
Impositus collo, Imperium sublime dicavit.*

§ III.

Vidimus unam solennis inaugurationis causam; ex moribus populi antiquis petitam: nunc altera, & proprior quidem unctionis succedat, *Oleum caeleste*; quo Galliarum Rex, inter universos terræ Principes, solus ungi fertur, ut locus fere sit, Psalmi xlv. 8. *Unxit te Deus, Deus tuus, Oleo letitiæ, præ consortibus tuis.* Neminem fugit, quid rerum Francicarum scriptores, de unguentaria sua Ampulla, fabulentur. Nimirum exeunte sæculo quinto, quum sacerdos ad baptismum Clodovei, chrisma allaturus, a multitudine interciperetur, ut ad Fontem venire nequiret, subito columbam, nive candidiorem, vitreum illud attulisse vasculum,

lum, chrismate sacro repletum, quod in hunc usque diem, Remis, in Campania Gallica, religiosissime servatur. Id equidem ipsi Ampullæ patroni cordatiores diffiteri non audent, Chlodoveum, non regia, sed Baptismi unctione linntum esse; qui ante annos quindecim, a militibus armatis clypeo in Regem fuerat levatus, & inauguratus. Unde *unctionis* tantum *Baptismalis* meminit Gregorius Turonensis *lib. 11. Hist. cap. 31.* lidem vero, quum ex eadem laguncula, nihilominus Regi suo omnes dignitatis prærogativas titulosque excellentiores asserant, digna res visa fuit multis, quæ ad veritatis trutinam examinaretur. Pro cœlesti Ampullæ origine, tanquam pro aris, & patriæ suæ focus, pugnarunt Hubertus Morus, facundissimus Remensis Ecclesiastes, in opere *de sacris Unctionibus*; tum Guilielmus Marlotus, Magnus Prior Monasterii S. Nicasii Remensis, in tractatu *de consecratione Regum*, Daniel etiam Priezacus, & Jacobus Alexander Tenneurius *Vindicias* pro simpulo Remensi dederunt; quibus non multum, quod adderet, habuit novissimus Abbas Vertotus, in dissertatione, Gallico sermone, de hoc argumento scripta, quæ reperitur tom. 11. *des Memoires de literature* pag. 381. Antequam horum argumenta enarremus, juvabit ipsam Ampullæ formam intueri, ex aurei nummi, in memoriam unctionis Ludovici XIII. cusi, exemplo, quod Chifletius nobis servavit, in disquisitione de Ampulla Remensi pag. 74.



Urgent inprimis S. Remigii testamentum, apud Flodoardum in *Historia Remensi* l. 1. c. 18. editionis Sirmondi:

ex quo appareat, non modo Clodoveum aquis lustralibus tinctum, sed & Regis unctione delibutum fuisse. Verba ejus sunt sequentia: *Quem in Regiæ Majestatis culmen perpetuo duraturum elegi, baptizavi, de sacro fonte suscepi, donoque septiformis Spiritus consignavi, & per ejusdem sancti spiritus sacri chrismati unctionem ordinavi in Regem.* Deinde Hincmarum, ajunt, Remensem Archiepiscopum, non modo in vita S. Remigii, apud Surium 13. Jan. miraculum hoc, ex vetustioribus Remensis Ecclesiæ Codicibus, in litteras misisse: sed eundem, Metis, publice & velut ex suggestu, in Caroli Calvi inauguratione, adstantibus Franciæ & Lotharingiæ regnorum Primatibus & Episcopis traditionem, a Majoribus diu receptam, ore sacro enunciasse. Nemini autem verisimile videri, primum Galliæ Episcopum, adeo omnem abjecisse pudorem, ut fabulas aniles, aut historiam recens a se confictam, in tam illustri confessu proferre, & cærimoniis sacris, ingesta fabula, illudere voluerit. Verba Capituli ab Hincmaro pronunciati, apud Stephanum Baluzium tomo. 11. Capitular. pag. 219. sunt ista: *Domnus Hludovicus pius Imperator Augustus, ex progenie Hludovici, Regis Francorum inclyti, per beati Remigii, Francorum Apostoli, catholicam prædicationem, cum integra gente conversi, & cum tribus Francorum millibus, exceptis parvulis & mulieribus, vigilia sancti Paschæ, in Remensi metropoli baptizati, & cœlitus sumto chrismate, unde adhuc habemus, peruncti & in Regem sacriati.* Addunt Aimoinum, Hincmari pene æqualem, ac in provincia Senonensi enutritum lib. 1. de Gestis Francorum c. 16. *Cum sanctus Pontifex modum divinæ Passionis recitasset, Rex, ait, illi, si ego cum Francis meis ibi affuissem, ejus injurias vindicarem: quod vero grata acceptabilisque Deo prædicti Regis fides fuit, ostensum declaravit miraculum; Nam cum forte, qui chrisma ferebat, interclusus a populo deesset: Ecce subito, non alius sine dubio, quam sanctus apparuit spiritus, in Columbæ visibile figuratus specie, qui rutilanti rostro sanctum deferens Chrisma, inter manus deposuit Sacerdotis, undas Fontis sanctificantis.*

ficantis. Denique, ut ceteros minorum gentium mittam, Nicolaus de Braja in Ludovico VIII. de S. Remigio :

cujus prece rorem

*Misit in Ampullam caelestem Rector Olympi,
Corpus ut hoc lavacro Regis deberet inungi,
Deficeretque liquor, ibi corpore Regis inuncto.*

§. IV.

Verumenimvero quemadmodum initia plerorumque regnorum & populorum, poeticis magis decora fabulis, quam incorruptis rerum gestarum monumentis traduntur, ita, Livio monente, venia hæc datur antiquitati, ut miscendo humana divinis, primordia rerum augustiora faciat. Trojani Palladium, *signum caeleste Minervæ*, cælo delapsum fabulati sunt. Virgilius lapsa *Ancilia cælo*, una cum civibus suis Romanis, veneratur. Constantinus litteras *in tota urbe*, in cælo legisse fertur, & ipse crucem a se in cælis visam juravit. Apud Germanos vero Lanceæ ferrum, quo latus Christi transfixum erronee putarunt, tantæ quondam venerationis fuit, ut Innocentius VI. Festum Lanceæ & Clavorum Domini, per totam Germaniam & Bohemiam celebrari præceperit, cum multo Indulgentiarum fumo. Nec ego dubitem, Vasculi Remensis historiam totam, ad eandem commentorum politicorum, aut si mavis, piarum fraudum classem referre, quibus & Principum & Cleri dignitas apud Gallos fuit evecta. Unum, instar omnium, Ampullæ oppugnatorem, nominasse sufficiat, Johannem Jacobum Chiffletium, Virum omni eruditionis genere cultissimum, qui ut variis scriptis Hispanorum prærogativam tuitus est, & *Hispaniissimi* nomen idcirco a Tenneurio tulit, sic contrariam Gallorum primam sedem, fragili Ampullæ innitentem, ut disturbaret, singularem disquisitionem *de Ampulla Remensi* edidit, quæ in omnium manibus versatur. Testes fictionis ipsos advocavit Francos, qui exordia religionis Christianæ in Gallia accurate persecuti sunt, & Clodovei baptismum ad minutias usque descripserunt, de ampul-

pullari autem miraculo ne ⁷⁷⁷ quidem. Hincmarum Remensem, docet, sæculo duntaxat nono jam inclinante, Ampullæ hujus primam fecisse mentionem; nullam cum autem fidem mereri; quia quatuor alios gravissimos errores, in describendo Clodovei Baptismo, commiserit. Verum porro ac legitimum Remigii testamentum profert; nec materiam Ampullæ, nec formam cœlestem esse ostendit; & elegantes deinceps conjecturas addidit, unde pia fabula orta videatur. Haud equidem diffiteor, argumentum a silentio antiquiorum deductum, non semper esse omni exceptione majus; quum novis auctoribus, prisca ex priscis narrantibus, fides etiam sit habenda. At vix fieri potuit, ut tam singulare & inauditum cœlo delati Chrismatis miraculum, in conspectu tot Germaniæ, Galliæ & Neustriæ Episcoporum, imo tot millium simul baptizatorum patratum, per omnem Orbem Christianum confestim non innotuerit: nec Anastasius Pontifex, in missa ad Clodoveum epistola gratulatoria, quæ in tomo v apud Dacherium reperitur, neque Avitus Nicetiusque Episcopi, ejus fecerint mentionem. Certe Gregorius Turonensis, primarius Franciæ Historiæ Ecclesiasticæ Historicus, Clodovei filiis regnantibus natus, & miraculorum relatione gaudens; tum Fredegarius Scholasticus, & Auctor gestorum Francorum, ceterique veteres Historici, rem eam indictam non reliquissent. Guilielmus Marlotus, in metropolis Remensis historia tomo 1. multus in eo est, his ut dubiis satisfaceret, & causam Ampullæ proculdubio in scripto singulari, supra a nobis laudato, egit disertius: sed non possum non egregium Papebrochii monitum hic commendare tomo v. Actor. Maji pag 20. *Laudandum est enimvero ornandæ patriæ studium, sed nescio an ulli moderandum magis quam Historico, nisi enim id fecerit quanto fuerit eruditior, tanto pronior erit ad patrias traditiones qualescunque animosius fidentiusque propugnandas, nec poterit, quam sint eæ male fundatæ agnoscere.* Nos honorem habemus Hincmaro Archi-Episcopo, quem nobili Francorum prosapia

pia ortum, inque aulicis regni negotiis, ætate Ludovici & filiorum ejus versatissimum scimus, & agnoscimus moniti ab Hermanno Conringio Exerc. de civ. Imp. §. 30. Eundem tamen, in gratiam Ecclesiæ suæ, posterorumque Caroli Magni, multas fabulas finxisse, Hadrianus Valefius in Gestis veterum Francorum observavit lib. VIII. ad A. 555. Ad alia ergo ejus Mythistorica damnanda est origo Ampullæ cœlestis, quam nulli facile persuadebit, nisi qui Tiberii Imperatoris affectum induerit, quem Tranquillus scribit, *maxime curasse notitiam historiæ fabularis, usque ad ineptias & derisum.*

§. V.

Magis hæc apparebunt, si demonstrabimus, Pippinum primum esse Regum Francorum, qui Judaicum ungendi morem, in vicina Hispania a Veligothis renovatum, semel & iterum secutus est. Primam ejus unctionem regiam, a Bonifacio Archiepiscopo factam, ad A. 750. describunt Annales Eginhardi, Regino, Marianus & Sigebertus, nulla cœlestis olei, aut Ampullæ Remensis facta mentione. Ipse locus, & monasterium S. Medardi, apud Sueffionas, in quo is chrismate communi delibutus est, ostendit, nullam tum Remis Ampullam miraculosam fuisse. Annales Laurisheimenses A. 750. *Hoc anno Pippinus Rex Francorum appellatus est, & ad hujus dignitatem honoris unctus sacra unctione, manu sanctæ memoriæ Bonifacii Archiepiscopi & Martyris, & more Francorum, elevatus in solium Regni, in civitate Sueffiona.* Annales Pithœani. A. 752. *Pippinus in civitate Sueffionum a sancto Bonifacio, Archi-Episcopo, in Regem unctus, Regni honore sublimatus est.* Nimirum cautus erat Pippinus ex femina tantum Merovingorum stirpe prognatus, ideoque nihil eorum prætermisit, quibus & apud Ecclesiasticos, & Laicos, regni securitatem sibi compararet. Antequam Childericum, Regem ignavum, cum filio ejus Theoderico (nec enim iste cœlebs, aut sine prole fuit) in S. Bertini monasterium Sithiense detrudi præciperet, anno 750. legationem ad Zachariam Papam direxit; cumque is de tonden-

Aaa

do

do Rege annuisset, unanimi Francorum consensu coronam accepisse non fuit contentus, sed unctionis sacræ imaginem ei circumposuit, nec semel, sed elapso triennio iterum a Pontifice Maximo consecratus; neque solus, sed cum uxore & filiis ungi voluit. De secunda unctione, prope Parisios, in fano S. Dionysii facta, Anastasius Bibliothecarius, in vitis Pontificum, ubi de Stephano III. pag. 85. edit. Paris. ita scribit: *Pippinus sanctissimum Papam, cum suis omnibus Parisios, apud venerabile monasterium beati Dionysii, ad habitandum pergere curavit. Quo peracto, & eo in eodem venerabili monasterio, cum jam facto Christianissimo Pippino conjungente, Domino annuente, post aliquantos dies, isdem Christianissimus Rex, ab eodem sanctissimo Papa, Christi gratia, cum duobus filiis suis, Reges uncti sunt Francorum. Utramque unctionem plenius enarravit Codex cœnobii Dionysii antiquus, cujus integram subscriptionem exhibuit Henschenius in Exegesi præliminari secunda, ad Martii tom. III partem vero Mabillon de Re diplomat. lib. II. c. 26. ex qua patet, quod liber ille scriptus sit, Pippini Regis anno sexto decimo, Indictione V. & filiorum ejus, Regum Francorum, Caroli & Carolomanni, qui per manus, sanctæ recordationis, viri beatissimi, domni Stephani Papæ, una cum prædicto patre, domno viro gloriosissimo, Pippino Rege, sacro chrismate firmati sunt. --- Quum ipse Pippinus, per auctoritatem & imperium sanctæ recordationis, domni Zachariæ Papæ, & unctionem sacri chrismatis, per manus beatorum sacerdotum Galliarum, & electionem omnium Francorum, tribus annis antea, in regni folio sublimatus. Postea per manus ejusdem Stephani Pontificis, die uno, in beatorum Martyrum, Dionysii, Rustici & Eleutherii ecclesia (ubi & venerabilis vir Folradus Archiepresbyter & Abbas esse cognoscitur) in Regem & Patricium, una cum prædictis filiis Carolo & Carolomanno, in nomine Sanctæ Trinitatis, unctus & benedictus est. In ipsa namque beatorum Martyrum Ecclesia; uno eodemque die, nobilissimam atque sanctissimam, de sanctis Martyribus devotissime adherentem,*
Ber-

Bertradam, jam dicti florentissimi Regis conjugem, prædictus venerabilis Pontifex, Regalibus indutam cycladibus, gratia septiformis Spiritus benedixit. Pippinus ergo primus fuit, qui, propter rationes politicas, unctionem coronationi adjecit: Alii ex zelo quodam, & superflua pietate erga Romanam Ecclesiam, aut si mavis, Zachariam Papam, id factum ajunt; quod Gerardus du Bois in *Hist. Eccl. Paris. lib. v. c. 1. §. 1. seq.* negat, & nullum primæ stirpis, regia unctione benedictum fatetur; id quod Tilletus, Haillan, aliique Francorum Historici etiam agnoverunt. At Scipio du Pleix tomo 2. de l'Histoire generale de France pag. 82. hos erroris accusavit, & post eum Vertotus, in dissertatione supra laudata pag. 389. causati, quod, sub initium sæculi duodecimi, Ivo Carnotensis Episcopus, Charibertum Parisiorum, & Guntramnum, Aurelianorum Reges, Clodovei nepotes, & Lotharii filios, quemque in suo regno, sacratos testatur: Verba ejus epist. 189. sunt, quæ sequuntur: *Illi Reges quippe nullam a Remensi Episcopo benedictionem, vel coronam acceperunt, sed a sacerdotibus provinciarum, quas regerent, sublimati sunt & sacrat.* Sed sacratos duntaxat, ait, id est, piis precibus ab Episcopis benedictos, & in regni solium constitutos, pariter ac superiore capite §. 6. de Imperatoribus Græcorum diximus; non consecratos, non inunctos, ut de secundæ stirpis Regibus statim Ivo addit: *Postquam vero Regnum Gallorum in suam monarchiam revocatum est, deleta progenie Clodovei, Pippinus & filii ejus Carolus & Carlomanus, nec Remis, nec a Remensi Archiepiscopo in Reges sublimati sunt, nec inuncti.* Nullam autem fidem habemus Guillelmo Brittoni, Monacho S. Dionysii, qui sæculo decimo tertio, Hincmarum aliosque, superstitione secutus, de Clodovei baptismo ita cecinit, lib. 1. Philipp.

*At sacer antistes, erecto lumine sursum,
Cum manibus, meruit sacra per supplicamina sacrum
Cælitus emitti cum sacro vase liquorem,
Ipso Rege palam, cunctisque videntibus ipsum*

*E cælo missus, quem detulit Angelus illi;
Quo Rex sacratus fuit idem primus: Et omnes
Post ipsum Reges Francorum, ad sceptrum vocati,
Quando coronantur, oleo sacrantur eodem.*

§. VI.

Cur Remensis Archi-Episcopus unctionis officium sibi vindicet, ex actis antiquissimis, coronationis Philippi, nominis istius primi, liquere videtur, quæ ex archivis Remensis bibliothecæ, in lucem protraxit Joannes Bodinus lib. VI de Republ. c. 5. & de Gervasio, tum temporis, circa A. 1059. Episcopo, ita loquuntur: *Accipiens baculum Sancti Remigii, differuit quiete Et pacifice, quomodo ad eum maxime pertineret Electio Regis Et Consecratio, ex quo sanctus Remigius Hludovicum Regem* (hodie Clodoveum appellamus) *baptizavit Et consecravit. Differuit etiam, quomodo per illum baculum hanc consecrandi potestatem, Et totius Galliæ principatum, Ormisdas Papa. sancto dederit Remigio, Et quomodo Victor Papa sibi Et Ecclesiæ concesserit. Tunc, annuente patre ejus Henrico, elegit Philippum in Regem. Post eum Legati Romanæ sedis; cum id sine Papa nutu fieri licitum non esse, disertum ibi sit.* Auctori narrationis hujus, sive is Gervasius, sive Julianus, Hincmarus prævit; qui tum in vita S. Remigii c. 19. tum in Opusculo 33. c. 16. & Opusc. 44. c. 11. summa impudentia, aut credulitate, Hormisdæ Papæ Epistolam insuper subnectit, per quam is Remigio committit vires suas, per omne Regnum, dilecti Et spiritualis filii sui Ludovici &c. At Chiffletius, ex temporis ratione, sagaciter jam animadvertit, falsam & commentitiam Hormisdæ Epistolam esse, cumque vires suas Remigio committere non potuisse, quia vivo Clodoveo Pontificatum non inivit. Obiit Clodoveus A. 511. triennio citius, quam Hormisdas A. 514. in locum Symmachii Papa electus est, ut Baronius, Ciaconius, & Papebrochius in conatu chronico, ad catalogum Pontificum pag. 69. testantur. Immo Sirmondus, laudatam Hormisdæ epistolam, quia similis ejusdem Papæ ad Joan-

Joannem Tarraconensem Episcopum extat, tomis Conciliorum intexere recusavit, frustra ringente Marloto, lib. II. Metrop. Rem. c. 9. Verior ergo ratio, quare unctionis munere fungatur Remensis Archi-Episcopus, hæc erit, quia is, tot inter Primates & Metropolitans Regni Francici, inde usque a temporibus Caroli Magni, Primas est Belgicæ secundæ, ex Hadriani I. privilegio, Tilpino Remensi Archi-Episcopo dato, apud Frodoardum lib. II. c. 17. & I. III. c. 10. ubi Hincmarus in epistola ad Leonem IV. Papam: *Remorum, inquit, Episcopus Primas inter Primates semper & unus, de primis Galliæ Primatibus, extitit, nec alium se potiozem, præter Apostolicum Præsulem, habuit.* Inde etiam facile intelligemus, quid sit, quod olim Gervasius, Remensis Archiepiscopus, Philippum Regem *elegisse*, dicitur; & cur in recentioribus actis coronationis Henrici IV. & Ludovici XIII. eadem formula reperiat. Etiam in oratione de consecratione Regis ita habeatur: *super hunc famulum tuum, quem supplici devotione in regnum Francorum pariter eligimus, benedictionum tuarum dona multiplica.* Hotmano, Lehmanno, Coccejo, aliisque multis adeo fraudi fuit hæc vox, ut regnum Carolingorum pro electio habuerint. Conringius, Schilterus & Kulpisius pro mixto certarunt; sed vel unus Gregorius Papa, in homilia decima ad Evangelia, adversus hos sufficit, testatus: *In Persarum Francorumque terra Reges ex genere prodire.* Verissima etiam est annotatio Viri Cl. Stephani Baluzii, in notis ad Capitul. Franc. pag. 1082. istum populi consensum, quem duo Episcopi requisiverunt, quive per primum subjectorum fuit explicatus, non esse accipiendum, de vera electione, sed de subjectione, obedientia & fide, quam populus Regi pollicetur. Forfan quoque umbra pristini juris in formula ista latet; secundum quod successio Regum primæ stirpis, aliquatenus a populi potestate pependit, neque enim in monachorum tantum, & rudium ejus ævi scriptorum chronicis, sed in Capitularibus ipsis *populi electio* celebratur, tom. 1. pag. 573.

Bodini iudicium hoc est: *Quod autem Remorum Pontifices sibi tribuerent Regum creationem, perabsurdum est, nisi fortasse, unctionem sacram pro creatione dici putent. Ac ne id quidem Pontificis Remorum proprium erat, cum Ludovicus Crassus Aureliis a Senonum Pontifice inunctus fuerit, dict. lib. VI. de Rep. c. 5.*

§. VII.

Non me fugit, Ludovicum Crassum Aureliis, Ludovicum Transmarinum Lauduni inunctos fuisse; Nec enim Remis inungi, ita necessarium & immutabile fuit, ut Ferias Latinas, non nisi in monte Albano, nec sacra Judæorum nisi Hierosolymis celebrare, fas erat. Aurelianus tamen sacris intercessit Remorum Archi-Episcopus, asserens Regiæ unctionis jus ad Remigii successores pertinere, bullatis Victoris II. Regumque Galliæ tabulis firmatum. Proinde Principali diplomate, ne illud fraudi Remensibus foret, tunc exceptum fuit. Alter autem Ludovicus, non ab Ansegiso Senonensi, ut plerique scribunt, sed ab Artaldo, Remensium Archi-Episcopo, Lauduni consecratus est, auctore Frodoardo, teste æquali & oculato *tom. 2. fol. 99.* qui etiam rationes inaugurationis, extra Remos facit, reddit. Pippinum apud Sueffionasunctum esse, supra diximus. Eo mortuo, Carolus Noviomi, Carolomannus apud Sueffionas Ludovicus ignavus ultimus Carolidum, vivente patre Lothario, Compendii est coronatus, ut Mabillon. *supplem. de re diplom. c. 10.* ostendit. Quinimo Ivo Carnotensis Epistola 70. pluribus exemplis, Remensibus dubiam fecit hanc prærogativam, alibi tamen fatetur: *Sanctam Remorum sedem diadema Regis habere, & omnibus pene Gallicanis Ecclesiis exemplum ruinæ, vel resurrectionis existere, epist. 116.* Proinde si nullum aderat impedimentum, illustrius visum fuit, ævo posteriore, consuetudinem gentium sequi, & a Provinciæ suæ Primatè inungi: sicut Reges Bohemiæ a Pragensi; Poloniæ a Gnesnensi; Hispaniæ a Toletano, Sueciæ ab Upsalensi Archi-Episcopo coronantur. Maxime, quia Remorum

op.

oppidani, sumtibus suggerendis obstricti fuerunt; quemadmodum ex Antiquo Arresto Curiae Francicae, & Senatus consultis, Renatus Choppinus lib. III. de dominio Franciae tit. 8. observavit. Hic ergo, post natam & firmatam de coelesti oleo fabulam, Virgilii verbis lib. VII. Aeneid. 173. quibus ad Capitolium alludit dicere liceat:

Hic sceptrā accipere, & primos attollere fasces,

Regibus omen erat: hoc illis curia templum.

Illud singulare est, quod Henricus IV. non oleo sacro Remensi, sed ex Ampulla Martini, Carnuti unctus fuit, A. 1594. Quum enim, propter vim hostium, nec Remis coronari, nec sacra Ampulla potiri posset, S. Martini ampulla, longa oblivione sepulta, ex monasterio Marmonsteriensi petebatur, cujus oleum haud minorem eius sanctitatem, quam ceteris Remense, conciliavit. Fabulantur autem Martinum, secundum Francorum Apostolum, quum per confragosos scalae gradus decedens, multis vulneribus esset faucius, ab Angelo perunctum statim convaluisse, quodque olei reliquum erat, in hanc Ampullam condidisse. Ita Sulpitius Severus, Fortunatus & Paulinus, in vita S. Martini, quorum verba attulit Theodorus Gothofredus, in append. Cærimonialis Francici pag. 705. In hujus autem unctionis memoriam, januae, qua clauditur Ampullae repositorium, in Choro Ecclesiae Marmonsteriensis, hi versus inscripti leguntur:

Angelus Ampullae Martini faucia membra

Unxit: id Henricus maximus omen habet.

Quamvis ergo Archiepiscopo Remensi jus ungendi competat, ex his tamen liquere arbitror, pro Regum arbitrio, rebus ita suadentibus, alibi & ab alio consecrationem celebratam fuisse. Pariter ac Imperator Romano Germanicus ex praescripto Aureae Bullae tit. 28. §. 5. coronari debet Aquisgrani, ubi sedes & Thronus Regalis antiquus: & tamen multi Imperatores Moguntiae, Francofurti & Ratisbonae inaugurati fuerunt, quos Cl. Struvius collegit *syntagm. jur. publ. c. VII. §. 24.* In Anglia Guillelmus I. Conquer-

stor

stor ab Ealdero, Archi-Episcopo Eboracensi apud Westmonasterium unctus est; quia Stigandus Cantuariensis multorum criminum tunc temporis arguebatur, auctore Eadmero *Histor. Novorum lib. 1.* Summa denique providentia lib. 2. legum Suecicarum c. 7. cautum est: *quavis Rex Upsalæ soleat coronari, alibi tamen, si necessitas urgeat, posse.*

§. VIII.

Sed quia præcipuum munus Parium Franciæ in eo versatur, ut sacre Regis inaugurationi intersint, suoque officio fungantur, haud intempestivum foret, de eorum origine, nomine, & numero pauca quædam adjicere, nisi Budaus, Fauchetus, Tilletius, Favinus, Pithæus, Duchenius, alique multi de iis copiose scripsissent. Robertus Guaguinus & Paulus Æmilius a Pippino vel Carolo M. eos institutos ajunt; sed *υπερβολικως*. Nullus enim illius ævi eorum meminit, verum sub Capetianis demum Regibus, & primi quidem numero indefinito lecti fuerunt. Ludovicus Sanctus duodecim esse voluit, sex Ecclesiasticos, totidemque Laicos; pari Ducum & Comitum numero in utraque classe constituto. Matthæus Parisiensis ad A. 1257. duodecimvirosum illorum. catalogum, sed ordine præpostero, memoravit. Omnes autem, ratione hominii ac tenuræ, sibi pares erant & æquales; unde a paritate conditionis, non a Patriciatus dignitate, eos nomen tulisse Cangius in Gloss. v. *Par* cum Hotmano in Franco-Gallia c. 17. recte contendit. Vetusti Ecclesiastici fuerunt, Remensis Archi-Episcopus & Dux; Laudunensis Episcopus & Dux; Lingonensis Episcopus & Dux; Bellovacensis, Cathalaunensis & Noviomensis Episcopi ac Comites. Laici Parcs, Burgundiæ, Normaniæ & Aquitaniæ Duces tres; ternique Flandriæ, Tholosæ & Campaniæ Comites. Hos inter cum in Sacris Remensibus, de prærogativa honoris contentio esset enata, ordo sessionis ex die instituti seu erecti cujusque Patriciatus constitutus est; qua de re singulari capite Rupanus lib. 7. *des Parlements* c. 10. Cur vero

vero Remensis Archi-Episcopus omnium Parium sit primus, Marlot. *lib. III. Metropol. Rem. hist. c. 25.* excusit. Ex ritu majorum Regale paludamentum Bellovacorum Episcopus præferebat; Noviodunensis cingulum; annulum Cathalaunensis; Laudunensis simpulum Rhemenſe; Lingonenſis ſceptrum. At Laicorum Decanus, Burgundus Auguſtum diadema geſtabat; Normanus vexillum; Aquitanus alterum vexillum quadratum; Tholoſas calcaria; Flander enſem; Campanus ſignum militare, ut Renatus Choppinus de domanio Franciæ *lib. III. tit. 8.* & plenius Marlotus *lib. IV. metrop. c. 18.* docuerunt. In hac autem Ludovici XV. inauguratione, Princeps de Turenne, Camerarius Regis ſupremus, ocreas holosericas, violaceo colore nitentes; Dux Aurelianenſis, Burgundi locum tenens, calcaria aurea aptavit. Marechalli d'Éſtrées, de Teſſé, & d'Huxelles Coronam Caroli M. Sceptrum & Manum juſtitiae portarunt. Marechallus & Dux de Villars, quia Conneſtablii, id eſt Comitis ſtabuli, ſeu Magiſtri Equitum officio functus, gladium Caroli Magni tenuit, in coronatione & feſto regali. Dux Aurelianenſis Burgundum repræſentavit, Dux Carnutenſis Normanum, Dux Borbonius Aquitanum. Comes Caroleſinus Tholoſani Vicarium egit, Flandri Clermontanus, Princeps Contyacenſis Campani. Illi Ducum, hi Comitum coronis redimiti, una cum Paribus Eccleſiaſticis mitratibus, Regiæ coronæ manus admoverunt, dum conſecrator Archi-Epiſcopus ſolemne formulam *Coronet te Deus corona gloriæ* &c. pronuntiavit. Liliſculptorum ac ſculturæ pictorum in corona, veſte, aliſque plena audivimus omnia; quia ſcutum liliatum, cum Auriflamma & Vaſculo Remenſi, vulgo inter tria regni pignora, cælo demiffa, reſertur. Sed in ſigillis Regum Francorum nulla unquam lilia, ante Philippum, conſpiciuntur; & adhuc ſub judice lis eſt, quænam vetuſtioribus temporibus Regni ſymbola fuerint; num tres buſones; an tres Lunulæ creſcentis faciès; an totidem irides; an vero diademata; quæ Cujacii

opinio fuit ad lib. XV. Respons. Papiniani, ad l. 13. ad L. Corn. de Falsis : *Domus Franciæ mutavit sæpius digmata. Primum enim habuit tres coronas, non bufones : deinde lilia innumera, & postremo, ex constitutione Caroli VI. lilia tantum tria.* Johannes Jacobus Chiffletius in Anastasi Childerici c. 12 apes aureas Childerici in lilia post mutatas esse contendit; ejus filius Petrus Franciscus horum originem, a trifido Dagoberti sceptrō, arcessit, in dissertatione quam Bedæ & Predegarii Concordiæ subjunxit. Sed omnia rerum initia tenebras habent, & bene Symmachus lib. IX. ep. 99. *Quod sola conjectura nititur, neque ex historia constat, non valet ad persuadendum.* Johannes autem Ferrandus in *Epimic. pro liliis*, ad anilem fabulam, a prudentioribus Gallis diu rejectam, velut ad sacram anchoram, iterum confugit, cujus vel imani plebis faciem, maxime vero hominem sapientiam professum, pudere debebat, judicio Davidis Blondelli *Geneal. Franc. tom. 1. 45.* Non minus commentitium est, Aurisflammam Clodoveo Regi e cælo missam fuisse. Erat enim vexillum S. Dionysii, Francorum tutelaris, ignei splendoris, e panno rubro serico, auratæ hastæ appenso. Cœnobitæ pacis tempore hoc in æde Martyris asservabant, ad statas solennesque pro Regis & regni felicitate supplicationes obcundas: belli autem necessitate ingruente, Advocato suo porrigebant, qui illud, tanquam Ecclesiæ signifer, in præliis circumferret. Robertus, Hugonis Capeti Filius, primum in bellis Aurisflamma usus est, atque hujus superstitionis imitatores habuit varios; donec Philippus Pulcher in Pabulano prælio ejus jacturam fecit, si Jacobo Meyero fides in Annal. Flandr. lib. X. Plene Chiffletius in Lumin. Sal. IV. fac. 2. de Flammulo hoc, sed latissime Cangius Dissertat. 18. ad Joinvillam, & Augustinus Gallandus, Parisiensis quondam Advocatus, in tractatu singulari de Aurisflamma.

§. IX.

Cærimonias unctionis & coronationis prolixè enarravit Nico-

Nicolaus Thuanus, Episcopus Carnutensis, in descriptione coronationis Henrici IV. quam Theodorus Gorhofredus in libro *le Cereimonial de France* pag. 601. cum aliis id genus edidit. Easdem exhibet Rituale, seu Ordo ad consecrandum & coronandum Regem Franciæ, editum a Laurentio Bochetto, Jæto Gallico, in *Decret. Eccles. Gallie lib. 5. tit. 2.* & emendatus a Johanne Seldeno de *tit. hon. p. 1. c. 8. pag. 236.* Formulas breviores, quibus Karolus Calvus Metis, & filius ejus Ludovicus, in Compendio palatio, consecrati sunt, Stephanus Baluzius capitularibus Regum Francorum inseruit *tom. 2. pag. 302.* Juvabit ex his discrimina quædam unctionis prisclæ & hodiernæ investigasse. Et primum quidem ex illis discimus, olim benedictiones a diversis Episcopis pronunciatas esse, quas nunc unus Archiepiscopus Remensis pronuntiavit. Deinde Hincmarus Archiepiscopus Karolum Calvum, ad ista verba *Coronet te Dominus*, inunxisse dicitur, *de chrismate ad dextram auriculam, usque ad sinistram auriculam, & in capite*: Hodier-nus vero Rex unctus est chrismate cœlesti, acu aurea ex Ampulla desumpto, & sacro chrismati immixto, novies: primum in vertice, deinde in pectore, tertio inter scapulas, tum in scapulis ipsis, postea in utriusque brachii internodiis, ac postremo in palma dextræ & sinistræ. Deinceps in laudatis Capp. palma & sceptrum Karolo Calvo oblata traduntur. Noster autem Ludovicus non palmæ rami, sed palmam manum accepit, id est scipionem inauratum, mensura unius cubiti, cui eburnea expansæ manus effigies, in summo infixæ est. Moris ejus initia forsan ab Hugonis Capeti temporibus repeti debent; qui in summo sceptri vertice gestavit manum, ut ex sigillo ejus apparet; Robertus florem lilii adjecit. Eorum successores dextra baculum, sinistra Manum justitiæ præferunt in sigillis: Carolus VI. primus sceptrum cum manu introduxit. Vid. Mabillon *lib. II. de re dipl. c. 17.* *Justitia* igitur *manum* hodie vocari, palmæ virgam, quæ olim in *victoria* appreciationem porrigebatur, Ja-

cobus Sirmondus in notis ad *dist. capit. pag. 816.* & Frenius in voce *palma* voluerunt. Gladio præterea accinctus est Rex, ab Archi-Episcopo, quem mox erectum & nudum tenuit; quia ensis proprium symbolum est regni colati, auctore Ottone Frisingensi de *Reb. gest. Fred. c. 5.* & Gunthero lib. 1. *Ligur. v. 551.*

*Hic autem gladio regnum suscepit ab ipso;
(Hunc etenim longo servatum tempore movent
Curia nostra tenet) posito diademate Petrus.
Regali dextra tulit alti Principis enssem,
Præcessitque sacram brevius diadema coronam.*

Porro dextræ Regiæ digitum minimo proximum *annulo* Archi-Episcopus exornavit, in symbolum regni desponsati: quemadmodum Episcopi cum annulo & baculo investiebantur. *Galliæ Britannique in medio digito annulis dicuntur usæ: hic nunc solus excipitur*, ait Plinius lib. XXXIII. *Hist. nat. c. 1.* De annulis signatoriis Regum Francorum multa Chifletius pater congeffit, in Anastasi; & filius in *Historia Tornutiensi.* *Hastam* propriam olim insigne regium fuisse, supra vidimus; per quam de manu in manum regni traditio fiebat: sed ea mature, saltem Caroli M. ævo, in sceptrum fuit conversa; nam Johannes Papa VIII. inter alia, sceptrum & baculum aureum ei transmisit; ut est in *Annalib. Bertin. tom. 3. Chen. pag. 244.* Ipse *Sceptrum nostrum, quod pro significatione regiminis nostri, aureum ferre solemus*, aiebat apud Monachum Sangallensem lib. I. *de gestis Caroli cap. 19.* Pro circulis capita Carolidarum aureæ coronæ, vel ferta gemmea, exemplo Imperatorum, vel laurea diademata ornabant; at Capitianorum coronas in lilia oblonga desinere, Mabillon probat lib. 2. *de Re diplom. c. 17. §. 13. & 2.* Franciscus I. clausam sibi primus arrogavit coronam, num æmulatione Caroli V, an imitatione Regum Angliæ, an vero ut a Ducibus & Comitibus distingueretur, qui coronati in nummis illius ævi, disquirat eruditus Frené *diff. 24. ad Joinvillam pag. 299.* Denique sicut populus Fran-

co-

corum olim interrogatus, an hunc Regem regnare velit ? uno ore proclamabat *laudamus, volumus, fiat* : & obsequium deinde sacramento fidelitatis promittebat ; ita vicissim Reges, quia non suam modo, sed & populi utilitatem primario curare debent, cum regnum inibant, profitebantur, se unumquemque pro suo gradu, suaeque dignitate, ac persona, quantum possint, honoraturos, defensores, ac suum cuique jus servaturos, ut ex Gregorio Turonensi discimus *lib. IX. hist. c. 30.* & pactio Confluentana declarat apud Baluzium *tom. 2. capit. pag. 141.* & acta Remensis bibliothecae antiquissima illustrant apud Bodinum *lib. VI. de Republ. c. 5.* Formula jurisjurandi ab Henrico IV. praestiti apud Theodorum Godofredum *pag. 629.* talis refertur : *Hæc populo Christiano & mihi subdito, in Christi promitto nomine. Inprimis, ut Ecclesiae Dei omnis populus Christianus veram pacem nostro arbitrio in omni tempore servet. Item, ut omnes rapacitates, & omnes iniquitates omnibus gradibus interdiciam. Item, ut in omnibus judiciis aequitatem & misericordiam praecipiam, ut mihi & vobis indulgeat suam misericordiam clemens & misericors Deus. Item, de terra mea ac jurisdictione mihi subdita, universos haereticos, ab Ecclesia denotatos, pro viribus bona fide exterminare studebo. Hæc omnia supradicta firmo juramento. Sic me Deus adjuvet, & hæc sancta Dei Evangelia.* Quam vetustum institutum sit, inde ab Hincmari usque temporibus, ut Reges Gallorum in coronatione sua Episcopis polliceantur tuitionem jurium Ecclesiae, quodque ejus formula non sacramentum, sed *perdonatio* dicta fuerit, Illustrissimus Vir, Petrus de Marca docuit de concordia Sacerdotii & Imperii *lib. IV. c. 9. §. 6.* Atque hæc quidem, missis minutioribus, de vestitu albo, chirothecis, throno, emissionem avium, nummis missilibus, instructione convivii, aliisque conciliandae venerationi paratis, tangere volui ; quo acta novissimae inaugurationis aliqualem lucem ex iis mutarentur. In iis enim Ludovicus XV. recto capite & sedens fertur, tutelam Ecclesiis omnibus regni promississ.

Deinde Laodunensis & Belluacensis Pontifices, paululum e folio sedentem crexerunt, & conversi ad populum regalemque comitatum omnium assensum, dicis causa rogarunt: postremo quatuor a Rege sacramenta præstita: regni, Ordinis Spiritus S. Ordinis S. Ludovici, & de servando Edicto adversus duella. Henrici IV. & Ludovici XIII., edicta vide apud Thuanum *l.* 129. ejusque continuat. *l.* 2. & 6. De fati prohibita monomachia apud Gallos Bodinus *lib. IV. de Rep. c.* 7. adendum est.

§. X.

Effectus unctionis regie communes, cum ecclesiasticos, tum civiles supra vidimus; sed quia Reges Gallia singulari privilegio fulgent, quod oleo cœlitus misso inungi creduntur; hinc dona Spiritus Sancti ipsis uberius vulgo infundi ajunt, cosque, velut Reges Regum terrestrium, & Christianissimos, omnibus unctis præferendos esse. Gallorum ita ratiocinantium magna est nubes, nec opus est, eorum verba referamus; quia ubivis sunt obvia, & nimia præ affectu in suum Regem. Ipse nummus, in memoriam novissimæ unctionis cusus, atque a fecialibus in populum sparsus, abunde id testatur. In ejus altera parte, circum Regis effigiem, verba hæc sculpta leguntur: LUD. XV. REX CHRISTIANISSIMUS: in adversa: REX COELESTI OLEO UNCTUS. *Remis 25. Octob. 1722.* Alios ergo, & externos maxime scriptores audiamus. Apud Græcos posteriores, tantæ dignationis visus fuit Rex Francorum, ut *Basilides Basilides* vocaretur, apud Annam Comnenam *lib. X. Alexiad. pag. 288.* solusque inter Principes Europæanos rege per excellentiam indigaretur, Suida auctore. Causam aperit Matthæus Parisiensis, Monachus Albanensis, in Anglica historia ad A. 1254. *Dominus Rex Francorum*, inquit, *qui terrestriam Rex Regum est, tum propter ejus celestem inunctionem, cum propter sui potentiam, & militiæ eminentiam, in medio sedebat.* Idem ad A. 1257. *Archi-Episcopus Remensis, qui Regem Francorum cœlesti consecrat chrismate* (qua-

(*quapropter Rex Francorum Regum censetur dignissimus*) est omnium Franciæ Parium primus, & excellentissimus. In Charta Amadei Comitis Sabaudie, apud Samuelem Guichenonium: *Le Roi de France, qui est le plus grand & le plus noble Roy des Chrestiens.* Michael etiam Surianus, Venetorum in Francia legatus, in relatione Francica A. 1562. per Auberium edita, rationes redditurus, cur Legatus Francicus, in Reipublicæ suæ aula, præcederet Hispanum, ad sacram Ampullam provocat, quæ miraculosa ab omnibus censetur, cujus liquore Reges omnes successive iunguntur. Huic rei argumento etiam sunt illustria Paparum de Francico regno iudicia, quodque Baldus scripsit, Regem Francorum supra omnes Reges esse, ad cap. 1. §. ult. de probib. feud. alien. Ex eodem simpulo Remensi Christianissimi titulus repetitur a plerisque. Instar omnium sit Chastianæus in catalogo gloriæ mundi confid. 31. Rex Franciæ, inquit, cum sit Christus, scilicet oleo sacro divinitus emissio undus & sacratus, omnibus celsior est atque major, ex quo vocatur Christianissimus. Verum enimvero licet religionis Christianæ apud Francos susceptæ antiquitas, & præclara in Ecclesiam sedemque Romanam merita, priscis Gallorum Regibus, in Conciliis, ad rem Christianam pertinentibus, prærogativam aliquam præ Hispanis, conciliare potuerint, more dudum recepto, ordinem servandum esse Nationum, ut quæque verbum Dei prius suscepit, qui Æneæ Sylvio placuit lib. 2. de Gest. Concil. Basil. Grotio epist. 722. & Pufendorfio lib. 8. de Jure nat. c. 4. §. 22. Quamvis dico, antiquus etiam titulorum ecclesiasticorum sit splendor, & Carolus Martellus, Pippini pater, Christianissimus a Gregorio III. epist. 5. vocetur; Pippini Christianissimam excellentiam laudet Stephanus III. ep. 6. & Carolus M. Christianissimus dicatur in Hadriani epist. 54. Nondum tamen id elogium hereditarium fuit Carolinis, qui gloriosi, excellentissimi, præcellentissimi, illustres passim in literis Pontificum appellantur. Pius II. in epist. 385. ad Carolum VII. Regem Christianissimi nomen illi hereditarium esse scripsit.

psit : Paulus II. demum Ludovico XI. ejusque successoribus, singulari & perpetua prærogativa, illud asseruit. Vide Mabillon *lib. II. de re diplom. c. 2. § 7. & pag. 384.* Minus profecto prudenter decora illa, titulique excellentiores sæculo decimo tertio, ex fictitia ampulla incrustari cœpere, de cujus fide ipsi cordatiores Galli ambigunt, velut Thuanus *lib. 109.* Scipio du Pleixius, Claudius Fauchetus, Dionysius Petavius alique : & Clodoveus denique vago tantum, ac omnibus Principibus orthodoxis communi titulo, *Catholicæ ecclesiæ filius*, a Patribus Concilii Aurelianensis primi appellatur. Recte Jacobus Gothofredus de jure præcedentiæ, *p. 1. c. 3. §. 25.* rituum solennia, pictoris & tectoriis similia, utpote arbitraria, sæpe etiam commentitia, inter præcedentiæ titulos non valide numerari ait, addens. *Hoc in censu, quoque colloco demerui illa, quæ cœlitus delapsa memorant, Oleum, Flammulam, Lilia. Hoc etiam numero Unctionis regie prærogativam & ritum pono---quum sane Rex Franciæ certiores alios & indubitatos habeat præcedentiæ suæ titulos.* Jacobi quoque frater, Theodorus Gothofredus, in toto libro de præcedentiâ Regum Francorum, cœlestem unctionem non tantum silentio prætermisit, sed verba quoque auctorum, qui ab illa primarium argumentum prærogativæ Francorum hauserunt, data opera suppressit, id quod Joh. Jacobus Chiffletius, in præfatione libri de ampulla Remensi, adversus Gallos urget vehementer.

§. XI.

His expositis, sequitur magnitudinem civilis potestatis, venerationem & eminentiam videamus, quam Rex felicitate, ad invidiam usque singulari, apud subjectos suos tenet, tanquam effectum sacræ & miraculosæ illius unctionis. Enimvero non multa sæcula effluxerunt, quum Galliæ status in plerisque Germaniæ similis, Regumque auctoritas pene precaria esset. At postquam Ducatus & Comitatus in Regum potestatem devenere, simulque pulsus Anglis, & emortua domo Burgundica, factiones cessarunt, Ludovicus XI.

omnia

omnia suo arbitrio agere cœpit. Verum Borboniæ gentis Reges, e malis civilibus eluctati, opibus aucti & potentia formidandi absolutum imperium ita firmarunt, ut noto Maronis dicto locus esse possit IV. Georg. 210.

- *Regem non sic Ægyptus, & ingens*

*Lydia, nec populi Parthorum, aut Medus Hydaspes
Observant.*

Causas ejus rei varias adferunt, sed quas inter non postrema est, sanctitas regii nominis, indies magis magisque per Clerum & Aulicos inculcata; unde vulgi enata persuasio, divinum quendam vigorem Regibus suis, per oleum cœleste infusum esse. Ne res aperta testium multitudine obscuretur, satis crit recitasse unius Huberti Mori verba, ex libro ejus III. de sacris unctionibus c. 9. *Quod, præter ceteros populos, Reges suos Gens Francorum semper sit venerata, illisque pene serviliter hætenus sit obsecuta, nihil aliud nos, vel majores nostros impulit, nisi quod per cœlestem unctionem, qua soli ex omnibus Regibus perunguntur, credimus, præter ceteros mundi Principes, a Deo, ad nominis sui gloriam, & Ecclesiæ suæ subsidium specialiter electos, christosque Domini veraciter effectos, quibus non simpliciter, ut Regibus, sed ut sacris Deoque dicatis personis, quidvis obsequii, honoris & reverentiæ exhibere debeamus.* Hac igitur ratione, postquam via semel patefacta, quicquid ubivis illustre vel magnificum fuit, in summam Majestatem translatum est, fecitque unguenti sacri delibutio, ut quibus ea obvenit, sacrosancti in terris habeantur. Reges, ut Patroni Ecclesiarum, jus supremum circa sacra, & ordinationes Episcoporum sibi vindicant, restricta, immo exclusa Papali auctoritate. Ex quo enim crudelissimum illud Bonifacii VIII. & Philippi Pulchri dissidium, in regni perniciem exortum est, Libertatibus suis tam strenue pugnarunt Galli, ut parum Romano Pontifici reliquum fuerit, omni potestate in clerum, cærimonias & religionem Principi suo asserita. Vid. Petrus de Marca de concord. sacerdot. & imp. lib. II. c. 3. Plane sanctius aliquid

Ccc

in

in his, quam in ceteris Regibus unctis inesse existimari, Eucharistia demonstrat, quæ sub utraque panis & vini specie Regi præbatur; id quod ex Pontificis summi legè sacerdotibus tantum competit, Vide P. Suavem *Hist. Conc. Trid. l. VI. Sleidanum comment. lib. IX. & Cormer. rer. gestar. Henr. II. lib. I. pag. 19.* Hoc etiam juris sibi reservarunt pii Reges Franciæ in quibusdam Ecclesiis, quod catalogis Canoniorum, honoris causâ, vel in tesseram juris patronatus, adscribuntur; & si quando istuc profecti, Regiis insignibus depositis & superpellicium induti, munere Ecclesiastico funguntur; sacerdotalem quasi dignitatem cum Regia Majestate conjungentes. Sic Canonici sunt Ecclesiæ S. Hilarii Pictavensis, & S. Joannis Lugdunensis; etiam in Ecclesiis Andegavensi, Cenomanensi, S. Martini Turonensi, aliisque habent præbendam, ut præter Joannem Feraldum *de jur. & priv. Regni Franc. c. 7.* refert Choppinus *de sacra Politia lib. I. tit. 4. n. 24.* Infinitum foret omnia honoris, eminentiæ & potestatis emblemata, in Ecclesiasticis & secularibus referre, quibus Rex in regno suo gaudet. Huc enim pertinet, quod nulli homagium aut fidelitatem jurat, licet forte ex successione, emtione aliove titulo feudum acquirat, ut Baluzius ostendit, in notis ad Petri de Marca *lib. II. c. 3.* Nunquam præterea funeri interfunt, auctore Thuano, *lib. 79. Histor.* quod ipsum de Regibus Hebræorum Grotius observavit *ad 2 Sam. III. v. 31.*

§. XII.

Priusquam ab effectibus unctionis cœlestis discedamus, quædam de Regum virtute sanandi strumosos dicenda sunt, sed per indicem tantum; quia Andreas Laurentius, singulari libello *de mirabili strumas sanandi vi, solis Galliæ Regibus divinitus concessa*, rem omnem, sed multa cum adulatione superstitioni mixta, persecutus est. Priscis Regibus mos fuit, die quæ coronationem sequitur, solenni peregrinatione Corbiniacum, quod in pago Laudunensi situm est, proficisci; ubi in Ecclesia S. Petri sacre Marculfi reliquiæ ser-

vantur, quem gratiæ illius curandi strumas sequestrum semper habuerunt, ac velut præsidem suspexerunt. Consuetudinem hanc a S. Ludovico ad Ludovicum Justum continua fere serie ostendit Oudardus, ejus loci Prior, in apologia pro Corbiniacensibus. Res gestas vero & miracula Sancti Marculfi, eruditissimus Mabillon recensuit, in Actis SS. ord. Benedictini; ubi & ritum quo Francorum Reges, sæculo XV. ad ejusmodi curationes se accinxerint, ex Stephani de Contio libello manuscripto, *sec. IV. parte 2. pag. 516.* memoravit. Verba Stephani sunt sequentia: *Postquam Rex audivit Missam, affertur ante eum vas aquæ plenum. Statim tunc facit orationem suam ante altare: Et postea manu dextra tangit infirmitatem, Et lavat in dicta aqua. Infirmi vero accipientes de dicta aqua, Et potantes per novem dies jejuni cum devotione, sine alia medicina omnino sanantur. Et est rei veritas, quod innumerabiles sic de dicta infirmitate fuerunt sanati, per plures Reges Franciæ. Hodiernus vero Ludovicus XV hujus rei causa Corbiniacum non adiit, sed pariter ac Ludovicus XIV. Remis, in templo Remigii, quorsum Marculfi corpus Corbiniaco translatum erat, sacras reliquias veneratus est a. d. 29. Octobris, Missamque per novenos dies continuatam ibi audivit. Dein post communionem sacram, non lotione, sed solo dextræ contactu, pronunciatis solennibus verbis: *Dieu te guerisse, le Roy te touche*, ultra duo millia ægrotorum tetigit. Morbus ille Græcis *regius*; Latinis gulæ tumor, struma sive scrophum; Gallis *Eserenelles*, & *le mal du Roy* vocatur. Hispanos, præ ceteris nationibus, eo laborare, ajunt, quia crudis & stagnantibus aquis utuntur. Unde autem potestas medicatrix Regibus obyenerit, & an eorum contactu vere sanentur strumosi, variâ sunt hominum judicia. Doctissimus Massonus precibus Marculfi gratiam illam acceptam fert: *nam illius infirmitatis sanandæ (quam regium morbum vocant) tanta ei gratia cælesti dono accessit, ut non minus ex remotis ac barbaris, quam ex vicinis nationibus, ad eum ægrotantium catervæ perpetuo confluant*, ait scriptor sæculi XII. in sermone de S. Mar-*

culso, apud Mabillon. *d. l.* Hubertus Morus & Marlotus ad coelestem inunctionem vim istam referunt. Ridicule Cardanus longo usui aromatum tribuit. Impie alii ad magicas causas, & nescio quam carminis solennis vim confugiunt. Rursus alii in saliva, alii in aere Gallico, alii in nota regiae familiae impressa, admirabilem istam virtutem latitare crediderunt: quorum opiniones Joannes Brodæus *lib. VIII. miscellan. c. 10.* & Morhofius in *dissertat. Princeps Medicus* examinarunt. Multi totam rem pro sophismate politico habent ægrosque a Medicis antea visitari, & medicamentis ad sanitatem præparari existimant. Verum quia tot Reges pios histrioniam egisse nemo credet, Becman *Notis. dign. diff. V. c. 2.* plurimum imaginationi & stupori plebis tribuendum censuit. Ad me quod attinet, malo quid alii sentiant referre, quam incertis conjecturis indulgere; harum enim pars magna in læsionem Regii nominis vergit, quod merito Tullius magnum & sanctum prædicavit. Semper gentes divini aliquid & salutaris majestati inesse crediderunt. Pyrrhi pollex lienosis medebatur, auctore Plinio *lib. VII. c. 2.* Vespasianum oris excremento visum restituisse cuidam Alexandrino, multi, sublato etiam mendacii pretio, memorarunt, apud Tacitum *lib. IV. Hist. c. 81.* Mulier & vir quidam, in somnio admoniti, ut contingerent Hadrianum Imperatorem, oculos recepisse feruntur; *quamvis Marius Maximus hæc per simulationem facta commemoravit*, ait Spartianus in Adriano c. 25. Huc pertinet, quod de S. Edwardo Anglorum Rege & Confessore, tradit Willelmus Malmesburienfis *lib. II. de gestis Regum Anglorum*, adolescentulam quandam feminam sterilem, luxuriantibus circa collum humoribus, turpem valetudinem contraxisse, glandulis protuberantibus horrendam. Hanc in somnis admonitam, ut collum a Rege ablueretur, cœlitus ea re præstita, convalescere. Multoties, addit, *eum in Normannia hanc pestem sedasse ferunt, qui interius vitam ejus noverunt. Unde in nostro tempore quidam falsam insumunt operam, qui asseverant, istius mor-*

morbi curationem, non ex sanctitate, sed ex regalis prosapia hereditate fluxisse.

§. XIII.

Corollarii loco, pauca quædam de tutela impuberum Regum Galliæ, eorumque legitima ætate adjicienda sunt; quia hoc ætas imperfecta Ludovici XV. cum maxime postulare videtur. Nemo autem ambigit, naturali rationi conveniens esse, ut Reges impuberes pariter, ac privati, alterius tutela regantur. Ac primum quidem hic obtinet, quod Paulus dicebat, in *l. 36. D. de Excusat. tut.* solere parentes amicissimos & fidelissimos tutores liberis eligere; ideoque Rex declarare potest, ad quem tutela successuri infantis pertinere debeat; quemadmodum Carolus Sapiens de tutela testamento disposuit, cujus judicium Proceres approbaverunt, teste P. Æmilio in Carolo V. & Carolo VI. Etiam Ludovicus XIII. administrationem regni in sex consiliarios divisit, quibus, præter Aurelianensem Ducem, Mazarinus præsidere, teste Vittorio Siri *t. 3. l. 2.* Quod si nullus testamento tutor datus fuerit, tutela legitima succedet. Inter propinquos nemo propius pupillum contingit matre, ideoque hanc aut aviam ceteris præferendam esse; & naturalis potestas & tenerrimus affectus jubent: præsertim quia matri, a morte vel a diminutione filii, minimum hic accedit emolumentum. Exempla innumera sunt: Brunichildis primum Childeberty filii, & post hujus mortem, nepotum tutrix fuit, in Austria & Burgundia; Ludovicus VII. Adelam uxorem, Ludovicus VIII. Blancam, Philippus IV. Janam, Ludovicus XII. Annam conjugem liberis tutricem & regni procuratricem constituit. Verum quemadmodum Majores domus tutores Regum, juxta matres, olim haberi cœperant; ita postea aliquis agnatorum, aut Magnatum, plerumque matri adjunctus fuit, qui rebus pro imperio moderaretur. Nam *feminarum ut successionem, lege regni nescis Gallia, sic imperium & administrationem semper familiarem experta est.* scribit Thuanus lib. 1. Desinit tutela, si

Ccc 3

Rex

Rex ipse sufficit regno administrando; id quod antea quidem ex probabilibus conjecturis aestimandum erat; quoniam distinctio tutelæ a cura, & anni, quibus utraque jure Romano finitur, non sunt ex jure gentium, neque usum habent aliarum rerumpublicarum institutis. Veruntamen quia lubrica ista ætatis dijudicatio odiis ferendis occasionem subministrabat, & gravis ea de re disputatio plus semel inter Reginam matrem & Principes sanguinis agitata erat; ideo Carolus V. Galliarum Rex sapientissimus A. 1374. pragmatica sanctione cavet, ut, quandocunque in Galliarum regno successor quantum decimum annum attigisset, pro majorene, & tali quidem haberetur, qui regni administrationem gerere possit. Paternam hanc sanctionem Carolus VI. A. 1392. maxima Procerum frequentia, non modo confirmavit, sed & A. 1407. eam ita correxit, ut primogenitus, licet minor sit quatuordecim annorum, quacunque ætate coronari & sacrari possit, regni administratione interim matri vel tutoribus commissa. Vid. Choppin *de dominio Gallico lib. III. tit. 5. Limn. notit. Regni Francie l. 1. c. 8. lit. mn. 100.* & Hert. *de tutela Regia sect. 2. §. 4.* ubi Hispaniarum & Lusitaniarum Reges Caroli V. exemplum secutos tradit. Eadem Caroli lege Rectoribus regni, quos *Regentes* vocant, modus impositus est, ut ne in posterum eorum manu ac sigillo, leges, edicta jussuque sancirentur, sed Regium nomen & sigillum omnibus mandatis apponeretur. Qua de re judicium Bodini extat *lib. 1. de Rep. c. 8.* De malis regni tutorii multa dici possent, sed cui bono? Gallia sub Carolo VI. Lernam eorum experta est, & vere Ecclesiastes c. x. v. 16. *Va tibi terra, cujus Rex puer est!*

T A N T U. M!

DIS.



DISSERTATIO OCTAVA,
DE
USUCAPIONE
SERVITUTUM,

*Ad L. IV. §. 29. D. de Usurpationibus
& Usucapionibus.*



Uod de Saturno fabulosa finxit Anti-
quitas, hominem canum dextra serpen-
tis imaginem portasse, sinistra vero fi-
lium parvulum ad os applicuisse, cum-
que devorasse: id quidem Christiani ad
Satorem nostrum Adamum referimus,
qui astutia serpentis deceptus, comesto
malo, se una cum posteris absumpsit,
Orcique faucibus objecit. Gentiles vero Saturnum suum
temporis auctorem esse voluerunt, quia cursum & con-
versionem spatiorum dimetiri, suae edacitate res produ-
ctas mox iterum devorare videbatur. Unde falx & alæ,
in nummis & marmoribus, ipsi tribuuntur, & Lactantius
lib. 1. c. 12. scribit, eum, usitatissima omnium appellatione *χρόνος*, quasi *χρόνος*, dici. Per se quidem tempus tantum
quantitas durationis est, nullamque, ex suapte natura, vim
effe-

effëctricem habet; quapropter jus Civile illud inter modòs finiendæ obligationis non numeravit *l. 44. §. 1. D. de O. & A.* Veruntamen, quia nihil non in tempore fit, tempusque longum vim moralem habet, ad legis favorem conciliandum, hinc merito *χρονος* initii & finis rerum omnium habetur metator, in quo volvitur & revolvitur mundus:

Omnia tempus alit, tempus rapit, usus in arëto est.

Cernitur hoc in rebus innumeris, sed maxime in juribus & actionibus civilibus, quæ ut hominum instar certo temporis spatio nasci & vivere dicuntur; sic etiam decem, viginti vel triginta annis intereunt & moriuntur. Mirabilem hanc virtutem Lex XII. Tabularum Usucapioni, Principum vero constitutiones Præscriptioni tribuerunt, ut suffragio temporis omnem e medio tollerent materiam litium, ac longa die firmam stabilemque possessionem redderent. Inde ista *bono publico introducta* dicitur Cajo: *Finis sollicitudinis & periculi litium* Ciceroni, *Patrona generis humani* Cassiodoro appellatur. Per hanc vero Valentinianus III. gloriatur, se profunda quiete humano generi prospexisse, ne jurgia, quæ avi & proavi nesciverunt, excitentur. Utriusque potestate res ipsæ varie permutant dominos, & rerum onera, sive servitutes, certo temporis lapsu nunc constituuntur, nunc, pristina libertate restituta, iterum extinguuntur. Pauli caput hanc in rem memorabile est, in *l. IV. §. 29. D. de Usurpationibus & usucapionibus*, cujus verba, ut Dissertationis hujus fundum, adscribo. Sunt autem ista: *Libertatem servitutium usucapi posse, verius est: quia eam usucapionem. sustulit lex Scribonia, quæ servitutem constituebat; non etiam eam, quæ libertatem præstat, sublata servitute. Itaque si cum tibi servitutem deberem, ne mihi (puta) liceret alius edificare, & per statutum tempus alius edificatum habuero, sublata erit servitus.* De auctore hujus legis Paulo, ut multis disseramus, nihil necessum erit. Cui enim non dictus ille Prudentum Coryphæus? τῶν Νομικῶν Κορυφαίος, ut cum, cum Scævola & Ulpiano, nuncupat Modestinus, in

in l. 13. §. 2. D. de Excusationibus: quem & Viri prudentissimi elogio exornat Gordianus Imperator, in l. 6. C. de Nuptus Libros in Jure civili tam multos scripsit, ut facile eo in genere omnibus palmam præripuisse videatur. Ex eorum numero præcipui sunt octoginta libri ad Prætoris Edictum, quorum laciniæ, velut pretiosæ ex naufragio tabulæ, passim in Pandectis occurrunt. Et Textus quidem noster, ut rubrica indicat, ex libro ejus 54. ad Edictum desumptus est: qui totus de possessionibus & usucapionibus conceptus fuit; sicut ex l. 1. & 3. D. de Acquirenda vel omitt. poss. l. 2. præ emptore l. penult. ad L. Juliam Reperund. sed maxime ex l. 2. D. de Usurpationibus & usucap. appareret: ubi cum de usurpatione tractasset, recte sub initium l. nostræ 4. insert. Sequitur de usucapione dicere. Dixit autem primo de personis, quæ usucapere possunt vel non; deinde de rebus; tum de tempore, & denique de actionibus. In tractatu de rebus, quæ usucapionem recipiunt, postremum locum dedit spinoso atque difficili argumento, de servitutum acquisitione & amissione: definit enim nulla usucapione eas constitui; libertatem verò servitutis usucapi posse. Vel clarius; usucapi servitutes, non ut constituantur, sed ut perimantur. Textus profecto est singularis, & meliore lapillo signandus. Solus ille sepultam legis Scriboniæ memoriam nobis conservavit, sed & variam Jurisconsultorum ingenii fixit crucem: ideoque dignus, qui cum cura explicetur. Ad verum ejus intellectum hoc ordine pervenire tentabimus; ut primo de Usucapione libertatis: mox, occasione L. Scriboniæ, de præscriptione servitutum dicamus. Ipsa materiæ jucunditas, & ambitus late diffusus, & usus forensis Lectoris attentionem provocabunt. Nec enim verum est, res non magni momenti servitutes prædiorum a juris auctoribus habitas esse, cum nullus in jure civili locus, majori cura & studio, ab eisdem tractatus reperitur, & constet ex Cicronis lib. 1. de Orat. causas, in quibus hæc prædiorum jura versarentur, olim Centumvires, & inter

gravissimas numerari solitas fuisse, scribit Duarenus ad l. 10. D. Si serv. vind.

CAPUT I.

DE

USUCAPIONE LIBERTATIS.

§. I. Servitus rerum & hominum qui differant. Illius origo & fontes examinantur. II. Quid sit libertas servitutum: Fundus liber & servus. III. Usucapio libertatis explicatur & defenditur. IV. Phrasis verius est non solum rem notat controversam, sed & ad justitiam & aequitatem hic referenda. V. Requiritur ad hanc Usucapionem, ut nemo servitute sit usus. VI. Olim per spatium biennii; deinde longi temporis. VII. Rem porro usucapiens, tanquam liberam, possedisse debet bona fide. An tempora conjungantur disquisitum: Cajacii, Harmenopuli & aliorum conciliatio rejecta. VIII. Actus denique servituti contrarius suscipiendus, sed immobilis. IX. Motus arboris apud Pomponium, in l. 7. D. d. S. P. V. explicatur. X. Minus requiritur ad amissionem, qua sit non utendo, quam ad Usucap. lib. L. 4, §. 27. D. de Usurpat. explicatur. XI. In quibus servitutibus Usucapio lib. necessaria sit, fluctuant Doctores; Communis sententia proponitur. XII. Eadem rejicitur, adductis exemplis rusticarum servitutum, in quibus obsineat, vel non. XIII. Distinctio inter servitutes affirmativas & negativas proponitur, & exemplo servitutis altius non tollendi illustratur. XIV. Justiniani novissimo jure haec Usucapio non est sublata. XV. Maribus obtinet, etiam in juribus aliis.

§. I.

A It Paulus: Libertatem Servitutium usucapi posse, verius est. Servitutis vocabulum generaliter sumtum, & reales & personales comprehendit; hoc autem loco reales tantum, seu praediales, in quibus res rei servit, designantur, pariter ac in rubrica tituli de Servitutibus & Ser-

Servitute legata. Neque enim de usucapione libertatis servitutum personalium, adeo laborandum videbatur; quia temporariae sunt, & cum anima extinguuntur: ut vero onus praedialium sua natura perpetuum esset, utilitatis publicae ratio effecit *l. 20. §. 2. d. S. P. R.* Dein longe alio significatu vox *servitutis* hic accipitur, quam servitus hominum alieno juri subditorum. Nam in hac servit homo, in nostra res servit rei: illa ad statum, haec ad utilitatem pertinet: ibi servus domino suo, hic res non domino officia praestare tenetur. Quemadmodum vero homo natura liber, constitutione juris gentium vel civilis, alteri fit obnoxius; sic varie accidit, ut libertas aedium vel fundorum coarctetur, & alteri jus in rebus nostris constituatur, ejus vi aliquid pati vel non facere in iis cogamur, quod libere alias liceret. In universum Paulus tria commemorat, per quae unus locus serviat alteri: naturam loci, conventionem partium, & denique vetustatem, quae, litium minuendarum causa, pro lege habetur. *l. 2. pr. D. de Aq. & aq. pluv. arc.* Quibus addi potest lex in *l. 10. & 12. D. de Relig. l. fin. §. 1. C. de Servit.* & adjudicatio judicis, in judiciis divisiis *l. 22. §. 3. Fam. etc.* Primo conditio loci hujusmodi onera quandoque introducit, nam ager inferior, natura superiori servit, & aquam profluentem excipit, ut Ulpianus in *l. 1. §. fin. D. de Aqua & aq. pluv. arc.* eleganter explicavit. A quo diversum quidem sentit Hugo Grotius in *appendice Epist. 5.* contendens naturali ratione, non rei magis, quam hominis servitutem esse; praesertim cum aqua sponte sua defluat, non immittatur; & dominus praedii superioris aquam in praedio suo retinere, inferiori eam opere facto excludere possit. Sed ipse Ulpianus *quasi servitutem* appellando anomaliam agnoscit, & Hertius ejus causam, mascule suscepit, in dissertatione *de servitute naturaliter constituta prolegom. §. 5.* Ceterae sane rei servitutes non naturales, facto hominum introducuntur, contra nativam libertatem: nam quia saepius contingit, ut sine nostro, vel

non magno incommodo aliorum utilitatem promovere, aut damnum ab iis, aliquid non faciendo, avertere possimus; ideo urbanis exceptis, quas magnam partem luxur perperit, regulæ humanitatis, amicitiae, commoditatis, necessitatis & vicinitatis postularunt, ut agros aliorum alii quandoque delibarent, & utilitatem ex iis consequerentur. *Servire* enim Latinis utilitatem præstare significat, & servitus proprie est juris nostri imminutio, alterius augmentum, l. 5 §. 9. *D. de Operis novi nunciis*. Unde respectu domini est onus, alterius respectu, in cujus gratiam comparata, Jus & facultas merito vocatur.

§. II.

Ab hoc incommodo & molestia si ædes & prædia liberantur, ut uni domino libere & ultro quasi præstent omnia, tum *libertas servitutium* enasci dicitur. Quemadmodum enim aliam vidimus, hominum esse servitutem, aliam rerum; sic etiam libertas alia personarum est, alia rerum. Illa res inæstimabilis est, hæc vero æstimationem recipit l. 12. *D. de Pignor.* & hyp. l. 106. *de Reg. jur.* At sicut homo tum demum liber est, cum potestatem habet vivendi, ut velit, & aves feræque libertatem recepisse intelliguntur, quando in suam naturalem laxitatem redierunt; sic sublato jure alterius in fundo nostro, naturalis facultas utendi, ut lubet, reviviscit, & dominus jure libertatis, singulis concessit, quidvis in suo facere potest. Libertas ergo servitutium est immunitas a servitutibus: ut fundus dicitur liber, qui nulli servit, qui nullam servitutem debet. *Ædes libera esse, hoc est nulli servire*, ait Ulpianus in l. 90. *de V. S.* Hinc libera ædes & servæ invicem pugnant, l. 6. §. 3. *D. Communia præd.* Inde servus fundus opponitur libero in l. 8. *D. de Actionibus emt.* l. 20. §. 1. *D. de Acquirendo ver. dom.* Cicero de Lege Agraria: Optimo jure ea sunt profecto prædia, quæ optima conditione sunt: libera meliore jure sunt, quam serva. Hinc etiam vulgaris emtionibus & stipulationibus adjiciebatur clausula: *Fundus uti optimus*.

optimus maximusque sit; cujus hæc vis erat, ut quod ita venditum, stipulatum, traditum esset, ab omni servitute liberum præstari deberet. *l. 59. D. de Contr. emt. l. 169. de V. S.* Illud præteriri non debet, Papinianum in *l. 44. §. 5. de Usurpationibus simpliciter usumfructum* dixisse, pro libertate ab usufructu, ut Cujacius ibi notavit.

§. III.

Variis autem modis naturalis illa prædiorum libertas restituitur, quos inter haud postremus est Usucapio: quæ hic nihil aliud est, quam exercitium facti alicujus continuum, & servituti contrarium: quando nimirum is, cui servitus debetur, per constitutum tempus, servitute non utitur; is vero qui servitutem debet, in suo aliquid positum habet, quo servitus constituta impediatur; tum enim hic, possessione prædij & usu haud limitato, libertatem fundi sui recipit, ex tacita quasi conventionione, vel, si mavis, lege positiva, in præmium diligentæ, & negligentæ poenam. Idque est, quod Paulus hic libertatem *usucapere* vocat: sicut Cajus, Pomponius in *l. 6. l. 7. l. 32. §. 1. D. de S P. V.* & idem Paulus in *l. 18. §. 2. D. Quib. mod. serv. am.* Proprie quidem usucapio est adjectio domini, id quod possessor prædij servientis jam ante habebat; nec incorporalia, quia tradi & possideri non possunt, usucapionem veram & ordinariam admittunt, *l. 43. §. 1. D. de Acquirendo rer. dom.* Quemadmodum vero, contra legum subtilitatem, utilitatis & litium inter vicinos minuendarum causa, hoc jure utebantur Romani, uti servitutes per se nusquam longo tempore capi possent, cum ædificiis, tanquam accessoriæ, possent, *l. 10. §. 1. D. de Usurpat.* Sic libertatis natura non in tantum obstabat, quo minus usucaperetur: licet enim res incorporalis sit, perinde tamen ac dominium, rem corporalem, prædium scilicet serviens, pro objecto habet. Deinde maximus libertatis naturalis favor hoc suadebat, ejusque exercitium & *usus*, per quietam possessionem ejus, quod ad impediendam servitutem positum vel ædificatum erat, satis

declaratus. Istius enim rei usus pro possessione à Prudentibus fuit habitus, ejusque colore pariter ac bonæ fidei prætextu, deinceps, ab Auctoribus Mediæ Jurisprudentiæ, introducta est Usucapio libertatis, ac post Legem Scriboniam, facilius retenta: quia non alia ad eam usucapionem possessio necessaria videbatur; dum sufficiebat fundum possedisse liberum omni servitute, ejusque indicium adfuisse: dubium autem non est, quin fundus possideri possit. Vide l. 32. §. 1. *D. de Servitutibus præd. urb.* Et quid aliud sunt jura prædiorum, quam prædia qualiter se habentia, ut bonitas, salubritas, amplitudo? inquit Celsus in l. 86. *D. de V. S. junct. l. 12. D. Quemadm. serv. amitt.*

§. IV.

Hæ fere rationes movebant Paulum, uti pronuntiaret; *verius esse* libertatem servitutum usucapi posse. Dudum observarunt alii, & innumeris locis evinci posset, si id ageremus, phrasin hanc in libris Jurisconsultorum ostendere, rem apud Veteres fuisse controversam; nec rationes dissentienti hic aliis defuisse, ex superiore disputatione liquet. Et tamen vix refragabor, si quis particulam hanc simul ad æquitatem & justitiam referendam contendat; quemadmodum non modo nostri, sed & reliqui bonarum litterarum auctores *verum* pro æquo & justo sæpius posuerunt. Unicus Virgilius in præsens sufficiat, lib. XII. *Æneid.* v. 694.

Quæcunque est fortuna, mea est: me verius unum

Pro vobis fœdus luere, & decernere ferro.

Enimvero ipsa æquitas dictabat, non tantum servitutis odium restringendum, sed & favorem libertatis ampliandum esse; quemadmodum semper, ubi de liberando quaeritur, ad liberationem nos propensiores esse debere, Arrianus monet in l. 47. *D. de Obligat. & act.* Quinimo ut contra libertatem personarum servitus nullo tempore præscribitur, sed bene contra servitutem libertas, l. 1. 2. & ult. *C. de Longi temp. præscr. que pro lib.* sic argumento a personis ad

ad res ducto, æquum videbatur, ut prædiorum libertas usucapi posset, servitus non posset. Et quanquam dispar harum servitutum adferri poterat ratio; quod servitus personæ quodammodo naturæ videtur contraria, nec persona est in commercio, id quod fallit in prædiorum servitutibus: attamen satis esse videbatur, quod per usucapionem libertatis res ad statum naturalem revocatur, cujus privationem omnis generis servitus continere solet.

§. V.

Et hæc quidem ad explicationem verborum hætenus. Sequitur ex aliis textibus requisita hujus usucapionis investigemus, quæ ad quatuor capita satis commode revocari possunt: ut scilicet (1.) nemo servitute sit usus (2.) per tempus definitum. Is vero qui servitutem debet (3.) interim rem possederit bona fide, tanquam liberam; & denique (4.) positum quid habuerit, quo servitus impediatur. De singulis agemus singillatim. Primum illud ad amissionem exigitur; ut constituta servitute nemo sit usus: id est, neque is cui servitus debetur; neque alius ejus nomine, ut mercenarius, amicus, hospes; neque is, qui est in possessione fundi dominantis; ut locius, fructuarius, bonæ vel malæ fidei possessor: hos enim, si usi fuerint, prædii nomine, & quasi debita servitute, usos sufficit. *l. 5. l. 20. & seqq. D. Quemadm. serv. amitt.* Non uti autem videtur, qui vel servitute omnino non utitur: vel qui utitur loco serviente, sed non tanquam servitute; ut si per constitutam servituti viam ivit longo tempore, tanquam per publicam aut vicinalem *l. ult. D. de itin. actuæ priv.* Vel qui utitur quidem, & jure servitutis utitur, sed non ad modum constitutum. v. g. Si is, cui nocturnum iter concessum erat, usus sit de die, nocturnam servitutem amittit *l. 10. §. 1. l. 18. D. Quemadm. serv. amitt. l. 17. D. de aqua & aquæ pl. juncta l. 5. §. 1. D. de aqua quot.* In alia causa est, qui fecit quidem id quod licuit, sed fecit amplius aliquid; ut si via latiore, vel alio vehiculi genere usus est, aut amplius oneris,

ris, quam licuit, vexit, aut majorem minoremve aquæ copiam duxit, minime servitutem amittit, quia hic magis plus, quam aliud egisse censetur *l. 11. D. Quemadm. serv. amitt. l. 1. §. 18. D. de aqua quot.* Præterea usus semel coepti repetitio non requiritur; quia servitutes, quæ in superficie consistunt, possessione retinentur, *l. 20. D. de S. P. V.* Neque nocet non usus, si prædium dominans ad pupillum pertineat *l. 10. D. Quemadm. serv. am.* aut servitus promissa, necdum vero constituta sit *l. 19. eod.* Servitus denique itineris ad sepulchrum non utendo haud perit *l. 4. eod.* Cujus rei ratio non est favor religionis: sic enim remitti non posset, contra *l. 14. §. 1. D. de Servit.* sed quia ejus utendi occasio, non nisi superveniente mortalitate, cujus tempus incertum est, existit.

§. VI.

Alterum est, ut nemo usus sit per tempus definitum. Statutum tempus appellat Paulus *h. l.* sicut in *l. 18 §. 2. D. Quemadm. serv. amitt.* Statutum tempus, quo servitus amittitur, inquit Proculus in *l. 16. D. eodem.* Pomponius *l. 18. §. 2. eodem.* & Julianus *l. 32. de S. P. V.* Vocatur & constitutum tempus in *l. 34. §. ult. D. de S. P. R. l. 6. §. 1. l. 7. l. 10. & l. 19. §. 1. D. Quemadm. serv. amitt.* Item legitimum tempus, quo servitutes percunt *l. 13. D. eodem.* Legibus enim XII Tabularum usucapioni fundi, ceterarumque rerum immobilium, biennium præstitutum erat, quod Jurisconsulti dein ad usucapionem servitutum & libertatis extenderunt, ut ex Paulo *lib. 1. Sent. tit. 17.* & Ciceronis oratione pro Cæcina cap. 26. liquet, his verbis: *Sed rata harum rerum auctoritas a jure civili sumitur.* Hoc vero temporis spatium attendebatur, sive inter præsentem, sive inter absentem de usucapione quæreretur. Nec interesse, idem Paulus noster docet, si servitutis usus ex conventionem sit interruptus, dum vel alternis tantum diebus, vel horis alternis, vel tantum de die aut nocte uti liceat; nihilominus enim quotidianum & continuum tempus dicitur: dum videtur, quod

quod fit alternis diebus, etiam quotidie fieri; quia unius diei finis in initium sequentis incurrit. Plane si alternis annis, alternisve mensibus, vel sola æstate hiemeve sola, servitutis exercitium permissum sit, placet eam non nisi duplicato tempore amitti, *l. 7. D. Quemadm. serv. amitt.* Quid enim potest imputari ei, qui jure facere quid, etiam si vellet, non potuit? inquit idem *l. 17. §. 3. D. de Usuris.* Verum enim vero ne spatio nimis angusto servitutes, præci- bus & pretio sæpius acquisitæ, amitterentur, præsertim cum dominis inquilinorum negligentia possit esse damnosa, ideo Justinianus novella constitutione *l. penult. C. de Servit.* Et aqua derogavit juri Pandectarum, sic ut servitutes non utendo X. annis inter præsentis, XX. inter absentes amittantur. Qui enim, in tam longo prolixoque spatio, suum jus minime consecutus est, sera pænitentia ad pristinam servitu- tem reverti desiderat, ait idem Imperator in *l. fin. C. de Serv.*

§. VII.

Ad diutinam negligentiam ejus, cui servitus debetur, adhæc tertio usucapientis accedere debet *bona fides*: nimirum ut justo errore justaque ignorantia, intra illud solenne spa- tium, ædes tanquam liberas possederit, quia factum ejus hic desideratur, cui bona fides adjuncta esse debet *l. fin. D. Quemadmod. serv. amitt. l. 1. C. de Servit.* Adde, quod jura usucapionis, præter naturalem æquitatem, introducta fuerunt, colore bonæ fidei, quasi damnum inferre non vi- deatur, qui usucapit, id quod nescit alterius esse, ut Mar- cianus ratiocinatur in *l. 43. D. de Acq. vel am.* Et gene- raliter Justinianus in *l. un. C. de Usuc. transf.* Hoc tan- tummodo, inquit, observando, ut in his omnibus casibus ab initio eam bona fide capiat. Corasius equidem ad *l. 14. de Servit.* libertatis favore opinionem illam, hic non deside- rari contendebat: at vero is tantus non est, ut exceptionem inducere possit contra regulam, quæ ad initium om- nis usucapionis bonam fidem requirit. Titulus non exi-

Ecc

gitur,

gitur, quia in incorporalibus patientia ejus vices subit; etiam si agatur de acquirenda servitute, quanto magis ergo, ubi de usucapienda libertate tractatur. *l. 11. §. 1. de Publiciana in rem l. 1. §. f. D. de S. P. R.* Sufficit ergo bona fide possedisse. Quid autem si usucapiens intra tempus rem possidere deserit? Placet interpellatam videri usucapionem, quasi una cum ædibus & libertatem earum possidere deserit. *l. 32. §. 1. D. de S. P. V.* Quod si a defuncto inchoata sit usucapio, haud ambigitur id tempus prodesse heredi; quandoquidem is, sicut in omnia jura, in usucapionem quoque succedit. *l. 11. D. de Divers. & temp. præscr.* Decessoris etiam tempora, profunt successoris singulari; ex quo Constitutione Severi & Caracallæ provisum fuit, ut ubique emtori tempus venditoris procederet ad usucapionem, *§. pen. l. 1. 14. de Usurp. l. 2. §. 20. D. Pro emt.* Eoque collineat Paulus in *l. 18. §. 1. D. Quemadm. serv. amitt.* Julianus vero in *l. 32. §. 1. D. de S. P. V.* cum tempora conjungi negat; aut loquitur de casu, quo à veteri possessore possessio non statim ad usucapientem, sed intermedium pervenit: sic enim interpellata usucapione postea integro tempore opus est: aut dici potest, eum convenienter juri antiquo, suo, id est, Hadriani tempore, adhuc vigenti respondisse, de quo in *l. 13. §. 4. D. de Acquir. vel amitt. poss.* Quibus positis apparet, quam parum causæ fuerit, cur Cujacius, Wissenbachius & Huberus, ad differentiam servitutum urbanarum & rusticarum hic confugerent, quam vel sola generalis locutio Pauli refellit. Nihil etiam est in *d. l. 32.* aut in juris analogia, quod Illustris Thomasi interpretationem juvet, qui in scholiis ad Huberum ad tit. *Quemadm. serv. amitt.* Julianum intelligit de eo, qui citra voluntatem possessionem ædium amisit. Minus nos denique moratur distinctio Harmenopuli *lib. 2. tit. 4. §. 143.* inter usucapionem libertatis & amissionem per non usum; quia publice interest, ut usucapio facilius absolva-

tur

tur l. 1. *D. de Usurpat.* Alium ejusdem in hac materia errorem Merillius notavit lib. V. Obs. c. 31.

§. VIII.

Ultimum & palmarium usucapionis hujus extinctivæ requisitum est, ut is qui servitutem debet, in suo aliquid positum, factum aut ædificatum habeat, quo servitus constituta impediatur. Veluti si tigni immittendi servitutem ædes Titii Cajo debent, & Cajus exemerit tignum, hic ita demum jus suum amittit, si Titius foramen, unde exemptum est tignum, obturavit, & per tempus statutum ita habuit; alioquin si nihil novi fecit, integrum jus Cajo permanet, nec enim Titius dici potest libertatem ædium suarum usucepisse, qui jus suum nullo contrario facto interpellavit l. 6. *D. de S. P. U. l. 18. §. ult. D. Quemadm serv. amitt.* Vel, ut Pauli exemplo utamur: Fac, me tibi debere servitutem altius non tollendi, servitus non erit sublata hoc solo, quod tu per decennium non ædificaveris, verum ita demum, si ipse contra ædificaverim, & per legitimum tempus ædificium habuerim. Non autem sufficit aliquid factum esse, nisi id omnem simul servitutis usum tollat. V. gr. si plura essent foramina, & unum duntaxat clausum sit, tota servitus retinebitur, tanquam individua; ut bene concludit Accursius ex l. 18. *D. de S. P. R.* Dein id, quod ponitur, immotum sit oportet, & continuam habeat possessionem, ut paries, ædificium, & aliquid ejusmodi. Si mobile erit, nihil proderit ad libertatis usucapionem. Ut si quis v. gr. arborem in suo plantam habuit, ex adverso luminum a vicino præclusorum; non ideo libertas adversus servitutem luminum usucapta erit, secundum Q. Mutii doctrinam. Et recte! quia non ita in suo statu & loco manet arbor, quemadmodum paries, propter naturalem motum arboris, insit Pomponius l. 7. *D. de Serv. præd. urb.*

§. IX.

Mira tamen hæc decisio videtur, quia arbor, dum terræ

Ecc 2

co-

cohaeret, immobilis & pars fundi habetur Mutio, apud eundem Pomponium in *l. 49. D. de Act. emti.* Nec insuper convenit inter eruditos, quid per naturalem illum arboris motum intelligatur. Accursius, Duarenus & Strauchius ad ventorum agitationem & aëris impulsu referunt. Synoplis Basilicōn *lib. 58. tit. 28.* & Radulph. Fornerius *lib. II. Rer. quotid. cap. 12.* transplantationem, translationem & ademptionem interpretantur, velut cum dicimus, movere Senatu. Janus a Costa *ad §. 31. I. de R. D.* post Mornacium, in subterraneis radicibus, quæ modo huc, modo illuc mituntur, motum quærit. Galvanus *de usufr. cap. 41. n. 3.* & Lynckerus in *Analcëtis ad Struvium lib. 8. tit. 6. ib. 58.* varia motus genera, & intrinseca & extrinseca, considerata fuisse existimant. Verum optime Zoannettus *resist. cap. 25.* Cujacius *lib. 27. Obs. c. 14.* & Balduinus in *Scævolis pag. 283.* ad vegetationem crescentis arboris hunc motum retulerunt: ea enim facit, ut quotidie nova velut arbor sit, & quæ olim luminibus non officiebat, nunc statu mutato officiat. Sic moveri *arborum* crescere poni, multis exemplis docuit Vir Summus, Joh. Frid. Gronovius *lib. III. Observat. cap. 1.* Ovidius *lib. III. Trist.*

Quoque loco est vitis, de palmit gemma movetur.

Hac ratione Celsus & Atticus apud Columellam ajunt, tres esse motus in vite naturales: unum, quo germinet; alterum, quo floreat; tertium, quo maturelcat. Atque ita Philosophi omnes, teste Macrobio *l. 11. in Somn. Scip. c. 15.* Moventur arbores, quarum etsi non videtur agitator; a natura tamen eas interius latente constat agitari. Sed hoc amplius, Q Mutius pariter ac Pomponius jurati Stoici fuerunt; quorum hoc erat proprium, ut *Naturam* per totum orbem diffusam, motus & rerum omnium magistrā crederent; iisdem arbores & corpora nostra mutari in horas, & ab illis, quæ a nascentibus fuerant, longe diversa videbantur. Propterea quod ut Philosophi dicerent, ex quibus particulis minimis consisteremus, hæc quotidie ex corpore decederent, aliæque extrinsecus.

secus in earum locum succederent, inquit Alfenus Varus in l. 76. D. de Judiciis. Seneca Epist. LVIII. Quacunque videmus ac tangimus. Plato in illis non numerat, quæ esse proprie putat. Fluunt enim, & in assidua diminutione atque adiectione sunt. Nemo nostrum idem est in senectute, qui fuit juvenis. Nemo est manens, qui fuit pridie. Corpora nostra rapiuntur fluminum more. Quicquid vides, currit cum tempore, nihil ex his, quæ videmus, manet. Ego ipse, dum loquor mutari ista, mutatus sum.

§. X.

Tantum de quatuor partibus, quæ ad usucapionem libertatis requiruntur. Absit vero putemus semper, ubi ex temporis lapsu recuperatur libertas a servitutibus, ea desiderari. Paulus generaliter hic loquens, alibi discrete distinguit inter usucapionem, & non usum, ac hoc solo, nonnullas amitti docet, *lib. 1. Sent. tit. 17. Viam, inquit, iter, aqueductum, qui biennio usus non est, amisisse videtur: nec enim ea usucapi possunt, quæ non utendo amittuntur.* Minus desideratur ad amissionem, quæ fit non utendo, quam ad usucapionem libertatis. Ibi ejus, cui servitur, diuturna cessatio sufficit; hic facto ejus opus, qui servit. Illam non impedit mala fides domini prædii servientis, ad hanc bona fides usucapientis necessaria est omnino. Hinc si viam habeam per tuum fundum, & tu me ab ea expuleris, per longum tempus non utendo, viam amitto: quia nec possideri intelligitur jus incorporale, neque de via quis, quatenus jus merum est, deficitur, *l. 4. §. 27. D. de Usurpat. & usuc.* Enimvero quasi possessio viæ præcipue in usu consistit, quo deficiente ipsam quoque possessionem deficere oportet. Causas juris & facti vi habuerat conjunctas, itaque sublato usu, qui facti est, solum merumque jus remanebat; hoc vero vi injusta statim detrusus non videor, sed ut tolleretur, juris auxilii opus erat. Confer *l. 19. D. Ex quibus caus. maj. l. 49. D. de Acquir. poss. l. 35. de Re j.* Ita obscurum istum Pauli locum recte explicavit Ravardus in

Ecc 3

Tri-

Triboniano §. 1. Male Cujacius & Brissónius per *merum jus* juris civilis subtilitatem intellexere, quod ab intentione Jurisconsulti, & proprietate vocis est alienum: merum enim antiquis idem erat quod solum. *Meram tunicam* Varro; *speciem meram* Terentius, & *merum jus gentium* pro solo & simplici usurpavit Tryphoninus l. 31. D. *Depositi*.

§. XI.

Age vero distinctius, quænam servitutes tantum non utendo pereant, & in quibus insuper desideretur usucapio libertatis, proponamus. Non una hac in re Doctorum est fluctuatio. Casparus Manzii in tractatu de servitutibus tit. 6. n. 92. differentiam inter servitutes continuas & discontinuas ponit; in illis factum hominis, in his solum inusum requirens. Communis vero schola, in amittendis servitutibus urbanorum prædiorum, continuum usum libertatis postulat, in servitutibus rusticorum prædiorum non item. Patrociniari his imprimis videtur Cajus, in l. 6. D. de S. P. V. tum ceteri Juris auctores, qui quoties de usucapione loquantur, exempla ab urbanis, in l. 7. D. l. 32. §. 1. D. de S. P. V. contra, ubi de non usu sermo est, a rusticis petitam eunt, l. 17. l. 19. *Quemad. serv.* Quos item Paulus noster hac l. 4. §. 27. & 29. D. de Usurpat. in utraque specie secutus est. Eoque pertinet quam maxime Ulpiani caput, in l. 6. D. de Fundo dotali, ubi inquit: *Sed nec libertas servitutis urbano prædio dotali debite competit, ne per hoc deterior conditio prædis fiat.* Hæc sunt fundamenta, quibus vulgaris innititur sententia, a summis pariter ac imis, jam a Castrensi, ad nostrum usque ævum, propugnata. At discriminis istius rationes si quis requirat, in alia omnia eos abire deprehendet. Vir magnus, Jacobus Cujacius ad b. l. respexit ad regulam juris vulgatam, nihil tam naturale esse, quam unumquodque eo genere dissolvi, quo colligatum est; ideoque urbanarum libertatem usucapi ait; quia & servitus urbana ante legem Scriboniam usucapioni erat subjecta; rusticam usucapi haud potuisse, sed solo usu acquisitam;

ram; non mirum ergo, si & solo non usu, sine interven-
 facti contrarii extingatur. Ait autem posterius tantum,
 non probat, ut caput sequens docebit. Schneidewinus ad
 §. fin. *Inst. de Serv. n. 28.* urbanas causatur nobiliores esse
 rusticis, & difficilior amitti, ne urbs ruinis deformatur.
 Sed invertendum est potius, quod ait; nam, rusticæ erant
 mancipi, auctoré Ulpiano *tit. 19.* & majoris pretii, ma-
 jorisque æstimationis, quod fructuum gratia comparabantur;
 ut vere de illis dici possit, quod Plinius lib. XVIII. H. N.
 c. 3. de tribubus scribit, rusticas honoratiores fuisse urba-
 nis, & Varro lib. I. de Re rust. c. 13. *Villæ rusticæ erant
 majoris, quam urbanae.* Struvius *S. 7. C. Exerc. 13. §. 58.*
 causam assignat hanc, quod illæ in facto personæ consistunt;
 in his nuda subest patientia prædii servientis. Quasi vero
 nonnullæ urbanæ, ut oneris ferendi, cloacæ vel rivi in pa-
 tiendo vicini facto non consistant. Accursii, Bartoli &
 Forcatuli ineptias refert, & simul refellit Joh Harprechtus
 ad §. fin. *I. de servit.* qui tamen ipse, quo se verteret nescius,
 ad ignorantie illud asylum in *l. 20. D. de LL.* confugit.
 Saniores rationes dederunt Connanus *lib. IV. cap. 12. n. 7.*
 Donellus *Comment. lib. XI. c. ult.* Galvanus *diff. cap. 41.*
n. 3. & Wesenbecius *de Servitut. n. 5.* sed quæ omnes huc
 fere redeunt, quod rusticarum exercitium consistit in facto
 eundi, agendi, vehendi, aquam ducendi, pascendi, coquen-
 di, quibus actibus omnis manifesto negligentia arguitur,
 & quasi possessio perit *l. 14. D. de Servitut. l. 4. §. 27. D. de
 Usurpat.* Urbanæ vero non in mero facto versantur; sed
 simul per se aliquid necessario mutant in ædibus vicini, &
 cessante ad tempus usu, ejus indicium vestigiumque relin-
 quunt, quibus abolendis facto opus esse contrario judica-
 tum sit, ne alias cum ædibus earum possessio retineatur, *l.*
20. & l. 32. §. 1. D. de S. P. V.

§. XII.

Verum enimvero, etsi non negem, hanc rationem effice-
 re, ut in urbanis potissimum usucapionis ratio habeatur,
 de

de quibus etiam Jurisconsulti, tanquam *υπὸ το πλείον*, ut plurimum accidentibus, exempla desumere; secuti exemplum Theophrasti, in l. 3. & 6. D. de Legibus. Nil tamen obstare, quo minus libertatis usucapionem in rusticis nonnunquam necessariam dicamus, jam dudum sensit Illustris Thomasius *Dissertat. de Servit. stillicid.* §. 23. Finge, te habere aquæductum per fundum Cornelianum, ibique canales, tubulos & fistulas, per quas aqua ducatur, posuisse; licet aqua longo tempore non sis usus, minime tamen Cornelii fundus liber erit, nisi is fistulas eximendo libertatem suscepit. Vel hoc modo: Servitus viæ mihi debetur per locum paludosum, quo uti non licet, nisi glareæ vel silice sternatur; fundum stravi, sed per legitimum tempus, forte quia commodum non erat, via usus non sum; profecto durabit servitus, quamdiu superest stratum, tanquam vestigium constitutæ servitutis. Nec aliud dicendum, si ad calcem coquendam calcariam dominans paraverit; vel ad aquam hauriendam situlas suspenderit fontesque refecerit: sibi enim imputet serviens, quod structuram, exercendæ servituti necessariam, non sustulerit. Atque ist hoc pacto, in hac materia, carere possumus otiosis concertationibus, tam veterum quam recentiorum, quænam servitus urbana vel rustica dici debeat. Non inficiamur, discrimina quædam inter servitutes rusticorum & urbanorum prædiorum intercessisse v. c. illæ mancipi erant, & hypothecæ obligari poterant, hæ non item, auctore Ulpiano tit. 19. §. 1. l. 11. §. f. l. 12. D. de Pignor. qua de re Merillius lib. VI. Obs. c. 4. Faber lib. XIX. Conj. c. 7. & Binckershoek de rebus mancipi c. 8. Argumento tamen tituli *Communia prædiorum tam urbanorum quam rusticorum* satis constat, & inductione ostendi potest, communia eis, isto discrimine sublato, regulariter jura esse; iisdemque modis eas constitui, iisdem finiri. Nihilominus unde rusticum prædium discernatur ab urbano, varie senserunt Jurisconsulti. Alii a materia prædia distinxerunt, in l. 3. D. de Servit. l. 1. D. Comm. præd. l. 198.

D.

D. de V. S. Alii a loco, ut Neratius *l. 2. D. de S. P. R. l. 4. D. In quib. caus. pign.* Alii rursus, ut Bachovius & Vin-
nius, ab intrinseca sui natura: alii, ut Voetius & Lau-
terbachius, ab usu servitutes aestimari voluerunt. Quid?
quod iter etiam circa urbana prædia constitui potuit, *l. 20. §. 1. l. ult. D. de S. P. V. l. 14. D. Comm. præd. l. pen. D. de Servit. leg.* & servitus cloacæ immittendæ, nunc inter
urbanorum, nunc inter rusticorum prædiorum servitutes
numeratur, prout vel urbano vel rustico fuerit prædio
constituta. §. 1. *I. de Servit. l. 2. de S. P. R.* Nec quicquam
frequentius apud Germanos, quam ut aquæductus & aquæ-
haultus prædio debeantur urbano.

§. XIII.

Ceterum ut argumentis, quibus contraria sententia quam
maxime innitur, satisfiat, adhibenda est distinctio, inter
servitutes affirmativas & negativas, quam non totidem qui-
dem verbis Cajus adfert; is enim magis distinguit inter
servitutes rusticorum & urbanorum prædiorum, in *l. 6. D. de S. P. V.* quacum jungenda est ejusdem *l. 2. eod.* sed
quam ratio, & analogia juris suppeditat, & exemplum,
quod Paulus noster habet, confirmat. *Affirmative* sunt,
quæ patiendo utilitatem præstant; atque hæ, si in mero fa-
cto consistunt, ut iter, actus, via, non utendo pereunt;
sin vero structuram aliquam præsupponunt, ut oneris feren-
di, tigni immittendi, structuræ remotione libertas usucapi
debet. *Negative* sunt, quæ in non faciendo consistunt,
ut altius non tollendi, stillicidii aut fluminis non recipien-
di: atque hæ per rerum naturam non nisi facto aboleri
possunt, quia actus servituti contrarius suscipiendus est, cui
dominus prædii dominantis non contradicat. Juvat hanc
distinctionem exemplum a Cajo in *l. 6. D. de S. P. V.* &
a Juliano in *l. 32. §. 1. D. eod.* a servitute altius non tol-
lendi petitum, quo & Paulus noster in hac *l. 4. §. 29. D. de Usurpat.* uti voluit: *Itaque, inquit, si cum tibi servitutem
deberem, ne mihi liceret altius edificare, & per statutum tem-*

pus altius edificatum habuero, sublata erit servitus. Non hic ingrediar prolixam disputationem, de servitute altius tollendi & non tollendi, quæ variis opinionum fluctibus ventilata est. Missis aliorum sententiis, duæ hæc servitutes, ex modo altitudinis, quem Augustus, Nero & Trajanus, ad ruinas evitandas, ædificiis imposuerunt, mihi enatæ videntur. Nostra & aliorum auctorum loca, huc pertinentia, Barnabas Brissonius lib. 1. *fel. Ant. c. 1.* Petrus Faber ad l. 61. de R. J. & Rævardus lib. III. *Conject. c. 12.* diligenter collegerunt. Hominum quippe multitudo, undique Remam convolantium, effecisse videtur, ut Principum illæ sanctiones tacitam exceptionem admitterent, nisi vicini, solida jaci fundamenta videntes, consenserint, ut formam definitam excedere liceret, atque ita *positum vel stipulatio edificanti suffragetur*, ut Zeno inquit l. 12. §. 1. *C. de Edific. priv.* & ante hunc Ulpianus in l. 11. §. 1. *D. de S. P. V. Si inter te & vicinum tuum non convenit, ad quam altitudinem extolli ædificia &c.* Plane Tiberii tempore, de maxima ædificiorum altitudine queritur Seneca Rhetor. Petronius, Neroni familiaris, sedesque ad sidera mitti canit. Juvenalis, sub Domitiano, avarum jubet respicere, quod spatium telluris sublimibus. Prudentius, tempore Arcadii & Honorii, celsa ænanacula vulgi celebravit. Non equidem diffiteor, hæc aliave loca, de ædificiis ante Augustum exstructis, accipi posse; sed ferali Neronis incendio, bona pars Urbis conflagravit, & Augusti edictum, mox a potentibus spretum, sine moribus fuisse, Neronis & Trajani iterata constitutio, tum l. 1. §. 8. *C. de Servitut.* ut credamus suadent. Falluntur utique, qui cum Zasio, Cæpolla & Schneidewino, servitute altius tollendi, id agi volunt, ut vicinus ædes suas altius tollere debeat, si mea forte interfit, ejus ædes altiores esse, ne meæ ventis perflentur, aut soli nimis liquido exponantur, aut quod meas repercussio lumine (kata ἀντανάκλασις Ulpianus vocat) illustrari velim. His enim refragatur natura servitutum, a Pomponio memorata in l. 15. §. 1. *D. de Serv. &*
Nera-

Neratius in *l. 2. de S. P. R.* aperte scribit: *licere, altius tollere, item Paulus in l. 7. §. 1. D. Comm. præd. ut altius tollere vel non tollere liceat.* Neque Viros Celebrerrimos Voetium, Pagenstecherum & Stryckium sequor, ad *tit. de Serv. præd. urb.* existimantes, non aliam, in verbis allatis, Jurisconsultos denotasse altius tollendi licentiam, quam qua ego vicini aedes, meis sumtibus, altius tollere possum, ad mei prædii utilitatem: hos enim vel unus Justinianus refellit, scribens, confessoria agi, *jus sibi esse altius aedes SUAS tollendi*, in *§. 2. I. de Action.* Si quis regerat, neque sic satis li- quidam videri hujus servitutis rationem; quia pacto, etiam contra Principum edicta, & jus publicum admisso, non servitus inducitur, sed libertas tantum naturalis restituitur, quæ prius fuerat, per impositam a lege servitutem, adem- ta. Respondeo; omnis servitus altius tollendi simul conti- net servitutem, seu jus luminibus vicini officendi. non qui- dem infinitum, sed ad boni viri arbitrium reductum: illa enim duo Cajus & Paulus, uno quasi spiritu conjunxerunt in *l. 2. & 4. D. de S. P. V.* Unde Cujacii opinio enata est, servitutem ne quis aedes suas altius tollat, & ne lumi- nibus vicini officiat, unam esse *lib. XVII. Obs. c. 35.* Mo- dus tamen diversus est, ut Marcellus indicavit & Ulpianus in *l. 10. 11. D. eod.* Verius ergo puto, servitutem altius tol- landi præsupponere legem, edictum, constitutionem aut statutum, quo ultra certam altitudinem, vicino invito, nulli ædificare licet: qualia statuta Uratislaviæ & in Bavaria alii observarunt. Contra altius non tollendi servitus est, qua vicinus non potest in suo altius ædificare, quam nunc ædi- ficatum habet, licet infra modum, lege concessum, subsistat. Auctor tamen est Javolenus, cum, qui hanc servitutem pa- tietur, viridia supra eam altitudinem habere posse *l. 12. D. de S. P. V.* ubi viridia non tam sunt herbe virides, sed horti, arbores & silvæ, quæ in tectis planis, & sine fastigio, a ditioribus habebantur. Seneca pater lib. V. contra *5. Alunt in summis culminibus nemora.* Seneca filius epist. 122. *Poma-*

ria in summis turribus serunt, quorum filvæ in testis domorum ac fastigiis nutant. Vide ibi Lipsium in notis, Merillium lib. I. Obs. c. 34. & omnino Casaubonum ad Athenæum lib. IV. c. 12. Ceterum quod Justinianus in *l. ult. §. 1. C. de Servitut.* generaliter constituit, nemini licere, prope aream alterius triturariam sublimiorem, tam alte ædificare, ut idoneum ventum infringat, id ad usum & privilegia agriculturæ pertinet, quo ventus frumenta a paleis purgare possit, ut ex multis docuit ampliff. Cuperus lib. II. Obs. c. 14.

§. XIV.

Verum cui bono, inquis, tam subtilis & anxia, distinctionis inter non usum & usucapionem libertatis, investigatio, si Justiniani nova constitutione, in *l. pen. C. de Servitut. Et aqua*, jam A. C. 534. in universum de omnibus realibus servitutibus cautum fuit, ut non utendo decem aut viginti annis amitterentur? Verba ejus sunt ista: *Ita Et in ceteris servitutibus obtinendum esse censuimus; ut omnes servitutes non utendo amittantur: non biennio (quia tantummodo soli rebus annexæ sunt) sed decennio contra præsentis, vel viginti spatii annorum contra absentes: ut sit in omnibus hujusmodi rebus causa similis, differentiis exceptis.* Trifariam hic videtur Imperator jus vetus emendasse: primum, quod pro biennio substituit longum tempus. Tum quod præsentis & absentis rationem haberi jussit. Deinceps omnes vult non utendo, nullas per usucapionem amitti. At si verum amamus, duas tantum correctiones priores instituit Justinianus, quoad tempus amittendi: non posteriorem, quoad modum: nam & Cajus in *l. 6. D. de S. P. V.* similiter dixerat, omnes servitutes certo tempore non utendo perire; sed cum hac dissimilitudine, ut in quibusdam cum omissione dominantis conjungatur usucapio servientis. Eadem restrictione nisi Constitutio illa suppleatur, frustra dici posset, post biennium, quam lata erat, tot loca Pandectis esse inserta, quibus libertatis usucapio continetur. Quod

Quod autem ad introductum illud præsentia & absentia discrimen attinet, sciendum est, olim nil interfuisse, præfens an absens esset is, cui servitus debebatur. Nec enim in his servitutibus absentia ratio habita, quia non ad personas, verum ad prædia vicina se referebant. Et quamvis dein longi temporis præscriptio, vel quasi, in servitutibus admittæ, decennium tamen sufficere videbatur, *l. 10. D. Si serv. vind.* Id quod corrigit Justinianus, absentibus tempora duplicari jubens, sicut ea jam ante duplicarat Paulus; si cui alternis tantum annis vel mensibus servitude uti liceret *l. 7. D. Quemadm. serv. amitt.* Finge autem. Hoc pacto servitus itineris est constituta, ut singulis quinquenniis uno die liceat ire, agere; an quot anni sunt intervalles, toties multiplicabitur tempus amissioni præscriptum? Ita somniant multi: sed Imperator nec in hac quidem specie plus semel duplicat tempus, & 20. annos præscribit, in *l. ult. C. de Servitut.* Istæ etiam maximi momenti est Justiniani mutatio, quod cum olim servitutes personales, ut usufructus, solo non usu perirent, etiam si rei libertatem non possideret proprietarius, *l. 44. §. 5. D. de Usurpat. & usuc. l. 20. l. 75. Quib. mod. usufr.* Paul. *l. III. Sent. tit. 6. §. 30.* hodie, præter illius cessationem, adhuc istius necessaria sit possessio, sine qua præscriptio non currit. *l. pen. C. de Usufr. l. 2. l. 4. l. 7. C. de Præscript. long. temp.* Atque hæc Usucapio libertatis Justinianca vocari posset, post *l. un. C. de Usucap. transf.*

§. XV.

Hoc ipsum denique & Mores constanter servant, ut in supradictis speciebus animus, de prohibendo servitutis usu, declarandus sit, prout præjudiciis confirmat Carpzovius *part. III. Dec. 288. & P. II. Const. 4. def. 13.* Item Responsa Jætor. Holl. *part. I. Conf. 199. in medio.* Barth. Capolla, non vilis auctor in materia servitutum, ideo disputationem suam hac de re *cap. 24. n. 7.* institutam, concludit his verbis: *Unde propter hoc tene omnia, quæ supra di-*

xi observanda esse, tam de jure Canonico, quam Civili, & tam in terris Ecclesiæ, quam in terris Imperii. Mornacius etiam ad l. 6. de S. P. V. magni hoc discrimen fieri a scientissimis & peritissimis patronis, se vidisse ait, cum de ejusmodi præscriptione orta esset quæstio. Nec ad servitutes tantum hæc pertinet observatio, sed ad jura omnia, quæ in alieno exerceri possunt: ut patronatus, decimarum, operarum, servitiorum, venationis, molendini bannari &c. de quibus Stryck. in disp. de non usu juris quæsit. Sic si quis per mille annos non fuerit venatus, haud amisit jus venandi, nisi vicinus semel prohibuerit, & in ea prohibitione alter acquieverit per longum tempus. Vide Carpz. lib. I. Resp. 36. n. 8. & Resp. 43. n. 15. Bruun. ad l. 1. C. de Servitut. n. 11. Lyncker. Decis. 961. An vero, ad præscribendam libertatem ab onere collectarum, necessaria sit interpellatio ex parte collectantis, & recusatio ex parte collectandi, discrepantes sunt Doctorum sententiæ, quas examinat Klockius de Contribut. cap. 16. n. 83. seqq. Cui jungatur Mevius p. VIII. decis. 312. & Harprecht de Præscript. immunit. a collectis. Illud forte monere supervacuum, apud Saxones, Belgas & alios, non nisi longissimo tempore libertatem ufucapi. Richt. p. I. dec. 21, n. 59. Grot. lib. II. Introd. cap. 37. n. ult. Leeuwen Conf. for. p. I. lib. 2. c. 14. in fin. Omnes quoque norunt, Juris Canonici Philosophiam, quod ad bonam fidem attinet, juri civili, ubivis fere locorum, hodie præferri, ex c. f. X. de Præscript. Myns. Cent. IV. Obs. 6. Mev. P. II. dec. 102. Recte, an secus, nunc non disquiro. Valde autem placet Jacobi Cujacii, Jurisconsultorum Phœnicis, & sedi Romanæ addicti, in c. 5. in fin. X. de Præscript. ea de re judicium: Hunc locum, inquit, serva interim, ut probes, quam Cynici & fusi olim fuerint, quæve imperitia, & incuria sit Curie Romanæ.

CAPUT II.

DE

PRÆSCRIPTIONE SERVITUTUM.

§. I. De Usucapione libertatis Pauli ratio firmatur, & Cajl. 9. D. de Usurpat. explicatur. II. In presenti questione sex juris temporasunt observanda. Secundum Legem XII. Tabb. Usucapio servitutum non fuit admiffa. Verba legis aliter, quam ab Hutmano, Salmasio & Grævio explicantur. III. Media Jurisprudencia Usucapionem servitutum permittit, tam rusticorum, quam urbanorum prædiorum. Cicero illustratur, Cujacius reprehensus. IV. Rursus Tiberii tempore, jus antiquum reduxit Lex Scribonia; quæ Consularis, non Tribunitia videtur. V. Quæ ejus legis fuerint rationes disquisitum: a Sabino & Paulo allata rejiciuntur; alia profertur, & conjectura fulcitur. VI. Post Scribonium nunquam usucapio servitutum reduc-ta. Seneca, Aggenus & l. 14. D. de Servitut. illustrantur. VII. Fundo usucapto, etiam servitutes, quæ ei debentur, sunt usucapte. L. 10. §. 1. de Usurpat. varia emendationes & explicationes. Pantli sententia cum aliis capitibus conciliatur. VIII. Prætor mox temporis diuturni præscriptionem indulsit, cujus requisita enarrantur. IX. Eam fuisse anomalam, & ab ordinaria præscriptione longe diversam; sola item Prætoris iustitione constitisse. L. 10. D. Si serv. vind. explicata. X. Ex Justiniani constitutione servitutes non usucapi, sed longo tempore præscribi. Titulus & bona fides requiruntur; scientia servientis non item. XI. Vulgaris error, dividendum servitutes in continuas & discontinuas, refutatus. XII. Moribus hanc distinctionem tenendam, ut continue longo tempore, discontinuæ immemoriali. præscriptione acquirantur. Quid sit tempus memoriam hominum excedens. Cur annus & dies Saxonibus, triens sæculi placuerit Batavis. XIII. De remediis præscribenti competentibus, & natura præscriptionis.

§. I.

Postulat nunc ordinis, quem ipse Paulus nobis præscripsit, ratio, ut de Lege Scribonia, atque ejus occasione,

ne, de præscriptione servitutum dicamus. Quæ pars etsi haud minore difficultate prematur, quam prior: enitar tamen pro virili, ut qualicumque modo provincia suscepta exornetur. Sed prius est, ut Paulum audiamus; qui ita pergit: *Quia eam Usucapionem susulit Lex Scribonia, quæ servitutem constituebat, non etiam eam, quæ libertatem præstat, sublata servitute.* Quibus in verbis, & ratio præcedentis sententiæ continetur, & simul novi aliquid assertur de Lege Scribonia, quam frustra alibi quæras. Dixerat antea verius esse, libertatem servitutium usucapi posse; id vero, contra dissentientes, nunc muniendum erat ratione, quam animam & medullam legum, non ab re Rhetor quidam antiquus appellavit. More igitur suo hanc apponit elegantissimam: quia libertatis usucapio, lege illa correctoria, non fuit sublata, quæ servitutes usucapi vetuit, omnemque Mediæ Jurisprudentiæ disciplinam in hac materia purgavit; ergo quod mutatum non est, cur stare prohibeatur? Sane libertatis favor, pariter ac odiosa servitutis natura, hanc interpretationem suadebant. Facilius enim admitti potuit usucapio libertatis, per quam nihil novi fit, sed res ad pristinum statum naturalem revocatur, hunc vero conservari publice interest. Dispar etiam alia adhuc ratio videbatur: servitutes solæ, tanquam res incorporales, possessionem, &, quæ per eam fit, usucapionem respuebant. *l. 25. D. de Usurpat.* Qui vero libertatem usucapit, is non modo fundum vel ædes, seu libertatis objectum, sed & id, quod contra servitutem positum vel ædificatum est, possidet omnino. Ita Julianus in *l. 32. §. 1. D. de S. P. U.* inquit: *Libertas servitutis usucapitur, si ædes possideantur. quare si is, qui altius ædificatum habebat, ante statutum tempus ædes possidere desit, interpellata usucapio est: is autem, qui postea easdem ædes possidere cæperit, integro statuto tempore, libertatem usucapiet. natura enim servitutum ea est, ut possideri non possint, sed intelligatur earum possessionem habere, qui ædes possidet.* Atque ad hanc differentiam respexit Gajus in *l. 9. D. de Usur-*

Usurpat. & usucap. quando ait: *Usucapionem recipiunt maxime res corporales.* Id est præcipue & principaliter, quemadmodum in *l. 11. D. de Rebus cred. l. 90. de Reg. Jur.* atque innumeris locis aliis hæc particula usurpatur: nam & libertas ædium, quæ incorporalis est, Hadriani ævo, quo Cæjus vixit, usucapionem admittebat. Nil igitur opus, ut *sc. maxime*, cum Cujacio ad *l. 4. §. 1. de Usurpat.* ad emblemata & emplastra Triboniani referamus: vel cum Brissonio lib. XI. de V. S. illud per *utique*, seu *ita demum* explicemus; quasi solæ corporales usucapionem recipiant: vel denique cum Wislenbachio in *Embl. Trib.* dicamus, post Legem Scriboniam servitutes usucaptas esse, quo nihil a juris ratione magis est alienum, ut ex iis, quæ nunc dicemus, apparebit.

§. II.

Sed quia non unus Wislenbachius hic lapsus est, & præter confusionem pauca in themate nostro promittunt Doctorum commentarii; omnino tempora, cum Galvano, distinguamus oportet; quo planius omnia percipiantur, quidve ante & post Legem Scriboniam, circa usucapionem servitutum obtinuerit, intelligatur. Primum esto XII. Tabularum: Alterum mediæ Jurisprudentiæ: Tertium Legis Scriboniæ: Quartum ab ea lege ad Justinianum: Quintum ipsius Justiniani: Et Sextum denique a tempore restauratæ Jurisprudentiæ ad mores hodiernos, quorsum labores nostros inprimis dirigamus oportet. Sequimur enim hac in re consilium Aristippi Philosophi, qui consultus, quid adolescentibus discendum putaret, id respondit, quod cum viri evassissent, ad usum vitæ maxime commodum esset futurum. *Quotus enim quisque tam patiens, ut velit discere, quod in usu non sit habiturus?* ad Aristonem Jurisconsultum, Plinius scribebat lib. VIII. Ep. 14. Quemadmodum vero in aliis disciplinis, sic & in Jurisprudentia, usu rerum vix potimur, nisi tota quæstio a primis initiis, & velut ab ovo repetatur. A Legibus itaque XII. Tabb. ceu omnis publi-

Ggg

blici

blici privatiq; juris fonte, ordiamur, quibus etiam Ufucapio introducta est. Nota satis carum est formula, apud Ciceronem in Topicis, & pro Cæcina c. 19. **USUS AUCTORITAS FUNDI BIENNIUM, CETERARUM RERUM OMNIUM ANNUUS USUS ESTO.** Obscura sunt verba Decemvirorum priora, sed gratia vetustatis retenta, ut eorum multa alia, quæ ne Ciceronis quidem temporibus, a Romanis intelligebantur. Salmasius cap. 8. de Usur. pag. 210. legis verba ita interpungit: *Usus, auctoritas fundi biennium esto: ceterarum omnium rerum usus annuus esto.* deinde explicat, non ultra biennium patere locum auctoritati, id est actioni pro evictione, atque adeo evictioni ipsi. Hotmanus in comm. ad orat. pro Cæcina, *biennis* legit, & post *usus* comma quoque ponit. Verum tantum abest, eis ut accedam, ut potius *usus-auctoritas*, conjunctis vocabulis, mihi pronuntiata videatur. nam in Topicis connectendi particula abest, & in ea pro Cæcina perperam retinetur. Sic pignoris capio, capitis minutio, aliaque apud Ærodiū ad Quintiliani decl. 295. & Gronovium avum in Observ. ad Hist. Eccl. script. c. 14. pag. 153. Duo hic sunt genitivi, qui a voce *auctoritas* reguntur, & *auctoritas usus* significat dominium ex possessione fundi quæsitum. Celebrerrimus Grævius ordinem verborum hunc constituit, *usus fundi biennium auctoritas esto*, eaque interpretatur: usus seu usura fundi per biennium parit jus possessionis legitimæ. Sed quia dura locutio est, *usus biennium*, id est utentes per biennium, mihi *biennium* nominativus videtur, pariter ac *annuus usus*, qui ei opponitur, ut ordo sit talis: biennium pariet auctoritatem usus fundi, annus erit usus auctoritas ceterarum rerum; vel possessione dominium in rebus immobilibus biennio, in mobilibus sequē moventibus anno acquiratur. Nullam vero Decemviri rerum incorporalium, ut servitutum, habuerunt rationem, quia fundamentum Ufucapionis ponebant in usu, sive possessione; incorporalia vero possideri non possunt.

sunt. Utrumque & ratio dicitur, & multiplex testimonium Juris Auctorum, quos inter & Aelius Gallus apud Festum definit: *Possessio est usus quidam agri aut edificii, non ipse fundus aut ager: non enim possessio est, nisi in iis rebus, quæ tangi possunt.* Javolenus quoque possessionem usum esse tradit in *l. 115. de V. S.* Nec usucapere aliud est, quam per possessionem dominium acquirere, & usum suum facere, ut ait Prætor in *l. 21. D. Ex quib. caus. maj.* Atque ex his satis, opinor, liquet, servitutem a non domino constitutam, vel ultro tentatam, cum fundo vel sine fundo, per Leges Decemvirales, usu acquiri non potuisse: idque jus, ut incredibili veneratione populi erat acceptum, antiqua Jurisprudencia, aspera illa & tenebrosa, ad Ciceronis ferè ætatem, servasse videtur.

§. III.

Tum vero humanior ætas media successit: quippe Jurisconfulti posteriores, ad Augusti usque imperium, magis utilitate communi, quam verborum potestate, negotia moderabantur, multaque Legum capita in melius & æquius producebant. Hos inter haud postremus fuit Q. Mutius Scævola, qui, Pomponio teste, jus civile primus generatim constituit: hic vero, libertatis usucapionem in mediam Jurisprudenciam, suo tempore, receptam esse, confirmat in *l. 7. D. S. P. K.* Quidni etiam credamus, ab iisdem juris Auctoribus usucapionem servitutis sine lege introductam fuisse? Nec multis opus est; rem omnem declarat disertissimus Scævola discipulorum Tullius, in Oratione pro Cæcina cap. XXVI. verbis quæ sequuntur: *Fundus a patre relinqui potest, at usucapio fundi, hoc est finis sollicitudinis & periculi litium, non a patre relinquitur, sed a legibus. Aqueductus, haustus, iter, actus a patre; sed rata auctoritas harum rerum omnium a jure civili sumitur.* Ecce! Leges XII. opponit juri civili, illisque usucapionem fundi, huic usucapionem servitutum adscribit, si Budæum sequimur ad *l. ult. D. de Evict.* Hotmanus in comment. ad hanc Cice-

ronis orat. *ratam auctoritatem*, jus domini firmum & fixum interpretatur, quod quomodo ad servitutes pertineat, non video. Potius *rata auctoritas* vindicationem servitutum & robur denotat, quod Jctiis accommodarunt, si cum fundis possessæ & usu acquisitæ fuerint; nemo enim est, qui nesciat, eam Juris partem, quæ sine scripto in sola Prudentum interpretatione consistit, *Juris Civilis* nomen commune, suum ac proprium fecisse. l. 2. §. 1. *D. de Orig. Jur.* Atque ita Emundus Merillius Justiniani verba explicat, in *pr. Inst. de Usucap. Jure civili constitutum fuerat*, id est ab antiquioribus Jurisconsultis: qui inter alia legem, de fundo loquentem, ad fundi qualitates extenderunt. Movebat eos, quod Decemviri ad Usucapionem exegerant *usum*, quem & quodammodo recipiunt servitutes, l. 20. *D. de S. P. V. l. 10. Si serv. vind. l. 1. §. ult. D. de Aqua & aquæ pluvi.* Et sicut Usucapio rerum corporalium bono publico introducta erat, ut dominia rerum essent certa, sic & Reip. intererat, jura rerum in incerto non fluctuare. Possessionis igitur fictione, seu potius (ut Senecæ verbis utar) imagine, & translatione quadam, biennalis usucapio fuit admittenda, exemplo rerum immobilium, auctore Paulo lib. 1. *Sent. tit. 17. §. 2. Servitus hauriendæ aquæ vel deducendæ biennio omiffa intercidit, & biennio usurpata recipitur.* Nec in servitutibus urbanis tantum, ut Cujacius ad *h. l.* & cum eo Gravina, Cifnerus, Vinnius, Voetius, ac plerique alii voluerunt, sed & quam maxime in rusticis; quia Cicero & Paulus locis citatis exempla rusticarum tantum attulerunt, & magis erat, ut hæc usucaperentur, quia mancipi res erant, urbanæ non item, auctore Ulpiano *tit. XIX. §. 1. Res vero nec mancipi, mobiles tantum, non immobiles usucapionem admittebant. pr. Inst. de Usucap. l. 12. §. 2. D. de Public. in rem act.* Veruntamen quia Paulus absolute ait, usucapionem servitutum deinde sublatam, verius est, & rusticas & urbanas usucapi potuisse.

§. IV.

Hæc ita obtinuerunt, ad Augusti usque vel Tiberii tempora, quorum sub imperio *Lex Scribonia eam usucapionem sustulit, quæ servitutem constituebat*, inquit Paulus noster. Male Haloander *Lex Voconia* legit; hæc enim de hereditatibus mulierum lata erat, nihilque de usucapione sanciebat. Pessimè item Robertus verba isthæc ita explicat, quasi *Lex Scribonia sustulerit servitutum usucapionem*, non quod ante usucapi potuerint; sed quia definiverit, eas non posse usucapi, quum juris regulæ & natura usucapionis sint impedimento. Quid vero est Lectorum ablegare ad capras sylvestres, si hoc non est? Sane pueri sciunt, qui nondum ære lavantur, id quod tollitur, antea obtinuisse oportere, & licet ficta ac impropria servitutum fuerit usucapio, tamen usucapio fuit; sicut Cicero, pleraque Jurisconsultorum ex fictis & commentitiis rebus constare, dixit in oratione pro Murena, c. 12. Illud autem apud Eruditos valde incertum est, lex nostra Consularis, an Tribunitia fuerit. Posterius placuit Cujacio, Hotmano & Balduino, quia Cicero in *Eruto* cap. 23. & Livius *Epit.* 49. Scribonii Tribuni meminere. At hic de libertate Lusitanorum rogationem tulit, quæ nullo modo huc trahi potest, nec silentio eam præterisset Tullius in ea pro Cæcina, ubi multis disserit de usucapione servitutum, tum certe nondum sublata. Magis igitur in illorum sententiam propendeo, qui Legem nostram post ætatem Ciceronis a Consule quodam Scribonio latam existimant. Quanquam vix dici possit, num is fuerit L. Scribonius Libo, qui anno ab V. C. DCCXIX. cum Antonio, consulatum gessit, decimo fere post mortem Tullii, quæ Galvani sententia est cap. 12. de *Usufructu*. An nepos ejus, L. Scribonius L. F. Libo, qui cum T. Statilio Sisenna Tauro, Consul fuit sub Tiberio A.V.C. DCCLXVIII. ut Rævardus contendit *lib. sing. ad L. Scrib.* Galvanum movebat, quod uno tantum nomine hæc lex designatur, quum leges alias a binis Consulibus nomen ferant; tum

G g g 3

quo-

quoque, quod Scribonium Sifenna auctoritate antecesserit, ut Dio indicat lib. 57. adeoque ejus nomen omitti non debuerit. Quicquid ejus est, scio, gloriosum fuisse, legem proprio nomine inscriptam promulgasse, sed & sæpe invidia, odium, aut vis legum latarum cognomen suppressit, ut ex facto Catonis discimus apud Dionem lib. 38. De gente Scribonia vid. Ryckium ad Tacit. lib. II. cap. 27.

§. V.

At vero quid impulit, inquis, Scribonium, ut usucapionem tolleret, prudentiore usu tot annos jam approbatam? Duplicem rationem adfert Paulus, unam Sabini, alteram suam, quia, inquit, *incorporales sunt servitutes, vel ideo, quia tales sunt, ut non habeant certam continuamque possessionem*, in l. 14. *D. de Servitut.* Hæsitat Paulus, tanquam sententiæ incertus; & diffidens quasi rationi Sabini, ad quem scribebat, aliam statim *πρὸς ἀληθειαν*, & in vulgus usitatam adnectit; ferme ac Ulpianus in l. 63. *D. de Ædilit. edit.* In prima Sabinus tanquam certum supponit, sine possessione nullam esse usucapionem; servitutes autem possideri non posse, cum sint incorporales l. 32. §. 1. *d. S. P. V. l. 25. D. de Usurp.* at Paulus statim rationem magis specialem addit, nimirum quod tales sunt, ut non habeant certam & continuam possessionem: ideoque secundum naturam rei evenire, ut possessione amissa, usucapio interrumpatur. Maxime id apparere in rusticis, minus in urbanis, videbatur: nemo enim tam perpetuo & continenter ire agere potest, ut nullo momento possessio ejus interpellari videatur. l. 13. *D. de Usu leg.* At qui tignum semel immisit in ædes vicini, servitute semper utitur, etiam cum dormit; immo licet tignum exemtum sit, dummodo non sit obturatum foramen, in quod fuerat immissum; & tamen ne quidem urbanæ usucapi potuere. Verum Bachovio ad Welsenbecium *tit. de Servit. n. 6.* neutra placet ratio. Schilterus etiam *Exerc. ad D. XVIII. §. 5.* utramque inadæquatam vocat: primam, quia post hanc Legem libertas servitutum usucapi potuit, quæ utique incor-

poralis est : alteram , quod à specie argumentatur ad genus, invita Dialectica ; idem enim observari in servitutibus prædiorum urbanorum mox addit, quarum tamen possessionem magis esse continuam, ipse agnoscit in l. 28. de S. P. V. Eundem fere in modum contra Paulum ratiocinatur Vir Cl. van de Water lib. II. Obs. cap. 18. tandemque concludit, Jurisconsultum aut veram revocati juris veteris rationem ignorasse, aut ei, quæ Scriboniæ legi occasionem dedit, consulto substituisse alias, quæ & servitutum & usucapionis indoli accommodatiores videbantur. Quicquid est, ego Paulum neque cum Eguinario Barone injuria afficiam, nec cum Ræcardo defendam : qui didici, unius rei plures posse dari causas, & Jctos rationibus probabilibus plerumque contentos esse, si de eo, quod juris certi & explorati est, agunt. *Nec enim fere ullæ sunt rationes juris auctorum, quæ non ex aliqua parte claudicant*, ait Cujacius ad tit. Inst. de fiduc. tut. Itaque, omnibus rite expensis, vera Legis Scriboniæ causa, temporis brevitatis fuisse videtur. Iniquum enim existimavit Scribonius, dominis ignorantibus, fundos & ædes spatio biennii servituti aliorum subjici : istis præsertim temporibus turbulentis, ubi inter tot bella civilia patrifamilias rebus suis invigilare non licebat, et media quoque in pace negligentia colonorum inquilinorumque, dominis absentibus plerumque, & rebus urbanis addictis, sic poterat esse damnosa. Nunc quippe, propagatis in immensum Imperii finibus, amplius sic in Italia non continebantur Quirites, ut eam non nisi voti, vel exilii causa egrederentur, pulsisque hostibus, ferro statim posito, rattrum manu lumerent, ut ante ; sed contra accidebat ut, qui Romæ domos, in provinciis prædia possiderent, ibique mercaturæ gratia commorarentur. Placuit ergo S. P. Q. R. revocare strictam XII. Tabb. rationem, præta æquitare mediæ Jurisprudentiæ, litibus paricendis idonea ; quamobrem Paulus in usucapione libertatis aliquando duplicatum tempus concessit l. 7. *Quemadm. serv. amis.* & Justinianus usucapionem compendiosans

sam dominii jacturam appellavit, l. un C. de Usuc. transform. Hac etiam ratione defendi posset, quod Hotmanus malo mori civitatis illam usucapionis concessionem adscribit *lib. IV. Obs. cap. 7.* Immo parum abest, quin suspicer, conceptam tum fuisse, in disputatione Fori, conditionem longioris temporis inducendi, quod & revera a Prætorum mox substitutum est; nec enim Edictum hujus merum, juri civili tum recepto derogare potuisset *arg. l. 1. §. 1. D. de Fer. l. 12. D. de Publ. in rem act.* Hæc conjectura, ni fallor; aliorum rationibus præferenda erit, inprimis Goveani, Viri alias docti & ingeniosi, qui *lib. I. var. lect. 14.* ideo existimat, servitutes non usucaptas, quod in bonis non essent; tempus autem modum esse eas acquirendi, sicut pactum, stipulatio, legatum. At *l. 1. de Us. leg.* longe alium habet sensum; nec tempus, ullius rei est acquirendi modus *l. 44. §. 1. D. de Obl. & act.* Ut adeo ad Saliorum carmina hoc referri mereatur, quæ Fabius scribit, ne ab iis quidem, qui caneant, intellecta fuisse, judice Hotmano *lib. VIII. Obs. c. 10.*

§ VI.

Illud satis constat, lata Lege Scribonia effectum esse, ut ne servitutes in posterum a civibus Romanis usucapi possent. Nec quicquam opus est, ut huic rei firmandæ, argumentum a Seneca petamus, qui Neronis temporibus, *lib. VI. de benef. c. 5.* scribebat. *Jurisconsultorum istæ acutæ ineptiæ sunt, qui hereditatem negant usucapi posse:* quamvis enim servitus, pariter ac hereditas, sit res incorporalis, attamen discriminis rationem jam observavit Huberus *lib. II. Digress. cap. 16.* quod usucapio rerum est singularium, non universalitatis rerum, qualis hereditas habetur. Non magis Aggenum Urbicum ad partes vocabo, quamvis de itinere non usucapiendo sermonem faciat, & nonnulli ad ipsius Tiberii tempora eum referant, saltem ante Pium vixisse constet. En tibi ejus verba, ex Comment. in Frontinum de limit. agr. pag. m. 53. *De sine enim lex Mamilia quinque aut sex pedum lati-*

latitudinem præscribit, quoniam hanc latitudinem vel iter ad culturas accedentium occupat, vel circum ætus aratri, quod usucapi non potest. Non enim iter, qua ad culturas pervenitur, capitur usu, sed id quod in usu biennio fuit. Iter fundo hic oppositum, non præcise notat servitutem itineris, sed magis locum, per quem iter fit; ut verba præcedentia indicant, & Vir longo Celeb. Schultingius me monuit ad Paulum lib. 1. Sent. tit. 17. §. 2. Rectius ergo sola Jurisconsultorum auctoritate hic utemur, in quorum libris plus semel regula juris repetita legitur, servitutes in universum usucapi non posse. Memorabilia hanc in rem sunt verba Masurii Sabini, apud Paulum lib. XV. ad Sabinum in l. 14. D. de Serv. Servitutes prædiorum rusticorum etiam si corporibus accedunt, incorporales tamen sunt; & ideo usu non capiuntur. Idem & in servitutibus prædiorum urbanorum observatur. Intercalaris ratio heic omissa soli Paulo debetur, cetera Sabini sunt: pariter ac Ulpianus lib. 41. ad Sabinum in l. 43. §. 4. D. de Furtis ipsa Sabini verba protulit, ut ex iis quæ Gellius habet l. X. Noct. Attic. c. ult. cognoscitur. Jam vero Sabinum sub Tiberio Cæsare vixisse, certus auctor est Pomponius l. 2. §. 47. D. de Orig. juris. nec peccabo forsitan, si auctorem & suasorem Legis Scriboniæ dicam Sabinum. Huic Titum Cajum adjungo, qui sub Hadriano & post Adrianum clarus, in l. 43. §. 1. de Acq. rer. dom. generaliter scripsit: Incorporales res traditionem & usucapionem non recipere, manifestum est.

§. VII.

Duo pulcherrima Ulpiani & Pauli loca cum his conferenda sunt, sed quæ difficiliorem inspectionem habent. Primas dabo Ulpiano; quia & regulam confirmat, & ex consuetudine ævi sui, exceptionem subjungit, in l. 10. §. 1. D. de Usurpat. *Hoc jure utimur*, inquit, *ut servitutes per se nusquam longo tempore capi possint, cum ædificiis possint.* Ex sententia Cujacii, Goveani & Fabri Domitius scripserat *nusquam usucapi.* Janus a Costa ad decret. pag. 422. post legem

H h h

Scribo-

Scriboniam, servitutes usucapi, nusquam scriptum vel constitutum esse ait, ideoque *prescribi* non usucapi legendum esse contendit. M. Lyklama l. 2. Membr. ecl. 6. *nusquam* interpretatur, nec ruri, nec in Urbe. Sed utut voces *longo tempore* infarsisse Tribonianum non invitus largiar, hoc amplius tamen nihil peccavit; quia servitutes solæ usucapi non poterant, cum ædibus vero, ut bonitas, salubritas, ceteraque qualitates, sunt usucaptæ: quia multa per consequentiam fiunt, quæ directo non conceduntur, arg. l. 62. §. 2. *D. de Acq. rer. dom.* Sic spatium quinque pedum, licet ex lege Manilia nullo modo usucapi potuerit, cum alieni tamen agri parte, longi temporis possessione, acquisitio ejus procedebat l. 2. §. 6. l. 7. §. 1. *D. pro emptore.* Atque hoc ipsum Ulpianus satis indicat per formulam *Hoc jure utimur*, quæ Isti significare solent, aliud oblique, & per circuitum in foro observari, quam per se juris ratio ferat. Vid. l. 1. §. 11. l. 3. *D. de Aqua quot. l.* 18. *pr. de His quæ ut ind. juncta* l. 51. §. 2. *D. Ad leg. Aquil.* At si hæc vera sunt, qui suo ævo potuit scribere Paulus lib. 1. sent. tit. 17. in fin. *Servitius bauriendæ aquæ vel deducendæ biennio omiſſa intercidit, & biennio usurpata recipitur?* Galvanus cum Cujacio respondit, Paulum loqui, non de nova servitute acquirenda, sed de veteri recuperanda: facilius enim rem reverti ad pristinam conditionem, quam de novo constitui. Wissenbach ad *D. Disp.* 20. §. 22. satis habet respondisse; Pauli sententiam, quia in Pandectas non est relata, juris auctoritate constitui. Giphanius ad l. 2. *C. de Servit.* eo delabitur, ut nihil hic certi propter librorum amissionem cognosci aut definiri posse credat. Verum Cl. Schultingius in notis ad *b. locum*, Julium loqui, ait, de illa, quæ plane amissa est usurpanda, sive usu acquirenda: nec enim jus sublatum amplius durat, per l. 98. §. 8. *D. de Solut.* Accipit autem hæc verba de jure antiquo, quod obtinuit ante Legem Scriboniam; quemadmodum Paulus passim ex jure civili sententias his libris inserere amat.

§. VIII.

In locum sublata usucapionis, mox humanitas Prætoris temporis diuturni præscriptionem introduxit. Multa alia sunt hujusmodi, quæ usucapionem effugiunt, & præscriptionem tamen admittunt, quæ diligenter & erudite collegit Janus a Costa ad pr. & §. 7. *Inst. de Usucap. & ad decretal. p. 421.* Sic intervallum illud quinque pedum, de quo in *l. 5. C. Fin. reg. res fisci*, vel civitatis, prædia provincialia, & agri vectigales, tam in Italia quam in provinciis, usucapi non poterant, in quibus tamen locum habuit præscriptio longi temporis, tanquam remedium subsidiarium usucapionis, ne bonæ fidei possessori tanto tempore quæsitæ possessio temere auferatur. Unde Dioclet. & Maximianus in *l. 2. C. In quib. caus. cessat.* eleganter Dionysio rescribunt, in negotiis, ubi usucapio procedit, ad quæstionem longi temporis præscriptionis superfluo perveniri. Sed in his exemplis beneficio Principum præscriptio concessa erat; nostra a Prætoribus introducta est, sedemque habet in famosa *l. 10. D. Si serv. vind.* cujus verba adscribo: *Si quis diuturno usu & longa quasi possessione, jus aquæ duende nactus sit, non est ei necesse docere de jure, quo aqua constituta est, veluti ex legato, vel alio modo: sed utilem habet actionem, ut ostendat per annos fere tot, rem se non vi, non clam, non precario possedisse.* Inscriptio legis Ulpianus lib. 53. ad Edictum, & mentio utilis actionis satis arguunt Prætorium hoc remedium esse; unde & Magistratibus, qui jurisdictioni præfunt, illud tributum videas, ut tueantur ductus aquæ, quibus auctoritatem vetustas daret, tametsi jus non probaretur, in *l. fin. D. de Aqua & aq. pluv. & officio Prætoris nominatim in l. 1. §. ult. D. de S. P. R.* Quatuor autem, ut officium suum impertiatur, exigit Prætor, (1.) ut præscribens ultro usus sit fundo alieno (2.) tanquam serviente, (3.) non vi, clam vel precario (4.) per tempus diuturnum. Titulus ad hanc usurpationem non requiritur, non quod servitutes modici sunt præjudicii, ut Dynus & Bartolus agebant: quid enim

H h h 2

gra-

gravius est, quam fundum nostrum affici servitute? sed quia nititur ipsius domini patientia, qua nullus titulus magis naturalis est. l. 28. *D. d. V. S.* quam rationem Faber lib. XIX. *Conject. c.* 10. una cum laudatis requisitis, pluribus illustravit. Duareno autem dissentienti lib. 1. *Disp. c.* 34. satisfecit Donellus lib. XI. *cap.* 12. Schifordegerus lib. I. *tract.* 6. *qu.* 1. *segg.* & Vinnius l. 1. *Sel. quest.* 31. Nec bona fide opus est; quia tertium requisitum diluit quicquid a mala fide labis vel vitii adspersi præscriptioni potest. Unde summa præscriptionis hujus æquitas simul & utilitas intelligitur; nominatim enim ait Paulus: *minuendarum titium causa*, quæ frequentissimæ inter vicinos oriri poterant, vetustatem semper hic pro lege haberi l. 2. *pr. D. de Aqua & aq.* & Ulpianus *vetustatem vicem legis tenere in l. 1. §. f. eod.* Nonne enim verisimile est, dominum, qui in fundo suo, quem possidet, alium servitutem palam exercentem & fistulas v. gr. tubosve ponentem, nunquam prohibuit, imo ne solennem quidem testationem interposuit, patientia & silentio suo, in servitutem consensisse? Aut si tam perditæ supinus fuerit, ut quem ceteri omnes eo in fundo ire ambulare videbant, servitutem sibi quærere non intellexerit, sic merito negligentia suæ pœnas luit, ne melioris sit conditionis stultus, quam peritus, ait Venulejus in l. 4. *D. Quod vi aut clam.* Junge l. 6. *pr. D. de Usuris l. 9. §. f. D. de Juris & facti ign.* Egregie dicebat Varro: *Boni patrisfamilias esse, singulis annis rerum suarum rationes inire, & si quid defuit, altero anno requirere; mobilium singulis quoque semestribus.*

§. IX.

Ad hanc præscriptionem omnia Pandectarum loca referenda sunt, in quibus dicitur, servitutes ex usu temporis acquiri. Notandum autem valde, Jurisconsultos timide & verenter de ea loqui, tanquam longius recedente a ratione juris; unde nusquam præscriptionis vocabulo, sed *patientie* & aliis ejusmodi vocibus eam designarunt. Ulpianus in l.

11. §. 1. D. de Public. in rem act. *Servitutibus urbanorum prædiorum per traditionem constitutis vel per patientiam.* Idem in l. 1. §. ult. D. de S. P. R. *Traditio plane & patientia servitutium inducet officium Prætoris.* Plane anomala & extraordinaria prorsus est hæc præscriptio: ut Illustri Coccejus, disputatione singulari, eam nominavit, & esse ostendit. Quum enim in ordinaria Constitutionibus Principum tempus longum esset definitum, inter præsentis 10. inter absentes 20. anni l. 76. §. 1. D. de Contrab. emt. Extraordinariæ tempus Prætoris iudicio relictum fuisse videtur, qui vetustatem, & longam consuetudinem, cujus initii memoria non extaret, plerumque requirebat, per l. 1. §. ult. l. 2. pr. & §. 7. l. ult. de Aqua & aquæ pluvi. l. 3. §. 4. de Aqua quotid. Hos vero textus auctor l. 2. C. Th. de Præscr. long. temp. in animo habuisse videtur, quando ait, in legibus anterioribus, præscriptionem quadraginta annorum *vetustatem* appellari. Summus Cujacius, in alia omnia abiens, vetustatem in dd. II accipit pro spatio vigintiannorum, & l. 2. corruptam pronunciat lib. XVIII. *Observ. c.* 28. sed Janus a Costa ad *Decret. p.* 424. & Jacobus Gothofredus ad l. 2. C. Th. de Longi temp. *præscript.* quantum satis est, ejus argumenta excusserunt. Porro ad ordinariam possessionem erat necessaria, quæ re rem tantum est corporalem, nec sine justo titulo contingebat. Contra ad hanc usurpationem sufficit quasi possessio rerum incorporalium, nec titulus requiritur, cujus vicem domini patientia subit. Proinde Jcti non usu longo impositam servitutem, sed velut jure impositam; non servitutem quæsitam, sed quasi servitutem, &, quod idem valet, longæ possessionis prærogativam ac consuetudinem per quasi possessionem acquiri dixerunt. Sic Ulpianus in l. 1. in fin. D. de Aqua & aquæ pluvi. *Ubi servitus*, inquit, *non invenitur imposita, qui diu usus est servitute, neque vi, neque precario, neque clam, habuisse longa consuetudine vel ex jure impositam servitutem videtur, eritque ista quasi servitus.* Rursus in l. 5. §. pen. D. de Itin. act. priv. ita loquitur:

Si quis servitutem jure impositam non habeat; habeat autem velut longe possessionis prerogativam; & Antoninus Caracalla in l. 1. C. de Servitut. Is, qui judex erit, longi temporis consuetudinem vicem servitutis obtinere sciet. Idem in l. 2. eodem. Servitutem, exemplo rerum immobilium, tempore quaesisti. Tuetur igitur Prætor hanc acquisitionem, quia in servitutibus usus pro possessione esse videtur l. ult. D. de Servit. & earum quasi possessio est l. 10. D. Si serv. vind. immo, quoad effectum juris, nonnunquam absolute & naturaliter possideri dicuntur l. ult. D. de liti. act. priv. l. 20. D. de S. P. V. l. 2. D. Comm. præd. l. 12. D. de Acq. poss.

§. X.

Hæc præscriptionis hujus fuerunt fata, usque ad Justinianum. Is vero transformata licet præscriptione in usucapionem in *l. un. C. de Usuc. transf.* servitutes retro usucapi noluit, quemadmodum nonnulli cum Græcis loquuntur. Hos inter Cujacius olim fuit, sed is rectius sententiam mutavit, ut ex *Parat. Cod. de Præscript. longi temp.* colligi posse videtur. Adæquatio enim ista ad tempus & loca, ut & res Mancipi & nec Mancipi, non ad discrimen rerum corporalium & incorporalium pertinuit; qua de re Janus a Costa ad tit. 26. lib. 11. *Decretal. pag. 423.* & Galvanus cap. XI. *Diff. de Usufr. n. 17.* conferantur. Porro ex *dd. l. 1. & 2. C. de Serv.* colligi quidem posse videtur, jam tempore Antonini, ordinariam præscriptionem in servitutibus esse admissam: nil certi tamen ex verbis, *exemplo rerum immobilium*, definiri potest; quia scimus, rescripta Imperatorum ad species nobis ignotas dari consuevisse, nec verba eorum omnia continere decisionem. Nunc vero plenius Imperator præscriptioni extraordinariæ superaddidit ordinariam; hoc effectu, ut decem annis inter præsentis, viginti inter absentes servitus acquiri possit. Quum enim in *l. ult. C. de Præscript. long. temp.* multa constituisset, circa præscriptionem longi temporis, tandem in fine subjicit: *Eadem observanda & si res non solum sunt, sed incorporales, qua-*

in

in jure consistunt, veluti ususfructus, & ceteræ servitutes
 Quod si ergo patiente vicino aquam ex ejus puteo hauriam, non præcedente contractu, locus adhuc est præscriptioni anomalæ, de qua tollenda Justinianus nihil dicit. Sin vero a vicino non domino servitus est vendita, legata, donata, aut alio titulo mihi constituta, qui ignoro vicinum verum non esse fundi dominum, præscriptio ordinaria obtinebit. Atque in hac titulo & bona fide omnino opus est: bona fide, quia servitute usus non videtur, nisi is qui jure suo uti se credidit *l. fin. D. Quemadm. serv. amitt.* Titulo, propter *l. 27. D. de Usucap. l. 24. C. de Rei vind. l. 4. C. de Præscript. long. temp. l. 8. C. de Præscript. 30. annor.* quibus ita demum dicitur præscriptio procedere, si quis emtionis, legati vel alio titulo possedit. Et ratio adstipulatur, quoniam traditio sine titulo alias foret nuda, quæ jus in re non transfert, & sic precario servitute possessor uteretur. Nihil etiam notius, quam, titulo deficiente, præscriptionem longissimi temporis & triginta annorum decursum desiderari, per *d. l. 8. §. 1. C. de Præscr. 30. ann.* Ceterum scientia veri domini, neque in ordinaria neque extraordinaria præscriptione, necessaria videtur: non in hac, quia *l. 10. D. si serv. vind.* nihil aliud, quam usum diuturni temporis exigit: nec in illa, quia *l. fin. C. de præscript. long. temp.* scientiam vel ignorantiam non atendi docet, illis verbis: *Nulla scientia vel ignorantia expectanda.* Accedit Paulus in *l. 28. D. de V. S. Alienationis*, inquit, *verbum etiam usucapionem continet: vix est enim, ut non videatur alienare, qui patitur usucapi.* Idem longioris temporis silentio finita judicio terminatis, & transactione compositis comparavit in *l. 230. D. de V. S.* Ipsa denique præscriptionis ratio hoc dicitur, quæ ad puniendam desidiam dominorum, sive scientium, sive res suas non curantium, introducta est. Ad *l. 16. D. Si serv. vind. & l. 2. C. de Servit.* quibus Corasius, Connarius, Giphanius & Bachovius in omnia alia cunctes, nituntur, videatur Galvanus *Diff. de Usufr. cap.*

cap. 21. §. 9. Bronchorstio autem Zacharias Huberus satisfecit, in Dissl. An usucapio perimat jura in re, c. 4. §. 3. Sit igitur conclusio, jure novissimo tribus modis servitutes per præscriptionem acquiri (1.) modo illo extraordinario, si quis fundo alieno utitur non vi, non clam, non precario (2.) Præscriptione ordinaria longi temporis, si bona fides & justus titulus adsint. (3.) Triginta annorum possessione, si a non domino accepit & titulo destituitur præscribens. Quartus modus addi possit, cum id prædium usucapitur, cui servitus debetur l. 10. §. 1. de Usucap. Sed revera tum nova servitus non constituitur, quia prædium suæ conditiones sequuntur l. 23. §. 2. D. de S. P. R.

§. XI.

Hoc pacto si quinque illa tempora hætenus recensita distinguantur, omnia tranquilla sunt, quæ deinde superiorum temporum interpretes rursus turbaverunt, adeo ut vulgaris error lubrico lapsu pervaserit in mores regionum. Tres diversas sententias recensuit Hertius, & confutavit in Dissl. de Servit. facto const. Sect. 2. qui tamen ipse non satis præscriptionem ordinariam ab extraordinaria discrevit. Practicorum vero antesignani Bartolus & Baldus famosam in hac questione distinctionem, inter servitutes continuas & discontinuas introduxerunt, quos deinde Balbus de præsc. 4. part. 2. qu. 1. Cæpolla de Servitut. urb. præd. cap. 20. Fachinæus l. 8. contr. c. 22. & plerique alii, ut grus gruem, secuti sunt. Continuas vocant, quæ sine facto hominis exercentur: ut sunt pleræque servitutes urbanorum prædiorum; tigni immittendi, oneris ferendi, & id genus aliæ. Discontinuas, quarum usus non est, nisi hominis facto intercedente; veluti iter, de quo Paulus scriptum reliquit, neminem tam continenter tamque perpetuo ire posse, ut nullo momento ejus possessio interpellari videatur, l. 14. D. de Servit. & alibi: *vix servitus una est; quia natura sui habet intermissionem*, in l. 13. D. de Usu & usufr. leg. Illas longo tempore; has, si titulus absit, immemoriali

reali præscriptione acquiri volunt. Non equidem negari debet, alias servitutes continuum usum & possessionem habere, alias non item: nec enim in æternum pluit, nec jus pascendi hieme exerceri potest; & fontis alia, quam stillidii est ratio. Id vero ad præscriptionem facit nihil: tum quia sufficit omnium servitutum causam esse perpetuam, id est aptas esse, ad utilitatem recipiendam & præstandam; tum quia earum possessio, cum semel coeperit, animo retinetur. *l. 28. D. de S. P. V. l. 9. D. de S. P. R. l. 3. § 7. D. de Acq. possess. l. 1. §. 2. D. de Itin. æd. priv.* Hactenus igitur recte ea distinctio primum a Johanne Longovallo, in tractatu suo ad *l. 3. D. de Jurisd.* tentata, deinde conspirantibus suffragiis a Barone, Duareno, Connano, Fabro, Donello, Schiffordegkero, & Cisnero rejecta est & repudiata. Inaudita enim Prudentibus nostris sunt nomina continuarum & discontinuarum servitutum: deinde aqueductus ex earum numero est, quas discontinuas vocant, & tamen, exemplo rerum immobilium, longo tempore acquiri potest *l. 2. C. de Servit.* Quinimo de omnibus servitutibus generalis definitio est, quod longo tempore acquirantur in *l. ult. in f. C. de Præscr. long. temp.* ubi nominatim quoque cavetur, usumfructum hoc temporis spatio præscribi, cum tamen idem fere, quod de itinere Paulus scribit, in hanc servitutem quadret. Certe dormiens non magis uti frui dici potest, quam actus animi & voluntatis non nisi in vigilantem cadunt. Vide tamen ad dict. *l. 13. D. de Usu & usufr. leg.* Cujacium *l. XIV. Obs. cap. 18.* Adde quod servitutes, etiam discontinuæ, longo tempore amittuntur *l. pen. C. de Serv.* ergo eodem ut acquirantur, & ratio suadet, & arg. *l. 35. D. de R. 7.* Si quæras, quibus locis & rationibus veteres illi dissentientes, in re tam perspicua, decepti sint? Scias velim, hos potissimum textus in eorum sententiam detorqueri, *l. 14. D. de Serv. l. 28. D. de S. P. V. l. 3. §. 4. D. de Aqua cottid. l. 1. l. 2. C.*

de Servit. & verba, per annos fere tot, in l. 10. D. Si serv. vind. At si curatius ea omnia inspicias, collectiones & argumenta inde desumpta, non modo pro istorum sententia non facere, sed vehementer eam quoque oppugnare animadverteres, ut Antonius Faber lib. XIX. *Consect.* c. 9. 10. & 11. solide demonstravit; licet nec is distinctam & plenam præscriptionis extraordinariæ habuerit ideam. Ad usum item regulæ l. 28. quod attinet, neque in ejus applicatione, quoad prædia dominantia sibi constituisse Jurisconsultos, neque quod ad servientia eam foro placuisse Viri Clarissimi Thomasius in *Dissert. Lips. de Servit. siliic.* §. 26. *segg.* & Tinius *Obs.* 244. ad *Laut.* ostenderunt, quorum scripta non compilo.

§. XII.

At quid in praxi? Error jus fecit. Siquidem unanimi Pragmaticorum calculo approbata est sententia, solas continuas longo tempore acquiri, in discontinuis seu rusticis vero opus esse præscriptione immemoriali. Ita Carpzov. p. 2. c. 4. *def.* 8. Brunnem. ad l. f. C. de Servit. Kœppen *decis.* 97. Lauterb. *Concl. for.* 2. *exerc.* 18. Hancque sententiam in Camera Imperiali receptam, confirmant Gail. l. 2. *Obs.* 66. n. 7. Myns. *cent.* 4. *Obs.* 53. Klock. *Vot. Cam. relat.* 131. n. 24. Et de usu ejus in Hispania, Delphinatu & Bavaria Dd. apud Stryckium *Us. Mod. lib.* 8. *tit.* 1. §. 6. testantur. Certe quum ipsa ratio prudentiæ civilis, quæ Legem Scriboniam suavit, heic quoque adsit, ne compendiosa libertatis jactura frequentetur: quumque durum sit, ut dominus invitus in re sua aliquid patiatur: nec servitutes, velut stricti juris, ulla interpretatione juvari debeant: & usus denique optimus legum interpretes habeatur: ideo consultius duco, cum prudentissimo Schiltero, receptam hanc in foro sententiam sequi, quam cornicum oculos effodere, *Exercit.* 18. ad ff. §. 7. Inprimis, si restringatur ad casum, ubi de titulo non constat: nam si titulo servitus sit acquisita, bonaque fide possessa, etiam discontinuas longo tempore acquiri, concedunt Brunn. ad l. 2. C.

de

de Servit. Wurm. tit. 27. Obs. 5. Bene Mevius p. 9. decis. 164. Nimis, inquit, durum & iniquum iudicarunt, ut dominus, qui ex jure domini fundatam intentionem habet, servitutem perpetuam ideo tolerare cogeretur, quod per illud tempus alter suo fundo usus est, cum id seu vi, seu clam, seu precario, seu vicinitatis occasione, seu familiaritatis causa fieri potuerit: visumque est, nec cum bona fide aliquem, qui ejus titulum non habet, hoc prætere, ideoque nec præscribere posse. Non aliter igitur sine titulo præscriptionem admisit, quam si per tempus, cujus non exstat memoria, quis servitute usus esset. Quam opinionem, ut rationi convenientiorem, æquiorē, communiorē, & cum alibi in praxi forensi, tum in Camera Imp. receptam, in summo Tribunali sequi placuit. Quid autem sit præscriptio immemorialis, qua discontinuæ acquiruntur, non convenit inter Doctores. Alii centum annos requirunt, alii centenaria majorem tantum admittunt. Verum bene notatum est a prudentioribus Jurisconsultis, certum tempus hic definiri non posse, quia sufficit neminem, qui initii meminerit, superesse. Id enim tempus, licet limites certos habeat, per humanam imbecillitatem pro infinito habetur l. 3. §. 4. D. de Aq. & aq. pluv. c. 26. X. de V. S. Grotius videatur lib. 11. d. 7. B. & P. c. 4. §. 7. & Coccejus jur. contr. lib. 41. tit. 3. qu. 32. In Saxonia præscriptiones longi temporis extensæ sunt ad 31. annos, 6 septimanas & 3. dies, ideoque servitutes rusticas tot annis etiam acquiri, communiter asseritur. Carpz. l. 1. Resp. 36. n. 3. Richter. p. 1. decis. 21. n. 59. Berlich. part. 2. concl. 6. n. 13. Anni, hebdomadam & dierum additio facta, ut exacta licet præscriptione, modicum adhuc spatium haberent defides, quo actionem instituere, moramque purgare possent; qua de re plenissime Eruditissimus Gundlingius, parte XXVI. Gundling. Apud Batavos præscriptio servitutum & continuarum & discontinuarum triente sæculi adimpletur. Grotius Manud. ad Jurispr. Holl. lib. 2. cap. 36. n. 4. Sec-

culum enim *tres ferme* hominum ætates continere, aut *tres efficere* solet, ut post Herodotum in Euterpe, & Plutarch. de defectu oracul. Herodianus lib. III. cap. 8. & Porphyrius in Homericis quæst. notarunt. Servius annos triginta *seculum brevius* appellari quibusdam ait, ad V. Æn. 508. Gallis *sexta Luna principia sæculi facit, post tricesimum annum*, ait Plinius l. b. XVI. H. N. c. 44. Illud quoque variorum locorum statutis & consuetudinibus obtinuit, ut si quis sciente vicino aliquid ædificaverit, vel cum eo ignorante opus perfectum esset, is deinde intra annum & diem non contraxerit, destructio deinde non impetretur, sed is, qui ædificavit, ad id quod interest, vicino tantum condemnatur. Argentreus ad *conf. Brit. ant.* 371. Voet. ad *ff. lib. 8. tit. 4. §. 6.* Nec hoc monere prætermittam, si alter vicinorum jus quoddam ex libertate naturali exerceat, alter vero jure suo contrario longo tempore vel immemoriali usus non sit, inde servitutem non acquiri. V. gr. si Cajus parietem suum aperuerit, & fenestras confecerit, Titius vicinus autem lumina istæ non obscuraverit, nec arbores plantaverit, nec altius sustulerit ædes suas, perperam inde Cajus servitutem ne luminibus officiat, vel altius non tollendi sibi asseret, quia rebus meræ facultatis, non præscribitur, ut constat ex l. 8. & 9. C. de *Servit.* & pluribus deduxit Heroldus *Obs. for. dec.* 29. Idem dicendum, si quis ex familiaritate, vel ad preces vicini, jure aliquo longo vel longissimo temporis spatio non utatur l. 2. §. 2. l. 15. D. de *Precar.* Mev. p. 9. *decis.* 165. n. 6.

§. XIII.

Supereſt de remediis agamus, quæ præſcriptione ſervitutis adimpleta conceduntur. Equidem præſcriptio ſui natura tantum eſt exceptio, non actio: nihilque intereſt, ſive exceptionem rei judicatæ, doli, metus, rei venditæ, litigioſi, pacti, temporis, jurisjurandi dixeris, ſive præſcriptionem, l. 11. D. de *Except.* l. 91. D. de *Solut.* l. 5. D. de *Ac-*

Accusat. Hoc significatu Tertullianus librum de *Præscriptionibus*, id est, exceptionibus & defensionibus *adversus hæreticos* scripsit: & Cicero lib. II. ad Herennium: *Præscriptio sive translatio esse videtur quedam exceptio.* Item Fortunatianus Rhetor lib. I. *Quid interest*, inquit, *inter Præscriptionem & Translationem?* quod *Præscriptio* excludit actionem: *Translatio* autem differt. Ratio appellationis a Græcis petita est, qui exceptionem vocabant παραγραφή, id est, *præscriptionem*, eo quod tota facti series verbis judici præscriptis erat demonstranda. Ita plus semel usurpavit Demosthenes *contra Midiam*, aliique Oratores. Sed optime notavit Suidas, peremptoriam exceptionem hoc nomine magis significari, quam dilatoriam, v. c. si res jam prius judicata esset: quod & Plutarchus in *Quæstionibus Romanis* confirmat. In libris autem nostris, temporum exceptiones regulariter & frequentius præscriptiones dicuntur. Cum enim vindicanti rem suam domino possessio longi temporis objicitur, præscribi ei dicitur, præcisa & imperfecta locutione. Ulpianus in l. 5. §. 1. D. de Divers. temp. præscr. *Exceptione longæ possessionis uti possit*; & Justinianus l. 11. C. de Præscr. long. temp. *memorata longi temporis exceptio.* Adeo autem Præscriptio exceptionem tantum parit, ut ex sola tantum 30. annorum præscriptione actio directa detur, cum bona fide subnixa est. l. 8. §. 1. C. de Præscr. 30. ann. Ei vero qui non vi, clam vel precario usus est, conceditur a Prætoris utilis confessoria, perinde ut ex servitutibus l. 10. D. si serv. vind. eaque non servitutes modo, sed publica quoque jura, quæ usu, inprimis Germaniæ, patrimonialia sunt facta, & quæ instar servitutum in alieno exercentur, uti jura patronatus, venationum, piscationum, quin ipsæ jurisdictiones, etiam criminales, seu merum imperium, ceteris paribus, vindicantur. Brunn. ad d. l. 10. n. 2. Gail. l. 2. Obs. 66. n. 1. & seqq. Zas. l. 1. sing. c. 11. ubi *innominatas servitutes* vocat. Denique & inter-

dicta eadem dantur præscribenti, quæ ex servitute dari solent. l. 1. §. ult. D. de Aqua & aque pluv. l. 1. §. 2. D. de Itin. actuque l. 3. §. 4. D. de Aqua cot. & æstiva. Conferatur Illustris Cocceji Disputatio de Præscriptione extraordinaria ad l. 10. Si serv. vind. §. 83. & seqq.

FINIS.



DIS-



DISSERTATIONIS NONÆ,
 DE
CONSULIBUS,
 QUI EXTRA ROMAM,
Occasio & scopus.

DE Consulibus Romanis eorumque officio, dignitate & insignibus anquisite satis satisque sollicitate egerunt multi, iique Antiquitatum Romanarum peritissimi Viri; sed majore cum apparatu & diligentia eos exornavit Petrus Faber, Jurisconsultus: quia Marcellum & Ulpianum libros de Officio Consulis scripssisse, & Jus Publicum in Sacris, Sacerdotibus & Magistratibus consistere sciebat. Subit vero animum cogitatio, qui factum sit, ut plerique Romanis tantum fuerint intenti; reperiatur autem nemo, qui Consules extra Romam professâ opera probavit, & iverit illustratum. Quamobrem Officiâ Consulûm; quibus libens meritoque interfui non pridem, & Urbis Trajecti dies, quam vidimus, natalis me monebat, uti curatius paulo & diligentius, quam oîm, in libro de Ædilibus coloniarum singulari, feceram, Consules hosce in lucem proferrem. Non quod verebar, ne nobilissimæ hujus Metropolis Rectores
 no-

nominis controversiam a rigidis Aristarchis paterentur, quibus nullus, nisi Consul Romanus placet: sed partim, ut ex antiqua formula, *Avete Amplissimi Consules* acclamarem; partim etiam, ut res scitu jucundissima, ex lapidibus litteratis, & varii ævi auctoribus, & nostris, id est Jurisconsultorum thesauris confirmaretur. Qui enim horis subsecivis in Philologorum castra, non ut transfuga, sed tanquam explorator, transire soleo, nonnulla videbar observasse; ex quibus hoc subitarium paucorum dierum dicam, an noctium, schediasma decerpendum duxi. Stimulos addebat Arcadii & Honorii constitutio, qua *votis communibus* annum felicem olim apertum testantur, *l. un. C. de Oblat. vot.* Ipse festas Romanis fuisse Kalendas Januarias, totasque in lætitia & gratulationibus positas, in mentem mihi revocabam. Tunc maxime Quirites gratam recuperatæ libertatis memoriam recolebant, & præstito solenni jurejurando, pro æternitate Reipublicæ, pro honore Senatus, pro Civium salute vota nuncupabant & persolvebant. Et quid vetat, Musas nostras, priscum illud Consulare carmen: *Quod bonum, faustum, felix, fortunatumque sit* concinuisse? Major equidem, in illa terrarum Dea gentiumque Roma, Consulatus fuit splendor; summa ejus domi auctoritas, & militiæ potestas. In liberis tamen Rebuspublicis Consules eandem hodie in fluvio suo gubernant navem, quam olim Duumviri in mari Ægeo Populi Romani. Illorum nomina annos signabant, & rebus gestis ad memoriam temporum præscribebantur: Christianos autem, inde a Caroli Magni usque & Caroli Crassi temporibus, non puduit a nato Salvatore suo, fato ad invidiam felici, annos numerasse. Cessent licet formidata illa Orbi Romano insignia, vestis palmata, scipio eburneus, calcei aurati, sella curulis, aliaque Imperatoria, vel certe triumphalia ornamenta: nostrates animo, fide, gravitate, cura & vigilantia Consules agunt, nec fascibus, aut securi vim minantur. Quinimo sicut Clarissimis olim toga vel sago Vi-
ris,

ris, ad memoriam apud posteros prodendam, nihil amplius visum fuit, quam ebur illud curule in nobilissimas familias aut intulisse; aut partum a maioribus conservasse; aut, quod nummis & faxis insculpere gaudebant, verum, tertium aut quartum obtinuisse: sic & nostris temporibus, haud postrema felicitatis pars est, ad moveri ad Reipublicæ clavum, capeßere curas Civitatis, Patriæ utilitatibus invigilare, & publico cunctorum testimonio intelligere, recte atque ordine personam, in partibus creditis, hætenus gestam esse, Urbisque dignitatem porro prudentiæ nostræ commendari. *Gubernacula Urbium probatos administrare, ipsa magnitudo deposcit*, Honorii vox erat, in l. 171. C. Th. de Decurion. & *Fasces repetitos virtutis merita comprobare*, Theodosius & Valentinianus Augusti rescripserunt, in l. 1. C. de Consulibus. Ceterum fallitur, qui tribunitios furores, & alia longo ævo sepulta, in hoc scripto a me expectat: nam didici a Platone, bono civi nihil magis convenire, quam a civilibus controversiis abesse. Nolim etiam quisquam existimet, me adeo esse amantem mei, ut ea, quæ viros in hoc studiorum genere versatissimos latuerunt, a me proferri possë credam. Id tantum censeo, quæ ad antiquitates Consulares pertinent, necdum exhausta esse omnia, neque supervacuum in iis laborem poni longiorem: licuit & licebit meliora investigare præceptis. Si qua vero severis Catonibus audacior aliquando videatur conjectura nostra, non tantum veteris ævi caligo causam orabit; verum Urbis quoque amor perfugio erit, cujus memoriam cupio ire propagatum. Sed longa præfatio, longum malum; ad rem ipsam accedamus. In hujus tractatione ordinem istum sequar: ut capite primo, originem propagati nominis Consularis in coloniis & municipiis ostendam. Altero autem summos antiquæ Batavorum civitatis, & urbium Germaniæ Magistratus, una cum eorum insignibus, fatis & nominibus complectar. David Mevius, non videns, qui titulum Consulis, liberæ in Imperio civitatis capitibus, ex antiquitatum

monimentis assereret, morose satis scribebat in comm. ad jus Lubec. lib. 1. tit. 1. n. 12. *Postquam usus, quo voces non secus ac nummi valent, ea vulgavit nomina, & dignitates priscas aboluit, otiosum est, rebus elapsis & immutatis, antiquitatem & subtiles significationes aucupari, praesertim ubi ipsum nomen ejusque virtus ad praesentia quadrat. Qua in re multos sine fructu operosos, scrutinio suo lepidos deprehendes, qui dum verba quaerunt, rerum incitiam proficiuntur. Verum cum titulus sit index dignitatis, & verborum pariter ac rerum cura sit habenda, non puto, me otio abuturum, si curatius in nominis Consularis fata inquiram:*

Ne pereat tam priscus honos, qui portus honorum Semper erat.

C A P U T I.

DE

Consulibus Coloniarum & Municipiorum.

- §. 1. *Argumenta hos negantium, Velferi, Reinefsi & Ruperti. II. Colonia summa urbis dominantis in omnibus, etiam in voce Senatus & Senatorum. Dodwellus negatur. III. Simulacra ornamentorum Consularium in municipiis, bisellium, praetexta, tribunal, bulgus & fasces. Horatiolux. IV. Praetores, Censores, Dictatores municipales. V. Capua pro Medixtricis Duumviri, ex his Consules Campani. VI. Carthago pro Suffetibus Duumviros, pro his Consules accepit. Vaillantius lapsus. VII. Nubes Consulium municipalium ex lapidibus, nummis, historia. VIII. Lapides, ad quos offendit Scaliger, excusantur. IX. Consules in l. 3. D. de Minoribus & l. 30. D. de Acq. vel. om. her. expensi. X. Florus, Ausonius, Prudentius illustrati. Velferus & Aldus reprehenfi. XI. Respondetur ad dissentientium argumenta. Titulus D. de Officio Consulibus illustratur.*

§. I.

QUaestum fuit apud paucos, sed Principes Philologorum, an Duumviri vel Quatuorviri, qui splendidas olim

olim colonias, aut florentissima commercii municipia re-
 xerunt, Consulum nomen affectarint, illudque saltem domi
 suæ obtinuerint, stante imperio Romano? Nullo modo id
 sibi persuaderi posse, proficitur Velserus lib. V. Rer. Aug.
 Vindelic. pag. 272. Solam quoque Romam Consules, cum
 aliis non communicandos, habuisse, ait Vir summus, ac mi-
 nime credulus, Thomas Reinesius lib. III. Var. lect. c.
 16. cujus sententiæ, præter Rupertum ep. XXVIII. subscri-
 bit Vir Celeberrimus, & hujus Academiæ quondam orna-
 mentum singulare, ad Ausonii claras urbes pag. 262. no-
 tans: *Reſtores primos urbium provincialium, coloniarum &
 municipiorum, nunquam Consules appellatos esse.* Scaliger con-
 tra, Summontius, Capacius, & Frenius rectius id affirma-
 runt; sed testimoniis minus idoneis, certe quæ non sunt
 omni exceptione majora. Bipartita ergo contra utrosque dis-
 putatio nostra erit, & quidem rationes, quæ tantos Viros
 moverunt, aut movere potuerunt, ut nomen hoc in du-
 bium vocarent, primo loco proponemus. Causantur, in-
 credibile videri, Duumviros adeo omnem exuisse pudorem,
 ut summum illud Consulare nomen affectarint, qui cum
 suis colonis eundem conditoribus honorem, quem liberi pa-
 rentibus debebant, ut Livius lib. XXVII. c. 9. & Curtius
 lib. III. c. 2. docuere. Consulum præterea nominibus pu-
 blica instrumenta colonos signasse, iisque statuas, signa alia-
 que opera publica dedicasse, ad obsequium testandum. Ne-
 quaquam vero eorum rectores ausos fuisse, sibi arrogare no-
 minis decus, quod velut peculium adsciverat Roma; quum
 libertas recuperata, exactis regibus, non aliud aptum ma-
 gis, & civile & patrium reperiebat? Addunt, vix esse, ut
 Patritii ferre potuerint, cum Equite municipali, aut cum
 Duumviro coloniarum communicari summum honorem, ad
 quem ipsi, tanquam ad portum, precibus & pretio, adspi-
 rabant. Hoc amplius Pomponius & Zonaras testantur, ma-
 luisse Patres olim plebi consularem concedere potestatem,
 quam Consulum nomen; ceu apicem Aristocraticæ auctori-
 tatis,

tatis, quique non parum de regio imperio retinebat. Multo minus igitur id largiri voluisse videntur, ignotis & obscuro loco prognatis, quos *municipaliter natos, municipale vulgus, homines municipales, Oratores & Poëtas municipales* contemtim appellabant, quorumque Magistratus pariter, ac Deos, pro minus legitimis habebant, ut Tertullianus in Apolog. c. 4. testatur. Quid? quod ipsi Imperatores, consortis impatientes, perpetuo hoc dominationis arcano, vel si inavis, legitimæ potestatis simulacro usi sunt: quia nulla Romæ dignitas, etiam post imminutum & enervatum consulare robur, isthac habebatur major; qua si caruisset Princeps, privatus in Republica primas tenere visus fuisset. Julianus sane, ubi Principes refert alias Reip. dignitates abolevisse, alias retinuisse, Consulatus tamen dignitatem adeo parum ab iis contemptam, ait, ut eadem ad annum unum assumpta gauderent, Orat. 111. pag. 108. *Fugis quidam & indefinens Consulatus* Imperatori tribuitur a Justiniano Novella 105. c. 2. & Jornandes de Rebus Geticis c. 57. pronunciavit: *Factusque est Consul ordinarius, quod summum bonum primumque in mundo decus dicitur.* Sic ergo Quatuorviri illi, Criticorum principes, forsân nunc quærent cum Claudiano in pr. Conf. Stilich. §. 288.

- - - *Titulumque levem parvique nitoris
Credimus, Augusti quem se decorare fatentur?*

§. II.

Verûmenimvero licet ex his satis verisimile fiat, Duumviros a Romanis summum illud dignitatis nomen haud obtinuisse: meo tamen, ne qui in universum coloniis & municipiis illud auferunt, pro Junone nebulas amplectantur. Principio constat, colonias, per omnes mundi tum cogniti partes late dispersas, omni cultu, usque ad ambitionem, id egisse, ut cunctarum rerum similitudine speciem Urbis parentis apud se effingerent, & fugientem deinceps Romani nominis umbram, intra mœnia sua tuerentur. Solenni enim more receptum erat, ut coloniæ linguam, Deorum

rum simulacra, formam templorum; sacra, ritus, antistites, symbola, festa, leges, vestitum, habitum, circos, stadia, capitolia, theatra, maxime vero Magistratus antiquæ patriæ suæ adsumerent & retinerent; ut Valesius ad Excerpta Polybii & Spanhemius de Præstantia numism. præclaris exemplis docuerunt. Nobis sufficiat, quod *colonie quasi effigies parvæ, simulacraque populi Romani* appellantiur apud Gellium lib. xvi cap. 13. Bene Lipsius lib. 1. de Magn. Rom. c. 6. *Colonis formam quasi novæ reip. dabant. Sic tamen ut omnia Romam & urbem matrem referrent. Ipsi quoque locis Fora, Capitolia, Tempia, Curie pro illa imagine essent; & in gubernatione Duumviri plerisque locis, quasi duo CONSULES; Aediles item & Decuriones pro Senatu.* Municipia similiter eadem, aut similia Magistratuum nomina, quibus Urbs urbium, illa *communis omnium patria*, ut Modestino, & τῆς οἰκουμένης ἡγετομή, ut Athenæo vocatur, splendebat, partim adulandi calliditate, partim ambitionis sensu Magistratibus imponebant suis, ut ita sensum totus Romanus orbis uno Magistratuum genere regeretur. Nec inepte Justinianus in Novella Constitutione 38. generaliter ait, curias in unaquaque civitate *κατὰ τῆς τῆς βασιλευσῆς πόλεως μίμησιν*, ad imitationem urbis dominantis, veteris scilicet & novæ Romæ, a majoribus ordinatas esse, earumque mores & ritus sequi debere. Enimvero quemadmodum Romæ maximum illud Patrum Conscriptorum Concilium Senatus, ejusque decreta Senatusconsulta appellata, sic in civitatibus, præsertim majoribus, Romano imperio subiectis, Decurionum Ordo *Senatus*, curiales *Senatores*, & psephisinata bules *Senatusconsulta* dicebantur, non in lapidibus municipalibus tantum ambitiosis, sed apud ipsos scriptores Romanos, Cæsarem, Ciceronem, Livium, Tacitum, Plinium aliosque. Nec quicquam causæ fuit, cur Henricus Dodwellus prælect. III. ad Spartianum id in dubium vocaret, aut Taciti interpretes lib. xiiii. Ann. 48. ad vocem *Senatoris* tam vehementer æstuant. Adco enim id frequens & usu pertritum po-

sterioribus temporibus; etiam tum, quando Imperatorum avaritia onus curialium fecerat intolerabile, permansit, ut Senatores Romani, discriminis causa, *Senatores Urbis vel Populi Romani*; eorumque Senatus *Maximus*, municipiorum vero *minor* debuerit in legibus ipsis appellari, l. 27. C. *Tb. de Decurion.* Cassiodor. lib. vi. var. 3. Non me fugit multos Provincialium Curiae Romanae Senatores, honoris causa, inde usque ab Augusti temporibus, allectos esse, licet nunquam fere Romam vidissent. Sed hos Capitolinus in Philosopho *Peregrinos* vocat; *Senatores Populi Romani*, Spartianus in Hadriano; *Senatores Romanos* Avitus Viennensis Episcopus epist. 31. Aufonius de patre, utriusque Romae Senatore honorario:

*Curia me duplex, & uterque Senatus habebat,
Muneris exortem, nomine participem.*

Nec tamen dubitandum est, ipsos civitatum curiales Senatores fuisse dictos. * *Viennensis Senatus* meminit Avitus in Homilia de Rogationibus; ipsaque *Vienna Urbis Senatoria* appellabatur, ut Savaro docuit ad Sidonii lib. IV. epist. 2. Affinis nimirum Senatorum & Decurionum videbatur dignitas; in utrisque eligendis, aetas, census, honestas, quaestus & alia, diligenter a Gulielmo Fornerio lib. 1. select. c. 12. exposita, spectabantur. Nec injuria ergo curiales, nervi & viscera civitatum, idem mite aetatis nomen, quo Senatores Romani in celeberrimo orbis theatro fulgebant, in suis civitatibus sunt aucupati. Quinimo sicut Senatus Romanus *Amplissimus Ordo*, & Senatusconsulta *Amplissimi ordinis Decreta consultaque*, & Consules *Amplissimi*, in Pandectis & Codice appellantur; pari modo *amplissimum ordinem* Putecolanorum laudat Cicero pro Caio c. 11. *Senatum amplissimum Trevirorum.* Vopiscus in Floriano, & ORDO. MUNICIP. AMPL. LICITANORUM est apud Gruter. pag. 421. n. 7.

§. III.

Haud leve porro momentum demonstrationi nostrae conc-

ciliabit, quod eadem fere, quibus Romani Consules ceterive Magistratus majores usi sunt, honoris insignia, aut saltem eorum imitationes, in coloniis & municipiis reperiantur. Ebur curule licet cum Duumviris non fuerit communicatum, ejus tamen simulacrum habebant *Bisellium*, quod Valerius Chimentellius ipsis libro singulari vindicavit. Togam purpura *prætextam*, Livius tam manifeste magistratibus in coloniis municipiisque tribuit, ut nullus ea de re ambigere possit lib. XXXIV. c. 7. Ambrosii autem tempore, habitus Senatorum Romæ penula erat, etiam in municipiis. Ita ille II. ad Timotheum: *Quos constat in societatem Romanorum receptos, ut de cetero appellarentur Romani; idcirco necesse est, eos Curiam habere, in quam more Romanorum penulati conveniant.* Quemadmodum mixto imperio destituti fuerunt Duumviri, sic Tribunali caruerunt; suggestus tamen editior, quem jus dicentes occupabant, ut ab omnibus videri possent, vulgo *Tribunal* appellatur, apud Suetonium de claris Rhet. c. 6. Petronium c. 71. & in lapide Veronensi apud Reinesium cl. vi. n. 44. Porro Consules Romanos, ab ipsa institutione prima, tempus notasse, & scipionem eburneum gessisse, ex Livio, Valerio Maximo, Dionysio, & Juvenale notum est; etiam numi testantur, inter quos rarior est ille Cl. Caldii Cos. apud Guillelmum du Choul, *de la Religion des anciens Romains* pag. 261. Similiter vero Aufidius Luscius, Prætor Fundanus, ut amplitudinem & dignitatem fastigii Romani æquaret, *Prætextam, & latum clavum prunæque batillum* assumpsit, & nomine suo annum signavit, Horatio ridente lib. 1. sat. 5. Male Turnebus lib. 1. Adv. c. 29. cumque secuti interpretes Horatiani, Lambinus & Torrentius, Aufidium exagitari putant, quod, supra humanam conditionem, ignem sibi præferri voluerit; quum tamen ignis, ante Antoninorum tempora, ne Majestatis quidem symbolum, nec batillus, sed lampas fuerit, ut Lipsius Excursu A. ad Tacitum eleganter demonstravit. Verisimilius Casaubonus, ad Pollionis Claudium, & Rutgersius

prune batillum ansati & gestatilis foculi genus fuisse, existimant, quod pruna plenum principibus viris, a *πορφύρεον* præferebatur, ad odores incendendos. Sed quid si batillum, pro instrumento, quo prunæ componuntur, a Satyrico venuste dictum putemus? ut nullam potestatem civilem, sed usum domesticum, scipioni isti tantum adhæsisse indicaret. Id enim firmat Cicero orat. II. contra Rullum c. 34. *Anteibant Capuæ lictores, non cum batillis, sed ut hic Prætoribus antecunt, cum fascibus duobus.* Denique quis nescit lictores cum fascibus, inter prima insignia Consulum fuisse? At Lucas in Actis c. xvi. v. 35. Magistratibus coloniarum Philippiensis *παιδαρχαι* tribuit; *annuos fasces* Narboni coloniarum Martialis lib. VIII. epigr. 72. *lixi & virgas* Apulejus lib. 1. Metam. Quinimo ipsi Imp. Arcadius & Honorius in l. 53. C. de Decurionibus: *Duumvirum impune non liceat extollere potestatem fascium, extra metas territorii propriæ civitatis.* De Asiæ urbe Cyzicenorū Propertius lib. 1. Eleg. 6.

Tu patriæ meritis conare anteire secures,

Et vetera oblitis reddere jura foris.

§. IV.

Sed ut propius ad Consules municipales veniamus, hoc amplius, *ut ex prætoribus in modum prævie inspectionis*, ut Theophilus præfati solet, observandum est, pleraque Magistratus vocabula, quibus Romanorum honorati superbiebant, in municipiis etiam & coloniis usitata fuisse. Nec mirum! coloniarum jure ac dignatione urbi quodammodo, pro parte aliqua, erant adequatæ, auctore Suetonio in Augusto c. 46. Cives earum, cives Romanæ, aut civitate donati; ordo primus, qui his præpositus, ex nobilibus patritiisque Romanis erat lectus, qui simiarum instar Urbis matricis instituta, populo & Principe connivente, imitabantur. Mito *Ædiles* municipales professæ opera a me expositos. *Prætoris* nomen Justinianus proprium, ait, fuisse imperii Romani, ac initio Consulibus, postea eorum collegis usurpatum, qui, quod Consules aberant, consulare munus, more majorum su-

sustinebant. *Nov. const.* 24. 25. At Cato in fragmento libri
 1. Originum apud Festum: *Clælius*, ait, *Prætor Albanus Ora-*
tores misit Romam. Livius epit. lib. 73. Herium Asinium,
Prætorem Marucinatorum habet: idem lib. XXI. c. 19. cum
 Plinio lib. XVII. Hist. nat. c. 11. *Prænestinorum Prætorem*
 laudat. Inscriptio apud Sponium misc. erud. pag. 182.
 PRÆTORIS *Puteolani*, aliæ aliorum meminerunt. Deinde
 de *Censoris* munere quid, quæso, Romæ fuit præstantius?
 Plutarchus in Catone summum ei tribuit culmen, & *νεφεως*
τῶν τιμῶν ἀναρχὸς, *fastigium quoddam omnium honorum.* Et ta-
 men singulis civitatibus sui fuerunt Censores, qui ad ex-
 emplum urbanorum Quinquennales dicebantur, auctore Ci-
 cerone II in Verrem c. 53. Livio lib. XXIX. c. 15. Plin-
 io lib. X. epist. 113. lapidibus apud Gruterum pag. 366. 2.
 432. 5. & Sponium pag. 169. BALBIO CENSORI REIP.
 NEAP. Deinceps tirones norunt, *Dictatorem* summum in
 republica Romana fuisse magistrum, qui extra ordinem
 quidem, ac ad tempus constitutus, fascibus tamen & pote-
 estate Consules superabat, quibus eum *moderatorem & magi-*
strum adpositum Livius ait lib. 21. c. 18. quique obviam si-
 bi factos Consules, sine fascibus ad se venire jubebat, ut
 refert idem lib. XXII. c. 11. Duplo ampliorem ejus Con-
 sulari auctoritatem fuisse, docet Pænius Metaphr. ad Eu-
 tropium lib. I. c. 11. Eodem autem nomine Tusculum,
 Cære ac Lanuvium, antiquissima municipia, summum re-
 ctorem suum nominarunt. Cato *Dictatoris Latini* memi-
 nit, in Originibus apud Priscianum, *DICTATOR AL-*
BANVS in lapide apud Reines. pag. 361. & Spartianus in
 Hadriano c. XIX. *In Hetruria Præturam Imperator egit. Per*
Latina oppida Dictator, & Edilis, & Duumvir fuit. Apud
Neapolim Demarchus, in patria sua Quinquennalis.

§. V.

Quid ergo causæ est, cur dubitemus, quin in municipiis
 & coloniis splendidioribus Consulium quoque nomen Duum-
 viri assumerint, & ab obnoxiiis acceperint? Neque enim

rectores imaginarii erant, & in speciem civitatibus præfecti; neque Consules *κοινοβουτοι*, pomeridiani & otiosi: sed annuam jurisdictionem exercebant, ordinem cogeant, decuriones consulebant, & sicut Consules bini Duumviri Romæ, sic hi pro Consulibus apud suos. Plane vocis notatio non repugnat; sive quod consulerent Senatum, id est rogarent; sive quod civibus consulerent, id est prospicerent, Consules dictos putemus. Posterior placuit Pomponio, Floro, Capellæ, Theophilo; Varro lib. IV. de L. L. utramque conjunxit, & Actium in Bruto dixisse refert: *Qui recte consulat, consul suat.* Mihi autem prior probabilior videtur, nec vercor judicium Quintiliani, qui lib. I. Inst. Orat. c. 6. quosdam pravis ingenius ad foedissima ludibria dilapsos culpat: *Sine Consul a consulendo, an a judicando.* Mitius Varro lib. VI. de L. L. si de originibus verborum quis multa dixerit commode, potius *boni consulendum*, quam eum qui aliquid nequiverit, reprehendendum esse, judicavit. Quicquid est, optimus auctor Tullius Duumviros Romanos & municipales miscet lib. II. ad Atticum epist. 6. *Dubitem, an hic an Antii confidam, & hoc tempus consumam: ubi quidem ego malle Duumvirum, quam Romæ fuisse.* Simili prorsus figura vel joco, quo Macrobius II. Saturn. 3. ipsummet facundissimum facetiarum patrem refert usum: quum enim ab hospite suo P. Mallio rogatus, ut decurionatum privigno ejus in municipio expediret, assistente frequentia, dixit: *Romæ si vis habebit, Pompejis difficile est.* Sed mittamus conjecturas, quibus minime opus est, ubi plura rerum testimonia sunt in promptu. Primas dabo eidem Ciceroni, qui summos Magistratus Campanos initio Prætoris, postea Consulis nomen, ait, affectasse: quum Capua, sui juris civitas, Medixtuticis ante paruisset. Livius lib. XXIII. c. 37. *Marius Albus Medixtuticus, summus Magistratus erat Campanis.* & lib. XXVI. c. 6. *Medixtuticus, qui summus Magistratus apud Campanos. puto a patre regnator, & tuticus magnus. Summus ibi capitur Mediæ Ennius dixit.* At quamprimum Capua coloniam Ro-

ma:

manam accepit, Magistratus ad forniam Urbis matris insecti coeperunt. Docet Cicero II. Agrar. c. 34. *Nam primum id quod dixi, cum in ceteris coloniis Duumviri appellantur, hi se Prætores appellari volebant.* Capua enim, propter ubertatem agrorum & omnium rerum abundantiam, Urbis erat æmula, hinc supinis ejus Duumviris duo lictores cum fascibus præibant; inde Campana superbia proverbio innotuit, *Capua superbiam gennisse* dicitur eidem Tullio I. Agrar. c. 6. & Aufonius de ea: *Roma altera quondam.* Laudant Ciceronem Cornelius Nepos & Plutarchus, quod ope prudentiæ civilis sæpiuscula futura prædixerit, & quæ postea usu venerunt cecinerit, ut vates; idem vero Capuam, & ejus exemplo, felices alias colonias ambituras esse nomen consulare conjecerat d. II. Agrar. c. 34. *Quibus primus annus hanc cupiditatem attulisset, nonne arbitramini paucis annis fuisse Consulum nomen appetituros?* Lucius enim Piso a C. Cæsare, genero suo, agro Campano dividendo præfectus, & imaginis formandæ causa Duumvir Capuæ creatus, Consul sibi nomen arrogaverat. Cicero in Pisonem cap. XI. *Seplasia mehercle, ut dici audiebam, te, ut primum adspexit, Campanum Consulem repudiavit.* & post reditum in Senat. c. VII. *Capuene te putabas, in qua urbe domicilium quondam superbiæ fuit, Consulem esse; sicut eras eo tempore; an Romæ, in qua civitate omnes ante vos Consules Senatui paruerunt?*

§. VI.

Dedimus unum exemplum adoptati nominis Consularis. Nunc aliud videamus, ab altera Romæ æmula Carthagine petium: sic enim sensim sublucebit, quod demonstrandum suscepimus, per colonias & municipia inprimis, una cum linguæ Latinæ usu, propagatum quoque fuisse, & per hæc cum vicinis communicatum Consulare nomen. Vetus autem Carthago, dum stabat, jam Magistratus Romanis similes habuisse, videri posset; quia Cato in originibus apud Gellium x. c. 24. Hannibalem *Dictatorem* Carthaginensem, & Justinus eundem Carthaginis *Consulem* vocat lib. XXXII.

c. 2. Nepos quoque *præfetti morum*, sive Cenforis, apud eos meminit in Hamilcare c. 3. sub quo titulo Cæsar eundem honorem admisit, auctore Sueton. Cæs. c. 76. Sed quilibet satis videt, quod Berneccerus ad Justini lib. XIX. c. 1. recte observavit, Romano more locutos Romanos scriptores, & vim potius ejus potestatis, quam proprium vocabulum respexisse: sed & diversam fuisse Dictatoris Pœni auctoritatem, ex Livio docuit Cl. Clericus Art. crit. p. 111. f. 1. c. 13. Alia ergo vetus Carthago Magistratum nomina habuit, & quidem Suffetes, quibus *Consulare imperium* Livius dedit lib. XXX. c. 7. Neque illa sola Consules suos ita vocavit, sed & Tyrus, unde vocem acceperant, atque Africanæ civitates, Timiligena, Stagitana, quod ex inscriptionibus Seldenus de Synedriis, & Bochartus in Chanaan crudite docuerunt. Sive autem Suffetum nomen a *Sophe-tim*, sive, ut Scaliger & Drusius voluerunt, a *Tzusse*, seu *Susse* descendat, hoc certum est, ut Romæ quotannis Consules, sic Carthagine binos annuos Magistratus cum regio imperio creatos esse. Hos Aristoteles II. Polit. 9. & Polybius Hist. VI. c. 49. pariter ac Solinus c. 56 *Reges* appellantur; *Ut Romæ Consules, sic Carthagine quotannis bini Reges creabantur*, inquit Cornelius Nepos in Hannibale: sed qui magis cum auctoritate suadendi, quam cum jubendi potestate, apud suos valuerunt, ut monuit Grotius I. de J. B. & P. c. 3. §. 10. Idem vero nomen non mansit, postquam, in vestigiis Carthaginis deletæ, colonia a Romanis deducta est; statim enim Duumviros, Ædiles, Quæstores accepit, ut nummi & lapides testantur. *Duumvirum splendidissimæ Colonie Carthaginiensium* legas in Gestis Purgationis Cæciliani c. 4. Nihilominus Joh. Vaillantius in nummis coloniar. pag. 72. & 131 Suffetes colonie Carthaginiensis, ex nummis sub Augusto & Tiberio cufis, se reperisse existimat, ideoque hæc litteras P. S. S. C. *Posuere Suffetes Carthaginienses* explicuit. Rectius tamen Celebrerrimus Perizonius, in elegante illa ad Andream Morellium de nummis consularibus epistola, negat

gat in his ullum ejus coloniae vestigium, aut Sufferum memoriam superesse, quum potius sigla illa sic exponenda sint: *Pecunia signata Senatus consulto*; quomodo & ipse Vailantius in alio nummo eadem, sed mutato paululum ordine, interpretatur. Quid autem, an Carthaginenses coloni nominibus Duumvirorum contenti fuerunt? Nequaquam. nam Salvianus lib. VII. de Providentia: *Carthago*, inquit, *universarum Africae urbium princeps & quasi mater, & in Africano orbe, quasi Roma*. Eadem una Urbe Roma inferior apud Herodianum appellatur lib. 7. Apud Prosperum legimus: *Asperum VI. Consulem Carthagini constitutum esse*. Is sufficit: nam Apuleji in Apologia locus: *Carthaginem pergit, ubi jam prope exacto Consulatus sui munere, Lollianus Avitus te, Maxime, opperiebatur*, ad Lollianum Avitum Africae Proconsulem pertinet; quem Capitolinus in Pertinace, *virum consularem*, Ulpianus Bithyniae Praefidem appellavit, l. 3. D. de Decurion. Cicero & Strabo similiter Consulem & *praefidem* pro Proconsule dixerunt. Casaubonus ad dictum Apuleji locum scribit, apud Poetam veterem, qui epigramma fecit in Laodicea, *praefide Asiae*, pro Praefide provinciae Asiae dici; at consulem appellari, qui proconsulari imperio provinciam aliquam regat, alibi se legisse non meminit; sed Cl. Perizonius plena manu exempla dedit c. VII. Animadv. Histor. pag. 309. Similiter Praetorem pro Propratore in l. 13. §. 1. D. de jurisdict. dici, Vir. Clariss. Gerardus Noodt observavit lib. I. Probabil. c. 6.

§. VII.

Dices, ambitionis causa in binis illis superbiae domiciliis id nominis appetitum esse, renitentibus Romanis, & tolerari posse, quia Florus lib. 1. c. 16. Capuam *caput urbium* vocat, quendam inter tres maximas, *Romam, Carthaginemque* numeratam. Veritatem tamen, rerum & vocabulorum ostentatione, aut magniloquentia minime vitiari. Audio. Sed nihil causae est, cur solos Campanos & Carthaginenses ambiciosiores fuisse credamus; raro enim subsistunt ex-

empla, ubi coeperunt; & quidni idem tentasset *Atina potens, Tiburque superbum*? ut Virgilius cecinit lib. vii. *Æneid.* 630. Quidni *Arelas*, uberrimum *Gallie* emporium? quæ eo sublimitatis venit, ut Aufonius eam *Gallulam Romanam* vocarit, titulo æmulis Urbis Romæ tantum tributo. Quidni denique Tyrus *splendidissima colonia*? ut Ulpianus vocat, & *splendidissima Italiae municipia* apud Florum l. iii. c. 11. Immo fides habenda est scriptoribus fideissimis, & lapidibus litteratis, qui alibi etiam municipales nobis Consules tam clare promittunt, ut non detur exceptio. De antiquissimo municipio Tusculano Plinius lib. vii. *Hist. nat.* c. 43. *Est & L. Fulvius Tusculanorum rebellantium Consul, eodemque honore, quum transisset, exornatus confestim à Pop. Romano: qui solus eodem anno, quo fuerat hostis, Romæ triumphavit ex iis, quorum Consul fuerat.* Similiter Aquileja, nobilissima colonia, & primaria Fori Julii civitas, a divitiis Pomponio Melæ celebrata, Quatuorviros suos Consules appellavit: ut ex quatuor inscriptionibus ibi repertis, docuit eruditissimus vir, Philippus a Turre de colonia Forojulienfi pag. 360. ubi tria marmora FABIANUM. COS. quartum QUINTIAN. COS. pronuntiant. Ut minime mirandum sit, cur Aquileja a quibusdam *Romania*, [ab aliis *Roma secunda* fuerit dicta; quodque Justinianus in præf. *Novell.* 29. *Aquileja, omnium sub Occidentem urbium maxima, & quæ multoties cum ipsis etiam Regiis (Roma & Constantinopoli) certamen susceperit.* Apud Gruterum pag. 351. porro SEXTO ÆLIO. MAMERCO COLONIAE. ASTIGITANÆ. CONSULI, Ilienses statuam dedicarunt. Fortissimum præterea, pro Consulibus municipalibus, argumentum præbet inscriptio Pisana, quam eminentissimus Norisius, cui plurimum debent antiquitates municipales, produxit ad Pisana Cæsarum fratrum Cenotaphia *disl.* i. c. 3. in qua FELIX. HERCULEO. AED. II. COS. I. PONT. PERP. REIP. PISIS. dicitur fuisse. Rursus apud Fabretum cap. x. *inscript.* num. 439. Duumvir Aufidentæ, Samni.

mniticae urbis, consul appellatur: L. TVRCI. FÆSASI. APRONIANI. COS. AUFIDENATES. DD. Pariter in vita S. Felicis Archi-Episcopi Trevirensis, *Consules, Patritii & Senatores Urbis Trevirensis*, occurrunt. In nummo quoque apud Cl. Harduinum, inter numismata sæculi Constantinci laudato, M. Aurelius Romulus bis urbis Remensis Consul vocatur: DIVO. ROMULO. N. V. BIS. CONS. Denique Græcis recentioribus usitatissimum fuisse videtur, Magistratus municipales *ὑπάται*; appellasse. Ex Philostrati vitis Sophistarum aliquot loca eam in rem Casaubonus indicavit, in notis ad Apulejum; quibus summa aliis in urbibus dignitas indicatur. Hoc amplius Olearius ad Philostratum in vita Herodis p. 546. ostendit, non infrequens fuisse, ut Magistratus nobiliores, urbibus regundis præfecti, sese *Διῦνπατες*, *bis Consules* appellarent; quamvis Ill. Spanhemius in Orb. Rom. Exerc. 11. c. 20. Marathonium bis Consulem, ceterosque a Philostrato memoratos, inter peregrinos Consules numerandos esse contendat, quos Imperatores ad Consulare fastigium Romæ evexerunt. Ego illud addam, vocem *ὑπάτης* recentioribus non modo Consulem significare, sed quemlibet virum in dignitate constitutum. Sic Psellus passim *ὑπάτης τῆν φιλοσοφίαν* dicitur; *ἀπὸ διῦνπαται* apud Anonymum, Theophani subjunctum pag. 440. non bis Consulem, sed Expræfectum notat; quamvis *ἀπὸ ὑπάτων*, consules etiam *codicillares* & honorarii dicerentur, ut Nicolaus Alemannus ad Procopii Anecdota observavit. Interim ex superioribus Latinorum testimoniis liquere arbitror, municipales & colonos, rectores suos summumque magistratum, aliquando Consules salutasse; id quod ipse etiam Reinesius consuetudine seculorum inferiorum agnoscit Epist. xxxi. ad Rupertum, & ad Daumium ep. xxxiii.

§. VIII.

Nunc, age, aliorum argumenta excutiamus, quibus Consules municipales demonstrare conati sunt: quæ tamen ad Lydium critices lapidem adnota, vix examen sustinere vide-

debantur, ideoque maxima, quæ supra a nobis dissidere diximus, nomina, ut in alia omnia abirent, opinor, impulerunt. Non hic immorabimur lapidibus litteratis, in quibus Jul. Cæs. Capacius lib. 1. Hist. Neap. c. 9. se Consules Neapolitanos reperisse existimabat; quæ enim profert nomina in fastis Consularibus Romanis occurrunt; unde Iolius cum tum victitasse, & non adhibuisse berillos, oculatus Reinecius ostendit lib. 111. Var. lect. c. 16. Cum maximo autem litterarum chorago, Josepho Scaligero, nobis res erit, qui capite v. Indicis ad Gruteri corpus Inscriptionum, aliquot nobis Consules obtrusit, cavea non applaudente. Quod enim inscriptionis Comensis pag. 438. n. 7. litteras has COS. PONTI. *Consul, Pontifex* interpretatur, displicuit Cl. Marquardo Gudius in notis: licet ab illius partibus stent Massonius & Eduardus Holthenus in corrigendis. Mihi sane Comenses, a Julio Cæsare deducti coloni, Vespasiani tempore, ad eum magnificentiæ gradum nondum pervenisse videntur, ut Duumvirum suum Consulem appellarint; qui Latii jure sic tantum donati erant, ut qui annum Novi Comi Magistratum gessisset, jus civium in Urbe haberet, auctore Appiano Alexandrino lib. 11. Civil. pag. 730. Magis aperto errore *Claudium Pacatum* V. C. COS. CAP. Consulem Capuæ esse auguratur pag. 390. 1. quum omnia non loquantur, sed clament, eum Consulare fuisse in Campaniam missum. Id enim titulus *Viri Cl.* ostendit, & qui sequuntur FASCES DEPOSITI, Consularium insignia, l. ult. C. Tb. ad L. Jul. de Ambitu. Ex eodem quoque lapide accuratius descripto, in eodem opere pag. 424. n. 1. & aliis id genus inscriptionum notis, Scaliger convincitur, in quibus ipse Campaniæ Consulares vidit & agnovit. Sic Postumius Lampadius V. C. CONS. CAMP. in 1. pag. 193. & elementis expressus, Decimius Geminianus, VIR. CLARISS. CONSULARIS provinciæ Bæticæ appellatur pag. 283. 8. Hadrianus vero quatuor Consulares, per omnem Italiam, Judices constituit, quos inter

ter Claudius ille Pacatus. Vide Spartianum in ejus vita c. 22. ubi Salmassius in notis etiam Consulares ex lapidibus produxit, ad quos alii offenderunt eruditi. Ill. vero Spanhemius de Præst. & usu num. dist. XIII pag. 611. eundem Scaligerum notavit, quod Acta concilii Chalchedonenſis male interpretatus est, in quibus Tyrus *υπατις* appellatur, non quod a Consulibus, libera adhuc Republica, deducta; sed quia nunc a Consulari regebatur, sicut Carthago *Proconsularis* ante appellabatur l. 2. C. de Off. Præf. Præf. Afr. Alios titulos, in quibus eruditissimus du Fresnoy Consules municipales, post Scaligerum, se reperisse putabat, sub examen vocavit Ampliss. Cuperus inonum. antiq. pag. 224. ad quem adi. Nos enim missis saxis ad fragmenta Jurisconsultorum, aurò quovis cariora, properamus; ne professionis nostræ obliſi, in alienis circulis agere, vel ut Plutarchus αἰσ. *ἢ ἀλλοτρίῳ χορῇ ποδα τίθιδαι*, pedem in alieno choro ponere videamur.

§. IX.

Non multum difficultatis habet Ulpianus, in l. 3. pr. D. de minor. Denique Divus Severus & Imperator noster hujusmodi Consulum, vel Præsidentum decreta, quasi ambitiosa esse, interpretati sunt: ipsi autem petraro minoribus rerum suarum administrationem extra ordinem indulerunt. Dubitatum tamen fuit, num recte, sub Antonino Caracalla, Urbis Consulibus tribuatur datio aut remissio curatoris, quam Marcus Antoninus in Prætozem tutelarem contulerat dudum. Non satis digna Cujacio est responsio: quoniam ad Coss. olim tutorum curatorumque datio pertinebat. Fuit, qui loco Consulum reponeret Proconsulum; alii alia commenti sunt, quibus Vir Præclarus, Jacobus Gothofredus cap. iv. Animadvers. linguam oclulit. Nostra hæc tantum cautio erit, ne quis stilo Jurisconsulti, Duumviros municipiorum Consules dici putet; quorum decreta itidem ambitiosa, apud eundem Ulpianum appellantur in l. 4. de Decret. ab ord. fac. Sed nullæ hac. in re partes magistratuum; quibus ea quæ magis

M m m

imperii

imperii, quam jurisdictionis erant, ne quidem sunt concessa *l. 26. D. ad municip.* & clara est mens Ulpiani; Principes solis sibi reservasse jus veniam ætatis indulgendi minoribus, eosque legibus solvendi; quia soli legibus erant soluti. Consulium vero in Urbe, & Præsidum in provinciis decreta, quia non jure, sed facto, per gratiam & ambitionem interposita erant, ipsis ambitiosa visa fuisse, ut Fornorius *1. select. c. 17.* interpretatur. Majus præsidium Consulibus nostris peti videtur ex *l. 30. de Acquir. vel omitt. hered.* ubi Ulpianus *D. Pium* refert *Consulibus* rescriptis, subvenire oportere ei, qui filium, in provincia agentem, non potuerat jubere adire. Plane magistratus municipales eo nomine intelligi posse, existimavit Scipio Gentilis lib. II. de *jurisd. c. 5.* Hotmanus autem lib. VII. Obs. c. 8. *consulentibus* legi jubet; ex more & instituto eorum magistratuum, qui Principes de incerto jure consulcbant, cujus vestigia extant in *l. 31. D. de Re jud. l. 3. de Test. l. 7. de in int. restit.* Verum ut prius ab Ulpiani, ceterorumque Jurisconsultorum, scribendi more est alienum, ita emendationem illam, seu minime necessariam, repudio. Nam licet Proconsules intelligendos putemus, hi quoque, ut supra vidimus, Consules dicebantur. Sed Consules in provincias etiam imperium habebant; sique Papinianus & Celsus. Prætoribus rescripserunt *l. 2. de Pact. dotat. l. 3. §. 1. D. de minor.* quidni credamus Principem a Consulibus Romanis fuisse consultum? cujus judicia ab æquitate & justitia magnopere Aristides laudavit, Encomio Romæ pag. 363. Sane Divi fratres Proculo & Munatio rescripserunt Consulibus; ut colligo ex inscriptione *l. Divi 27. de Liber. caus.* Idem Celerem ad competentem judicem ablegant, in rescripto IPSIS ET COSS. dato, *l. 2. G. de alendis lib.* Judices autem de alimentis erant Consules, ut Viri eruditi ex *l. 51. D. de Agnosce. et al. lib.* docuerunt, quæ ex Ulpiani lib. 2. de officio Consulibus desumpta est. Quanquam posterius exemplum magis eruditum, quam verum esse putem; quia Divi fratres ant-

no

no eodem, quo obiit Antoninus, Consules memorantur apud Dionem, *tuncquo primum Romanum Imperium duos Augustos habere cepit*, inquit Capitolinus in Marco cap. 7. Samuel Peritus ad LL. Atticas pag. 165. reponit, IPSIS ETIAM COSS. nec hoc quidem omni dubio carere veretur. Ego nihil mutandum cenfeo, ob emphasin in dictione & quæ alibi quoque pro *etiam* usurpatur, vide l. 9. §. ult. D. de Off. procons.

§. X.

Nunc cetera pro Consulibus municipalibus inania, dubia, aut minus stringentia veterum auctorum capita, per saturationem colligamus. Primas tenebit Florus, qui lib. III. c. 18. in descriptione belli Socialis: *Quum omne*, inquit, *robur fortissimorum fidelissimorumque sociorum sub suis quoque signis haberent, municipalia illa prodigia; Popedius Marfos, & Latinos Afranius; Umbros totus Senatus & CONSULES, Samnium, Lucanianque Telesinus.* Doctissimo Freinshemio sententia male cohærere videbatur; unde nomen ducis cuiusdam quærendum putavit. Sed minime de hoc laborandum censuit Reinesius epist. 31. quia omnis Italia & socii Romanorum, propter jus civitatis injuste sibi negatum, contra matrem ac parentem suam Romam tumultuantes, quingentos viros rerum summæ præfecerant, ex quibus quotannis duo Consules, exemplo Romanorum, & duodecim Imperatores legerentur; totus vero ille seditiosus Senatus & Consules vitio creati, simulac communio armis obtenta est, æternum cessarunt, auctore Strabone lib. V. Quamquam ne sic quidem reliqua satis plana sunt; unde locum hunc pro desperato habet Clariss. Collega meus Dukerus, in eruditis notis. Haud minorem difficultatem habet Aufonius, qui in claris urbibus XIII. Burdigalæ se Consulē, pariter ac Romæ, fuisse gloriatur:

Diligo Burdigalam; Romam colo: crois in hac sum,

Consul in ambabus. Cuna hic, ibi sella curulis.

Firmat hunc Consulatum municipalem Josephus Scaliger

lib. II. Aufon. lect. c. 23. ex veteri saxo, in quo eundem Burdigalensem honorem, ex instituto municipiorum, per Olympiadas indicari putat, hoc modo; DEC. AVSON. COS. OLYMPIADE. Petrus Pithœus in eandem sententiam pedibus ivit. & civitates quasdam Galliæ consules habuisse, fidenter pronuntiat lib. II. Advers. c. 18. Isaacus quoque Casaubonus, in Apuleji apologiam, his verbis suffragatur: *Eviluit tandem superbum Consulatus nomen: adeo ut etiam Magistratus municipales consules appellari non erubuerint. Sic ait Aufonius, se Burdigale Consulem fuisse.* Contra, majorem Aufonio pudorem tribuendum existimavit Velferus Rer. Aug. Vind. lib. V. quam ut Duumvir Burdigalæ lectus, elate se ipsum Consulem prædicaret: quum & ad veritatem expeditius sit, & proximo hemistichio firmetur, si vocibus trajectis, *civis in hac sum, Consul in ambabus* legamus. Velfero adfentitur Scipio Gentilis lib. II. de jurisd. c. 5. & ad Apuleji apolog. n. 930. nihil hunc locum, ad consules municipales probandos, facere scribit, quæ etiam aliorum in notis ad Aufonium sententia fuit. Sed ipse Reinesius; licet a nobis dissentiens, retinendam suadet Aufonii lectionem, omnium codicum fide nixam: quum Poëta fortassis hoc dederit patriæ, ut summum ejus magistratum, tanquam Romani simulacrum, potiore nomine complecteretur, vel licentioso genere Duumvirum Consulem appellaret. Illud memorabile est, quod Scaliger ad Velferum lib. II. epist. 145. ita scripsit: *Apud nostratem Aufonium Consul in ambabus recte habet, quod municipales magistratus per totam Aquitaniam & Provinciam Romanam ita vocarentur, & ita ad hanc usque diem vocentur.* Respondit Velferus epist. v. ad Scaligerum; palinodiam prope canens: *Ut Aufonium paulo aliter, quam tu, & de Consulatu Romano proprie caperem, illud etiam in causa fuit, sellæ quod curulis meminit, quam nescio, an minutis istis provincialibus Consulibus recte sribuamus.* Sed levis ratio; cunas patriæ Burdigalæ, sellam vero curulem Romæ acceptam fert Aufonius, ergo Duumviri nobilissimæ civitatis Consules non sunt.

sunt vocati. Mihi sane si inter tantos Senatores suffragij
 jus est, vincet Scaliger, cujus dicta Vinetus etiam firma-
 vit, testatus civitatum Galliae Narbonensis binos, ternos,
 quaternos annuos summos magistratus *Coffos* & *Consules* ap-
 pellari, licet Búrdigalensium Senatus princeps *Major* vocetur.
 Addo *Æduorum* civitatem adeo ad splendorem Ro-
 manum compositam fuisse, ut de ea Erricus Monachus lib.
 I. *Celtica Roma* dein *voluit capiteque appellari*. Tantum de Au-
 sonio. Jungamus huic Prudentii consulatum Massiliæ,
 quem Aldus in vita Prudentii, editioni Antverpiensi præ-
 fixa, ex notis litterarum V. C. & præfat. Cathemerinon,
 ubi *veteris Messaliæ Consulis* meminit, exsculpsit, Lilio ap-
 plaudente. Georgius Remus in Hispania Cæsaraugustæ Con-
 sulatu cum defunctum rebatur. Sed nuspiam Aurelius, ubi
 cuncta vitæ munia recenset, Consulatus sui meminit, quid-
 que de litterarum illo compendio habendum sit, Alciatus
 docuit III. disjunct. 4. Victor autem Giselinus in notis, &
 Aubertus Miræus ad Gennadium *Salia* & *Philippo* Consuli-
 bus Prudentium natum esse ostenderunt A. Chr. cccxlviii.
 unde locus ille mendosus, ab aliis jam, ex melioribus libris,
 diu correctus est. Vide III. Ludewigii vitam Prudentii §. 5.
 §. XI.

Hæc poterant scopo nostro sufficere; ne quem vero du-
 bia, sub initium capitis hujus mota, suspensum teneant, quod
 intrivimus nobis exedendum erit. Patemur magnam Con-
 sulum sub Republica fuisse majestatem, nec Martiam Ro-
 mam ullum imperium altius summo Consulatu vidisse. At
 quis nescit, quantopere liberrima illa potestas a Cæsaribus
 fracta, atque adeo per alios Magistratus, Præfectum Præ-
 torio puta, & Præfectum Urbi, exinanita fuerit, ut Præsi-
 des tantum senatus manerent; rari toto anno, plerique duo-
 bus mensibus magistratum gererent, & paucos tantum vo-
 luntariæ & contentiosæ jurisdictionis actus exercerent. Quod
 si ex titulo Pandectarum, de officio Consulis, indicium su-
 mamus, consilium tantum præbuerunt manumittere volen-
 tibus,

tibus, prætereaque nihil: sed alia fugitiva Ulpiani capita, ex tribus ejus de Officio Consulis libris servata, plura nobis promittunt. Tandem vero *bonos sine labore* mansit, ut Mamertinus ait, qui variis in speciem, etiam exteris, pro lubitu Imperatorum mandabatur. Non dicam Caligulam, monstrum hominis, equo suo e rarioribus consulatum destinasse; Commodum quinque & viginti in unum annum creasse: Sed passim libertini & flagitiosi homines, pariter ac pueri, Consules proclamabantur. Hinc Ulpianus Senatusconsulto Macedoniano locum esse dicit, *etiamsi Consul sit*, l. 1. §. 3. de *SCto Maced.* Idem Consulis *minoris annis* viginti meminit l. un. §. 2. D. de *Off. cons.* l. 20. D. de *Man. vind.* & pueri Nobilissimi Consules, ex Augusta domo, memorantur; in l. 14. C. d. *Relig.* l. 112. C. *Tb. de Decur.* Hos inter Varronianus, admodum parvulus, & vagiens in cunis, cum patre iniit Consulatum, auctore Ammiano lib. XXV. c. 10. Hieronymus Olybrium, Valentiniani generum, *Consulem in guerisia* appellavit, ad Demetriad. epist. 97. Præterea dona, missilia, ludos, & profusam liberalitatem, in processibus consulum exercendam, propter quam alii, inopix causa, sine impendio creandi, aliis donatio *honoris causa* inter virum & uxorem permittenda, l. 41. l. 42. D. de *Donat. inter vir. & ux.* rursus aliorum immensitati, modus ponendus fuit, ne per ludos ad pauperiorem redigerentur: Nov. 105. Certe sarcina virorum honestorum postremis temporibus; & onus magis, quam honos mansit, *factumque ut divitiarum, non hominum esset Consalatus, quia utique si virtutibus defertur, editorem spoliare non debet*, Flavii Vopisci querela erat, in Aureliano, Justiniani tempore, levis tantum imago pristini splendoris civibus supererat, & adumbrata quedam dignitatis insignia, in minimis ponebantur. Ipse Basilium postremum Consulem privatum creavit. Quid prærogativæ deinde manserit Urbi, quæ totum ceperat orbem, postquam toties a barbaris capta, vexata, directa est, quilibet facile videt? Atila totam excindere, Ataulphus nomen quo-

quoque ejus delere, & Gothiam appellare voluit. Memorandum sane aliis civitatibus ante oppressis ludibrium fuit, urbium regina, barbarorum municipium facta. Leo Imp. Nov. 94. consularis dignitatis magnificentiam, e pristina gloria & amplitudine, in abjectam speciem, temporis cursu, mutatam esse testatur. Et tamen servatus, post ruinam ejus, perpetuo nominis Consularis honos, ac Regibus Francorum, Episcopis, Ducibus, Comitibus, supremis classium praefectis, & deinceps Rectoribus civitatum liberarum tributus, ut capite sequente ostendemus. Illud certum, post Fl. Basilii junioris Consulatum, solos Imperatores Græcos Consules ordinarios fuisse. Corippus Afric. lib. 2.

Ditabo plebes opibus, nomenque negatum

Consulibus, Consul post tempora cuncta norabo,

Gaudeat ut totus Justini munere mundus.

CAPUT II.

Summis Batavarum & Germanicarum Civitatum Magistratibus.

- S.* I. Hercules Masfuanus quis fueris dubium; non tamen Euthysenus, ut Valesius existimabat. II. Ejus cultor Flavius Vibertimatis filius, nobili genere ortus. III. Non videtur Dux Gentis, nec Magisterius oppidi Batavorum, neque Consul Neomagi fuisse, contra Sinetium & Cuperum. IV. Civitas Batavorum, an Trajectum nostrum sit, inquirunt. V. Ejus antiquitas & vera nominis origo demonstrata. VI. Summus Magistratus Romanorum lingua, est Consul. VII. In medio erant Reges, Duces, Episcopi, Comites, Classium praefecti & Senatores Consules dicti. VIII. Urbium Rectores Potestates, Abbates, Capitollini, Scabini, & Aldermanni appellati. IX. Batavi & Franci suos, canite venerabiles, Meercredios, Meieros, Majores, & Villicos vocant. X. Quando Civium Magistri & Burgimagistri nomen exortum, & quare? Conringius & Lambecius notantur. XI. Nominis Consularis & Proconsula-

ris prima vestigia apud Germanos, Batavos, aliosque, sub Saxonum imperio. XII. Ab Advocatis, Praefectis & Scultetis Imperialibus civitates diu gubernatae: earum regimen politicum bodiernum. XIII. Inter insignia consularia baculus. XIV. Toga cum tintinnabulis, quondam Consulum Trajectinorum, antiquitas & ratio.

§. I.

IN Coloniis & municipiis Romanorum, per totam Europam dispersis, Magistratus principes, Consulare nomen sibi mature adscivisse, in superiori capite satis probabiliter ostensum esse, existimo. Nunc de ceterarum urbium summo Magistratu dicturis, pulcherrimam materiam praebet marmor antiquum, & omnium facile, quae his in oris reperta sunt, elegantissimum, quod felix harum rerum perscrutator, Gisbertus Cuperus in monumentis antiquis pag. 218. produxit. Verba ejus sunt ista:

... ACSUSA
NO. HERCULI
SACRV. FLAVS
VIHTIRMATIS FIL
S. MMUS. MAGISTRA
IVITATIS. BATAVOR
V. S. L. M.

Topicus Deus, *Hercules Macrusanus*, in principio nostri lapidis, tertio, ut videtur, seculo caelati, occurrit; de cujus patria multa differere, titulus hujus dissertationis vetat. Sive igitur, in *Castris Herculis*, hodie *Malburg* dictis, ei votum hoc solutum fuerit: an vero *Land van Arckel* ab eo tulerit nomen: an denique idem sit, qui *MARCUSANUS*, in inscriptione Westcapellae inventa nominatur, nobis aequae perinde est, quam unde, an a *Magusa*, *Magen*. vel ab Orientalium *Mago* sapientissimo derivetur? Eyndius in Chr. Zelandiae, & Goropius, in Gigantomachia, ea de re prolixè egerunt. Hadrianus Valesius lib. I. Rer. Francic. pag. 6.

ex Posthumanis nummis, HERCULI MACUSANO inscriptis, collegit, Postumum Macusam oppidum Batavorum, quod hodie Ancusam vocant, recepisse, ibique idoli hujus lares fuisse: sed licebit ei opponere Ampl. Altingii auctoritatem; cui urbis Enchusen vix antiquior mentio, quam sæculo tertio decimo occurrit; tum vero Gaufridus, vitæ Ludovici scriptor, ad Annum MCCXLVIII. eam *Pbrisiæ oppidum* appellavit. Sed cujas tandem, num ater an albus fuerit Hercules iste, nihil ad nos; quibus cum Cl. Viris Vossio & Clerico certum fixumque sedet, suis nominibus Deos apud Germanos nominatos fuisse; quos vero ad sua idola inflexerunt & nominarunt Romani, quibus tot Hercules, quot Hecatompyla portæ fuerunt. Herculem & Martem, concessis animalibus, placasse majores nostros, Tacitus scribit, de M. G. c. 9. *Et silvam Herculi sacram*, apud Visurgin memorat 11. Annal. 12. Aventinus heroi Germanorum, apud suos celebri, nomen *Erkle* vel *Arkle* fuisse tradit, idque prisca Teutonum lingua leonem significare; cujus simulacrum in Richenavia, insula Rhenana, ad Maximiliani Imperatoris ætatem servatum; id quod Althamerus ad Tacitum confirmat. Vide, si tanti, quæ diximus, in disert. de Diis vial. cap. 8. pag. 127. seqq. Hic duo potissimum sub examen nobis erunt vocanda, quæ illa *Civitas* fuerit *Batavorum*? & quis *summus* in ea *Magistratus*?

§. II.

CIVITATIS vocabulum non unam habet significationem: nam & pro regione, & pro oppido, & pro jure omnium, & hominum quoque multitudine ponitur, auctore Verrio Flacco apud Gellium lib. XVIII. Noct. Att. c. 7. Origine sua integrum civilis societatis cœtum notat, juris fruendi & communis utilitatis causa sociatum; sive is in urbe una habitet, sive plura oppida, provincias, amplius dicam, gentes integras complectatur. Quod si ergo omnem Batavorum multitudinem hic intelligamus, concordia unitam, iisdemque legibus utentem; necesse est, ut apud

N n n

Fla-

Flavium Vibtirmatem summa potestas, per omnem Batavorum insulam fuerit; non tanquam Regem, sed summum Magistratum, annum forte, vel ad certum tempus constitutum. Foret sic æquiparandus summo Magistratui CIVITATIS ÆDUORUM, apud Gruterum 8. pag. 371. laudatæ, quæque eodem fraternitatis nomine cum populo Romano usæ est, Tacito auctore XI. Ann. 25. In illa autem Vergobretus SUMMO MAGISTRATUI præerat, & annuus creabatur, & vitæ necisque in suos potestatem habebat, Cæsaris verba sunt lib. I. de Bello Gallico c. 16. juncto lib. VII. 33. Popularem sane Batavorum statum fuisse, libertatis amor genti innatus, & virtus militaris, & alia multa nos credere jubent. Tacitus omnium populorum, qui ad Rhenum, eos virtute præcipuos dixit, de M. G. c. 29. Hi etiam, si belli tempore a pura politia recedendum erat, majorem potestatem nobilissimis popularium mandabant, auctore eodem lib. IV. Hist. c. 12. Ipsum sane Vibtirmatis nomen, latum possessorem indicare videtur, sicut Widigola est late possessor; Widimer late princeps; Vidiricus late polens; Widulf late auxiliator; & Witutdrager legislator, a promulgando & late spargendo vocatus. Certius autem adjectio Vibtirmatis filius insinuat, Flavium nostrum illustri stirpe oriundum fuisse: sic enim Batavorum, Belgarum & Germanorum principes, a Patrum claris nominibus, decus sibi quærere solebant. Apud Strabonem, Σαρδανός Αιγυμάρη υἱὸς τοῦ Χερύβατος ἡγεμὸν καὶ ὡς οὗτος τῶν Γαλαί, Οὐκρομῆρι θυγατρὶ, ἡγεμὸς Βαττῶν. Sestibacus, Egimeri filius Cberuscorum ducis, ejusque uxor Rhamis, Ucromeri filia Battorum ducis, celebratur lib. VII. pag. 292. Alii χαττων legunt: sed Hattorum, Assorum, Cattorum, Battorum unius gentis vocabula fuerunt, donec Batti a latīs arvis, awen, nomen Battavorum proprium tulerunt; unde Belaw & Battua provincia apud Reginonem Abbatem ad A. Chr. 885. ut Nassau, Morau, Velau, aliaque id genus, ab au terra vocatur: quod in transcurso, ad illustrationem Strabonis. Addamus, quod Germa-

ma-

maiorum ducem Segimundum, Tacitus *Sogestis filium* vocat: 1. Ann. 57. Arminius *Sigimeri filius* audit, apud Vellejum Paterc. 1. II. c. 118. Vitrodorus *Viduarii filius* apud Ammian. lib. XVII. 12. qui etiam Regum filios *Regales* appellat lib. XVI. c. 12. quemadmodum Julius Paulus & Claudius Civilis, Batavi *regia stirpe* multo ceteros antevisse dicuntur, apud Tacitum lib. IX. Hist. 13. Denique sicut Nileus Nili, Achilles Thetidos natus habitus, ita Virдумarum, Belgarum ducem, genus ab ipso Deo, aut, si mavis, *nobili Rheno* jactasse, auctor est Propertius lib. IV. Eleg. 10.

*Claudius Eridanum trajectos arcuit hostes,
Belgica cui vasti parma relicta ducis
Virдумari. genus hic Rheno jactabat ab ipso,
Nobilis o tellis fundere gesta rotis.*

§. III.

Verum licet hæc marmoris nostri explicatio satis speciosa videatur, malim tamen *civitas* vocabulum, vulgari per id tempus, & strictiore significato accipere, pro civibus unius urbis, qui conjunctione testorum intra eadem mœnia utebantur. His enim proprie præficiuntur Magistratus, qui domi atque in pace rempublicam administrant, ab imperiis & Præsidibus integrarum provinciarum distincti, l. 13. §. 1. D. de *jurisd.* l. 3. §. 1. D. *Quod met. caus.* Sueton. Cæf. c. 53. unde *Magistratus civitatum* dicuntur. l. 3. C. *Th. de superact.* Sic Ammianus Agrippinam ac Tongros *civitates amplas*, vocat. Notitia Provinciarum Galliæ, in Lugdunensi prima, sic habet: *Civitas Eboracum, hoc est Augustodunum. Civitas Arvernorum Arverna.* Hæc etiam notatione vox eadem frequens occurrit, apud nostros, *Civitas Antiochenfium.* l. 37. de Reb. auct. jud. *Emisenorum* in l. ult. de Censibus; etiam in lapidibus priscis apud Gruterum Indicis cap. X. & Sponium Miscell. erud. antiq. p. 161. 188. CIVITAS LEMOVICUM. Accedit quod Batavi totius populi Duces, nisi ingruente bello, legisse haud videntur;

cosque lectos Romani non Magistratus, sed Reges, vel Principes appellarunt, ut Tacitus nos docet de M. G. c. 7. & clarius Ammianus Marcellinus *Batavorum reges* memorat lib. XVI. c. 12. pag. 159. quoniam, ut auctor est Procopius lib. I. de Bello Gothico, duces illo tempore, minus proprie Reges appellabantur. Quod si denique ex nomine *Vibirmatis*, Romana incude formato, conjecturam capere liceat, æque illud a sapientia, quam a lata dominatione derivari potest, ut virum sapientem *cen wieler man* notet: pariter ac *Vittericus* & *Videricus*, apud Ammianum, est sapientia pollens; *Vitiges* Gothorum Rex, apud Procopium, a *Witte*, prudentia dictus; *Wittichindus* sapiens puer; *Witrad* sapiens consilium: nam T & S in hac voce, ut in multis aliis, idem valere, Grotius in indice nom. propr. Goth. observavit: quocum Lipsius cent. III. ad Belgas epist. 44. & Meibomius de Irminsula tom. III. pag. 26. conjungantur. At quænam sit illa civitas, in qua *Vihtrimas* Magistratum gessit, dictu est difficillimum: nam speciosius magis, quam verius, vetera nomina cum recentioribus contenduntur; postquam perpetuis bellis, diluviis, vastationibus, incendiis, prædationibus & gentium migrationibus omnia sunt turbata. Surgunt urbes ex parvis initiis, crescunt, florent; rursus concidunt celerrimo lapsu, & dejectæ resurgunt, ut pulchre docuit Ovidius XV. Met. Dorestadum exemplo esse potest; urbs olim magna, & emporium celeberrimum, antequam a Danis & Normannis vastaretur. Quinque & quinquaginta Ecclesias parochiales in eo fuisse Chron. Herfaug. tradit, alii plures. Nunc seges est, ubi Troja fuit! Sed *obscuritatem auxere secuti interpretes*, antiquam famam ad suæ quisque gentis decora trahendo, in simili argumento, verum & prudens Hugonis Grotii est monitum lib. VII. Hist. Belg. ad A. 1598. nec hoc loco omittendum. Amplissimus enim Cuperus eandem hic civitatem intelligit, quam Tacitus *oppidum Batavorum* vocat lib. V. Hist. c. 19. hanc vero cum H. Pontano, & Joh. Smetio

Smetio Noviomagum ad Vahalim, urbem & Romanorum temporibus cognitam, & media ætate, inter palatia Regum Francorum, illustrem, & nunc celeberrimam interpretatur. Lipsius contra & Ryckius, in suis ad Tacitum notis, parum verisimile judicant, antiquissimos Batavos unicum tantum oppidum habuisse, ad Gallorum incursiones inhibendas, ideoque oppida apud Tacitum rescribunt; Codice quidem Romanosuffulti, sed parum memores, quod de Batavorum consanguineis idem Tacitus scribit: *Nullas Germanorum populis urbes habitari, satis notum est; ne pati quidem inter se junctas sedes.* & Ammianus: *Ipsa oppida, ut circumdata retibus lustra, declinant.* Mihi Cluverii sententia verior videtur; qui oppidum illud ad Mosam referre voluit, ubi castrum *Batenburg* superest. lib. II. Germ. ant. c. 12. Quamvis enim Legionis X. Gem. hiberna Neomagi fuerint, vix tamen Urbis tanta est antiquitas, ut ad Vespasiani principatum adscendat: quandoquidem nulla ejus mentio occurrit ante auctorem tabulæ, quæ Theodosiana appellatur. Adde quod Noviomagum, statim cum suo exordio, proprium nomen Celticum ex *Nie* & *mægen* habuisse videtur; ut nomine generali minime fuerit opus. Pertinet huc, quod Rhenanus, Cambdenus & Bochartus observarunt, *magum* apud Germanos, Gallos & Britannos ædificium, oppidum, domicilium, aut affinitatem, *magſchap*, significare; unde triginta, & quod excurret, urbes, in *magus* desinentes, enumerari possunt. Buchanan. lib. II. Hist. Scot. MAGUS, item vox antiqua, in omnibus provinciis, in quibus publicus fuit usus Gallici sermonis, in nominibus urbium exprimendis admodum frequens, quæ res Gallicam eam fuisse indicat. Unum præterea oppidum insigne, ad extrema Galliarum ora, ut Tacitus ait, Batavi tantum possedisse videntur, virorum principum sedem, extra insulam inter Vahalim & Mosam collocatam. Aut certe oppidum illud *μαγ* *μαγ* sic dictum; quemadmodum Græci antiqui, quum *αθ* dicunt, Athenas signant; hodierni vero solam Constantinopolin *πολι* appellare solent. Romani itidem Hi-

historici vetustiores *oppidi* mentionem facientes, *Romam* antiquam, posteriores *Urbis* appellatione novam intellexerunt. Tacitus autem *quatuor modicos vicos* tantum in insula commemorat v. Hist. 20. quos inter *Wyck* & *Durstede* veram nominis vim conservat, ut *Brunswyk*, *Sleswyk*, aliarque in Germania urbes. Vicos hos erudite explicavit Ampl. Menso Altingius, in notitia Bataviæ; qui & oppidum illud Batavorum ad Mosam, a Claudio Civili injecto igne absumtum, statim finito bello instauratum, & ex Celtica voce *Duren*, velut alterum forum judicarium, & Batavodurum, dictum esse opinatur, adeoque in Ptolemæi tabula Galliarum recte ad Mosam collocari.

§ IV.

Quod si hujus sententiam satis, ut videtur, probabilem amplectamur, colligere licebit: oppidum illud Batavorum, quod anno Æræ Christianæ septuagesimo incensum, & cum nomine singulari restitutum est, longe aliud fuisse, quam *civitas* post annum Christi quinquagesimum & ducentissimum, ut Cuperus erudite suspicatur, in marmore nostro memorata. Conjecturis utique magis speciosis Batavorum ista civitas, in nova, post ductam a Druso fossam, provincia, ad utramque Rheni ripam, quæriri posset Trajecti, licet in re vetusta nil certi polliceri queamus. Enimvero Urbs nostra, præ ceteris, hoc inter laudes suas vindicat, quod ævum habet, & ab ipsa antiquitate tulit nomen. Neque enim *antiqua* tantum *civitas*, in vita S. Gregorii apud Brouwerum, & *vetus Trajectum* in charta Caroli M. apud Hedam in Albrico, sed & proavi hujus Pippini Herstalli ætate, *illustre castellum* apud Bedam lib. V. Hist. eccl. c. 12. immo Utrecht, quasi *Ald*, *Old*, *Outrecht*, & abjecta littera O, *Utrecht* vocatur. Antiquius *Antonine* vel *Ultricesit* nomen, quod, ex Hortensio & Rhenano, passim narratur ab illis, qui creduli omnia amplectuntur, judicii trutina nihil pensant, jam pueri, qui fari incipiunt, aspernantur, & post Buchelium, rejecit Cl. Matthæus, in notis ad Beckam

kam tom. V. Analectorum. Nec tamen in alia omnia trahere debebat Buchelium, quod in chartis apud Hedam *castrum Trajectum*, & *castellum* Alcuino vocatur. Nil quippe id ætatis scriptoribus, Græcis & Latinis, fuit frequentius, quam civitates *kurga*, *Castra* appellare; quia ritu castrorum militarium fossis munitæ erant, & castra urbibus initia dederunt, ut Frenius in utroque Glossario docuit, Lipsius in Lovanio l. 1. c. 6. & Matthæus de nobil. lib. I. c. 24. lib. II. c. 1. Quærit Cl. Altingius: *cujusnam vero opus?* & a sacris demum Christianis, ultimam Trajecti memoriam repetendam contendit. Sed Willibrodi tempore, urbs jam celebris fuit, & arx regni Frisiæ, teste Theofrido, Abbate Epternacensi. Annales Bertiniani ad A. DCCCXXXIV. *Interim classis de Dania veniens in Frisiam, aliquam partem ex illa devastavit; & inde, per Vetus Trajectum, ad emporium, quod vocatur Dorestadus, venientes, omnia diripuerunt.* Quinimo Childebertus Rex, in charta de A. DXCV. apud Baluz. t. I. p. 17. *Trejeſto nobis convenit campo.* quam Goldastus tom. 3. Const. male retulit ad A. DXXXIX. Rurfus apud Baluz. t. 2. p. 42. *Reges fratres convenerunt secus municipium Trejeſtum, in loco, qui dicitur Maerſua.* Qui locus, an vicinus nobis pagus *Maerſen* fuerit, an vero ad Mosam situs, dubitant; sed hoc verius puto. Scimus, Drusum, Augusti privignum, quinquaginta castella per Rheni ripam direxisse; ut Florus memoriæ prodidit lib. IV. c. 12. Valentinianus quoque Rhenum omnem a Rætiarum exordio, ad usque seralem Oceanum, magnis molibus communivit, castra extollens altius & castella, turreſque affluas, per habiles locos & opportunos, nonnunquam etiam ædificiis positis ultra flumen, auctore Ammiano Marcellino lib. XXVIII. c. 2. Quæ duo egregia loca merito basis & fundus fuerunt illis, qui in originem & incrementa Trajecti inquisiverunt. Inter priora enim castra, a Druso ædificata, Trajectinum fuisse, non modo ex vicina Drusi fossa conjicitur, sed & inde constat, quia Antoninus Augustus,

stus, in Itinerario suo (quod tamen posterioris ævi multas continet reliquias) jam meminit *Trajecti*, neutro genere; verissimam castri vel oppidi præbens notam: quum si locum, ubi Rhenus trajiciebatur, ostendere voluisset, *trajectus* dicere debebat, quorum innumeri ad Rhenum fuerunt. Pro Rheni quippe transitu vectigal accipiebant Romani: qui tum temporis, flumina ac terras, & cælum quodammodo ipsum clauserant: unde Agrippinenses apud Tacitum IV. Hist. c. 65. *Vectigal & onera commerciorum resolvimus. Sint transitus incustoditi, sed diurni & inermes.* Hinc porta Trajectina, a telonio publicanorum *de Tolsteegs Poort* appellatur.

§. V.

Sed non multis opus est. Originem Urbis Romanam & antiquissimam ipsum nomen Latinum ostendit, quod per metaplasmī speciem, quam syncopam vocant, a Batavis postea, vel ipsi Romanis, in *Trecht* mutatum esse videtur. Sic enim, ut alia mittam, Willibaldus, in vita S Bonifacii: *Injuncto Episcopo in urbe, quæ vocatur Trebit.* Othlonus vero in ejusdem vita: *Episcopatu in Urbe, quæ dicitur Thret,* apud Mabillon sæc. III. Benedi&. Aliter Surius ad V. Jun. sed is Othloni stilum sæpe corrumpit. *Districum Tre&is*, in divisione Regni Lotharii, est apud Baluz. tom. II. Cap. pag. 223. Etiam Zacharias Papa Moguntia metropoli subjecit *Tungris, Coloniam, Wormatiam, Spiratiam & Tre&is*, id est, Trajectum ad Rhenum, in litteris apud Mabillonium d. l. Qui varias litterarum mutationes, & vocum longiorum compendia norunt, hanc etymologiam facile probabunt. Ipsi Romani *trai&to* διευλα&τος pro trajecto, & *traice* pro trajice dixerunt; quod exemplo simili Virgiliano *reicc capellas*, Scaliger ad Varronem firmavit. Syncope certe illis valde frequens fuit, ut Lucas Fruterius lib. II. Verisim. c. XI. præclaris exemplis ostendit. Nec minus *adicio*, quam *adjicio*, reperitur in veterum monumentis, quicquid contra disputarit Gellius lib. IV. c. 17. Accedit, quod Romani

sonum litteræ C. per G. efferebant, unde C. *gamme vice prius functum*, scripsit Aufonius; & Victorinus C. *nomen habuit G. & usum præstitit*. Pariter ergo ac Cajus pronuntiabant, ut Gajus; sic Traiectum, ut Tregtum, unde *Tregt*; quod nemo observavit, nec ipse Janus Rutgersius lib. III. Var. lect. c. 13 ubi *Dordrecht*, a trajectu ad Dortam fluvium, qui Mosæ mistus disparuit, dictum esse recte coniecit. Apprime hanc sententiam firmant vetusti Regum Francorum nummi, a Boterovio editi. in quibus Traiectum ad Mosam *Triectum* vocatur: nam qui ibi eusi, hanc habent inscriptionem: TRIECTO FIT. auctor Germano apud Mabill. de Re dipl. lib. IV. c. 144. Illud vero, quod ad nostrum Traiectum attinet, haud præteribo, minus recte ad partes vocari Aimoinum Hist. Franc. lib. V. c. 25. ut probetur, jam sæculo nono nomen *Trecht* in *Utrecht* degenerasse: quia quæ post caput 41. libri IV. Aimoini leguntur, a duobus consarcinatoribus adjecta sunt, quorum ætas vix definiri potest; quum & Saxonis Grammatici mentionem fecerunt. Castro itaque antiquissimo Romano, & commercii maxime opportuno, confluxu accolarum mature vicopidum, *Κομπολις*, oppidum muris carens accessit, quod *vicus Traiectum* in chartis antiquis appellatur. Simili ergo ratione, qua Stephanus in vita S. Lamberti, a Chapeavilla edita, Traiectum ad Mosam *vicum* nominavit; quia subjunctum ei suburbium Trans-Mosanum, proprio nomine *Wyck*, quod hodie retinet, appellabatur; licet Godeschalcus, sub Pippino clarus, in vita S. Lamberti, idem Traiectum recte *Urbem* vocarit, ut eruditissimus Valesius animadvertit. Sic etiam commercantium frequentia factum est, ut coli cœperit & ædificiis augeri *vicus* noster ad Rhenum, donec civitas vallo clausa & muris firmata evasit. Verumenimvero quia tot alii prope castra, pagos, vicos & oppida increverant trajectus, nota characteristica jam olim opus fuit, qua ab illis distingueretur. At nulla apta magis & naturalis fingi potest, quam *civitas Basavorum* ad trajectum; his enim quam maxime, utet Romanis;

ex vetere insula in novam, ad Caninefates Frisiosque, heic loci Rhenus erat transjiciendus: ad cujus utramque ripam primum cauponæ, dein crebra habitacula hic extructa fuerunt, ut post Hedam, docet Cluver. de tribus Rheni alv: cap. 21. & præter manentia adhuc riparum vestigia, veteris Rheni appellatio, nunquam intermoritura, ostendit. Loco igitur cognomen dedisse videntur, & quemadmodum Trajectum ad Mosam *Tungrorum Trajectensis urbs*, apud Gregorium Turonensem II. Hist. c. 5. vocatur, ac Francofurtum Francorum vadum explicavit Guntherus lib. I. Ligu-
rini §. 178. sic Trajectum *Batavorum oppidum*, & serius, quasi postliminio, *Hollandiæ metropolis*, ut Veldenaer in pr. Chron. Holl. & Joan a Leidis lib. 1. c. 1. scripserunt. Non aliter sane intelligi potest, quod Venerabilis Bedæ lib. V. de Gestis Anglorum c. 12. & ex eo Sigebertus Gemblacensis ad A. 13CXCVII. ubi Willibrordi res gestas exponunt, & *Trajectum ad Rhenum illustre castellum* vocant, testantur, *Trajectum lingua Gallica oppidum notare*. Hujus enim trajectus nobilissimi, & simul Batavorum civitatis exemplo, Belgæ oppida sua aquis apposita *Drecht*, *Trecht*, & *Tricht*, pro diversâ dialectorum ratione, ut Maestricht, Drechteland, Menkendrecht, Moerdrecht, Maaldrecht, Ture-drecht appellasse videntur. *Trecht* in vita S. Sturmionis apud Brouwerum laudatur, etiam vicus Galliæ Treje-
ctum, super Matronam, vulgo Triport, aut Trillebardou dictus, olim a portu *Triet*, aut *Trijet*, quasi *Trajet* dictus, teste Germano apud Mabillon. de R. D. lib. IV. c. 69. Ut adeo non ovum ovo, nec lac lacti videatur similius, quam Latino-
rum *civitas*, & Gallorum *Trajectum*. Forſan autem civita-
tis Batavorum cognomen usurpari desiit, ex quo in Fri-
siorum nomen omnia concesserunt, & Trajectum *Frisiæ op-
pidum*, vel *Frisiæ urbs* facta, uti Otto Frisingensis lib. VII.
c. 16. & Hermannus Contractus ad A. MXLVII. eam
nuncuparunt. *Arx & solium regni Frisiæ* vocatur, apud
Theofridum, Abbatem Epternacensem, in vita Willibrordi

di c. 5. Fortassis etiam nomen jam mutatum, ex quo Wil-
ti, Slavorum populi, a morum ferocia ita dicti, castrum
illud Romanum occuparunt, & de suo nomine *Wiltenburg*
dixerunt; quod Antonius Matthæus, verissimum esse cre-
dedit, lib. 2. de Nobil. c. 1. & plenius in præfat. Tracta-
tus de jure gladii. adstruere satagit. Vereor autem, ut om-
nibus id persuaserit; quia notus in agro Trajectino collis,
omnis generis numismata, rudera & fragmenta, vel levi-
ter effossa humo, ostendens, ad exsiccatum Rheni alveum,
non procul ab urbe, nomen *Wiltenburg* servat: & quidam vo-
cem illam, ex notis marginalibus, in Bedæ textum irreperisse
contendunt. Quicquid est, nulla profecto urbs, in hoc
tractu, Pippini tempore, fuit commendatior, quæ ad sacræ
dignitatis honorem eveheretur. Nec Franci ullam in Frisia
urbem invenisse videntur, quando Carolus Martellus re-
gnum illud, devicto Poppone, evertit; si unum excipias
Trajectum, quod a Romanis extructum esse, fidenter no-
biscum asserit Conringius de Urb. Germ. §. 26. Propo-
sui conjecturam meam: lubricam dicent alii, & incertam:
sed qui meliora docuerit, eum vatem optimum perhibebo.

§. VI.

Cuicunque autem civitati honos ille antiquitatis debeat-
ur, hoc ex marmoris hujus inscriptione liquet, plures,
ethnics illis temporibus, civitatis Batavorum fuisse Magi-
stratus, quorum ille summus, qui principem in curia sua
obtinuit locum, & civitatis gubernacula administravit.
Quid illi nominis fuerit, in tanto veterum silentio vix di-
ci potest: hoc largientur omnes, Germanicæ originis voca-
bulum illud fuisse, quod Romani ad suum morem expres-
serunt. Pariter enim ac deum gentis Batavorum, ex signi
similitudine vel muneris paritate, ut supra diximus, eun-
dem existimarunt, quem domi suæ Herculem vocabant, in-
terpretatione Romana, ait Tacitus de M. G. c. 43. sic & bar-
barum Flavii magistratum summum appellarunt, ad exem-
plum Consulum Romanorum. Penes hos, si vim imperii

& potestatis spectes, *sumum jus* fuit l. 2. §. 16. de Orig. jur. *summi fasces* Rutilius Itin. V. 175. & *summa potestas* Sueton. Calig. c. 26. Ovidius eos *summos* appellat lib. IV. de Ponto eleg. 2. Græci *υπατης*; quoniam id quod *sumum* est, *prisci Græci υπατι* dixerunt, auctore Dionys. Halicarn. lib. IV. *Honorum populi finis est Consulatus*, dixit Cicero pro Plancio c. xxv. *Fastigium* passim apud scriptores; *potissimus Magistratus* Sidonio Apollinari, & *κερυφη και κεφαλη των αρχων*, apex omnium honorum, Chrysostomo appellatur. Atque hæc causa est, cur Romani aliarum gentium primos Rectores nunc Consules, nunc *summos Magistratus* interpretari solebant: nam Suffetes, quos Livius ait, *sumum Pœnis fuisse magistratum*, Justinus Consules appellavit lib. XXXII. c. 2. nomine Suffetes, quod ad potentiam Consules Salvianus dixisset, de gubernat. Dei lib. VII. pag. 149. In ipsis municipiis Duumviratus *maximus honor*, id est *summus Magistratus* vocatur, l. 1. D. de Albo scrib. quamvis enim duo essent, unum tamen magistratum administrabant, hominis unius vicem sustinentes l. 25. D. ad Municip. l. 13. C. de Magistr. municip. Apulejus Thesco patre loco principe duumvirali gloriatur. *Summates* civitatis Cæsariensis habet Symmachus. Sed maxime huc pertinet Aufonii locus, Idyll. X. ubi Mosellæ laudibus defunctus, accinctum sese olim, ait, ad deprædicandos Belgas, Batavorum vicinos, fama & magistratibus claros:

*Quis mihi tum non dictus erit? Memorabo quietos
Agrícolas: legumque catos sandique potentes,
Præsidium sublime reis. Quos curia SUMMOS
Municipum vidit PROCERES, propriumque senatum.
Quique suas rexere urbes, purumque tribunal
Sanguine & innocuas illustravere secures.*

§. VII.

Hæc ad illustrationem marmoris antiqui, & in honorem Trajecti, urbis splendidissimæ, dicta sufficiant: nec prorsus extra oleas, opinor. Nunc in viam revertentes fata nomi-
nis

nis Consularis persequamur. Non sane illud deletum fuit in Occidente, circa Justiniani ævum, nec solis Duumviris quarundam coloniarum & municipiorum cessit; sed apud Reges, Duces, Comites & Marchiones, in memoriam pristini splendoris, atque originis Romanæ, venerandum semper permanfit. Celeberrimus omnium Consulum est Clodovæus, Rex Francorum, qui, ab Anastasio, Imperatore Constantinopolitano, *codicillos de consulatu* accepit, auctore Gregorio Turonensi lib. 2. Hist. c. 38. Eruditus Calvisius, in opere Chronologico, *Consulatus* vocabulo triumphii insignia; Carolus Cointius ipsum Imperium intelligi opinantur. Verum probabilior est V. Cl. Hadriani Valesii sententia, hoc nomine Patriciatus Romani dignitatem significari; id quod, præter Ruinartum in notis, Pagius Crit. ad Baron. A. 508. n. 2. & in proleg. Dissert. Hypat. n. 9. multis confirmavit. Similem in modum Fredegarii continuator Chron. c. 110. Papam Gregorium III. refert, Carolo Martello *Romanum consulatum*, id est Patriciatum, cui defensio Ecclesiæ annexa erat, sancivisse. Nec alio sensu Carolus M. in versibus libro Evangeliorum inscriptis, apud Duchenum tom. 1. pag. 189. Consul appellatur: *voluit quo visere Consul*. Vid. Frenius in Glossario voce *Consul*. Sed præter Patriciatum Romanum, Consulatus vocabulo ornatum, tanta apud Gallos, Anglos & Germanos, nominis hujus admiratio fuit, ut in quovis altiore dignitatis gradu constituti id ambirent, & Consul, Dux, Marchio, Comes promiscue sumerentur. Non equidem ipsos movebat, quod ita summos utriusque Imperii honores in se conjungi putarent, ut Alteserra fingit de Ducib. & Com. lib. II. c. 5. Sed Consules a consulendo dicti, quia in Regum consilia erant adsciti, aut certe quoniam ea persuasio mentes tunc occupaverat, nominibus Roma petitis maximum decus inesse. Unde Sidonius Romam *Curiam dignitatum* lib. I. ep. 6. Cassiodorus *matrem omnium dignitatum* appellavit, lib. I. Ep. 32. Sane temporibus Pippini & Caro-

li M. Theodericus Dux Aquitaniæ, cum filio Guillelmo I. nomen Consulis & Consulatum sortiti sunt, teste Ordrico Vitali lib. VI. Hist. Dudo, S. Quintini Decanus de morib. Normann. pag. 130. Richardum Normanniæ ducem, *dulce caput Consulum* vocavit. Odonem, Comitem Campaniæ, Consulem appellat Matthæus Westmonasteriensis. Consules Cestriæ, Flandriæ, & Cenomaniæ occurrunt apud Robertum de Monte, in accessu ad Siebert. A. 1042. & 1099. Fulco bonus, Comes, *Consulis Andegavensis* titulo decoratur, apud eundem ad A. 1117. Leges Edwardi Confess. c. 2. *Quod modo vocatur Comitatus olim apud Britones, temporibus Romanorum, in regno isto Britannie vocabatur Consulatus, & qui modo vocabantur Vice-Comites, tunc temporis Vice-Consules vocabantur.* Albericus Monachus ad A. 913. *Vir inclitus Comes Gastinensis, Ingelerius nomine, Hugonis Ducis Burgundiæ nepos, Loziæ & Ambazie dominus, factus est Consul Andegavensium, a Rege Franciæ.* Infinita talia scriptorum loca adsunt, quorum multa Frenius in Glossario, voce *Consul*, alia Berter. 1. *pithanon.* 10. alia Matthæus collegit lib. I. de Nobilit. c. 16. & lib. III. c. 2. Idem tomo III. Analect. pag. 290. primores populi *Proceres*, qui nunc apud Frisios Grietmanni, certæ terrarum parti, cum summa potestate præfectos, sæculo decimo tertio Consules dictos esse, observavit. Rursus apud Anastasium, in collectaneis, aliosque, Consules appellari, qui Regni Senatores, Principum Consiliarii, & præcipui imperii ministri erant, idem Matthæus cap. 4. de Jure gladii ostendit. Sic mercatorum Consules, in portibus maris, suæ nationis merces tuentur, & Tripoli, Alexandriæ, Cairi, seu Memphi, hodie jurisdictionem exercent. Olim Anconitanorum & Pisatorum Magistratus, qui Constantinopoli degebat, *Κοιτὺλος* appellatus, auctore Codino cap. 7. de Off. Constant. n. 9. & 10. Meminit etiam Pachymeres lib. II. c. 32. & Nicephorus Gregoras lib. IV. sect. 9. *Magistratus*, inquit, *qui certis temporibus eo mittuntur, Venetorum Bajulus; Pifa-*

norum Consul; Genuensium Potestas appellatur: quæ in Græcam dialectum traducta, unum quidem nomen Procuratorem; alterum Præsidem; ultimum auctoritatem pollentem notat. Admiralli etiam, seu supremi Classium Præfecti, hoc nominis tulerunt apud Saracenos: sed an Consulatus, proprie ita dictus, viguerit apud Arabes, qui Hispaniam occuparunt, sic ut eorum Sultani Consulatum, instar Tribunitiæ potestatis gesserint, ut Pagius volebat, in Diss. hyp. p. 2. c. 4. n. 20. 21. id Vir nunquam satis laudatus, Carolus du Fresne discussit, in Glossar. Græc. t. 1. pag. 1268.

§. VIII.

Quod si ergo viri Principes Consulis nomen affectarunt, non est, quod miremur, usum ejus necdum vulgatum fuisse, aut Rectoribus civitatum promiscue tributum. Aliis autem honorum vocabulis hi denominabantur, inter quæ primum locum obtineat *Potestatis* vox, a Præsidibus provinciarum, ad summos Magistratus urbium liberarum translata. Julius Paulus, in illis, potestatis verbo, imperium significari scribit l. 215. de V. S. Modestinus refert, fidejussorem a potestate impetrasse, ut pignora possideret, l. 26. pr. D. de Pignor. & Junius Gracchanus libros de Potestatibus scripsit, quorum septimum habes, in l. un. D. de Off. quæst. Apud Juvenalem Gabiorum potestatis expressa occurrit mentio lib. X. v. 200. Græcis Πολιτικῆς ἑξουσίας etiam municipiorum magistratus dicti, auctore Valesio ad Eusebii Hist. Eccl. lib. V. c. 1. Ejusque appellationis exempla, apud posterioris ævi scriptores, etiam Græcos, ut modo diximus, maxime vero apud Innocentium III. Honorium III. & Clementem IV. vulgaria sunt. Immo sicut hodie in Italiæ & Venetæ ditionis urbibus, is, qui jurisdictioni præest, & civitatis negotia cum potestate quadam gerit, *Potestà* dicitur, ita Potestas Patavina, Bononiensis, Arelatensis, Avenionensis, Massiliensis, civibus in rebus belli ac pacis libere imperarunt. Apud Frisios vero rector totius gentis, e sui medio electus, *Potestas* appellatus; donec Imperatores, aut Reges,

Co-

Comites & Schultesios juri dicundo, in Frisiam miserunt, ut Ubbo Emmius, in Frisiæ descript. generali pag. 9. ostendit. De civicis nostris Fridericus, in Constitutione ecclesiastica apud Cironium, in quinta compilatione Decret. pag. 4. loquitur: *Potestates, Consules, Rectores, Statutarii.* cui addo Guntherum lib. 9. Ligur.

*Inde per Etruscas Legatos destinat urbes,
Campanasque domos, & quas in litore curvo
Æquorei lavat unda salis: quo debita fisco
Jura vetusta petant, per quos statuuntur in omni
Urbe Magistratus, & civica quæque Potestas.*

Hoc amplius Octavius Ferrarius, in Originibus linguæ Italicæ observavit, Brixia decurionum primates *Abbat*es dictos; eadem nomenclatura, qua Prætor Genuensium, & qui Galatinis, ab his missus, imperitabat Consul, donatus est. Forfan ad imitationem *Patrum civitatum*, qui πατὴρ πόλιν, in Justinian constitutionibus Græcis, appellantur l. 12. C. de Heret. l. 1. C. de Aleat. Nov. 160. pr. De Gallis Strabo memoriæ prodidit lib. IV. florente populari politia, primores urbium deligi solitos, qui in singulos annos jura redderent. Horum autem nomen non unum fuit: nam Vergobretus Flaviæ Heduatorum præfuit, ut ex Cæsaris lib. I. c. 16. supra diximus: id vero nominis Augustodunum, primaria civitas, ad hæc usque tempora, retinuit, sed media parte truncatum; ut princeps Magistratus *Vierg* dicatur. Tolosani Consules suos Capitولينos, *Capitous* appellant, sive a Capitolio, a Romanis extructo, cujus nomen & vestigia supersunt; sive a capitulo: nam *Capitularii* etiam, *Capitulares*, vel *Domini de Capitulo* dicti, auctore Alteserra lib. III. Rer. Aquit. c. 4. Burdegaleses vero rectores suos *Juratos* vocant, quorum caput *Major* dicitur. Similiter *Major & jurati Sueffionenses*, in veteri Aristo Parlamenti, sunt apud Choppinum de dominio Franc. lib. III. tit. 20. n. 10. In aliis Gallia urbibus Scabini, quasi lecti judices, Germanico vocabulo, appellati, ut discimus ex Ale-

Alexandri IV. Romani Pontificis, c. 1. de Immunit. Eccl. in 6. *In regno Franciæ*, inquit, *communiæ*, *Scabini*, seu *Consules*, *jurisdictionem in ipsis communiis, civitatibus, castris & villis temporalem exercent.* Non multis a Gallis discrepant Belgicarum urbium rectores, de quibus Gregorii IX Pont. Rom. decretalis epistola extat, de alienat. jud. mut. caus. *Ex parte Scabinorum Hypretis*; id est *Ypre* in Flandria, quæ nunc *Burgimagistros* habet. Qui Gallis *Eschewins*, Anglis *Aldermanni* dicuntur, etiam in amplissimo Metropolis Londinensis collegio; quod, Ricardo I. auspice, libera Urbis administratione & honoribus augmentum est, ut annales Anglorum produnt. LL. Edwardi Confess. c. 35. *Sicut modo vocantur Greve, qui super alios præfekturas habent: ita apud Anglos antiquitus vocabantur Ealdormen, quasi Seniores; non propter senectutem, sed propter sapientiam & dignitatem.* Apud Frisios, stante populari libertate, eadem vox, pura puta Germanica, usitata fuit, & ab his, sine dubio, in Angliam delata. Qui enim *Leovardix*, *Doccumi*, *Franekerae*, & *Harlingæ* Senior in Senatu erat, eique præsidebat, patrio sermone, *Oldermannus* dictus, ceteri *Scabini*, *Senatores* vel *Jurati*, auctore *Ubbone Emmio de Frisior. Rep.* pag. 16. De Principalibus vel Honoratis, *Hondradis*, duumviris, quatuorviris vel *Seviris Hispanorum*, videatur *Petrus de Marca, Marciæ Hispan. lib. II. c. 14. §. 13.*

§. IX.

Quemadmodum ergo, in medio ævo, propriis honorum vocabulis singulæ civitates magistratus suos ornavunt; sic inter vetustiores *Carthago Suffetes* habuit, *Capua Medixuticos*, *Corinthus Prytanes*, *Athenæ Archontas*, *Cyprus Anactas*, *Massilia Timuchos*, *Catina Proagoros*, *Constantinopolis Dissipatos*, *Messina Strategos*, aliæ aliter suos appellarunt. Nec *Batavis*, quondam *Cattorum* populo, ut *Tacitus* tradit, & seditione domestica in eas sedes transfresso, in vernacula videntur nomina defuisse, quibus summos & imos suos Magistratus honorarent. Hæc ut cogno-

P p p

scerem,

fecerem, nulli peperci industriæ, excussi & perreptavi, quoad a me fieri potuit, medii ævi monumenta; nec antiquius, in Cimmeriis illis tenebris, nunc quidem reperire licuit ullum, quam *Mergrævi* nomen. Notatu dignus est locus in LL. Edwardi Confessoris c. xxxv. *Greve quoque nomen est potestatis, &c. Unde Teutonici, Frisones & Flandrenses Consules suos MERGREVE, quasi majores dominos, vel bonos pacificos, vocare solent. Nomen verum, etymon incertum. Illud patet, vocem Mergreve ex mer, maire, & Græve compositam esse. Mer autem principem notat Gregorio Turo-nensi aliisque. Hinc Tillius comm. de reb. Gall. l. 2. Mai-eri vel mairii vocabulum origine Germanicum esse, & præ-fectum, præsidem, rectorem designare scribit. Quæ senten-tia tot prisca Germanorum Maris, ut Britomari, Teutoma-ri, Catumeri, Gilimeri, Fillimeri, Rotemeri, Vithimiri, Segi-miri, Condomari, Civismari, & antiquissimo Indumari, sive Indutiomari, summi Trevirorum Magistratus nomine, cujus Cæsar meminit, juvari possit. Viridumarum, Rheni proge-niem, celebravit Propertius; qui & Viridomarus & Britoma-rus Floro, Oroño & Jornandi dictus. Ricimeris meminit inscriptio l. 13. C. Tb. de Re milit. THEUDOMER REX in nummo aureo legitur. Apud Claudian. lib. I. de Laud. Stil.*

Marcomer Sunnoque docens.

Multa id genus alia collegit Hadrianus Junius in Batavia c. 23. & laudatam etymi Tilliani rationem, magis consentaneam esse, ait, dignitati & officio personarum principalis fortunæ. Bochartus addit, Gallorum principum nomina a *mar* composita esse, quia id Britannis *magnum*, Syris *dominum* sonat; unde *magnum* dominus noster venit. 1 Cor. XVI. 22. lib. 1. Geogr. c. 42. Reinesius contra lib. 111. Var. Lect. c. 2. *Mairii* vocabulum, a Germanis, ceterisque Romane scribentibus quarumvis nationum hominibus, è Latino *Major*, corruptum esse, & magistratum vel judicem notare, existi-mavit, quia apud Suidam est: *Μαίριος οἱ πρεβυται.* Janus etiam

etiam a Costa ad titulum Decretalium de Majoritate & obedientia erroris omnes arguit, qui vocabulum *Maire*, a Germanica voce *Meier* deductum esse censent: quia Major populi Neapolitani plebejus Magistratus vocatur apud Gregorium l. lib. 7. *Registri* ep. 27. Major Rupellæ in inscript. cap. pen. X. de *Consuetud.* Major domus in *can. Volumus* 89 dist. Costam laudat & sequitur Menagius in dictionario, voce *maire*, atque in Picardia *Mayeur de ville* dici, addit. Matthæus lib. IV. de nobil. c. 2. ex Græcorum ^{modis} argumentum depromit. Potuisset addere Hispanos, quibus *Majorinus* & *Meirinus*, sicut *Mairinho* Lusitanis, est Magistratus causarum cognitioni præfectus. *Majorinos vel alios rectores civitatum* habes, in Concilio apud Pennam fidelem an. 1302. c. 13. Gallis sane hac voce nihil frequentius fuit, & peculiarem Sidonio loquendi formulam, *Domine Major*, Arvernum idioma redolere, Joh. Savaro ad primam ejus epistolam observavit. Apud Francos princeps in regum palatio dignitas, *major domatus* dicebatur, & Civitatibus sui fuerunt *Majores*, *maires* vulgo: *Amalricus major de Buxido* est in Capit. Caroli Calvi tit. 13. In legibus Wisigothorum lib. 9. tit. 1. l. 6. *Major in loco*. Mihi sic videtur: ut origines plerarumque civitatum exiles, sic rudia quoque magistratuum nomina fuisse; quæ cum vitæ elegantia mutari cœperunt: quia *principia sua semper sequens magnitudo obruit*, ait Seneca l. 111. de benef. 29. Jam vero maxima pars civitatum ex villis, & vicis, *Meyerei*, enata est, quorum Præfecti, in illa temporum simplicitate, sua honoris & potestatis vocabula *Meyeri* pariter ac *Sculdassii*, *Scultesi*, retinuerunt, quæ Romani, linguæ Teutonicæ rudes, per *Major* explicarunt. Plane apud Francos, qui villæ regie præerant, & domini nomine incolis jus dicebant, *Majores villarum* vocantur, in Capitularibus, apud Hincmarum aliosque, a Frenio in Glossario laudatos. Idem *Villici* interdum dicti, sive a Francogallica voce *Ville* civitas, quæ ex complurium in agris mansionum & adium collectione exsurgit: sive a Romanis petiti, qui

ad quoslibet præfectos eam vocem transtulerunt. *Villicus* *erarii* est in Priapeis : *alimentorum*, *pagorum* in lapidibus antiquis. Juvenalis Sat. 1v. v. 77. de ipsa Roma :

Pegasus attonitæ positus modo Villicus Urbi.

Hujus imitatione *Villicos* & *Scabinos* *Leodienses*, habes apud Hocsemium c. 10. Prætor Groninganus, *Villicus in Groningen*, vernacule *Grunevuogt*, in charta audit antiqua, quæ in Kempii rerum Friscarum opere reperitur. *Villicus civitatis* est apud Joh. de Leidis in Chron. Holl. *Ballivum* sive *Villicum* habet Beka an. 1322. Ab Embrico Villico, Embrici villa dicta; & Prætozem Gandavensem notissimo hodie vocabulo, *Villanum de Gandavo* appellari, Menso Altingius notitiæ p. 11. p. 74. testatur. Sed hæc ad judices magis & Burgravios pertinent, quam ad Consules, quos Edwardus *Meergrevios* dictos esse tradit, adjectione honoris causa, ab ætate & canitie desumpta, quasi *Graeven*, Graviones. Qui hos a *græf*, a *grave* fossa, vel a *græven*, ab erudendis causarum meritis, quod erudito Altingio placuisse miror, vel ab aureo Regis graphiario, cum Chisletio, dictos volunt, unusquisque facile videt, quam longe a vero absint. Magna enim reverentia senectuti apud Germanos fuit. *Majores natu*, ut Cæsar vocat 1v. de B. G. c. 13. sive *Grtetmanni*, *Griese mannen*, viri canitie venerabiles, atque consuetudinum olitanarum periti, publicis Germanorum muneribus erant præficiendi; quia plus apud eos boni mores, quam Romæ leges scriptæ valebant. Ipsi civium judices *Sagibarones*, in tit. 56. L. Salicæ, vocantur, id est viri ætate & sapientia maturi, quibus controversias decidendi facultas erat. Et nihil prudentius isto instituto. Consilia senum, hastæ juvenum in proverbio sunt. Stomachatur nemo, cui per ætatem imperatur, neque se meliorem esse credit; præsertim cum hoc præmium recepturus sit; cum res tulerit justa ætate, ut pluribus disserit Aristoteles VII. Polit. 14. Claudianus bellis annisque verendos Getarum Proceres describens, de bello Getico canit :

Heic

*Heic aliquis gravior natu, cui plurima dictis
Consiliiisque fides.*

§. X.

Hæc paulo fusius edisserenda fuerunt, ut appareret, quam recte Hermannus Conringius, in disputatione de Urb. Germ. §. 75. scripserit: *absque dubio omnibus urbibus, Francorum ætate, jam suos Burgimagistros fuisse, negotiis civilibus dirigendis* Tantum vero abest, ut vox illa Capitularibus & Historicis Francorum sit nota, ut solum Capitolini, Oldermanni, Quatuorviri, Rectores civitatum, Scabini, aliisque vocabulis, supra §. VIII allatis, dicantur. Omnium autem frequentissima vox Majoris erat, *le Maire*; cujus meminit Capitulare Caroli M. *ut Presbyteri neque judices, neque Majores fiant*: quoque nomine Bituriges, Burdegalenses, ac Pictavienses adhuc lætantur. Non nego, fieri potuisse, ut civium curatores Burgimagistri in sermone vulgari appellarentur: serius vero, atque demum in sæculi tertii decimi publicis monumentis, titulus *Magistri civium*; rarius *Burgimagistri* nomen, licet prius forsan ætate, occurrit, antequam Acta publica vernacule scribi cœperunt. Ubbo Emmius, in serie Consulum Groning. ad A. 1260. *Hoc sæculo, inquit, litteræ vulgo scribebantur Latine, in iisque appellabantur Rationales, qui post, cum litteræ scriberentur Germanice, dicti sunt, voce Teutonica, Burgomagistri.* Charta Friderici II. Imp. anno 1232. apud Brouwerum lib. XV. Annal. Trevir. *Revocamus in omni oppido Alemannie. Communia, Consilia, Magistros civium, seu Rectores.* De civibus Augustanis scribit Crusius lib.

II. Annal. c. 17. quod, Conradino nefarie obtruncato, ipsimet sibi cœperint eligere Civitatis curatores, & Duumviros, *Magistros civium tunc dictos.* Hi vero ipsis Consulibus, id est Senatoribus, & quasi Consiliariis superiores erant, ut discimus ex diplomate Rudolphi Imp. an. 1280: apud Lehmannum l. v. Chron. Spir. c. 111. *Magistro civium, Consulibus, & universis civibus Spirensibus:* Et satis apta hæc appellatio, atque in synonymis *Raktsmeister, Stadtmeister, Ammeister*, alibi probata,

bata. Halæ Suevorum, quæ libera Imperii civitas est; Quinqueviri consules *Stattmeister* vocantur, auctore Crusio, p. II lib. VIII. c. 5. & p. III. lib. IV. c. 6. quos tamen Maximilianus I. in diplomate de A. 1521. *Burgemeister* salutavit. Argentorati nobilis genere per excellentiam *der Meister* appellatus, auctore Wenckero de jure archivi pag. 150. cujus verba adscribo: *Eorum qui hodie Consulum titulo, der Ammeister, apud nos sunt insigniti, origo certe antiquior est, quam ut vulgo creditur; quippe & in vetustissimis Argentoratensium documentis hujus muneris vestigia inveniuntur; licet non semper sub hoc expresso nomine: quoniam & iidem plerumque Magistri Scabinorum dicuntur.* Deinde pag. 151. *Qui der Meister, Magister nat. & xxi nominabatur, vel Magister civium, aut Magister Burgenfium, nobilis genere erat, ab antiquissimis temporibus: & primum unus, vel duo, raro tres, ultimo tandem quatuor eligebantur quotannis; quæ ordinatio, ab A. 1271. fere perpetuo huc usque fuit resenta; quo anno etiam titulus Magistri Burgenfium desuit, & in ejus locum nomen, der Stattmeister fuit introductum.* Haud ineleganter! Quibus enim præcipua cura incumbit, quique magis, quam ceteri, diligentiam & sollicitudinem rebus, quibus præsumt, debent, hi Magistri Romanis & Germanis appellabantur, l. 57. D. de V. S. Hinc Consules Romani Tullio *populi magistri* dicuntur; quia publicis rebus præfecti. Sic *Magister Equitum*, quod summa ejus in Equites potestas; Censor quoque *Magister morum*; & Dictator Romanus, *Magister populi* vocatus, auctore Varrone aliisque. Plerique collegiorum Principes hoc nominis gesserunt: *Magister collegii Fratrum Arvalium, Magister Collegii Dendrophororum*, in pri-scis Inscriptionibus; & *Magister universitatis* in l. 8. *Rem. rat. hab.* Agathias, lib. IV. Hist. Justiniani, Magistrum dignitatis nomen vocat: *Magister populi* in *xxxi*. Quamvis ante hunc municipiorum magistratus aliquando, apud Romanos, *Magistri*, velut diminutionis nota, & per ludibrium dicti: quod ex Suetonii Octavio c. 2. Joh. Fr. Gronov. ad Livii lib.

lib XXIV. c. 35. docuit; nec satis dixerim, an ejus appellationis vestigium sit, in lapide apud Gruterum 4. pag. 1093. MVNICIPI. MAGO. Sed *Burgimagistri* nomen recentissimum perperamque effectum esse, credidit Lambecius p. 2. rer. Hamburg. n. 25. quia *Burgus* vel *Burgum*, apud mediæ ætatis scriptores, pro munimento & castello sumatur, pro urbe nusquam. At *Burgus* Romanis quidem, sequiori ævo, *castellum parvulum*, seu turritum propugnaculum in limitibus denotavit, ut Vegetius scribit, & Cyrillus glossario, *pyræ turris*, *burgus*. alias clusuræ dicebantur. Vid. Cujac. III. Obs. 24. & Pithocum lib. I. Adv. c. 14. Germani vero crebra habitacula constituta, *burgos* vulgo vocant, ait Orosius lib. VII. c. 22. & *Burgundiones*, ab oppidis munitis, quæ arcem impositam habebant, nomen tulisse, Paulus Diaconus & Isidorus voluerunt. Otfridus Monachus in Evangelio illud: *Ite in civitatem*, Theotisce, sive Francisce vertit: *Faret in thia Burg*. Sigilla multarum urbium hoc confirmant, in quibus oppidum turritum conspicitur; etiam terminationes in *Burg*: *Magdeburg*, *Batenburg*, *Salzburg*, *Wurtzburg*, *Strasburg*, *Augsburg*, *Merseburg*, *Lauenburg*, *Freiburg*, *Duisburg*, &c. Hinc *Burgum* pago, & vox *Burgensis* rustico opponitur passim, ut liquet ex c. 2. x. de *His que vi metusve*, ubi Gonzalez plures auctores cumulavit. Nos addimus sigillum majus apud Buchelium ad Beckam, pag. 89. in quo: SIGILLUM BURGENSEM CIVITATIS TRAJECTI. Simile *Sigillum Burgensium in Lopdenburg*, expressit Freherus Orig. Palat. p. 57. *Sigillum Burgensium in Goslaria* dedit Rev. Heineccius de sigillis pag. 138. *Burgenses nostri in Dresden*, occurrunt in charta Henrici, Misniæ Marchionis, apud Weckium in descript. Dresd. Certe Lambecium nodos in scirpo quæsisse Matthæus de nobil. l. III. c. 2. & Schurtzschisch disp. 39. §. 7. docuerunt. Finiamus ergo verbis Henrici Aquilonipolensis de Primordiis Lubecanæ urbis l. I. c. 5.

*Schultetum hic habuere usque hic, vel Burgimagistrum,
Jam cum Consulibus Burgimagister erat.*

§. XI.

Verum de nominibus adeo diversis, pro instituti quidem ratione, jam satis; immo forte plusquam satis. Nunc ergo pressius videamus, quo tempore Consulum nomen, a rectoribus urbium Germanicarum, fuerit adoptatum. Quam rem, ut sine offensione persequamur, Germania Cis-Rhenana a Germania magna omnino discerni debet. In illa omnibus notæ sunt urbes, multis nominibus celebratæ, Argentoratus, Nemetes, Magontiacum, Colonia Agrippina, Bonna, & omnium antiquissima Treviris; quæ sicut auspiciis Romanorum conditæ erant, ita Magistratus, Romanis similes, creasse videntur. Quapropter non mirum est, in vita S. Felicis, Archiepiscopi Trevirensis, circa A. 386. *Consules, Patritios & Senatores, urbis Trevirensis*, laudari. Trans-Rhenanis autem Germanorum populis, ante sæculum quintum, urbes nullæ, sequutis temporibus paucæ fuerunt; donec sub Carolingis religio Christiana; sub Henrico Aucope, incursiones Hunnorum, urbium incrementa promoverunt. Sine dubio autem civitates, statim in ipso exordio, suos acceperunt præpositos, qui rebus ad politiam spectantibus præessent, sed immane quantum ab hodiernis Consulibus diversos. Hinc Carolus Sigonius lib. XVII. de Regno Italiæ, quum narrasset, ad A. 973. Ottonem Imperatorem, civitatibus Italiæ dedisse, ut leges, jura & magistratus sui arbitrii haberent. Quos vero populi, subjungit, ad regendam civitatem, & jura moderanda, posthac crearunt, *Consules duo aut plures fuerunt, ex antiqua Romanæ Reip.* (non ergo Germanicæ) *consuetudine, quotannis sumti.* De Langobardis, Otto Frisingensis lib. II. de Gestis Frid. c. 13. *In civitatum dispositione, ac Reip. servatione, antiquorum adhuc Romanorum imitantur solertiam.* Denique libertatem tantopere affectant, ut, potestatis insolentiam fugiendo, Consulium potius, quam imperantium, regantur arbitrio. Radevicus lib.

lib. II. de gestis Frid. c. 5. Itatorum Consulatus inter regalia numerat, & jus creandorum Consulum, rebellibus Mediolanensibus ab Imperatore restitutum, describit lib. I. c. 41. Diserte Guntherus lib. VIII. Ligur. 206. *Consulibus positis, & facta pace repertis Stare licet, plenus dum se converterit annus. Postea nullus erit, nisi quem Rex ipse probarit, Electum populo.* Quemadmodum ergo Itali Romanos, sic Germani Langobardos postea imitati esse videntur; in aliis urbibus serius, in aliis citius, prout commerciis & potentia valebant, vel à Præfectis, Comitibus, Missisque dominicis mature liberabantur. Præ ceteris, probabilis videtur sententia, Viri rerum patriarum peritissimi, Christophori Lehmanni, lib. IV. Chron. Spir. c. XI. regnante Henrico V. Imperatore demum, morem Langobardicum, publica sanctione ad Germanorum civitates transiisse: licet nonnullæ forsan, (timide loquor) sub Saxonice Imperatoribus, domi suæ, id vocabuli sibi arrogarint; quia non Italiæ tantum, sed Galliæ urbes quoque vicinas Consules suos habere videbant. Supra allatis Aufonii aliorumque testimoniis, auctarii loco, nunc elegans inscriptio accedat, Augustoriti-Pictonum effossa, apud Mabillonium Addit. Supplementi de Re diplom. pag. 114. in qua Pictonum civitas, nobili cuidam heroinæ Gallæ, CLUARENILLÆ, CLUARENI. CONS. FILIÆ, funus, locum & statuam dedisse memoratur. At vero in Germaniæ urbibus, omnes Senatores initio Consules & Consulares dicti, vel *homines de Consulatu, Universitas Consulum*, quia consilio civitatem juvabant, in chartis apud Lambec. lib. 2. Rer. Hamb. n. 139. Capita vero Senatus, alibi *Magistri civium*, apud Hamburgenſes & Magdeburgenses minus perite *Proconsules* sunt appellati; quasi Proconsules, & Præsides, qui præ ceteris Consulibus, id est Senatoribus, auctoritate pollebant. Testimonia, post Lambecium, plena manu congeſſit Matthæus de Nobilit. lib. III. c. 2. quocum Lehmannus lib. IV. Chron. Spir. c. 13. & Joh. Albertus Fabritius vol. I. Memor. Hamb. in nota ad

feriem Consulum, quam ex A. 1248. nescit, jungantur. Addo jus Weichbildicum Magdeburgense, sæculo decimo tertio, ut videtur, conscriptum, art. 43. §. 2. *Eligere insuper Consules debent inter se Proconsulem unum vel duos &c.* Contra Rudolphi Imp. ad Magistrum, *Consules & universos cives Bisontinos*, epistola de A. 1277. extat apud Chiffetium Vefont. pag. 229. *Magister civium & Consules*, in privilegiis Academiae Viennensis, occurrunt rubr. 38. Sed Annales Dominicanorum Colmaricnsium ad A. 1287. referunt: *Consules Argentinenses cives suos equos habere bis mille præcepisse.* In Batavorum civitatibus Scabini Consulibus olim sunt prælati, ut ex duorum conjugum testamento, coram judicio Leydensi facto, probat Marthæus tom. III. *Analest.* pag. 406. & rationem addit; quia judicum seu Scabinorum institutio ibi vetustior est, quam Consulum; hi enim A. 1351. sub appellatione *Raets-mannen* instituti, demum circa A. 1434. nomen *Burgermeysters* adsciverunt, auctore Ampliff. Orlers in descript. urb. Leydens. part. 3. pag. 608. seqq. Trajecti similiter *Sculteti*, Scabinorum, Consulum & Universitatis meminit Henricus Episcopus, in litteris A. 1250. & 1260. exaratis. Beka, ex vernaculo *Borgermeister*, Consules Civium Magistrum vocat: sed quamprimum acta Germanice scribi cœperunt, ordo inversus, & *Borgermeesters*, *Schepenen*, *Raad en Oudermannen* leguntur. Illud non præteribo, Ampl. Menfonem Altingium part. I. Notitiæ Bataviæ pag. 49. nimium dedisse videri patriæ suæ Groningæ, dum ejus Consules, ceterosque Magistratus, quin etiam leges, Cn. Domitio Corbuloni acceptos fert; quia Tacitus XI. Annal. c. 19. scribit, ipsum nationi Frisiorum *Senatum, magistratus, leges imposuisse, ac, ne jussa evenerent, præsidium imposuisse.* Ut vero de incertitudine loci, quo munimentum illud extructum fuit, & de recentioribus demum urbis illius vestigiis nil dicam, Ubbo Emmius fastos Consulares Reip. Groningæ non ultra A. Chr. 1260. evchere potuit, atque tum Burgomagistri *Rationales*, Senatores *Oldermanni* vocabantur.

§. XII.

Si quis nunc scire aveat, cur sæculo duodecimo & sequentibus demum, in plerisque Germaniæ civitatibus, Consulare nomen & imperium occurrat, ratio non longe petenda erit. Alia enim regiminis forma in principio fuit, quam nunc est. Sub Carolingis quotquot extabant urbes, *Curtis regie*, & *Ville regales*, immediatæ Regni erant, & per Comitès, vel Mîslos regios administrabantur. Ottonum tempore differentia inter *Urbes Regales* & *Præfectorias* invaluit, quæ distinguuntur in charta Ottonis II. Imp. A. 974 apud Nicol. Zylles. Defens. Abbat. S. Maxim. Posteriores præfecturis populi Romani in Italia comparari possent; nam ut hæc magistratus proprios non habebant, sed quotannis Mîslos accipiebant, qui jus dicerent: sic in Germaniæ urbibus Præfecti omnia negotia publica, & jurisdictionem criminalem, Sculteti civilem exercebant: utrique vero ab Imperatore constituebantur, certis pagis vel regalibus, ex quibus viverent, salarii loco assignatis. De Præfectis, qui & Comitès civitatum, Advocati & Consules dicebantur, multa Sagittarius de Antiquit. Duc. Thuring. lib. IV. c. 4. Matth. lib. I. de Nobil. c. 6. & l. II. c. 29. Scultetus vero, alias Schulthais, Sculdafius, Scultes, Scout appellatus, non de capite, sed de pecunia judicabat, & ut vox indicat, debitorum erat præfectus. Odefridus, antiquissimus vernaculæ scriptor, vocem *Schultzeiz* habet, & Diaconus lib. VI. de Gestis Langob. *Reñor loci illius, quem Schuldbais lingua propria dicunt, vir nobilis, animoque & viribus potens*. Ubi burgi & castella erant, Duumviris his accedebat Burggravius, ad defensionem urbis & locorum vicinorum constitutus. Burggravii Trajectini Henricus Episcopus meminit in literis A. 1250. Sculteti Philippus Suevus Imp. in diplomate A. 1200. Burggravius Leydenus *Castellanus de Leyden* dicitur, in veteri charta A. 1266. apud van Hout in *zijn Dienstboek* p. II. Hi vero Burggravii, Præfecti & Sculteti, quia cives nimis avare & inclementer tractare coeperant, jura, redditus &

vices eorum aliæ urbes dato pretio redemerunt, in aliis, beneficio Imperatorum, cesserunt Episcopis diocesanis; qui fons est tot contröversiarum, de quibus Danielis Heideri, Consiliarii Lindaviensis, præclarum scriptum in lucem prodiiit. Paulatim igitur civitates, sui juris factæ, liberiores rempublicam instituerunt, ut, Aristocratia hereditaria, ab Optimatibus gubernarentur. Hi vero, ex re & vulgari vocis usu, neque nimium ambitiose, Consulum & Senatorum nomen adoptarunt: quod suam longe potiores, quam Duumvirorum & Decurionum, in priscis municipiis, conditionem esse sentiebant; & *consulare* pro consulere, *consularius*, & *consulatio*, sæpe in ævi illius libris, conjugatione mutata. V. Lehman *lib. IV. Chron. Spir. c. II. § 13*. Schilter. *Exerc. ad Pand. XXII. §. 58*. Ast quum hi, sub initium sæculi decimi quarti, exemplo Præfectorum, rursus superbe imperitare conarentur, seditiones passim Argentorati, Moguntia, Hagenoæ, Wormatiæ, Spiræ, Noribergæ, atque alibi exortæ sunt; quibus effectum, ut omne tandem imperium amitterent Patritii, & Respublicæ Optimatum, in Democratas vel Politias temperatas mutarentur, sola fere Noriberga excepta: ut post Knipschildium *de jure civit. imp.* passim, Hertius docuit, in *dis. de Special. Rom. Germ. Imp. Rebusp.* §. 22. Argentorati singulare est, quod nemo, nisi plebejus sit & opifex, Consul eligi possit, auctore Limnæo *t. III. lib. 7. c. 3. n. 9*. Ceterum in eo quidem Consules hodierni facile conveniunt, quod convocant Senatum, proponunt, dirigunt, concludunt; &, ut paucis multa, totius Reipublicæ curam gerunt: non una tamen nominis, numeri & temporis est ratio, quo munere suo funguntur. Argentorati *Ammmeister*; Augustæ Vindelicorum *Statt-Pfleger*; Halæ Suevorum *Statt-Meister*; Halæ Magdeburgicæ *Rabts-Meister*; in plerisque *Burger-Meister* appellantur. Numerus pro urbium magnitudine variat; in majoribus ut Lubecæ, Bremæ, Quatuorviri; alibi Seviri, ut Augustæ Vindelicorum; in minoribus Duumviri leguntur. Sunt quibus perpetuum

petuum placet imperium, aliis annuum: hic alternis anni vicibus, alibi per mensem, unius vel plurium, vicissitudines regimen mutatur: ac tum qui præest, Verbi potens seu regens Consul dici solet. Vide Mevium ad jus Lub. lib. I. tit. 1. & Ill. Ludewigii disp. de Diff. juris Rom. & Germ. de Senator. §: XI. & XVI.

§. XIII.

Supereſt, ut de insignibus & symbolis Consulium hodiernorum, quædam dicamus. Antiquissima dignitatis nota est sceptrum, vel baculus, quem Reges, quum jus dicerent, vel publico aliquo munere fungerentur, tanquam justitiæ, veritatis & gubernaculi insigne, in manus sumebant. Ipse Jupiter, *spectroque innixus eburno*, apud Ovidium depingitur; & Virgilius de Regibus Latinis lib. XII.

Olim arbos, nunc artificis manu ære decoro

Inclusit, patribusque dedit gestare Latinis.

Idem vero scipionis symbolum Consules Romani, ab ipsa institutione, sibi aptarunt; quos deinde Duumviri, in municipiis & coloniis, imitati sunt; ut capite præcedente diximus. Hinc inter magistratuum municipalium ornamenta, ab Ulpiano laudata in l. 15. §. 39. *D. de Injur.* fasces, batilli, lixæ & virgæ memorantur l. 53. *C. de Decur.* Cic: de *lege Agrar. II. c. 34.* Apulej. lib. I. *Metam.* Athenis olim baculus, *ἡ τις ἢ συμβολὴ τοῦ δικαστοῦ*, judici unicuique Heliastarum dabatur, cō colore & littera, qua tribunal, denotatus, ut ex Aristotelis libro, de Athen. Scholiastes ad Comici Plutum & Vespas docebit. Græcis recentioribus similiter virga regiminis nota fuit; quam *δικαστικὴν* appellatione, in magistratibus, plus semel Codinus donat. In aula Regis Gothorum, Cura palatii, cum aurea virga, incedere solebat, auctore Cassiodoro lib. VII. Var. c. 5. Apud Francos & Anglos *baculus aureus*, omni tempore, Regiam Majestatem designavit, quo & pacta feriebant, & dignitatem successoribus resignabant. Vid. Frenius in voce *baculus*, & Mabillon. lib. II. de Re diplom. c. 18. Etiam in coronatione Ottonis

M. Wittichindus *baculum, cum scepro & diademate*, super altari positum fuisse, tradit. Episcopi vero per annulum & baculum *lignum* investiebantur, per solum baculum Abbates; unde Rectori Magnifico adhuc hodie virga, sive, ut vulgo dicitur, sceptrum a Pedellis præfertur. In judiciis porro Germanorum baculo nil frequentius; ut Nemesius Carolina art. 82. & usus multorum tribunalium ostendit. In condemnatione facinororum, lignum, quod *Ruge-Stab* Otfrido dictum, frangitur; in causis civilibus, tacto baculo judiciali, promittitur: *an den gerichtis-Stab angeloben*. Vid. Constit. crim. art. 96. & Bambergensem art. 117. Moguntinus Archiepiscopus hacpropter investitur & investit alios, *mit den Stabgerichten*, in dipl. apud Lunigium Archiv. cont. 2. p. 6. pag. 60. Hinc etiam in Capitularibus Francorum, tit. 33. c. 1. & tit. 67. c. 5. Mallus publicus Regius *Staplum*, a *Stab*, vel a *Stapel*; judicii vero Assessores, præsertim qui ad Rhenum, *Conßesser, Stab-Herren, Stabel-Herren, judex der Stabhalter*, dicuntur. De baculis Consulibus, nemo, nisi qui civitatum Germaniæ Curias prorsus ignorat, dubitare potest. Nescio autem, an alibi obtineat, quod Colonia Agrippinæ olim observavit Lipsius lib. I Elect. c. 23. & ipse nuper curiosis oculis adspexi. nimirum Duumviris Consulibus, singulis, qui ex Scviris annum regimen tenent, sive eant, sive carpentis vehantur; famulus domesticus, vix pubertatem egressus. & splendide vestitus, baculum album, fere duarum ulnarum, præfert; cumque Curiam ingredientibus tradit; quo Regiminis insigni, inter genua posito, dum Senatores subsellia occuparunt, in loco paululum editiore, conspicui utuntur. Nugas agunt, qui sibi aliisque persuadent, baculo rustico uti Consules, quod civitas olim inter quatuor rusticas numerata fuerit. Ritus enim, ut multi eorum alii, mere Romanus est, ad imitationem Urbis matris a colonis susceptus, ut dudum in libro de Ædil colon. c. XII. p. 368. ostendi, & nunc triplici argumento confirmo. Primum sit, quod

quod Stephanus in hist. S. Maurini scribit : *Colonia Agrippina secunda* : (si dignatur dici) *Roma*. Alterum, quod Senatores toga nigra, holoserico prætexta, & pilei singularis genere, Senatum ingrediuntur. Tertium, quod in Curiam ingressuri, prius in sacello vicino sacra faciunt; pariter ac Octavianus Augustus decrevit, ut Senatores Romani ture ac mero supplicarent illi Deo, in cujus templo Senatus habebatur, ut Suetonius in ejus vita, & Dio lib. 54. memorie prodiderunt.

§. XIV.

Quod ad habitum consularem attinet, pridem docuerunt Criticorum filii, Romanorum veterum vestes fuisse togas pictas & palmatas; recentiorum, si non diversas, saltem non easdem, ut numismata & Diptycha Consularia representant. Nobis vestitus Consulum Germanicorum curæ erit, qui nunc quidem in multis civitatibus non alius est, quam Senatorum & civium, a quibus honor solus & muneris amplitudo eos distinguit; sed olim non erat sic. Inter alia ornamenta, nullum memorabile est magis, quam Amplissimorum quondam Consulum Trajectinorum, quod Antonius Matthæus, lib. IV. de Nobilit. c. 31. pag. 1132. ex veteri tabella, æri incisum exhibet. Vides ibi Consules Duumviros non modo togatos, sed & nescio quod humerale rubrum, togæ superfusum, collum & brachia instar coronæ ambiens, nolisque argenteis adornatum, quod *een Silvern Covel*, in Registris civitatis, appellatur. Præter Consules binos veteris, & totidem novi Consilii, vestem illam accipiebant quatuor primarii Collegiorum Decani; sicque Octoviri, de *Oversten* vulgo, diebus festis, & quum solennes facerent processiones, ad annum usque 1529. in publicum prodire. Lambertus Hortensius, ad insignia Romanæ libertatis, illud ornamentum referre non dubitavit lib. VII. Hist. in. fin. *Populo comitia antiquata: Consulibus & Senatorum duobus principibus, Romana libertatis insignia, togæ argentea sunt detracta.* At mihi vestitum con-

consulare Romanorum intuenti, nullum hujus indu-
 ti vestigium compareret; nisi quis curtam tunicam laticlaviam
 posterioris ævi Consulum & Senatorum, huc trahere velit,
 quæ sine manicis, & ceteris vestibus injecta, *Colobum* ap-
 pellatur in l. 1. C. Th. de Habitu, quo uti oportet intra
 Urbem: *Nullus Senatorum habitum sibi vindicet militare;*
sed chlamydis terrore depositò, quieta coloborum ac penularum
induat vestimenta. Ammianus Marcellinus lib. XIV. *Pecto-*
ralem tunicam sine manicis textam appellat. Graphice for-
 mam ejus describit Acron ad Horat. lib. I. sat. 5. *Latum*
clavum purpuram dicit, quæ in pectore extenditur Senatorum.
Græci τὸν κόλωβον vocant. Usus ejus hodie retinent *Princi-*
pes, injicientes vesti a cervice indumentum ex purpura vel pel-
libus pretiosis muris Pontici, vel aliis, dum regio habitu prode-
unt in publicum. Verum quia colobia veræ tunicæ erant, sed
 truncæ, & manicis carentes, quæ vero sub armis, id est
 brachiis, alarum sinum ambiebant, indeque *subarmales* di-
 ctæ; satis liquere, arbitror, Consulum Trajectinorum
Covels, partem brachiorum superiorum tegentes, a veterum
colobiis differre. Inprimis, quia *covel* non togam tantum,
 sed & capitis tegmen significabat, pariter ac ricinium toga
 mulierum clavo purpureo prætexta erat, & ad caput ope-
 riendum serviebat; palliola quoque mulierum, ac cucul-
 lii monachorum caput & humeros tegebant, ut Salmasius
 ad Vopisci Aurelium c. 45. & ad Tertullianum de pal-
 lio pag. 308. ostendit. Nec tamen prorsus inficiari ausim,
 a Romanis initia Consularis hujus ornamenti fluxisse; quia
 Consules quoque Colonienfes, in processionibus annuis,
 simile rubri coloris humerale induere accepi: idemque or-
 natus, in Manuelis Palæologi Imperatoris figura, apud
 Frenium cernitur, in dissert. de Imp. Constant. numism.
 tab. 7. Sed quorsum tintinnabula? Apulejus Procerum
 vestes noluisse exornatas, docet lib. X. *Et pithilibus bal-*
theis & tintinnabulis perangustis exornatum, ipse residens, aman-
tissime nonnunquam commissimis affatur sermonibus. Potentiori-
 bus

bus deinde, in medio ævo, campanulas in vestimentis placuisse, non modo imagines a Bucelino *Hist. Agilolfing.* pag. 383. Lambecio *lib. 2. Orig. Hamb. & Tenzelio suppl. 2. Hist. Gotb.* pag. 246. depictæ, sed etiam Auctor Jurisprud. Heroicæ p. 1. art. 8. pag. 403. & Slegelius in disert. de nummis *Isenac.* pag. 9. ostenderunt. Quinimo, simulac veteris Testamenti sacerdotium, cum pompa externa, in Ecclesia Christiana restauratum fuit, tintinnabula quasi propria facta sunt vestitus clericorum. Missa vetus, ex codice Ratoldi, Abbatis Corbejensis: *Super hæc itaque ministretur Episcopo tunica, gyris in tintinnabulis mirifice referta.* Testamentum Riculfi, Episcopi Helenensis A. 915. *Stolas quatuor cum auro, una ex illis cum tintinnabulis.* Origo, ut dixi, fluxit ex summi Sacerdotis vestimento, cujus oræ tintinnabulis insignes: id enim diserte confirmat Vita S. Hilarii Arelatenfis: *Videt, se facris interesse mysteriis, intuetur tunica Aaron quondam Pontificis tegmine decoratum, tinniola etiam commota, gressibus incedentis, & intrinsecus malo granatis illisa, clarum personabant extrinsecus salutiferumque tinnitum.* Augustinus tintinnabulorum, sub vetere lege, hanc causam adfert, *ut nota esset eorum conversatio*, lib. II. Quæst. in Exod. c. 119. quæ ratio ad Consules quoque Traiectinos applicari potest. Recens demum, & sæculi decimi quinti inventum, morem illum, tintinnabula vestibus honoratiorum appendendi, existimat Clar. Dn. Heineccius, de vet. sigillis p. 1. c. 9. n. 47. nec Traiecti antiquiora ejus vestigia nunc succurrunt, sed Apulejus & reliqui me in diversum ire cogunt.

F I N I S.

Rr̄

DIS-



DISSERTATIO DECIMA,
DE
DOLO BONO,
AD

L. 1. §. 3. D. de Dolo malo.



Mant alterna Camoenæ. Et ecce! juris Publici materiam, excipit alia, non minus illustris, quæque ex vario jure, divino & humano, partem trahit. Augustinus eam non ab re, *magnam questionem, laetebrosam tractationem, & disputationem inter doctos alternantem* appellavit. Fuerunt enim omni tempore, & adhuc sunt, quibus in tractandis negotiis, dolus malus placet, homines ad Cy- nicorum *ἀδιαφορίαν*, in professione veritatis delapsi; quos inter Machiavellus, Principi inprimis dat potestatem fallendi fidem. Alii contra, omnem mentis & orationis discordiam Stygia palude expiandam censent, nullumque mendacium inter & falsiloquium discrimen, agnoscunt, Augustinum ducem secuti: Nos vitiosum putavimus omne, quod nimium est: ideoque tam dissidentium sententiarum conciliationem aggressi sumus, adhibita distinctione, inter dolum bonum & malum, quam prudentissimus Ulpianus nobis servavit.

vavit. Quod si enim ad exempla catur, atque officiorum existimationes suis, ut oportet, ponderibus, non inanibus vocabulorum aucupii exigantur, fateamur necesse est, incidere tempora, ut crimine vacet, qui in factis simulavit, in verbis falsa locutus est. Qui aliter sentiunt, rigidiores veritatis custodes, mendacium aut minus recte definiunt, aut vocem invisam accipiunt nimis late, tandemque dubiis prefissi, in meram λογισμὸν definunt. Lipsius, ut extrema Machiavelli declinaret, gravem dolum prohibuit, mediocrem toleravit; sed illius doctrina, fraudis & moris pravi magistra, non magis utimur, quam rancidis mendacii distinctionibus, ex Augustini schola profectis. Quantum in nobis est, ita in re ancipiti versati sumus, ut malitiam execrandam, honestis nominibus nuspiam appellaverimus, semper memores sapientissimæ Jesu filii Sirach sententiæ, in Ecclesiastico, omnis virtutis penu, cap. XIX. 19. *Improbitalis scientia, non est sapientia; neque est prudentia, ubi consilium peccatorum est. Est improbitas, quæ eadem abominanda est; sed est insipiens, qui parum valet sapientia. Præstat timidus, qui trepidat in intelligentia, eo qui abundat prudentia, & transgreditur legem Altissimi. Est astutia accurata, quæ ipsa injusta est.* Quod si alicubi peccatum sit, æquos Lectores spero; quia plus semel incedendum fuit per ignes suppositos cineri dolo. Cicero agebat, Jurisconsultos iniqua tollere, quatenus teneri manu possunt, Philosophos, quatenus ratione & intelligentia; sed & ego virtutis & officii subinde rationem habui, ac meum facio Comici illud:

Nunquam ita quisquam bene subducta ratione ad vitam fuit,

*Quin res, ætas, usus, semper aliquid adportet novi;
Aliquid moneat, ut illa, quæ te scire credas, nescias;
Et quæ tibi putaris prima, in experiundo repudies.*

CAPUT PRIMUM.

Justitiam doli boni rationibus defendit.

§. I. *Doli vox media apud Græcos & Latinos.* II. *Doli mali descriptio, in l. 1. §. 2. D. de Dolo malo, adversus Hotmannum defensa.* III. *Dolus bonus per solertiam explicatur, & quare?* IV. *Omnis dolus malus damnatur.* V. *Dolus bonus laudatur a Jurisconsultis.* VI. *His praeiverunt Stoici, Plato, Xenophon, Philo, aliique.* VII. *Rationes, quibus dolus bonus impugnatur.* VIII. *Ejus justitia defenditur separatione mendacii, a falsiloquio; jure circa sermonem, & collisione legum recte explicata.* IX. *Argumenta contraria refelluntur.* X. *Dolus bonus probatur auctoritate veteris Testamenti & Rabbiorum.* XI. *Exemplis novi Instrumenti. Grotius notatur.* XII. *Judicio Patrum omnium, Augustino excepto.* XIII. *Assensu Theologorum & Jurisconsultorum recentiorum.*

§. I.

Nota res est Jurisconsultis pariter, ac Grammaticis, vocabula multa nunc quidem, in sermonibus vulgi, unam certamque rem demonstrare, quæ in veterum scriptis fuerunt ex genere των μεσων, sive mediæ significationis, ac utroqueversus, & in bonam & in malam partem, accepta; quorum proinde significatio ut determinaretur, adjectione boni vel mali fuit opus. Sic apud Græcos vox φαρμακον, apud Latinos *venenum* anceps est, tam medicamenta, quam quæ nocent venena denotans l. 236. *D. de V. S.* Sic *persuadere* possumus, & bonum consilium dando, & malum, auctore Ulpiano in l. 1. §. 3. *D. de Servo corr.* Horatius *fraudem malam*, pro furto dixit. Bona & mala *gratia*, est apud Terentium in Phormione: Plautus *malitiam malam* habet in Aulularia, quasi sit & aliqua bona; licet hæc vox simpliciter posita, Ciceronis ætate, versutam & fallacem nocendi rationem

tionem notarit. Alia Latinorum exempla in *Noſtibus Atticis* plena manu conduxit Gellius lib. XII. cap. 9. nos unum Latinorum, & duo Græcorum apprime ad rem pertinentia addemus: *Ingenium* plerumque docilitatem inſitamque homini vim notat, & *bonum* appellatur Plauto *Pœnulo* Act. 1. ſc. 2. 90. pro fraude autem & machinatione ponitur, in 1. 6. C. Th. de Curioſ. *Callida machinamenta commeantium, ac ſimulatæ obſervationis ingenia & fraudes*. Alterum Vir ſanctus, Baſilius Magnus præbebit, qui in Proverbia Salomonis, Sophoclem imitatus, quandam καλήν και επαινετην παρρησίαν, *honeſtam atque laudabilem calliditatem* eſſe tradit. Æſchylus denique dolum agnoſcit, cui nec ipſe Deus ſolet auxilium denegare:

Απάτης δικαίας ηκ αποσταει θεος.

Eundem ergo in modum *Doli* vocabulo nunc tantum in malis utimur, veteres autem in bonis etiam rebus id uſurpabant, unde in Legibus XII. Tabularum ſcriptum: *Si tuſor DOLO MALO* gerat, *vituperato*; nimirum *malo*, quia ſolebat & dici *bonus*. Si originem intueamur, & primæ notionis ſignificatum, Dolus eſt a Græco δολος, *fraus, deceptio, læſio*; non a dolando, ut Plautus *dolum dolare* dixit Mil: III. 3. 64. Inde & *dolones*, απο τε δολη, pro telis & gladiolis, in ſtagello vel baculo latentibus, apud Virgilium, Phædrum, Alphenum in l. 52 §. 1. *D. ad Legem Aquil.* Ulpianum in l. 1. §. 7. *D. Si quadrup. paup. ſec. dic.* & recte vetus interpres Eccleſiaſtici XXXVIII. 26. baculum cum ſtimulo, quo boves agitantur, *dolonem* interpretatur. Dicimus autem dolum malum, non quaſi perpetuo epitheto, ut Camerarius ad Ecl. I. Maronis exiſtimabat; ſed diſtinctionis cauſa, & per διαβολην, quemadmodum id Donatus ad Terentii Eunuchum Actus III. Sc. 3. verſ. 9. poſtremo loco, ceu verius, agnoſcit. Ita ille: *Quod autem addidit malo, aut αρχαισμος eſt, quia ſic in duodecim Tabulis a veteribus ſcriptum; aut επιθετον doli eſt perpetuum: aut διαβολη eſt, quia eſt bonus, quo a medentibus falli egros, non tamen decipi,*

Rrr 3

Lu:

Lucretius Poëta testatur. Decemviris præiverunt Græci: nam apud Homerum *Iliad. IV.* est δολὴ κακῇ & κακοῖσι δολοῖσι κεκοσμενῇ: ad quæ Eustathius: πρὸς διαφορὰν καὶ τὰς δολὴν ἐτέρων ἀγαθῶν, εἰς ἐπαινεῖς ἀν τῆς κοσμοῦτο: *ad differentiam aliorum dolorum bonorum, quibus quis cum laude ornaretur.* Alia ex Græcis magistris, ad locum secundi *Iliados*, vide apud Muretum lib. XVIII. Var. lect. c. 4.

§. II.

Dolum malum Aquilius Gallus describit, cum aliud agitur, aliud simulatur; laudante M. Tullio *de Officiis lib. III. cap. 14.* Servius Sulpitius, ejus discipulus, & Pedius, generis loco, addiderunt machinationem alterius decipiendi causa, quia & sine dolo malo aliud agi, aliud simulari potest. Labeo autem, ut in Dialecticam & Grammaticam sese penetraverat, eaque præcipue scientia ad enodandos plebrosque juris laquos utebatur, sic hoc loco, illorum traditionibus non acquiescens, plenius & distinctius, dolum malum dixit esse, omnem calliditatem, fallaciam, machinationem, ad circumveniendum, fallendum, decipiendum alterum adhibitam: quæ definitio vera est, inquit Ulpianus in *l. 1. §. 2. D. de Dolo malo.* Franciscus Hotmanus, ad Ciceronis orationem pro Cæcina, versum illum integrum: *machinationem quandam, alterius decipiendi causa*, studiosi alicujus, aut fortasse Triboniani esse, conjecit; ne alioquin Servius stultissime a Labeone reprehensus, aut præceptoris Aquilii Sententiam minus amplexus videatur. Alii Ulpianum cum Ulpiano committunt, in *l. 7. §. 9. D. de Pactis.* Sed nihil horum opus esse, Vir Clarissimus, Gerardus Noodt pulcherrime ostendit *de form. emend. dol. mal. cap. 2.* Κλωτικῶς autem, & quasi per gradus, omnes doli mali species expressit Labeo, propter quem restitutio in integrum datur: nam generaliter dolum malus est omne malignum alterius lædendi consilium, sive id per simulationem, aut dissimulationem, aut etiam aperte exequamur. §. 1. *Inst. de Vi bon. rapt. l. 3. §. 1. D. de Injur.* Atque hoc sensu omnia delicta, machi-

machinas, suasiones, tendiculas, technas, affirmationes, laudationes, cuniculos, molimina, ad emungendum, circumducendum, ac spoliandum alterum adhibita comprehendit; nec tantum opponitur bonæ fidei, simplicitati & peccato inconsulto, quod culpam vocamus, sed & dolo bono, qui ipsis deceptis prodest, quoque nulli infertur injuria, sed nostra vel aliena conservamus.

§. III.

Unicus Ulpianus, inter tot Jurisconsultos, doli hujus boni nominatim meminit, eumque explicat, & exemplo illustrat, in l. 1. §. 3. D. de Dolo malo. Verba ejus: *Non fuit autem contentus Prætor DOLUM dicere, sed adjecit MALUM. quoniam Veteres DOLUM etiam BONUM dicebant, & pro SOLERTIA hoc nomen accipiebant: maxime, si adversus hostem latronemve quis machinetur.* Hoc vult: Decemviros, & Jureconsultos mediæ Jurisprudentiæ auctores, etiam Præto-rem in Edicto, dolum malum a bono sollicite distinxisse; licet vocis proprietate, & usu loquendi, quem penes arbitrium erat & jus & norma loquendi, vocula doli, sine adjecto posita, malus intelligatur, bonus vero solertiæ vocabulo exprimi soleat. In oppositione igitur dolus bonus est *solertia*, acumen, dexteritas, etiam simulatio vel dissimulatio, non alios fraudandi, sed sibi vel aliis consulendi. Solers dicitur, qui quasi totus ex arte consistit; qui consilio pollet, & in omni re prudens est; qui totam artem callet, cujusque animus usu, tanquam manus opere, concalluit. Hinc solertia est habitus perfectus animi ad rem quampiam, Græci ἀρχινοία vocant. Aristoteles VI. Eth. c. 13. δεινότης appellat: *Est, inquit, quedam facultas, quam solertiam vocant, hæc talis est, ut ea, quæ ad propositum scopum tendunt, possit quis agere atque consequi; quod si ergo honestus est scopus, laudanda quoque est illa: sin malus, πανουργία seu versutia est.* Pariter Latinis solertiæ vox accipitur plerumque in partem bonam, sed tamen habet & astutiæ ac calliditatis, quæ ad fraudem declinet, significatio-

nem:

nem : quia haud raro evenit , ut quis ingenio ad fraudes dolosque abutatur. Quemadmodum enim urticae in solo pingui & bene stercolato validiores efficiuntur, sic sagaces natura, ab arte, usu & institutione majores vires accipiunt, & quia vis illa ingenii in utramque partem valet, solertia saepius non tantum malitiae rore leviter adlpergitur, sed & longius aliquando a virtute deflectit, & in vitium convertitur; unde ingenium pro dolo & fraude a recentioribus ponit, supra diximus. *Per ingenia dissimulare*, Gregorius Turonensis lib. IV. Hist. c. 18. Similiter solertiae vocabulum in sequiorem partem accepit Paulus, in l. 24. D. *Ex quib. caus. maj.* cum tergiversatione eam conjungens, & Cicero lib. I. de Offic. cap. 10. ubi de Q. Fabio Labeone, arbitro Nolanis & Neapolitanis dato: *Decipere hoc quidem est, non judicare. Quocirca in omni re fugienda talis solertia.* Alexander apud Curt. lib. IV. cap. 13. *Latrunculorum & furum ista solertia est, quippe illorum unicum votum est, fallere.* Tibullus lib. I. Eleg. 4. ad Priapum:

Quae tua formosos cepit solertia? certe

Non tibi barba nitet, non tibi culta coma est.

§. IV.

Jam vero, quod ad dolum malum attinet, Jurisconsulti Romani, ubivis omnem fraudem & absconditam machinationem adeo detestantur, ut dolus in delictum & crimen vergat, eoque etiam nomine censeatur. l. 3. §. 5. D. de *Suspens. tut.* Nullus adhuc contractus est, in quo non suapte natura dolus veniat; quinimo nulla pactio id effici potest, ut ne dolus praestetur. Vulgata in omnibus negotiis erat doli mali clausula, l. 119. l. 135. D. de *V. O. l. 19. D. Jud. solv.* quae tamen si adjecta non fuisset, dolus nihilominus praestari debebat, postquam in stricti juris judiciis etiam dolus malus Aquiliana formula vindicatus erat, quam ideo rectissime Tullius omnium malitiarum everriculum vocat: sicut enim everriculum omnia piscium capit genera, ita nihil malitiosum hanc formulam effugere potest.

Am;

Ambrosius *lib. III. Offic. cap. 10.* honestatis formulam appellat: *Quid autem loquor de contractibus ceteris, ac maxime de coëmtione prædiorum, vel transactionibus atque pactis? Nonne honestatis formulæ sunt, Dolum malum abesse, eumque cujus dolus deprehensus fuerit, dupli pænæ obnoxium fore.* Huc pertinet instrumentum donationis apud Gruterum pag 1081.

DE. EA. RE. DOLVM. ABESSE. ABFVTVRVM. QVE. ESSE. & in alio lapide Romæ invento p. 777. n. 6. DOLVS. MALVS. MALVS. ABESTO. Omnes simulationes & dissimulationes, quibus in præjudicium alterius falsum palam asseritur, mendacia item hunc in dolum incidunt, atque infamia, duplo, præstatione ejus quod interest, amissione privilegii, aliisque modis coercentur, l. 1. §. 1. D. *Depositi* l. 2 § 1. D. *ad L. Aquil.* l. 13. §. 4. & 6. D. *de Aët. emt. vend.* l. 37. §. 1. D. *de Minor.* l. 10. §. 1. D. *de Fidej.* l. 11. §. 9. D. *de Interr. in jur. fac.* l. 3. §. 1. *Stellion.* l. 2. C. *Si contr. jus.* Nefas enim existimabant Prudentes, rationis imaginem expressam, bono consilio a Diis immortalibus datam, in fraudem malitiamque converti: cum vel puerorum exemplo constet, ipsam naturam humanam a mendaciis abhorrere: nam illi in primis probris falsa obijciunt, & quanquam levitate quadam assument, tamen judicii insita reſtitutione damnant. Mentiri insuper servile est, dignumque apud omnes odio, ac ne mediocribus quidem servis ignoscendum. Quanto magis ergo viro, & libero homini, mendacium obijci in turpissimis habetur? Sophocles Trachiniis: *ὡς εὐεχόμενον ψευδὲς καλεῖσθαι, καὶ προσεῖν ἢ καλῇ.* *Quid miserius est homini libero, quam vocari mendacem?*

§. V.

Contra solertiam & industriam illam, quæ hostis circumvenitur, vel Principum consilia velantur, aut salus decepti procuratur; quæve ad fraudem malasque artes repellendas, vel ad nostra tutanda, vel ad alium a malo revocandum tendit, tantum abest ut Jurisconsulti veteres damnarint, ut nihil in ea vitii vel mali agnoverint palam; dum doli boni

§§

ap-

appellatione, nihil pene a virtute eam distare indicarunt. Pythagoras ad bonum & malum, tanquam summas classes, sibi contrarias, retulit omnia: quod ergo bonum est, id malum dici non potest. Virgiliana & Horatiana *viri boni* descriptio nota est omnibus. Ciceroni definitur, qui prodest, quibus potest, nocet nemini. Eadem autem doli boni est indeoles. Jurisconsultis *viri boni* arbitrium, circumspici, diligenti & considerati patrisfamilias arbitrium significat; in ejusmodi autem virum sapientem scelerisque purum, dolus etiam bonus cadit: qui hominum existimationis & humanitatis causa, in factis per simulationem, & per falsiloquium in verbis, aliis prodesse, nostra tueri aliquando permittit. Quæstus autem & emolumenti sui causa mentiri, in virum bonum non cadere, docet Cicero *III. de Offic. cap. 2.* & P. Nigidius, apud Gellium lib. XI. Noct. Att. cap. 11. *Vir bonus præstare debet, ne mentiatur: prudens ne mendacium dicat: alterum incidit in hominem, alterum non.* Sic igitur boni vocabulum honesti & justii reputationem & approbationem hic infert. Alibi idem Ulpianus, in pretio emtionis & venditionis naturaliter contrahentibus se circumvenire licere pronunciat in *l. 16. §. 4. D. de Minor.* quia circumventio illa, sine aperta fraude, ex humani generis consensu, tantum permixta & impunis, minime vero honesta & laudabilis habetur: nec enim omne, quod licet, honestum est, ait Paulus in *l. 144. de Reg. jur.* & major Paulus *1. ad Corinth. 6. §. 17.* Unde minus recte Robertus *5. Sent. 12.* & Petrus Gregorius *21. Synt. 13.* in hac specie exemplum doli boni quæsilvere.

§. VI.

Doctrinam de Dolo bono, ut alia pleraque, veteres Jurisconsulti a Stoicis Philosophis, magistris suis, hauserunt: quorum secta licet sanctissima, gravissima & fortissima haberetur, ipsique virtutis rigida custodes & Medici majores dicerentur, haud tamen adeo pertinaces erant veritatis faellites, quin nonnulla, mali speciem præ se ferentia, quando alia ratione

ratione & sine geruntur, non modo culpa omni carere, sed etiam laudanda esse putarint. Ad rem Quintilianus lib. XII. Institut. Oratoriarum cap. 1. *Concedant mihi omnes oportet, quod Stoicorum quoque asperrimi consentientur, facturum aliquando bonum virum, ut mendacium dicat, & quidem nonnunquam levioribus causis; ut in pueris ægrotantibus, utilitatis eorum gratia, multa fingimus, multa facturi promittimus; nedum si ab homine occidendo grassator avertendus sit, aut hostis pro salute patriæ fallendus: ut hoc, quod alias in servis quoque reprehendendum est, sit alias in ipso sapiente laudandum. Scilicet ad mendacii perfectionem pertinere aiebant, alterum capi, fraudari; licet ergo verbis aliud, quam sonant, exprimatur, mendacium esse negabant, si ea fini dixerit, ut aliis prodesset, & major inde utilitas in genus humanum redundaret; tum enim præter regulam facere licere. Diserte Stobæus tom. 1. lib. 2. tit. 4. §. 8. *Mentiri quoque sapientem negant, cum non tam qui mendacium dicat, quam qui mendacitor ac dolo id faciat, mentiatur. Mendacio tamen uti variis modis posse credunt, ut in militia contra hostes, aut alia necessitate. At mendacio nunquam assensurum sapientem existimant, quod nec opinetur, nec ignoret quicquam. His accedat Chrysippus, summus Stoicæ sapientiæ Philosophus, affirmans apud Plutarch. de Stoic. repugn. c. 70. sepe sapientes adversus vitiosos mendacio uti. Haulerunt vero hanc doctrinam Porticenses a Socrate, Philosophiæ parente, quique omnium mortalium sapientissimus oraculo judicatus est. De ejus ore Plato, in Republica, quam beatissimam esse volebat, lib. II. de Rep. Mendacium quando & quatenus utile est, ut odio minime sit dignum? Nonne adversus hostes, & eos, qui amici vocantur, quum vel furore, vel alio quopiam dementiae genere correpti, facinus aliquod aggrediuntur, ut eos inde avertamus, utili remedio exhibitio. Eadem Socratis sententia, sæpius apud Xenophontem, in Cyropædia, expressa est, sed maxime juvabit ejus verba audire ex IV. Socrat. S. *Estne in hominibus mentiri? E. Est. S. Ubi igitur hoc collocabimus? E. Patet, ad injustitiam esse referendum.***

dum. S. Quid vero si quis dux hostem deceperit? E. Id justum contra hostes. Sed adversum amicos animo perquam simplici esse oportet. S. Quid ergo si quis dux viderit exercitum perterritum, & mentitus dicat, illico socios adfuturos, istoque mendacio animos commilitonum levet? Sub quonam id collocabimus? E. Sub justitia, uti videtur. S. At si quis filio pharmacum, quo maxime indigeat, respuenti, in cibarii locum dederit, & hoc mendacio ipsum liberarit, deceptionem hanc ubi collocabimus? E. Et hanc sub eadem, ut mihi videtur. S. Nec igitur adversum amicor opus est, cunctis in rebus, animo esse simplici? E. Minime. Medius Fidius! Philo Judæus denique, Platonis imitator perpetuus, de Migrat. Abrah. Discant vel falsa, modo utilia, qui per veritatem ad bonam frugem reduci nequeunt: nam & his qui corporis morbis graviter laborant, instituti legitime Medici non sustinent vera proloqui: sed adhibent contrarias consolationes, ut fiat egrotus ad tempus sedatior. Idem de Chérubim pag. 110. Quod non est officium, interdum fit officium. Quale est cum depositum redditur non bono animo, sed aut in detrimentum accipientis, aut insidiose, ut comparata semel fide, occasio capteretur abnegandi majus depositum, tum officium non officiose fit. E diverso quoties egroto non dicat vera Medicus, purgaturus eum, aut secturus, aut usurus propter ipsius utilitatem, ne forte metu doloris fugiat medicinam, aut forte metu doloris linguatur animo. Item quoties sapiens mendacio fallit hostem, propter salutem suæ patriæ: veritus, ne si vera prodatur, vires addat adversariis, inofficiosam rem facit officiosam.

§. VII.

Sed vereor, ut Porticus & omnium Philosophorum Socraticorum auctoritas hodie levior sit, quam ut Jurisconsultos ab iniquitatis patrocinio defendere queat; quapropter dolum bonum ad naturalem illam divinamque legem, velut ad Lydium lapidem, examinemus oportet. Si vulgi præjudicia sequamur, omne falsiloquium, omnis fictio, & veridissimulatio, ceu peccaminosa rejicienda est: tum quia non est faciendum malum, ut eveniat bonum: tum quod

ipse.

ipse Deus verax est *Rom. III. 4.* mentiri non potest *Hebr. VI. 18.* & imaginem suæ veracitatis homini conservandam impressit. In Decalogo præterea sub falso testimonio omne falsiloquium comprehendendi, ajunt; quia quisquis aliquid enuntiat, testimonium perhibet animo suo, & lingua, nobilissimum instrumentum, tali abusu scèdatur. Bis Sanctus etiam Apostolus ad Ephesios cap. IV. §. 25. *Abdicato mendacio loquimini quod verum est, singuli cum proximo suo, quia membra sumus ejusdem corporis.* Etiam ut Florentinus: quia natura cognationem quandam inter homines constituit. l. 3. *D. de Just. & jur.* Divus denique Petrus omnes dolos & simulationes deponi præcipit i *Epist. II. §. 1.* Ita Placæus, Danæus, Ziglerus, Whitby & multi Theologorum alii ratiocinantur, quorum antesignanus est Vir sanctus, Augustinus, qui libris *de Mendacio & contra mendacium* duobus, Consentio nuncupatis, Priscillianistas, qui mentiri se posse, aut falsa loqui existimabant, vehementer impugnavit. Is servandæ veritatis officium cum officio servandæ castitatis componit, & sicut stupra & adulteria per se mala sunt, ita nulla ratione fieri posse docet, ut falsiloquium sit bonum; licet hæreticos lucrifacere, vitam aut pudicitiam servare possimus. *Mentiri non licet, nec pro Dei laude.* Sunt etiam inter Philosophos, Oratores & Poëtas gentiles, qui hanc partem rigide tuentur. Homero invisus est omnis, cujus mens aliud condit, quam lingua profatur, *Iliad. IX. 312.* Simonides justitiam definiebat, non modo acceptum reddere, sed & verum dicere, apud Platonem lib. I. de Rep. pag. 331. Cicero item, ubi utriusque sententiæ pondera attulerat, *ex omni vita simulationem & dissimulationem tollendam esse* concludit lib. III. de Offic. c. 15. Verum enimvero sicut a dolo malo juridico bonæ fidei simulatores absunt proculdubio; ita optandum erat, homines, Epaminondæ exemplo, ne joco quidem mentiri velle: prius autem honestæ atque innoxie simulandi & dissimulandi artes in fax proscribi poterunt, quam omnis malitia aut vecordia in fax

pientiam & probitatem fuerit mutata. Donec id fiet, in turbido hoc rerum humanarum pelago, qui recta portum tenere nequit, id ipsum mutata velificatione assequi tentabit.

§. VIII.

Quinimo tota hac de re disceptatio in *λογομαχίαν* inanem abibit, nisi primo discrimen inter mendacium & falsiloquium, tum jus circa sermonem, & collisiones legum recte observentur. Omne *Mendacium* est falsiloquium, non autem contra. Illud est voluntaria loquelæ & rei disconvenientia, contra obligationem instituta, & cum detrimento proxim-coniuncta. Sic Philippus Melancthon, in finitionibus Theoi logicis: *Mendacium* ait, esse petulanter, aut cupiditate nocendi, aliud loqui, seu gestu significare, & aliud sentire. Non enim nomino mendacia figuras, quibus ex probabili causa aliquid tegitur, quod non est necesse dici. Semper itaque & omnino illicitum est mendacium; quia repugnat instituto generis humani, præceptoque Creatoris, ut ne nobis aliisque sermone noceamus, sed potius profimus. *Falsiloquium* vero aliquando prohibitum est, aliquando licitum & indifferens. Quod si enim quis alteri sensa animi liquido significare tenetur, peccabit utique, si ambiguo sermone aut tacita restrictione alteri illudat. Sin ad silentium obligatus ab prave curioso interrogetur, aut silendum est, aut si nullatenus silere liceat, sermo ita formari potest, ut diversum ab eo, quod in animo est, exprimat. Denique si intra æquilibrium amoris alieni & proprii constituitur, vel in neutram partem obligatio concurrat, falsiloquium pro specie prudentiæ aut imprudentiæ est habendum. Poseit utique commodum societatis, ita clausum pectus per sermonem aperire, ut tuto credere liceat, nec falli timeamus. Qui vero sine causa fabulosa profert, vanus merito appellatur, & imprudens, aliquando & injustus, intuitu honoris alieni. Hæc de Dolo bono in verbis. Ad facta & gestus pertinet *Simulatio*, quæ actiones a mente aliena format; Græci *οικονομίσαν* vocant; & *dissimulatio*, quæ

quæ facta mentem indicantia omittit. Quæ de verbis dicta sunt, ad has non immerito accommodantur; nempe malas non esse simulationes, nisi honorem Dei, aut reverentiam Superiorum, aut amorem proximi lædant. Hinc cessante obligatione, utraque est mediæ naturæ, & in se indifferens, potestque non tantum injustitia carere, sed & vitio ac imperfectione, quin virtuosa & laudabilis esse. Nimirum falluntur, qui omnes simulationes & falsiloquia in naturam hominis rationalem, ideo injuria esse clamitant, quod illi, quibuscum ago, potentia physica pollent, meum sermonem & gestus, quibus sermo animatur, intelligendi. Atqui a potentia physica ad facultatem moralem non valet consequentia; neque in veritate, seu officii objecto, officium sermoninantium consistit, sed æquali ratione ista cum silentio & falsiloquio sese habet ad finem sermonis, qui est ut aliis & nobis prosimus. Quemadmodum ergo non semper obligor ad loquendum, sic nec ad verum dicendum; nisi alter ex speciali pacto, aut ex natura societatis humanæ, aut indole negotii præsentis, jus habeat, convenientiam sermonis cum animo a me exigendi. Quod si his momentis necdum præjudicia submoveri possint, dabo, legem esse, quæ semper nos veraces esse jubet; sed & illi dabunt vicissim, incidere tempora, ut alia naturæ lex fortior, cum ista concurrat, nec utrique tamen satisfieri possit: nonne tunc ex mente legislatoris, inferiorem superiori cedere necesse est? nonne gradus & ordo officiorum, in dijudicatione, erunt observandi? Jam vero potentissima lex est, & sine exceptione, quæ Deum colere & amare jubet. Proxima huic est, quæ nosmetipsos tueri ac conservare præcipit. Tertia, quæ homines mandat esse sociales. Atque huic demum quarta, veritatis curam injungens, tam manifeste est subordinata, quemadmodum instrumentum suo principali inservit. Quamobrem ex his liquere arbitror: Dei, nostri, societatis, addo & civitatis causam fortiorem esse lege, quæ sermonem cum mente convenire præcepit. Hæc igitur, non temere neglecta,

Etā, legis rationem exiit, ob maiorem utilitatem promotam, aut certe minima illa labes, graviore in adjuvanda Republica aut amico honestate compensatur, ut graviter Theophrastus differit apud A. Gellium lib. I. Noct. Attic. c. 3. Cicero lib. II. de Invent. *Primum leges oportet contendere, considerando, utra lex ad majores, hoc est, ad utiliores, ad honestiores, ac magis necessarias res pertineat. Ex quo conficitur, ut si leges duæ, aut si plures, aut quotquot erunt, conservari non possint, quia discrepant inter se, ea maxime conservanda putetur, quæ ad maximas res pertinere videatur.*

§. IX.

Non equidem diffiteor, Deum, qui absolutus vitæ nostræ est dominus, tam rigidam veri custodiam nobis injungere potuisse, ut potius moriendum sit, quam vel latum unguem ab ea discedendum. At sicut nuspian id comparet, ita præceptis negativis, quæ hominum officia continent, extremæ necessitatis exceptio inest, adeoque explicanda sunt, cum sensu humanæ imbecillitatis. Nec Divis homines componere æquum est. Deus falsa non loquitur, necemit, vendit, conducit; quia omni ex parte beatus est; ob nostram vero indigentiam, impotentiam & imperfectionem, permittit, ut in verbis & factis, ad falsiloquium vel simulationem confugere possimus, ad nostram vel communem utilitatem. Sed ut via & ordine §. VII. obmota diluantur; fateor, non esse faciendum malum, quantumvis secuturo bono; at malum non est, quo salus aliorum promovetur. Qui majus scelus perpetrat, ut minus bonum consequatur, is demum in hoc Apostoli, ut ajunt, brocardicon peccat; sed minus malum, cum majore comparatum, rationem boni induit, ex natura collisionis legum, quæ simul non possunt observari. In Decalogo falsum testimonium dicere prohibemur, sed *contra* proximum nostrum; qui jus habebat, ex communi legis naturalis præcepto, ut vera loqueremur apud judicem aliosve, ad noxam ejus avertendam. Econtrario si sermo apertus detrimentum ipsi allaturus est, ficto & colorato sermone *utili-*
cebit;

cebit; & gratias aget, si ira deferbuit, si crapulam edormivit. Lingua porro mendacio proprie sic dicto foedatur, de quo loquuntur Apostoli, locis supra allatis: at si quis prudenter falsiloquio utatur, hostem arceat, innocentem defendat, moderatio vocis vere sit conciliatrix humanæ societatis, & instrumentum publici boni. Stuprum denique ex suaapte natura in genere malorum censetur, & quocunque tempore, loco, modo est vitiosum: non ita falsiloquium & simulatio; quibus accidere potest, ut etiam bona sint; quemadmodum exempla capite sequente ostendent. Ipse Augustinus alibi, ut solet, varians, ubi contra Priscillianistas non disputat, dissimulationes probavit: *Licet*, inquit, *veritatem occultare prudenter, sub aliqua dissimulatione.* & rursus: *Aliud est mentiri, aliud verum occultare. in can. quæritur 14. caus. 22. qu. 11.* In libro de mendaciis, jocos excipit, *quia habent evindentissimam, ex pronuntiatione, atque ipso jocantis affectu, significationem animi, nequaquam fallentis, etsi non vera enuntiantis.* Cicero denique, & in loco supra nobis obmoto, & aliis, ubi, omne mendacium, in rebus contrahendis, tollendum esse docet, de pernicioso mendacio, vel de versuta dissimulatione, quæ fit emolumentum & lucri causa, loquitur: aut certe doli odio, cum Antipatro suo, latius aliquando proventus, quam oportebat. Crudum nimis ejus dictum esse, censuit Grotius. Quid multa? Ipse Tullius aliquod mendacium *honestum* & *misericors* vocat, pro Q. Ligario, nec in hanc partem auctoritatem expressam defugit lib. I. de Offic. *Quæ pertinent ad veritatem, negare interdum justum. Referrî enim debet ad justitiæ fundamenta, primum, ne cui noceatur, deinde, ut communi utilitati serviat.* Alibi Socratem in omni oratione simulatorem callidum, & Q. Maximum facile tacentem, & dissimulantem probat. Rursus in Lælio, sive de Amicitia, si caput amicorum aut fama agatur, cum Theophrasto, quem sequitur, de via declinare permittit: *est enim quatenus amicitie venia dari possit.*

Quod si ad Sacrae Scripturae oracula mentem convertamus, nihil divinius est illo Salvatoris: *Simplices ut columbae: astuti ut serpentes.* Veritas ubivis non tantum praecipitur, sed & inculcatur, tanquam nota civis coelestis, & viri boni. *Zach. VIII. 16. Psalm. XV. 3. Prov. XIII. 5. Eph. VI. 14.* Contra abominatio Domino est omnis illusor *Prov. XII. 22.* perdit loquentes mendacium, *Psalm V. 7.* quia pars est veteris hominis, abjicienda piis *Ephes. XIV. 5.* diabolus auctor ejus vocatur *Joh. VIII. 44.* & nullum vitium mendacio est decantatius *Levit. XIX. 11. Prov. VI. 16. Ephes. IV. 25. Coloss. III. 9.* Nec tamen promiscue omnes fictiones & simulationes illicitae habentur; sed illae demum, quae vel in gloriam divini Numinis injuriae sunt, vel reverentiam erga Magistratus laedunt, vel jus proximo perfecte aut imperfecte debitum tollunt, aut cordis denique vanitatem produnt: ceterae fere, quibus nulli fit injuria, sed malum ingens vitatur, aut bonum aliquod procuratur, inter ea, quae vitio verti possunt, non numerantur. Quae vero Scriptura non increpat, eorum nos non debere fieri accusatores, jam olim monuit Irenaeus. Exemplorum magna nubes est, sed quae excutere nostri non est fori, quum inter ipsos Theologos lis sit, & facta Patriarcharum non omnia ad imitationem trahenda esse, nec ipsos absque peccato vixisse, certo sciamus. Per indicem tamen nonnulla adferre lubet, libero de iis cuiuslibet sentiendi arbitrio relicto. Abrahamus & Isaac Patriarchae nuptias dissimulant, uxores sorores suas vocantes, *Genes. XII. 10. & XXVI. 7.* Jacobus, homo *πλῆγος*, & minime fictus, dolo accepit benedictionem, *Genes. XXVII. 12.* Josephus fictis criminationibus anxios diu habuit fratres, furti & explorationis scelera iis inurens *Genes. XLII. 9.* Obstetrices Aegyptiae Pharaonis tyrannidem eludere, Dei timore, qui eis benefecit. *Exod. I. 19. 20.* Moses & Aaron sacrificia tridwana in deserto praetextunt, de fuga nihil *Exod. III. 18.* Rachab occultatos a se explorato-

ICS

res pulcro dolo servavit *Jos. II. 4* cui geminum in muliercula exemplum est 2 *Reg. XVII. 20.* Michala simulacrum veste tectum ægrotare dixit 1 *Sam. XIX. 13.* David exul simulavit dementiam 1 *Sam. XXI. 3.* idem Achisum ambiguitate verborum delusit. c. *XXVII. 10.* & a Jonathane exegit, ut patri de se mentiretur c. *XX. 6.* Elisæus copias Syriacas, ipsum quærentes, Samariam duxit 2 *Reg. VI. 19.* Jehu, ut regnum ab idololatria liberaret, Baalis cultorem se fore fingit 2 *Reg. X. 18.* Jeremias obsidionis eventum apud Proceres dissimulavit *Jer. XXXVIII.* Et quæ id genus alia ex Vetere Instrumento infra sparsim proferentur. Multi majore subtilitate, quam soliditate, inania hic effugia quærent; quibus carere possent, distinctione, inter dolum bonum & malum probata. Econtrario Rabbini circumventionem dolosam, & mendacium manifestum, in exitium Ebræi apostatæ permiserunt; in gentilem vero promissa vafra, modo cum injuria ejus non essent conjuncta. Vide Selden. *de jure nat. & Gent. juxta disc. Ebr. lib. IV. c. 3. & VI. c. 3.* Judicium Celeberrimi Clerici, in Comment. ad Genes. XII. §. 13. hac in re, non spernendum videtur; est autem tale: *Non videntur Hebræi unquam innoxia, imo utilia, ut ingentia mala vitarentur, aut ut bonum aliquod inde ori- retur, sine contumelia aut injuria cujusquam, sine veri ullius dogmatis abnegatione, mendacia, inter ea, quæ vitio verti possunt, numerasse.*

§. XI.

Non me fugit, Hugonem Grotium, cum in notis ad dicta Josuæ & Samuelis loca, tum *lib. III. de J. B. & P. c. 1. §. 20.* existimare, ante Evangelium falsiloquium viris bonis salutare, culpæ datum non fuisse, & laudari quædam, ut illis temporibus congruentia, ad *Ebræos X. §. 31. Jacob. II. 25.* Christianis vero simplicitatem non tantum imperatam, sed & vaniloquentiam interdictam esse *Matth. X. 16. XII. 36.* Verum quod universaliter & suapte natura vitiosum est, a fine, temporis, loci aut personarum circumstantiis licitum

fieri non potest. Præterea Evangelium sui ipsius conser-
vationem nulli adimit; quamvis majorem perfectionem re-
quireret, ut ille perperam contendit. Et ipse Grotius de-
nique varians, non omnem in vitio ponendam esse simula-
tionem, multis argumentis edocet ad *Lucæ XXIV. 28.* cu-
jus verba statim proferemus. Nil vero causæ est, cur ad
dubia quædam exempla, in novo fœdere confugiamus: &
cum aliis, v. gr. ad defendendum dolum bonum, trahamus,
quod ipsa increata Sapiencia Christus, apud comites Ema-
untinos *παραποιεῖτο* ire longius *dict. ψ. 28.* nec enim simula-
bat, fingeat, dicebat, se ultra progressurum, sed habi-
tum præ se ferebat illi, pro quo habebatur, convenientem;
& fortasse constituerat progredi longius, nisi, ut maneret,
instanter rogaretur. Conf. *Gen. XIX. 2. Matth. VIII. 7. Marci VI. 48.* Nimis sane durum est, quod Hiero-
nymus scripsit: *Christum simulasse ignorantiam, & humanos*
mentitum esse affectus, ab Erasmo eapropter notatus. Lu-
bentius huc referrem, quod Paulus Timotheum circumci-
dit propter Judæos *Actor. XVI. 3.* Licet enim hac nota cum
Judaicis ritibus obligare noluerit; sperabat tamen multos
Judæos ad Christum ita conversos iri, qui hominis incir-
cumcisi conversationem cane pejus & angue aversabantur.
Atque sic Paulus, ceteris Apostolis perfectior, implebat,
quod de se scribit, Judæis factus sum tanquam Judæus,
ut eos lucrificerem. Unum enim illud anhelabat bis sanctus
vir, ut omnium gentium salutem procuraret; ideoque
mox extollit legem, mox deiecit, pro temporum & loco-
rum opportunitate, varius & multiplex; non astu mentien-
tis, sed affectu compatiensis. Alibi autem Petro, eadem
fere facienti, restitit in faciem, & simulationis graviter ac-
cusavit; quia scandalum gentibus præbebat. Quamobrem
Clemens, Chrysostomus, Theodoretus, alique merito hoc
dispensationis profundum, & *την ἀκρὰν οἰκονομίαν τῆς φιλανθρω-
πικῆς καὶ φιλοθεῆς παιδείας*, admirantur. Male autem nonnulli,
ad hanc classem pertinere, crediderunt illud ejusdem Apostoli

2. ad Corinth XII. 16. *Quod sum callidus, dolo vos cepi:* υπαρχων παν-υγος, δολω υμας; ελαβον, est enim mera ironia ex persona obrectatorum loquentis. Nonnulli quippe suggererant, Paulum Corinthios magna pecunia emunxisse; quamvis nullam ab iis mercedem accepisset, ob Evangelii prædicationem. Hoc ergo est, quod fortissime negat interrogando versu seq. *Numquid per aliquem eorum, quos misi ad vos, circumveni vos?* Interim Patres Christiani, Origenes, Clemens, Tertullianus, Lactantius, Chrysostomus, Hieronymus, & alii hujusmodi exemplis nixi, falsiloquium, quod pro salute dicitur, *pæne omnes* probarunt; ut ipse Augustinus fatetur, quæst. 68. ad Levit. *Utrum hæc aliqua compensatione admittenda sint, magna questio est; sicut de mendacio pæne omnibus videtur, quod ubi nemo leditur, pro salute mentiendum est.*

§. XII.

Ut res clarior evadat, juvabit ipsa Patrum nonnullorum verba adscripsisse. Primas dabimus Clementi Alexandrino lib. VII. Stromat. hunc in modum disserenti: *Qui cognitione præditus est, vera simul sentit & dicit, nisi quando loco medicinæ, ut medicus ad ægrotantes, ad eorum, qui laborant, salutem mentitur, aut falsum dicit, ut ajunt sophistæ. Ecce enim Timotheum præclarus circumcidit Apostolus, cum vociferaretur, & scriberet, circumcisionem, manu factam, nihil prodesse: sed ne repente a lege avellens ad eam, quæ est ex fide cordis circumcisionem, adhuc reluctantes eos, qui audiebant, Hebræos, a Synagoga sese cogeret distrabere, se Judæis accommodans, factus est Judæus, ut omnes lucrificaret. Qui ergo propter proximorum salutem, quibus se accommodat, se demittit, is nullius simulationis omnino cogitur esse particeps, propter periculum, quod imminet justis, ab iis, qui eis invident. Propter solam autem propinquorum utilitatem, faciet quædam, quæ primario non fierent ab eo, si non faceret illorum causa. Non minus facunde rem eandem explicavit Chrysostomus, cujus verba ex lib. I. de Sacerdotio in fine, semel legisse sufficiat: *Frau-**

dis quidem magna vis, modo ne fraudulento ea animo fiat: quam ipsam tum ne fraudem quidem nominandam putaverim, verum œconomiam quandam potius, ac sapientiam, artemque, qua possis e mediis, iisdemque imperviis desperatarum rerum angustius difficultatibusque, correctis emendatisque animi vitiis, evadere. Neque enim Phinees illum homicidam ego unquam appellaverim; quanquam is plaga una corpora duo sustulit: quemadmodum neque Heliam, vel post milites centum, una cum ducibus suis, interfectos; atque adeo post magnum illum sanguinis torrentem, quem eorum nece, qui dæmonum sacerdotes erant, fecit excurrere. Nam si hoc dederimus, & res ipsas per se singulas, nudas ab auctorum suorum consilio propositoque separatas, expendere quis voluerit, nemini sane non licebit, vel Abraham ipsum patricidii accusare: item & illius tum nepotem, tum abnepotem doli ac maleficii reos agere. Sic enim ille jus sibi primogenitum usurpavit; hic autem Egyptiorum opes in Israelitarum castra transulit. Sed non est ita, non est ita. Faceffat hinc tanta ista impudentia: neque enim solum eos, quos modo nominavi, culpa liberamus, sed etiam eosdem, vel hoc nomine, admiramur: quandoquidem & ipsi, hoc demum nomine, gratiam a Deo magnam inierunt. Proinde illusoris deceptorisque nomine dignus fuerit, quisquis re ipsa, iniquo ac nocendi animo, abutitur; non qui recto consilio id præset, alioquin sæpe numero profuit decipisse, & hac potissimum arte, in maximis rebus, alteri opem subsidiumque tulisse. Ceterum qui recto semper calle ingreditur, de eo nunquam despectens; sæpe fit, ut ei etiam, cui non astum aliquem struxeris, malorum incommodorumque quamplurimorum auctor sit. Succedat Hieronymus, vir maximæ eruditionis, qui non modo in epistolam ad Galatas. c. 2. utilem simulationem, & in tempore assumendam, Jchu & Davidis exemplis probat; sed & lib I. Apologiæ adversus Rufinum c. 4. ex Origenis lib. VI. Stromatum, hæc habet: *Plato in tertio de Republica libro: Veritas, inquit, sectanda magnopere est: si enim Deo indecens & inutile mendacium est, hominibus quandoque utile, ut utantur eo, quasi condimento aut medi-*

medicamine, nulli dubium est, quin hujusmodi licentia medicis danda sit, & ab imprudentibus removenda: ergo & Principes urbium, si quibus & aliis hoc conceditur, oportet aliquando mentiri, vel contra hostes, vel pro patria, vel pro civibus. Ab aliis vero, qui mendacio uti nesciunt, auferendum est omne mendacium. Haec tenus verba Platonis recensuimus. Et nos igitur illius praecepti memores: Loquimini veritatem unusquisque, cum proximo suo; non debemus dicere, quis est proximus meus? sed considerare, quomodo Philosophus, caute dixerit, Deo indecen- & inutile mendacium, hominibus interdum utile, & quod ne pro dispensatione quidem putandus sit Deus aliquando mentiri... Homo autem, cui incumbit necessitas mentiendi, diligenter attendat; ut sic utatur mendacio, tanquam condimento & medicamine, ut servet mensuram, ejus, nec excedat terminos, quibus usa est Judith contra Holofernem, & viciis cum prudenti simulatione. Imitetur Ester, quae Artaxerxis sententiam, diu tacita gentis veritate correxuit: & inprimis Patriarcham Jacob, quem legimus benedictiones Patris artificiose impetrasse mendacio. Ex quo perspicuum est, quod nisi ita mentiti fuerimus, ut magnum nobis ex hoc quaeratur bonum, judicandi sumus quasi inimici ejus, qui ait: Ego sum veritas. Eandem doctrinam, totis ingenii viribus, hac in parte secutus est Cassianus, Chrysostomus in plerisque discipulus, Collatione XVII. c. 17. graviter monens, non rigida animi obstinatione, sed judicio & ratione temperandas esse definitiones, ne irrationabiles videamur: tum subjungit: Itaque ita eo utendum est, quasi natura ei insit ellebori, quod si, imminente exitiali morbo, sumtum fuerit, sit salubre: ceterum absque summi discriminis necessitate praeceptum, praesentis exitii est. Ita namque sanctos ac probatissimos Deo viros veniabiliter legimus, usos fuisse mendacio; sicut Rahab, cujus cum non solum nulla virtutum, sed etiam impudicitiae monumenta commemorat scriptura, pro tali mendacio, quo exploratores maluit occultare, quam prodere, admisit populo Dei aeterna benedictione promeruit. Addit: Quosdam per mendacium justificatos, alios per veritatis assertionem pecca-

tum perpetuæ mortis incurrisse. Jacobum instiganti ad mendacium matri laudabiliter acquievisse: quia videbat, ex hoc majora sibi lucra benedictionis atque justitiæ, quam per simplicitatis observantiam, conferenda. Denique Ambrosius, vel quisquis est auctor Sermonis XV. de Sanctis, Ambrosio adscripti, Sanctum Eulibium Vercellensem Episcopum commendat: *Quod hæreticis mentitus sit, ut de hæresi filium liberaret.* Mitto Athanasium, qui ministris Juliani Imperatoris ipsum quærentibus, & interrogantibus, quantum inde Athanasius abesset, respondisse fertur: *Eum non longe abesse,* apud Theodoretum lib. III. Hist. Eccl. c. 8. Cui non dissimilis est Felicis Nolani responsio, ad paganos, ipsum sibi ignotum interrogantes, ubi esset Felix: *Nescio Felicem, quem queritis,* auctore Paulino Natali V.

§. XIII.

At vidcor mihi audire, nescio quos, susurros obmurmurantium, Patres in doctrina, quæ falsiloquio patrocinator, ut in aliis plurimis, deserendos esse; quia, nimio Platonis amore, in gravissimos errores delapsi sunt; & Origenistas alibi Hieronymus *mendaciorum orgiis fœderatos appellavit.* Quapropter recentiores addam hilarioris famæ, Theologos & Jurisconsultos, in quos illa suspicio non cadit. Hugo Grotius, Vir summi judicii, nec divinarum minus, quam humanarum rerum scientissimus, in comment. ad Lucæ cap. XXIV. 28. recte monuit, non confundenda esse, quæ distingui debent. Falsiloquium, simulationes & dissimulationes per se res medias esse, quæ malæ fiant, quoties malo fini adhibentur. Hoc vero seposito, neque materiam, seu actum loquentis vel facientis exteriorem, neque formam, seu intentionem agentis, vitiosam esse. Non illam; quia verba & facta naturaliter nullam habent significationem: non hanc; quia per hujusmodi dissimulationem plerique deserviunt, ac sua vel aliena tuentur. In verbis quidem majorem, quam in factis, difficultatem agnoscit; ideoque in contractibus, testimonii dictione, aliisque id genus

vc-

veritatem, ad id negotium pertinentem, aperiri jubet: *veruntamen si qui insanie malo aegrent, ut atra bile perciti (qui fere a morbo imaginoso, nisi per remedia imaginosa, curari vix possunt:)* aut ejus sint infantia, quæ rationis usum non habeat, apud hos, qui loquitur, is positus videri potest extra illam necessitatem, verba significatis rebus aptandi: quia scilicet sermonis commercium non habemus, nisi cum iis, qui sermonis significationem intelligere sunt idonei. Alterum testimonium ferat Osiander ad Josuæ II. *Hæc, inquit, dissimulatio, qua Rachab ex fide innocentes viros servavit, non fuit peccatum, sed prudentia, vel potius pia astutia; talisque occultatio ac elusio, non a vanitate ac nocendi cupidine orta, sed propter honestam causam, & proximi utilitatem, aliquid dissimulans, vel tegens, non est mendacium, Deo displicens, sed figura potius, officiosa simulatio.* De mendacio quid senserit Philippus Melancthon, corculum Theologiæ Reformatæ, ex ejus verbis, supra pag. 508. allatis constat. Inter Evangelicos ex asse nobiscum facit, Rev. Dn. Buddeus, Institut. Theologiæ moral. p. II. c. 3. sect. 5. De Pontificiis non est laborandum; quia in alterum extremum delapsi, inprimis Jesuitæ, reservationes etiam mentales admittunt. Jurisconsultorum, qui vera non simulata sua philosophia, omne falsiloquium promiscue non damnant, magna nubes est; sed potiores nominasse sufficit, ne gregatim pasci, aut testium numero niti videamur. Alciatus inultas species, ait, esse, quibus omni jure, divino & humano, fas sit mentiri lib. V. Conf. 6. n. 67. Cujacius dolum, quo utimur in hostes, nihil pene a virtute distare, ait, ad l. 1. D. de Dol. mal. Hotmanus dolum bonum sine controversia probari, scribit c. 7. Quæst. ill. Albericus Gentilis in disp. de abusu mendacii, & Joh. Lud. Praefchius, in schediasmate de mendacio ad Bœclerum, professæ opera id caverunt, ne laquei injiciantur conscientis, in argumento, quod per omnem vitæ humanæ scenam latissime patet. Singularia capita nobilissimo huic argumento dederunt Viri Celeberrimi, Grotius, in divino opere de J. B. & P. lib. III. c. 1. Pu-

Scndorf lib. IV. de J. N. & G. c. 1. Noodt de forma emend. dol. c. 1. Thomas. lib. II. Jurud. div. c. 8. Huber lib. II. de Jure civ. sect. 6. c. 2. quos si quis inter se conferre velit, alios aliis rationibus subinde moveri, & naturali hominum ad dissentiendum facilitate, idem omnibus non placuisse, deprehendet.

C A P U T II.

Dolum bonum illustrat exemplis.

§. I. Dolo uti licet adversus hostes & latrones. II. Non vero in infinitum, nec fide data. Amensius notatur. III. Reſtoribus rerum publicarum an, & quatenus falsa dicere liceat, contra Machiavellum. IV. Dolas bonus Legislatorum. V. Pratorum. VI. Jurisconsultorum. VII. Cautiones saepe degenerant in malas. VIII. De fictionibus juris adversus Alteserram. IX. Dolus bonus Judicum. X. Advocatorum. XI. Lisigantium. XII. Contrahentium. XIII. Mercatorum. XIV. Jacobi satura artificiosa, aliter, quam a Clerico defensa. XV. Blanditia an obſint testamentis. XVI. Jurantium reservationes damnatae. XVII. Dolus bonus in tuitione suorum. XVIII. Erga furiosos & infantes. XIX. Dolus bonus Medicorum. XX. Poetarum. XXI. Oratorum & Historicorum.

§. I.

Rationibus & auctoritate, veterum pariter ac recentiorum, hactenus defensuſ est dolus bonus: nunc ad jura controversa pedem promovemus. Metus enim est, ne quis incautior, doli boni pomœria nimis extendat: aut alius contra, rerum humanarum minus peritus, bonos nostros Jurisconsultos, ut doli & fraudis magistros, impudenter calumniatur: ideo exemplis quibusdam horum doctrina illustranda erit: & quodnam aptius primo loco proferri posset, quam ex Ulpiano? *Maxime si adversus hostem latronemve quis machinetur, l. 1. §. 3. de Dolo malo.* Hostis est, qui nobis,
aut

aut cui nos publice bellum decrevimus, eoque a latrone & prædone differt, qui privato ausu vim infert *l. 118. D. de V. S.* Uterque tam gestu & signis, quam confectis sparsisque litteris, aut vulgato rumore falso licite circumvenitur, quia rupto societatis & juris vinculo, hoc agunt, ut homines nefarie lædant, jugulent, ferrum & flammam patriæ inferant, & in perniciem generis humani grassentur. Nulla cum his nobis societas est, sed summa distractio: neque est contra naturam fallere eum, quem possis occidere *l. 21 de R. J.* qui stultum foret sermone gestive ita uti, ut hostis malo nos mulcet, vel furor latronis innocentem ad cædem querentis promoveatur. Hinc belli furta, *iniqua* & stragemata omni ævo non minorem laudem habuere, quam facinora, quæ propalam & per vim patrantur. Exempla passim sunt obvia, etiam nostri ævi. Videlicet cum pauci sunt videri plures, cum plures rursus videri paucos. Rapa ferere prope mœnia, mox deferenda, ut apud Casilinum, obsidione cinctum. Nolendo pugnare, ut Annibal, quum virtute frangi non poterat, mora est comminutus. Huc pertinet, si dux alia minatur, alia interrupt; si noctu castra hostium invadit, qui animas quicti mandarunt. Utiliter sæpe fuga simulatur: fausta & læta, quamvis falsa, militibus acclamantur. Cum discedimus videri præsentem; præsentem autem cum sumus, videri absentes. Frontinus & Polyænus, ille quatuor, hic octo libris, multa veterum specimina dedere. Accedat iis aliud, magis admirandum, e Danorum Saxonis Grammatici Historia lib. IV. ante medium: *Amlethum, Jutia Regem, Britanni insecuti, majore copiarum parte exuerant. Rex postero die, ad augendam multitudinis speciem, cesorum cadavera, partim subjectis stipitibus inserta, partim propinquis lapidibus affixa, alia vicentium more equis imposita, in aciem digessit, ut ipse extinguentium imagines, lacessentibus Solis radiis, immensi agminis speciem darent. Quo aspectu territi Eritanni, a mortuis superati sunt, quos vivos superassent.* Valerius Maximus lib. VII. c. 4. hujusmodi dolos

partem calliditatis egregiam, & ab omni reprehensione procul remotam, appellavit. Gentem *ad furta belli* idoneam, laudat Sallust *lib. 1.* quem imitatus Virgilius *lib. XI. Æneid. 5.* 515. de Turno:

Furta paro belli, convexo in tramite silvæ,

Ut bivias armato obsidam milite fauces.

In sacris Josuam dolo bono unum usum legimus, ad capiendam urbem Haj. *2os. VIII. 21.* quod explicans Augustinus quæst. X. super Josua, *Cum justum bellum suscipitur,* inquit, *vi aperta pugnet quis, aut ex insidiis, nihil ad justitiam interest.* Aliud exemplum est *11 Regum. VI. 19.* ubi Elisa Syris, ipsum insequentibus, & scolomate percussis, dixit: *Non est hæc via, neque hæc est civitas illa, sequimini me,* &c. In profanis eminet Ulysses, plenus ubique fraudium in hostes; quem Homerus ideo πολυτροπον & πολυπλυν; Horatius *duplicem;* Statius *varium* appellavit. Sic ille lib. II. Achill. 5. 171.

Heu simplex, nimiumque rudis, qui callida dona,

Græcorum dolos, variumque ignorat Ulysses.

Doli hujus boni nominatim meminere Livius *lib. I. c. 37.* Ovidius *Epist. I. 5. 18.* & Curtius *lib. VIII. c. 13.* quorum verba referre, nihil attinet. Florus *lib. I. c. 3.* Horatium ait, *addito ad virtutem dolo,* ut distraheret hostem, simulasse fugam. Rursus *lib. II. c. 6.* Fabium Cunctatorem, adversus callidum Hannibalem, *non virtute tantum, sed suis etiam consiliis pugnasse.* Ammianus Marcellinus *lib. XVII.* nullo discrimine virtutis ac doli, prosperos laudari omnes debere bellorum eventus, tradit. Silius Italicus de Fabio, *lib. XV. Exin virtuti placuit dolus,* cecinit: sed elegantissimus est Virgilii locus *lib. II. Æneid. 390.* cujus acumen Macrobius & Scaliger olim sunt admirati, & nos merito veneramus:

- - dolus, an virtus, quis in hoste requirat?

§. II.

Hæc vero ita intelligimus, si bellum justa causa, non ex
ava-

avaritia, vel dominandi libidine sit susceptum, & ceteroquin leges naturales, circa modum belli legitime gerendi, observentur, nec remedium hoc subsidiarium ad alia producat, quam necesse est. Insidias licitas tantum probamus, degeneres detestamur, & Stygio sulphure expiandas committimus. Quidni enim belli dux, leoninæ vulpinam addat, quoties ex re sua id esse videt, & simul imbecillitatis suspicionem non excitat? sicut Romani, non Punicis versutiis, sed Marte aperto, hostes suos ulcisci gloriosum ducebant. Prudentissimum est illud Livii, & velut ex tripode dictum lib. XLII. c. 47. *Interdum in praesens tempus plus profici dolo, quam virtute: sed ejus demum animum in perpetuum vinci, cui confessio expressa fit, se neque arte, neque casu, sed collatis cominus viribus, iusto ac pio bello esse superatum.* Antea tamen lib. II. c. 64. *Gradum retulissent, ni talubri mendacio Consul fugere hostes ab cornu altero clamitans, concitasset aciem.* Aliud Tulli Hostilii exemplum habet Florus lib. I. c. 3. Generaliter Seneca consol. ad Polyb. c. 24. *Quod duces magni faciunt, rebus afflictiis, ut bilaritatem de industria simulent, & adversas res adumbrata letitia abscondant; ne militum animi, si fractam ducis sui mentem viderint, & ipsi collabantur, id nunc tibi quoque faciendum est.* Guilielmus tamen Amelius lib. V. de jure conscientiae c. 33. §. 38. fallere hostes mendacio vetat, interque verba & signa discrimen, quod nullum est, quærit: nos nec facta, nec verba omnia probamus. Nam hostem veneno interficere, spicula & sagittas viperina sanie inungere, prata & fontes toxico inficere, gentium jus, si non omnium, certe meliorum, non patitur. *Illita sela dolis* improbat Lucanus VIII. v. 482. Omnium utique consensu, peccarunt Hispani, quando, obsessa a Gallis Neapoli, noctu non horum aquas tantum veneno, & pistorum ut gypsum pani admiscerent, pecunia corrupisse, contenti, clam quoque scorta formosissima ex urbe miserunt, ut totus inde exercitus extingueretur. Adde Grot. l. III. c. 4. §. 15. 16. Certum est præterea, fidem &

justitiam in bello servari oportere; tum quia fides supremum rerum humanarum est vinculum; tum quod hostes homines esse non desinunt, sed juris gentium communio- nem habent; tum quod ante fidem datam nullum virtutis & doli discrimen est, ea autem data, fraudibus & dolis uti non licet; tum denique quia Gibeonitarum historia apud *Jos. IX. & 2 Sam. XXI.* ac Scipionis Africani apud *Liv. lib. XXX. c. 25.* id confirmat. Itaque cum alter tri- ginta dierum inducias pactus esset, alteri specioso fraudis titulo, noctu agros vastare non licuit, quasi non ut die- rum, ita noctium induciæ factæ, apud Ciceronem *de Offe.* 1. Nec ad hostem rediisse censetur, qui clam rediit, ut statim exiret. Ejusmodi enim interpretatio veteratoria eidem Tullio, & fraudulenta calliditas, ignominia a Censore no- tata, Gellio dicitur *lib. VIII. 19.* Equidem nihil referre, ait Florentinus, utrum captivus dimissus, an vi, vel fallacia hostium potestatem evaserit in *l. 16. D. de Captiv. & poss. rev.* sed hoc ad postliminium pertinet, si ea mente fuerit, ut illo non reverteretur. Ideoque responsum est Attilium Regulum non esse postliminio reversum, qui juraverat Car- thaginem reversurum *l. 5. §. 3. cod.* Ultro is ad hostem cru- delissimum reverti, quam domi perjurus & consularis ma- nere maluit, laudatus id propter Ciceroni, Silio, Gen- tili de jure belli *lib. II. cap. XI.* & Grotio *lib. III. cap. 23. §. 6.* De quaestione: an fides hosti & prædoni data servan- da sit, adde Hotman. *Quæstion. illustr. cap. VII.* & Dua- renum *ad l. 1. D. de Pactis.*

§. III.

Nunc missa militia armata ad togatam veniamus, in qua doli etiam boni compluria exempla habebimus, quæ nec per particulam maxime exclusisse videtur Ulpianus in *d. l. 1. §. 3. de dol. mal.* Licet enim is nonnunquam eam vocem accipiat, pro utique, ita demum, tanquam alias idem joris non sit, v. gr. in *l. 21. §. 1. de Peculio* juncta *l. 3. Quand. ex facto int.* Hoc tamen loco, ut plerumque, pro præsertim & principa- liter,

liter, eam usurpavit; imitatione Stoicorum, qui isthuc imprimis militiæ exemplo utebantur, auctore Quintiliano & Stobæo supra pag. 505. Non solos vero militare sciebat illos, qui gladiis, clypeis & thoracibus nituntur; militantes namque & Principum Consilarii, Jurisconsulti, iudices & causarum patroni, dum gloriose vocis consiliis munimine laborantium spem, vitam & posteros defendunt. De singulis agemus singillatim. Ad primum quidem huc maxime pertinent Principes, & qui circa latus eorum agunt Consilarii, in sacris palatii sereniis milites, quibus vel ideo, quod populus ingenio mobilis, cupidusque rerum novarum, vera sua bona nescit, & proinde tacito consensu omne jus suum in imperantem contulit, dolo bono sæpius utendum est. Plato *lib. III. de Rep.* civibus a mendacio abstinendum monet, Rectoribus autem rerumpublicarum, sicut Medicis, vel hostium, vel civium causa, falsum dicere concedit, atque in eam sententiam Socratem loquentem introducit. In partes ivit Græcorum justissimus Aristides, qui apud Plutarchum, *Remp.* multa injustitia egere facitur, & Quintilianus *lib. II. c. 18.* Aliquando, ait, communis utilitas exigit, ut etiam falsa defendantur. Referri huc potest exemplum Saulis, qui cum ab hominibus nequam despiceretur, contumelias dissimulans, quasi surdum egit *1 Sam. X. 27.* Tiberius nullam ex virtutibus suis magis, quam dissimulationem diligebat. Vespasianus omnium, quæ diceret, atque ageret, arte quadam ostentator erat. Inter recentiores, Ludovicus XI. Galliæ Rex prudentissimus, filium Carolum VIII. expertum esse literarum, sed unani sententiam Latinam scire voluit: *Qui nescit simulare, nescit imperare*, auctore Paulo Æmilio. Vel sola, ut vocatur, Ratio status, sive dominationis arcana, ad salutem præsentis Status pertinentia, hoc edocent; quæ nisi prudenti consilio velentur, aut sæpius, salvo tamen ubivis justitiæ moderamine, dissimulentur, Principi aut Reip. exitium conciliare possunt. Salus populi suprema lex esto. Rigidi quidam, in umbra scho-

scholastica nati & alti, cum Terentio exclamabunt: *O Jupiter! Hancine vitam? Hosine mores? Hanc dementia?* Sed qui aulas & earum fumos novit, paucis hic directum cum virtute iter probari, plures abditos gerere sensus, & astutam vapido sub pectore fraudem servare sciet. Nuncii & legati ad has mittuntur, tum ut speculatores agant; tum ut Principis sui actiones tegant; tum ut quorundam animos ad usus suos adjungant: inter vulpes ergo vulpinum esse licet; sique contendendi nequitum est, clam tendenda est plaga. *Velimus, ut quimus, quando ut volumus non licet*, ait Terentius. Magis ad rem Cicero monet, cos, quibus commissâ est Respublica, ut ad effectum suorum consiliorum veniant, oportere, ut multa simulent inviti, multa dissimulent cum dolore. *lib. X. ad fam. ep. 8. Poeta lib. IV. Æneid. 7. 490.*

Arma parent, & quæ sit rebus causa novandis

Dissimulent.

Verum cautione hic opus est, ne scelus & perfidia sub arcanis status tegantur, & nequitiae palæstra Regibus aperiantur. Impium consilium Principi suo dat Machiavellus; dum mox leonis, mox vulpis, mox monstri centauri formam ei induendam esse suadet, quod sua ætate viderat, scilicet! nonnullos plus fraudibus, quam alios fide profecisse. Gabriel quoque Naudæus, dum in Arcanis status, excessus juris communis, propter bonum commune vehementer extollit, ac crudelem lanienam Parisiensem hoc prætextu excusat, non parum ex iniquo trahit. Contra Grotius, nimis severe Platonis comparisonem medici & Rectoris Reipublicæ, exagitat ad Lucæ XXIV. 28. Quamvis enim dignitatis differentia non tollat æqualitatem, quam inter omnes homines natura constituit; liquere tamen arbitror, simulatione opus esse, quoties cum plebe, sævissima bellua, res est, aut cum Machiavelli discipulis negotia intercedunt. Quidni enim hos propriis artibus implicemus, ut Metellus Jugurtham? Exemplorum pleni sunt annales. Apud Livium Marcus & Attilius, Romanorum legati de Perseo, Rege Macedonum,

spe

spe pacis a se circumvento, glorianur; improbantibus Senatoribus antiquis, qui fidei Romanæ erant, laudantibus novis, lib. XLII. c. 47. Unicus Tacitus, scriptor πολιτικωτατος, & fraudium aulicarum acutissimus detector, multa habet: utitur is verbis *imagine*, vel *specie*; degenerem vero Status rationem *flagitia dominationis* appellat XIV. Annal. c. 11. Nec aliud sibi hodie volunt articuli, quos vocant, secreti; rumoris falsi sparsiones, & fœdera ad speciem potentiae comparata. Hugo Grotius I. V. Hist. Belg. ad A. 1596. de fœdere inter Henricum & Galliae regem: *Hæc palam speciosa: nam secretioribus pactis imminutus est numerus militum.* Et nonne mors Principum, rebus periculosis, utiliter sæpe celata est, turbis præcavendis, donec necessaria expedita essent? Vide Tacitum Annal. I. cap. 5. Liv. III. c. 18. Thuan. XIII. p. m. 259. Infinitum foret, si miracula, visiones cœlestes, prophetias, conciones, aliasque *pias*, ut Ovidius jam vocavit, *fraudes*, sed gravissimo abusu & impietate plerumque involutas, hic commemorare vellem; ingens enim ejusmodi historiis liber impleretur. Semiramidis, Cyri, Romuli, Alexandri, Augusti, Constantini, Clodovæi, Alfonsi, Caroli V. natales & res gestæ loquuntur, captos superstitione animos quæstui sæpenumero fuisse, nullaque re multitudinem efficacius moveri, quam thyrsæ religionis. Livius *Patres*, inquit, *non vi agebant, sed precibus, & inter preces multa deorum mentio erat, religiosum parti id maxime fuit.* lib. V. c. 14. seq. Duo specimina, in historia Francorum, vidimus supra in Diss. de Unctione Remensi p. 365. & 385. §. IV.

Proximum locum præclaris Legislatoribus dabo, inter quos vel omnium judicio eminent Lycurgus & Solon, ille Spartanorum, hic Atheniensium, duces; quorum dolos bonos complures Xenophon & Plutarchus memoriæ prodiderunt. Solon aliquando sollicitus, ne aut tacendo Reipublicæ parum consuleret, aut censendo periculum sibi afferret, dementiam simulavit, cujus venia non dicturus modo prohibita,

X x x

hibita,

hibita, sed & facturus esset, Justinus *lib. II. c. 7.* quod ejus factum *versutum inprimis & callidum* vocat Cicero *de Offic. 1.* at Florentinus ille politicus astutissimus, Sapientis esse nonnunquam stultitiam simulare, hoc aliisque exemplis defendit. Lycurgi leges steterunt per annos fere octingentos, auctore Livio; is vero ut aeternitatem iis daret, jurejurando obligavit civitatem, nihil eos de legibus mutatu- ros, priusquam reverteretur. Simulavit statim, ad oraculum Delphicum se proficisci; sed perpetuum exilium in Creta egit, atque moriens ossa in mare abjici jussit; ne relatis Lacedaemonem solutos se Spartani jurisjurandi religione arbitrarentur, Justin. *l. 111. c. 3.* In universum huc pertinet, quod Marcianus in *l. 2. D. de Legibus*, cum Demosthene, legem *inventum ac munus Dei* vocat: quia antiqui Legislatores, non metu tantum religionis, solutos antea mores & tedium confuescendi vincere voluerunt, sed & a Diis ipsis se leges suas accepisse finxere, veram Mosi historiam per simulationem imitati. Ita Lycurgus Apollinem Delphicum legum suarum auctorem finxit, Cicero *l. de Divin.* Pythagoras Apollinis sacerdoti decreta sua accepta tulit, Laert. *lib. VIII. §. 8.* Romulus Confum, Consiliorum Deum invenit; Numa congressus nocturnos cum Nympha Aegeria simulavit. Livius *lib. I. cap. 19.* De Mnevi Aegyptiorum Legislatore Diodori Siculi locus pulcherrimus est *lib. I. Biblioth. c. 94.* cujus verba semel adscribam: *Leges a Mercurio sibi traditas, unde ingentia vitæ bona promanarent, simulavit. Quod apud Græcos in Creta quidem Minos; apud Lacedæmonios Lycurgus fecitavit: quorum iste Jovi; hic Apollini suas vendicavit. Id commenti genus apud plures quoque alias gentes adhibitum, multorum causa bonorum persuasis extitisse ferunt. Nam apud Arismaspos Zathrausæ Bonum Genium, apud Getas Zamolxis Commune Vestam; apud Judæos Moses Deum, qui JAO dicitur, Legum auctorem suarum finxisse perhibetur. Sive quod admirandum prorsus & divinum esse judicarent commentum istud, quod in commodum societatis humanae exires; sive quod valgis ad majestatem* &

Et potentiam illorum, qui leges invenisse dicerentur, respiciamus, dicto magis audiens fore, existimarent. Legum dolo bono latarum varia possent adferri exempla, sed tribus contenti erimus. Quum piscarii Athenis pisces nimis caro venundarent, Aristonicus legem tulit, ut in custodiam abduceretur, qui pluris indicaret, ac minoris venderet. Sed quum illi ex compacto carius indicarent, piscesque putres, aqua rigatos, die sequente exponerent, is alia lege jussit, ut stantes pisces venderent, non sedentes; quo ita tædio moræ confecti, quam recentissimos vili venderent; ut refert Alexis, in Lebece fabula, auctore Athenæo lib. VI. Apud Lacedæmonios, sobrios illos & acres viros, Legislatores jus atque usum furandi juvenibus permiserunt, non ob turpia lucra, neque ad sumtum libidini præbendum, sed pro exercitio disciplinaque rei militaris, ad quam tota Respublica composita erat. Credebant enim furandi sollertiam & assuetudinem acuere animos adolescentium, & ad insidiarum astus, & ad vigilandi tolerantiam, & ad obrependi celeritatem: majorque victima immolata ab eo, qui per dolum, quam aperto Marte hostem superasset, auctore Plutarcho in Marcello. & Gellio lib. XI. Noct. Att. c. 18. Romæ equo vehi Flamini Diali non licebat, ne si longius digrederetur, sacra negligenterentur; inquit Sextus Pompejus de V. S. lib. 5.

§. V.

Sed propius ad Romanos veniamus, quorum nomothesia pluribus doli boni exemplis abundat. Non hic memorabo actiones legis & juris formulas, astu Patriciorum hoc sine excogitatas, ut omnibus in rebus interessent, & ipsi hoc freno vulgus refractarium cohiberent, ejusque fortunis, aucupatione sillabarum insidiarentur. Neque arcana monarchiæ introducendæ recensebo, quibus callidi Imperatores umbram libertatis populo reliquerunt, Senatus vero potentiam augendo suæ intervierunt. Magis enim hæc, & ejusmodi alia arrogantiam spirant, atque ad dolum malum inclinant. vid. Tacit. II. Ann. c. 64. *seqq.* Verus

autem illa & mystica per æs & libram testandi ratio, interdictiones aquæ & ignis, nec non additiones in servitutem huc omnino pertinere videntur: sed iis hoc loco missis, Prætores tantum videamus. Hi legum custodes & ministri, non arbitri erant; nec leges sancire novas, neque veteres corrigere poterant directe, quippe quod solius Majestatis & populi erat. *l. 12. §. 4. D. de Public. in rem act. l. 12. §. 1. de Bon. poss.* quamobrem Marcianus jus honorarium *αλλεγορικως* *vivam vocem juris civilis*, & Cicero Magistratum *legem loquentem* appellavit. Et tamen quia nescias videbatur, scriptum legis angustum, sola interpretatione, ultra proximam verborum significationem extendere; multæ item species generalitate verborum comprehensæ, propter æquitatem, subducendæ erant, & leges denique neglectæ vel desuetudine abolitæ iterum revocari debebant; hinc Prætores per indirectum, occultis mutationibus & coloribus quæstis, jus civile varie & suppleverunt & emendarunt, rigore mitigato. Nunc enim diversis nominibus uni rei impositis juri civili, quasi aliud agentes derogabant; nunc fictionibus adhibitis imperitæ plebi fucum faciebant; ubique tamen & æquitatis, & utilitatis publicæ, & litium finiendarum studiosi. Sic Prætor, quia legem facere non poterat, nec heredem facere, nec dominium transferre, nec obligationem inducere valebat directe: imperfecte tamen, & tanquam minister æquitatis invenit bonorum possesores, per omnia vice heredum habentes, *l. 2. de Bon. poss. l. 138. de V. S.* quos tamen heredes appellare contra jus erat, quia *per legem tantum, vel legi similem constitutionem heredes fiunt*, ait Imperator *pr. Inst. de B. P.* Hinc *fictionibus actionibus*, id est, utilibus, opus fuisse, ait Ulpian. *tit. 28. §. 12.* Sic juris civilis duritiem ut emolliret, finxit filium non esse emancipatum, ut ad bonorum possessionem admitteretur. Rursus liberis Suis, qui per Leges Decemvires parentum, quorum in potestate, inviti & necessarij heredes existebant, beneficium abstinendi concessit *§. 2. l. de Hered. qual.* Et licet

vi ipsa ex necessariis voluntarios fecerit, quia in eos actio non datur; non tamen extranei sunt, sed adhuc inviti heredes esse dicuntur jure civili l. 57. de Acq. her. Sic in Publiciana Prætor fingit rem usucaptam, quæ usucapta non est; quia jus strictum vindicationem ex jure Quiritium denegabat: & contra in rescissoria tempus usucapionis nondum aiebat esse elapsum, quod tamen elapsum erat §. 4. & 5. l. de Aët. Simplicius utique fuisset, si insuper habitis subtilitatibus actorem veras circumstantias allegare jussisset, sic enim Placentini censura abforet ad §. 4. Inst. de Aët. *Juvabatur*, inquit, *actor potius, si mentiat, quam si verum dicat: littera est meretrix & occidit.* Sed vide Bachov. disp. 3. de Aët. §. 16. Hinc quoque inter actiones directas id est civiles, & in factum vel utiles, id est Prætorias distinctio enata est. Obligationem denique jure civili recte contractam tollere non poterat Prætor, sed dabat exceptionem; cum tamen effectus ipso & exitu judicii inspecto nihil interfit, ipso jure quis actionem non habeat, an per exceptionem infirmetur l. 112. D. de R. j. Vide Averan. *interpr. jur. lib. I. c. 6.*

§. VI.

: Ordo postulat, ad urbanam illam Jurisconsultorum, Judicum & Advocatorum cavendi, fingendi, judicandi & postulandi militiam progrediamur: in qua præ ceteris veterum Prudentium *εὐρηματικὰ* eminent, quibus nimium juris rigorem ad æquitatem inflexerunt, clientibusque suis, ut captionum laquos & calumnias adversariorum evitarent, sua autem negotia valide gererent, consilia dedere. Latini *Cautiones* appellarunt, ut cautio Muciana. Inde jocus Ciceronis VII. ep. 13. *Sed ut ego quoque aliquid de vestris cautionibus dicam.* Et longe urbanus ep. 18. *Itaque quando vestre cautiones infirmæ sunt, Graculam tibi misi cautionem chirographi mei.* Pomponius & Ulpianus *Remedii* voce usi sunt, in l. 66. de jure dot. l. 3. §. 2. de Statu lib. Papinianus conjunxit cautionis Mucianæ remedium in l. 79. §. 3. de Cond.

§ dem. Nec aliud quid fuere stipulationes ab antiquis Jurisconsultis, rei jurisque sui tuendi gratia inventæ Paul. *V. rec. sent. tit. 7. l. 1. de Præt. stip.* Cic. *pro Roscio cap. 12. & II. de LL. c. 21.* Recentioribus passim *Cautelæ* vox placuit, Apulejo item & Prisciano usurpata: Stryckii *Cautelæ* contractuum, testamentorum, juramentorum & praxeos forensis omnium in manibus sunt, nec sine fructu leguntur. Veterum quoque cautionum vestigia, per universum Pandectarum corpus dispersa supersunt, ac Modestinus ultimum Jurisconsultorum oraculum, & Alexandri Imperatoris Consiliarius, librum singularem *Euphratini* scripsit, cujus decem capita, ex magno naufragio servata, Viri Clariss. Johannes Schilterus & Henricus Brenkman eruditis commentariis illustrarunt. Atque hæc pars Jurisprudentiæ maxime practica erat, tam ad averruncandas fraudes, quam ad lites præcidendas maxime necessaria: unde Cicero Jurisconsultum definit, qui non tantum ad respondendum, & ad agendum, sed & ad cavendum peritus est lib. I. de Oratore. Hinc cauta diligentia laudatur & commendatur §. 3. *Inst. de Pup. substit. l. 2. C. de Furtis l. 5. pr. C. de Off. Magistr. mil.* Ipsum jus eapropter *versutum* vocatur in *l. 28. C. ad Leg. Jul. de Adult. & Vafrum* apud Horatium lib. II. *Sat. 2.* Hinc quoque Alphenus, Jurisconsultorum coryphæus, *vaser* audit eidem lib. I. *Sat. 3.* *Æbutium peritum juris & callidum* Cicero pro Cæcina vocat, & Licinium Proculum urbanæ militiæ impigrum & *callidum* Tacitus appellavit *l. Histor. c. 87.* Calliditas enim proprie *versutiam* significat, ex usu rerum multo contractam. Callidi sunt quorum animus, ut manus opere, concalluit, ait Cicero lib. III. *de Nat. deor.*

§. VII.

Quemadmodum vero cautiones laudem merentur, quæ ex vera, non simulata Philosophia profectæ litibus minuendis inserviunt, sic tanquam illicitas & pestilentes damnamus cavillationes & vafamenta, quæ legi fraudem faciunt, pacta evertunt, aut fidem jurejurando adstrictam elidunt.

dunt. l. 29. & 30. D. de Leg. l. 133. de V. S. l. 65. de Reg. Jur. Hæ sunt quæ calliditatis commentum in l. 9. D. de Reb. cor. calliditatis auxilium in l. 9. C. Tb. Quor. appell. & callidæ debitorum artes vocantur in l. ult. C. eod. Multa harum exempla congeffit Pufendorf lib. IV. de J. N. & G. c. 2. §. 12. & lib. V. c. 12 §. 3. 7. 18. Coccejus de Simulatione & Nicolaus Hertius de Jurisprud. cavente sect. 1. §. 11. seqq. quorum scrinia compilare non vacat. Illud certum, Romanos Jurisconsultos non omnes fuisse Gallos Aquilios, cujus prudentiam populus Romanus in cavendo, non in decipiendo perspexit, auctore Cicerone pro Cæcina. Qui enim in foro verisque litibus terebantur, multum malitiæ, etiam inviti, addiscebant, ut de se Plinius lib. XI. epist. 3. Multos innata animi perversitas, alios artis sanctissimæ abusus, rursus alios auri sacra fames veteratoriis artibus mancipabat, quia & ad opes augendas & ad gratiam vehementer pertinebant. Hinc Lucius Titius testamentum suum scripserat sine ullo Jurisperito, rationem animi sui potius secutus, quam nimiam & miscram diligentiam in l. 88. §. 17. D. de Legatis lib. II. Testamenta quippe scribebant & caute concipiebant Jurisconsulti, teste Suetonio in Nerone cap. 32. Arriano ad Epictet. lib. 2. c. 1. & Ammiano Marcellino lib. 28. c. 4. Cicero II. de Oratore c. 6. Nam si inquam Scævola nullum erit testamentum recte factum, nisi quod tu scripseris, omnes ad te cives cum tabulis veniemus. Ad cautiones contractuum ab iisdem confectas pertinet Inscriptio Neapolitana apud Gruter. pag. DCLXII. DOLVS MAL. ABE- STO. ET. IVRISCONSULT. Nec recentiores ab hac labe immunes: qui enim post Joh. de Deo, Hispanum, & Bartholomæum Capollam, Italum, cautelas collegerunt Germani, si unicum B. Stryckium excipias, periculosas & fallaces a necessariis & innoxiiis non satis separarunt. Specimina nonnulla minus probandorum ejusmodi sophismatum ex Capolla, & Dyno, immodestis eorum artificibus, cetera tamen, integræ vitæ & conscientiæ viris, adduxit Schilte-

Schilterus *Exerc. 1.* §. 4. *XV.* §. 34. *XXX.* 140. & *XXXVII.* §. 147. 167. & 168. Alia Stryckius de *C. C. Sect. 1. c. 1.* §. 8. Quibus adde quod Oldendorp *D. I. Aet. 9.* ex Speculatore refert, Cæpollam tradidisse, suspendendum esse laqueo advocatum, qui in causa tutelari patiatur litem contestari, intra triennium. Ejusdem farinae est, quod Paulus Castrensis probat atque excusat, Notarium de majore summa, cum minor esset soluta, sed eadem sæpius enumerata, instrumentum scribere posse ad *l. 67. D. de Solut.* Quodque Angelus Aretinus ad *l. 1. C. de fals. caus.* scribit, ex visione quadam sibi compertum, Dynum, ob cautelæ alicujus usum, ad inferos damnatum esse. Rectum de his judicium tulit Jacobus Cujacius, in præfat. Consultationibus præmissa: *cæperunt more pravo, prævaro, litigandi potius, quam justitiæ tradere vias.* Aliud est Francisc. Duareni ad *l. 25. D. Solut. matr.* cujus verba adscribo: *Ευρηματικὸν libros nonnulli ex barbaris conscripserunt, sed commentis partim frigidis & ineptis, partim vafreis atque veteratoriis refertos, ut eos studiosorum lectione prorsus indignos censeam.* Utique in hæc artis nostræ propudia fraudisque magistros quadrat vulgaris parœmia, qua status controversia passim Jctorum ordini movetur, & Juristæ mali Christiani vocitantur. Ejus occasionem & causas indagavit Cl. Hertius, quibus hanc a cautionibus subdolis petitam addi velim: hæc namque Jurisprudentiam ex matrona meretricem, ex matre novercam fecere. Ceterum usuri cautionibus, etiam licitis, caveant ne nimis, præsertim insolitis utantur, ex hoc ipso enim fraudis suspicio oritur; ut sæpius usu veniat Plautinum illud in *Capteiv. Aet. II. sc. 2.*

*Qui cavet, ne decipiatur, vix cavet, cum etiam cavet.
Etiam cum cavisse ratus, sepe is cautor captus est.*

§. VIII.

Quid autem est, dicat aliquis, quod Ulpianus tam magnifice juris Sacerdotes *veram non simulatam Philosophiam* profiteri, ait in *l. 1. §. 1. de Just. & jure?* & tamen fictionum adco

adeo plena sunt omnia, ut non tantum *commentitii juris* fiat mentio in *l. 20. D. de Pœnis*, sed & Plautus Jurisconsultos *legum atque jurium fictores* appellavit, *Epid. Att. III. sc. 4 v. 86*. Quid est? quod Cicero pro *Muræna c. 13*. etsi subridens, scientiam juris, prope totam, *ex rebus fictis & commentitiis* constare dixit, quibus falsa pro veris scienter & aperte assumantur. Et alibi, *umbris & imaginibus* uti Jctos, queritur; nullam eos veri juris, germanæque justitiæ solidam & expressam effigiem tenuisse *lib. III. de Offic. 17*. Dignus est articulus, qui exemplis illustretur. Filius movens querelam inofficiosi hoc colore, tam apud Græcos, quam Romanos niti jubetur, ut dicat, non sanæ mentis fuisse patrem, cum testamentum ordinaret, etsi certum sit, dementem non fuisse *l. 2. & 5. D. de Inoff. test.* Adoptiones & emancipationes per imaginarias venditiones celebratæ *l. ult. C. de Adopt. l. ult. C. de Emanc.* Hinc imago naturæ veritati opponitur, in *l. 23. D. de lib. & postb.* Papinianus *adoptionis commentum* vocat, *l. 76 D. de Cond. & dem.* Justinianus *ludibrium* appellavit, *l. 10. C. de Adopt.* Donationis gratia nummo uno mancipio dabatur, *Vitruv. lib. I. c. 4 Arcas divisit nummoque Sesterio singulis mancipibus mancipio dedit.* & *Grut. pag. 956. n. 4.*

MANCVPATIO. SESTERTIO. NUMMO. VNO. Qui ex captivitate reversus, semper in Urbe fuisse, & qui mortuus in captivitate, ab initio mortuus fingebatur *§. 5. l. quib. mod. jus patr. pot. sol.* pariter ac apud Athenienses, ab hostibus reversi, *δευτεροποτμοι και υστεροποτμοι* dicti, quasi ex Orco reversi & renati. Qui in utero sunt pro natis habentur, quoties de eorum commodo agitur *l. 7. D. de Stat. hom. l. 30. §. 1. de Acq. vel om. her.* Actio funeraria oriri censetur ex quasi contractu, cum homine mortuo celebrato *l. 1. D. de Relig.* Hereditas ante aditionem defunctum repræsentat *§. 2. I. l. 31. §. 1. l. 52. D. de Hered. inst.* Pater & filius, servus & dominus, heres & defunctus pro una persona habentur *§. 4. & 12. Inst. de inutil. stip. l. fin. C. de impub. subst.* Servitus mortalitati h. e. morti, comparatur *l. 209. de R. 7.* Sexcenta id genus sunt

Yyy

alia,

alia, quæ Franciscus Hotmanus *quæ illustr.* c. 38. ad quinque genera, personas, res, tempora, loca & actus revocavit. Taceo tot alia *dicis causa*, *περὸς αὐτοὺς εἰρηναῖα*, a Jurisconsultis excogitata, l. 4. *D. Commod. l. 66. de Jur. dot. l. 46. Locati l. 10. de Acq. poss.* de quibus A. Dadinus Alteserra Tractatus septem de *Fictionibus Juris* publicavit Parisiis anno 1659. Equidem non meum facio istorum judicium, qui fingendi illud institutum, tanquam elegans, subtile, & ad leges ferendas necessarium extollunt: multo minus probo comparationem Alteserræ, in præfatione laudati tractatus: *Etiam fictiones usquequaque non respuit ipsa sacra scriptura, & quod perpetuum vel æternum pactum salutis dicere malis, variis verborum coloribus veritatis sacramenta insinuavit; & Christus per parabolas & figmenta de infrugifera ficu arefacta, de lampadibus sponsi, de sementis incrementis; hypocritas apud eum audies per sepulchra dealbata, quæ foris marmorea, intus nihil aliud, quam cineres, & putredinem continent.* Potius assentior Titio, qui totum istum fictionum apparatus, non modo non necessarium, sed & inutilem ineptumque esse docuit, in *dissert. de Fict. Roman. natur. & inconcin.* Pendent enim ab imperio, & sunt legis dispositiones, quæ falsi assumptione per se non egent; Romæ autem malum erant necessarium, & species genuina doli boni. Vix enim Reip. status aliam legum rigidarum medelam admittebat; vulgus æquos habebat mores antiquos, & novandi studium exemplo periculosum censebat; ideo quæ diu comprobata erant, propter utilitatem, verborum fictione atque imagine erant obliteranda, ut Clariss. Vir Gerard. Noodt *lib. III. Probabil. cap. 12.* pulcherrime ostendit. Nūmis autem durum est Titii effectum, stultitiam atque improbitatem Jurisconsultorum fictiones protulisse, quo res planas involverent, miseramque plebem emungerent atque irretirent. *Jur. priv. lib. I. c. 9. §. 12.* Nec audio Ant. Matthæum *disp. fund. VII th 23.* furoris colorem in querela inofficiosi his verbis redarguentem: *At, inquam, sermo vester sit, Ita ita: Non non.* Ecquid

quid enim minus lædit reverentiam, patrem impietatis & avaritia, an morbi accusasse? Nonne furor est, posthabito sanguine, extraneos heredes instituisse? Plinius paneg. ad Trajanum: *Non tu falsis, non iniquis, tabulis advocaris, nullius ad te iracundia, nullius impietas, nullius furor confugit.* De fictionibus in jure naturali licitis, vide quæ Pufendorf lib. II de ? N. & G. c. 2. §. 2. in Eride Scandinavica pag. 20. 220. contra imperitos adversarios suos disputavit.

§. IX.

Tempus est ad Judicum tribunalia veniamus. Hæc utut justitiæ ac veritatis officinæ esse debeant. dolum tamen bonum non excludunt, si ejus ope ab actore vel reo veritas extorqueri possit. Divinum Salomonis judicium, in jure quibus mulieribus dicendo, primum in hoc genere locum meretur; quia summa prudentia naturalem matrum affectionem respiciens, voluntatem scindendi infantis vivi præ se tulit, ut matrem detegeret veram 1 Reg. III. 25. Similem Claudii solertiam memoræ prodidit Suetonius cap. XV. qui feminam, non agnoscentem filium suum, dubia utrinque argumentorum fide, ad confessionem, indicto ejus matrimonio, compulsi. Aliam Galbæ, narrat idem: quum enim de proprietate jumenti quæreretur, levibus utrinque argumentis & testibus, decrevit, ut ad locum, ubi aduari solebat, duceretur, capite involuto, atque ejus esset, ad quem sponte a potu, capite revelato, se recepisset, in ejus visa c. VII. Carolus Magnus denique, certus aut patrem aut filium quendam occidisse, incertus autem uter eorum, utrumque suspendi jussit, & confestim filium innocentem confessione sua pater ab imminente supplicio liberavit: id quod laudat Menochius: improbat Scaccias imperite, & contra cap. asserte 2. X. de Præsumt. Vel sola namque ratio dicitur, judicem, ad veritatem eruendam, simulatione honesta, & ad decipiendum non directâ, uti posse. Sic territionem realem & verbalem praxis quotidiana defendit, quando judex ministrum terribilem, carnificem puta, reo sistit, quasi tor-

quendus esset. Similiter prudens judex notitiam criminis præ se ferre potest, ac si auctorem delicti ejusque circumstantias habeat perspectas, licet omnium sit ignarissimus. Caveat autem sibi, ne promissione impunitatis confessionem eruat, quæ raro in optimam partem cadere solet. Neque enim judicis est, pœnam remittere, sed punire, immo dubia & inutilis plerumque hæc eruendæ veritatis est ratio. Sive enim reum indicia propinqua & præsumptiones urgeant, quæstioni est subjiçendus: sive per testes criminis jam convictus, & ejusmodi confessio non desideratur *l. 8. D. de Quæst.* sive deinceps leviores tantum conjecturæ adsunt, & ille crimen, forsan non commissum, falsus est, quo e carceris squalore se liberaret, nec tunc pœnæ ordinariæ erit subjiçendus, præsertim si confessionem ita extortam revocaverit. *l. 27. §. 4. D. de Pænis.* ibique Duarenus, Faber *C. lib. 9. tit. 25. def. 17. Covarr. lib. I. Var. res. 2. in fin.* Quid si vero judex nihilominus veniam delicti promisit? Distinguo: aut is inferior est, & tum si reus, indiciiis oneratus, in confessione perseveret, vel satis probatum fuerit delictum, non obstante fide nulliter data, pœna ordinaria est afficiendus. Aut Princeps aliusve, qui gratiam delicti facere potest, impunitatem promisit, & hic fidem liberare tenetur, exemplo Davidis *3 Reg. II. 8. Matth. de crim. lib. 48. tit. 16. c. 1. n. 16.* Unde factum Alexandri III. passim reprehenditur, qui impunitatem Episcopo Simoniaco promissam, haud præstitit. *Carpz. pr. cr. qu. 149. n. 15.* Aliquando item si Reip. intersit, delictum valde occultum detegi, impunitas prodenti a judice inferiore promissa, servanda erit. vid. *l. 5. §. 7. C. ad L. Jul. Maj. l. 1. C. de Fals. monet.* Brunn. *proc. inq. c. 8. m. 1. §. 55.*

§. X.

Nunc latissimus disquirendi campus sese aperit, num Advocatis in bona causa simulatione & dissimulatione uti fas sit? Vetus illa quæstio est, tam apud Gentiles, quam Christianos ventilata, Quintilianus *lib. XII. Inst. orat. c. 1.* licite fieri

non posse existimavit, ut vir bonus, in defensione causæ, velit aliquando judici auferre veritatem; aut responsione joculari, rem risu magis dignam facere, quam pœna, si crimen objectum negari non potest. Sane cum litis contestatio sit quasi initium prælii civilis, dolos & argutias, velut stratagemata forensia, probarunt multi, etiam recentiores Jurisconsulti, Mynsing. cent. 3. Obs. 6. Wesenb. & Peretz. in tit. C. de Adv. div. Negarunt alii, auctoritatis non minoris, quos inter Wissenb. disp. XI. n. 11. Covarruv. 1. resolut. 2. Carpzov. p. 1. c. 1. d. 8. & Struv. Ex. VII. §. 8. hoc moti sunt argumento, quod non sint facienda mala, ut eveniant bona, quodque melius sit decipi, quam decipere 1 Cor. VI. 7. 8. Mihi distinguendum videtur inter dolum bonum & malum. Circuitus prudentiæ civilis, vigilantia & modi, quibus sine læsione adversarii ad exitum citius pervenitur, non tantum permitti sunt, sed & laudandi; inprimis si ad excludendam alterius fraudem, vel pertinaciam ejus frangendam adhibeantur: nec enim dolo fecisse videtur, qui fraudem exclusit, ait Papinianus in l. 77. §. antepen. de Legat. 2. Perjuriis autem & mendaciis, etiam in bona causa, abstinendum censemus, etsi pars adversa iis utatur; nec enim hujus peccatum, alteri peccandi licentiam donat. Omnino autem temeritatem illorum causidicorum, qui omnia moliuntur, lucri cupiditate illecti, ut palmam ferant per fas & nefas, per vera & falsa, detestamur, illosque supplicio dignos esse censemus, quod, post cladem Varianam, majores nostri statuerunt, in causarum Patronos Romanos: aliis oculos, aliis manus amputabant: unius os sutum, recisa prius lingua, quam in manu tenens barbarus, Tandem, inquit, vipera, sibilare desisse, apud Florum lib. IV. cap. 12. Neque enim caninum illud studium, quod Lipsius, post Columellam, pestem reip. vocat, majoribus tum cognitum fuit; sicut nec Hebræis, Suecis, Danis, Hungaris antiquis. Franci inter Advocatos & causidicos, seu clamatores, differentiam statuerunt, ut apparet ex capit. 8. & 12. apud Goldast. t. 3. pag.

156. Romæ in jure cavere, consilio juvare, atque hoc scientiæ genere prodesse quamplurimis, vehementer & ad opes augendas, & ad grâtiâ pertinuit. Cassiodorus contra queritur, officium Advocati plus ad subversionem veritatis, quam expositionem justitiæ exerceri; Nec tamen propter abusum usus tolli potuit, neque hodie omnes eodem loco habendi sunt. Praviac perniciosi procul e limine judicii pellantur: probos autem, fideliter, ut decet Justitiæ Sacerdotes, munere suo fungentes, maneat suus honos suaque laus ex l. 14. C. de Adv. div. jud. quam & scite Lucanus expressit:

- - - licet exercere togatæ

Manera militiæ, licet & sine sanguinis haustu

Militia legitimo sub judice bella movere,

Hinc quoque servati contingit gloria civis,

Ataque victrices intexunt limina palmæ.

Hi præstiti jurisjurandi memores, non modo falsas allegationes & dilatorias exceptiones, utut cliens suus possideat, abominantur, sed & a maledictis, calumniis & fordibus abstinent, illud Isocratis monitum, non moniti præ oculis habentes: Nullius improbi negotii patronus esse velis: nam & te ipsum facere putabunt, quæ ab aliis facta defenderis. Quo magis autem in tritura forensi exercitatus erit causarum Patronus, eo plures cautelas contra adversarii cavillationes in promptu habebit, legitimas puta & honestas, non tales, quibus ipse Cæpolla nonnunquam subjecit: Sed cave, ut hac cautela utaris, in perniciem animæ tuæ. Finge: negotia mea gerens, imprudens rem meam enisti: intelligis rem meam esse; priusquam usucapias, vis mihi rem servare, & tibi regressum efficere contra venditorem, quod neutrum fieri potest, ubi impleveris usucapionem. Ergo aliquem subornas, me absente, qui meo nomine petat rem; nec videberis dolum malum facere; quia nemini facis injuriam l. 19. §. 3. D. de Neg. gest. Aliter sentiendum de specie sequente: Mulier quædam Atheniensis pecuniam depositi nomine ac-

cepe;

ceperat a duobus, ea conditione, ut illam utrisque redderet. Alter eorum rediens, simulata socii morte, pecuniam ab ea totam abstulit; postea alter reversus eandem ab ea pecuniam, aut totam, aut suam partem poposcit, venit res ad iudicium. Hærebat misera in maxima pariter, & pecuniæ, & defensionis penuria; jamque de laqueo cogitabat. Sed Demosthenes, mulieris patronus, iudicii vim ita elusit: postulavit enim, ut hic socium advocandum curaret, quo utrique simul secundum legem conventionis pecunia redderetur. Quod Demosthenis factum Valerius Maximus inter ea annumerat, quæ aliquando vafre dicta aut facta sunt *lib. VII, c. 3, §. 5*. Pejus est, docere clientem, ut adversario subtrahat instrumenta; vel ut cum teste simulet rixas, quo tanquam suspensus recusari possit. Bene monuit Justus Oldekop in *Obs. crim. tit. I. Obs. 11*. advocatos aliis cavere volentes, sibi imprimis cavere debere, ne per cautelas vincendo, cauteriatam conscientiam consequantur; quamvis enim in hac vita profint ad honorem, in futura tamen vita, ædificent gehennam. In criminalibus equidem, ubi de poena agitur, fre-na laxat Pufendorf *lib. IV. de J. N. & G. c. 1, §. 21*. adeo ut Patronis a parte adscitis, fictas sententias allegare, & reum, qui clam confessus est crimen, ad negandum instruere permittat. Verum quum rei interpretem agat Advocatus, fictis argumentis absolutionem non obtinebit, sed simplicior via præstat; qua usum M. Antonium, in defendendo M. Aquilio, tradit Cicero in *Verrem lib. V. Oratores, qui circumscribere nituntur*, hos tales vocat. Salvi-
anus epist. 4. *Diaboli mancipia*. Carpzoy, *pr. crim. qu. 115. n. 93*. appellavit.

§. XI.

Difficilior inspectio est, quid his in speciebus de litigan-
tibus & accusatis dicendum sit? Si ad forum catur, plerique in ea sunt hæresi, quasi veritas, non nisi exacto iure-
jurando dici debeat; ordinatam charitatem incipere a se ipso, *l. 6. C. de Serv.* actori probandum esse, Decius & Myn-
fingerus causantur, neminem vero, ut forex, spontanea con-

not. inf. n. 14. & aliorum existimantium, eos qui actionem injuriarum timent, mittere posse procuratorem, ut ad evitandam infamiam sententiā in ipsos feratur, per *l. 4. § fin. l. 6. de His qui not. inf. l. 2. de Obseq. patron. Et par.* Quanquam enim Camera Imperialis, in causis injuriarum, sententias in Procuratores ferat; alibi tamen in reum feruntur, nec ex lite, sed ex negotio ac turpi facto infamia oritur, cujus dominus est reus conventus *l. 86. de Solut. Schilt. Exerc. X. §. 14.* Solidum magis crepat cautio, ut qui propter injurias non atroces, calore iracundiæ prolatas, actione ad palinodiam pulsari potest, ante litem contestatam honoris declarationem instituat, quo ipso a recantatione se liberabit. Finckelth. *Obf. 50. per tot.* id quod non tantum apud Saxones, sed & alibi obtinere tradunt Mev. *p. III. dec. 358. Klock. tom. 3. conf. 184 n. 10. Sande lib. 5. tit. 8. def. 7.* Quid? quod jure Romano de furto, rapina aliove delicto ante litem contestatam transigens, infamis non fit, quod crimen confiteri non videtur *l. 73. D. de Proc. l. 26. §. 5. D. de Nox. act.* Idem est, si per tertium transactio celebrata *l. 4. §. fin. D. de His qui not.*

§. XII.

Ad contrahentes quod attinet, ipsa ratio dicitur, omnia aperienda esse, quæ natura contractus exigit; id quod & legibus civilibus est repetitum. Prostat apud Demosthenem vetus Lex Attica: *Κατὰ τὴν ἀγορὰν ἀψευδὲς.* Romæ venditor, secundum Edicti Ædilitii normam, de vitiis non indicatis tenetur; siue sciverit ea, siue ignoraverit; quoniam nihil interest, ignorantia venditoris, an ejus calliditate emtor fallatur. Plane *dolum malum semper abesse oportere, in judicio emti, quod bonæ fidei est*, respondit Pomponius in *l. 6. §. fin. D. de Act. emt. vend.* Et nemo quidem dubitat; vitia quæ rem subjectam per se contingunt, a viro bono reticere non posse; ut si mancipium morbosum, fugitivum, noxave non solutum, venum exponat mango; si domum a Magistratu dejici jussam, vel ædes pestilentes quis vendat, quæ salu-

Z z z

bres

bres habebantur, indicandum id est emtori, quia lux contractibus convenit, & bonæ fidei venditorem nec commodorum spem augere, nec incommodorum cognitionem obscurare oportet, ait Valer. Max. l. VIII. c. 2. n. 1. At difficilior decisio est, num & vitia, quæ extra rem venditam posita sunt, palam & recte pronuntiari debeant? Cicero lib. III. de Off. eam quæstionem inter controversa jura Stoicorum retulit; hodie casus conscientiæ vocamus. Antipater enim, homo acutissimus, omnia patefacienda existimabat, ut ne quid omnino, quod venditor novit, emtor ignoret. v. gr. Si in annonæ caritate frumentum aliquo advexerim, solusque sciam, multos illuc frumenta advekturos, ita ut suo adventu inopiam paullo post levaturi sint: omnia hæc, putabat, me nota facere debere, nec quicquam subticendum esse, ut pluris quam æquum sit, frumentum vendam. Contra Diogenes Babylonius, magnus itidem & gravis Stoicus, venditorem, quatenus jure civili constitutum esset, dicere oportere, aiebat; cetera eum sine insidiis agere, & quoniam vendat, velle quam optime vendere. Advexi, inquit, exposui, vendo meum, non pluris quam ceteri: fortasse etiam minoris, cum major est copia, cui fit injuria? Cicero in Antipatri sententiam prior est, omnemque mercatoris dissimulationem idcirco hominis non aperti, simplicis aut ingenui, sed versuti potius, astuti & fallacis esse contendit. Alexander autem ab Alexandro lib. VI. Genial. dier. c. 1. Grotius lib. II. c. 12. §. 8. & 9. etiam Pufendorf lib. V. c. 3. §. 2. 3. 4. arbitrium suum interposuerunt. Vin' meum? Paucis dabo: Aliter leges, aliter Philosophi tollunt astutias; illæ quatenus tenere manu possunt, hi quatenus ratione & sectæ doctrinis. Jam vero Cicero, cum Antipatro suo, Virum bonum & Stoicum sapientem fingit, qui ubique sanctus & honesti cultor paupertatem magis, quam divitias in bonis habet; hic vero in summa frumenti inopia si sciat, alios annonæ caritate mox levaturos, id non silebit, quia ea lege se hominem natum profitetur, ut humanæ societati inserviat,

viat, nihilque dicat, faciat, aut expetat, nisi summa cum laude & dignitate conjunctum. At mercator, ad Indos extremos impiger currens, nulloque pacto ad futura prædicenda obstrictus, pluseulum hic lucrabitur, reticendo negotiorum eventa, quæ fortuita tantum & in casu sita esse norat. Sine hac solertia commercia stare non possunt: & licet rigida charitatis regula, in egenis emtoribus, sic violari possit; non tamen injustus est venditor, pretium ab omnibus ultro oblatum accipiens. Latius utique patet officiorum, quam juris regula: multa pietas, humanitas & liberalitas suadent, quæ extra publicas tabulas sunt. Forum hæc propter Anacharsis, locum ad fallendum invicem destinatum appellavit, ubi æquum esse credatur, quemque ad quæstum suum esse callidum: & judicio. Imp. hæc emtionis venditionis existimatur substantia, ut emtor viliori comparandi, venditor cariores distrabendi votum gerentes, ad hunc contractum accedant. l. 8. C. de Resc. vend. Alibi nimius in alteram partem Cicero; cum enim ab inimicis, in Senatu, ei mendacium objiceretur, inter ridendum eos, quasi austeros & œconomix imperitos obtundebat, dicens: *Αγοραῖοι τοι ὁμοῖοι ἄνθρωποι εἰσίν, οὓς οὐκ οἶσιν, οὐδ' οἴονται, οὐδ' ἐπιθυμῶσι, οὐδ' ἐπινοοῦσι, οὐδ' ἐπιβουλεύουσι, οὐδ' ἐπιμελῶνται, οὐδ' ἐπινοοῦνται, οὐδ' ἐπινοοῦνται, οὐδ' ἐπινοοῦνται.* Ignoratis, prudentis & cauti patrisfamilias esse, quod emere vellet, emiturum sese negare, propter competitores emtionis, apud Gellium lib. XII. N. A. c. 12. Plautus Trucul. Actus II. sc. 4. v. 60.

quippini?

Ubi sine labore res geri pulchre potest,

Ad laum quemque æquum est, quæstum esse callidum.

§. XIII.

Eadem ratio efficit, ut quæ commendandi causa, in venditione dicuntur a mercatoribus, si palam appareant, eos non obligent l. 43. §. 1. D. de Contr. emt. l. 19. pr. & §. 3. de Adil. ed. veluti si servum frugi & dicto audientem dixerint; vel speciosum, cui difficilis natura formam negavit; vel domum bene ædificatam, quæ ruinam minatur. Diogenes in laudanda lib. I. de Offic. Quod si qui proscribant, in-

Z z z 2

quit,

quit, villam bonam beneque ædificatam, non existimantur fessisse, etiamsi illa nec bona sit, nec ædificata ratione; multo minus, qui domum non laudarunt: ubi enim iudicium emtoris est, ibi fraus venditoris quæ potest esse? Attamen nostris quoque temporibus, verum esse comperimus, quod Sirachus habet *cap. 27. §. 2.* Inter compages ligneas pangitur clavus, & inter venditionem atque emtionem peccatum ultro citroque teritur: vel quod de sui ævi propolis dixit Cicero, nihil eos proficere, nisi admodum mentiantur. Salycetus paucos mercatores esse conqueritur, qui non utantur mendaciis; & plures id genus querelas cumulat Benevenutus Stracha de *Mercat. p. 2. n. 9.* quas promiscue nostras non facimus. Trita interim præconum laudatio est, rem bonam venum exponi; cuius causa emtor intelligens ne numulo quidem pluris emit, stultus suam sibi exprobrat stultitiam, & quia non aperuit oculos, aperiat crumenam *l. 15. §. 1. D. de Contr. emt. Mev. p. IV. dec. 49. Brun. cent. 3. dec. 10.* Bene Horatius *lib. II. ep. 2.*

Multa fidem promissa levant, ubi plenius æquo

Laudat venales, qui vult extrudere, merces.

Plane si decipiendi emtoris causa aliquid dictum, quod ad rei laudem spectat, vel reservatio mentalis aut vanitas orationis adhibita, quæ hominem constantem & prudentem fallere possit, ratio est, ut actio de dolo nascatur *l. 37. D. de Dolo mal.* Non multum enim refert in mendacio, aperte dicas a re alienum, an verum quidem, sed quod, ob πολωνίαν vocis, alterum aliter accepturum scias. v. gr. vendito tibi equum sine vitio, nisi quod non ascendit arborem, pontem ligneum in mente habens, apud Gloss. in *l. 39. de Pass.* vel de equo lunatico, si loquatur, *klare ogen*, non equi, sed suos, vel emtoris oculos intelligens, quod exemplum attulit Giphani, in *acon. leg. l. 1. c. 24. n. 215.* Hæ enim & aliæ ejuscemodi cavillationes hominum perfidorum & veteratorum sunt, contra quos commodum erit ac frugiperuata adhibere, qualia Cl. Stryckius in cautelis contratum

etuum commendavit. Bene idcirco Hieronymus ad Paullinum nos jubet habere simplicitatem columbæ, ne cuiquam machinemur dolos; & serpentis astutiam, ne aliorum supplantemur insidiis; *Non multum*, inquit, *disfat in vitio, vel decipere posse, vel decipi.* Nec minus perspicue doli mali ut & mendacii naturam, supra a nobis traditam, in hac venditionis materia, expressit Florentinus in l. 43. §. 2. *D. de Contr. emt.* verba ejus: *Dolum malum a se abesse præstare venditor debet: qui non tantum in eo est, qui, fallendi causa obscure loquitur, sed etiam qui insidiosè obscure dissimulat.* Adde Modestin. l. 39. de *A. E. V.* verbis potuit & debuit, item Mevium p. VI. dec. 146.

§. XIV.

Age, quia huc perventum, videamus quo in loco Jacobo Patriarchæ stratagema œconomicum habendum sit, quo avunculi gregem minuit, suum vero auxit? De facto Sacra Scriptura nos dubitare non finit, *Genes. XXX. & XXXI* licet de genere virgultorum variæ sint interpretum sententiæ, apud Bochartum, quas excutere non debet. Aben-Esra effectum ad miraculum retulit; at R. Levi Ben Gerson & Abarbanel ex obtutu & causis physicis rationem petunt; quod colores agant in humores, præsertim in bestiis, quarum sensio cum speciebus corporeis arctius connexa est. Hodie forsan imaginationis tanta vis non est; verum oviculæ nostræ tanto desiderio aquam nec expetunt, neq. aquisitionis tempore arietes admittunt. Si de jure quæras, constat inter omnes, artem illam, quæ alterius commoda intervertuntur, in furtum cadere; sed Jacobus, foctura hac artificiosa, loceri fraudulentas molitiones, pacta decies mutantis, & septennali *ἔκτισα* Rachelam vendentis elusit: nec id suopte consilio, sed admonitus a numine divino, velut iudice supremo; cujus ultrix ærumnarum providentia, ita disposuerat causas naturales, ut quod per se effecturæ erant, nunc promptius efficerent, quo legi de mercede solvenda satisfieret. Qui absolutum & supereminens Dei in opes

Zzz 3

huma-

humana dominium urgent, dubiis premuntur, quibus, haud facile satisfieri potest. Jobi Clericus, Vir Cl. ad Ctorum regulam confugit, quod ambigua pæctio vel obscura venditori nocere debeat, in cuius potestate fuit legem contractus apertius dicere, *l. 21. §. l. 33. D. de Contr. emt. l. 172. D. de R. j.* Sed vereor, ut feliciter! Neque enim Laban, sed Jacobus legem contractus dixit, & Paulus cum Labcone aliquando contra emtorem interpretationem faciendam monuit, quando is, ut hic Patriarcha, singularem & extraordinariam utilitatem quærit in *l. 34. D. de Contr. emt. l. 13. D. Qui pot. in pign. l. 41. l. 110. §. 1. D. de V. O.* In obscuris porro id, quod plerumque fieri solet, inspicere debet *l. 114. D. de R. j.* & Jacobus denique locator magis fuit operarum, quam emtor; ei autem qui locavit pæctio obscura nocere debet, inquit Papinianus in *l. 39. de Pæctis.*

§. XV.

Cum dolo bono magnam affinitatem habent blanditiæ, quæ sicut in contractibus omnino sunt permixtæ *arg. l. ult. C. de his quæ vi metusve*, ita mellitis loquelis & verborum lenociniis, ut quis condito testamento heres scribatur, vel ne agnatus testamentum condat, omni jure uti licet. Quod ad Romanum, dubia quædam movit Antecessor Viadrinus Clarissimus *Var. c. 8.* sed nimis aperte Papinianus ex facto consultus respondit, maritum, si non per vim ac dolum intercessit, sed ut fieri assolet, offensam agræ mulieris blando sermone placavit, quominus contra eum mutata voluntate edictillos faceret, in crimen haud incidere, nec ei, velut indigno, hereditatem auferendam, quæ testamento data fuerat *l. ult. D. Si quis aliq. test. prob.* Cujus imitatione judicium uxoris postremum in se provocare maritali sermone, criminum non esse, Diocletianus & Maximianus rescripserunt in *l. ult. C. cod.* Qui elegans Papiniani ingenium novit, quid sit sermo maritalis facile intelligit. Is totus Stoicus licet, non omnia ad Stoicam gravitatem exigenda censuit. Mariti enim uxorum amantes quovis sermone jucundos & obvios sese præ-

præbere solent, & ipse Cato rugosa, opinor, fronte Gratiis aliquando litavit, suæque stomachantis Marciae benevolentiam blanditiis & amorum illecebris recollegit. Sic Cujacius *ad lib. XV. Resp. Papin. Jac. Gothofred. ad l. 1. C. Th. d. inf. pæn. cæl. Bynkersh. d. captat. inst. cap. 3. & Dd. communiter ad tit. D. Si quis aliq. test. prob.* Aliud autem sedisse videtur Soloni, Atheniensium Legislatori, qui, Plutarcho auctore, nihil discriminis intercedere existimavit, testatori persuadeatur, secus quam expediat, an vero is cogatur; quia in pervertenda hominis voluntate tan undem utraque valerent. Romæ, ut dixi, crimen erat, si intervenisset vis ac dolus; illecebris elicere hominum benignitatem, nulli prohibitum; satis enim existimabant malitiam abfuisse; quin gratia & officiis hereditatem merere, laudi dabatur & honori. Cicer. *Phil. II. c. 16. & Tacit. II. Annal. c. 84.* Adeo ut licet heredipetarum natio infamis esset quam maxime, & legibus damnata, ejusmodi tamen institutio: *Qua ex parte Lucius Titius me heredem instituit, ex ea parte mihi idem Lucius Titius heres esset*, captatoria non videretur, sed grata potius amoris compensatio *l. 70. § 71. D. de Her. inst.* quod cum similis affectus & simplex religio testantium sine calliditate provocarit, ajunt Impp. & Leonii exemplo declarant *in novell. Valentini. l. 1. tit. 4.* Pariter & moribus nostris verbis delenificis, etiam, ut multi volunt, lacrymis non dolosis, munusculis hamatis, & expositione benemeritorum judicium uxoris, vel marii, etiam extranei, provocare licet. Gail. *l. 2. Obs. 117. n. 4. Carpz. p. 3. consi. 5. d. 7. Farinac. de falso § simul. qu. 161. n. 87.* Nec tamen (1) mendacia, fugillationes, aut fictæ criminationes, in heredes scribundos adductæ, probantur. Hartm. *Pistor p. 1. qu. 39. n. 4. Mev. p. VI. dec. 146. Carpz. p. 3. c. 5. d. 8. § 10.* multo minus (2) assidue persuasiones & instantissimæ sollicitationes; cum habeant vim compulsionis, ut Samson in Delila sua expertus est, *Jud. XVI. 16. Sande lib. IV. Dec. Fris. tit. 1. def. 11. Lynck. cent. 9. dec. 832.* Potentiorum quoque (3) assentiones, five preces.

preces armatae, justo metui pares sunt *arg. l. 1. C. Si Res. prov. Mascard. de Probat. vol. 2. concl. 1. & denique blanditiae, (4) in ultimo mortis articulo adhibitae, reprobantur a plerisque, quod eo in statu morienti omnia sunt molesta. Stulte quodammodo & perverse plerique affecti sunt, quando morti se proximos arbitrantur, scribit Plato lib. XI. de LL. De usu hodierno, vide ex professio Stryck de Jure blandit. c. 3. & 4. Atque importunas ejusmodi sollicitationes & dolosas, quibus legitimae heredes arcentur, prohibuisse videtur Solon: quemadmodum Romani novercalia delinimenta detestantur, quibus ad malignum circa sanguinem suum judicium inferendum parentes binubi corrumpuntur. l. 4. D. de Inoff. test. Constantinus fallaces blanditias vocat in l. 1. C. Tb. de Infirm. pæn. cæl. Egregie Cicero lib. III. de Off. c. 18. *Mibi quidem, inquit, etiam verae hereditates non honestae videntur, si sint malitiosis blanditiis officiorum, non veritate, sed simulatione quaesitae.* Graphicam & prolixam heredipetarum descriptionem dabit Ammianus Marcellinus lib. XXVIII. & Salvianus lib. III. adv. avarit. Ciceronem illustrat Seneca epist. 96. *Amico aegro aliquis adsidet? Probamus. At hoc si hereditatis causa facit, vultur est, cadaver expectat. Eadem aut turpia sunt, aut honesta. Refert, quare, aut quemadmodum fiant.**

§. XVI.

Magis adhuc detestandae sunt reservationes mentales, & equivocationes Jesuiticae, quibus ei, quocum res geritur, verba dantur, & apertus verborum sensus in contrarium torquetur. Accidit quidem aliquando, ut sermoni generali ex indifferenti verborum significatione, aut sententiae constructione, aliisve circumstantiis, tacita conditio vel restrictio accedat; multae quippe voces, ex vulgi usu, vel artis consuetudine, plures uno significatus admittunt, nec tum mendacium committitur, etiamsi putetur is, qui accedit, in aliam partem accepturus Vid. Grot. lib. III. c. 1. §. 10. At in assertionibus jurejurando confirmandis, vel in rebus,
ubi

ubi ad veritatem dicendam obligamur, absurdum sane & Diabolicum inventum est æquivocatio, qua omnis juramentorum usus & sanctitas tollitur, pacta enervantur, mendacia foventur, & perpetua diffidentia inter contrahentes, litigantes, testes & judices stabilitur. Plane Scriptura damnat eos, qui loquuntur pacem, & insidias in corde ponunt *Jer. IX. 8.* econtrario nosmetipsos in manifestatione veritatis commendare jubet, non tantum coram Deo, sed & apud hominum conscientiam *2 Cor. IV. 2.* Idque expressis verbis *Jure Canonico* repetitum *c. 22. qu. 5. c. 9.* *Quacunque arte verborum quis juret, Deus tamen, qui conscientia testis, ita hoc accipit, sicut ille, cui juratur, intelligit.* Ipse Juvenalis Sat. VIII.

*- - Ambigua si quando citabere testis,
Incertaque rei, Phalaris licet imperet ut sis
Falsus, & admoto dicet perjuriam tauro,
Summum crede nefas, animam præferre pudori,
Et propter vitam vivendi perdere causas.*

Hæc licet aperta sint, & pluribus apud Casaubonum epistola 9. ad Frontinum Ducem, Jarrigium, in libro, quo Jesuitam in ferali pegmate exhibet, Ludovicum Montaltium Epist. Provinc. pag. 226. aliosque firmata, Toleti tamen Jesuitæ & Cardinalis instruct. Sacerdot. l. IV. c. 21. sententia bonis illis Patribus adhuc placet: *Si quis a superiore interrogetur juratus; tum si jussu interrogetur, respondere debet absque æquivocatione; si vero injuste, tum potest uti æquivocatione, & respondere non secundum judicis mentem, sed secundum propriam. Et si crimen omnino occultum est, de quo quis interrogatur: tum æquivocatione uti poterit, respondendo, nescio: intelligendo tamen intra se, ut dicam tibi: vel respondendo, non feci, intelligendo intra se, nunc non feci, vel quid simile.* Fundamentum pestiferæ hujus doctrinæ ponunt in facto S. Francisci, qui interrogatus a lictoribus, homicidam persequentibus; An illuc transiisset? immixtis intra manicas manibus, hac non transiisse, respondit. Eundem in modum Jesuita

Aaaa

in

in locis, ubi impune commorari non potest, interrogatus, an sit Sacerdos? jurabit se non esse Sacerdotem, Baalis scilicet, vel Apollinis, vel non talem, qui ad id dicendum obligetur. Vide Riveti *præl. ad Exodi XX. pag. m. 297.* Ejusdem indolis est nautarum Belgicorum fictio, qui ut tutius apud Japonenses mercari possint, Num essent Christiani interrogati? Non, sed Hollandos se esse, responderunt, auri tacra fame impulsii. De æquivocatione Arii hæretici, librum sub axilla ferentis, videatur Photius in *Excerpt. pag. 489.* Aliam Ludovici XIII. Regis Galliæ, adversus Magnum Priorem Galliæ ejusque fratrem, habet Gramond *Hist. Gall. lib. XVI.*

§. XVII.

Nos, missio spurio hoc doli boni exemplo, cetera genuina videamus, quo lux simul affundatur, Labeoni, qui *posse & sine dolo malo aliud agi, aliud simulari, contendebat, sicuti faciunt, qui per ejusmodi dissimulationem deserviunt, & tuentur vel sua vel aliena*, auctore Ulpiano in *l. 1. §. 2. D. de Dol. mal.* Enimvero ita nati sumus & educati, ut vitam quisque tenerius amet, quam necesse est; & nemo sanus ad curam sui hortandus sit. Contra insidiantes ergo vel simulantes, quidni scutum aliquod a simulatione innocente, quæ vitandæ, non inferendæ fraudis gratia adhibetur? Diphili sententia eam defendit: *Est probum, quod fit salutis gratia mendacium.* Jure hoc evenire, ait Florentinus, ut quod quisque ob tutelam corporis vel bonorum suorum fecerit, id recte fecisse existimetur, *l. 3. D. de Just. & jur.* Id jus natura comparatum esse, ait Ulpianus, ut vim vi repellere liceat *l. 1. §. 27. de Vi & vi arm.* & Paulus in *l. 45. §. 4. D. ad L. Aquil.* Nil denique vetat cretizare cum Cretensi, & artem arte eludere, quia hoc minus quietem publicam turbat, nec fidem frangenti fides servari debet. Genu fura propius esse, in Græcorum adagium ivit. Ne in amicitia quidem optandum esse, ut me ille plus, quam se amet, ego illum plus, quam me: perturbatio vitæ, si ita sit, atque offi-

officiorum omnium consequetur, ait Cicero III. Tusc. quæst. Quanto magis ergo furum, latronum, veteratorum, & inimicorum desideria caute declinare licebit, ut in eisdem, quos nobis struxerunt, casses incidunt? Hanc non scriptam, sed natam legem, præclare vocat idem Tullius *pro Milone* c. 4. ut si vita nostra in aliquas insidias, in vim, in tela inimicorum incidisset, omnis ratio honesta sit expediendæ salutis. Publius quoque Syrus pronunciat: *Nil turpe ducas pro salutis remedio*. Et Plautus denique adstipulatur Rudente act. IV. sc. 7. v. 9.

- - - *In ætate hominum plurima
Fiunt transfennæ, ubi decipiuntur dolis.
Ille qui consulte, docte atque astute cavet,
Diutius ei uti bene licet partum bene.*

Elegans exemplum habet Cornelius Nepos in *vita Lyfandri*; aliud ex Pauli l. 19. §. 3. *de Neg. gest.* vidimus supra, aliud suppeditat Justinianus in §. 8. *I. de Obl. quæ ex del.* aliud Tryphoninus in l. ult. *D. de Dot. collat.* sed elegantissimum Papinianus habet in l. 77. §. 31. *D. de Legat. lib. II.* cujus species ista est: Mevius a Sejo heres institutus, & hereditatem Titio fratri suo restituere rogatus, eundem Titium heredem scribit, rogatque, ut moriens tam suam, quam Seji hereditatem restituat Sempronio. Si Titius hereditatem adit, fideicommissaria Seji hereditate fraudatus est; prudentius ergo hereditatem fratris repudiat, & intestati possessionem petit: *nec enim*, inquit Æmilius, *videbitur dolo fecisse, cum fraudem exclusisset*. Quocum conspirat Ulpianus in l. 42. *de Acq. her.* *Nec enim videtur voluisse fraudare editum, qui sibi prospicit, ne oneribus patris pupilli hereditas implicaretur*. Et iterum in l. 6. §. 8. Si quis amiss. causa test. *Neque enim interdictum est, ut quis omittat hereditatem, si sine fraude id faciat*.

§. XVIII.

Hoc amplius in dolo bono esse, ait Labco, qui per ejusmodi dissimulationem *deserviunt & tuentur aliena*. Servire

Aaaa 2

Lati

Latinis utilitatem præstare significat; vocula *de* autem hic auget significationem, ut sit reipsa, cum effectu prodesse, ut in *l. 39. § f. de leg. 3.* Finge furiosum ire se perditum, iratum placandum, mœstum demulcendum, pertinaciam ebrii aut ægroti ad mortem festinantis frangendam, vel malum propositum alicujus intervertendum esse, quod plano sermone fieri nequeat. Hic sane duæ colliduntur leges, altera veritatis, altera humanitatis, nempe de homine servando, qui bona sua non intelligit. Et jubet ratio legem majorem vincere minorem; major autem est, quæ magis necessaria & utilior est; quæ prodest generi humano, non quæ illud pessundet. Testimonia sacra & profana hunc dolum bonum confirmant. *Exod. I. 17. 1 Sam. XIX. 12. XX. 5.* Menander: *Satius eligere mendacium, quam malum verum.* Heliodorus lib. 1. *Æthiop. Pulchrum, vocat, mendacium, quum auctori commodat, & audienti non nocet.* In alia tamen omnia ivit Augustinus in *can. Si quis 22. qu. 2.* causatus, quod vita æterna mentiando amittatur. Bartolus etiam neminem jure civili ad alterius defensionem teneri docuit; sed quemadmodum ejus animam propterea in inferno cruciari, dixit Baldus, ita qui non peccare vetat, cum possit, jubet. Nullum profecto mendacium, nulla hic læsio occurrit ejus, qui ficto sermone, sed salutari, deluditur; quin remissio furore mox consensuri, immo gratias acturi sunt insanus, ebriosus, vel iracundus, pro beneficio, quod in ipsos invitos est collatum. Merito sic Hypermnestra, Danaï filia, ad patrem simulans, se sponsum interfecisse: *Splendide mendax & in omne virgo Nobilis ævum*, laudatur apud Horatium *III. Carm. II.* Apposite etiam Sosia Terentianus ait, *Audria Ast. I. sc. 1. v. 115.*

Si illum objurges, vitæ qui auxilium tulit:
Quid facias illi, qui dedit damnum aut malum?

In eadem causa est, qui a sobrio & sanæ mentis homine, depositum accepit, id enim ebrio aut furioso repetenti negare potest; quia sic utilitas ejus promovetur: nonne enim
 con.

confestim perditurus est, quod recepit? Nonne reddere peccatum est, inficiari officium? Nonne justitia suum cuique ita tribui jubet, ut non distrahatur ab ulla humanæ societatis, & utilitatis publicæ justiore contemplatione? *l. 31. §. 1. D. Depos. l. 4. §. 11. D. Fam. etc. l. 12. §. 11. D. Mandati.* Seneca de Benef. IV. c. 10. *Depositum reddere per se res expectanda est: non tamen semper reddam, nec quolibet loco, nec quolibet tempore. Aliquando nihil interest, utrum inficiet, an palam reddam. Intuebor utilitatem ejus, cui redditurus sum, & nociturum illi depositum negabo.* Ex his simul constat, mendaces non esse, qui fictis sermonibus utuntur, ad meliorem liberorum educationem. Plato selectas fabulas a nutrice vel matre pueris narrari præcipit, *lib. II. de Rep.* Strabo *lib. I. Geograph.* ejus rei utilitates, & causas proposuit. Sed hoc ita demum admittimus, quatenus pueri nudæ veritatis nondum sunt capaces; alioquin enim ejusmodi fictionibus & terculamentis intellectus recens corrumpitur, judicium supprimitur, & mens tota præjudiciis repletur, ad senectutem usque duraturis, ut Lockius egregie monuit *de l'education des Enfans n. 120. 138.* Solebant autem veteres, Gorgus Empusæ mentione facta, puerulos ejulantes compescere; adultiores vero, Accus & Alphitus formidine, ab otio detertere, auctore Plutarcho *de Stoic. repugn.* Græci alias *μογ-μαλυκτις* vocant, Romani Manducum: de quo Juvenalis Sat. III.

- - - personæ pallentis biatum

In gremio matris formidat rusticus infans.

§. XIX.

Non migrabimus limites professionis nostræ, si Medicis, Poëtis, Oratoribus, & Historicis, locum hic concedamus inter illos, quibus in utilitatem generis humani, & ad alios tuendos, dolo bono uti licet. Quod si enim Medicus agroto delicato aut moroso pharmaci dulcedinem persuadeat, dissimulatio est & dolus, non malus, sed bonus; quia studium agroto debet restituendæ potius salutis, quam veritatem ei

A a a a 3

noci-

nocituram. Aliquis opinabatur, se vita functum esse, nec alimentis indigere, medicus adducebat, qui se mentiretur mortuum, & tamen comederet: nonne melius erat, delusum sic fuisse ægrum, quam verum audivisse? Alphenus Varus in *l. 26. D. de Oper. libert.* decumbentes ejusmodi divites idcirco *imperantes* Medicorum vocat, quia illi, medicinam fastidientes, imperant aliud atque aliud genus: hi vero, si sapiunt, ex Hippocratis præcepto, sese accommodant ægris, iratos placant, recusantibus cedunt, nec qua optimum & celerrimum est, sed qua licet, medentur. *Si quis per vim, vel suam, medicamentum alicui infundit*, ait Ulpianus *l. 9. §. 1. D. ad L. Aquil.* Aliorum testimonia passim obvia sunt, & supra laudavimus Platonem, Xenophontem, Philonem, Quintilianum aliosque: quibus hic, velut suo loco, accedat Seneca III. de ira c. 39. *Medicum ajunt, cum Regis filiam curare deberet, nec sine ferro posset, dum tumentem mammam leniter foret, scalpellum spongia testum induxisse. Repugnasset puella remedio palam admoto: eadem, quia non expectavit, dolorem tulit. Quædam non nisi decepta sanantur.* Palladius Sophista *lib. VI. Epid. Hipp. sect. 4 aph. 9.* eo usque processit, ut medico non tantum mentiri, sed & mendacium perjurio firmare licere, citra hæsitantiam pronunciarit: nimis large, opinor! Maximus Tyrius non minus audacter Dissert. III. *Ego non Deo tantum, sed & viro bono indignum esse puto, ut occasione qualibet verum dicat. Neque enim res per se præclara est, verum dicere, nisi id cum utilitate ejus fiat, qui audit. Ita sæpe Medicus ægros, Imperator exercitum, & gubernator navigantes decipit absque malo. At, inquis, vox decipiendi ingreditur definitionem doli mali, qua ratione ergo sine malo? Audi Titum Lucretium, qui lib. I. de Rer. nat. ita deceptos non capi, te docebit:*

*Sed veluti pueris absinthia tetra medentes
Cum dare conantur, prius oras pocula circum
Contingunt mellis dulci flavoque liquore,
Ut puerorum ætas improvida ludificetur,*

Labro.

*Labrorum tensus : interea perpotet amarum
Absinthii lasicem , deceptaque non capiat ,
Sed potius tali facto recreata valescat.*

Andronicus Rhodius de Medico mentiente idem affirmat :
Decipit quidem at deceptor non est : nec enim propositum sibi ha-
bet decipere , sed servare ægrotum. Salus ægri suprema Medi-
corum debet lex esse, & quacunque ratione eam præstant
boni & æqui consulendum est. Modos hujus doli boni va-
rios adduxit Franciscus Valleriola *Enarrat Med. lib. VI.*
enarrat. 6. Gabrielis quoque Naudæi ea de re scriptum olim
me vidisse puto. Hoc loco unicum adhuc exemplum attu-
lisse sufficiat, & verbis Horatii quidem pulcherrimis *l. II.*
Sat. 3. 142.

*Pauper Optimus argenti positi intus & auri,
Qui Vejensanum festis potare diebus
Campana solitus trulla , vappamque profestis,
Quondam leibargo grandi est oppressus , ut heres
Jam circum loculos & claves lætus ovanisque
Curreret : hunc medicus multum celer atque fidelis
Excitat hoc pacto ; mensam poni jubet , atque
Effundi saccos nummorum , accedere plures
Ad numerandum : hominem sic erigit , addit & illud ;
Ni tua custodis , avidus jam hæc auferet heres.
Op. Men' vivo ? M. Ut vivas igitur vigila : hoc age.
Op. Quid vis ?*

§. XXX.

Sequitur ut fictas Poetarum fabulas, & *portentosa*, ut Pli-
nius vocat, *mendacia* videamus. Magna sapientiæ vis aliquan-
do iis inclusa est ; adeo ut corticibus fractis humanum ge-
nus nucleum inveniat, & quod ei ex usu sit, per ludum &
jocum deprehendat. Nullam poësin sine fictione esse, So-
crates jam olim apud Platonem vidit. Dii Deæque falsa lo-
quentes, apud Poetas in scenam producuntur. Virgilio &
fandi fictor *Ulysses*, & *Æneas* spem vultu simulans probatur.
Horatius *Hypermetestram* splendide mendacem vocat, & Ovi-
dius

dus *piam fraudem* criminis suspicione absolvit, l. IX. Metam. Idem alibi l. III. Eleg.

Exit in immensum secunda licentia vatum,

Obligat historica nec sua verba fide.

Petronius, omnium elegantiarum Arbiter, rem gestam verbis comprehendendam non esse docuit; id enim longe melius Historici faciunt; sed per ambages, ait, Deorumque ministeria, & fabulosum sententiarum tormentum, spiritum liberum præcipitandum esse, ut potius furentis animi vaticinatio appareat, quam religiosæ orationis sub testibus fides. Plautus in Pseudolo:

Sed quasi poeta fabulas cum cepit sibi.

Quærit, quod nusquam est gentium, reperit tamen,

Facit illud verosimile, quod mendacium est.

Inprimis autem Poetæ, & Græci & Latini, Theologorum partibus fungebantur, & sub amœnis fabularum involucris omnem de Diis historiam occultabant. Intuentes item hominis ingenium, cognitionis pariter ac novitatis avidum, rudes hoc pacto inescarunt, ac monstris fabularum discendi illecebras proposuerunt; quia solida & amara virtutis dogmata a vitiosis spernebantur.

Aut prodesse volunt, aut delectare Poetæ.

Neque aurium voluptati tantum student, sed ingentes sapientiæ thesauros, præcepta puto morum, & civilis doctrinæ sub commentitiis fabellis tegunt, ut hoc Scriptorum genus plus profuerit generi humano, quam sexcenti Zenones aut Chryssippi. Nec enim, ut Phædrus ait, aliud quicquam per fabellas quæritur, quam ut corrigatur error mortaliū, acuatque se diligens industria. Vehementer tamen falsidicos vates jam olim impugnavit Dionysius Halicarnassensis; Arnobius prolixè adversus eorum fabulas disputavit; Ausonius, quod humanis vitiis Deos assimilant, & multa absurda de divinis tradunt, eos reprehendit. Sed Philosophi larvam detrahentes, narrationes omnes veras non esse ostendebant; unde Sallustius c. 3. Philosophos fabulis usos esse, ait, &

& Philosophi esse inquirere, cur fabulæ sint? Immo ple-
ræque figuræ potius & simulacra veritatis, quam menda-
cium erant, a quo eos fusc Plutarchus absolvit, libello de
aud. Poëtis & ipse Augustinus l. 2. quæst. Evangel. c. f. *Non
omne quod fingimus mendacium est, sed quando id fingimus, quod
nihil significat, tunc est mendacium. Cum autem fictio nostra
refertur ad aliquam significationem, non est mendacium, sed ali-
qua figura veritatis. Alioquin omnia, quæ a sapientibus & san-
ctis viris, vel etiam ab ipso Domino figurate dicta sunt, men-
dacia deputabantur; quia secundum usitatum intellectum non sub-
sistit veritas in talibus dictis.*

§. XXI.

Agmen claudant Oratorum, Historicorum, & quorum-
vis Doctorum apologi, parabolæ, orationes, & hyperbo-
læ, quibus non semper violatur commercium sermonis;
cum auditores vel lectores ex negotii natura fictionis igna-
ri esse non possint. Cicero judicis esse, ajebat, semper in
causis verum sequi, patroni nonnunquam verisimile, etsi
minus sit verum, defendere; multa & misericorditer &
honeste dici posse, pro salute calamitosi. Sic ipse egit, &
falsus est, orationem pro Muræna, apud imperitos tum di-
ctam, aliquid etiam coronæ datum fuisse, lib. IV. de Finib. c.
24. Rotunde Castrucius, artis rhetoricæ princeps, apud
Gellium lib. I. c. 6. *Aliter, inquit, Censor loqui debet, aliter
rhetor. Rhetori concessum est sententiis uti falsis, audacibus
subdolis, captiosis, si modo verisimiles sunt, & possunt ad moven-
dos homines qualicunque astu irrepere.* Hinc Plato in Gorgia,
cumque imitatus Basilii, Rhetoricen artem mentiendi voca-
vit. Nullum tamen in apologis mendacii crimen: idem
enim illis, qui fabulis scopus est propositus, ut homines
qui directo objurgari nolunt, quasi per alienum latus pun-
gantur. In sacris vetustissimus apologus est, quo Joathan
utitur, ad reprehendendos Sichemitas Jud. IX. 7. in profa-
nis Hesiodi Op. & dier. v. 203. Post Archilochus, Demosthe-
nes & alii usurparunt; sed principem in hoc genere locum

Bbbb

ob-

obtinuit Æsopus Phryx, Cræsi Lydorum Regis tempore celeberrimus fabularum fictor, qui frequenter animantibus rationis expertibus, aut arboribus, fandi discerendique facultatem fecit; quo homines earum exemplis cautiores facti, nil admitterent, cujus eos postea poeniteret. Magnificum fabulis his elogium suspendit Philostratus de vita Apollonii *l. V. c. 14.* Gellius *II Noct. Att. c. pen.* Phædrus & alii passim. Notus item est Menenii Agrippæ apologus, de membris humanis adversus stomachum conspirantibus, cujus narratione plebem Romanam ex Aventino in Urbem reduxit; ad quem etiam bis sanctus Apostolus in epistolis suis alludere videtur. Ab Apologis differunt Parabolæ, quod hæc ab eo, quod fieri potest & solet, desumuntur; talis est Prophetæ Nathanis *2 Reg. XII.* & quas protulit Assertor noster in Evangelio, more tum temporis, in familiaribus etiam colloquiis, usitato Palæstinis, auctore Hieronymo in *Matth. XVIII.* Ipse Christus *Aperiam, ait, in parabolis os meum, & in enigmate antiqua loquar.* Grotius historiolas illas comparativas & similitudines *fabulas & fabellas* nominavit *l. 2. de J. B. & P. c. 20. § 48.* acriter eo nomine passim reprehensus; sed plura sunt quibus defendi possit, quam Erasmus, qui in catechismo suo historiam redempti generis humani *salutiferam fabulam* appellavit. Senecæ judicium sperni non debet, epist. 59. *Illi qui simpliciter & demonstrandæ rei causa loquebantur, parabolis referti sunt: quas existimo necessarias, non ex eadem causa, qua Poëtis, sed ut imbecillitatis nostræ adminicula sint, & ut discitem & audientem in rem præsentem deducant.* Ad finem properat calamus; de Historicis tamen verbo dicam. Prima eorum lex est, nihil falsi dicere, altera, verum non tacere: multi vero fabulas inferuerunt, ad captandum & illiciendum lectorem, ut Herodotus & Theopompus. Alii in orationibus, quas fingunt, & panegyricis multum favori, aut odio suo indulserunt, ut Livius, Dio & Florus. Alii rursus a vero mendacio non refugerunt, ut patriæ prodesse. Sic Fabius Pictor pro

Ro-

Romanis, Philenius, pro Carthaginienſibus ſuis falſa ſcripſerunt. Jovii penna venalis fuit: Varillaſio fluxa fides: Aretinus a Carolo V. Francisco I. & Solimanno ſimul muneribus cultus eſt. Solus Grotius de hoſte ſuo Mauritio ſine livore ſcripſit. De Calvino, Luthero & Hildebrando lætiſſima ſeges diſcrepantium narrationum; multa de hyperbolicis, quæ & Oratoribus & Hiſtoricis frequentes, adjici poſſent: veritati eas opponit Cicero *l. V. ad Att. c. 21.* & mendacio ſic ad verum veniri ait Seneca *lib. VII. de benef. c. 23.* Sed ohe! jam ſatis exemplorum eſt, imo forte nimis. Tu nunc, Benevole Lector, judex ſedeto, num Veteres *Dolum* aliquem bonum eſſe dixerint vere, & an recte is a me fuerit deſenſus & explicatus. Ego mihi ſic blandior, humano more. Si quid vero ſacris literis, aut bonis moribus contrarium dixi, id dictum non eſto. Nullus me promptius monebit errantem, quam ego monentem ſequar. Nam adhuc

Illud in his rebus vereor, ne forte rearis,

Impia te rationis inire elementa, viamque

Ingreſſi ſcleris.

F I N I S.



Bbbb z

EVE,



EVERARDI OTTONIS.

ORATIO INAUGURALIS,

D E

STOICA VETERUM JURIS-
CONSULTORUM PHILOSOPHIA,

Dicta Solenniter.

a. d. xiv. Kal. Novembr: M D CC XIV.

*Quum ordinariam juris Professionem, in Regia
Duisburgensi Academia, auspicaretur.*

Cicero iv. Tusc. Quæst. c. 24.

*Licet infestemur Stoicos, ut Carneades solebat, metuo
ne soli Philosophi sint.*



Uod bene vertat Deus Optimus Maximus, quod-
que celeberrimæ huic Academiæ, Vobis, mihi,
reique tum publicæ, tum litterariæ salutare sit!
lætus juxta ac tremebundus in cathedram hanc,
virtutis & honoris sedem, adscendi, Juris docendi provin-
ciam,

ciam, Regiis codicillis clementissime mihi demandatam, suscepturus. Non enim me fugit, quot quantæque sint causæ, cur gaudio exultem, mihiq; gratuler; qui eadem hac die, quin eadem hora, qua Jurisconsulti nomen & insignia sum adeptus, in Amplissimum Professorum Ordinem adsciscor, munusque obtineo lautum ac honorificum, quod nec viri ætate, ingenio & rerum experimentis longe me vincentes fprevissent. Verecundans tamen in conspectum vestrum prodeco; vocem faucibus hæere, membra trepidare, nervos rigere, & auditis & cernitis. Num Templi hujus majestas mentem ita perturbet, an rei novitas, an vero tenuitatis meæ conscientia artus hoc frigore concutiat, id equidem nunc non disquiro; & si vel maxime id definire possem, frustra nunc damnum consilium, quod mutare non libet, nec licet. Inertis subjecti erat Regem vocantem non sequi; vir fortis & strenuus haud existit, qui laborem fugit, & luctatur cum officio, quod semel suscepit; quum animus crescat ipsa rerum difficultate. Illud in præsens magis curæ mihi habendum esse sentio, ut argumentum auribus vestris proponam, quod personæ, quam capeſſo, sit aptum, quodque sua dignitate meam verborum inopiam compenset. Miles castra aut prælia loquitur; rus & sementem cogitat agricola: Jurisprudentiæ fundus est, quem jam decennium, & quod excurrit, colui; ex hoc frugum quidam manipulus recens mihi depromendus est, nisi de spe ac qualicunque opinione vestra, statim sub initium, malo omine periclitari velim. Superiorum autem sæculorum ea jam fuit felicitas, ut, exuta barbarie & melioribus litteris, velut postliminio, restitutis, nubes, quæ Jurisprudentiam obscurabant, pulsæ sint omnes, tritaque satis via in secretiora ejus mysteria eatur. Sordet nunc plerisque fecunda & perbeata Accursii familia; retusum est Baldi acumen, & Decii subtilitas, pariter ac Butrigarii matura oratio ridetur. Ipsa hæc Academia, quæ masculæ semper Jurisprudentiæ fuit sacrarium, sedula illa legum mater & nutrix; hic ipse, quem occupavi, suggestus

nil nisi ingenio perfectum, elaboratum industria, & gravitate insigne admittere videntur. Tot artis nostræ Proceres, eloquentiæ non minus, quam Juris consultos, Weyerstrassios, Fuchsius, Feltmannos, Mastrichtios, Crusios, Langenbergios, Brandtios, Pagenstecheros, Tillios, Reinoldos, ex his sacratis pulpitis verba ad Vos facientes audivistis: a quorum varia eruditione quo longius absum, eo magis mihi annitendum duco, ne mea infantia & incondito sermone pulcher hujus loci Genius profanetur.

Quid igitur? Ne diu Vos suspensos detineam, *De Stoica Veterum Jurisconsultorum Philosophia* sermonis mei argumentum elegi: non injucundum, opinor, nec inutile, nec satis adhuc, ut oportebat, pertractatum. Quis enim Vestrum summa cum voluptate non aveat percipere, cui Philosophorum sectæ Juris nostri Auctores fuerint addicti; qui suis laboribus, vigiliis & curis sibi perennem gloriam, nobis otium, & quietem pepererunt? Juvat nosse, quibus præceptoribus usi fuerint Historici & Poetæ; & quanti nostra interest scire, ad quam potissimum scholam ingenium appulerint Jurisconsulti, quorum pretiosa fragmenta non nostræ modo Germaniæ, sed totius terrarum orbis oracula habentur. Nullus in horum explicatione, jam usque ab Alciato & Budæo, cum laude est versatus, qui non ab Historia & Antiquitatibus, qua Græcis qua Latinis, lucem iverit mutuatum; & in amœno hoc studiorum genere nostra ætate excellit non unus. Ea vero fundi nostri ab antiquo superest calamitas, quod in scholis negligitur Philosophia, saltem illa, qua Veteres Jurisconsulti usi sunt, sine cujus tamen peritia jus civile nec disci, nec recte doceri potest. Jubeat Comicus^a nos in vitas hominum, tanquam in speculum, inspicere, & ex aliis nobis exemplum sumere, si quid recte factum, si quid laudi fuit, hoc imitari. Hinc autem Themidis alumni discent, veteres affectari magistros, quibus nihil unquam in vita carius fuit, quam Philosophia moralis; quæ

^a *Adelpb. Act. III. sc. 4.*

que non a legibus Decemviralibus, nec ab Edicto Prætoris, sed ab intima Philosophia inchoandam esse Juris disciplinam putarunt. Habebunt hic etiam Juris Studiosi adulescentiores, Prolytæ & Papinianistæ, unde veros legum sensus eruant, & tot cruces tollant, ab ignavis priscæ sapientiæ collocatas. Quid? quod ipsi Philosophiæ Doctores, lucifugi & versipertiliones, sic tandem sapere incipient, qui desidiosa nunc facilitate, & fallaci lenocinio, veteres Philosophos e manibus juvenum excussos volunt; ut novas suas merces, metaphysicas puta nugas, & luxuriantis ingenii argutias majori pretio venditare queant. Adeo enim a recta via institutio nunc aberravit, ut, si Lucianus revivisceret, non uno, sed multis Hermetimis opus foret. Novas quilibet sibi condit artes; antiquas, quo quis est indoctior, eo magis contemnit; ut, si Diis placet, eas suppressere, & licentiæ suæ velamina ex vaga Philosophia prætereundum possit. In Platone legendo, quod impenditur, tempus falli frustra que conteri putamus: Stoicorum secta omnium suffragiis, tanquam morosa, aspera & austera, est damnata: quin Zenonem, Chrysippum & Posidonium, piscis aut edulii peregrini nomina arbitramur. Uni tantum Stagiritæ, qui Sapientum numero inter nos habentur, adhærescunt, & ex ejus Ethicorum libris Jurisconsultorum sententias explicare satagunt. Quam contortæ autem inde nascantur interpretationes, quot loca tranquilla & perspicua inde turbentur, vetus querela est; & tamen studium istud ita omnium animis inhæsit, & tam altas in Scholis radices egit, ut qui illud mentibus & pulpitis eximere tentarit, is vel Jovi fulmen, vel Herculi clavam extorquere conaretur.

Reditivæ autem Jurisprudentiæ parens, Jacobus Cujacius, jam dudum, in divinis Observationum libris, * plus uno testimonio docuit, a Stoicis juris Auctores nostros fere imbutos esse: pluribus id confirmavit Emundus Merillius,

* *Lib. XXVI. cap. 40.*

lius, Galliae itidem suae decus.^a & M. Aurelius Galvanus^b librum singularem, de Stoica Jurisprudencia veterum Romanorum affectum habuit; qui vel ob immaturam ejus mortem absolutus non est, aut certe cum tincis & blattis luctatur. Tantum vero abest, ut praeclarum hoc inventum multos sui invenerit aestimatores, uti potius a Viris, etiam hilarioris famae, fuerit neglectum, multoque cachinno exceptum. Hos inter familiam ducens Paganinus Gaudentius,^c Pisis quondam Historiam & Politices Professor celeberrimus, eos peccare clamat, qui Jurisprudentes ad Stoicam doctrinam confluisse, ejusque decretis praecipue aluisse artem suam contendunt: quandoquidem multa in Zenonis Stoa proferantur, quae leges evertunt, civilis adhuc & forensis vita longe majorem habeat cum Aristotelica & Platonica Philosophia affinitatem, quam cum Zenonis schola. Huic igitur, quantum ingenio & voce potero, tribus argumentis occurrere animus est; ita quidem, ut primo loco primos quosque, & maxime celebres Romae Philosophos, e Porticu prodiiisse ostendam: dein non aliam magis, quam Stoicam disciplinam, Jurisconsultorum studiis fuisse accommodatam; & postremo plerorumque horum responsa Stoicae familiae placitis respondere.

Per tria haec Orationis capita dum ordine festinabundus eo, ne quaeso, Auditores, mellitos verborum globulos, aut verba sesamo & papavere sparsa a me expectetis. Stoicorum dogmata vobis expositurus sum; hi autem simplici stilo contenti, verborum pompam troporumque venustatem, tanquam damnosam & generi humano noxiam, aspernabantur. Moribus etiam nunc obtinet, ut a Jurisconsultis

^a Lib. I. *Observat. cap. 8. §. seq.*

^b Vide ejus librum de *Usufr. cap. 1. §. 1.*

^c De *Philosophia apud Romanos cap. 43.* In addendis autem c. 13. fatetur, Stoicos, de honestate agentes, multum ad Jurisprudentiam conferre potuisse. Nos hac Oratione Ictos Stoicis praecipue addictos fuisse probabimus: altera autem, de vera non simulata *Ictorum Philosophia*, quibus in partibus magistratos suos deferuerint, ostendemus.

ris eloquentiæ lumina non admodum flagitemus, modo res bonas proferant ac cognitu dignas. Quare vehementer Vos oro, ut mentes atque aures placidas præbeatis, dum meas vobis rationes exposuero.

Qui ad urbem vel portum contendunt peregrinantes non una via, nec una ratione, iter instituere solent. Alii navibus proficiscuntur, per regiones & agros iter faciunt alii: illi vel oram legunt, vel per altum vehuntur: hi aut publicis utuntur viis, aut calles & viarum compendia quærunt: rursum alii per florida prata & oras amœnas, alii per dura & aspera, multo cum labore & molestia, incedunt. Sic etiam ad Sapientiæ arcem, qui adspirarunt, Græci & Romani, non unum vitæ genus, nec unam disciplinam tenuere. Una quidem est Philosophia, una veritas: sed ambitio, quæstus & naturalis illa hominum ad dissentiendum facilitas in tot factiones, studia & opiniones diversas ejus cultores divisit, ut inter horologia facilius, quam inter Philosophos semper convenerit, & verissimum sit, quod ille ait: Nihil unquam ægrum somniasse, quod non Sophorum aliquis crediderit, aut docuerit alios. Marcus Terentius Varro, * subili investigatione, jam sua ætate animadvertit, ad ducentas octo & octoginta sectas facillime perveniri posse Hippobotus in libro de sectis novem numeravit, Ammonius septem. Quatuor autem imprimis Academica, Peripatetica, Stoica & Epicurea ab antiquo fuerunt celebratæ, quæ in suis sapientiæ officinis mentes hominum ad propria decreta, sive singularum dogmata scholarum contraxerunt. Ad harum auctores & principes omnis sensim potestas doctrinarum delata est, nec tam rectæ rationi, quam interpretandæ, colorandæ, sæpe etiam convitiis vindicandæ cujusque Doctorum sententiæ fuit incubatum. Cum itaque de Philosophia Jurisconsultorum apud Romanos quærimus, ante omnia sectam, quæ primum in Urbe caput extulit, quæ plurimum ibi valuit,

C c c

quæ-

* Apud Augustinum lib. IX. de Civ. Dei cap. 1.

quæque formæ & genio Reipublicæ fuit convenientior, investigemus oportet.

Nemo Vestrum nescit, militarem fuisse Remp. Romanam, cui ab ipsis incunabulis, nil mage in votis, quam fines Urbis propagare, vicinos, remotos, hostes atque amicos bello laceßere, & per totum terrarum orbem victricia arma circumferre. Sero hacpropter, & non nisi per gradus, Philosophiæ cultus ad eam est admissus. Plane sub Regibus hunc qui quæsierit, is frustra erit. Romulus quidem & Remus omni liberali disciplina Gabiis erant instituti: Numa Pompilius sapientiæ laude claruit: Servius Tullius quinquaginta de contractibus & delictis rogavit leges, e Philosophiæ fontibus petitas. At apud populum nullus studiis, nullus otio Philosophico erat locus: rustici, pastores, perditæ ac facinorosi ad Asylum confugientes, quemadmodum inter arma & ferrum erant nati, sic ad subita belli externi & intestini excubabant. Tarquinio Superbo regnante, Pythagoræ disciplina per eam Italiæ partem, quæ Græcia Magna dicta est, excelluit & haud vana conjectura in Urbem vicinam penetravit: verum Patricius dum opprimit plebem, dum plebs secedit, & sacrosanctos sibi Magistratus creat, dum fames & pestilentia grassantur, amplissima hæc bene vivendi disciplina actis radicibus hæere non potuit. Mars & horrida virtus omnia obtinebant. Trecentesimo dein post Urbem conditam anno Decemvrales leges, auctore Hermodoro Philosopho, de lare Solonis, Lycurgi & præstantissimorum quorumvis Sapientum petitiæ, & in tabulis eboreis pro Rostris propositæ sunt, quæ propter suam æquitatem & auctoritatis pondus, non universam modo sapientiam continere, sed omnium Philosophorum bibliothecas superare videbantur. Neque tamen per has Philosophiæ simul præcepta innotuerunt Romanis: fontes acceperunt & semina omnis publici & privati juris: at usum illius & rationem, qua quisque jus suum persequeretur, ignorabant. Livius & Dionysius tabernas tantum hac ætate memorant, in

in quibus Grammatistæ legere & scribere, non ultra docuerunt. Viderat Urbs jam ante, fateor, multos cives gloria præstantes, quos e numero Philosophorum expungere nefas: at vita illi non scriptis, factis non dictis, moribus non sermonibus fuit philosophati. Justitiam, fidem, pietatem & omnem denique virtutem coluerunt Horatii, Scævola: Cincinnati, Camilli, Curii & Fabricii; jacuit tamen Philosophia, nec ullum habuit lumen litterarum. ^a

Tempori, quod est circa bellum Punicum secundum, felicitas illa tribuenda, qua lux totum mox illustratura orbem Romæ exorta est. Discedebant tum paullatim Quirites ab asperitate vitæ militaris, atque ideo sapientiæ studia, apud Græcos, vel propter bellorum tumultus repudiata & contempta, vel senio ipsa suo confecta, suscipiebant, colebant & faciebant meliora. Livius poeta primus tunc fabulam docere incipiebat: Ennius centurio in utraque lingua erat evectus: Nævius nunc fundebat versus: nunc etiam primi Philosophi videbantur. Occasio erat isthæc: Miserant Athenienses ad Senatum, de suis maximis rebus, tres illius ætatis nobilissimos Philosophos, Carneadem Academicum, Critolaum Peripateticum & Diogenem Stoicum: qui, cum in scholis ab se excitatis de finibus boni & mali disputarent, facile adolescentes gravitate sua, & rerum utilissimarum doctrina, ad se alliciebant. ^b Cato Censorius, vehementi ingenio vir, & Græcæ disciplinæ osor, præter morem legatorum id factum notans, tum quidem statuebat, honestatis specie universos Philosophos Roma dimittendos esse; ut ne ad humanitatem conversa juvenus parvi penderet rei militaris disciplinam: sed revera metuebat, ne horum eloquentia liberisque vocibus arcana sua provulgarentur. ^c Neque

Cccc 2

etiam

^a Cicero lib. I. *Tuscul. Quæst. cap. 3.* & lib. IV. *Tusc. cap. 2.* ubi *Sapientiæ, inquit, studium vetus idquidem in nostris: sed tamen ante Lælii ætatem & Scipionis non reperio, quos appellare possim nominatim.*

^b Cicero II. *de Oratore cap. 37.*

^c Plutarch. *ejus vita cap. 45.*

etiam horrendi hæc carminis lex sapientiæ amorem in animis juvenum extinguere valuit, immo potius novitatis avidos ad peregrina isthæc, & moribus apta, & auditu miranda incendit. Ut adolescentum quisque erat nobilior, ita eruditorem e Græcia hominem palam secum habebat.

Omniū autem consensu Panætius, Stoicorum princeps, ^a primus fuit, qui Romæ publice Philosophiam docuit. Hic, quia omnem verborum tristitiam & asperitatem fugiebat, nec disserendi spinas probabat, multos auditores nactus est, C. Lælium, Scipionem Africanum, Rutilium Rufum, Ælium Tuberonem, ^b principes tum juventutis, sed postea magnos Imperatores, magnos Jurisconsultos, domi militiæque nobilitatos. Quanta dein Stoicæ Philosophiæ ab horum sententiis auctoritas accesserit, illi facile colligent, qui in Procerum voluntate scenam reip. cum orchestra, cum ordinibus, cum cæva cuneisque versari sciunt. Quotusquisque ab hoc tempore eminere volebat, is Stoicum sibi quærebat præceptorem, comitem & familiarem: quin etiam domi ex hac secta magistros habuisse non contenti, quo magis firmentur, ad alias terras, ad alias regiones & insulas sese contulere multi, etiam viri maximi, rempublicam sustinentes; ut hic novum Pythagoram Memphiticos vates, ibi Platonem Ægyptios sacerdotes, rursus Apollonium Brachmanas & Gymnosophistas consuluisse putes. Cneus Pompejus, unus ex præcipuis sui avi viris, ille, quem Sylla Magnum, Cicero Virum ad omnia summa natum appellavit, ut Panætii discipulum Posidonium videret, Rhodum profectus est, cumque ad limina accessisset, percuti de more fores a lictore vetuit;

^a Sic eum Cicero vocat lib. IV. Acad. Quæst. cap. 33. *Panætius princeps prope meo quidem iudicio Stoicorum.* & lib. II. de Off. cap. 14. *Quod scribere non auderem, nisi idem placeret gravissimo Stoicorum Panætio.*

^b Pompon. l. 2. §. 40. de Orig. jur. *Quintus Tubero ille Stoicus, Panætii auditor.* ita enim legendum esse, non *Pansa*, H. Cagnolius & alii jam monuerunt.

vetuit, & fasces januæ submisit, is cui se Oriens & Occidens submiterat. ^a Pompejo major, Cato Uticensis similiter ad Athenodorum, Stoicæ disciplinæ hominem, in Asiam adiit, effecitque ut se in castra sequeretur; lætus atque gloriabundus, velut ingentem adeptus palmam, & multo clariorem, quam illi, quicum universi orbis nationes & reges subigebant. ^b Singulos quid referam, sub libera republica, in Zenonis familiam transcriptos? Ipsius Senatus tantus in eam fuit affectus, ut Cleanthi, majorum gentium Stoico, egregiam Aſti statuam dedicavit, quam se vidisse testatur Simplicius. ^c Et quid multis opus? Seneca ^d signanter Lucilium suum meminisse jubet, antiquos Romanos, qui cuique hominum Genium dedere, Stoicos fuisse.

Ex quo sub unius dominatum rerum summa pervenit, idem, si non major, Stoicis constitit honos. Julianus ^e & Zosimus ^f testantur mitius Augusti imperium fuisse, quod ab Athenodoro erat institutus, quodque Arium inter amicos assumserat; uterque autem Stoicam disciplinam amplectebatur. Nero Seneca rectore usus est, ^g & optimus fuit, quamdiu hujus consiliis monitisque se dedit: is vero Attalum Stoicum & Sotionem ejusdem sectæ, magistros suos laudat nominatim. Marcus denique Antoninus, ne ceteros requiram, ob Stoicæ Philosophiæ studium, ab aliis Philosophi, a Justiniano ^h Philosophissimi cognomen meruit, & quam semper in ore habuit, Platonis sententiam: Tum demum beatas fore respublicas, cum aut Philosophi regnarent,

Cccc 3

rent,

^a Tull. II. Tuscul. 25. Strabo lib. XI. pag. 492.

^b Plinius lib. VII. Hist. Nat. c. 30.

^c Comment. ult. in Epictetum.

^d Epist. 110. Ita tamen hoc seponas volo, ut memineras majores nostros, qui crediderunt hoc, Stoicos fuisse.

^e In Caesaribus pag. 326.

^f Lib. I. cap. 6.

^g Tacit. lib. XIII. Annal. cap. 2.

^h L. ult. C. de Repud. l. pen. C. de His quibus ut ind. Nov. 22. c. 19.

rent, aut reges philosopharentur, suo exemplo confirmavit. Quod si ergo nil magis humana pectora flectit, quam exempla regentum, quis dubitet, omnes aut plerosque, qui sub his Principibus Philosophiæ operam dederunt, per Zenonis & Chrysippi vestigia ivisse? Sub Antonino certe Sextus Empiricus^a asserit, plures fuisse, qui Stoicam sectam sequerentur, quam aliam quamcunque. De ceteris idem habendum. Lautis enim stipendius inde ab Augusto honorabantur sapientiæ magistri; unde novæ in Urbe exsurgebant porticus; e quibus viri justissimi, optimi eives, iudices æquissimi, testes religiosissimi, verbo dicam, tot Catones prodibant. Ex his nobilitas magistratus, plebs patronos, pietas vindices, lex custodes sibi poposcit & rogavit. Hi in foro, in aula, in Senatu ubique primas obtinebant. Per singulas ætates hos indicare possem, nisi fabulam narrarem omnibus notam & pervulgatam: Historici, Poëtæ, marmora & omnis vetustas eos loquuntur. Nec est ut tantum numerum a nobis quis deponat: plerique Romanorum a Græcis disciplinis abhorrebant, & vel ad studia rei militaris conversi, vel in petendis honoribus & civibus prensandis occupati, philosophandi curam libertis & Græculis esurientibus cum irrisione relinquebant.^b

At non fato quodam, sed certa ratione Stoicos magis placuisse Romuli nepotibus, ut constet, age, oculo fugitivo illorum perlustremus decreta. Næ! quam sancta illa, quam recta, quam fortia: dixeris nonnunquam hos homines sacras litteras attigisse, aut degustasse.^c Tam enixe pie-

^a Lib. I. de Philos.

^b Tacitus in vita Agricolæ cap. IV. *Memoria teneo, solitum ipsum narrare, se in prima juvenia studium philosophiæ ac juris, ultra quam concessum Romano ac Senatori hancisse: ni prudentia matris incensum ac flagrantem animum coercuisset.* Pers. Sat. III.

Quod sapio, satis est mihi: non ego curo,

Esse, quod Arcefilas, ærumnosque Solones.

^c Clemens Alexandrinus lib. II. Stromat. eos ideo fures Hebræica veritatis

pietatem ubivis, caritatem, humanitatem, bonitatem & omnes virtutes inculcant: nec alia magis sēcta Deo maiestatem suam adseruit, & homines ad æterna illa traxit magis. Venenum occultant, scio, pulcherrima etiam eorum effata: at quid mirum hoc in hominibus veræ religionis ignaris? Sufficit eos eximia & prope divina virtutis præcepta natura duce dedisse, quæ nobis quoque capitalem culpam & neglectum cogniti summi boni exprobrare possunt. Unum unum immensi hujus operis credebant opificem ac molitorem: hunc solum rerum humanarum curam gerere, suæque providentia singulis ad vitæ commoda adesse. Non auro, nec argento hujus imaginem fingi; pia & recta voluntate, non opimis raiusorum corporibus contrucidatis, hunc esse colendum, ad omnia invocandum, per omnia cogitandum, in omnibus comprobandum. Huic sanctiore quemvis sacramento, quam militem Imperatori, esse obstrictum. Huic, ceu provideo parenti, quocunque ducere visum fuerit, citra tergiversationem esse obsequendum: invadant licet undique calamitates, denunciatur mors, infundatur venenum, corpus excæcetur, debilitetur, obrigescat, & si quid talium malorum gravius edici aut excogitari potest. Id qui fecerit eum securum malique metu immunem vivere, nec fieri posse, ut forte beata excidat unquam. *

Cuivis præterea hominum a natura tributum aiebant, ut se, vitam corpusque tueatur, ac omnia, quæ ad vivendum sunt necessaria, conquirat & paret: ita tamen, ne mentis, partis nobilissimæ, a Jove divulsæ ^b obliviscatur. Hanc vitæ

vitatis vocat, & Hieronymus in *Esaïam* comment. cap. 21. *Stoici*, inquit, *cum nostro dogmate in plerisque concordant.*

^a In compendium hæc decreta misit Thomas Gatakerus in præloquo, ad Antoninum.

^b Ita Marcus lib. V. §. 27. & Epiſtetus *dissert. I. cap. 14.* Seneca animam divini spiritus partem ac veluti scintillam quandam vocat *epist. 92.* nam diffusam per omnia corpora essentiam divinam, in hominibus animi munere fungi credebant. Vide Joh. Franc. Buddeum V.C. *de error. Stoic. Exercit. 1. §. 2.*

vitæ gubernatricem summa ope esse excolendam, quo aratri
 intar, novati ac iterati agri meliores ac grandiores fructus
 proferre queat. Aureum illud, quod e cœlo descendisse
 fertur, paucis satis animadversum, suisque ponderibus ex-
 pensum *ΓΝΩΤΙ ΣΕ ΑΥΤΟΝ*,^a tanquam primum Philosophiæ
 suæ principium, commendabant: quo sane nihil excellen-
 tius, nihil salutarius, nihil ad vitæ rationem accommoda-
 tius excogitari poterat. Qui enim secum habitat, is suo
 se modulo metitur, nec plus promittit de facultatibus suis,
 quam in iis est; idem etiam, dum sentit quanta habeat re-
 rum gerendarum instrumenta, nil nisi magnum quiddam
 & excellens conatur, nec conquiescit unquam, donec di-
 vina & humana cognoscat, ac tenor vitæ per omnia con-
 sonans sibi accedat.

Non minus præclare de officiis erga congeneres sentie-
 bant; mundum hunc omnem ut unam spectantes domum,
 in qua non tantum inter cives, sed & externos & homines
 quosvis, cognatio intercedat. Hanc nasci a prima stirpe &
 satū parentum, serpere dein foras, primum cognationibus,
 post affinitatibus, tum amicitiiis, dein civitatibus, & tan-
 dem complexu totius generis humani; Omnes, uno e semi-
 ne cœlesti ortos, ut fratres & amicos diligendos esse; ser-
 vi liberique sint, ingenui an libertini, justæ libertatis, an
 inter amicos datæ, nil quicquam referre. In commune ge-
 nitum hominem, animal sociale; ut cunctis pro viribus
 benevolum & facilem se exhibeat, naufrago ut porrigat ma-
 nus, viam erranti monstret, cum esuriente panem suum
 dividat, cum sitiente potum. Hæc & alia de officiis erga
 Deum, erga se ipsum, & erga alios docuere Porticenses:
 hæc factis etiam consentaneis signarunt Zeno, Cato, Epi-
 ctetus, Antoninus, aliique.^b

Sed

^a Seneca consolat. ad Marciam cap. XI. *Hoc jubet illa Pythicis ora-
 culis adscripta vox, NOSCE TE.*

^b De Catone ita Lucanus Stoicus *lib. II. vers. 380.*

Sed missis his sanctioribus decretis, alia potius videamus, quæ Romanos rerum dominos ad hanc sectam pertrahere poterant. Illam reipublicæ formam, quæ ex populari dominatu & optimorum potentia est mixta, optimam judicabant Quirites, jurati principatus osores, regiumque nomen odio internecino prosequentes. Neque enim populus ille, dominus regum, victor atque imperator nationum omnium, sub unius hominis dominatum subigi, & effrenem tyranni licentiam ferre volebat; satis memor Servium Tullium leges tulisse, quæis etiam reges obtemperarent. Idem vero Stoicorum erat robur, * nisi quod nimium, & arroganti ratione suffultum. Omnes esse pares, omnes ad regnandum natos. Superba principum limina adorare, fores circumfistere, genua invadere, Dei cognatos minime decere. Salus populi suprema iis lex erat. Reges contra, non impios tantum & truculentos, Cyclopas, Bufirides, Dionysios, Lysandros, Neronas, Caligulas: sed & bonos, patriæ patres, Cyros, Agesilaos, Augustos, Nervas, Trajanos procaci licentia perstringebant. Chrysippus, qui Por-

D d d

ticum

== Hi mores, hæc duri immota Catonis
 Secta fuit, servare modum, finemque tenere,
 Naturamque sequi, patriæque impendere vitam;
 Nec sibi, sed toti genitum se credere mundo.
 Huic epulæ, vicisse famem: magnique penates,
 Submovisse biemem tecto: pretiosæque vestis,
 Hirtam membra super Romani more Quiritis
 Induxisse togam: Venerisque huic maximus usus,
 Progenies; Urbi pater est: Urbique maritus:
 Iustitiæ cultor, rigidi servator honesti:
 In commune bonus: nullosque Catonis in actus
 Subrepsit, partemque tulit sibi nata voluptas.

* Tigellinus apud Tacitum lib. XVI. Ann. c. 22. *Ista secta Tubero-
 nes & Favonius, veteri quoque Reip. ingrata nomina, genuit. Ut im-
 perium evertant, libertatem præferunt: si perverterint, libertatem ipsam
 aggrediuntur.* Suetonius Neron. c. 52. *A Philosophia (Stoica, quam
 Seneca docturus) cum mater avertit: monens, imperaturo contrariam.*

ticum fulcire dicebatur^a, septingenta & quinque volumina scripsit, nulli tamen Regum quidquam dedicavit, quia eorum contemtor erat. Prorsus in eadem sententia Cato: qui solus fecit Reip. partes, cum alii ad Cæsarem, alii ad Pompejum inclinarent. Is rebus jam desperatis gladio sanctum illud pectus perfodere, quam morientem libertatem vivus videre maluit. Jam vero Antistius Labeo, ex eadem schola Philosophus, quanta audacia obstitit Augusto, laudatissimo principi? M. Lepidum, hostem ejus, & tum exultantem, cum in Senatum legisset, interrogatus a Cæsare, an non essent alii digniores? *Suum quemque judicium habere* respondit.^b Cumque Senatui videbatur e Rep. esse, ut Augustum singuli Senatores per ordinem custodirent, ille: Excubito rem se nunquam fuisse, &, quia stertens ronchos duceret, excubiis pro Augusto agendis esse ineptum.^c Inanis quidem tum & intempestiva hæc erat libertatis jactatio, tanto Jurisconsulto indigna; sed moribus istis creverat res Romana, ipseque Augustus, quo magis eadem principia imbiberat, eo clementius omnem iram remittebat. Qui posthinc vixerunt Stoici, calidum illud & impotens libertatis studium prudenti consilio temperarunt, recte persuasi, posse etiam sub malis Principibus magnos esse viros, obsequiumque ac modestiam, si industria ac vigor adsint, eo laudis excedere, quo plerique per abrupta, sed in nullum Rei-

^a Cicero IV. Acad. quæst. 24. *Stoicæ princeps Philosophiæ* vocatur a Gellio lib. VI. cap. 2. & *Philosophus summæ Stoicæ sapientiæ* a Marciano in l. 2. D. de Legibus.

^b Suetonius in Aug. 54.

^c Dio Cassius Hist. Rom. lib. LIV. ad ann. 739. De eodem Capito apud Gellium lib. XIII. cap. 12. *Agitabat*, inquit, *hominem libertas quædam nimia atque vecors, usque eo, ut Divo Augusto, jam principe & rempublicam obtinente, ratum tamen pensumque nihil haberet, nisi quod justum sanctumque esse in Romanis antiquitatibus legisset.* Horatius lib. I. sat. 3. v. 28. ideo:

Labeone insanior inter sanos dicatur.

Reipublicæ usum, ambitiosa morte inclaruerunt.^a

Præterea optime noverant Romani, non muros & propugnacula perinde firma imperii sui munimenta esse, quam multitudinem liberorum.^b Militem sibi legendum domesticum, qui loca sedesque patrias revereatur, nec fortitudinem magis, quam fidem colat. Externis auxiliis credi non posse; coire purgamenta urbium, stupidos, imbelles, venalesque manus; quibus ibi fas, ubi maxima merces. Quamobrem conjugiorum subolisque habendam curam; coelibatum pœnis coercendum, numerum liberorum præmiis esse provocandum. Hinc sollennis illa Censorum quaestio: *Ex animi tui sententia. Tu uxorem habes?* Hinc lex conficta: *Calibes esse prohibento.* Hinc Metelli Numidici oratio^c de prole augenda, quam Augustus Cæsar, quum de maritandis ordinibus ageret, in Senatu recitavit. Nota est lex illa Julia & Papia Poppæa, quæ coelibes & orbos pœnis, maritos & patres præmiis affecit; lex illa inquam maritata, quæ crebritati divortiorum modum, concubinatui nomen imposuit, eosque per Prætorem coercendos statuit, qui nuptias contrahere prohibuerint, aut dotem negaverint; ut his artificiis nuptiarum dies protraheretur. Non alii autem sectæ, tanta matrimoniorum cura, quam quidem nostræ: ab ipsa natura id tributum aiebant, ut conjugia viro-
rum & uxorum conjuncta esse deberent; cum unumquodque animal, ferum etiam, eo desiderio teneatur, quale ipsum est, tale alterum relinquendi.^d

Dddd 2

Ne-

^a Sunt Taciti verba in *Agric. cap. 42.*

^b Vide l. 1. *D. Solut. matr. l. 64. de Condit. & dem. l. 7. §. 3. de Bonis damnat.*

^c Liv. *epit. lib. 59.* Sueton. *Aug. cap. 84.* Gellius *lib. I. cap. 6.*

^d Ad rem Julianus Imp. orat. VI. p. m. 185. *Citiensis Zenonis discipuli cum animadverterent urbes meram illam nimiumque canis, id est Cynice sectæ, libertatem averfari, quibusdam illam integumentis involucrisque texerunt; nimirum rei domesticæ cura, opum comparandarum studio, uxoris contubernio, ac prolis educatione. Quod eo ani-*

Neque vero sola procreatione contenti fuerunt heroes nostri, curam quoque procreatorum parentibus injunxerunt: quin liberis, bene curatis & adultis, bellicæ gloriæ commendabant studium, Macte hac virtute esto! sanguinolentis in acie acclamantes. Ulysssem & Herculem sectæ suæ laudabant patronos ac deos tutelares. Dulce & decorum iis erat pro patria mori: caros esse parentes, caros liberos, propinquos, familiares: sed omnes omnium caritates patriam complecti; pro qua omnibus mortem esse optendam, si ei sint profuturi.^a Præclara hæc coram vulgo fundebant verba, at, si rem curatius examines, cum pia fraude conjuncta. Totus mundus iis patria erat, omnes ubivis gentium cognatos & amicos sibi profitebantur: jam autem, qui fieri potest, ut patriæ commoda, alterius civitatis aut gentis non sint incommoda? qui patriæ fines proferre nititur, alios spoliât, occidat, justitiam & humani generis societatem tollat oportet. Et, dic fodes, adcone pulchrum est pro gleba mori, in qua prima vestigia posuisti, quando alio in solo commode satis vivere licet? ubivis magnam partem peregrinæ multitudinis invenies, & nullum est exilium, in quo non aliquis animi causâ moreretur. Cives vero si patriam vocas, amicis quidem, cognatis & propinquis amor debetur, quod ad ceteros delira interdum patria est, mentisque errore ducitur, ut Plato de sua locutus; interdum crudeliter bacchatur, atque in viscera sua sævit. Sordent illi certe plerumque domestici, hinc lusciniâ in nido non canit. Sed quorsum hæc? Ut patefcat Stoicos viros politicos fuisse, qui aliter in vi-

1a

mo fecisse videntur, ut hoc Philosophiæ genus proxime ad civitatum custodiam pertineret. Adde Ulpianum Stoicum in l. 1. §. 3. D. de J. & J.

^a Cic. III. de off. Stobæus Eclog. 37. Marcellus l. 35. de Relig. & sumt. & Paulus l. postliminium 19. §. 7. de Captiv. & postl. rev. Disciplina, inquit, castrorum antiquior fuit parentibus, quam cura liberorum.

ta civili, quam in scholis philosophantes, militi Romano robur & æs triplex circa pectus, magno cavæ consensu, accommodarunt.^a

Quod si denique animos ad religionem Stoicæ sectæ attendamus, nil erat institutis Romanorum convenientius. Romulus Urbis parens id sancte posteris servandum præceperat, ut Deos patrios patrio more colerent; idem Ennius ille versus indicat, qui ob suam brevitatem & veritatem, tanquam ex oraculo pronunciatus videbatur:

Moribus antiquis stat res Romana virisque.

Unum autem Jovem Urbis & imperii sui credebant statorem, qui tecta, mœnia, vitam, fortunasque suas e rupe Tarpeja tueatur. Fabulari illa Poetarum Theologia, qua Mars homicida, fur Mercurius, Bacchus ebriosus fingitur, ipsis nil infulsus magisque nugatorium visum fuit. Civilem autem cultum, tanquam frænum vulgi, observandum sibi diligenter & retinendum existimarunt. Quid nostri? Unam similiter naturam, unum Deum, unum Δία sive Jovem, qui per materiam, velut mel per favos, decurrat, ubique in scholis suis profitentur.^b Nec tamen religionis ita sunt metuentes, ut cum vulgo Deos Deorumque nomina numero multitudinis appellare vereantur; passim id faciunt, &, si usus erat, nulli majores sacrilegiorum vin-

Dddd 3

dices,

^a Huc refero illud Plutarchi in vita Cleomenis cap. 3. *Magna & vehementia ingenia, si Stoica disciplina imbuantur, prompti ad pericula subeunda & audaces, adeoque temerarii fiunt homines: sin ea sedato & placido ingenio committatur, ejus temperamento quasi dilata, fructus optimos & consentaneos proferunt.*

^b Diogenes Laert. in vita Zenonis lib. VII. cap. 135. cujus verba ex Ambrosii versione, compendii causa, semel tantum appono: *Unum quoque Deum esse, & mentem, & fatum, & Jovem, multisque aliis appellari nominibus.* Seneca IV. de benef. c. 7. *Quæcunque voles nomina propria Deo aptabis.* Pomponius l. 2. de J. & J. *Veluti erga Deum religio.* Ulpianus l. 9. § 3. de R. D. *Sanctum est, etsi Deo non sit consecratum.* quæ & alia loca cur a Triboniano interpolata putemus, cum Wissenbachio *Embl. Trib.* nulla causa subest.

dices, & Deorum assertores. Socrates pro uno numine capitis periculum subierat; hi vero inter parum & nimium medii, populo falsam potius, quam nullam religionem obijciendam crediderunt. Omnem illam, aiebat Seneca, ^aignobilem deorum turbam, quam longo ævo superstitione ingessit, sic adorabimus, ut meminerimus, cultum ejus magis ad morem, quam ad rem pertinere. Ecce talis tamque cata fuit Zenonis disciplina: Vos nunc judices sedete, tacitique expendite, num quæ alia magis Romanorum assensum meruisse potuerit, quam quidem hæc, & sententiarum gravitate & decretorum usu abundans.

At nondum res expedita est: nisi enim litterarum monumenta nos fallunt, quatuor sectis publica lege in imperio Rom. salaria sunt constituta, ^b& omnes in Urbe suos habuisse videntur antistites & patronos. Acriter igitur hi nos inclamant, & grunniunt in primis Epicuri de grege porci, plurimos maximo veterum consensu amicos, etiam Romæ, sibi vindicantes. Pythagoram ibidem aliquo loco habitum, statua ejus in cornibus Comitii indicat. Ennius certe ejus dogmata secutus est, & Appii Claudii carmen, quod Ciceronis tempore extitit, Pythagoricum fuisse videtur. Qui causis orandis se prolaturi, Academiæ spatia amabant; quod mos in utramque partem differendi ad exercitationem forensium causarum proxime accedat. Quos vitæ delectabat libertas Cynicos securi. Aristotelis item & Theophrasti libros

^a In libro, quem contra superstitiones scripsit, auctore Augustino *lib. V. de Civ. Dei cap. 10.*

^b Lucianus Eunuchus: *Scis, Pamphile, salarium, idque neutiquam exiguum, ab Imperatore fuisse constitutum singulis Philosophorum generibus, puta Stoicis, Platonis, Epicureis, præterea Peripateticis, ita ut unicuique sectæ præmium esset æquale.* Huc pertinere videtur quod de Philosophis scribit Modestinus in *l. 6. §. 2. D. de Excus. scriptis tunc προκηρυχται τα νόμιμα: hæreses quadam proposita lege.* Sed conditiones, non sectas intelligendas esse, contra Petium, Grotium, Gronovium & alios evici cap. VI. §. 4. De Ædilibus colon. & municip.

broSylla Roman detulit. Denique quis credat, prudentiores uni sectæ, velut sacramento aut superstitione quadam constrictos, se addidisse? cum extra hæc vincula liberius philosophari, & in omnium castra transire liceret. Speciosa hæc sunt, fateor; sed vadimonium non defero, rationibus certis liquidisque stipatus. Unus & alter licet ad alios deflexerit, Stoica tamen secta ceterarum fuit regina, & plurimos omni tempore sui habuit assertores. Patebit hoc clarius, si mecum per singulas ire placebit: unicuique suum tribuemus singulatim. Aureum, sodes, *Pythagoræ* carmen & mystica ejus disciplina, quo in numero esse potuit apud severos Romanos? Sylla statuam ejus bello Samnitico positam removit; ^a libros hujus Philosophiæ in Cn. Terentii agro inventos combussit Petilius Prætor; ^b & in ipsa denique Italia, quam Magnam Græciam vocabant, Pythagoræorum collegia, jam anno circiter ducentesimo, post reges exactos, incensa fuerunt & extincta. ^c *Academia* nova ignorantia erat magistra, & majorem impudentiam ad facinora subministrabat. Sensibus illa tam externis, quam internis male fidens, oleum a garo, tudiculam a veru, atrum ab albo discerni posse negabat; ^d Unde & vix ultra Augusti ætatem. ^e *Cynicorum* magnus erat proventus, sed major ob affectatam illuviem vilitas: decoris etenim Romanis qui obscena illa, quæ paria, immo pejora belluis, fecerunt Crates, Diogenes, & ejus farinae alii probari potuissent? Pepulissent eos Censores

^a Plin. lib. XXXIV. cap. 6.

^b Idem lib. XIII. cap. 13. At Livius lib. XL. cap. 29. negat Pythagoricos fuisse.

^c Vide Joan. Scheffer. de nat. & constit. Philosoph. Italica cap. 35.

^d Festivo Arrianus ad Epictetum lib. II. cap. 20.

^e Elegans locus Senecæ lib. VII. Nat. Quæst. cap. 32. Itaque tot familie Philosophorum sine successore deficiunt. Academici & veteres & minores nullum antistitem reliquerunt. Quis est, qui tradat præcepta Pyrrhonis? Pythagorica illa invidiose turbe schola præceptorem non invenit. Sextiorum nova & Romani roboris secta, inter initia sua, cum magno impetu cepisset, extincta est.

res, pudoris ac verecundiæ magistri; quin omnis puer, muliercula & e vulgo quisque barbam iis petulanter vellebat.^a *Aristoteles* in disciplinis omne genus tradendis ad miraculum usque eminuit, in *Physicis* etiam & *Dialecticis* *Stoicos* longe post se reliquit; accuratius ubique definit, dividit, meliorique omnia ordine pertractat. Habebant vero ejus libelli sua fata: *Andronicus Rhodius* eos in multa exemplaria transfundi & publicari curaverat; ipsis autem *Philosophis Romanis*, præter admodum paucos, *Ciceronis* tempore erant ignoti: ^b nec multos secutis temporibus habuerunt lectores, fortassis quod obscuras rerum causas obruunt sermonis obscuritate, vel quia blattarum malignitas & hominum ineptorum emendationes æstimationem eorum iverant imminutum. *Electivum* philosophandi genus ceteris quidem præstantius, ^c quia optima quævis ex unaquaque secta eligit, nec tam auctores in disputando, quam rationis momenta quærit: quemadmodum autem folia per se virere non possunt, ramum desiderant, cui inhæcant & ex quo trahant succum; sic plerique sectæ infigi volebant,

^a *Persius sat. I. in fine.*

- - - multum gaudere paratus,

Si Cynico barbam petulans nonaria vellat.

^b Ita ille in *Topicis* ad *Trebatium* cap. 1. *Rhetor autem ille magnus hæc, ut opinor, Aristotelica se ignorare respondit. Quod quidem minime sum admiratus, eum Philosophum Rhetori non esse cognitum, qui ab ipsis Philosophis, præter admodum paucos, ignoretur.*

^c Hoc secuti *Cicero*, *Varro*, *Quintilianus*, *Tacitus*, & *Horatius*, qui nunc *virum rectum* ex *Stoicorum* mente depingit, alibi *Silvas Academicæ* laudat, rursus sese *Epicuri de grege porcum* appellat. *Diserte lib. 1. Epist. 1. vers. 13. de se ipso:*

Ac ne forte roges, quo me duce, quo lare tuter
Nullius addictus jurare in verba magistri,
Quo me cunque rapit tempestas deferor hospes.
Nunc agilis fio, & merfor civilibus undis,
Virtutis veræ custos, rigidusque satelles
Nunc in Aristippi furtim præcepta relabor,
Et mihi res, non me rebus submittere cogor.

bant, præcepta, si sola sunt, marcere putantes. Multa adhuc industria, multo ingenio & judicio opus erat, ut in tanto Porticus, Academix, Lycæi & hortuli dissensu verum ubique a falso discerneretur. Ad Epicuri denique nomen multi advolarunt, patrocinium inertix suæ quærentes: * sed pessimi indicium turba est, nec unquam tam feliciter actum cum genere humano, ut meliora pluribus placerent. Titus Lucretius, C. Cassius, Pomponius Atticus, Vellejus Senator, Virgilius, Petronius, Martialis fuerint ex hac voluptatis officina; ejus profecto decreta reipublicæ videbantur perniciofa, horumque doctores Alcæus & Philiscus, urbe sunt ejecti, tanquam libidinis & inertix patroni. Demus etiam magnos & amoris conspiratione consentientes amicorum greges Romæ tenuisse Epicurum, Jurisconsultos certe a se ipse dimittebat; † qui Remp. gerere negabat esse sapientis, qui contemnebat Dialecticam, dictione utebatur vitiosa, & fugere omnem disciplinam navigatione quam velocissima jubebat. Nolo mihi sine pigrore credatis: attendite diligentius quibus argumentis Tul-

Eccc

Ius

* Laert. lib. X. segm. 9. Cicero IV. Acad. Q. & 1. de Fin. Laetant. lib. III. de falsa sap. cap. 17. Epicuri disciplina multo celebrior semper fuit, quam ceterorum: non quia veri aliquid afferas, sed quia multos popolare nomen voluptatis invitat. Nemo enim non in vitia pronus est. Propterea ut ad se multitudinem contrahat, apposita singulis quibusque moribus loquitur. Desidiosum vasas siteris discere, avarum largiri: ne liberat, ignavum prohibet accedere ad rempublicam.

b Athenæus lib. XII. Deipnos. cap. 12. Alianus lib. IX. cap. 12.

c Unicus Alphenus Epicureos ἀπαι, Philosophos vocare videtur in celebrata illa l. Proponebatur 76 D. de Judicio his verbis: Propterea quod, ut philosophi dicerent, ex quibus particulis minimis consisteremus, hæc quotidie ex nostro corpore decederent, aliæque extrinsecus in eorum locum accederent. Epicuri enim dogma de stomis hic laudari, existimat Dionys. Gothofredus in notis, & Joh. Schilterus Manud. Philos. moral. cap. 1. §. 7. Sed Jacobus Cujacius lib. XXXI. Obs. c. 40. de Heraclitico & Stoicis Alfenum excipiendum docuit, quem eo nomine laudat Menagius in notis ad Laert. lib. X. segm. 66. pag. 463. Dabimus huic legi dissertationem singularem.

lius Trebatio Jurisconsulto hanc sectam dissuadeat : * *Indicavit mihi* (verba sunt Cicconis) *Pansa meus, Epicureum te esse factum.* O castra praelara! quid tu fecisses, si te Tarentum & non Samarobrinam misissem? Jam tum mihi non placebas, cum idem intuebare, quod Titius familiaris meus. Sed quoniam modo jus civile defendes, cum omnia tua causa facias, non civium? Ubi porro eris formula fiducia, Ut inter bonos bene agier oportet? Quis enim est bonus; qui facit nihil, nisi sua causa? Quod jus statues communi dividundo, cum commune nihil possit esse apud eos, qui omnia voluptate sua mediuntur? Quomodo autem tibi placebit, Jovem lapidem jurare, cum scias, Jovem iratum esse nemini posse. Quid porro fiet populo Ulubrano, si tu statueris πολιτευέσθαι non oportere? Hactenus ille. Ex quibus cum satis jam pateat, sectas alias fuisse extinctas, alias pulsas, ignotas alias, & sine nomine, sine censu ac lare publico projectas; superest dicamus, unam unam Stoicorum Philosophiam Romanos didicisse, nec aliam usui Reip. fuisse accommodatorem.

Sed video vos, Auditores, tacitis a me cogitationibus jam dudum expetere, uti propius ad Jurisconsultos nostros accedam, Vobisque rationes aperiam singulares, cur hi Stoicorum disciplinam fuerint secuti: sine his enim vix id, quod proposui, momentum sat firmum & liquidum habebitis. Mihi vero id vel maximum videtur, & quo nullum huic rei demonstrandae adhiberi potest majus. Enimvero disciplinarum illa divortia & limites, quos ubivis nunc inculcant liberalium artium doctores, Romae erant ignoti. Qui sapientiae gloria excellere vellent, omnia, quae civitas nosset, complectebantur; una omnium rerum erat doctrina, unus omnium disciplinarum concentus. Qui Jurisconsultus idem Philosophus; qui Philosophus idem Jurisconsultus. Dicam audacius: fuit tempus, cum apud solos Jurisconsultos in Urbe sapientiae amor resedit: horum domus oracula erant totius civitatis, unde cives & hospites

sua;

* *Lib. VII, ad familiares epist. 12.*

suarum rerum incerti, cauti & consilii compotes dimittebantur. Hinc eadem Jurisprudentiæ, quæ Philosophiæ est definitio; ^a ut Philosophi appellati *sapientes*, sic & Jurisconsulti; ^b & ipsum juris studium ab Ulpiano *civilis sapientia*, ^c a Justiniano *antiqua sapientia* vocatur. ^d Juris itaque studiosi ut Philosophiam, artis suæ tam necessarium, tam carum, tam utile instrumentum discendo caperent, Stoicorum scholas frequentarint oportet; quia non alias in Urbe constitutas inveniebant & apertas. Sed & aliæ licet fuissent, ad has vel ultro eos invitabat mirabilis omnium doctrinarum compositio & ordo; respondebant extrema primis, media utrisque, omnia omnibus, & quod caput est, earum decreta & studia suis rationibus quam maxime conveniebant. Non omnia, quæ hanc in rem dici possunt, proferre animus est: sic enim patientia vestra facile abuti viderer, & res ipsa testimoniorum inter se collationem amat, unde amœni tractatus aliquando materia erit. Dicam tantum illustriora, & summa rerum fastigia, qua id potest fieri brevitate, complectar.

Stoicorum natio regnum tenebat in philosophia morali: cum enim reliquæ sectæ in Physicis fere tantum excellerent, & de motu, quiete, inani, de numeris, motibus, aliisque rerum naturalium principiis, multa acute differerent; hi regulas de vita & moribus tradebant, quibus omnes officio-

Eccc 2

rum

^a Ulpian. l. 10. de J. & J. Strabo initio sui operis: *Divinas humanasque res complectitur, quarum scientia dicitur esse ea, quæ Philosophia appellatur*. Cicero II. de Fin. c. 12. *divinarum humanarumque rerum scientia, quæ potest rite appellari sapientia*.

^b Omnes Philosophi sapientes dicebantur, at Stoicos per excellentiam *sapientia doctores* vocat Tacitus lib. IV. Hist. c. 5. De Jurisconsultis Gellius lib. IV. cap. 1. *Veteris juris magistri, qui Sapientes appellati sunt*. Sic Atilius Sapiens dictus, quia *prudens esse in jure civili putabatur*, Cicero in Lælio cap. 2. *Sempronium populus Romanus eoq̃, id est, sapientem appellavit*. Pompon. l. 2. §. 37. de Orig. jur.

^c L. 1. §. 4. D. de Extr. cognit.

^d L. ult. C. Per quas pers. nob. acq.

rum fontes, ac tota hominum societas continetur. Divinam hanc & nobilissimam artem Socrates primus e cœlo in terram deduxit; unde non hominum tantum consensu, sed & Apollinis oraculo sapientissimus judicatus est. Deinde eam pulcherrima hereditate ad Zenonem delatam, ejus discipuli excoluerunt; indeque Socratici, virtutis rigidæ custodes, medici majores dicti; eorumque secta fortissima, sanctissima, gravissima; rigida & virilis sapientia passim vocatur. Multa & præclara in hoc genere Poëtæ in fabulis, multa Plato & Aristoteles: sed non robore eo & nervis, quibus nostrates. Unum vobis modo proponite Epictetum, hominem servum, mutilum, pauperem; sed cujus scripta nil nisi liberum, rectum & excelsum spirant, & divina parte de vitandis vitiis, de virtutibus sectandis, de modestia, temperantia, prudentia, & omni morum honestate præcipiunt. Quid sit homo, in quem finem a Deo creatus, quis ordo sit rerum, in qua mundi statione sit collocatus, quid quisque cuique debeat, hæc & id genus alia inculcat. Hoc autem studium Jurisconsultis apprimè erat necessarium, ut in hac caligine, densaque velut nebula fallacium imaginum, latentem veritatem eruere possent. Ut scirent quomodo constituendæ sint respublicæ & regendæ; quæ partes Principis, quæ subiecti; quid maritus debeat uxori, quid patri filius, quid domino servus; de justitia denique, de legibus, de præmiis & pœnis quid statuendum sit, sine quibus civitates aut esse, aut bene moratæ esse non possunt.^b Hanc sane qui ex juris disciplina tollunt, illi Solem mihi de rerum natura tollere videntur; hanc si demas nudum & deforme cadaver, immo monstrum foedissimum remanebit. O igitur vitæ Philosophia dux! o virtutis indagatrix ex-

^a Persius Sat. V. vers. 36.

*Me tibi supposui: teneros tu suscipis annos
Socratico, Cornute, finu: tunc fallere sollers
Apposita intortos excludis regula mores.*

^b Horatius de arte poet.

^c Cicero lib. V. Tuscul. Q. cap. 2.

pultrixque vitiorum! quid non modo nos sed omnino vita hominum sine te esse potuisset? Tu urbes peperisti: tu dissipatos homines in societatem vitæ convocasti: tu eos inter se primo domiciliis, deinde conjugiiis, tum litterarum & vocum communione junxisti: tu inventrix legum, tu magistra morum & disciplinæ fuisti: ad te confugiunt principes, magistratus & legislatores: Solon, Pittacus, Minos, Lycurgus, Charondas, Zaleucus æquas tua ope tulerunt leges, sed æquissimas Romani, quia per Stoicorum vestigia inceserunt. Horum libros si cum jure civili conferre placeat, id quod verissimum est, agnoscemus, hanc nostram scientiam ex ea domo profluxisse. In Senecæ scriptis omnis pagina nobis lucem affundit: nec alia causa est, cur Ciceronis libri de Officiis * tam multa tamque elegantia de contractibus, de judiciis bonæ fidei, de dolo in venditione coercendo complectuntur, quam quia ex Panætii aliorumque Stoicorum libris de officiis sunt excerpti. Non ergo ingratis Jurisconsulti ad Stoicorum scholas itabant, cum in eis suam ipsi doctrinam agnoscerent.

Hoc amplius Zenonis familia Jurisconsultis utilis erat & grata, quod inter ratas suas sententias habebat, Rempublicam administrare esse sapientis. ^b Neque enim umbratici erant doctores, ludus eorum non erat otii diversorium, non cucurbitas in eo pingere, velut stipites, docebant: sed de regno, de republica, de legibus, de officio judicis in scholis & scriptis suis differentes erudiebant suos, quo essent meliores cives, judices & magistratus. Epicurei discincti ac dissoluti, in balneo, vel etiam in scortilli gremio moliter recubantes, societatis civilis partem nec noverant ullam, nec nosse volebant. Alii in umbraticis scholarum porticibus inclusi syllogismos retexebant, ac de elenchis philosophabantur: cum vero ad remp. vocati, nil præter sapientem barbam & togam afferebant. At nostri cuique homi-

Eccc 3

num

* Vide lib. III. de Offic. cap. 4.

^b Seneca Epist. XVI. & de Otio sap. cap. 30.

num suum locum datum esse statuebant; alii ut aret, alii ut naviget, huic ut militet, illi ut rempublicam gerat: ipsi etiam vere viri belli pacisque tractabant artes, ibant in forum, honores fascesque capebant; non purpura aureisque virgis addicti, sed ut amicis, propinquis, civibus ingenio & voce magis prodesse. Aultera quidem nimis, morosa ac obscæna plerisque Stoica secta videtur, quam ut publicis moribus conveniret. Intonsum caput, frons rugosa, & barba negligentior a multis, velut proprium hujus familiæ habetur. Credat hoc Judæus Apella, non ego! Germanus Stoicus non abhorrebat a vita communi; ^a non splendebat ei toga, nec sordebat quidem: meliorem vitam agebat, quam vulgus, non contrariam; intus omnia dissimilia, frons populo conveniebat. Nullus illi horror in cultu, nulla tristitia; reveraris occursum, non reformides. Vicia insectatur, non homines, nec castigat errantes, sed emendat. Austri erant, sed illis similes vinis, quæ medicaminis vim habent, ad computationes vero sunt inepta. Gaudebant cum gaudentibus, flebant cum flentibus, & agendæ rei causâ faciebant sapē, quæ non probabant. Vultis exempla? Dabo! Et quem meliorem Scipione Africano? qui ex hac doctrina non austerus, sed lenissimus factus. ^b Quis vero C. Lælio comior, quis jucundior eodem ex studio? Catone quis gravior? Pompejo quis sublimior? Augusto quis sapientior? quis denique clementior Antonino? qui & in theatrum descendit, & spectaculis interfuit; princeps sine exemplo bonus, constans, tranquillus, civibus ita carus, ut mortuum omnes, velut una voce, alii parentem probum, alii bonum im-

^a Viliores animæ cultum ac munditiem corporis neglexere, unde quidam Stoici *pene* Cynici vocantur a Cicerone 1. de Off. c. 35. & Juvenalis Sat. XIII. vl. 121. Stoica dogmata a Cynicis tunica distare ait. Id quod si de omnibus accipias, injuria fiet sectæ verecundæ, quæ sordes hujusmodi, tanquam a natura alienas, averfabatur. Vide Laert. lib. VII. n. 4. Senec. epist. 92. Arrian. lib. IV. c. 11.

^b Cicero pro Marcell. cap. XXXI.

imperatorem; quidam etiam fortissimum ducem appellarent.^a Vestrum nunc erit pronuntiare, an hanc escam appetituri fuerint veteres Jurisconsulti, homines suapte natura ambiciosi, & vitam actuosam publice profitentes. Nefas illis erat pecorum ritu segni otio torpescere; in publicis conventibus, in foro, in tribunalibus tractabant leges, instituta ac mores majorum, ad primas quasque dignitates evecti. Nec de stillicidiis tantum, cloacis, aut glande legenda; sed de omni jure, publico & privato, divino & humano responsa dabant, assidebant magistratibus, hastas patronis subministrabant. Hæc est vera illa, non simulata Philosophia, quam Ulpianus Jurisconsultos affectare, & vere, gloriatur: justitiam namque colunt, & boni ac æqui notitiam profitentur: æquum ab iniquo separantes: licitum ab illicito discernentes: bonos non solum metu poenarum, verum præmiorum quoque exhortatione efficere cupientes.

Satis, nisi fallor, ostendi, utilem & acceptam Jurisconsultis fuisse Stoicorum disciplinam. Quid si addam fuisse necessariam? Immo addo, & totidem quidem rursus argumentis. Primum esto, quod omnis eorum cura in Dialectica consumebatur, adeo ut eam inter virtutes referendam putarent. Peripateticorum opera in hoc genere erat consummatio; sed quæ ab illis erant inventa, nostri elaborarunt, & quibusdam commutatis in usum suum transtulerunt. Zeno arti huic ita fuit deditus, ut cuidam septem species argumenti, quod Metentem appellant, ei indicanti, ducenas drachmas dederit, cum centum mercedis tantum locupostulasset.^b Unus Chrysippus ultra trecentos libros solius Logicæ reliquit, atque adeo clarus in hac fuit, ut plerique existimarent, si apud Deos usus esset Dialecticæ, eam non futurum

^a Herodian. lib. 1. *Histor. cap. 4. §. 20.* Philostrat. in vita Herodis lib. 2. pag. 558. Ο Μαρκερ φερει δημοτικωτης: Marcus natura magis popularis.

^b Laetius lib. VII. num. 181.

futuram aliam, quam Chrysippeam.^a Uterque etiam definitionum & divisionum fuit amantissimus, immo omnes, quotquot habuerunt, discipuli, hanc disciplinam, velut omnium principem, coluerunt; unde *κατ' ἐξοχὴν* Dialectici dicti,^b & plerique alii hoc in studio Stoicorum doctrinam sunt sequuti. In primis autem Jurisconsulti artem ratiocinandi e Porticu suæ disciplinæ adhibendam censuerunt; ut genera dispartiri, rem definire, vera a falsis dijudicare, ambigua primum videre, dein distinguere, tum quid cuique consentaneum sit, quid repugnans animadvertere possent. Hac duce & magistra cum delitueretur adhuc jus civile, dissipatum & confusum erat chaos: monstrum horrendum, informe, ingens, cui lumen ademptum. Quod in una cognitione erat positum, id in infinitas dividebatur; nequam ex generum causis, quam ex responsis prudentum, causæ innumerabiles poterant decidi. Crassius, Pompejus, Cæsar, Cicero, aliique civitatis proceres ideo de jure civili in artem redigendo studiosissime cogitarunt; sed otii inopia ac Reip. necessitatibus fuerunt impediti. Q. Ælius Tubero; Panætii auditor & Stoicus, jam ante, & primus quidem, Logicam ad Jurisprudentiam attulerat,^c sed rem tantam solus

^a Laert. eod. lib. VII. *segm* 181.

^b Turnebus lib. XV. *Adv.* cap. 11. hoc ex Cornificio lib. 2. ad Herennium ostendit. Cui adde Ciceronem lib. IV. de Finib. *Quid ea, quæ Dialectici nunc tradunt & docent, nonne ab illis (Academicis & Peripateticis) instituta sunt & inventa.* Et lib. 1. Acad. *Quæst. Cum hoc igitur Dialectici pugnent, id est Antiochus & Stoici.* Hinc lux Africano in l. 83. D. ad L. Falcid. *Dixi tui æque hanc questionem esse, qui tractatus apud Dialecticos tu quodammodo dicitur.* Hæc iis addenda videbantur, quæ disputat Menagius lib. 1. *Amænit.* cap. 1. Non omnes vero Stoicos nugatorias illas argumentationes approbasse, sed quosdam tantum, atque ideo eos sæpe a Dialecticis distingui, docet Merillius lib. 1. *Obs.* c. 17. Cui adde Freheri *decis. Arcop.* c. 2.

^c Gellius lib. I. cap. 22. *M. autem Cicero in libro, qui inscriptus est de jure civili in artem redigendo, verba hæc posuit: Nec vero scientia*

Ius non perfecit. Felicius fuit Scævola, qui, auctore Pomponio, ^a ius civile primus constituit, nec tamen omne tulit punctum. Servius autem Sulpitius artem hanc omnium maximam, quasi lucem, ad ea quæ confuse adhuc respondebantur, a Stoicis est mutuatus, eamque totam in Jurisprudentiam advocavit; quapropter M. Tullius ^b aliis usum juris, huic uni artem concedit; qua laude haud scio, an alia tribui Jurisconsulto major possit. Hujus exemplo, Antistius Labeo dein in Dialecticam penetravit, æquique post eum vixerunt Jurisconsulti omnes hac parte Stoicorum vestigia pressere. Unde genus & speciem eodem modo, quo illi describunt; raro definitiones habent accuratas, quod vitium erat Stoicorum; & sicut captionum amantissima erat Porticus, spinas Logica sua vellebat, & varii generis sophismatibus, ut pseudomeno, sorite, superposito, metente, calvo, crocodilo, cornuto, conficiente, obvelato, ignava ratione, & aliis ejusmodi argumentandi monstris lubricus utebatur, sic & juris nostri auctores ea in artem suam retulerunt. ^c

Præterea Dialecticæ nomine Stoica gens Grammaticam simul complexa est: unde de proprietate verborum, de consuetu vocalium, de voce canora, de hellenismo, idiotismo, barbarismo & solæcismo disceptabant; ad syllabarum quoque distinctiones & conjunctionum ac præpositionum proprietates descendebant, Grammaticis, velut invidentes. ^d Idem

Ffff

vero

tia juris majoribus suis Q. Ælius Tubero defuit, doctrina etiam superfluit. *In quo loco, superfluit, significare videtur supra fuit & præstitit, superavitque majores suos doctrina sua superfluenti, tum & nimis abundanti: disciplinas enim Tubero Stoicas & dialecticas perculluerat.*

^a L. 2. §. 41. de Orig. Jur.

^b In Bruto cap. 41.

^c Africanus, l. 88. D. ad L. Falcid. Ulpianus l. 177. de V. S. Julianus l. 65. de Reg. Jur. Scævola apud Ciceronem lib. 1. de Oratore cap. 10. Stoici vero nostri, inquit, disputationum suarum atque interrogationum laqueis te irretitum tenerent.

^d Seneca epist. 88.

vero labor omnino Jurisconsultis fuit suscipiendus, ^a ut vim vocum haberent perspectam, & in legibus, edictis, Senatufconsultis, in contractibus & testamentis, exacte omnia explicare possent. Quippe ex uno verbulo male obscureve posito, magnæ plerumque lites oriuntur, & apud Prætorem, si quando una syllaba erratum esset in formula, lis tota perdebatur. Ut ne dicam ex alieno sæculo iis explicanda fuisse verba Legum XII. Tabb. a regiis temporibus conservata, quibus interpretandis doctissimi Romanorum erant minores. ^b Endo pro in, im pro eum, escit pro erit, duit pro dederit, sirit pro siverit, adorato pro agito, facile omnibus erant nota: at *Nexo soluto fortis sanati firemps jus esto*, & alia hujusmodi, hoc opus hic labor erat. Servius Sulpitius ideo consuluit Varronem, quid in Censoriis libris sint *favisse Capitoline*: In Prætorum edictis quid *flumina retanda* significet, in bibliotheca templi Trajani quærunt eruditi, ^c & in universum propria Jurisconsultorum vocabula, *suus heres, eratum citum, ruta casa, ex jure manum confertum*, alia, quorum significatio Grammaticis non satis erat culta & perspecta, sed ab ipsis Jurisconsultis petenda. Unde Gregorio Thaumaturgo ^d verba legum Rom. præclara quidem, sed difficilia perplexaque videbantur. Paulus, velut e grege Grammaticitarum aliquis (risum teneatis amici) nomen *penus* omnis generis esse, sibi traditum notat: Ulpianus in vocolas *penes* &

^a Cicero pro Muræna cap. XI. *Quæ dignitas in tam tenui juris scientia esse potest? Res enim sunt parva, prope in singulis litteris & verborum interpunctionibus occupata?* Quintilianus lib. V. Inst. Orat. cap. 14. *Cum etiam ipsi Jurisconsulti, quorum summus circa verborum proprietatem labor est, litus audeant dicere, qua fluctus eludis.*

^b Cicero lib. I de Oratore. *Plurima est in omni jure civili, & in Pontificum libris, & in XII. tabulis antiquitatis effigies, quod & verborum prisca vetustas cognoscitur, & actionum genera quadam majorum consuetudinem vitamque declarant.* Adde Gellium lib. XX. cap. 1. Symmachum lib. III. epist. 44.

^c Gellius lib. II. cap. 10. lib. XI. cap. 17. lib. XX. cap. 10.

^d In Orat. Panegyric. ad Origen.

& apud inquit: Pomponius, Julianus & Modestinus sub masculino genere sexum utrumque comprehendere scribunt: quinimo Aelius Gallus de verbis ad jus pertinentibus, & Volusius Mæcianus, de Ase ejusque partibus, libros singulares ediderunt. Quemadmodum vero usum rei abusus facile consequitur, sic Stoici anxiam nimis curam in verbis habuere. In Zenone hunc morbum damnat Seneca; in omnibus ejus sectatoribus Plutarchus, Galenus & alii; ac vellem parciores fuissent in veriloquiis, & allusionibus, quibus supra modum sibi placuerunt. ^a Neque tamen adeo erant inepti, uti derivationes suas Dialecticas pro veris etymologiis Grammaticis venditarent: sed quia inanis sæpe opera in vera origine investiganda ponitur, cum omnium fere nominum plures natales assignari possint, & usus, tanquam lex quædam, vocis notationi subroget, obroget, vel derogat; externa etiam illa & antiqua plerumque sint incertiora, ideo ex flexione verbi & verisimili ad naturam rei alludere, quam nimio artificio ingenium discruciare maluerunt. Jurisconsulti Romani ea in re præceptores suos eo lubentius sequebantur, quia multas voces ab Hebræis, Græcis, Etruscis, Volscis, Oscanis, Sabinis, aliisque finitimis & remotis populis, in Latinum sermonem incidisse sciebant, quarum origo obscura esset & ignota. Stoicorum etiam morem in docendo utilem esse didicerant. Hinc Labeo Latinarum vocum origines rationesque percalluerat, eaque præcipue scientia ad enodandos plerosque juris laqueos utebatur; ^b secutus sine dubio exemplum Servii Sulpitii, præceptoris sui, qui te-

F f f 2

stamen-

^a Cicero lib. 1. de Off. cap. 7. *Tamen andequm imitari Stoicos, qui studiose exquirunt, unde verba sint ducta; credamnsque, quia fiat quod dictum est, appellatam fides.* Festus: *Oppidorum originem optime refert Cicero libro primo de Gloria; eamque appellationem usurpatione appellatam esse existimat, quod operum darent; adjiciens, ut imitetur ineptias Stoicorum.* Chrysippum Lactius lib. 7. n. 200. ait, libros septem de Etymologicis scripsisse.

^b Gellius lib. XIII. cap. 10.

testamentum ex eo appellatum dixerat, quod sit testatio mentis. Nec quicquam causæ video, cur huic notationi ex veteribus Gellius, * ex recentioribus Laurentius Valla, tam vehementer succenseant: nam Servius, non veram originem, (hanc enim quomodo summus orator, & vir ætatis suæ doctissimus, ignorare potuisset?) sed naturam rei tantum indicare voluit: ut hoc ipso dementes, furiosos, impuberes a testamenti factione areeret. Idem de ceteris iudicium esto, quando ex allusionibus argumenta ducunt: v. gr. ubi lapis non cæditur, ibi non est lapidicina; ubi lis non perit, ibi nec lius est periculum; ubi mutuum, ibi ex meo fit tuum; ubi possessio, ibi sedem ponere licet; ubi res pugno non traditur, ibi nec est pignus. His sua utilitas inerat, & Plato atque Aristoteles in his frequentes frequentes fuerunt; Stoici vero perpetui, & horum imitatione Jurisconsulti: nam primo statim Pandectarum capite, Ulpianus ait: *Juri operam daturum prius nosse oportet, unde nomen juris descendat*, id quod Stoa sic efferebat, definitio nominis præcedere debet definitionem rei.

Ex vultibus Vestris me satis jam intelligere puto, parum abesse, quin vobis persuaserim, utilem & necessariam Jurisconsultis fuisse Stoicorum disciplinam: si quis autem adhuc dubitat, num pari eam ardore fuerint amplexi, is mente & auribus jam adesto: rem omnem, utriusque studii, dogmatum & doctrinarum collatione, tam liquidam faciam; ut non ovum ovo, nec lac lacti videatur similis. Melioris autem ordinis causa, Jurisconsultos in quatuor classes dividendo: prout scilicet vixerunt, vel post latas leges XII. tabularum, usque ad ætatem Ciceronis; aut sub hoc & Cæsare, usque ad Augusti imperium; vel ab Augusto ad tempora Antonini Pii; vel denique post hunc ad Gordianum usque: sub hoc enim, cessim & retro collapsa jam Jurisprudentia, Oracula nostra obmutuerunt. In antiquis illis frustra sectam quærimus, nulla quippe his affulserat Philosophiæ lux, nul-

* Lib. VI. cap. 12.

lum lumen litterarum. Aspera & tenebricosa erant omnia; scriptis quidem, sed sine arte, jus civile committebant; nec institutione, sed natura duce, Sempronius & Atilius evaserunt sapientes. Paulo autem ante Ciceronem natum, Philosophia a Græcis Romam fuit delata, & moralis illa pleno jam alveo, cum is nasceretur, in Jurisprudentiam manabat. Panætium, Stoicorum principem, supra audivimus, primum Romæ Philosophiam docuisse; hujus autem discipuli mediæ Jurisprudentiæ tum erant conditores; quæ non poterat non Philosophiam, & Stoicam tantum, redolere: ipsi quippe Stoici erant, & tales in litterarum monumentis vocantur. P. Rutilium Rufum Cicero ^a signanter *Panætiæ auditorem, prope perfectum in Stoicis* appellat. Q. Ælium Tuberonem, Gellius auctor est, ^b *Stoicas & dialecticas percalluisse disciplinas*: Sextum Pompejum ingenium contulisse ad summam juris civilis, & ad perfectam Geometrix, & rerum Stoicarum scientiam, refert Tullius. ^c Idem Lucilium Balbum, in libris de natura Deorum, Stoicarum partium defensorem inducit, eumque *tantus in Stoicis progressus habuisse*, ait, ut cum excellentibus in eo genere Græcis, fuerit comparandus. ^d Quid Quintum Mutium Scævolam memorem? quem Athenæus ^e *placita Stoicorum secutum* tradit diserte. Quid Servium Sulpitium? qui Athenis & Rhodi Stoicis operam dedit, Lucilii quoque Balbi auditor fuit, & Dialecticam didicit, *allusionum tam fuit studiosus*, ut vel eo nomine solo in hanc classem referri mereatur. Jam vero A. Cascellii obfirmatus animus nonne Porticum sapit? neque enim mores cum Rep. mutavit; sed temporibus Cæsaris liberius est locutus, nulliusve gratia vel auctoritate compelli potuit, ut de his rebus, quas Triumviri

Ffff 3

sta-

^a *In Bruto cap. 30.*^b *Lib. I. Noct. Att. cap. 22.*^c *In Bruto cap. 47.*^d *Lib. I. cap. 6. de Nat. deor.*^e *Lib. VI. Deipnos. cap. 21.*

statuerant, formulam componeret: unde Valerius Maximus eum *periculose contumacem*, id est Stoicum, appellare non veretur.^a Tui autem. Trebatii Testa, fere heic oblitus eram, & delendus ex hoc albo videbaris, quia a viris ad feminas, a virtute ad voluptatem, ut infamis ille transfuga Dionysius Heracleotes, transire voluisti; sed tamen agmen hoc claudas licet; fortassis enim more suo tecum jocatur Tullius, aut e fuga te retraxit. Certe in Stoica schola te ante vixisse nullus dubito: formasti Antistium Labeonem, perfectum Stoicum, & peccata tibi paria sunt; nam qui aurem alicujus tangit, is totum tibi hominem tetigisse videtur.^b Constat itaque Jurisconsultos, qui sub libera Republica Ciceronis ætate vixerunt, aut Panætii fuisse discipulos, aut saltem ex Stoicorum fontibus arva sua rigasse.

Verſo in principatum Reip. statu, primis Augusti temporibus, una Stoicorum disciplina, qua ipse Princeps imbutus erat, Jurisprudentiam ornabat; mox autem luxuriantibus Jurisconsultorum ingeniis divortia facta sunt, inque duas itum est sectas. Clarebant tunc simul *duo pacis decora*,^c & amplissimæ dignitatis viri, Antistius Labeo & Attejus Capito, doctrina pares, ingenio vero multum dissimiles.

^a *Lib. VI. cap. 2. n. 12.* contumacia est studium libertatis, & libido contradicendi Principibus. Vox in Stoicos & Cynicos usurpata. Vide Tacitum *in vita Agricola cap. 42.* Sueton. *August. cap. 55. & Vespas. cap. 13.* Martial. *lib. II. epigr. 68.*

^b Gothofredus *ad l. 2. de Legibus & Gassendus de vita & mor. Epicuri Oper. Tom. V. pag. 158.* cum Epicureis accensent, propter Ciceronis verba *lib. VII. ad fam. ep. 12. Indicavi mihi Panſa meus, Epicureum se esse factum.* Sed Tullium ludere, ut in aliis epistolis ejusdem libri, observavit Schilterus *Mannud. Philof. mor. cap. 1. §. 6.* Contra Christ. Otto a Boeckelen *de familiis JCorum pag. 17.* Testam Stoicum fuisse ex *epist. 16. dicti lib.* constare putat. Ego libentius utar argumento *l. 21. D. de Furt.* quam *l. recte &*, ut solet, erudite ad mentem Stoicorum explicavit, Vir Clarissimus, mihiq; amicissimus, Nicolaus Hieronymus Gundlingius *in Trebatio injuriis liberato §. 35.*

^c Tacit. *lib. III. Annal. sub fin.*

les. Ille quidem vitæ severæ, & ad Stoicam gravitatem compositæ, Græcæ eruditionis fiducia, multum innovare instituebat: hic, ut erat ingenii subservientis, iis, quæ ab antiquis tradita erant, mordicus inhærebat, & in vitæ actionibus tempori serviens, Principis auræ plus quam vernili adulatione velificabatur. Hinc cum uterque ad docendum se dedisset, duæ familiæ exortæ sunt. ^a Labæoni successit Nerva, Nervæ Proculus, Proculo Pegafus; unde *Proculejani* & *Pegafiani*. Capitonis doctrinam complexus est Maffurius Sabinus, & C. Cassius Longinus; unde *Sabiniani* & *Cassiani*. Inter hos tam perpetuæ contentiones & dissidia crebra, ut veritatem in multis, quam sectam deferere maluerint. Proculejani constanter a partibus Stoicorum; Sabiniani vero in nonnullis a Zenonis schola discedebant. ^b Hinc in variis juris articulis utriusque scholæ dissensio. In ea quæstione, an dominus materiæ, an vero is, qui novum opus fecerat, speciei dominus sit, Proculejani pro artifice stabant: quia a Stoicis acceperant, formam operi factæ substantiam tribuere, non materiam. ^c Sabinianis contra videbatur, naturali & civili rationi convenire, ut dominus materiæ fieret dominus speciei. Rursus in legatis, hereditatibus aliisque speciebus, Sabiniani proportionem Geometricam, secundum Academicos; Proculejani secundum Stoicos Arithmeticam sequebantur; nam & paria esse peccata dicebant, æquales virtutes, nec alium alio magis esse sapientem. ^d Pubertatem Cassiani ab habitu corporis, Procule-

^a Pompon. l. 2. §. 47. de Orig. jur.

^b Hinc ut secta alteri sectæ addictos Jurisconsultos deridebat, l. 10. §. 1. de Neg. gest. l. pen. in quib. caus. l. 109. de Cond. et dem. sic & Stoici Sabinianis infensi, quo poterant modo, eos fugillabant, auctore Arriano ad Epictet. lib. IV. cap. 3.

^c Seneca epist. 88.

^d L. 21. D. de Furtis l. 23. C. de Legat. Horatius lib. I. epist. 16. Arnobius lib. VII. ubi idem Trebatius existimat, si quid sacri faciendi causa de dolio demeretur, totum dolium sacrum fieri.

culejani autem, perinde atque Stoici, ab anno decimo quarto auspicabantur: putabant enim animam simul cum corpore crescere, & post bis septem demum annorum decursum perfecte compleri.^a Ecce in his & aliis^b Proculejani magis Stoicis sese obstrinxerunt: quemadmodum autem qui in Sole ambulant, licet inviti, colorem inde ducere solent; sic Cassiani, mediæ Jurisprudentiæ inhærentes, multa a Patrio profecta retinuerunt, ut adeo ex Stoicorum classe penitus non sint ejiciendi.

Hæ partium contentiones sub Tiberio, Caligula, Claudio, Nerone, maxime vero sub Vespasianis, inter Jurisprudentes vehementissime agitatae sunt; post Hadrianum autem & Antoninum Pium refriguit iste disputandi æstus, & qui posthac vixerunt Jurisconsulti, miscellam professi sunt doctrinam, nullis unius disciplinæ legibus adstricti. Alii quidem Proculejanis erant propiores, ut Pomponius & Ulpianus: Sabinianis alii, ut Papinianus & Paulus: omnes vero ea in re Stoicis similes,^c quod, velut eriscundi & honorarii arbitri, ex pluribus contrariis opinionibus, unam conficerent & sequerentur. Aristotelis libri jam tum in aliquo pretio, multa ab eo mutuati sunt Jurisconsulti posteriores, ejus etiam auctoritate utuntur: sed ut Homeri, Xenophontis, Ciceronis, Virgilii, Hippocratis & aliorum; nulli unquam exinde Peripateticos fuisse persuadebis. Plane Antonini Pii præceptor, Flavius Arrianus juratus fuit Stoicus, idem qui scripsit dissertationes ad Epictetum.^d Sub Marco omnes ad Principis exemplum sese com-

^a Ulpian. *tit. XI. §. 28.* Plutarch. *lib. V. de plac. Philos. cap. 24.* Tertullianus *de anima cap. 38.*

^b Quæ diligenter annotavit Merillius *lib. 1. Obs. cap. 20. & seq.*

^c His enim familiare erat *μίσκειν ὅλοι τιμῶν*; unde *eriscundi* dicuntur Servio ad *III. Æneid. vers. 68.* & Chrysippus *arbitrator honorarius* vocatur apud Cicer. *de fato cap. 17.*

^d Unde *Φιλοσοφῆς Ἐπικτατίου* appellatur a Suida. *V. Cl. Jo. Albertus Fabricius Biblioth. Græcæ lib. IV. c. 8.* alium facit a Philosopho Juris-

composuisse, vidimus supra: Et ecce Vobis Ælium Marcianum, qui tempore Severi Stoicam sapientiam *summam* appellavit: ^a nonne & hunc sectam, quam extollit, & ex cujus libris definitionem legis depromit, secutum existimatis? Titum porro Gajum qui Stoicum negat, hunc insanum non sanus juret Orestes: naturam enim pro Deo accipit, & partum ancillæ in fructu esse, absurdum putat; quia a Stoicis acceperat, Deum hominum gratia omnes fructus comparasse. In Sexto Pomponio, quis unquam inficiabitur, curam, quam habuit, verborum, commendationem patriæ, consulatus contentum, & genus illud corporum, quod *uno spiritu* contineri scripsit, mentem Stoicam indicare? ^b Sapientissimus Papinianus, nisi sanguine suo præclaram Stoicorum constantiam obsignasset, vel hoc sectam proderet, quod beneficio affici hominem hominis interesse ait, quodque partum nondum editum, latens viscerum maternorum onus, spem tantum animantis, non hominem esse agnoscit. ^c De Ulpiano, Jctorum coryphæo, præstat tacere, quam pauca loqui, tot tamque illustria hujus disciplinæ vestigia in fragmentis ejus supersunt. Mentiar, nisi plus decem in unico titulo de Justitia & jure reperiuntur. Florentinus ibidem cognationem a natura inter omnes constitutam commendat, quod purum putum Stoicum est. Et singula quid referam? Idem principium, idem finis, eadem omnium doctrinarum radix apud Stoicos, quæ apud Jurisconsultos. Capitalis hæc illorum erat sententia: Solum bonum esse, quod honestum; & primum juris præceptum est, honeste vivere. Illi virtutem constantia metiuntur: nostris Justitia constans definitur & perpetua voluntas.

Gggg

tas.

consultum, cujus in Pandectis fit mentio: sed vide l. 2. §. 1. *D. de Jure fisci*.

^a L. 2. *D. de Legib.*

^b Vide B. H. Reinoldi, Antecessoris Viadrini, civis & amici mei Clarissimi, Orationem eruditissimam de Sexto Pomponio pag. 22.

^c Plura dixi in vita Papiniani c. 9.

tas. Illis fides summum est humani pectoris bonum; nostri etiam nil tam congruum fidei humanæ habent, quam ea, quæ inter homines placuerunt servare; nil esse gravius, quam fidem fallere, inculcant. Utrorumque sancta illa, & tantum non Christiana vox ubivis resonat: Quæ facta lædunt pietatem, existimationem, verecundiam nostram, & contra bonos mores sunt, ea nec facere nos posse credendum est. Dies me deficeret, si omnia dicendi genera, regulas & principia, e Porticu deducta, adferre & explicare vellem. Summus in libris nostris libertatis favor, odium servitutis, infantia ac pubertatis terminus, dolus bonus, *αυτοχρησία*, usuræ natura non provenientes, spiritus cuncta permiscans, naturalis motus arboris, poena levis abacti partus, expositio infantum, vir bonus, fatum, vis divina, & sexcenta id genus alia a Stoicis promanarunt; quorum explicationem qui illotis manibus aggrediuntur, næ! illi non aliter agunt, quam si dent operam, ut cum ratione infamiant. Ne primæ quidem, quas dupondius ediscit, definitiones iustitiæ, Jurisprudentiæ, juris naturæ, libertatis & servitutis, sine hujus Philosophiæ luce, intelligi aut recte explicari possunt.

I nunc, Paganine Gaudenti, & veteres Jurisconsultos a Stoicis non esse imbutos, porro contende. Ite nunc Aristotelis amici, & ex Ethicis vestris Romanum jus, si Diis placet, illustrate. Ite cauti, & discite, qua via ad secretiora ejus adyta sit eundum. Huc etiam adeste præcæ Philosophiæ hostes, leguleji & formularum cantores, qui legum & paragraphorum cognitione juris studium absolvi putatis: adeste & cernite, qua domo profluxerit sanctissimus juris nostri thesaurus, & quibus subsidiis opus sit, ad veterum fragmenta recte explicanda. Vos denique hic notandi estis vitio creati Jurisprudentiæ Censores, qui omnem Romanorum disciplinam, tanquam Reip. nostræ non modo inutilem, sed & perniciosam, immo ut litium fomitem, e foris nostris eliminandam, ad ravim usque clamatis. At ve-

ro illa non est inventum hominum otioforum; non vana atque inania præcepta ejus auctores secuti; sed sancta, recta, fortia, a Christianorum regulis haud longe aliena. Erravit, fateor, in multis Stoicorum schola; fatuum est eorum fatum; providentia anus fatidica; ambitio & μεγαλυνονια, quæ tam sollicitos eos habuit, inanis mentium fuit agina; hominum animas falso docebant ex ipsa Numinis substantia ortas; naturæ & fortunæ munera bonis annumeranda, sine ratione negabant; in doctrina circa voluntatem peccarunt in excessu & defectu; perperam æqualia dixerunt peccata; pessime deinceps αυτοχειριαν, παιδερασιν, & quosvis incestus, tanquam res medias, permiserunt. ^a At cogitemus, homines eos fuisse, non Deos, errasse & alias sectas; nec mirum! ethnici de Deo & mentis immortalitate non satis erant certi, unde omnia eorum dogmata, præclara licet & splendida, lubrico fundamento innitebantur. Neque omnibus in Porticu eadem de illis sententia sedit. Aliter Diodoto, aliter Chrysippo, Philoni aliter placebat: Herillus & Aristot multum ab Zenone præceptore suo discesserunt; Posidonius sectam deferere maluit, quam veritatem; & Athenodorus in bibliotheca Pergamenæ libris crasis, quæ male a Stoicis dicta essent. Absit igitur, ob Zenonis & Chrysippi impias quasdam & ridiculas doctrinas, totam sectam infectemur; ipso Zenone nemo vixit continentior, aliaque is & ejus discipuli principia vivendi, alia differendi habuerunt. Paradoxa eorum prima specie miranda & incredibilia videntur: at si curatius ea inspexeris, non nisi verborum insolentia oculos mentemque offendunt: Cicero, in oratione pro Muræna, ceu duriora & asperiora ea perstringit, quam quidem natura aut veritas patiatur: sed tempori & instituto tum serviebat callidus orator, ut Catoni Stoico invidiam moveret, qui in petitione Consulatus

G g g 2

Mu-

^a Vide omnino Plutarchi duos libellos, quibus contra Stoicos pugnat; item J. Franc. Buddei V. Cl. *Exercitationes IV. de erroribus Stoicorum*, & infra Orat. III. *de Vera, non simulata, Jētorum Philosophia*.

Muraenæ vehementer adversabatur; & bene est, quod ipse alibi^a fatetur, aliquid coronæ datum esse. Sed hæc, & quæ alia pro Paganino adferri possunt, Deo volente, fusius in dissertationibus nostris disputabimus. Nunc sufficit constare, id quod demonstrandum suscepimus, Stoicam Philosophiam plurimum Romæ valuisse, eam Jurisconsultorum studiis fuisse accomodatam, & plerorumque horum fragmenta Stoæ doctrinas redolere.

Quod igitur superest, ad Vos me converto, omnium facultatum Professores Clarissimi, Collegæ atque Amici honorandi. Stipes sim, nisi læter, & maximo mihi honori ducam, in Amplissimum Ordinem vestrum adscitum esse, cujus singularia in Ecclesiam, in Rempublicam, inque bonas litteras merita Orbi erudito patent, mihiq; jam dudum sunt perfecta. Valedixit Vobis pridie hujus diei Reinoldus vester, vir ingenii & eruditionis gloria clarissimus, vir omnibus carus, mihi vero propter communem patriam, & communia studiorum sacra ab antiquo conjunctissimus. Quod si eundem, quo ille gavissus est, amorem a Vobis impetrare potero, nil erit quod amplius optem. Eadem certe modestia, facilitate & continentia, si non passibus æquis, quacunque tamen ratione, Vos demereri conabor; nec sciens committam, ut benevolentia vestra Vos unquam poenitere queat. Tecum præcipue Juris consultissime Summermanne, quem mihi arctiore necessitudinis vinculo jungit ejusdem muneris ac laboris societas, tecum, ita vivam, ita valeam, pacem & concordiam religiose colere, fixum immotumque animo sedet. Mihi prius hæc excindatur lingua, quam ut rixis aut inani velitatione otia tua, vestra, aut cujuscunque alterius non laceffitur turbem, quæ sanctissimis Musis Themidique sunt dedicata. Juliani Impera-

^a Lib. IV. de Finib. cap. 27. *Cum L. Muraenam te accusante defenderem, apud imperitos tum illa dicta sunt: aliquid etiam coronæ datum.*

peratoris aureum illud præceptum: * *Magistros studiorum Doctoresque excellere oportet, moribus primum, deinde facundia*, semper apud me valebit. Vos idem si observare pergetis, novis auctibus quotidie florescet hæc bonarum artium officina: templum hoc concordiae, pietatis & sapientiae sedes erit, in quo virtutis Vestrae monumentum stabit ære perennius, quod nec imber edax, nec Aquilo impotens, nec fuga temporum destruere possit.

Nunc tandem & Vos compello, Nobilissimi atque Ornatissimi Studiosi, o cara mihi pectora! præsertim qui sacris nostris estis initiati. Vestrum causâ Clementissimus Rex hunc publici Doctoris locum me occupare jussit: Vobis etiam ex hoc tempore meae curæ, mei labores, vigiliæ meæ sunt consecratæ. Audivistis, quam arcto connubio Philosophia moralis & Jurisprudentia sint conjuncta. Cavete igitur ne, quod stolidissimi olim Trimalcionis tumulto inscriptum refert Petronius, idem & titulis vestris inscribi possit: *Nec unquam Philosophum audivit*. Paulo rectius Trioptolemus apud Ennium suadebat: *Philosophandum esse paucis*. Vos autem veterem illam & regiam in studiis vestris insistite viam, quam Tuberones, Rutillii, Scævolæ, Sulpitii, ceterique Heroës, nati melioribus annis, tenuerunt. Hi quippe ad civilem sapientiam non accedebant, nisi largo philosophiæ flumine essent inundati. Hæc illis Amalthææ cornu erat, ex quo, quicquid libebat, in usum suum depromere licebat. Hæc etiam est germana Jurisprudentiæ soror, lex vitæ, quæ nunc adolescentiam vestram alit, olim senectutem oblectat, secundas res ornat, adversis perflugium ac solatium præbet. Sine hac quid, quæso, omnis hæc vita vestra? Nonne mors & spurcum cadaver? Finis instat fabulæ, quam agitis; & aliquando scenæ hujus vela erunt complicanda. Stoicos igitur Vobis imitandos proponite, viros graves, viros sanctos, boni & æqui custodes; cum his studiorum vestrorum certum finem concipite, miseris-

G g g g }

que

* In l. 7. C. de Prof. & Med.

604 *Oratio I. de Stoica Jēlorum Philosophia.*

que viatica canis. Horum dogmata, ^a si bene imbiberitis, ad sacra nostra accedite. Leve Vobis erit, quod a plerisque, tanquam ingens saxum, volvitur Juris corpus, & cum Scævola affirmabitis, nullius artis, quam Jurisprudentiæ, scientiam videri faciliorem. Cottam accepimus, eodem die, quo togam virilem sumsit, Carbonem postulasse. Plinius ipse refert, se adolescentulum causam Julii Pastoris egisse: Celsus quoque adulescens de Jure scripsit, & Nerva filius anno ætatis septimo decimo publice de jure responsitavit. Vos etiam si horum exemplo doctrinam de moribus, Dialecticam, Grammaticam, Historiam & Antiquitates præmittetis, facile & mature cognoscetis ea, quæ alii toto vitæ suæ tempore, vix credendis laboribus, raro aut nunquam assequuntur. Me non morosum patrum, sed ducem habebitis, comitem & familiarem. Limpidos Vobis propinabo juris Romani, juris profecto sancti & æqui, fontes; in ipsa Themidis penetralia Vos deducam; nec leges tantum, sed & earum usum, vim & potestatem Vos tenere docebo. Sic itaque, carissimi Commilitones, me totum, Vestris commodis unice intentum, nunc accipite; & vosmetipsos tam diligentes ostendite, ut a necessariis aliquando dotibus instructi; Reip. Rectores, Regum ac Principum Consiliarii, Judices, Doctores, causarum Patroni evadere, & gloriosæ vocis confisi munimine, in publicis privatisque rebus, lapsa erigere, fatigata reparare, laborantium spem, vitam & posteros tueri queatis. Virtus, credite mihi, repulsæ nescia fordidæ, intaminatis fulget honoribus!

D I X I.

^a Perius ea breviter complexus est *Sat. III.* verbis pulcherrimis:

*Discite mortales, & causas cognoscite rerum,
Quid sumus, & quidnam victuri gignimur, ordo
Quis datus, aut metæ quam mollis flexus & unde,
Quis modus argento; quid fas optare, quid asper
Utile nummus habet: Patriæ carisque propinquis
Quantum elargiri deceat: quem te Deus esse
Fussit, & humana qua parte locatus es in re.*



ORATIO INAUGURALIS,

SECUNDA,

DE

JURE IMPERATORIS ET
STATUUM IMPERII CIRCA SACRA,

Habita Trajecti a. d. xviii. Novembr.
M D CC XX.

Tertullianus Apologet. c. xxiv.

Videte, ne & hoc ad irrelegiositatis elogium concurrat, adimere libertatem Religionis, & interdicere optionem divinitatis, ut non liceat mihi colere, quod velim, sed cogar colere, quem nolum. Nemo se ab invito coli velit, ne homo quidem.



Uod nunquam fore putavi, ut officium & operam meam sibi aliquando deposceret Respublica, cui Ecclesia hospitium, litteræ splendorem, universus terrarum orbis Libertatis, Foederis & Pacis exemplum debet, id ante hos menses septem accidit; quum Amplissimi Urbis hujus Proceres ad celeberrimam hanc suam Academiam me vocarunt, ut immortalitati operarer, & florem Juventutis, in varia Juris disciplina erudirem. Non equidem dissimulo, continuos inter labores forenses, quos Pro-

Professionis prioris imponebat ratio, optabile nonnunquam visum fuisse hujusmodi munus, quod arctiore vinculo me jungeret cum Musis amœnioribus, omneque otium ac requiem in studiis humanitatis & litterarum collocare pateretur. At qui necdum usu satis firmatus, ingenio autem parum me posse sciebam, sapientissimum illud: quod vix quisquam sua contentus vivat sorte, seu Ratio eam dederit, five Fortuna objecerit, in memoriam revocabam. Pietas item, quam debeo BORUSSORUM REGI, Magno, Potenti, Patriæ meæ Patri clementissimo; tum suavis omnium fere Collegarum, Affinium & Amicorum necessitudo vincula injiciebat; & res mea omnis Duisburgi jam ita composita erat, ut cœlum & mores mutare difficile videretur. Inde quid consilii mihi fuerit, Patres Conscripti, ut legi codicillos, benevolæ voluntatis vestræ nuntios, facile conjicitis. Certe inter spem & metum suspensus, atque in deliberando animus erat distractus, ita multa succurrebant in partem utramque. Non poterat non gaudio me cumulare judicium tantorum Virorum, de me, at homine ignoto, nec annis gravi, benignum. Arridebat valde invitatio in Urbem, Fœderatarum antiquissimam, amœnissimam & splendidissimam, non Præsulum modo quondam, sed & Imperatorum sedem. Nihil deinde ad gloriam amplius esse videbatur, quam cooptari in collegium tot eruditissimorum virorum, quibus superbit hæc Studiorum Mater, quorumque in partibus sibi creditis quilibet, Decorum hominumque irruentem barbariem avertit, jamque labantes, immo casuras Musas sustinet feliciter.

Atat pudorem fronti mox incutiebat tenuitatis meæ conscientia: nihil enim hætenus, nisi exiguos quosdam de Jurisprudencia bene merendi conatus, in me deprehendi; quos modo eruditionis inopia, modo memoriæ infelicitas, modo alia, irritos semper reddiderunt. Pudorem rubor consequebatur; cum inde per aliquot annorum gradus, ad hæc usque tempora, intuebar Juriseonsultos, qui in hac

Lc.

Legum nutrice famam sunt ingressi, Matthæos, Schotanos, Voetios, Moreesios, Noodtios, Coccejos, Pollios, Vitriarios, Viros magnos, totidem Scævolas & Papinianos, in quorum successurus locum Herculis cothurnos infans mihi aptare videbar. Provinciæ deinceps suscipiendæ varietas & difficultas ante oculos obversabatur: neque enim leves aut exigui usus res, sed Imperantium majestas, populorum libertas, Principum successiones, tituli, controversiæ, fœdera, pactiones; universum denique Belli & Pacis jus; publicum & privatum, divinum & humanum; cum magna vigilandi, laborandi, contendendi omnes industriæ nervos necessitate, pro parte virili, mihi committebantur.

Scio, ita natura comparatum esse, ut de facultatibus suis amplius, quam in his est, multi sperent, & majora sustinere se posse existiment, quam vires patiuntur. Ego vero, mecum habitans, oneris suscipiendi gravitatem suis momentis examinavi, atque, perpensis & subductis singulis, humeros ei impares deprehendi; unica autem illa admiranda Dei Optimi Maximi providentia me traxit in partem hanc affirmantem. Illi soli corde & animo, a primis incunabulis, fîsus sum; is per omne, quod in priore statione exegi, sexennium actionibus meis benedixit: is etiam vocationis hujus auctor, animos Vestros, Amplissimi Viri, inflexit; ut me, id neque merentem neque expectantem, ultro hoc honore dignum habueritis; & animi fuerit angusti desperasse, quin idem benignus Pater faventes mihi Patronos, amicos Collegas, & sedulos Auditores, pro inexhausta bonitate sua, largiter sit conciliaturus.

Vel absens autem mihi apud animum representavi, in quanta Clarissimorum atque omne genus eruditissimorum Virorum corona, verba mihi facienda forent: altera hinc nascebatur sollicitudo, ut tale dicendi reperirem argumentum, quod & doctis auribus vestris quodammodo satisfaceret; & muneri, quod amplector, conveniret. Non aliud vero se offerebat, in quo plus aut gravitatis, aut utilitatis, hoc

H h h h

præ-

præsertim tempore, inesse videretur; quam si distinctius inquirerem, cuinam potestas circa sacra in Germania, & quousque competat? Quæ capitalis & ardua quæstio, olim inter ejusdem fidei cultores, inter Regnum, inquam, & Sacerdotium, ^a multa cum cæde & sanguine disceptata est: nunc vero inter Protestantes & Romani pontificatus assertores, in tertium usque sæculum ventilatur. *Capitalem* appellavi hanc controversiam, quia jus circa sacra ita cum publico rerum omnium statu copulatum est, nemo ut de eo dicere possit, quin de omni simul Republica loquatur. *Arduam* vero, cum propter studia partium, gliscentibus inde dies odiis inflammata, tum etiam propter varia judiciorum de Legibus Imperii discrimina; quæ non potuerunt non parere, in Scholis, Curiis, ipsisque adeo sacris cœtibus immanem perturbationem.

Argumentum, opinor, neque Vestra attentione indignum, neque a disciplinis, quas profitebor, alienum. Quod si enim ad Vos, Nobilissimi Viri, oculos converto, de jure circa sacra dicturus, facilem & expeditam hic loci provinciam suscipere videbar, quia plerorumque parentes sanctissimi adversus injustos dominatus, alterum Hispanicum, alterum Romanum, magno animo, consilio & viribus, ad libertatem conscientiae, æternam sibi posterisque muniverunt viam, & pietatis professionem capitis periculo redeemerunt. Nec zelus Vester puriora sacra ad curam suam revocare desinit; isthoc enim consilio Urbis sumtibus erecta est, & sustentatur hæc litterariæ sapientiæ Pharus; constituti tot Mystæ probi, fideles, sancte eruditi, qui fomenta gregibus suis vera sufficiunt. Unde & Civitatem hanc, ceti purgatæ religionis columnen, Dei manus tot beneficiis pigneratam tenet, ut de summa ejus erga Vos benignitate nulli dubitare possitis. Laudant Germani fortunas Vestras, quod Jovis Capitolini fulmina nullius capiti im-

^a Ursperg. Chron. A. 1102, fol. 184. *Inter Regnum & Sacerdotium unitas tot annis scissa.*

imminent; nullius famæ, vitæ & libertati sacrificulus infidiatur; nulli, quod Divos Divasque non fatis religiose coluit, invidia creatur; nec ingratum Vobis erit audivisse, quo pacto alma Evangelii veritas in Germania sit restaurata, ejusque intemerata professio exerceatur.

Ad me vero quod attinet, non metuo finium regundorum judicium, quasi aliorum possessiones invasurus. Juris Naturæ & Publici professionem in primis aggredior; at recta ratio exercitium juris circa sacra certis cancellis definivit, quos ne Principi quidem, legibus soluto, excedere fas est. Publicum vero jus *in sacris, in sacerdotibus, in magistratibus consistere*, jam olim dixit Ulpianus. * Is pariter ac reliqui Jurisconsulti veteres, nati melioribus annis, jus Pontificium & augurale, eadem necessitate tractarunt, qua jus civile. Scævola, Crassus, Nerva, Trebatius, Capito, Sulpitius, alique, vel Pontifices Maximi fuerunt, vel de religionibus, de rebus divinis, de jure sacrificiorum, de sacris detestandis commentaria scripserunt. Quin, paganos ut præteream, si Tertulliano causarum Patrono laudi ducitur, quod veritatem religionis Christianæ adversus heterodoxos propugnavit; quanto minus mihi vitio versum iri confido, si diversas illas vicissitudines & periculosos eventus, Vobis inaugurali hoc sermone exposuero, per quos trium religionum dispositio in hunc statum est deducta. Melius, credo, isthæc & uberius tractari posse ab his, qui pro muneris sui ratione curam gerunt divinorum; sed quia cum Jureconsultis negotium vertitur, jam diu Jus Ecclesiasticum nobilissima juris Publici portio esse cœpit: publicas item pacis Passaviensis, Augustanæ & Westphalicæ tabulas; Ordo sibi vindicavit noster, ex quo rara illa temporum felicitas Germaniæ affulsit, ut sentire licuerit quod velis, & dicere quod sentias. Ante reformationis tempora sepulta jacuit juris Publici disciplina, nec ullum habuit lumen litterarum; sive quod incerta ejus tum ratio; sive quod meræ

H h h h 2

adhuc

* L. 1. §. 2. D. de Just. & jure.

adhuc in rerum civilium usu tenebræ; sive deinceps quod rem ipsam tenere majores, quam periculose de ea disputare maluerunt. Fatale autem religionis dissidium multis questionibus ansam dedit, ut Status Evangelici de jure & Imperatoris, & suo, & Constitutum certiores redderentur.^a

His itaque intentus, non molestus Vobis ero enarratione variarum, quæ ad jus circa sacra pertinent, sententiarum; nec Albutii Rhetoris exemplo dicam, quicquid dici potest. Marcus Antonius de Dominis, Hugo Grotius, Hermannus Conringius, & maxime Samuel Pufendorfius, scriptis in sæcula ituris, rem satis prolixè excusserunt.^b Nec ignota Vobis reor Episcopatum, Puritanorum, Brownistarum, Independentium, Quakerorum, Erastianorum aut Presbyterianorum dogmata, quorum specimen hæc ipsa Belgica tempore Leicesterano, paulo post vicina Britannia habuit.^c Duplex autem hominum genus Germaniæ inprimis functum fuit. Quotquot enim magnum Præsulem Romanum colunt, huic uni omnia tribuunt, tanquam Christi Vicario, & judici falli nescio sacrarum controversiarum. Imperantibus vero adeo nihil relinquitur, ut eos jure suo optimo maximo utentes, cum Ozia Rege. jus adolendi invadere clamitent, sola tantum sævitæ sacerdotalis apparitura, & executione eorum, quæ manum requirunt, ipsis addicta.^d Alii contra in alterum extremum prolabentes Hobbesiani, eadem Principibus circa sacra, quæ circa civilia, competere statuunt, ideoque fas ipsis esse civium conscientis imperare,

^a V. Hortleder de *C. B. G.* t. 2. l. 2. c. 5. seqq.

^b Rectum, de his aliisque huc pertinentibus scriptoribus, judicium tulit Ill. Thomæus, in *Historia contentationis inter Imperium & Sacerdotium*.

^c Confer Grot. l. v. *Annal. Belg. ad A. 1586.* & Huberi *Hist. Civ.* p. 11. lib. 2. *Seç. 1. cap. 21.* & *Seç. 2. c. 16.*

^d Qua occasione eadem sententia reformatæ religionis Presbyteros, in Fœderata Belgica invaserit, tradit Grotius lib. xvi. *Hist. Belg. ad A. 1608.* & in *Apolog.* c. 7.

perare, hosque indieta causa, & erroris ne quidem convictos, vi pœnisque, ad ejuranda sua, amplectenda aliena sacra compellere: quo ipso suas ipsi conscientias fauciant, & Principes, Patriæ Patrum loco, infensissimos sese subditorum hostes ostendunt. Ad leges Imperii si rem exigamus, distinctius nonnulla exprimi potuisse, inficiari nolum: absit autem in mentem, necdum in sermones publicos veniat, Instrumentum Pacis, discordiarum fomitem esse, illudque nasi plumbei, aut regulæ cereæ instar, in cujusque sententiam inflecti posse. Nondum eo perventum est; ut de corrigendis, quæ intra & extra Iliacos muros peccantur, desperari debeat. Jam enim præsentibus argumentis augurari licet, a Carolo VI. Sapientissimo Imperatore, & sæculi nostri Camillo, excitatum iri, quæ jacent tam diuturnis dissensionibus prostrata. Concurrant modo omnes non improbi Germaniæ cives, atque aquam infundant in sacrum hunc ignem; ut ne dissidiorum facibus, a turbida religione accensis, solvatur Imperii compages, per se sat irregularis; sed jugo potius omni excusso, primigenia libertas restitatur.

Procul igitur amore nostrarum partium, solo patriæ Reipublicæ & recti verique studio ductus; sine felle, sine ira, sine malevolentia, sed ea, quæ conditionis nostræ homines decet, moderatione; animo item a sæculi nostri controversiis ac factis singularibus abstracto, de *Jure Imperatoris & Statuum Imperii circa sacra* disseram, & ne vagari cogatur oratio, tribus ea capitibus concludetur. Primo enim Ecclesiam non omnino statum esse ab imperio civili separatum ostendam. Deinde universum jus circa sacra initio apud Imperatores, post apud Ordines Imperii fuisse demonstrabo. Postremo autem modum exercendi juris illius, ex legibus Imperii, qua potero brevitate, proponam.

Dabitis veniam, Auditores, si in tam pulchro Orationis argumento non ea methodo, elegantia & perspicuitate, quam quidem illius dignitas, & illustris hujus Panegyris expecta-

tio postulabat; versatus fuero. Neque enim in Rhetorum scholis educatus sum, neque lepores, calamistri, aut orationis exaggerata pompa temporis & fortunæ meæ conveniebant. Morbus iste gravis & diutinus, pertinax votorum meorum morator, igniculos, si qui fuerunt, eloquentiæ extinxit. Ad vestræ igitur humanitatis aras confugio, ut tenuitatem meam Vestræ favore & silentio adjuvetis.

Sacrorum appellatio late patet: nobis cultus divini rationem in se spectatam potissimum notat. Fuit ille varius ab orbe condito. Aliis quippe gentibus Deus Optimus Maximus inculpfit tantum religionem naturalem, quæ ad felicitatem in vita civili obtinendam tendit; aliis vero cœlitus aliquid superadditum est, quod æterna simul bona pollicetur: sæpius autem in hac vita ærumnas magis, quam sortem beatam, exspectare jubet. Religionis naturalis primum principium est, Deum & esse, & ab eo curari res humanas. Quæ notio tam universalis est, nulla ut gens unquam adeo extra mœurs legesque fuerit projecta, quæ in eam non consenserit. Deumque istum pura mente esse colendum, in eo acquiescendum, in ipsum sperandum; & omnia ejus jussa accurate observanda esse, habuerit persuasissimum. Ad hæc autem luminis naturalis instrumenta, a Gentium Philosophis exulta, statim accesserit revelatio Dei specialis, protoplastis facta: quæ in Ebræorum Ecclesia diu asservata, a Christo autem Salvatore, tam scriptis Prophetarum, quam innumeris miraculis confirmata, tandemque fido Apostolorum testimonio per universum, quæ late patet, terrarum orbem est promulgata: quod Evangelium, seu nova salutis formula, Veteris & Novi Instrumenti voluminibus continetur.

Jam

^a Paulus, *ad Rom.* c. 1. *et* 2. *Ebr.* xi. *et* 6. Seneca *epist.* 95. *Primus est Deorum cultus, Deos credere: deinde reddere illis majestatem suam; reddere bonitatem, sine qua nulla majestas est. Scire illos esse, qui præsident mundo, qui universa vi sua temperant, qui humani generis tutelam gerunt.* Add. Grot. l. 2. c. 20. §. 46.

Jam vero neminem vestrum dubitare arbitror; quin Reges & Principes, velut Dei ministri; utriusque tabulae custodes ac vindices, in id instituti sint, ut ad vitam tranquillam, in omni honestate & pietate degendam, perducant subiectos; ut bona præcipiant, mala prohibeant, non solum quæ pertinent ad societatem, sed & ad divinam religionem. Hoc summi imperii indoles exposcit: civitatum natura suadet: divina Oracula confirmant, & consensus omnium quotquot, extra Hebræam, fuerunt Rerumpublicarum. Enimvero summi istæ est conditio, nihil ut illud effugiat, nihil exæquet, nodum superet; sed omnia, nominatim a Deo, vel hominibus in societatem coeuntibus non excepta, vasto sub ambitu complectatur. Majestas Coronæ imagine depingitur; quia ejus naturæ est, ut parte amissa substantiam suam amittat. Una porro navis quemadmodum ab uno gubernatore regitur, sic quicquid sub imperium cadit, imperanti subjiciamus oportet; nisi monstrum Reipublicæ in Republica fingere velimus: quo nihil dissolvendo regimini paratius dici potest. Civitates, fateor, religionis causa non sunt constitutæ: hæc enim in segregibus familiis obtineri poterat; ex voto tamen optimarum scopus & felicitas consistit in eo, ut cives secundum virtutes operentur, & quantum satis est corporis aut fortunæ bonorum habere queant. Inter virtutes morales præcipua est pietas in Deum, gravissimum & sanctissimum illud nomen, fundamentum & basis omnis honestatis. Hoc vinculo sublato non domus ulla, non civitas, non societas humani generis, non ipsa denique fides & justitia, excellentissimæ illæ virtutes, stare, aut temporis momentum se tueri possunt. Solent profecto e mundo detrahat necesse est, qui Dei timorem e civitatibus expunxerit; neque enim minor confusio erit, quam si in altissimis tenebris vita transigatur. Aufer præmia & poenas, remove vindicem illum Dei oculum; & homine, animali per se indomito, nihil erit immanius, ni-

* Aristot. l. vii. Polit. c. 2.

hil efferratius, nullo non scelere clam se polluet, & palam omnia sibi licere putabit, modo superior promittat impunitatem. Quemadmodum corpus sine anima putridum cadaver: sic Respublica sine religione colluvies quædam prædonum est; quorum alii per juga vagantur; alii in speluncis, ferarum more, stabulantur; omnes, quo error ducit, sequuntur. Nec minus malum Reipublicæ imminet, si anilis Deorum timor civium imbecillitatem occupat. Infanus quippe error est superstitio, ex Physicæ ignorantia plerumque exortus: amandos timet, quos colit violat, rectam religionem in suspicionem falsitatis perducit; & vulgi animos, nunc inani metu terret, nunc ad ardua stulto consilio audenda invitat. Ne quis igitur malo exemplo felicitatem communem turbare velit, interest civitatis impietatem & superstitionem, quæque similia naturalismi, deismi, indifferentismi, rariora pristinis, quam nostris temporibus, sunt portenta, procul eliminari, & contra sanctissime custodiri religionem sacrorum, propugnaculum illud potestatis, vinculum disciplinæ; omnis societatis coagulum & legislationis fundamentum.

Face & viatico mihi opus foret, si ad Reges^a & Magistratus gentilium, qui jus circa sacra sibi vindicarunt, excurrere luberet: iter enim est longum, multisque præstantissimis viris tritum, nec tamen cum insigni fructu. Pagani quippe, licet ex operibus naturæ ad notitiam Numinis perducti essent, totam suam de Diis immortalibus opinionem ad rationes Reipublicæ peculiare, atque retinendam in obsequio plebem accomodarunt: ut profecto mirum fuerit, si non risit aruspex Hetruscus, aruspice cum vidisset.

^a Aristot. 111. Polit. 21. *Rex, inquit, dux belli erat, Index controversiarum, & Dominus caerimoniarum erga Deos.* Quod de Anio Rege Virgilius 111. *Æneid.* 80. cecinit, id ad Romanorum Imp. Servius ibi revocavit: *Sane majorum hæc erat consuetudo, ut Rex esset etiam Sacerdos vel Pontifex; unde hodieque Imperatores dicunt Pontifices.* Adde Casaubon. ad Sueton. *Aug.* c. 31. & ad Spartiani *Hadr.* c. 21. Spanhem. de *Præst. & us. num.* diff. 12.

disset. Attamen vix mihi tempero, quin unicos Romanos, orbis quondam dominos gentemque togatam, in exemplum Vobis adducam: non quod cum aliis existimem, ex colosso Nebucadnezaris, & Bestiis quatuor Danielis, durare quartam Monarchiam, atque a vetere Romanorum imperio ad nostrum argumentum duci posse; absit! sed quia rem puto esse, quod gloriari ausus est Tullius, ^a populum hunc, non calliditate aut robore, verum pietate & religione omnes nationes superasse. Ipsi Patres evectum a Deo horum imperium existimarunt, quod cordi illis esset religio, quamvis falsa; quodque summum hominis officium, etsi non re ipsa, tamen proposito, tenerent. Romulus auspiciis, Numa constitutis sacris fundamenta jecerunt civitatis. Decemviri de rebus sacris Tabulam decimam fixerunt. Populus Domitiam, Liciniam, aliasque de sacerdotiis tulit leges. Flamini plus quam trinoctium Urbe abesse, aut equo vehi permissum non fuit; ne longius evagaretur, sacris desertis. Senatus plus semel negotium Magistratibus dedit, viderent ne quid detrimenti a peregrinis sacris Respublica acciperet. Judicabant enim viri, juris divini & humani prudentissimi, nihil æque dissolvendæ religionis esse, quam si non patrio, sed externo ritu sacrificaretur. Horum auspiciis Epicurei, divinam providentiam negantes, Urbe ejecti, tanquam injustitiæ & nequitiae Patroni. Pulsi Chaldaei & Sabazii, mores antiquos corrumpere nati: impii itidem Bacchanalium furorcs repressi Senatusconsulto Marciano, & Liber Pater cum mysteriis suis non Roma tantum, sed ex universa Italia abire jussus. ^b Occupata Republica ad arbitrium Principis jus illud maximum delatum est, ut Deorum munere, summus Pontificum etiam summus hominum haberetur. Quod si autem novi Dei adsciscendi, vel repudiandi,

Iiii

diandi,

^a De Harnsp. Resp.

^b Hujus Sæti Historiam prolixè describit Livius l. 39. c. 8. seqq. ipsum vero Sætum nuper erudite restituit, & notis illustravit Ampliff. Bincersh. Opusc. pag. 261.

diandi, initio Senatus jus mansit: donec illi, firmato magis imperio, omnem sacrorum potestatem sibi vindicarunt.^a

Nec aliter in spissis & Cimmeriis illis paganicæ religionis tenebris, res se habere potuit. Quæ enim ad beatitudinem civitatis vere & proprie facit religio, ut omnis naturalis, imperio & legibus subjacet; non ut mutationem ab his recipiat, sed ut Majestas ad eam pariter, ac ad alias virtutes, qua præmiis qua pœnis, cives adstringat.^b Mentium Rex solus Deus est, nec cogitationis pœnas humanas patitur, qui male de Deo sentit, sed sibi. Mortalium autem perditissimis, qui nec jus, nec fas, nec divina, nec humana curant, Dei vero numen suis cupiditatibus prætendunt, ac propagandis monstribus illustres fieri volunt, his, inquam, mundi facibus non modo, ne veniant, civitate interdici; sed etiam, dum ibi sunt, exilium injungi potest. Scabiosæ oves sicut a caulis repelluntur, atque Arianos ut Constantinus, Nestorium Theodosius, alii alios, tentatis prius omnibus, aliorum deportari præceperunt: ita huc pertinent ex ipso Acheronte prognatæ atque inferis dignæ doctrinæ: numen non esse, sed solis terroribus fingi; fictos Deos & dæmones esse colendos; religionibus sicut vestibus utendum, quæque id genus alia, luxato & in dubium vocato rectæ rationis dictamine, docendo vel scribendo, contra leges,

^a Memorabile decretum vetus Tertullianus refert in *Apolog. c. 5.* quo Tiberius Christum inter Deos accipere prohibitus est. Sed Dionis Cassii & Zosimi temporibus non erat sic. Vide illum *lib. 53.* hunc *lib. 14. c. 36.* & omnino Tanaq. Fabrum *t. 2. ep. 12.*

^b Seneca *111. de Benef. c. 6. Violatarum religionum alimbi atque aliubi diversa pœna est, sed ubique aliqua.* Hanc ob causam Athenienses Paulum, de Christo verba facientem, tanquam novo aliquo Deo, prehensum deduxerunt in Arcopagum, auctore Luca in *Actis c. xvii.* & Plato deum unum, a majoribus non traditum, nominare tutum non existimavit, metu Arcopagi, apud Justinum Martyrem in *Exhortat. ad gent.* Adde Grot. *d. 7. B. & l. 2. c. 20. §. 46.* Pufend. *de Habitu relig. Christ. §. 7.*

ges, contra magistratus, ab atheis disseminantur. Quod si impudentia impietati accedat, adeoque blasphemi sint, seditiosi, & turbis gravissimis boni quoque civis officia violent, minor clementiæ sit locus; * scindantur putridæ carnes, ut membrorum potius aliquod, quam totum corpus intereat. Nec fanaticos hic prætextus juvabit, ab errore aut conscientiae libertate defumtus: nimis enim supinam ignorantiam aut malitiam error iste arguit, nec alma Themis sinat, ut libertas in licentiam vergat: cum idcirco omnes legum servi simus, ut liberi esse queamus.

Longe diversa autem religionis Christianæ est indoles: hæc quatenus religioni naturali multum ad vitæ æternæ felicitatem adjecit, sub imperio civilis potestatis non continetur. Homo, nisi arrhabone & sigillo Spiritus Sancti sit obsignatus, ad immortalium illam cognitionem nimis mortalis est. Dei solius esse, novimus hominuli, media eo tendentia largiri: ille solus, cui vult, miseretur, & quem vult indurat idem. Nihil vinculis hic proficiet Princeps, aut poenarum metu; quia intellectus cogi non potest. Ut edat sine mente sonum, ut sensa animi dissimulet, forte cogetur infirmus; ut credat verum esse, quod pro falso habet, cogi nequit. Et quanta quæso! absurditas, ad Regis arbitrium venerari Deum? cum ipso idololatra idolis immolare; mox cum eodem atheo Deum negare; rursus Christo maledicere, si Princeps ad Judæicas fabulas animum convertat? Quemadmodum generosi & nobiles equi facili freno regi volunt; sic homines docendo magis, quam jubendo, monendo quam minando, in gremium Ecclesiæ sunt perducendi. Hujus caput Christus, non Principis, sed Doctoris personam gessit; ipse regnum suum non esse de hoc mundo testatus est, sed regnum veritatis, quod suadendi magis auctoritatem, quam jubendi potestatem habet. Judæos obtorto collo non rapuit ad doctrinam suam; sed qui aures habet ad audiendum, audiat, ipsis inclamavit.

Iiii 2

Apo-

* Levit. xxiv. vs. 14. Nov. 77. C. C. art. 106. R. I. de a. 1495.

Apostolos misit binos, sine crumena, sine armis, sine imperio, patientes injuriarum, hique eos tantum, qui *libenter* verbum Christi accipiebant, baptizarunt.^a

Procul hinc procul absit igitur Pauli IV. Pontificis Romani effatum, Inquisitionem Hispanicam, Spiritu Sancto inspirante, esse institutam. Quod si enim arma hujus militiæ cum armis majoris Pauli conferre lubet, nimis carnalia apparebunt, & ejus regni, cui præest angelus abyssi, Abaddon.^b Deinde fructus crudelis ejusmodi lanienæ, nonne atheismus, hypocrisis, superstitio, barbaries, solitudo, odia, gladii, & venena, quæ ejus auctores a tergo sequuntur? Horret animus cogitatione rei nefandæ, quam majores Vestri magnam partem viderunt aut senserunt: una in Belgica, annis ultimis præfecturæ Margaritæ Parmensis, ad mortem rapta esse hominum non minus centum millia: Albanum autem ejus successorem, sæculi istud opprobrium, Deique flagellum, intra quinquennii spatium, octodecim hominum millia & sexcentos carnificis ministerio sustulisse, idque per speciem pietatis. O crudelitatem inauditam! o ferinam rabiem! Occidere, sævire, sanguine & vulneribus gaudere, quid est, nisi abjecto homine in plus quam silvestre animal transire? Non lupis hic mos, nec fuit leonibus unquam, nisi in dispar genus. Parta autem hisce doloribus, cædibus & rapinis fuit libertas, res omnibus metallis potior; & concussa velut tellure, nutavit Hispaniæ colossus ingens; ex quo Batavorum virtus, constrato maximis classibus Occano, novas terras aperuit, ultraque Solis terminos imperium late porrexit. Quod si Vobis hæc nimis nota & pertrita videntur, ite per omnes annales, replicate monumentorum memoriam, & satis apparebit, ad veram religionem ac pietatem promovendam, vim nunquam profuisse. Carolus Magnus,

^a Job. XVIII. 36. 37. Matth. v. 10. Marci vi. 7. Act. II. 4. Adde Beyerli *Delineat. juris div. c. 30.*

^b Conf. Limborch *Historiam inquisitionis, & Relation de l'inquisition de Goa*, Cl. Clericum *Bibl. sel. t. x. 332.*

gnus, Saxonum Apostolus, uti vocatur, armatus, sed magis imperii propagandi cupidus, quid, sodes, bello tricennali effecit, nisi quod plures ex nobilitate Francorum & functos summis honoribus viros consumpsit? * Saxones namque ad Crodonis, Irmenfulæ, Frææ, Ostaris, arborumque cultus ægre dimissos, canum instar ejecta devorantium, revertebantur, nec pro sacris majorum mortem oppetere recusabant. Armis nihil effectum, omnia pietati tot Episcoporum debentur. Quid porro post immanes Albigenſium clades? post bella Hussitica? post Cruciatas in terram sanctam susceptas Ecclesiæ commodi accessit? In America quid profuit mactasse tot chiliadas miserorum? Dii meliora! Vastitas & solitudo ubivis inducta, ipsique barbari, nil minus quam Christiani facti, vel hoc argumento didicerunt, homines tam inhumanos cœlestibus æquiparari non posse. Ex quibus liquere Vobis arbitror, Auditores, nocuisse & nociturum semper rigorem, nec vetus illud *Ure ſeca*, esse e sacris nostris.

Quod si autem *officium*, homini cuivis Christiano incumbens, cum summo imperio jungamus, non minus ex natura Majestatis liquebit, Regibus & Principibus Chri-

liii 3

istianis,

^a Eginhart c. 8. de vita Caroli.

^b Tertullianus ad Scapul. c. 11. *Humani juris & naturalis potestatis est, unicuique quod putaverit colere: nec alii obest, aut prodest alterius religio. Sed nec religionis est, cogere religionem; qua sponte suscipi debet, non vi; cum & hostiæ ab anima libente expostulentur.* Attamen hæreticos ferro & igne delere, antiquum esse, Leo Allatius de concord. utr. Eccl. c. 13. n. 2. & Alemannus ad Procopii anecdota pag. 55. 56. probare voluerunt. Rectius Agathias lib. 1. Hist. & Ballamo ad Photii Nomocan. tit. 1x. c. 23. id damnarunt. Procopius etiam Justiniani consilium a sapientibus culpatum refert, quo Samaritas vi ac minis ad Christianam religionem compulsi. Epistolam Theodahadi ad Just. vide apud Cassiodor. x. 26. Professæ opera hanc materiam pertractarunt Lockius, Werenselius, Baylius, Saurinus; omnes brevitate & pondere rationum superavit Clarissimus Noodtius in Orat. de religione ab imperio libera.

stianis, non modo *jus* aliquod esse circa sacra, sed eisdem jure naturali *obligari*, ut Ecclesiam, quatenus visibilis est, & externum collegium constituit, alant, propagent &, quantum in ipsis est, adversus turbas, lupos, falsosque doctores defendant.* Fit autem hoc, si impensæ ad cultum divinum necessariæ exhibeantur; scholæ religionis seminaria instituantur, Pastores idonei Ecclesiis præficiantur; ac proba educatio modis omnibus promoveatur. Huc pertinent leges plurimæ ab Imperatoribus ad cultum Dei, & Ecclesiæ *πολιτειαν*; atque quietem constitutæ, quos inter eminent Theodosius, Gratianus & Valentinianus,^b quando hoc sibi curæ esse profitentur, cuncti ut populi, quos clementiæ suæ regebat imperium, secundum Apostolicam doctrinam, Patris, & Filii, & Spiritus Sancti unam deitatem, sub pia Trinitate credant. Et Justinianus,^c si pro caussis, inquit, corporalibus cogitamus, quanto magis pro animarum salute, providentia est nostræ sollicitudinis adhibenda. Necessitas item & ratio decori, tantopere ab Apostolo commendata, ut circa ritus sacros, personas & res Ecclesiasticas, aliaque quæ aliter atque aliter se habere possunt;

a Esa. XLIX. 23. *Reges erunt nutritii tui, & semina, principes eorum, nutrices tuæ.* In Hebræorum regno pii Reges, David, Salomo, Asa, Josaphatus, & Ezechias eam curam susceperunt, etiam Deo colaudante, ut Grotius *de Imp. summ. pot. circa sacra* c. 10. §. 17. ostendit.

b L. 1. C. de *Summ. Trin.* Non omnia equidem & sæva hujus tituli capita probanda sunt, a sacro, ut multis videtur, dominatu Imperatoribus suggesta; at Theodosium Sozomenus *Hist. Eccl.* VII. c. 12. Valentinianum Ammianus Marcellinus lib. xxx. c. 9. alique plures, a Valesio in notis ibi laudati, satis defendunt. In universum de Imp. Romanis testatur Socrates lib. v. *Hist. Eccl. proæm.* res Ecclesiæ & Clerum ab ipsis pependisse, ex quo Christianismum profiteri cœperunt. Optatus lib. III. contra Parmenionem: *Donatus, furore succensus, in hæc verba erupit: Quid est Imperatori cum Ecclesia? Jam tunc meditabatur, contra præcepta Apostoli Pauli, potestatibus & Regibus injuriam facere.* Vide supra *dissert.* 1. pag. 39.

c *Nov. Const.* 115. c. 2.

sunt, aliquid ordinetur; quatenus neque Christus, neque Apostoli, nec primitivæ Ecclesiæ praxis ea jam circumscripserunt. Nihil equidem ad placandum Deum facit, quo modo, quo tempore, quo loco sacra fiant; ipse toties testatus est, ab omni ævo sibi displicuisse cultum ab hominibus inventum; accidit fere tamen, ut quælibet Ecclesia peculiaribus institutis suo commodo utatur: in quibus carene nequit auctoritate civitatis; quæ semper nutabit, ni acutiorum & hominum inepte curiosorum novationes removeantur. Nulla in re profecto periculosius luditur; quia mens humana, vaga & inconstans, ad novitates istas facile excitatur, ut omne humanum genus est avidum nimis auricularum. ^a Docentes in Academiis, Ecclesiis, & scholis, quemadmodum vitæ sanctimonia eminere, atque munus illud sanctissimum, ea, qua dignum est, religione, & vigilantia fungi debent; sic & fas piumque dignationem ipsis haberi, non verbis tantum, sed re ipsa, ut quibus opus est hac lucerna (opus autem est omnibus) oleum infundant. Ministrorum est docere Reges; non regni negotia acriter censura perstringere: plebs enim ventis ejusmodi Tribunitiis agitata, vatibus melius, quam ducibus suis, parere solet. ^b Princeps doceri debet, ut membrum Ecclesiæ, non ministros docere; sed statuta condere & leges circa sacra: ut tamen salus Ecclesiæ suprema lex Ecclesiastica sit, & Deo magis, quam hominibus obsequamur. Dies me deficeret, si de rebus divini juris, de legibus Ecclesiasticis, de constitutionibus superiorum consistoriorum, de visitatione Ecclesiarum, de suspensionibus & remotionibus ab officio, de banno spirituali, de feriis, aliisque juris hujus partibus, ab aliis

^a Lucretii verba sunt *lib. xv. vl. 598.*

^b Curtii dictum *l. xv. c. 10.* cujus veritatem in statibus popularibus multa exempla ostendunt. De Atheniensibus Livius *l. xxxi. 44.* de Romanis Quintilianus *Decl. 268.* de Belgis Grotius *l. xv. Histor. Belg. ad. A. 1595.* & Huber. *de Jure civ. lib. I. S. 3. c. 5. §. 25.*

aliis ^a recte exposita, cum pulvisculo huc converrere vellem: sufficit constare, summam potestatem habentibus, sive Rex, sive Optimates, sive Populus eam habeat, jus aliquod circa sacra competere, nec Ecclesiam statum esse ab imperio civili omnino separatum, id quod primo loco distincte erat demonstrandum.

Nunc, age, proprium sermonis nostri fundum ingredientes, totum, ex Jure publico, ordinemus ad partem, & hoc jure an Reges & Principes Germanorum usi fuerint, videamus. Quum falsa adhuc numina placarent majores nostri, in varias gentes divisi, pars magna imperii penes populum, nec Regibus infinita potestas; ast Sacerdotum provincia, ultra proprium objectum, usque eo fuit extensa, ut in negotiis civilibus per eos silentium imperatum, ipsisque executio quoque poenarum civilium committeretur. Neque enim animadvertere, neque vincere, neque verberare quidem, nisi sacerdotibus, permissum; non quasi in poenam, nec Ducis jussu; sed velut Deo imperante, cujus sese ministros jactabant. ^b Postquam vero Germani paulatim, inde a sæculo quarto, institutionem Christianam acceperunt, & in unum corpus civile coacti sunt a Francis, facies Reipublicæ mutata est. Magna apud hos, & merito suo, omnis ordinis Ecclesiastici fuit auctoritas; nec minuit, sed auxit principale culmen, quod sanctorum Ecclesiæ Antistitum & fidelium Christi fervorum suffragia audiebantur. Summum item honorem Pontifici habuerant Romano, nullam tamen ut huic in se permitterent potestatem. Plane a nutu Regum Merovingicæ stirpis

^a Adi in primis ad Grotium de *Imp. S. P. circa sacra*. Pufendorf. de *Habitu Rel. Chr.* §. 44 seq. Thomasius *Vindic. jur. Maj. circa sacra*. Ejusdem tract. de *Jure Principis Evang. in controuv. Theol.* Item diss. de *Jur. Princ. circa adiaphora*. Item ejus diss. de *Officio Princ. Evangelici circa augenda salaria ministrorum Eccles.* denique notas ejus ad Huber. de *Jure civ. l. 1. S. §. c. 2.*

^b Cæsar de *B. G. lib. vi.* Tacit. de *M. G. c. vii.*

pis pependisse Episcopatus, pleni sunt libri Gregorii Turonensis. ^a Carolo Magno posthinc Adrianus Pontifex, in præmium asseritæ libertatis, jus detulit ordinandi Catholicam sedem. Quin nemo est, qui vel concilia, vel canones, aut capitularia, aut hujus Episcopatus Historicos per transfennam inspexerit, qui negare ausit, penes Carolinam familiam jus circa sacra perstetisse. Willibrordum, primum Episcopum Trajectinum, misit Pippinus: Fridericum, ordine octavum, fecit Ludovicus Pius: ^b similique ratione ceterarum diocesium Episcopos soli constituerunt Reges; soli indignos removerunt; soli convocarunt Synodos, earumque decreta confirmarunt: nec locus occurrit ullus, unde constet, auctoritatem Concilii majorem, quam consilii fuisse.

Extincta sub initium sæculi decimi, cum Ludovico IV. Carolidarum regnatrice domo, nationes Germanicæ sui rursus juris factæ, in pristinam se libertatem recipere, suisque Ducibus uti potuissent; sed Ecclesiarum Præsules, Comites & Nobiles, extrema omnia ab his metuentes, Regis potius boni, ac publicæ Fortunæ vindicis imperium retinere maluerunt. Quin ipsos Duces, siue avitæ libertati, siue ambitioni & licentiæ studentes, Normannorum incendia, Hunnorum furores, Venedorum & Slavorum impetus, Germaniam misere tum lacerantes, ad Imperii corpus vel invitos mox reverti cogerunt; ne dum singuli pugnarent, omnes vincerentur. Produunt annales, quam acriter Conrado I. a suis ad regni culmen evecto, frontem opposuerint potentissimi quatuor provinciarum Duces: summum tamen jus circa sacra, in concilio Altheimensi convocando, in constituendis Episcopis, etiam in causis connubiorum

Kkkk

rum

^a L. I. Hist. c. 31. IV. 15. 26. & ex eo, aliisque Bignonius in notis ad Marculf. p. 884. Baluz. ad tom. I. capit. p. 1012. 1141. & ad Concilia Galliæ Narbon. pag. 34.

Beka Chron. pag. 9. & 23.

rum penes Regem fuit. * Magis lacertos movit Henricus, id nomen primus, Othones & reliqui ad Henricum IV. omnes, quorum regia potestas, sicut in rebus mundanis ubilibet viguit & negotiosa fuit, sic investire Episcopos, aliasque sacrorum partes exercere, solius erat Imperatoriae potestatis. ^b Hæc aurea illa sunt tempora, de quibus Petrus de Ferrariis. Papiensis, miro candore & simplicitate scribit: ^c *Nam scire debes, tu ignare, (Laice) quod Imperium aliquando habuit utrumque gladium, temporalem, & spirituale; adeo quod tunc Imperatores conferebant omnia beneficia Ecclesiastica, per universum orbem, & amplius eligebant Papam. Neque enim Episcopi tantum & Abbates, Archimandritæ & Cœnobiarchæ, horumque Adjutores & Advocati, sed & ipsi Pontifices Maximi Regum munere constituti, hisque auctoribus, si immorigeri essent, pontificatu moti sunt. Otho I. ut Augustale diadema Romæ accepit, cum Leone pactus est, ne Romani summum Præsulem crearent ullum, quem Imperator non probaret; eoque jure Otho II. Johannem XIV. Otho III. Gregorium V. Pontificem renunciavit. Henricus autem III. tres Pontifices scismaticos, totidem monstra impietatis convicta, Magistratu Ecclesiastico se abdicare præcepit, populumque Romanum, ne injussu suo ad electionem accederet, sacramento adegit. ^d De Episcopis minor dubitatio. Quemadmodum enim filia parentem sequitur, sic Reges ut Præsules darent Ecclesiis, quas e bonis Imperii,*

cx

* Stadenfis ad a. 915. Ditmar. p. 325. Tom. 1. Leibnitii.

^b Luitprandus lib. vi. c. 10. 11. Henschen. ad 4. Febr. vita S. Remberti, juncta Cl. Hahnii Hist. Germ. t. 1. p. 239. Lehman. Chron. Spir. l. 2. c. 41. Meibom. tom. 2. diss. de jur. invest. Conring de constitut. Episcoporum Germania. Mabillon t. 1v. Annal. Ord. S. Bened. p. 141.

^c In praxi sua, tit. 50. de form. libell. ex. substit. gl. 9.

^d Paſtorum formulas servavit Theodoricus a Niem de investit. Regum Teuton. pag. 249. Goldast, t. 1. Const. Imp. an. 964. & Tomo uno p. 231. An illæ authenticæ sint, de industria inquisivimus supra, dissent. 1. de Jure Imp. cap. 2.

ex suo, paterno, vel avito patrimonio fundarant, aut dotarant, jus & æquum erat. Vel unicus Conradus Salicus nobis sufficiat, cujus viscera in templo Cathedrali hic recondita servantur: is vero Bernulphum Episcopum Trajectinum pedo pastoralis & annulo investivit.^a

Interim jam, inde ex sæculo secundo, apud sedem Romanam potentior fuerat principatus; cum propter martyria primorum Episcoporum tum propter eruditionis & sapientiæ famam. Constantinus, Magni nomen adeptus, sed regnandi artibus parum instructus Princeps, nimia sua indulgentia, Papatum mox stabilire cœpit. Justinianus, Urbis regię amplitudine, majestate & antiquitate motus, eidem *πρωτοδυνα* & alia quædam privilegia concessit. Pippinus deinde & Carolus M. amplius eos territorio, Ravennate Exarchatu, salvo dominii jure, donarunt. Tandem cum pleraque Europæ regna horum auspiciis ad Christi disciplinam ducta essent, summi & imi ipsos, ut Papas, ut patres suos spirituales, & Episcopos œcumenicos venerati sunt. Nec minus Prælatorum res & auctoritas, per precarias, per feudorum oblationes, aliosque aureos hamos crevit: siquidem Imperatores, ultra liberalitatis metam sese abjicientes, ob remissionem peccatorum, pro remedio animæ suæ & suorum, ob spem & pretium vitæ æternæ, si Diis placet! Imperii bona profuderunt in Sanctorum cohortes, & prodito semel ab Othone M. Brunonis Archipræfulis Colonienfis exemplo, ducatum Episcopatus jungi posse, res ante toto cœlo separatas,

K k k k 2

ratas,

^a A 1039. Beka p. 39. Heda p. 118.

^b Conf. Euseb. l. 11. d. vita Const. 35. l. 1v. 24. junct. Obs. sel. Halens. T. 1. O. 24. Cl. Struvii diss. de Christianismo polit. Constantini M. scilicet. 4.

^c L. 16. C. de Sacros. Eccl. Nov. 131. At l. 8. C. de Summ. Trin. qua Ecclesia Romana supra modum extollitur, suppositam esse, adversus Alciatum iv. Parerg. 23. & Cujac. x11. Obs. 26. contendit Hotman. in bruto fulm. Sixti V.

^d Sigonius lib. 1v. de Regno Ital. Carolum has terras, jure principatus, & disione sibi retenta, Pontifici permisisse.

ratas, sacerdotium & principatum, jugiter ea fini miscuerunt Imperatores, ut Episcopos sibi addictos Ducum molitionibus opponerent, consilio quidem non malo, sed pessimo eventu. Regum domos soli fere Episcopi tenebant & Abbates: fors lecta Dei, montes cœlestium soli participes. Hi primis curiæ negotiis erant præficiendi, propter idioma Imperii Latinum, id quod soli in claustris tractabant. Unde hos Archicapellanos, Archicancellarios, Cancellarios, Notarios, & quot alios, in tanta opportunitate, quum Principes profani inter Martios spiritus fortunam alebant, amplissima honorum & opum seges mansit. Summo autem cum orbis stupore, hi subditi & clientes tanta beneficia converterunt in exitium auctorum, ut proverbio locus fieret: *Proprium Ecclesiæ esse, Cæsares timere & odisse*. Avidos scilicet facit nimia felicitas, nec tam temperatæ sunt cupiditates unquam, ut in eo, quod contigit, desinant. Gradus a magnis ad majora fit: & spes improbissimas complectuntur inasperata assecuti.

Laudibus passim evchitur Otho I. quod Imperatoriam, id est, summam humani fastigii dignitatem, a Caroli posteris neglectam, Germanis perpetuum recuperavit. Utinam vero Germaniæ regnum cum Italia & imperio in Romam nunquam coaluisset! prætextu enim coronationis Romanæ potestatem in Cæsares, & omne jus circa sacra sensim Pontifices usurparunt, vulgique invaluit opinio, Augustos ad horum regiam, velut Imperii matrem, rationes suas potissimum referre debere. ^a Nemo repente fuit turpissimus: multorum, quia imbecilles fuerunt, latent vitia; quoniam minus in perniciem Germanici Imperii, cervicibus suis gravis, ausuri, si vires suffecissent. At omnes inter Episcopos, quos Roma innumeros tulit, repertus fuit nemo, qui
majora

^a Memorante Guicciardino in *comm. polis*.

^b Seneca 1. de *Clem. c. 1.*

^c Vide Guntherum *lib. vi. Ligur. vs. 270. & 534.* ad quem plura *Heim. Helt. de orig. & progr. spec. R. G. I. Rerump. §. 10. 16. 19.*

majora vel paria sibi arrogarit, quam Hildebrandus, sæculo XI. exeunte Pontifex Romanus. Monstrum istud hominis horrendum & ingens, sumto Gregorii VII. nomine, armis Normannorum fretus, opibus Comitissæ Mathildis confusus, & discordia Principum Germanorum inflammatus, ^a non modo Ecclesiam civili potestati eximere; in Hispaniam, Galliam, Angliam, Daniam, Poloniam, ceteraque Europæ regna sacrum quendam dominatum moliri; sed ipsum Henricum IV. Imperatorem, Simonix reum facere; mox inauditum diris devovere; & tandem Canusii indignissima passum, quasi legitimus judex, regno privare ausus est, exemplo inaudito. Hujus dein vestigiis graviter insistens Curia Romana, Hierachiam illam tam altis radicibus firmavit, ut præter investituram, quam vocant, per annulum & baculum, partem imperii nobilissimam, plurima quoque juris sacrorum capita invaserit; postquam Callistus II. Henrico V. fessio & impari, hic loci defuncto; tandemque Nicolaus V. Friderico III. per famosa Concordata, confessionem erepti juris extorserunt. ^b

Heu pudet effari, evenisse tum cultiori Germaniæ, quod de Meroensibus, Æthiopum populo, tanquam singulare, & inauditum, memoriæ prodidit Strabo: ^c summam penes sacerdotes fuisse potestatem, tantamque auctoritatem, ut nonnunquam, missio nuncio, mortem Regi imperarent, & alium ei sufficerent. Sed Pontificis Vaticani amplior ex hoc tempore coepit majestas, immo tanta, ut omnes, quotquot fuerunt Sacerdotes, longo post se reliquerit intervallo. Nunc enim, secundum *Dictatus* Hildebrandinos, non

K k k k 3

modo

^a Vide Onuphrium Panvinium in *ejus vita*, Bayle *Diction. in Gregoire VII.* Cl. Ditmar *vitam Gregorii*, & *Historiam belli inter Imp. & sacerdot.*

^b Ille in comitiis Wormatiens. A. 1122. hic in Concordatis A. 1448. Utrumque diploma habet Leibnit *Cod. J. G. dipl. p. 1. n. 2. & 158.* Machinationes detexit P. Maimbourg *Histoire de la decadence de l'Empire.* & Schilt. de *L. E. G. l. 1v. c. 5.*

modo Magistratus Ecclesiastici, Archiepiscopatus, Episcopatus, Abbatiae & Canonicatus arbitrii sunt facti Papalis: sed in cunctos homines, sive paganos, sive Christianam fidem profitentes; adeoque Reges etiam, Principes, & summas quasvis potestates; earumque vitam, bona, terras, regna, imperia, Vicarii hujus cœlestis potestas usque eo extensa est: ut is, velut Dei personam inter homines sustinens, quos Reges privatos fieri, quos diademate ornari oporteat; quæ ruant urbes, quæ orientur, suæ jurisdictioni vindicaret. Mox quoque Cœlestinus corona Imperatoria pedibus ludendo, Alexander vero Friderici collum calcando, super aspidem & basiliscum ambulasse, leonem & draconem conculcasse fingebantur. ^b Inde tot Imperatores de culmine præcipitati, alii in turbas factionesque distracti, insidiis & perfidiæ suorum patuerunt. In reluctantes vibratum fulmen Capitolinum, capita diris devota, execrables & sacerrimi proclamabantur. Nunc quidem orbi universo fragores isti tam sunt ludi, quam Vulcanus suam terens incudem: at in illa superstitionis nocte brutum fulmen Principes ac populos non minus sollicitabat, quam sonus fundæ inanis aviculas in terrorem dare potest. Cum nullo excommunicatis commercium, omnes eis decedebant, aditum eorum sermonemque defugiebant; omnes vitabant, ut impios & sceleratos, in cineres ipsos rabies ista sæviebat. Henrici IV. cadaver ex monumento regio Leodiensi extractum, integrum quinquennium Spiræ in ædícula, extra Ecclesiam, stetit inhumatum. Ludovicum vero Bavarum proscriptum quot-

^a *Lib. XVII.*

^b Fabulam de collo Friderici I. supplicis calcato, in contumeliam Germanorum esse confictam, docuit Rittershusius *ad Jovii Fridericum*, p. 215. in appendice notarum ad Guntheri Ligurinum. Reines. *ad Rup. epist.* 57. & Rupertus *ad Besold. c.* 18. Ipse Baronius *ad A. Cbr.* 1177. opinionem huic grandem dicam impingit, quia nemo Friderico æqualis tantum facinus prodidit, ab Alexandri Papæ moribus, si diis placet! alienum.

quotquot hospitio exceperant, cibo vel potu juverant, ruri omnes extra cœmeteria sepulti memorantur.^a

Dum ita servus servorum fastu & dominandi libidine apud Germanos insaniebat, exteri reges in speculis fuerunt; & Gallica imprimis natio *Libertatibus* suis magnam istius Hildebrandinæ monarchiæ partem ivit destructum; jusque nominandi Episcopos, pragmatica sanctione a Leone X. recuperavit.^b Bonifacii VIII. bulla, qua Philippus regnum suum liberum Papæ feudum esse agnoscere jussus, Ordinum decreto publice fuit combusta: ^c & nemo, nisi in superiorum temporum historiis sit hospes, memorabilem Ludovici XII. ignorat nummum, cum elogio: *Perdam Fabylonis nomen*.^d Carolus V. Roma occupata, Clementem VII. sex menses in custodia detinuit, atque abolita per omnem Hispaniam Sedis auctoritate, successoribus facultatem conferendi beneficia Ecclesiastica asseruit. ^e Nolo plura; cum ipsi Germaniæ non defuerint heroes; qui lingua, calamo,

armis,

^a Graphicam excommunicatorum civium Ultrajectinorum descriptionem dedit Marthæ. *de nobil.* l. 11. c. 21. & *de Jure gladii* c. 31: nec dissimili pœrarum genere Druides Gallorum olim usos, docet Cæsar *de B. G. l.* vi. c. 13. De Ottone IV. & Henrico IV. exauctoratis, quædam notavit Reines. *lib. II. Var. lect.* c. 16.

^b Extant de hoc argumento libri varii: sed Petrum de Marca vide instar omnium. Concordata cum Leone X. habet Leibnit. *Munt. C. p.* 1. n. 4.

^c Vid. c. *unam sanctam Extravag. Comm. de majoritat.* juncto c. *meruit. de privileg.* Hinc liber sextus Decretalium in Gallia nunquam receptus. Duaren. *de Jacr. Eccl. min. præfat.*

^d Ex *Esa. xiv. 22. Babilonis vult* Harduinus *Op. p.* 925. sine ratione valla, ut eruditus Germanus ostendit.

^e Auctor sit locuples Vasquius, Philippi Regis Senator. *l.* 11. *contr. ill. c.* 51. Memorabile etiam est diploma Urbani Papæ II. de Monarchia Ecclesiastica Siciliæ, A. 1096. Rogerio datum, apud Leibnit. *Prodr. Codicis dipl. n.* 1 cui refutando Baronius Cardinalis, tomum, apud Hispanos prohibitum, destinavit. Idem jus Angliæ regibus fuisse, testatur Ingulfus Abbas *Rer. Angl. libro.* Verum quid A. 1103. mutationis acciderit narrant Walterus Hemmigford. *l.* 1. *Chr. en. c.* 28. & Joh. Brompton. *Chron. p. m.* 1003. De aliis regnis *supra pag.* 41.

armis, agerent imperii causam; ut Curia Romana, de quietâ possessione, multo minus de præscriptione gloriari non possit. Nil dicam de Gibellinis; prætereo Goldasti & Schar-
dii collectiones: ipse Lotharius Imperator, duo Friderici, Otho IV. Henricus VII. & Ludovicus IV. jus circa sacra vindicare conati sunt. ^a Similiter Conrado Suvo quid animi fuerit, ex eo diplomate insigni, cui Eugenius etiam Pontifex subscripsit, apparet. ^b Tepuit autem deinde ple-
rorumque Imperatorum studium: dum alii jus circa sacra insuper habuerunt: alii piis Episcopi pedibus advoluti, eosque osculati sunt: alii rursus, stratorum instar, strepam tenuerunt. Multos expeditio sacra retinuit: ^c plures improba Episcoporum studia retraxerunt: plerosque opinio inveterata, de Sedis Romanæ universali potestate, ex dictis S. Scripturæ, perperam intellectis, impedit: donec justa tandem Principum indignatione effectum est, ut ne Pontifici in infinitum jure Imperio abstracto & usurpato, aut, si quod habuit, ob ruptam tot transactionum fidem amisso, nullo & imaginario abuti liceret.

Vix dici potest, quam repente Hierarchiam exceperit luxur, ambitio, inertia, artium & linguarum ignorantia, summa deinceps morum ac doctrinæ corruptela. ^d Tot enim opibus undique affluentibus non gradu, sed præcipiti cursu, ad vitia transcursum, vetus disciplina deserta, a labore ad voluptates inversa sunt omnia. ^e Cleri Deus venter erat;

sacras

^a Schilterum adi de L. E. G. lib. IV. c. 6. l. v. 2. 8. vi. 1. 2. & Muratorum des Droits de l'Empire sur l'Etat Ecclesiastique.

^b Apud Wilh. Hedim Hist. Episc. Ultrajectens. p. m. 164.

^c Prorsus ut apud Tacitum lib. XIV. Ann. c. 31. *Templum divo Claudio (Divæ Mariæ) constitutum, quasi arx æternæ dominationis aspicietur; delectique Reges & sacerdotes, specie religionis omnes fortunas effundebant.* Adde Cl. Buddcum de Expedit. cruc. Maimbourg des Croisades. De strepa vide supra Diss. 1. pag. 13.

^d Trithemius ad a. 1359. pag. 236. Seckendorf Hist. Luth. l. i. §. 88. 123. 133. l. iii. 3. 96.

^e S. Bernardus olim exclamavit: *Religio peperit divitias, sed filia devoravit matrem.*

sacras mercari dignitates sæculum vocabatur: Tonsus Monachorum grex, vario cucullo & vivendi ratione, in varia sectarum genera, barbatorum, funigerorum, nudipedum, pullatorum distinctus, sacrificio suo missatico, suis Sanctorum reliquiis, cereis agni imagunculis, iræ divinæ minis, rosariis, aliisque venalibus indulgentiarum fumis, simplex vulgus emungebant; cum experiundo didicissent, quod multitudinem nulla res efficacius, quam superstitio regat. Laicus etenim Christianus, stupidi jumenti instar, bajulabat religionem, ut asinus sacra Iſidis; & unusquisque aut metu poenarum, aut opum, honorum, vel melioris fortunæ expectatione, periculum inquirendæ veritatis fugiebat. Quid? quod illa cœlestium scriptorum lampade remota, ne oculatioribus quidem patuerunt præstigiæ tenebrarum, & Caci domus atra, abjuratæque rapinæ.

Nolo quicquam ceteris nationibus detractum; sed placuit divinæ providentiæ, Maximiliano imperante & connivente, in Germania primum uti ministerio magni illius Alcidiæ, Martini Lutheri, ad corruptum longa consuetudine Ecclesiæ statum emendandum: quem Occolampadius deinde, Zuinglius, Calvinus, Beza, alique Semones luci & nitori suo restituerunt. Maturius Waldenses in Gallia, Wiclefitæ in Anglia, Hussitæ in Bohemia faciem sacrorum miserrimam fuerant detestati: sed hi, statim in crepusculo cluſcendentis veritatis, velut rebelles & læsæ Majestatis rei, aut angustiis inclusi, aut rogo dicati, opus desperatum perficere nequiverunt. Magnæ quondam molis fuit Romanam condere gentem; sed majore Rerumpublicarum motu invadenda erat auctoritas Sedis Romanæ. Herculi facilius clavam, quam illi dominationem in conscientias extorsisses. Omnis Clerus minor ad reformationem pronus; major, cetera discors, pro commodis & opibus

LIII

suis

^a Curtii vox l. IV. c. 10.

^b Compara Virgilium VIII. *Æneid.* vs. 256 *seqq.* cum elogiis Viri apud Seckendorf. *Hist. Luther* l. III. §. 36. §. 135.

suis pugnabat; virtus post nummos. Reges & Principes, licet cum Adriano VI. hujate, Pontifice candidissimo, ^a cum Carolo V. ejusque conscientiae rectore Glapione, cum interioris admissionis ministris, cum omnibus denique rerum divinarum peritis, necessitatem reformationis facile agnoscerent, classico tamen hæreseos, ad expediendas secures incitabantur. Eadem vel paria Reformatoribus, quæ primis Christianis, impacta crimina: ^b *Bonus Vir. C. Sejus, sed malus tantum, quod Christianus*: quod Augustanæ confessioni addictus. Bella, tumultus, aliaque infelicis sæculi mala ipsis assignata, impiis velut naturæ hostibus, publicæ Dei atque hominum ultioni, e medio tollendis. Ad bestias, ad leones clamabatur. At profecto, si rem ipsam, si auctorum vilitatem & impotentiam, si progressus velocitatem per omnem Europam intueamur, Dei digitum agnoscamus oportet. Retecta Evangelii lux omnium fere regnorum, Galliarum, Angliarum, Scotiarum, Sueciarum, Daniarum, Poloniarum, Hungariarum, Belgicarum quoque hujus & Helvetiarum urbes, castella, tribus, palatia statim implevit; & quominus totum pervaderet Christianum orbem, non nisi extrema violentia effectum est. Hispanos sævum inquisitionis tribunal; Italos commoda Hierarchiæ; alios utilitas ex monasteriis, intuitu liberorum, repressit. Verum in parte vastæ Germaniæ prope dimidia; frustra fulminantibus Romanis, per damna, per cædes, ab ipso ferro, puriora sacra vires acceperunt & incrementum.

Dulce videlicet nomen libertatis est, Auditores; sed dulcissima libertas ipsa: quam non ab hominibus tantum expecti, sed ab ipsis brutis animantibus rebus omnibus anteponi videmus. Suetus regibus fuerit Oriens, & amica Asiaticis dominatio; eo quod Chamum Noachus, maledictione sua, ad infimum servitutis gradum detruxit. Europæis autem mens semper erectior, quam ut ad libidinem dominorum

^a Seckend. lib. 1. S. 56: §. 142. 143. & in epilog. p. 698.

^b Tertullian. Apolog. c. 3. & lib. 1. ad nat. c. 4.

norum se componerent, eorumque jussa pro legibus haberent. Perpauca inde regna, plures Republicæ apud Græcos, Britannos & Gallos, ante dominationem Romanorum, sunt numeratæ, apud Germanos adhuc serius: quia horum Republicæ scopus fuit *Libertas*, ob indolem, quam sortiti sunt, generosiorē, ex majorum illustri hereditate. Ad *libertatem* hanc *avitam* provocabat Arminius Dux: ^a Lucanus eam Germanum *Scythicumque bonum* appellat. Magis exaggerat summus Morum Germanicorum scriptor, quum Parthos, Aquilis tremendos, superari facilius, quam Germanos potuisse, his verbis fatetur: *Arsacis regno acriorem fuisse Germanorum libertatem. Triumphatos magis, quam victos.* ^b Ut vere Germanis sic conveniat, quod de Quiritibus suis dixit M. Tullius: *Aliæ nationes servitutem pati possunt, Populi Romani propria est libertas.* ^c At fortuna istæ magno olim stetit Romanis: stetit & majoribus nostris; cladibus aliquando affecti sunt; nunquam perdomiti: pro aurea libertate sua, donec ipsa cederet Roma, pugnarunt. ^d

Longius civium amor a proposito me abducere videtur: at sane rem ipsam premo. Quod si enim corporis libertatem sanguine suo redemerunt Alamanni gentiles, a gentilibus Romanis: quid non eosdem, cum Jesum Christum caput suum unicum agnoverunt, ausos fuisse putabimus, pro libertate conscientie; summo illo humani generis bono pro jugo isto Clavigeri decutiendo, quod neque majores

LIII 2

co-

^a Apud Tacit. 11. *Ann.* 10.

^b Lucan. *lib.* VII. Tacit. *de M. G. c.* XXXVII. Utrique quidem *libertas* alibi *Democratiam* notat, cujus præcipuus finis *libertas*: eoque pertinent Cheruscorum querelæ, *adimi veterem Germaniæ libertatem*, apud Tacit. XI. *Ann.* c. 16. verum Josephus l. 11. *de bello Jud.* c. 16. Germanos pro libertate pugnaces; Seneca l. 11. *de ira* c. 15. *liberam gentem* appellavit.

^c *Phil.* VI.

^d Claudian. *lib.* 11. *de Land. Stilic.* idcirco querit:

*Qui mihi Germanos solus Francosque subegit,
Cur nondum legitur Fastis?*

eorum, neque ipsi ferre potuerunt? Itali, jam sæculo duodecimo, in suam perniciem, derulerant studia litterarum ad Germanos. Hi longi temporis barbariem ^a cito compensabant; erectis tot Academiis, bonæ mentis officinis, & arte typographica reperta; cujus beneficio, præter divina Oracula, optimi libri, blattarum hætenus ac tinearum epulæ, in vulgus spargebantur. Ipsi qui ad clavum, non leviter bonis litteris tincti. Hos inter Fridericus II. doctus & eruditionis Patronus. Maximilianus, quas puer odio habuerat, litteras impense fovebat. Erasmus, Budæus, Reuchlinus, Ferus, Huttenius, alique Viri Celeberrimi superbiam & avaritiam Romanam perstringebant. Jurisconsulti tot Imperatorum constitutiones de divinis legentes, velut e somno excitabantur. Aliqua item Historiæ veteris Ecclesiasticæ notitia, non dogmata modo complura in falsi & novitatis suspicionem adducebat, sed & a Pontificibus nihil humani alienum fuisse testabatur. Prodigabant Benedicti, Gregorii, Julii, Leones: homines monstrosi, vita turpissimi, moribus putidissimi; a quibus æternam suspendere salutem, insani esse apparebat. Ipsum pseudo Petri solium, non petræ, sed arenæ magis imaginem præ se ferens, toties per diuturna interregna fuerat destitutum, tot scismaticis lubricum, ut quis fuerit legitimus Papa, ipsi successores dubitarint. ^b Atque sic tandem, ex Christi promisso, obstitit Deus, ne portæ sepulchri contra Ecclesiam prævalerent: sic etiam cœlesti beneficio operata quæ fuerant, aperta sunt; lux tenebras vicit, mendacium veritati cecidit; conclamatum erat de auctoritate Sedis Papalis.

Sæpe de doctrina, sæpe de vita Sacerdotum emendanda actum; Concilia convocata; edita avasamenta Constantiensia,

^a Aventinus *lib. vii. Ann. Boicor.* c. 18. proverbium Romanæ Curie memorat: *sibi maxime utile esse, Germanos quam stolidissimos habere.*

^b Luitprandus *Hist. lib. vi. c. 7.* Conradus Ursperg. *ad. A.* 1076. Baron. *ad. A.* 897. 900. 912. 933. & *alibi.* Causam indicavi supra *disser.* 1. pag. 62.

sia, Moguntina, Basileensia; multa tractata, pauca conclusa; quod indictum dictum, quod pactum, non pactum erat, cum illis lubebat. In re itaque desperata, quum Lutheri dogmata plus semel hæreseos damnata, & centum Gravamina adversus pontificatum vana spe eludebantur: Status Protestantes, ut suæ suorumque subditorum conscientia consulerent, vigore avitæ libertatis, & potestatis jam adultæ, summa cum moderatione, subditis non coactis, sed instantissime petentibus, in regionibus suis reformare instituerunt, ^a & magnam fortunam magnus animus decebat. Jam sub Francorum regno Optimates, quos infringendæ libertatis urgebat metus, Ducum, Comitum, aliisque Dignitatum gradibus placandi fuerant; ut res suapte natura dissociabiles, *Principatus & Libertas*, coirent in unum. Mutare id Carolo visum, sed cum is abiisset ad plures, quanta Ordinum potentia, per discordiæ fratrum, dein facta fuerit, Caroli Crassi exauguratio, & Arnulphi electio ostendit. ^b Extincta hac stirpe, Duces, Marchiones, Landgravii, Comites, Barones, Civitates & Nobiles ad libertatem summam, non simul nec semel, sed paulatim, arboris instar occulto ævo crescentis, per varia temporum spiramenta, alii serius, alii ocius, adspirarunt. ^c Hujus libertatis publicæ certissimum argumentum est sublimis ille sublimium capitum pileus, prisco Scytharum more pellitus, Regum variorum gestamen: ^d quem item, ceu libertatis symbolum, LIII 3.

^a De Saxonia Seckendorf. *H. L. lib. 1. Sect. 57. §. 153. in add. n. de Palatinatu D. Coccejus 7: P. c. 28. S. 1. §. 26.*

^b Luitprandus *lib. 11. bist. c. 3. Annales Fuldenenses ad a. 832.*

^c Vid. Cl. Gundlingii *Henr. Auc. §. 10. & 36.*

^d de quo Paschal. *de coron. lib. ix. c. 23.* Scythis ferinas pelles & murinas tribuunt Seneca & Justinus. Germania pelles pretiosæ, ut alius purpura, dignitatis symbolum fuerunt. In pellium *maculis* ornatum eos quæsisisse, auctor est Tacitus *de M. G. c. 17.* *Pellita Getarum Chiria* est apud Claudianum. De pellitis Francorum Ducibus Alteserra *de Duc. & Com. lib. 2. c. 12: De marturinis* Procerum Germanicorum Helmoldus, aliique.

lum, Henricus II. Gallia^a rex, publico præfixit scripto, in quo fœderis, cum Mauritio Saxone, aliisque Protestantibus initi, rationem reddebat. ^a Hinc Imperatores *Statibus Libertatem, omnibus justitiam jurarunt*, ^b unde Capitulationum origo. Jam ante has, secundum Auream Bullam Caroli IV. ^c Cæsar Principibus *Privilegia, Literas, Jura, Libertates confirmare tenebatur*. Nec Baldus ^d tantum Principes Germaniæ pro regibus habuit; sed & Maximilianus I. pariter ac Carolus V. Imperatores Monarchiæ tenacissimi, in *Germania Regibus Regem imperare*, dixisse feruntur; cum veris in regnis obtineat: Qui Rex est Regem Maxime, non habeat. ^e

Verum ut plenius Statuum Imperii jus circa sacra & ab ovo cognoscamus, sciendum est, quod apex & culmen istius Libertatis, in tantum fastigium evectæ, fuerit sacrorum potestas; quam Ordines seculares pridem sub Merovingis in censu suo posuerant; ^f labente autem & extincta Caroli gente, primum Duces, mox Principes, tandemque laici Proceres omnes, longo usu, vel ex privilegio, per quandam velut Cæsareæ Majestatis emanationem, postliminio sibi vindicarunt. ^g Bavariae Dux Arnulphus, jam tum illis temporibus, quum sacrorum regimen integrum adhuc stabat penes Cæsares, ab Henrico Aucepe jus ordinandi Epif-

CO-

^a Spondan. *Ann. Gall. ad A. 1552. n. 6.*

^b Lehman. *Chron. Spir. l. IV. c. 10.* Hotman. *Franco Gall. c. 6. 7.*
^{12.} *Spec. Sax. l. 3. art. 34.*

^c *C. 2. §. 8.*

^d *Ad l. fin. C. de Test. mil.*

^e *Martialis l. 12. Epigr. 18.*

^f Vide Thasilonis decretum *s. legi. veteri Bojorianorum subjectum. Velferum: l. v. Rer. Boic. p. 161.* Alteserr. *de Duc. & Com. c. 7. 8. 9.*
Petrus de Marca l. VII. de Concord. Regni. c. 25.

^g *Regino Prumiens. l. 2. Chron. ad a. 889. apud Pistor. t. 1. His diebus, inquit, Luidpertus Maguntie urbis præsul, e rebus humanis sublatus, in ejus loco subrogatus est Sunzo --- Poppone Thuringorum Duce, & Arnolpho Rege annuente.*

copos obtinuit. ^a Quin is humanis valedixerat, non filios tantum ducatu exiit Otho magnus, sed & jus sacrorum sibi rursus arrogavit, Præsulibus in hac provincia constitutis. ^b At pejor Arnulpho malo, ^c immo acerrimus scelerum vindex, & vitæ melioris assertor, Henricus Bojorum Dux, Patriarcham Aquilejensem mox castrari, & Archiepiscopum Salisburgensem excæcari præcepit, haud levi juris a fratre circa sacra recuperati argumento. ^d Jam vero quis nescit, hujus parentem Henricum, priusquam Rex fieret, *liberæ potestatis* in Saxonia & Thuringia Ducem appellatum? cui ipse Conradus Imp. *neminem in regno equiparem se scire* affirmavit. ^e Nec minorem in sacris auctoritatem sibi arrogarunt ceterarum provinciarum fortissimi Duces. Gisfbertus in Lotharingia, Everhardus in Francia, in Suevia Burhardus, Princeps clero perinvisus, & Monachis inprimis; qui cum Phocas magis & Ludovicos Pios, quam Fridericos & Ludovicos Bavaros optabant, tyrannice cum rexiffe cul-

^a Verba Statuum Baviaræ auctore Liutprando l. 2. c. 7. fuerunt ista: *Æquum justumque nobis videtur, ut quod prædecessores tui non habuere, tibi concedatur; scilicet quatenus totius Bojaria Pontifices tui subjaceant ditioni; tuæque sit potestatis, uno defuncto, alterum ordinare.* Idem Rex appellatur in Chron. Cosm. Prag. a. 937. etiam Witi-chindus Corbej. 1. Ann. apud Meibom. s. 1. p. 537. regnum ei tribuit; cum propter alia, tum quia par Regibus jus habebat in suo ducatu: si-ve ut Justinus l. 1. c. 7. ait: *etsi non regiam vitam, proximam tamen majestati regia debebat.*

^b Quia privilegium illud soli Arnulpho datum, Ditmar. p. 329. & 336. in Leibniz. tom. 1. juncto Cl. Gundlingii Henr. Auc. p. 91.

^c Stilo monachorum. Hepidanus in Annalibus ad A. 913. optimum ducem Bajoariorum vocat; & causam ejus egit Brunneus p. 11. l. 2. n. 10.

^d Ditmarus restitutus pag. 339. Tempore Ottonis III. alius Henricus, Bavariz dux, Godebardum, tunc Presbyterum, Abbatem Canobio Althænsi præponere voluit; cui ille per biennium justa satis excusatione resistit - - Sed tandem idem regimen, juxta Ducis decretum, suscepit, verba sunt Wolffherri in vita S. Godehardi c. 1. p. 485.

^e apud Ekkehard. de cas. Monast. S. Galli c. 5.

culparunt; *Regale* Sacerdotium esse Novi Testamenti, non *Ducale*, causati. ^a Arnolde equidem privilegium concessum esse videtur; at ceteri Duces, quemadmodum totum illud jus ordinandi sacra *Imperio* tribuebant, ita *singuli*, pro rata territoriorum, ejus participes esse voluerunt. Vasa odorem, quo primum sunt imbuta, diu retinent; & illi similiter, quam semel, deficientibus Carolinis, animo conceperant, potentiam constantissime urserunt, & a quibusdam etiam Episcopis regales honores mature impetrarunt. Exemplo sit Hermannus Billungus, Saxonie Dux, cui Albertus, Archiepiscopus Magdeburgensis, regium in modum obviam processit, ab Othone M. id propter multatus. ^b Alii quae Ecclesiarum Advocati jus legendi Episcopos sibi sumferunt: quemadmodum Theodoricus, Mosellanorum Dux, mortuo fratre Alberone, filium suum adhuc impuberem, dato Adjutore, Ecclesiae Metensi Episcopum obtrusit. ^c Alii aliis causis: ut ex his seculi decimi & undecimi exemplis, satis constare putem, Dominos regionum, si non omnes, saltem potentiores, jam ante Hildebrandum natum, iustissimo titulo, ex Caesarum munificentia, vel conniventia, potestatem sacrorum obtinuisse.

Sequutis temporibus non minus opportuna magnis hisce successibus fuit Henrici IV. pueritia, regni & sacerdotii discordia; interregnum longissimum, & quivis alii transitus rerum. Vae illi regno, cujus Rex puer est! Didicit hoc damno suo Gallia: in Germania vero quantum Henrico imperbi

^a De Giselberto, Episcopos & Abbates constituyente, Hugo Flaviniacensis *Chron. Virid.* p. 1. pag. 124. De Burchardo Heribertum Augiae praepositum pellente, & Luithardum instituente, Hermann. Contractus ad A. 922. p. 382. Ditmarus pag. 330. ita scribit: *Audiivi tamen nonnullos (pastores) sub Ducem, & quod plus doleo, sub Comitum potestate, magnam sustinere calumniam* &c. Add. Ill. Ludewig. in *Conrad.* I. c. 5. Cl. Hahnii *Henr. Auc.* c. 4. & *Hist. Germ.* p. 1. pag. 31. 32.

^b Ditmar. lib. 11. *Hist.* pag. 337.

^c Siebertus ad A. 1009. junct. Chifflet. in *Alsat. vindic.* c. 2.

berbi & male educato; de Imperatoria auctoritate decessit, tantum ornamenti Curiae Romanae & Principibus accrevit. * Pontifex, quod totum retinere non poterat, mira calliditate, cum Statibus communicabat, Senatus potentiam augendo, suae consulturus. * Quin utrique, & Imperatores & Pontifices, in acerrimis istis de investitura contentionibus, ut fieri solet, multa donarunt, multa confirmarunt, quo sibi conciliarent amicos. Henricus Leo, Saxonum & Bavarorum Dux, sicut inter omnes Imperii Proceres saeculo XII. potentia eminebat, sic & investituram cum annexis proprio sibi jure vindicavit. Renitentem habuit omnem clerum; sed ipse Fridericus Barbarossa, strenuus ille juris Majestatici Sospitator, privilegio indulgit, ut in terra Slavorum tres Episcopos, Aldenburgensem, Magnopolitanum ac Rasesburgensem constituere, eosque per virgam investire posset. * Idem Leo Aldenburgensem Episcopatum transtulit Lubecam, sua auctoritate: Geroldum Episcopum nominavit; homagium sibi praestari voluit; aliaque insignia juris circa sacra edidit documenta. Contra Pontifex Summus, Eugenius IV. Adolphum, Ducem Cliviensem, non modo cum omnibus Ecclesiis, Capitulis, monasteriis, Archiepiscopi Colonienfis, & Monasterienfis Episcopi jurisdictione spiritali liberavit; sed & hanc in ipsum ejusque filium Johannem transtulit. * Quid multa? Quia Principes jure hereditario, & majestatis aemula illa Superioritate territoriali nitebantur, jam saeculo XIII. vel XIV. tritum vulgi sermone invaluit proverbium: *Duces & Comites*

* Singuli, quod sibi animus suggessisset, facere impune poterant. scribit Lambert. Schafnab. ad A. 1063.

b Tiberii exemplo, Sueton. c. 29.

* Diploma Friderici produxit Maderus de vetustate Ducum Brunsv. dipl. XII. p. 121. Diploma Leonis. V. Cl. Boehmerus de Jur. Eccles. Prot. lib. I tit. 31. §. 35. Disputationes inter Leonem & Episcopos narrat Helmoldus I. Chron. Slav. c. 62. & 11. c. 9.

d A. 1404. in litteris apud Leibnit. Mantissa Cod. n. 34. 35.

mites esse Papas in suis terris, ^a & aliud non dissimile: *Cuius est regio, ejus est religio.* ^b Paucissimi eorum Concordata Nicolai V. contumeliosa, & vi extorta, calculo suo probarant. ^c Territoriorum Ecclesiæ pleræque à Dominis fundatæ erant, dotatæ, aut beneficiis, Advocatiis, & tutelis ornata. ^d Nec inepte plurimi in suo idem sibi, immo plus licere existimarunt, quam Imperatori in Imperio languente. ^e Ducum & Comitum nubes mihi in promptu esset, qui diu ante Reformationem, collapsam Ecclesiæ, & monachorum disciplinam reformarunt; Prælatos & Abbates nominarunt; ^f jus precum primariorum sibi vindicarunt, & seseque, ut paucis omnia complectar, *Fidei defensores & Protectores* exhibere conati sunt: ^h sed provexit orationem meam benignitas Vestra jam longius; ideoque tempus est, ad juris hujus firmamenta & modum veniamus.

Sarta testæ manserat hætenus, ad sæculum usque XVI. Pontificis & Episcoporum circa doctrinam potestas: de moribus

^a De Ducibus Saxoniz id testatur Stryck. *de jur. Papal. Princ. Evang.* c. 1. §. 10. de Ducibus Clivienasibus Feltman. *de jure in re* c. 5. §. 11. de Comitibus Hollandiz, ex Philippo Leidio, simile quid attulit Grot. *de Ans. Reip. Bat.* c. 5.

^b De cujus ortu Sarpus *Hist. Concil. Trid.* l. 3. Londorp. t. xv. *act. publ.* p. 240. Pufend. *de Reb. Suec.* l. XVII. §. 108. Præter rem id *cenensandum* damnat Mev. *ad Jus Lub. qu. prat.* 3. n. 22. nisi propter abusum.

^c Vox plurimorum, quæ extat in tractatibus apud Leibnitium *Cod. dipl.* p. 1. n. 158. ipsæ Concordatis deest, apud Schilterum post *Inst. Jur. Can.* p. 462.

^d De Bavariz Ducibus id ostendit Meibomius, ad Tassilonis diploma t. 111. p. 196. de aliis Magerus c. 9. *d. Adv. arm.* n. 413.

^e Eyben disp. singularem de hoc axioma scripsit.

^f Conf. Meibom. *Cbron. Berg.* t. 111. p. 307. Busch. *de reformat. Monast.* apud Leibnit. t. 11. p. 930. & de Saxoniz Principibus nuper professi opera Dn. Reinhardus, in *meditat. de jure Princ. Sax.*

Vid. Cl. Gribneri *Opusc.* t. 1. p. 181. *segg.*

^h Ita enim vocantur in *R. I. a.* 1524. §. 28. & 29. & tales esse jubentur in *R. I. a.* 1525. §. 1. 1526. §. 4. id quod vel unice sufficit ad justitiam reformationis. V. Schilt. *de Pace Relig.* c. 2. §. 2.

tribus tantum corruptis, & abusu jurisdictionis Ecclesiasticæ, querelæ erant motæ; ipsis sacris secl. immiscere religio videbatur. Nunc autem Hieromonarchia ad eum impudentiæ exercebat gradum, ut indies magis magisque servilem humanarum constitutionum sarcinam persentirent Potestates civiles, ideoque larvam cærimoniarum, immo Medusæ Gorgonis caput, magno Theologorum & populi assensu, execrarentur. Leo X. sponte sua ad sacram tyrannidem pronus, Puccii Cardinalis impulsu, nundinationes indulgentiarum, per omnem Germaniam, tum in Magdalensæ sororis, tum in Moguntini AEp. usus instituebat. Pastor ille vitio creatus suis Annatis, suis Palliis, immenso isto vilis lanæ pretio, Christi ovile deglubebat; ipsosque Principes hoc pacto suis tributis & proventibus spoliabat. * Quam obdurata horum fuerit patientia, vel ex unius Friderici Sapientis cunctatione patet; qui utut Lutheri impensè favebat, nunquam tamen accessu & alloquio eum dignatus est. b Sicut liberi parentum morosorum obligatione se non statim exsolvent; & civium gloriosissimum officium est, bonos Imperatores voto expetere, qualescunque tolerare: sic & abusum emendationem a Papa & Cæsare, tanquam Ecclesiæ Rectoribus & Advocatis, sine scismate exposcebant. Sciebant Protestantes, quam exitiosæ sint mutationes in divinis: moveri haud posse sacram illam ancoram, ut non simul fluctuet Reip. tota navis. Solliciti hacpropter erant, servare unitatem spiritus, in vinculo pacis; unam omnibus optabant fidem, unum baptisma, unam ad normam verbi divini compositam vocem: sed quia flammis totam urbem late haurientibus, ab ipso incendii auctore hamos atque dolabras frustra expectari videbant, ad Concilium liberum, in

M m m m 2 fi-

a Sleidan. lib. xlii. Thuan. l. i. Strauch. diff. exot. v. Quanto retius Tiberius rescriptit: *Boni pastoris esse, tondere pecus, non deglubere*, auctore Suetonio c. 32.

b Seckend. lib. i. §. 12. add. 2. d. §. 153. add. 2. g.

finibus Germaniæ habendum, uno ore provocabatur. ^a Hac spe rursus decollante, Principes pauci, quippe boni, Hermannus Archiepiscopus Colonienſis; Johannes Conſtans, Saxonix Elector; Joachimus II. Brandenburgicus; Ernestus, Dux Luneburgenſis; Philippus, Haſſiæ Landgravius; Johannes, Dux Cliviſenſis, alique Principes & Civitates liberæ apertius Reformationem inſtituerunt. ^b Tandem fœdus Smalcaldicum, Mauritio Saxone interveniente, poſt tot inducias, erupit in bellum; principio triſte, exitu glorioſum; ſecuta enim Paſſavii *Pax Religioſa*, quæ in Comitibus Auguſtanis deinde eſt confirmata, juriſdictionem Pontificis Eccleſiaſticam in Ordinum, Auguſtanæ confeſſioni addictorum, territoriis ſuſpenderit, iſſisquæ juriſdictionum, honorum, larium & templorum poſſeſſionem perpetua lege firmavit. ^c

Sic verum comperit eſſe ſedes Latina, quod Bernardus Eugenio quondam prædixerat: *utrumque gladium habere ſi voles, utrumque perdes.* ^d Sed gladii Germanorum, ex vaticinio Prophetæ, ^e nondum contuſi ſunt in ligones; necdum lanceæ in falces converſæ. Lupus aliquandiu pacem colebat cum agno, leopardus cum hoedo recubabat. Quemadmodum autem ſerarum impetus, diu retentus & infrenatus, vehementior eſſe conſuevit; ſic turbidi Dillingenſes & Societas Jeſu, quam nec Oriens nec Occidens ſatiaverit, fractis legum repagulis, per nobiliſſimum regnum calumniari, furere, ac bacchari cœperunt; ipſique Proteſtantes, Vatinianiſ Theologorum odiis inter ſe diviſi, majoris operæ eſſe, parta tueri, quam acquirere experiebantur. ^f Notæ ſunt

^a Rec. Imp. 1524. §. 28. 2530. §. 5.

^b Petrus Suavis, ſive Paulus Sarpius, *Hiſt. conc. Trid. p. 108.* Seckendorf *Hiſt. Luth. l. 1. §. 41. 168. lib. 11. §. 12. 16. lib. 111. §. 16. 25. 75. & 106.*

^c A. 1555. V. Lehman. & Schilt. *de Pace religioſa.*

^d *Lib. 2. de conf. ad Eugen.*

^e *Eſ. 11. 4. 21. 6.*

^f Lampreuſ ad Philippum Sydnæum ep. 60. a 1577. ſcribebat: *Germania*

sunt Cochlæi, Ræmondi, Pallavicini, Varillafii, Maimburgii, aliorumque adversariorum criminationes: Principes cœli prætextu captasse terras: privatos specioso libertatis nomine abufos esse, ut disciplina antiqua, votisque monasticis soluti, genio liberius indulgere possent.

Sed male habebat istos, ea illuxisse tempora, quibus se-
gnitia odio, superstirio execrationi fuit. Non destructa
iunt in terris Protestantium collegia sacra; sed repurgata:
non abolita fuerunt templa, sed avitis sacris restituta: in
diviniores usus redditus ecclesiastici conversi sunt; non dila-
pidati, nec ad Cameram relati; quæ pura puta calumnia
est; turpis animi impotentis, sibi que metuentis foetus. * Mo-
nachorum & monialium pars claustra deseruerunt, quod
ex Servatoris effato, spadones coacti *hoc verbum non capie-
bant.* ^b Videbant illi in hac veritatis luce, Cœnobîa sua su-
perstitionum scholas, & Murciae Dcæ sacella esse; in qui-
bus nil recti, nihil sinceri; omnia aut pravo de divinis sen-
su, aut luxu & ignavia fœdabantur.

Illud vero luctuosum valde nostratibus accidit, quod
coelitus evocati, & jamjam è dura servitute manumissi,
æstu Theologorum, in duas iverunt sectas, quæ per for-
mulam Concordiæ mox ^c prorsus separatae sunt, aliis *Evan-
gelicorum*, aliis *Reformatorum* adoptantibus nomen. Sic enim
causa communis, mutuis jurgiis & convitiis, ^d & maxi-

M m m 3

mania peccata esset, nisi eam sua ambitione & arrogantia turbarent
Theologi, imprimis Romani.

^a Sicidan. lib. viii. Seckend. H. L. præloq. & l. iii. §. 4. n. 5. 6.
Schurtzfl. disp. 43. §. 22. Ipse Clemens VII. temporalitatem, ut vo-
cant, Episcopatus Traiectini, in Carolum V. ejusque heredes translatam,
confirmavit, ratione minus valida, quam videbis in ejus bulla apud Leib-
nit. p. 11. Codicij diplom. n. 42. pag. 226.

^b Matth. xix. 11.

^c A. 1580. Muller Hist. form. conc.

^d Grot. l. iii. Annal. Qui tum concordia sectatores erant, eos con-
currentia e diverso odia premebant, signiferis &c. Idem lib. vii. Hist.
Augustanos Romanis quanto sententiæ diversos, tanto studiis promiores,
ait fuisse.

mam quidem partem propter ea, quæ vel ad pietatem faciunt nihil, vel fundamentum salutis haud attingunt, scissa ruptaque, insidiis patuit Romanorum. Ex hoc diffidio rursus iis cornua creverunt, ad sacra restaurata penitus opprimenda, aut saltem ad sufflaminandum Reformationis progressum. Quod si de religione tantum lis fuisset, fortasse par voluntas, aut certe pugna non tanta: nunc de regione, de mortalium jure, de prædiis & opibus agebatur. Ipsa pietas impiæ ambitionis fiebat instrumentum; avaritia ceteræque cupiditates honesto sacrorum mantello velabantur. Jam olim de Germanis gentilibus, dixit Petilius Cerealis: *Libertas & speciosa nomina prætexuntur. Nec quisquam alienum servitium & dominationem sibi concupivit, ut non eadem ista vocabula usurparet.* Idem profecto dicturus, si in tempora illa incidisset Christiana. Eucharistia, quæ pacis & caritatis symbolum esse debebat, in pomum Eridos, vah pudor! & dissensionis tesseram commutabatur. Qui Luthero strictius adhærebant, Zuinglii & Calvinii assecclas a communione Augustanæ Confessionis volebant exclusos; spoliis eos passim reos agentes, & fructum Pacis Religiosæ fratribus & sociis bellorum negantes injuste. ^a Utrique & Reservatum Ecclesiasticum, & canones Concilii Tridentini, & omnem jurisdictionem Papalem, maxima sacræ libertatis repagula, junctim, ore & scriptis impugnabant: unde omnium contra omnes nata est dissidentia, mater simultatum & odiorum, quæ aliquantisper cineri dolofo supposita; tandem post *Unionis* & *Ligæ* factiones, post motus Bohemicos & Friderici V. proscriptionem, post Ferdinandi II. Edictum restitutorium, in bellum tricennale, tristem illam omnium malorum Lernam, excrevere.

Nunquam Germaniæ sua desuerunt damna, sed nunquam majora sensit, quam hisce annis triginta. Idem enim patriæ, pacis pertaxæ, & pietatem in ritibus quærenti, quod olim

^a Apud Tacit. iv. *Hist.* 73. juncto Plannero *H. P. W. lib.* 1. §. 10.

^b V. Schilt. d. L. E. G. lib. viii. c. 4. & de Pac. relig. c. 6.

olim Reip. Judaicæ accidit; quum alibi Roboam & Jeroboam; Juda & Israel; Hierosolyma & Samaria esset. Totum quippe corpus ægrotabat, & cor totum languebat: a planta pedis, usque ad verticem, nulla in eo integritas, sed vulnus & vibex, & plaga saniosa, quæ nec colligata erat, neque emollita unguento. Non gens tantum vicina contra gentem, sed pater contra filium, Christianus contra Christianum, gladiatorio more, in Campo Germanico, in curia, intra domesticos parietes, velut in arena, armati steterunt. Jam olim Romani lætos bello Germanos, quique intra annos quatuordecim tectum non subiissent, mirati sunt; ^a hoc autem bellum duplo longius fuit protractum, quia sacrum, quia civile. Quod si omnium gentium evolvantur annales, tam acre & diuturnum pro religione non occurrit. Sed quemadmodum, apud fratres & cognatos insensos, eadem sunt incitamenta irarum, quæ apud concordēs vincula caritatis: sic multis compertum est experimentis, acris civium esse odia; acriora diversarum religionum; ^b acerrima inter Christianos. ^c Horum professio, cum molliendis & fœderandis

^a Cæsar l. 1. d. B. G. c. 36. Seneca vi. Nat. quæst. c. 7. *avidam belli gentem*; Tacitus *ad arma natos dixit* iv. *Hist.* 16. § 64.

^b Omni tempore gentes pro religione & cærimoniiis bella gesserunt. Cambyſis infamiam, qua ritus Ægyptiorum luftribus habuit, perſtrinxit Herodotus lib. 111. c. 33. De Gallis Cicero pro Fontejo c. 9. *Cætera gentes pro religionibus ſuis bella ſuſcipiunt, iſta contra omnium religiones.* In Ægypto inter Cynopolitas & Oxyrynchitas ſuo ævo, ex cultus diſparitate, bellum conſtatum eſſe, memorat Plutarchus de Iſide & Ofiride c. 38. Diſſidium inter Tentyritas & Ombitas, ridet Juvenalis Sat. xv. De odio Perſarum & Turcarum, propter religionem, Camerar. l. 3. Hor. ſubſ. c. 12. In cauſas odiorum inquirivit Paſſorius *Hist. Polon.* lib. vi. in ſin. & Puſendorf in *diſſ. de Rebus geſt. Philippi* §. 31. Recte Hobbeſius c. 1. de Cive §. 5. *Non modo, inquit, contra contendere, ſed & hoc ipſam, non conſentire odioſum eſt. Nam non conſentire alicui in re aliqua, eſt eum erroris tacite accuſare, ſicut in valde multis diſſentire, idem atque eum pro ſtulto habere.*

^c De his Tacitus xv. Ann. 44. *odio humani generis convicſi ſunt.*

Ob.

dis animis valere deberet; siue humanæ imbecillitatis vitio, siue Judæorum imitatione, dissentientis impatiens, & acerbissima odiorum materia facta est. ^a *Sæpius olim, gentilis Religio peperit scelerosa atque impia fusta*: ^b nunc autem parum erat vastari agros, oppida diripi, Regni opes exhauriri; nihil sanctum & inviolatum mansit; templa partim diruta, partim inflammata, sacrilegia in triumphis ferebantur. Religionem prostratæ victrix insultabat impietas, quia propter religionem religionis erant oblici. Summa adhæc inopia, fames & pestis; domi parricidæ, foras latrones; obvii quivis, sine ullo sexu, ordinis aut ætatis discrimine, trucidabantur. Cæsaris & Pompeji bellum civile millia trecenta consumpsit; sed lusus illud & jocus, præ hoc Germanico, siue occisorum numerum incas, siue calamitatum atrocitatem spectes.

Huc igitur adeste, quotquot nunc iterum, pacatis rebus, Bellonæ sanguineum quatitis flagellum, qui privatim degeneres, in publicum perniciosi, nil nisi per discordias habetis: adeste & ineffabiles miseras, quæ bellum civile comitantur, penitus mecum contemplamini: & confestim agnoscetis, pacem unam mille triumphis esse potiore, immo è finibus naturæ procul ejiciendum, quem illa civium multorum strages delectat. Omne bellum per se calamitosum est, nullum vero infelicius civili: misera in eo sunt omnia, sed ipsa victoria nihil est miserius, utpote non externo, sed domestico cruore parata. ^c Non dicam, tricennale

Obstinationem meram iis affingit Plin. x. ep. 97. & Marcus Antonin. l. xi. §. 3. Arrianus Galilæos describit, tanquam homines, qui præ insania & consuetudine mortem non retormident l. iv. ad Epiā. c. 7. Ammianus Marcellinus lib. xxi. c. 5. *nullas infestas hominibus bestias, ut sunt sibi feræ plerique Christianorum.* Ampl. Bynkershoek à Jutæis hoc odium hostile derivat, quem adiuisse non pœnitebit diff. 2. de cultu relig. peregr.

^a Grot. Ann. I.

^b Lucret. lib. 1.

^c Val. Max. l. xi. c. 8. n. 7.

nale illud in Imperio gestum esse a peregrinis; Gallis & Gothis, a Lappionibus & Fennis: infusos in Germaniam Cosacchos Crabatasque, Hunnica barbarie truculentiores. Non enumerabo prælia atrocia ad Lipsiam, ad Lutzenam, ad Nordlingam, ad Wittstokkium, Taboram & alibi pugната. Prætereo crudelitates ipsi Busiridi horrendas; infectam tabo humum, putres ubique virorum equorumque formas; stupra feminarum, virginumque raptus. Vel unicum Magdeburgum vobis proponite, urbem ea tempestate opulentam, situ amœnissimam, Primatis Germaniæ florentissimam sedem. Misera virago, palatiis suis ante & munitis superba, simulac a Tillio expugnata, intra quatuor & viginti horas flammis absumta est. Crabatæ per plateas effusi, barbaro ululatu, in quemcunque inciderant, occidebant. Lactentes ab uberibus maternis abrepti, occisi, ad parietes allisi: in cæde & sanguine dominorum cadentia natabant tecta: ferro & igne triginta incolarum millia, inter lamentabiles quiritus, consumeantur. Plures ejusmodi tragicos belli istius periculosissimi fructus referre possem, Auditores, sed instituti nostri ratio id non patitur; & piget tædetque per vulnera Imperii procedere ulterius. Hoc unicum sufficiat, ad horrorem contentiosis istis incutiendum, quibus optime hostis occisus, sed melius civis olet: amplius mille myriadas ferro, peste, fame tum periisse; plebisque civitatibus insuper ac pagis vastitatem fuisse indutam. En campus, ubi Troja fuit! En quo discordia cives perducit miseros! En etiam *quantum religio potuit suadere malorum!*

Opis humanæ non erat, tantas componere lites. Arborem turbine eradicatam, vix in solum desigas; sed Germaniam pacis & otii tempestatibus divulsam, antiquæ reddi formæ, majus miraculum videbatur. Continuis Ferdinandi II. victoriis jam tantus Protestantibus injectus erat metus, ut de libertate sua actum existimarent; nec

N n n n

mi.

• Pufend, *de reb. Succ. l. 111. n. 18.* Theatr. Europ. t. 2. p. 354.

minus Romanenses, sub belli onere, & Wallensteinii sævitia gemeabant. Sed divinæ providentiæ ductu, sopitus ubique armorum furor: resque inextricabilis exitum habuit felicissimum. * Ex ultima Thule accitus Gustavus Adolphus, exiguis viribus, incredibilia peregit; ut constaret inter omnes, non in munitionibus, sed in causæ bonitate victoriam sitam esse. Ut palmæ adversus onera surgunt, sic *Pace Osnabrugensi* pristina libertas non modo restaurata, sed certior etiam Reformatis, & tutior facta est, citra omnium spem & opinionem. Salvete cœlitus clausæ Jani portæ! Salve lex æterna; Pacis Christianæ pignus; Regni Præsidium, & ancile! Sine te quid non modo Germania, sed universa Europa fuisset? Tu sacris honorem; legibus robur, hominibus securitatem; certam cunctis rerum suarum possessionem restituiti. Tua ope sacrilegia a templis, ab oppidis direptiones, ab agris vastitas depulsa est. Te merito suscipimus, colimus & veneramur. Justitia enim tua omnibus aut recte faciendi voluntatem imposuit, aut necessitatem: lacerata Imperii membra glutino tuo firmiter cohædere, & porro conjunguntur.

Sic itaque, jugo peregrino excusso, Imperator, tanquam supremum Imperii caput, & Ecclesiæ Advocatus, † salva ubivis Protestantium libertate, multis in partibus creptam sibi, aut in dubium vocatam majestaticam sacrorum potestatem plene recepit. Si scismata Ecclesiam dilacerant, jure suo, Friderici pariter ac Sigismundi exemplo, Concilium indicit, dirigit, & contumaces banni fulmine percellit. ‡ Pontifices pia, atque honesta molientes juvat, protegit & tuetur; ut tamen & illorum usurpationes coërceat. Archiepi-

* Similiter Grotius observavit 11. *Ann.* ad A. 1571. *Supremæ providentiæ fere placuisse, Belgicis in rebus, ita humanam fiduciam & consilia illudere, ut nunquam simul essent spes magna, & bonus eventus.*

† Carolus M. primus Advocatum S. Petri se inscripsit; deinde & alii Imperatores. Dixi plenius supra *Dissert.* 1. pag. 41. 49. 77.

‡ *R. I.* 1524 §. 28. 1526. §. 1. & 4. 1544. §. 80. *seqq.*

piscopos & Episcopos bonis ac regalibus firmat. Statibus Protestantibus plena sacrorum jura sub complexu Superioritatis confert; eademque facta tecta, remotis abusibus, conservat. Nuncios item coercet, Provocationes ad Pontificem moderatur. In Episcopatibus sede vacante, jus habet regaliarum; in Ecclesiis Cathedralibus jus priuariorum precum exercet, pristinae investiturae scintillas. Ejus auspiciis conduntur Academiae, & Theologis quoque Doctoribus facultas docendi confertur. Ipse tantum Theologos Romanos; Comites Palatini, in qualibet religione recepta, Doctores creant. In causis autem religionis Imperator, concurrentibus Statibus, per amicam transactionem, non per vota majora, ad normam Pacis Religiosae & Instrumenti Pacis decernit.^a

Jam satis attonita stabat sacra tyrannis, ob *αυτοκρατορίαν* Imperio assentam: sed ultimo metu defixa expalluit, quum singuli Status, in veterem, immo firmiorem libertatis possessionem restituebantur. Vehementer contradicebat Fabius Chisius, Nuncius Papalis: ipse Innocentius X. fulmen horrendum ex rupe Tarpeja vibrabat, ultimum furoris complementum.^b At Dei viæ longe aliae, quam Vicarii erant: constitit illi suum propositum, ut barbarum finis esset, utque omne imperium sacrum, jurisdictione Pontificum suspensa, *cum jure territorii & superioritatis, ex communi per totum Imperium hactenus usitata praxi*, Regionum dominis confirmaretur.^c Enimvero in id libertatis & potentiae dudum excreverant Principes, ut Regum jura in terris suis sequerentur, & potestatem Majestatis æmulam sibi vindicarent: quæ, modesto Transalpinorum vocabulo,

N n n 2

Su-

^a Vid. *Instr. pac. art. v. §. 9 & 52. Lyncker Resp. 58.*

^b Bullam cum Protestatione vide apud Conring. *de Pace perpetua*.
p. 361. qui post Davidem Blondellum, & Joh. Hoonbeckium, S. Litterarum in hac Academia Doctorem, prudentissime eam impugnavit.

^c Verba sunt *Instr. Pac. art. v. §. 30.* ubi nota, originem juris sacro-

Superioritas territorialis vocatur:^a Hujus pars principalior; ipso naturæ jure, semper fuerat regimen Ecclesiasticum: sed quoniam Papa & Episcopi id tibi injuria arrogarant, nunc remoto jurisdictionis Papalis impedimento, jus circa sacra Statibus non datum, sed redditum; non collatum, sed redintegratum est; ipsique non ut Episcopi,^b sed ut Principes, parte hac imperii nobilissima gaudent, utuntur & fruuntur. Pariter ac olim multis populis & urbibus *αυτονομία* relicta, ut suis legibus utentes, immunes essent a jurisdictione Præsidis Romani:^c vel potius, sicut in hac Fœderata Belgica penes quamlibet Remp. seorsim jus est de religione statuendi: nec Helvetiæ Pagis religio fraudi esse debet: ita & Principes Germaniæ Protestantes suum in sacris *πολιτεῖα* separatim ex pacto & lege habent; cum facultate reformandi, decidendi controversias ecclesiasticas, excommunicandi & absolvendi. Condunt ordinationes ecclesiasticas; Synodos cogunt, exigunt annatas; Menses Papales exercent, dispensant in connubiis subditorum, lege civili prohibitis, & circa statuta capitulorum. Constituunt ministros, vel electos confirmant; remonent indignos, ferias indicunt, quæque id genus sunt alia, nam universa recensere longum esset. Si de matrimonio Evangelici Principis contrahendo
vel

crorum ex observantia Imperii deduci, id est, prisca illa libertate, de qua supra. Plus enim apud majores nostros valebant boni mores, quam Romæ bonæ leges, Tacit. *d. M. G. c.* 19. Francorum Carolus Calvus ad *olitanas consuetudines* se refert, *capit. tit.* 30. c. 1. Fridericus Imp. *usum bonum prædecessorum & Patrum* laudat, apud Radevic. *l. 1. c.* 16. Romæ similiter jus sacrorum & publicum moribus adscriptum. Virgil. *111. Æneid.* 402. Macrobi. *111. Sat. c.* 8. Plinius partem juris publici maximam *morem Senatorum* dixit *l. v111. ep.* 14.

^a V. Hert. *d. sup. territ.* § 68.

^b Capitalem hunc, sed inde a Constantino M. inveteratum, Carpovii, Mevii, Struvii, aliorumque errorem, solide refutavit Cl. Bœhmer. *Jur. Eccl. Protest. lib.* 1. *tit.* 31.

^c Ita Strabo Massiliensium *αυτονομία* explicat, *ut neque ipsi, neque*
iis

vel dissolvendo quæstio incidit; is sui ipsius judex est: non Austregæ, nec Camera, nec Consistorium. Ex regulis tamen prudentiæ judicium extraordinarium constituere; vel arbitros, viros bonos, eligere; vel Theologos & Jurisconsultos consulere solet.^b

Ne vero Principes, sive a pravis Consiliariis instigati, sive ambitione elati, quod odissent, ipsi imitarentur; eadem lege, norma & modus ipsis præscriptus est: quo subditis publicum & privatum religionis exercitium, sicut qualibet anni M. DCXXXIV. parte eo gavisi, perpetuo assertum; ita ut eo nomine, nec abitus ipsis imperari, nec molestia bonis inferri possit. ^c Sine hac clausula, Pax quieti perpetuæ destinata, manca & inutilis; immo religio, civium men-

Nnn 3

te

iis subjecti, missi in provinciam Romanis Præsidibus obtemperare cogerentur lib. IV. Quamquam & in hoc & in sequente simili dissimilia plura, ob formam imperii irregularem, quæ nomen suum adhuc quærit, & non inveniendæ anonymæ nomen invenit, ut de herba Plin. l. 27. H. N. c. 7. Principes Protestantes pro justitia causæ suæ adferebant: Germanicum imperium esse saltem fæderationem, & quandam certis in rebus conjunctionem, apud Hortlederum de C. B. G. c. 3. §. 13. V. Hert. prud. civ. p. 1. S. 12. §. 2.

^a Has & alias ob causas nimis fractam esse hierarchiam existimat Ill. Leibnitius de suprematu Princip. c. 31. & in Præfat. Cod. jur. gent. Qui nimia, inquit, affectabant, etiam iusta amittere, quæ retinere ipsos e re Christiana fuisset. Sed apage simulatam Paparum, in gradibus prohibitis, philosophiam, quæ omni tempore nummis expugnari potuit. Præterea potestas in matrimonialibus, olim non apud Papam, sed apud Imp. fuit, ut constat ex forma divortii apud eundem p. 1. n. 82. p. 154. Goldast. t. 1. Const. Imp. ad a. 1343. Freher. t. 1. script. rer. Germ. p. 621. & Guil. Ockam de Jurisd. Imp. in caus. matr. Adde quod Helmoldus 1. Slav. 33. scribit: *A tempore isto, (Henrici IV.) omnibus modis nituntur humiliare Ecclesiam, ne resumant vires consurgendi adversus Reges, nec inferre, quæ intulerunt patribus eorum.*

^b Tacit. l. Ann. 10. *Abducta Neroni uxor: & consulti per ludibrium Pontifices, (ab Augusto) an concepto, necdum edito partu, rite nuberet.*

^c Instr. pac. art. 5. §. 31. 32. 33. ibi hoc non obstante.

te turbata, nulla aut incerta foret. Et quid, fodes, absonum magis, quam provinciis invitis, a quolibet Principe succedente, vario, vel superstitioso, formulam obtrudi novam & ignotam? Graves ea de re Wolfgangi Gemmingii, Equestris Ordinis Legati, querelæ audiebantur: necdum, a Pace Augustana, elapso sæculo uno, Oppenheimium, urbem Palatinis oppignoratam, decies sacra mutasse: ^a Hoc amplius liquere arbitror, ne *Simultaneum* quidem Pontificiæ religionis exercitium *publicum*, legitimis puriorum factorum possessoribus, superinduci posse; si Princeps Pontificius Evangelico in principatum succedat: vel Reformatus ad Romanas cærimonias transgrediatur. Quibus enim ante panem sacratum, dum circumfertur, procumbere, aut divum simulacra pileo honorare, religio est: si fuste aperitur caput, si templa & reditus, pace religiosa quæsi, vel eripiuntur, vel communicantur, hos spoliis & verberibus magis turbari parret, quam ritibus Latinis simpliciter introductis. Nutus, gestus & geniculatio, si ab animo discrepat, mendacium est, Deo invisum, & legibus naturæ adversum. ^b Judæi nostratibus præverunt, tempore Antiochi & Manassis; sed illustriora sunt exempla Martyrum Christianorum; qui nullo pacto adduci potuerunt, ut vel levi simulatione, thuris puta in aram jactu, a tyrannorum se redimerent carnificina. In hac ultima temporum sæce, & sæculi exulcerati gangræna, quid factum sit, quid prætextu articuli IV. Pacis Ryswicensis fiat, ^c referre nil attinet. Publicæ tum alibi, tum hic loci haud dudum motæ extant querelæ, ^d quas si comprehendere vellem,

Icarie numerum dicere coner aque.

Enim:

^a Pfanner. *Hist. P. W.* l. v. §. 42.

^b *Matth.* x. 32. *2 Tim.* 11. 12. *Apoc.* 111. 5.

^c *Actes & memoires de la Paix de Ryswick* t. iv. p. 116. *Fabri Staats Cantzley.* t. iv. p. 91. t. v. p. 78. *Electa J. P. passim* Lyncker. vol. 1. *Resp.* 58.

^d *Vid. Diarium pacis Traject.* p. 83. & 282. *Actes & memoires de la Paix d'Utrecht* t. 1. p. 213.

Enimvero multorum dierum, non unius horæ negotium est, omnes exponere controversias, post parietem illum intergerinum enatas. Multis Principibus, quia a teneris nos ignorare assuefunt & odisse, infixum sedet, utilius esse Rempublicam tribulis & vepribus abundare, quam civibus hæresi aliqua imbutis; unum civitatis corpus una religione, velut spiritu contineri; sacris, ut humanis legibus, tum optime constare rationem, si multitudini non reddatur. Hi ergo Deum se demereri putant, si sacra post annum criticum in regionibus suis inducta moveant, miserosque subditos, salvis tantum fortunis, salvis laribus paternis, retentis vel distractis, dulcissimum natale solum vertere cogant. Jure id an injuria, non disquiro. ^a Quod si vero Christi & Apostolorum doctrinam intueamur, illæ duabus parabolis, altera de zizaniis, altera de rete, quid amor Christianus, quid clementia, omnibus hominibus secundum naturam, sed maxime Principi decora, jubeat, satis significavit. Paulus vero Corinthios monebat, oportere esse sectas, ut probati manifesti fiant. ^b Ipsi Persæ, Macedones, Romani, immo barbari, Judæis aliisque nationibus sibi subiectis; modo læsæ Reip. abesset ratio, sacrorum libertatem, non singulis modo, sed & totis Collegiis indulserunt. ^c Nos autem his moribus vivimus, ut aliis vitiis affectos cum feramus, quibusdam etiam oblectemur: Deorum tamen injuriis nostræ curæ vindicatis, præfractæ servare cupiamus cives, quibus aëra sæpe & aquam invidemus. Unde multi perdunt, plures perierunt & pereunt, per speciem pietatis Ju-

^a Alii ajunt, alii negant, alii ad Comitia rejiciunt. v. Cranium de pac. rel. p. 2. probl. 1. Rhet. de sarcina c. 4. §. 25. Boehmer. Jur. Eccl. Prot. lib. 1. tit. 1. §. 89. 90. & inprimis Schilt. d. L. E. G. lib. vii. c. 12. §. 20.

^b Matth. xiii. 24. 47. 1 Cor. xiii. 12.

^c L. 1. D. de Colleg. & corp. Tacit. ii. Ann. 85. Ampl. Bynkersh. de Relig. peregr. diff. 2. Turcarum Sultani Sokeimaai notabile dictum narrat Camerar. 1. oper. subc. c. 58.

Juvenalis pro monstro habuit, duo oppida in Ægypto, crudeles similitudines pro Diis suis exercuisse: quis nunc tam ferreus, ut se teneat, ubi integra regna? ^a

Tu vero o Germania, Germania, si cognosceres hac die tua, quæ ad pacem tibi atque salutem! Et Tu quoque CAROLE VI. Augustissime Cæsar, excipe animo gratioſo, quod Majestatem Tuam compellare audet umbraticus homo, humillimus civium piorum. In summo Tibi rerum mortalium gradu, creditus est Imperii Sacri contextus; ne quid hiet, ne quid protuberet, nihil ut declinet amissis. Latiorem jam induisse faciem videtur Germania, ex quo pacem ei civilem sapientia Tua reddidisti: nunc religiosam quoque restaurare pergis, ad illam æternæ & perpetuæ legis normam. Excitat nos in spem successus feliciſ, Tuus ille masculus justitiæ zelus, quo in Principum controversiis, nulla religionis, aut affinitatis habita ratione, indies pro tribunali pronuncias, & pronuncjata cito executioni mandas. Erigit provincias gementes imperium Tuum lene, quo Deum imitaris: solatur clementia, gentile illud Gentis Tuæ bonum. Senserunt invictissimi majores Tui, & sentis ipse, molitiones cleri Romani; hoc assidue agentis, ut sacram Vestram proculcet potentiam, utque Imperatorem, cum Ordinibus rupta pace commissum, gaudente licet Turca, habeat debiliorem. ^b

Ula-

^a Juvenalis tempore Domitiani exul, in Ægyptum missus, arripuit materiam, de immani Ægyptiorum superstitione Satyræ xv. scribendi. Orbitæ crocodilum numinis instar colebant, Tentyritæ animo infensissimo eum proſequabantur. Politico Regum consilio diversa sacra constituta esse, tradit Diodorus Siculus l. i. c. 89 ne unquam Ægyptii concordiam inirent. Verba Juvenalis vs. 35.

*Inter finitimos vetus atque antiqua simulas,
Immortale odium, & nunquam sanabile vulnus
Ardet adhuc, Ombos & Tentyra. Summus utrinque
Inde furor vulgo, quod Numina vicinorum
Odis uterque locus, cum solos credas habendos
Esse Deos, quos ipse colit.*

^b Idem Romanæ Curie, quod olim gentilium Romanorum votum

a pu

Uladiſſai Hungariæ regis, ab Amurathe II. Turcarum Imperatore, cum multis Chriſtianorum millibus, ad Varnam cæſi, epitaphium notum eſt. ^a Carolus V. Sapientiſſimus Princeps, ſæpe queſtus fertur, bellis internis lauream Imperio rapi, quam de veris & juratis Chriſtianorum hoſtibus referre poſſent. Is quoque arcana immitis Vicarii, & rabioſos perſecutorum latratus expertus, conſeſſores noſtros lubenter audivit, iſque bonorum poſſeſſionem interdicto firmavit. Hujus frater Ferdinandus, pietate non inferior, crebris ante obitum ſermonibus, inter ſumma Dei beneficia, maximum numeravit; quod ad ſedandas diſcordias animum adjeceſſet, & tolerantie in religione formulam, benigniſſimus Deus ſibi in mentem dedieſſet. ^b Nullus finis, ſi ſingulos Cæſares, majores Tuos religioſiſſimos, ſpecula boni Principis, enarrare vellem: unius Maximiliani, docti & magnanimi Imperatoris, vox obſignet: ^c *Qui conſcientius imperare volunt, arcem cæli invadunt, & plerumque terræ poſſeſſionem perdunt.* Idem animo Tuo inſige, Carole invictiſſime: Tuosque Catones & Scipiones idem cogitare jube, ut mendosa emendent. Mirabitur poſteritas prudentiam Tuam; vivi Te ſuum Tutanum, Carolo M. majorem laudabunt; cunctique Proteſtantes, manibus ad cælum tenſis, vitam Tibi prolixam, imperium ſecurum, domum poſteris ſecundam, exercitus fortes,

O o o o

tes,

apud Tacitum d. M. G. c. 33. *Maneat, quæſo, duretque Germanis, ſi non amor noſtri, at certe odium ſui, quando urgentibus imperii ſactis, nihil jam præſtare fortuna majus poteſt, quam hoſtium diſcordiam.* Adde in Agric. c. 12.

^a Hiſtoria, prudentiæ magiſtra, multa ſuppeditat exempla Principum, qui a Clero ad incitas ſunt redacti. Vid. Vailor t. 11. lib. 6. p. 54. Uladiſſai epitaphium, A. 1444. poſitum, refert Jæneas Sylvius epiſt. 81. Bonfinius dec. 3. lib. vi.

*Me niſi Pontifices juſſiſſent rumpere ſædus,
Non ferret Scythicum Pannonis ora iugum.*

^b Verba ſunt Joh. Cratonis in epiſtola ad Rudolphum Imp. Jani Du-
bravii Hiſtoriæ Bohemicæ præfixa.

^c Vide ejus epiſtolam ad Lazarum Swendium.

tes, Aquilas victrices, orbem quietum, quæcunque hominibus & Cæsaris vota sunt, grato pectore nobiscum apprecabuntur.

Vos etiam Celsissimi PRINCIPES, solidæ Imperii Columnæ & Bases, ignoscite mihi, si salvo, quem omnibus debeo, cultu & reverentia dicam; nimio quorundam zelo, a turbulentis, etiam iustissimorum, consiliariis accenso, effectum esse, ut vastum hoc regnum, in propria viscera sævierit, & nunc in perniciem suam digladietur. Nemo equidem prudens satagentibus aliis, cum Diogene, dolium volverit: nec ignarus sum, ad sanos propinquos ablegandum esse, qui de summa Republica suum audeat consilium explicare, non rogatus. Sed veteris & nostri ævi exempla, tum maxime dolor ille pii civis, ad similem operam me invitat. Faceßat tandem Aleæto, sæva Furia, ex inferis reducta, quæ nuper rursus, atris faucibus, ad horridum bellum, sacrum & civile, inclamare videbatur. Quid enim? an nondum satis effusum est Christiani sanguinis? an nondum pœnitet cicatricum? Pax certa melior tutiorque, quam sperata victoria est; illa in vestra, hæc in Dei manu sita. Cessent ea fini Hæreticorum, Calvinistarum, Ubiquitarum, & Calixtinorum tituli, totque mendaciorum fabulæ, in contumeliam utriusque partis confictæ. Desinat tandem propagandæ religionis per vim aut astum libido. Quamvis enim hæretici videantur alii, & errent; sed bono animo errant; non odio, sed affectu Dei. Apud Vos tales sunt; ipsi adeo se Catholicos esse iudicant, ut Vos ipsos titulo hæreticæ pravitatis infament^a. Sua cuique religio videtur optima, ut quæ plerumque non ratione, sed affectu dijudicari solet: immo plerique adstringuntur, antequam quid optimum sit, discernere queant.^b Nec ratio tantum, sed utilitas

^a Ita de Arrianis olim Presbyter Salvianus *lib. v. de Gubern. Dei*.

^b Herodotus *lib. 111. c. 33*. Cambysem notans, *Si quis*, ait, *omnibus hominibus faciat potestatem, optimos ex omnibus ritus eligendi*,
pro-

litas quoque, & civilis prudentiæ regula expulsionē vetat, tolerantiam commendat. Interest rerum publicarum urbes & pagos hominibus abundare; libertas vero sentiendi multitudinem parit, commercia juvat. Optime hoc Belgica ostendit, tutissimum omnibus scētis, quas novit terrarum orbis, refugium & asylum, si modo Reip. non adversentur. Gallia vero nondum eluxit sua damna, pulsas cum exulibus litteras, artes, operas, gemmas, aurum, & argentum, non sine insigni vicinorum incremento. Mitto Hispaniam, ab inquisitione foris diu exosam, domi inopem & desertam.^a Sufficit quippe constare, non conducere regno nobilissimo, multo minus specialibus Germaniæ Rebus-

O o o o 2

profecto quilibet, cum singulos explorasset, suos eligeret. Exemplum jucundum addit, quod legisse non poenitebit. Sua cuique civitati religio est, nostra nobis, inquit Cicero pro Flacco c. xxviii. ubi Cæleb. Grævii nota videatur.

^b Mariana l. xxx. c. 1. Adde elegantissimas *Præfationes*, alteram Thuanii ad Henricum IV. alteram Conringii in Politica Aristorelis, ad Guilielmum Brunsvicensium Ducem; dignas, quæ ab omnibus Principibus legantur. Obsigno has notas pulcherrimo Themistii hominis gentilis, loco, ex orat. ad Valentem Imp. p. m. 503. *Non desuere patrum memoria importuni Principes, qui hanc vim asferre hominum animis conati sunt, ut quam ipsi religionem acceperant, eam ceteris ingratis tentarent obtrudere: sed hoc unum effecerunt, ut præsentis pænæ metu, multos cogerent tegere, quod sentirent: neminem ad suam sententiam traducerent. Ita non Deum, quem illi volebant, sed purpuram verebantur Imperatoriam: neque tum unus, ut quondam Athenis, sed omnes Theramenes existebant. - - Sapienter igitur à te decretum est, ut quam quisque religionem probabilem duceret, ad eam se adjungeret. in eoque animi sui tranquillitati serviret. Neque hæc à te primum lex excogitata est. sed æqualis est vitæ hominum; & jam inde ex omnium seculorum aternitate à Deo sancita. Informavit enim Deus omnium mentes, quamvis agrestium & barbarorum notione sui, studiumque pietatis ita omnibus insculpsit, ut neque persuadendo, neque cogendo ex animis exui possit: rationem vero & viam, qua coli velis, non præscripsit, sed cuiusque judicio & voluntati permisit: Quos circa qui vim addibet, pugnat cum Dei & naturæ lege.*

buspublicis, ut expulsionones, summo quamvis jure permissæ, promiscue exercentur.

Plura gestiebat animus: sed nolo longiore sermone tempora Vestra morari, VIRI AMPLISSIMI, qui inclytam hanc Rempublicam & Academiam curis Vestris sustinetis. Novus hic sese aperit campus, in laudes prudentiæ Vestræ excurrendi, qui civibus, incolis, advenis non modo permittitis conscientiæ libertatem, sed &, in tanta animorum discrepancia, omnes in pace, rempublicam in flore conservatis. Qui vero extrema oratione præconia Vestra exordiri ausim? quicquid dixerò, minus erit: & animorum Vestrorum magnitudo, laudes, quæ coram fiunt, adspersatur. Illud non æque silebo, Vestram illam gloriam esse singularem, quod litteræ & disciplinæ aliunde pulsæ, atque oberrantes, stabile hic domicilium & asylum invenerunt. Vester in litterarum studia affectus, amplissimis præmiis, undique hos Viros excellentes evocavit, ut præclara ingenia ad melioris vitæ & fortunæ cultum informarent. Vestra humanitate, morum elegantia, & hospitii benignitate exteras invitastis gentes, ut subolem suam numerosam ad hanc omnium disciplinarum mitterent officinam; illis artibus imbuendam, quibus Ecclesia & Respublica continetur. Vestrum item beneficium est, quod me in hujus gloriæ partem accire voluistis, & ingratus sum, nisi in omni vita mea id agnoscam. Utinam vero is essem, quem Vobis me esse persuasistis, aut saltem optastis, hoc est tam ardua provincia dignum! Quanta sit Vestra de me expectatio, novi invitus: quantam præclare agendi necessitatem Vestra mihi imposuerit benignitas, abunde sentio. Sed spes me certa tenet, vires divinas imbecillitati meæ præsidio futuras, si modo diligentiam mihi subsidio comparavero, id quod modis omnibus me effecturum, sancte promitto. Vos porro præclaram illam in me voluntatem conservate, Viri Nobilissimi, & quæ apud hunc Ottonem collocastis beneficia, rogo, apud eum hominem collocata existimetis,

a quo omne studii, obsequii & observantiæ genus expectare perpetuo possitis! Deus dexter semper adsit consiliis Vestris! Is diu Vos servet incolumes, ut ex animi voto, ad Nestoris annos, valeatis, floreatis, perennetis!

Vos autem, omnium disciplinarum Professores, Viri Clarissimi, qui noctium doctarum vigilias Academiæ, vires Ecclesiæ, & litteris consecratis; Vos, inquam, omnibus precibus rogo atque obtestor, ut qua benevolentia Nobilissimi Senatores Duumviri, Reipublicæ universæ interpretes, jam nunc in florentissimum Collegium Vestrum me introduxerunt; pari Vos quoque animo & affectu, me laboris socium, accipere dignemini. Honestæ æmulatione ut Vos præcuntes, quanquam non passibus æquis, sequar, muneris decus, & parva Vobis gloria impellet, diviniore naturæ argumentum. Fluxa & calida videmus omnia; ipsa metalla ævum sentiunt; at litteris æternitas inventa est; quam non imber edax, nec Aquilo impotens diruere potest. Admior singulare illud vestrum concordiæ vinculum; utque divitissime constet, votis conceptis opto. Quod si me partem Vestri censere volueritis, ego vicissim universis venerationem, singulis Germanum candorem præstabo; illosque dies inter faustos referam, quibus amicitiam Vestram demerendi occasio nascetur. Vos inprimis, Consultissimi Antecessores, ætiori necessitudinis vinculo mihi adjunctos, dum cominus intueor, duos Ælios aut Scævolas, antiqua virtute & doctrina Viros, conspiciere videor. Gemina hæc laus Vestra, quod & eruditione clari estis, & ad Rempublicam vim ingenii confertis. Domus Vestra consilium: vox Oraculum melioris juventutis est. Vestro auxilio, ut mihi in rebus arduis opus erit nonnunquam, ita faciles Vos mihi opto. Quæcunque a collega juniore expectari aut proficisci possunt officia mutua, ore & corde Vobis offero, promitto, & spondeo. En dextra fidesque!

Nunc tandem uberiore alloquio, ultimo quidem loco, sed prolixissimo affectu, mihi demerenda esse Studiosa co-

O o o o 3 hors,

hors, spes sæculi & votum : maxime Commilitones suavissimi, qui nostris sacris estis initiati. Sed ecce! jam dudum aqua effluxit. Sive autem me ducem vultis, sive militem & æmulum, accipio societatem : omnes conatus mei, ex hac hora, ad Vestram utilitatem referuntur. Nolite expectare, ut quas profitebor disciplinas prolixo elogio ornatam eam : non egent illæ commendatione, se ipsas ostendunt. Agite modo, Generosa Pectora, & animos mecum ad illam divini & humani juris scientiam appellite : quæ non unius gentis & nationis est, sed totius humanæ societatis jura comprehendit. Juvat nosse & vidisse capita fluminum nobiliorum; sed incredibili Vos gaudio cumulabit, apud nominis sui Virum, Hugonem Grotium, limpidos gustasse fontes, ex quibus amplissimi illi Juris Romani fluvii emanarunt: Cum privato Jus publicum conjungite; viam illam regiam ingredientibus, quam Tiberones, Capitones & Aristones tenuerunt : hi vero utriusque juris laudantur periti. * Accedent, Deo volente, & alia, ad notitiam Regnorum & Rerumpublicarum Europæ singularium pertinentia; quæ haud minorem forte spondent fructum & jucunditatem. Pariter enim ac atomi, non nisi adhibito microscopio, videntur; ita mysteria & subtilissimos Civitatum contextus vix aliquis peregrinantium observat, nisi cum Ulyxe prudentia illa civili fuerit instructus, qui multorum providus urbes & mores hominum inspexit. Sed multa fidem promissa levant. Vos modo, Præstantissimi Juvenes, in illa potissimum incumbite, quæ viris aliquando usui futura. Sive enim virtus tum ad Resp. gubernacula Vos admoveat, sive inter ambigua cautarum discrimina Vobis verandum sit, Deo accepti, Patriæ utiles, familiis gloriosi eritis, & solidæ eruditionis munimine, in publicis privatisque rebus, lapsa erigentur, fatigata reparabuntur.

D I X I.

* Pom. l. 2. §. 46. d. O. J. Gell. x. c. 20. Plin. viii. ep. 14.



O R A T I O T E R T I A,

D E

VERA, NON SIMULATA,
JURISCONSULTORUM PHILOSOPHIA.

Habita Trajecti a. d. xvi. Septembr.
M D CC XXII.

Plinius lib. IV. epist. 17.

*Naturale est cuique, ut ea, quæ quis adeptus est, ipsa
quam amplissima existimari velit.*



Illuxit nobis iterum, Auditores, omnis ordinis,
loci & dignitatis honoratissimi, illuxit nobis,
inquam, anni litterarii dies auspiciatissimus, quo
Musarum delubra referantur, & docentes, pari-
ter ac discentes, ad munia revertimur feliciter.
Vulgus gentilium superstitionum omina principiis inesse
rebatur; ideoque ab avibus signa, a decorum simulacris auxi-
lia petebat. Rectius Sapientes ignavum bubonem, & fini-
stros corvorum volatus riserunt, modo rerum agendarum
primordia a Diis immortalibus caperentur. Veteres Roma-
ni nihil magnum, in bello vel pace, publice aut privatim
inchoabant, nisi solenne illud carmen, Quod bonum, fe-
lix,

lix, fortunatumque sit, essent præfati. Quotquot magistratum inibant, aut novum opus suscipiebant Quirites, leviter aliquid primo die delibabant; ne totus annus, totumve opus ab auspicio iners censeretur. Consules quum annum suum aperiebant, solennia ludebat omnia libertas, lætumque tribunal auspice clamore resonabat. Prætor Kalendis Januariis, summa prætexta, & sacrificio in Capitolio facto, conscendebat rostra, ac more majorum, quid mereri vellet, quæve in jure dicundo observaturus esset, proponebat. Ipse Cajus noster, * legum vetustarum interpretationem facturus, non modo cujusque rei partem potissimam principium vocat; sed illotis manibus protinus materiam interpretationis tractari vetat; quia præfationes istæ & lubentius nos ad attentionem materiæ proponendæ producant, & cum ibi venerimus, evidentiorẽ præstant intellectum. Hujus prudentissimi viri præceptum secuti sunt varii in Germania, Gallia & Italia Professores, qui, in vestibulo prælectionum suarum, rationem instituti, cum ejus, quam tradituri erant, disciplinæ laude conjunxerunt. Sed dum quisque merces venales extollebat, omnium auctoritas elevata est, tepuitque tandem mos non spernendus, postquam minus morati, circulatorum instar, ex vicinis theatris, tam doctrinas, quam earum doctores, mutuis convitiis prosciderunt. Absit vero abusus tollat usum consuetudinis laudatissimæ, quæ & ad augendam artium dignitatem, & ad animos juvenum inflammandos suscepta est. Magnus ille Antonius Matthæus, inde usque ab ipsis illustribus hujus Academiæ incunabulis, solenne hoc plus semel servavit, ejusque clarissimi successores haud unius exempli imitationem nobis prodiderunt.

Non equidem a duplici munere tantum mihi otii superest, ut ingenium in Rhetorum scholis exerceam: neque adeo me vexat philantiæ tentigo, quin sentiam, tenuitatem
meam

* In l. 1. de Orig-juris.

meam vix quicquam doctis auribus dignum, proferre poſſe. Interſtrepit tamen anſer olores aliquando; & quidni quælibet arriperetur occaſio, celebrandi munificentiam Ampliſſimorum Academiae hujus Curatorum, iisque ex yelere formula, apprecandi, ut annare & perennare poſſint, in publicum bonum? Vobis autem, Viri Celeberrimi, Collegæ conjunctiſſimi, non poſſum non, erumpente lætitia, gratulari raram temporis felicitatem; qua pars vegeta ſeneſcæ, pars virili ætate, omnes feſti atque valentes, ſacras has ædes reviſimus, dumque alibi conſcientiæ libertas proſtrata jacet, alibi litteræ mœrentes in exilium pelluntur, nos in pace & amore litterarios conventus celebramus: id quod ut vobis & mihi ſæpius contingat, votis conceptis opto.

Quam vellem autem, ceteri omnis ordinis Auditores, tale in præſens elegiſſem legalis orationis, ut Zaſius vocabat, argumentum, quod huic temporis, loco & perſonis eſſet accommodatum, quodque, præter animi delectationem, utilitate ſeſe commendaret! Bonum, opinor, factum erit, ſi hoc ipſo die, quo juris Naturæ & Publici explicationem aggreſſurus ſum, de *Vera, non ſimulata, Jurisconſultorum Philoſophia* dicam, & telam, quam alibi exorſus ſum, pertexam. Enimvero veteres Jurisconſultos a Stoicis præcipue imbutos eſſe, olim publico ſermone, adverſus Paganinum Gaudentium, oſtendi; ſuperest, ut quibus in partibus rigidam magiſtrorum diſciplinam viri ſummi, & juris auctores, deferendam exiſtimarint, ediſſeram: id quod haud commodius fiet, quam ſi vera ſapientia à ſimulata diſcernatur.^a Nil præterea Inſtitutionum explicationi aptius præmitteretur, quam invidendum illud & magnificum ordinis noſtri elogium, quod Ulpianus, ſtatim ſub initium libri primi Inſtitutionum, ſibi ſuiſque ſociis ſuſpenderit. Quid denique recitationibus publicis, de differentiis Juris Civilis & Canonici, nec non de Originibus præcipuarum juris Eccleſiaſtici materiarum, magis erit accommodatum, quam Sa-

P p p p

cer-

^a Vide ſupra pag. 566. in fin.

cerdotium juris ? quod Justinianus Imperator, seu Pandectarum architecti, valvis & portis sanctissimi Jurisprudentiæ templi inscripserunt. Verba Ulpiani sunt, quæ sequuntur: *a Juris merito quis nos Sacerdotes appellet. Justitiam namque colimus, & boni & equi notitiam profitemur: æquum ab iniquo separantes: licitum ab illicito discernentes: bonos non solum metu poenarum, verum etiam præmiorum exhortatione efficiere cupientes; veram, nisi fallor, Philosophiam, non simulatam affectantes.*

En fundum sermonis pulchrum omnino, & varia observatione secundum, in quo excolendo decora ingenia, cum in commentariis ad Pandectas, tum in libris singularibus elaborarunt.^b Magna plerorumque horum apud me auctoritas est, & ingenui pudoris erit laudasse, per quos profecerim. Nisi tamen me omnia fallunt, non pauca adhuc in publico relicta sunt, quæ quum nemo occuparit, jure communi mea faciam, Vestroque judicio submittam. In eodem prato bos herbam quærit, canis leporem, ciconia ranam: mihi princeps cura erit, atrox censuræ telum submovere ab Ulpiano, viro sapientissimo & larva Stoicis detracta, simulatam eorum in multis demonstrare contemplativam disciplinam, præ activa & mascula Philosophia, quam Jurisconsulti sunt secuti. Quis enim tam ferreus est, ut se teneat? quum nonnulli, sine suffragio populi Ædilitatem gerentes, indignantur, & clamant: Domitium, desultorii ingenii hominem, pomœria artis suæ extendere ultra fines; sacros eum move-

^a In l. 1. pr. D. de Justitia & jure.

^b Ludovicus Malquytius, de vera non simulata Jætorum Philosophia, Paris. A. 1626. Ernstius & Brandes, de vera & simulata Jætorum Philosophia. Majore ingenii & eruditionis copia Ubertus Foliera, de Philosophiæ & juris civilis inter se comparatione, Romæ A. 1555. Hopperus & Conringius de vera Jurisprudentia. Sed his alius, quam nobis, fuit scopus. Petrus Faber multa, ad illustrationem hujus l. 1. pertinentia, in medium protulit; ut tamen spicilegium, haud contemnendum ex temporis consideratione, quo Ulpianus hæc scripsit, & ex historia Philosophica nobis superfit.

move re doctrinarum terminos; Sacerdotes ipsum in triumphum ducere, Philosophis sapientem barbam vellere, & suum denique studium reliquis anteferre, quo ambitioni vel avaritiæ suæ velificaretur.

Ne contra turbam instituta disputatio in incerto vagetur, patronum obrectatoribus dabo Adrianum Turnebum, ^a Criticorum patrem, qui Ulpianum ambitiose, ait, affectare sapientiæ munus, quo ejus ornamento arti suæ decus quæreret. Sapientiam, pergit, rerum divinarum & humanarum cognitionem esse; hanc ipsum, in Jurisprudentiæ definitione, Philosophis adimere, suis tribuere. In contumeliam denique Theologorum, & invidiam Philosophorum interpretatur, quod Jurisconsultos sacerdotes; & veræ non simulatæ Philosophiæ cultores appellavit. Nec prorsus spernenda videtur censura, quæ & alio textu, & patria, & genio Domitii mordace, & moribus ejus adjuvatur. Alibi enim idem Ulpianus, Philosophos numero Professorum habendos esse, negavit. ^b Deinde ex colonia Tyriorum sibi originem esse, ipse professus est; hi vero, perdita audacia, velut omnis Musæ mancipia, sese Romæ nunc efferebant, licet nullam Philosophiæ partem attigissent; bilingues erant, & Punica fide mercabantur. ^c Scipio Gentilis porro, at ipse Jurisconsultus, non tantum ex Ulpiani fragmentis, sed ex singulis quoque Athenæi paginis, animum ejus cavillis deditum elucere fastus est, eamque putavit causam esse, cur a Cynicis, quos interrogatiunculis vexa-

P p p 2

vit,

^a lib. viii. *Advers.* c. 20.

^b L. 1. §. 4. *D. de Extraord. cogn.*

^c L. 1. *D. de Censibus*. Virgilius Tyriosque bilingues, id est fallaces vocat l. 1. *Æneid.* 651. Juvenalis Phœnicum πολυμαθεις professionem, Romanis molestam, perstringit Sat. 111. 75.

- - - Ede, quid illum

*Esse putes? quemvis hominem secum attulit ad nos:
Grammaticus, Rhetor, Geometres. pictor, aliptes,
Augur, Schœnobates, medicus, magnus, omnia novit.*

vit, Σοφιστῆς & κειτηκτὸς appelletur.^a Idem denique sceleratissimus creditur esse homicida, omnibus bonis detestandus, qui non modo Christianos *impositores*, & codices eorum sacros, *libros improbatæ lectionis* appellare ausus, sed & libro VII. de Officio Proconsulis, rescripta Principum nefaria collegit, ut Proconsules & Præsides provinciarum doceret, quibus poenis affici oporteret eos, qui se cultores veri Dei profiterentur.^b

Verum enimvero non sinat alma Themis, indicta causa, arrogantiae & vanitatis damnari castissimum juris interpretem, virum modestissimum, & sæculi sui decus; qui nihil in vita, nisi laudandum aut fecit, aut dixit, aut sensit. Apage tam foedam protervitatem a virorum principe, qui virtuti sacramento dixerat; quem Heliogabalus, impurissima bestia, removit, ut *virum bonum*: qui veram quoque, cui semper litaverat, Philosophiam, morte non sicca confirmavit.^c Non thraeo, non Pyrgopolinices Ulpianus fuit, sed Jurisconsultorum κορυφαῖος, vir præstantissimus, sapientissimus, & prudentissimus, haud uno publico munere functus. Ad extremum vero, Prætorio Præfectus, Pater, Amicus, & Tutor Alexandri Severi, qui ideo summus Imperator fuisse dicitur, quod hujus consiliis præcipue Rempublicam rexit.^d Nil sane causæ erat, cur is disciplinæ suæ, aliarum obrectatione, famam aucuparetur, qui vel privato in limine, perpetuus populi Prætor fuisset, sed ad cujus nutum mox triginta tremebant legiones, quibus gubernacula imperii gessit. Nunquam certe metachronismi notam

^a Athenæ. lib. 111. c. 18. 19. Gentil. lib. 1. *Parerg.* 6.

^b Lactant. l. v. *Div. Inst.* c. xi.

^c Lamprid. *Heliog.* c. 16. Dio Cassius lib. 80. Jacobus Lectionius, magna facundia, vitam & scripta Ulpiani, duabus orationibus enarravit: sed jungendus ei est Clariss. Schultingius, in notis, ad vitam Ulpiani, a Bertrando & Grotio conscriptam

^d L. 2. §. ult. l. 4. in fin. D. de *Excus. tut.* l. 4. C. de *Contr. vel comm. stip.* l. 11. C. de *Quest. Nov.* 97. c. 6. Spartian. in *Nigro.* c. vii. Lamprid. in *Alexandro* c. 26. & 51.

tam effugient, qui Ulpianum, loquacem Rhetorem, apud Athenæum, cum nostro confundunt. * Injuria quoque eum, tanquam professum nominis Christiani hostem, a summis & imis, passim perstringi, nuper ostendi, * nec ad quæstionem præsentem id valde pertinet. Atque ideo hæc sufficere poterant retundendis illis, qui de Ulpiano, haud secus, quam de scurra e trivio, aut Græculo esuriente, aut Munna, jus trium discipulorum captante loquuntur.

Sed quia Turnebi asseclæ in his nondum acquiescent, res paullo altius repetenda est; atque ut via & ordine nostra proficiatur oratio, primum Philosophi existimationem Ulpiano ejusque symmystis breviter comparabo: dein veram eos Philosophiam non modo affectasse; sed & tanti nominis mensuram implevisse, postremo loco ostendam. Quo facto, laus modestiæ, & summus honos Ulpiano surget, unde ostentationis infamia ei parabatur. Dicendi genere humili, & juridico, aut si mavultis philosophico utar: Ita laudabo Jurisconsultos, ut veros, quos veneror, Philosophos, honore & cultu suo non defraudem; simulatores autem quosvis, Tros Rutulusve fuit, vivis coloribus depictos & variegatos sistere conabor. Vos, quæso Auditores, aures mihi benevolas præbete.

Omnes artes scientiasque cognitione inter se connecti, & sororio quasi vinculo conjungi, omnis ætatis Sapientes tradiderunt, & nemo nostrum cotidie non experitur. Græci amœnum illum variæ disciplinæ concentum *ἐκκλησιαστικόν*,

Pppp 3

Roma-

a Eundem errorem erravit Cujac. xxiv. O. 39. sed alius fuit Sophista Ulpianus, alius Jctus; uterque Tyrius, sed dispares ætate. Ille Pan-
cratem Poëtam, qui floruit sub Hadriano, notum sibi fuisse affirmat; hic pleraque imperante Caracalla scripsit, & à Prætorianis Alexandri occisus est. Vide argumentum, ab antiquo epitomatore, Athenæo præfixum; & Hieronymum Wolsium, ad Demosthenicos Ulpiani commentarios in princ.

b In disputat. de Statu Judæorum publico, ad l. 3. §. fin. de Decur-
tion. c. 1. §. 5. 6. Vide etiam Merillium lib. v. Observ. c. 22. & Meri-
cum Casaubonum ad lib. 1. Antonini pag. 386.

Romani orbem doctrinarum vocarunt. ^a Quemadmodum vero iter per orbem terrarum facientes, quibusdam in locis, prandendi causa tantum commorantur, in aliis pernoctant; alibi plusculos dies consistunt, tandemque in patriam reverti, penates ibi & sedem fortunarum figunt. Sic etiam eos, qui litteris operam navant, in quibusdam brevius, in aliis diutius immorari oportet: & illas quidem delibare, has integras perdiscere, atque ad eas exornandas & poliendas omnia referre. Apud Hebræos, legis divinæ studium, præter Theologiam contemplativam & activam, jus tam civile, quam Pontificium, etiam historias veteres comprehendebat. Simili eruditionis varietate, inter alios Romanos commendantur Nigidius Figulus, & Terentius Varro: nos Senecam Philosophum, & naturalis historiæ scriptorem Plinium, ex scriptis, quæ supersunt, admiramur. Eandem quoque viam ingressi sunt, quotquot veterum Jurisconsultorum per gloriam vivunt. Servium Sulpitium omnis doctrinæ studiosum fuisse accepimus: Antistius Labeo in omnes disciplinas penetravit. Masurius Sabinus in vario scientiarum genere diligenter fuit versatus: in uno Aristone omnes bonæ artes summum periculum adiisse videbantur. ^b Nemo autem Jurisprudentum tanta Physicarum, Medicarum, Politicarum, œconomicarum, etiam exoticarum rerum scientia clarus fuit, quam noster Ulpianus. ^c Si titulos Pandectarum de Re militari, Ædilitio edicto, de Tritico, de Auro & argento, de Penu, de Instructo vel instrumento legato, aliosque percurras, omnem rem bellicam, forensem,

^a Quintilian. *lib. I. Instit. c. 10.* Vitruv. *lib. I. c. 1. & lib. VI. præfat.*

^b Vide Ciceronem *lib. XII. de Oratore c. 33. & IV. ep. 3.* Gell. *I. XII. c. 11.* Athenæi *argumentum*, Plin. *lib. I. ep. 22.*

^c Ulpianus præ ceteris erat πολυδρῆς καὶ πολυγῆς, omniumque & politicarum, & œconomicarum, etiam minutissimarum rerum & scientia & usu callentissimus, ut passim in toto jure leges ejus ostendunt, scribit Carolus Molinæus in *tractatu commerciorum n. 775.*

sem, medicam, institutoriam, rusticam, urbanam, fabrilem, vestiariam, nauticam & unguentariam cum calluisse deprehendes. Nulla, illius ætate, de termino moto actio erat inter eruditos; nullus Prætor de jurisdictione cognoscebat. Propter inertiam multorum, & exigua naturæ præsidia, tum quidem plures artes erant constitutæ: & satis decantatum erat, cum, qui ubivis est, nullibi esse; fabrilia fabros tractare debere: sed qui in Rep. excellere volebat, omnia, quæ a sapientibus tradita fuerant, summo studio & cura disciebat; omnium rerum, quæ libero homine sunt dignæ, una credebatur esse doctrina, unus contextus disciplinarum. Qui Jurisconsultus, idem Theologus; idem rerum divinarum & humanarum peritus. Humani autem ingenii imbecillitas, & breve vitæ spatium, & longa singulorum artium cognitio, excellentia quævis ingenia monebat, ut a potiore disciplina, in qua consenuerant, tantum nominari voluerint.

Inter ceteras autem artes liberales, quas humana ratio comprehendit, Philosophia principatum tenere visa est Jurisconsultis; ideoque non ab Edicto Prætoris, neque a legibus XII. Tabularum, sed penitus ex intima Philosophia, juris artem hauriendam esse existimarunt. Hi omnes, quæ Philosophiæ tribuuntur partes, naturalem, quantum satis erat; diligentius rationalem, Politicam & æconomicam; diligentissime moralem sunt complexi. Hæc nimirum germana Jurisprudentiæ soror est, virtutis indagatrix, expultrix vitiorum, quæ eosdem habet fontes, qui legibus & jure civili continentur. Logicus si de triangulo disserit, Geometræ munus invadit: Rhetor, res divinas tractans, aliud agit, quam debebat. Verum si Theologis Philosophiæ insidiari licet; si Medici rerum naturalium scientia, se carere non posse profitentur; quod malum nostri ordinis homines ab illa omnium artium matre arceat? Profecto Jurisconsultus, Philosophiæ deditus, tantum abest, ut in alienas possessiones irruat, ut nomen suum tueri non possit, nisi largo
sa-

sapientiae illius flumine sit inundatus, quæ vitæ usum tradit, mores ad honestatem componit, & officia societatis humanæ dispensat. Itæ per omnes respublicas; legum æquitate celebratas; & maximos quosque legislatorum Philosophos fuisse, legumque interpretes philosophatos esse, liquebit. Athenas & Spartam, duos illos Græciæ feliciis ocellos, intueamur: nonne ibi Solon, hic Lycurgus, solius Philosophiæ ope, viam ad subigendos animos feroces muniverunt? Quid Zaleucus; & Charondas? quid ceteri Rheginorum, Locrensiû & Thuriorum legislatores? nonne in tacito illo Pythagoræ secessu sese præpararunt, priusquam jura darent, quibus immortalem gloriam sunt consecuti? Maneat ergo æternum Jurisprudentiæ cum Philosophia connubium; & valeant ignaviæ magistri, qui divortio pernicioso separanda contendunt, quæ individuo nexu semper conjuncta fuerunt, & porro a veris Jurisconsultis conjunguntur.^a

Videamus autem, quid impulerit Censores Ulpiani, ut nimis magnifice putarint, ab eo dictum esse, Jurisconsultos Philosophiam affectare. Hi scilicet maturos illos & consummatos veteris Romæ Prudentes componunt, cum modulo eorum, qui neglectis laborum gradibus, prout, amores vel ambitus suadent, biduo se Jurisconsultos profiteri non erubescunt. Alii forsan Jurisperiti officium arctissimis finibus concludi arbitrati sunt; scribendo, respondendo, de stillicidiis, antestationibus, vagulationibus, de rivis, glande legenda, aliisque ejusmodi contemptis rebus, ad quas Philosophus statim nauseat, diviniorebus tantum adfectus.^b

Ve-

^a Non repeto, quæ supra dixi, *Orat. I. pag. 584. 585. 595.* Sed addo Horatium *Arte poet. de vetustissima Philosophia Poëtica:*

- - - *Fuit hæc sapientia quondam*

*Publica privatis secernere, sacra profanis,
Concubitu prohibere vago, dare jura maritis,
Oppida moliri; leges incidere ligno.*

^b Cicero *I. de LL. Quo me vocas? aut quid hortaris? ut libellos*

com-

Verum niſi præjudiciis mens horum occupata ſit, levi negotio, ad proprii erroris confeſſionem eos adigam. Num enim parva cuiquam eruditio videri poteſt, de omnibus rebus, quæ in hominum controverſiam cadunt, juſ tenere, & rationem eas dijudicandi habere perceptam? Ergone vile aliquod artificioſum eſt juſ civile, rebus tranquillis turbandis, aut crumenis hominum impune emungendis inventum? quod in gyrum rationis deducit mortales, rebus ſecundis efferatos, ſocietates tuetur, & res cunctas æquis imperiis diſpenſat. Itane tandem quæſuoſum magis, quam ſalutare eſt Jurisconſultorum munus? qui conſultoribus formulam, haſtaſ patronis, judicibus rectum & bonum, Prætori æquitatem ſubminiſtrabant; ad quos ſic adibatur, ut non modo de univerſo jure, verum de omni officio ad eos referretur. Latiffime proſecto, per omnem ſocietatem humanam, manat juris interpretatio, nullaſque vitæ pars, domi foris; pace & bello; in divinis & humanis; publicis & privatis, neque ſi tecum agas aliquid, neque ſi cum altero contrahas, ejus munere vacare poteſt. Hæc ſuum cuique tribuendum, patriæ & parentibus parendum, fidem in conventionibus ſervandam eſſe jubet. Hujus cognitionem viri principes ſemper in poſſeſſione ſua tenuerunt, quod plurimas gratias, firmiſſimas amicitias, multaſque ſtudia pariebat. Et tu, quicquid es denique, tolle leges, & vincula revelles vitæ communis; aufer jura, & vide quid ſint dominia rerum? quæ vis obligationis? quis exitus ultimæ voluntatis? Nihil erit, quare exploratum cuiquam eſſe poſſit, quid ſuum vel alienum ſit, quid pater liberis ſit relicturus, quid filius a patre ſperare poſſit. Omnia incerta ſunt, ſimul a jure reſeſſum eſt.

Qq q q

Satis

conſciam de ſillicidiorum & de parietum jure? aut ut ſtipulationum & judiciorum formulas componam? Quæ & conſcriptæ ſunt a multis diligenter, & ſunt humiliora, quam illa, quæ à vobis exſpectari poſſo.

a Egreſſe Cicero, lib. xi. ad Famil. ep. 16. & pro Cæcina c. 25:

qui

Satis jam ex vultibus vestris colligere videor, Auditores, inter omnes constare, non utiliter modo, sed necessario Philosophiam cum Jurisprudencia copulatam fuisse olim, & hodie ab omnibus conjungi debere. Nunc major rerum ordo surgit, ubi ad veram, non simulatam Jurisconsultorum Philosophiam perventum est, quam sibi suisque adscripsit Ulpianus. ^a Ecquid enim, dicet aliquis egregie cordatus homo, ecquid hoc est, nisi ampullas projicere, & limites modestiæ egredi, per quam pudor honestus sibi stabilem demum auctoritatem comparare valet? Dic aliquem, sodes, dic Quintiliane colorem, Hæremus dubii! Poppius Aizema ^b hic exclamandum putat: non ego. Neque enim adeo in angustum redactæ sunt copiæ nostræ, ut animus abjiciendus sit: quicquid fieri potest, turpiter desperatur. Possem provocare ad naturalem illam mortalium inclinationem, qua suum cuilibet pulcrum videtur, & nemo non ea in re triumphat, in qua maxime se excellere sentit, ut ipse sese evadat excellentior. ^c Possem confugere ad innatam illam Romanis ambitionem, aut si mavultis, ad studium Syrorum alios vincendi ingenii cultu. Sed nihil horum opus est. Qui tot finium regundorum formulas præscripserat Juriscon-

qui & alibi multus est, in juris scientia prædicanda, *lib. 11. de Off. c. 19. & lib. 1. de Orat.* Quid, inquit, præclarior, quam honoribus & Reip. muneribus perfunctum senem, suo jure dicere id, quod apud Ennium dicit ille Pythius Apollo: se esse eum unde sibi, si non populi & Reges, at omnes sui cives consilium expetant, suarum rerum incerti; quos ego mea ope ex incertis certos, compotesque consilii dimitto, ut ne res temere tractent turbidas?

^a Livius similiter simulatum pavorem vero opponit *lib. 11. c. 10.* Florus veram fugam simulatæ *lib. 111. c. 1.* Sidonius Apollinaris *lib. 111. ep. 7.* Nihil affectatum simulatumque; vera potius severitas, quam severitatis imitatio. Optime Marcus Antoninus *lib. 1. n. 16.* *Τὸ αὐτὸν ἔχει καὶ τὸ τιμητικὸν τῶν ἀλλοῦς φιλοφρονῶντος, τοῖς δὲ ἄλλοις ἐν ἐξουσιῇ τῶν αὐτοῦ.* Vere Philosophantes in honore habebas, ceteris nihil exprobrabas.

^b *lib. 11. dissert. jur. civ. c. 9.*

^c Vide Plinium *14. ep. 17.* in fronte hujus dissertationis, ad invidiam statim ab Ulpiano removendam, laudatum,

consultus, libenter vicinis disciplinarum terminos permittebat. Qui legem Philosophiæ veræ, quantum natura sibi relicta capit, reipsa impleverat, nil erat, cur elogium Philosophi, cum aliorum injuria aucuparetur; unde quo minus gloriæ petiit, eo majorem est adsecutus. Quid ergo? Non ait Ulpianus, suam juris scientiam veræ Philosophiæ decreta tradere; Philosophorum omnia esse simulata, umbras & purgamenta mera. Non jactat, se suosque solos culmen veræ sapientiæ tenere, sed juxta cum aliis veris Philosophis, juris sacerdotes anxie eniti, & nervis omnibus studere, ut, damnato otio, hypocrisi, avaritia, & missis difficilibus nugis, *rem illam religiosam*, quam alibi vocat, ^a factis, non verbis excolerent; ejusque brabeum, animi tranquillitatem consequerentur.

Veram igitur Philosophiam primo *Activam* vocat, quæ boni & æqui notitiam non modo intellectu comprehendit, & lingua proficitur; sed quæ in Curia, in Foro, in omni vita civili, licitum ab illicito discernit, malosque cives, duabus rebus, multo potentissimis, immedicabiles pœnis coercet, reliquos vero præmiorum exhortatione bonos efficere conatur. Contra simulata *contemplationibus* argutis, & altercationibus cathedrariis, nil profuturis consumitur, otio gaudet, totaque in oratione, non in actione consistit. ^b

Q9992

Deinde

^a l. 1. §. 4. De *de Extraord. cognis.* Seneca Philosophiæ nomen similiter *sacrum & venerabile* appellat, *epist.* 14.

^b Aristoteles Philosophiam contemplatricem alibi quidem videtur evchere, sed activæ eam subjecit lib. 1. *Ethic* ad Nicomach. c. 2. *Beneficium civitatis & acquirere, & conservare, majus quid est divinius videtur: nam contentus quidem esse etiam unusquisque potest, si anni soli; pulchrius tamen ac divinius, si genti ac civitatibus utilis efficiatur.* Rotunde Cicero lib. xv. *epist.* 4. ad Catonem: *Soli prope modum nos Philosophiam illam VERAM & antiquam, quæ quibusdam otii esset ac desidia videtur, in forum. atque in remp. atque in ipsorum aciem pene deduximus.* Seneca *Indum litterariorum Philosophorum* (sic in vlt. Gronovio, pro *litterariorum* legit Faber, Lipsius ex suo *litteralium*

Deinde vera Philosophia, vel unius Socratis iudicio, est *moralis*, quæ naturam humanam penitus intuetur, ex ea mores recte constituit, eosque a labe & pravorum injuriis defendit. Hæc animum discuit, appetitus a vitiis purgat, bonum, malum; expetendum, fugiendum proponit; nec alios tantum facunde monet, domitas habere libidines; sed propriis cupiditatibus manus injicit, easque frenis & catenis compefcit. Simulata autem rebus *physicus* & coelestibus unice intenta, de fluxu & refluxu maris, terra, cælo, meteoris, comets, aliisque extra nos positis, multa obscure discierit, dumque nimium auctoritatis naturæ tribuit, in auctorem naturæ sæpius impingit. ^a Tertio veram Philosophiam *gratuitam* vocat, quæ sine præmio benigna, modicis

con-

valium) qui rem magnificentissimas syllabas vocant, & animum minuta docendo dimittunt, relinquendum esse suadet *Epist.* 71. Alibi veros Philosophos opponit *cathedrariis*, qui verbis non re philosophabantur, de Brevitate vitæ c. x. Solebat dicere *Fabianus*: non ex his *cathedrariis* Philosophis, sed ex VERIS & antiquis. *Argianus* Scholasticos & stultos conjunxit *lib.* 111. c. 26. *Marcus* Scholasticum viro maturo, & rebus administrandis idoneo opponit *lib.* 1. §. 16. *Julianus* Imp. ad *Themistium* pag. 263: Cum vita genus illud, quod in actione versatur, philosophico te anteferre dixisses; tam ejus sententia testem *Aristotelem* citasti, qui felicitatem in eo, quod recte agatur, suam putavit. &c. Posterior ætas *nominales* Philosophos appellavit, quod *avaræ rerum*, prodigi nominum essent, auctore *Aventino* *lib.* vi. *Annal. Bojor.* *Stephano* Episcopo *Tornac.* *Epist.* 97. *verborum venditores* dicuntur.

Hinc *Aristo* dicebat, eos qui, relicta Philosophia morali, *τοῖς ὑψηλοῖς μαθηματικῶν* vacarent, similes procis *Penelopes* esse, qui cum dona potiri non possent, ancillis miscebantur, apud *Stobæum* *Serm.* II. *Alexandria* Astrologi tributum stultorum pendebant, quod a stultis confulerentur; *Suidas* in voc. *βλακισμοῦ*. Romæ ab omnibus fere Principibus interdictum fuit, ne quis omnino Chaldaeorum & mathematicorum ineptiis se immisceret, varique puniti sunt hi, qui id exerceverunt, auctore *Ulpiano* *sic.* xv. *Collat.* In Concilio Lateranensi Clericis vetitum exercitio Physicæ *cap.* 3. & ult. X. Ne clerici vel mon. ^a *Augustinus* hanc scientiam parum proficere, *Christiano*, scriptis *Enchirid.* ad *Laurentium*.

177. 178. 179.

contenta, ſine oſtentatione, ſine ſuperbia; nocet nemini, prodeſt multis, nec ambitione, aut ſpe lucri, ſed virtutis amore excitatur. Simulata *mercenaria* eſt, quæ victu & corporis habitu ſeveritatem præ ſe fert, lingua & ſupercilio pecuniam contemnit, at fictam adſeverationem ubivis nudat, artem ſanctiſſimam nummario pretio dehoneſtat, ſuaque utilitate omnia metitur. ^a Denique vera Philoſophia eſt *prudencia civilis*, quam Plato regalem ſcientiam & Principum vere propriam, Ariſtoteles artium reginam appellavit. Hæc eſt politica illa Philoſophia, & architectonica, quæ cum pedifſequis ſuis comitata, orbem illum doctrinarum, omnique juris, naturalis & divini, publici & privati complectitur ſtudium, nec leges tantum, ſed & earum finem, rationes, applicationem & interpretationem commonſtrat. Hujus fundamentum eſt illud rectæ rationis dictamen, quod non hauſimus, non didicimus, ſed cujus inventor & diſceptor eſt Deus; quod aliud non eſt nunc, aliud olim, aliud hic, aliud in Anglia, Gallia, Hiſpania; cui derogare non licet, quo ſolvi nemo poteſt; fons legum civilium, quæ ad genium cujuſque populi, ſuadente publica utilitate diriguntur. ^b Simulata autem *ſophiſtica* eſt, quæ in captan-

Qqqq 3

do

^a Papinianus; niveus ille veræ Philoſophiæ cuſtos, in l. 8. §. 4. D. de Excusat. tut. Etenim, inquit, *VERE* philoſophantes pecuniam contemnunt; cujuſ retinendæ cupidine fictam adſeverationem detegunt. Seneca 11. de Benef. cap. 17. *Res eſt intolerabilis, poſcere nummos & contemnere, Indixiſti pecuniæ odium; hoc profeſſus es: perſonam induiſti, agenda eſt. Iniquiſſimum eſt, te pecuniam ſub gloria egeſtatis acquirere.* Apulejus in apolog. ubi paupertatem Philoſophiæ vernaculam, & bonæ mentis ſororem explicat, *cur ejus, inquit, pudeat tenuiores, quod ea non ſimulate. ſed vere ſungimur.* Multa Grotius in ſtor. ſparſ. ad l. 1. D. de Extr. cognis. Freherus 1. parerg. c. 1. Henelius c. 12. Ot. Vratiflav.

^b Euphrates Philoſophus apud Plinium lib. 1. epiſt. 10. *Hanc eſſe Philoſophiæ, & quidem pulcherrimam partem, agere negotium publicum, cognoscere, judicare, promere, & exercere juſtitiam, quæque* ipſi

do & illaqueando occupata, meris sycophantiis & fallaciis humanarum fictionum innititur, a Platone olim derisa, nunc proceribus contempta, crux melioris juventutis; quæ utiliore fruge neglecta, scholæ non vitæ discit, & tot inter nebulas variarum opinionum, vix viam videt, qua ad rationalem & veram sapientiam eatur.^a

Jam vero, per fidem vestram, Auditores, aures animumque in rem præsentem convertite; & verba Ulpiani, convitiis vulgo proscissa, ac tantum non arrogantiae damnata, mecum considerate pressius. Ecce! quam prudenter ille temperat sermonem? quanta cunctatione deliberat? nec absolute tandem, sed hæsitans pronunciat, judicii temeritatem, si qua esset, velut deprecaturus: *Veram Philosophiam, nisi fallor, non simulatam affectantes*. Tanta nimium viri hujus summi erat modestia, ut licet sententiæ suæ esset certus,

ipsi doceant, in usu habere. Cujacius in adhortatione ad filium Jacobum, tractatui vi. ad Africanum præmissa: *Sine studiis Juris Civilis, inquit, neque stare res, neque mores hominum constitui, componi aut temperari ullo modo possunt: sine quibus prudentissimus cautissimusque rerum homo, quisquis sit, quantumvis felici fidere natus, nemo unus evaserit unquam, sine quibus æqui & boni quoque speciem comprehenderis vix unquam quisquam bene; nec si se dederis totum Philosophiæ, nec si litteris sacris. Nam Philosophia universa tantum præcepta regendæ Reipublice nos docet, nec attingit singula quæque &c.* Multis partibus, magnoque dignitatis intervallo, jus civile Philosophiæ præstare, Ubertus Folieta, in libris tribus docuit, *de Philosophiæ & juris civilis comparatione*.

^a Hanc Plato infamat passim, maxime in Hippiâ minore, & in Sophist. *το σοφιστήν* definit: *μιμητὴν τῆ σοφίας, sapientis simiam*. Sophismata & ancipites disputationes inde Philosophiæ dicuntur apud Ciceron. III. de Orat. 27. Senec. epist. 48. Goll. lib. IV. c. 1. *Sophistæ appellantur ii, qui ostentationis, aut quæstus causa philosophantur*, ait Tullius II. Acad. quæst. Seneca ep. 29. *circulatores sophistæ vocat, qui Philosophiam honestius neglexissent, quam vendunt*. Idem epist. CXI. *VERUS & rebus, non artificii Philosophus*. Marcus Antoninus Dii acceptum fert, quod cum philosophandi cupiditas incessisset, non in Sophistam aliquem inciderit, nec syllogismis resolvendis, vel meteorologicis discutiendis, tempus defec contriverit lib. I. in fin.

tus, nec falli timeret, tamen verbis timidis: *nifi fallor; credo, opinor, videtur, difficile, mirum, novum, verius est, magis puto, ut mea fert opinio*, aliisque id genus moderationis formulis eam proferret. Sæpe sententia ejus discrepat; nuspam verbis petulantibus aut dictu asperis utitur adversus illos, quos reprehendit. Si maledicta & concertationes iracundas adamasset, hic locus erat fictos Philosophos, qui omnia vitæ instituta præ sua sorte despiciebant, castigandi; sed nihil horum. Dum contumelias, turpem animi impotentis & simulati fœtum detestatur, verum se Philosophum esse ostendit. *Affectare*, in partem bonam, est omnibus votis & viribus appetere, animum pronum ad faciendum habere.* Se ergo suosque focios, æquum ab iniquo separantes, licitum ab illicito discernentes, cives non solum metu pœnarum, verum præmiorum quoque exhortatione bonos efficere cupientes, anxie eniti declarat, ut veri Philosophi essent, sed experiundo didicisse, quam id difficile sit, immo perfecte præstari non possit. Prorsus ac bis sanctus Apo-

* Hoc sensu affectare iter, viam, regnum, Cicero, Virgilius & Livius dixerunt. *Qui data opera & sine lucro hoc affectaveris*, inquit idem Ulpianus noster in l. 5. D. Ex quib. caus. maj. Mornacius longe convenientius in hoc, quod explicamus, capite legendum putat, *affectantes*, quia in re simili Paulus 11. ad Timoth. c. 3. v. 10. sic locutus fuit. Sed magis est, ut Ulpianum, dum punit simulatos Philosophos, voce Philosophica usum esse credamus. Seneca ep. 89. *Philosophiam sapientiæ amorem & affectionem* definit. Tertullianus, Ulpiano æqualis, lib. 1. ad nat. c. 4. *Sed veritatem, sæculo operosissimam, Philosophi quidam affectant, possident autem Christiani: ideoque qui possident magis displicent, quia qui affectat inludit, qui possidet defendit.* Idem in Apolog. c. 46. *Mimice Philosophi affectant veritatem. & affectando corrumpunt, ut qui gloriam captant. Christiani & necessario appetunt, & integre præstant, ut qui saluti suæ curent.* Similiter Jurisconsulti, Reip. consulentes, integre præstare conantur leges veræ Philosophiæ, easque re & factis, non per mimicam *vanitatem* affectant. Studiosos sapientiæ se esse gloriantur, non eruditos. Hinc artem suam *studium* vocant, se *studiosos*, quia dant operam, necdum pervenerunt.

Apostolus, si parva licet componere magnis, ad Philipenses scribens: non quod jam metam apprehenderim, aut jam sim consummatus, sed persequor experiens, an quoque comprehendam.^a Verum quod præ verecundia sibi tribuere non ausus est magnus Juris antistes, id ratio postulat, ei mortuo ut asseramus. Res omnis manifesta erit, si tempus, quo hæc scribebat, tum sectas & æmulationem Philosophos inter & Jētos contemplemur: Sic enim causā cadam, nisi liquido ostendero, propius ad veræ sapientiæ culmen Ulpianum, cum plerisque Jurisconsultis accessisse, quam ~~Philosophos~~ Philosophi ejus temporis, nulla laude vel patrocini-
nio digni.

Natus est Ulpianus, Antonino Philosopho imperante: libros Institutionum, ex quibus hoc caput desumptum est, ut alia pleraque, elucubravit sub Antonino Caracalla; sub Alexandro autem Severo, in summo honoris fastigio, militum scelere trucidatus est.^b Jam vero aptum philosophandi sæculum natum erat, quo Marcus Antoninus, Princeps cognomēto Philosophus, imperio præerat, & sapientiæ studium, non scriptis tantum, ac decretorum sententia, sed morum gravitate, atque continentia usurpabat. Unde princeps providentissimus, Philosophiæ plenus, & Philosophissimus vocatur.^c Hinc quoque factum est, ut nulla ætas majorem philosophantium protulerit proventum, quam ista: solent

^a Ad Philip. III. 12.

^b Caracalla imperare coepit A. C. 211. Alexander A. C. 212. Institutionum libros ab Ulpiano scriptos esse, sub Antonino Caracalla, liquet ex fine tit. 16. Collat. LL. Mof. & monuit ibidem Eruditissimus Vir, Ant. Schultingius in notis.

^c L. 67. §. fin. D. de Leg. lib. 2. l. ult. C. de Repud. l. pen. C. de His quib. ut ind. Nov. 22. c. 19. Eutropius lib. VIII. Hist. Rom. Marcus Philosophiæ deditus Stoicæ: ipse etiam non solum vitæ moribus, sed etiam eruditione Philosophus. At Capitolinus in ejus vita, datum ei visio, refert, quod & fictus fuisset, nec tam simplex, quam videretur. De numero philosophantium hoc ævo Herodianus lib. 1. c. 2. §. 8:

ſolent enim homines vitam Principis plerumque æmulari; ad hanc flexibilis quiſque in quamcunque partem conver- titur, nec tam imperio opus eſt, quam exemplo. Plerique autem, ut ejus genio ſe conciliarent, barbæ palliique habi- tu Philoſophos ſeſe mentiebantur, lucra & immunitates tan- tum captantes, homines ignava opera, Philoſophia ſenten- tia. Nulla ætas ejuſmodi ſimiis caruit: ſed dies me defice- ret, ſi mathematicorum, aſtologorum, genethliacorum, Chaldæorum, magorum, impietatem & diſciplinam nume- rorum, Romanis potentibus inſidam, ſperantibus fallacem, enarrare vellem. Senatusconſultis & Principum Ediſtis im- poſterioribus his occurrendum fuit plus ſemel, eorumque mul- ta in libris noſtris ſuperſunt. Quis neſcit toties pseudo- Philoſophos Urbe pulſos? ſimulatam Philoſophiam a Co- micis in ſcæna traduſtam? a Poetis denique circumforaneos iſtos, qui in convitia ſua diſerti, in ſuam libidinem & ava- ritiam perorabant, populo deridendos propinatos eſſe? ^a Ve- rum ſub Marco talium integri obrepebant greges: *Magna multitudo ſe philoſophari ſimulavit, ut ab eo locupletaretur*, in- quit Dio Caſſius; addit Capitolinus, inde eveniſſe, *ut fa- ma fuerit, quod ſub Philoſophorum ſpecie quidam rempublicam vexarent, & privatos.* ^b Non minor horum, tempore Septimii Severi, proventus fuiſſe videtur; quia non ipſe tantum Au-

Rrrr

guſtus

^a Elegans Ulpiani locus *tit. xv. Collat. LL. Moſ. Pauli v. Sent. 21. §. 3. Ennii pag. 226. Pacuvii apud Gellium lib. xiii. c. 8. Plauti in Curcul. 11. 3. vſ. 9. Valerii Maximi lib. 1. c. 3. Taciti 11. Ann. 32. & 1. Hiſt. 22. Sueton. Tiber. c. 36. & Domit. c. x. Juvenalis Sat. vi. Martialis lib. ix. ep. 77. Quintilianus Inſt. lib. 1. præfat. Noſtris tem- poribus, ſub hoc nomine maxima in plerisque vitia latuerunt: nomen enim virtute ac ſtudiis, ut haberentur Philoſophi laborabant; ſed vultum & triſtitiâ, & diſſentientem a ceteris habitum peſſimis moribus prætendebant.*

^b Dio in Marco lib. 71: & Capitolinus in eodem c. 23. ubi Caſau- bonus ad hos, qui ſub Philoſophiæ ſpecie Remp. vexabant, Marci re- ſcriptum reſeri poſſe cenſuit, a Modeſtino memoratum, in l. 30. D. de Panis & Ulpiano diſt. tit. xv. Collat.

gustus *Philosophiæ studiis deditus* fuit, etiam infamata illius; quæ ex astris & genesi, futurorum notitiam profitebatur; sed ejus quoque uxor, Julia Domna, Caracallæ mater, circumfusam undique Sophistarum coronam secum duxit; atque adeo *Philosophiæ* fuit studiosa, ut *Philosophæ* meruerit nomen. ^a Evenit sic idem rursus, quod Marci temporibus, ut multi, *Philosophiæ* studio quam maxime se teneri, fingerent, ad gratiam & favorem promerendum, licet nulla docendi peritia, interpretandi subtilitate, aut morum probitate instructi essent. Quapropter Papinianus *Veros Philosophos* a falsis tum distinxit. ^b Sed, quod caput est, jam dudum Antoninus Philosophis, per omnes provincias, salaria, eaque nequitiam exigua, contulerat, & vacationes munerum personalium ac patrimonialium, a Vespasiano & Hadriano olim indultas, iis confirmarat; numerum vero, quot quibus in civitatibus exhiberi publice deberent, non finivit, conditiones quasdam lege proposuisse contentus, quibus expletis ad privilegia & lucra admitterentur. ^c His ergo quia multi, amictu tenus Philosophi, Ulpiani ætate, insidiabantur, amplasque mercedes a discipulis suis exigebant, quis ambigat, tales Professorum numero habendos, ab eo recte negari? Quanquam enim nosset, omnes liberalium artium Doctores, Professores dici, & Philosophiam rem religiosam esse, vox tamen professionis mage mercenariam operam indicabat, quam spernere oportebat eos, qui Philosophos se haberi vellent. ^d Modestinus tradit, Phi-

sopho-

^a Aurelius Victor *Cesarib. c. 20. Dio lib. 75. fin. Menag. Hist. mul. Philof. segm. 16.*

^b In l. 8. §. 4. *D. de Vacat. Et excusat. mun.*

^c Auctor est Capitolinus in *vita Pii c. xi. & Modestinus l. 6. §. 8. D. de Excusat.* Arcadius Charisius in *l. ult. in fin. de Mun. Et bon. & Diocletianus in l. 4. C. de Prof. Et Med.* Salarium pupas præparasse Lucianus in *Eunucho*, Philostratus *lib. 11. de vitis, in Theodoto*, & in *Creso* testantur. Vide Meursii *Fors. Ast. c. 8. & Gronov. lib. 17. de poc. vet. c. xi.*

^d Verba Ulpiani in *l. 1. §. 4. D. de Extraord. cognis. An Et Philosophi*

osophorum numerum, constitutione Divi Pii, ideo haud constitutum fuisse; quia *vari sunt, qui philosophantur*. * Valentinianus postea omnes, qui habitum Philosophiæ indēbite & insolenter usurpabant, patriæ suæ reddi jussit; turpe putans esse. ut patriæ functiones ferre non possent, qui vim fortunæ se ferre profiterentur. ^b

Satis, opinor, ex temporis ratione, quo scripsit Ulpianus, ostendi, perquam utile, immo necessarium fuisse, ut veri Philosophi a simulatis discernerentur; qui meritoria sua arte, Philosophiam, sanctissimam matronam, meretricis instar, ea ætate prostituebant. Major nunc lux affulgebit, si pressius consideremus, quatuor Philosophorum sectis, Platoniciis, Peripateticis, Epicureis & Stoicis, ab Antonino salaria constituta fuisse, ut juventutem docerent. * Alebat

R r r r 2

fic

phi Professorum numero sunt? Et non putem: non quia non religiosa res est: sed quia hoc primum profiteri eos oportet, mercenariam operam spernere. Hæc in contumeliam Philosophorum non vergunt, ut multi existimant; sed magis ad honorem eorum referri possunt. De Jurisconsultis enim in §. seq. posterius quoque affirmat; & utrosque separat a Grammaticis, Sophistis, Geometris, calculatoribus, chirurgis & auriculariis, qui extra ordinem de mercede agentes, audiebantur. In l. 3. C. Th. de studiis lib. *Philosophia arcana rimantes*. In l. 11. C. Just. de Prof. *Philosophie præceptores* vocantur.

^a In l. 6. §. 7. D. de Excusat. ubi Burgundionis Pisani, aut quisquis interpres est, errorem insignem, in versione vocis *αμφιβολοῦντι*, corrigit Menagius ad Laërt. lib. IV. segm. 50.

^b l. 7. C. Th. de Medicis & Prof. ad quam Jac. Gothofredus in notis, quid sit *habitus* Philosophiæ explicavit. Sed adde Matth. X. 10. Casaubon. ad Capitolini Marcum c. 2. & Salmas. de pallio. Herodianus habitum illum *φιλοσοφικὸν ἔχημα* vocavit lib. 1 sicut sacerdotum, Clericorum & Monachorum *sechema* in l. 3. C. de Summa trin. Nov. 123. c. 10. Nov. Leon. 7. Huc etiam pertinet elegans Diocletiani & Maximiani l. 6. C. de Muner. patrim. *Professio & desiderium tuum inter se discrepant: nam cum philosophum te esse propinas, vinceris avaritia & rapacitate; & onera quæ patrimonio tuo injunguntur, solus recusare conaris. Quod frustra te facere, ceterorum exemplo poteris edoceri.*

^c Lucianus in Eunuchō, Philostrat. lib. 11. de vit. Soph. n. 2. Tertul-

sic æmulatio ingenia; sed dum hunc invidia, illum avaritia, omnes præjudicium auctoritatis accendebat, quisque suam philosophiam veram, ceterorum simulatam esse jactavit, philosophico more. Academici quidem & Peripatetici inter steriles cathedras plorabant; illi, quod ignorantie magistri erant, & Reipublicæ ideam, quæ nusquam fuit, nec erit, fingeant: hi vero, quia se totos ad naturæ investigationem conferbant, sed maxime necessariam Philosophiæ partem, quæ posita est in virtute & moribus, relinquebant. ^a Ad Epicuri vero disciplinam populare voluptatis nomen multos invitabat, viros magnos, & principes civitatis; qui patris sui memoriam, velut Dei cujusdam, annua solennitate colebant, ejus imaginem in annulis, poculis & cubiculo habebant, ratasque ejus sententias ad verbum ediscebant; sancta, recta & fortia ipsum præcipere credentes. Hi magna amoris conspiratione, sed fastu intolerando, *Philosophi* nomen soli Epicuro, sibi *vere philosophantium* laudem tribuerunt. ^b Non hic sectæ infamatae dogmata defendam, quæ sanior Philosophia merito proscribit. Nolim vero omnia dicteria & scommata, in hortorum magistrum ejusque Sectatores vibrata, pro veris haberi; quia livor Stoicorum magnam eorum partem effudit. Nihil autem his litibus

tullian. *Apolog.* c. 3. Vide de sectis elegans judicium Diodori Siculi *l. 1. c. 29.*

^a Commentitiam Platonis remp. reprehendit Athenæus *lib. xi. Deipnos. c. ult.* Ejus leges, sicut summum stultitiæ exemplum, proponit Lucianus in *Icaromenipp.* p. m. 689. Græci, cum frivolum quid significare voverunt, proverbia loco, *ψυχροίτοις Πλάτωνος νομοι*, *Frigidius Platonis legibus*, dixerunt.

^b Cicero *lib. v. Tusc. Quæst. An Epicuro, qui tantum modo induit personam Philosophi, & sibi ipsi hoc nomen inscripsit, dicere licebit?* Discipulos ejus pro certo habuisse, atque professos: *Neminem extitisse Epicuro sapientiore*, testatur Plutarchus de Fraternali amore. Libros ejus de cælo delapsos, ab iis creditum, Victorius docuit *lib. xix. var. lect. c. 16.* An Alphenus Varus, Epicureos *απλως* Philosophos dixerit, in *l. 76. D. de Judiciis*, excussit supra *pag. 583.*

bus opus erat Jurisconſultis, viris politicis & popularibus, quibus Epicuri diſciplina nullo modo vera videri poterat. Is namque Rempublicam noſſe, aut gerere, negabat eſſe ſapientis; & fugere omnem diſciplinam navigatione quam velociſſima jubebat. Hoc amplius, Deos nullam humanarum rerum procurationem habere cenſuit: quam ſententiam ſi veram habuiſſent Jurisconſulti, ubi pietas? ubi religio? ubi juſjurandum? His vero ſublatis, fides etiam, & ſocietas humani generis, & una excellentiſſima virtus, Juſtitia tollitur, cujus ille nihil reliquit, niſi nomen inane, quod intra communem utilitatem conſiſtat. Denique omnia ſui cauſa quum facienda docuit, non civitatis: an juſtitiam adminiſtrari, voluit? quæ, Ariſtotelis eſſato, *αλλοτριον αγατον*, alienum, non proprium commodum ſpectat. Tullius *maxime aſtuti eſſe*, ſcripſit, *omnia ad ſuam utilitatem referre*; alibi *επικτηρειον* vocat, ad ſuum quæſtum unice callidum eſſe; quoniam hæc ſimulata, non vera erat Epicureorum Philoſophia, omnia voluptate metiri.^a

Ad Stoicorum ſectam nunc pergamus, graviſſimam & fortiſſimam, quæ virum ſummi ingenii Zenonem habuit anteſignanum. Is finem bonorum non in voluptate, ſed in honeſtate collocavit; atque ideo Epicuri diſciplinæ, tum maxime florenti, omnibus ingenii viribus non modo adverſatus eſt, ſed & novam hæreſin novo paxillo ut ſuſpenderet, ceteros maledictis laceravit. In epiſtola ad Antigonom Regem, vehementer laudat ejus diſcendi ſtudium, quatenus *veram* atque utilem, non autem *popularem* & morum corruptricem Epicuri Philoſophiam amplectebatur.^b

R r r 3

Ejus

^a Ariſtoteles *lib. v. Eſhic. Nicom. c. 10.* Cicero *lib. 111. ad Fam. ep. 10. & 1. de Nat. deor. c. 2.* juncto Laert. x. n. 150. Adde pulcherriſſimam Tullii epiſtolam ſupra pag. 584. & Schottum *Nod. Cicer. lib. 11. c. 19.*

^b Menagius *lib. vii. n. 8.* *κατοις της αληθινας και εις οφειν τινωσας*, &c. Similiter Marcus Antoninus Stoicos ſuos *vere philoſophantes* appellat,

Ejus alumni in physicis, quod ad divina, tum in doctrina civili, præcipue autem in ethicis excelluerunt, suumque sapientem nihil ignorare, nihil opinari, totam naturæ vim, & summum humani generis bonum scientia eum complecti, uno verbo, omnia, immo prope deum esse, sunt gloriati. Quantum ergo res cœlestis terrestri, Deus ipse hominibus præstat, tanto intervallo doctrinam suam ceteras antecire. Et sane inficiari haud possumus, nullum non virtutis genus severa lege ab illis exactum; multos eorum ad omnes virtutes magnos evasisse & excelsos: Catones denique & Brutos, Thræscas Pœtos, & Helvidios Priscos, quæ de iustitia, liberalitate, temperantia, honestate & animi magnitudine edocti erant, re & factis probasse. Plerique eorum hoc amplius se solos *sapientiæ doctores*, solos *vere Philosophos*, solos *Socraticos*, solos *Medicos majores*, tum propter sanctitatem doctrinarum, tum ob rigidam vitæ disciplinam appellabant. Epicurum contra otii magistrum; hortum voluptatis officinam fuisse; illius de grege porcos, in umbra, & amplexibus puellarum, plenos traducere hilaritatis dies, in aliis vere, in aliis falso, præ invidia & æmulatione criminabantur.^a Atque ob has causas magna hominum nubes Stoicorum familiæ nomen dedit, præsertim ex quo M. Antoninus, princeps optimus, in albo codem.^b

Ipse Ulpianus, cum plerisque Jurisconsultis, ingenium ex Stoicorum fontibus proluerat; quia Zeno a rebus geren-

pellat, *lib. I. §. 16.* τὸν ἀληθὲς φιλοσοφῶντων. Etiam Horatius, ubi Stoicus factus, vitam civilem laudat, *lib. I. epist. I. §. 16.*

*Nunc agilis sis, & mersor civilibus undis,
Virtutis VERÆ custos, rigidusque satelles*

^a Seneca de vita beata, c. 13. Plerique Stoicorum dicunt, sectam Epicuri flagitiorum magistrum esse. Epictetus multus adversus Epicurum *lib. II. c. 20. & lib. III. c. 7.*

^b Sextus Empiricus, hoc Marci ævo, assererat: *plures fuisse, qui Stoicam sectam sectarentur, quam qui aliam quancunque.* Hermotimus, apud Lucianum, professione Stoicum se factum, ait: *quia videbam plurimos ad eam sectam se conferre, eam meliorem esse consiciebam.*

dis minime avocabat, & Chryſippus juſſerat, πολυτεστειν τον σοφον, niſi prohiberetur. Cum ſuis igitur magiſtris pupugiffe videtur Epicureos, quaſi ſimulata philoſophia, tantum corpori deſervirent, atque omnia, quæ anquirenda in vita, quæque fugienda, voluptatibus & doloribus ponderarent; reipublicæ autem partem, quæ manu & minis, præmiis & pœnis bonos cives facit, nec noſſent ullam, nec noſſe vellent.^a Nolim vero exiſtimetis, ſolis Epicureis, ſimulationis infamiam adſpergi, unos Porticenſes, tanquam veræ ſapientię cultores, ab eo commendari: nam & inter illos viri optimi, & plurimi Stoicorum, dum præ ceteris ſapere volebant, ad factum & ſubtiles contemplationes prolabebantur. Olim quidem Stoicorum invidia maxime exarſerat in Epicurcos; at poſtquam Ariſtoteles Romanis placuit, in Peripateticos non minus obliqui fuerunt, quod hi bonis, quæ illi concupiſcebant, potiebantur. Deinde Ulpianus eique æquales, miſcellam magis amarunt Philoſophiam, quam ut in verba Stoicorum juraſſent: unde feliciter placarunt diſſidia Sabinianorum & Proculianorum, ex diverſo philoſophandi genere enata. Quod ſi poſtremo ex zizaniis de tota ſegete judicare liceret, infinitos Pſeudo-Stoicorum in ſcænam producere poſſem, qui aliter vixerunt, quam vivendum eſſe præceperant, quibuſque Ulpianus vere objicere potuiſſet, quod Herodes Atticus cuidam dicebat: *barbam & palium video, philoſophum non video.* Mul-

^a Hæc Celeb. Gundlingii ſententia eſt, in *Add. ad tom. xv. Gundl. p. 486.* Feſtman *ad hunc l. 1. n. 17.* & Stoicam & Epicurcam intelligit; at omnium ſectarum ſimulatam Philoſophiam Ulpianus inſectatur. etiam Pythagoreorum, quos αληθινος πρισταμινος φιλοσοφίας, *vere Philoſophia præeſſe*, Claudius Imp. ſcribit, in epiſt. ad Apollonium, & ipſe Apollonius, *epiſt. 50. & 53.* Sed Romanis erant invili, quia magiæ infamia laborabant; unde nec inter quatuor ſectas, ab Antonino ſalariis honoratas. Vide Rhodigin. *lib. xix. Antiq. lect. c. 7.* Pejſus vero Feſtman addit, Ulpianum Stoicis tantum operam dediſſe, eoque reſert quod dixit, *niſi fallor.* Sed multa Ulpianus ex Ariſtotele, Platone, aliisque eſt mutuatus. Vid. Pancirol. *lib. 1. Var. lect. c. 80.*

Multorum os ad modestiam videbat compositum, dejecta lumina, supercilia subducta, & corporis, velut rei supervacaneæ, contemptum. At si pectus intraret, dii deæque, quam omnia dissimilia! dira ambitio, inæquales livor, deorum neglectus, aliaque nefanda regnum tenebant. Non memorabo, quæ de Seneca scripsit Dio Coccejanus. Prætereo Egnatium, qui auctoritatem Stoicæ sectæ prætulit, habitu & ore ad exprimendam imaginem honesti exercitus, ceterum animo perfidiosus, & subdolos, avaritiam ac libidinem occultans.^a Hoc tantum dicam, quod integræ huic sectæ passim arrogantiae labes impingitur, quodque turbidos & negotiorum adpetentes fecit plus semel.^b Cicero Catonis doctrinam paullo asperiores & duriores appellavit, quam veritas patiatur; ejusque magistros, ait, fines officiorum longius, quam natura vellet, protulisse; ut cum ad ultimum animo contendissent, ibi tamen, ubi oportet, consistere deberent.^c Ut satis ex his appareat, Stoicorum mores & disciplinam cum vita civili non satis congruisse, minimum Jureconsultis eam per omnia aptam non fuisse.

Sed quia facilius latent, quæ non comparantur, age, Paradoxa cum responsis Prudentum conferamus, & aliter Philosophos, aliter Jurisconsultos astutias sustulisse apparebit. Inter illorum sententias & præcepta erat: sapientem sine affectibus esse; injuriam non accipere, nec gratia moveri; illum non exorari, non ignoscere; neminem misericordem esse, nisi stultum. Contra omnem sensum generis humani disputabant, omnia peccata esse paria, nec minus delinquere, qui

^a Dio lib. 61. Tacitus lib. xvi. *Annal.* c. 32. Hinc toties hypocritis ab Horatio, Juvenale, Persio, Martiale & Luciano barbatis magistris exprobrata est; & Pharisei, qua dogmata, qua mores, Stoicis simillimi dicuntur, apud Josephum, qui inter istos nomen erat professus, in *vita sua*.

^b Tacitus lib. xiv. *Ann.* 57. de Rubellio Plauto: *assumpta Stoicorum arrogantia, sectaque, quæ turbidos & negotiorum appetentes facit*. Mitius judicat Plutarchus supra pag. 579.

^c Cicero pro Murena cap. 29. & 31.

qui gallum gallinaceum, cum opus non fuerit, quam cum, qui patrem suffocaverit. At Jurisconsulti, homines moderati, & nihil humani a se alienum credentes, opinari, irasci, & exorari nonnunquam virum bonum statuebant: valuit aliquando gratia apud eos, & relictus misericordiae locus. Valde incivile ipsis videbatur, eandem crimini cum maximo, tum minimo poenam statuere: regulas, quæ singulis maleficiis æquam irrogabant æstimationem, in arte sua æqui & boni, sequebantur. *

Magnus ille Stoicorum coryphæus, Chrysippus incestos cum matre vel filia concubitus, argumento a gallis gallinaceis, aliisque mutis animantibus petito probavit. Zeno uxores communes in republica decrevit: neuter in paedæstis, fellatoribus, aliisque libidinum portentis, quicquam obscœni, nihil turpe in dictis agnoscebat: naturam ducem monstrare, crepitus æque liberos, in conviviis, ac ructus esse debere. Verum Jurisconsulti ubivis, præter id quod justum est, honesti quoque & decori rationem habent; & verecundiam, omnium virtutum custodem, inculcant, ut nemo magis. Maxime vero in matrimoniis contrahendis naturale jus & pudorem, nec id quod licet, sed quod honestum est, inspicere jubent. Recte sentiebant illi, per concubitus marium cum maribus naturam everti, & communi uxorum admittâ, totam civitatem unum fore lupanar, cum columbæ etiam, aliaque muta animantia servant conjugii fidem. Hoc proprium iis quasi symbolum & capitalis sententia fuit: Quæ facta lædunt pietatem, æstimationem, verecundiam nostram, & contra bonos mores fiunt, nec facere nos posse credendum est: *

Ex constitutione Stoica sapientes soli Reges, soli divites, sani & formosi; soli cives, liberi, & Magistratus; soli pistorum,

Sfff

^a Tullius *pro Murena*. c. 30. l. 19. *D. de Off. Præsidis* Grot. lib. 11. c. 20. §. 21. 23. Ampl. Bynkershoek lib. 1. *Obs.* c. 3.

^b Cicero *1x. ep.* 22. Sextus Empiricus *Pyrrh. Hypotyp.* 111. c. 24. l. 14. §. 3. *D. de Ritu nups.* l. 15. *D. de Condit. instit.*

stores, soli sutores, soli lentem accurate & cum judicio coquunt: insipientes omnes peregrini, exules, servi, fugitivi; nec leges, urbes, civitates, nisi sapientum. His dolor non malum, sanitas non bonum, exilium & publicatio bonorum non fugienda, sed rejicienda est. Verum quis vestrum non videt, hanc Philosophiam aditum in urbem, forum, curiam nullum habere potuisse? Ea sane admissa tollitur omnis status civilis, omne jus personarum, omne discrimen, inter liberos & servos, cives & peregrinos, homines sui vel alieni juris. Sed quamvis idem cum aliis sentirent, & nomina rerum magis immutarent; inde tamen inimicitiae inter parentes & liberos, qui non essent sapientes: inde contumacia, sui amor, privatorum denique ac Principum contemptus. Prudentius Jurisconsulti medium inter abruptam contumaciam & deforme obsequium iter elegerunt, satis persuasi, posse etiam sub malis Principibus magnos esse viros, obsequiumque & modestiam eo laudis excedere, quo plerique per abrupta, sed in nullum reipublicae usum, ambitiosa morte inclinarunt.^a

Zenonis decretum erat, nec templa, nec sepulchra ædificanda esse; quod enim non sit magni pretii, id ne sacrum quidem esse, aut religiosum. Ipse tamen sibi adversus, quod culpabat adorabat; colebat quod reprehendebat: loca sacra, auguria, vota, sacrificia, & omnem religionem sacrorum, aperta simulatione, ad superstitionem usque, observabat, non tanquam Diis gratam, sed legibus imperatam. Verum Jurisconsulti summi religionis vindices, & sacrorum custodes, jus publicum in sacris, sacerdotibus & magistratibus consistere sciebant; de divinis pariter ac humanis responsa dabant; neminem, qui sacra Diis, aut iusta mortuis faceret, in jus vocari permittebant, & summam esse rationem, quæ pro religione facit, ubivis testabantur.^b

Ex

^a Tullius IV. *Acad. quæst.* c. 44. & IV. *de Finibus* c. 9. Tacitus *Agric.* c. 42.

^b Laert. *lib.* VII. n. 33. Plutarchus *de Stoicorum repugnant.* *Ælian.* l. VIII. c. 14. l. I. §. 2. *D. de Just. & jure* l. 43. *D. de Religiosis.*

Ex præceptis Stoicorum non modo licebat, fati diem occupare, sed & sapiens, ex ædificio putrido ac ruente, sponte sua, ob levissimam, immo nullam causam, migrare debebat, quia vita convivio & ludo similis esset, a quibus satur & fessus abire potest. At Jurisconsulti non omnibus promiscue, nec aliter, nisi justa fuerit causa, de vita statuere permittunt. Paulus militem, qui sibi manus intulit, nec factum peregit, capite puniendum esse statuit: Ulpianus propalam malum servum esse pronunciat, qui aliquid fecerit, quo magis se rebus humanis extrahat; alibi eorum, qui ob criminis conscientiam mori, quam damnavi maluerint, testamenta irrita facit, atque Zenonem, Empedoclem, Cleanthem, Catonem, Euphratem, aliosque Philosophiæ simulatæ reos agit, quod *jactationis* causa sibi ipsis fata accelerarunt.* Illi in virtute nuda summam felicitatem collocabant, ideoque bonis corporis, & quæ extra corpus, ad fortem beatam constituendam nihil virium tribuebant. Naturam paucis esse contentam; plurimum habere, qui minimum desideret; opes a malis possideri; solam paupertatem Philosophiæ vernaculam esse; hæc & alia suis instillabant. At Jurisconsulti, vere Philosophi, boni viri & civis esse judicarent, sapientiam reliquis præferre, sed non excludere bona fortunæ, tam necessaria rei bene gerendæ instrumenta: duri hominis, & in se iniqui esse, amoliri a se Deorum munus, & nummos abjicere, quorum solidum esse usum, plus quam mathematicis demonstrationibus quilibet

S f f f 2

coti-

* Augustin. *lib. xix. de civ. Dei c. 4. l. 38. §. ult. D. de Panis l. 23. §. 3. D. de Edilis. editio l. 6. §. 7. D. de Injusto rupto*, ubi Accursius, Alciatus alique per voces *vel jactationis*, ut quidam Philosophi, mortem Empedoclis notari existimant, qui Deus immortalis haberi dum cupiebat, ardentem frigidus Æternam insiluit. Sed Menagius ad Laert. *lib. viii. n. 69.* jactationem adversæ fortunæ intelligit: quia vana ambitio non est *λογος εγωισμος*. Vide Lipsium *lib. xii. Manud. ad Stoic. differt. 22. 23.* Fabrot. *Exerc. v. Binckeroh. lib. iv. Obs. c. 4.*

cotidie experitur. Magis ergo suos admonebant, ut re & opera durum paupertatis telum effugerent: non amarent divitias, nec respuerent possessas, non in animum illas, sed in domum reciperent, quo miseris canis viaticum praeberent, nec liberi egestate premerentur.*

Nullus finis foret, Auditores, & Vestra patientia abuterer, si omnia Stoicorum paradoxa, fastigio humano altiora, immo prudentiae civili e regione opposita, commemorare vellem.^b Illi vaniloquentia sua affectus in totum excindi volebant: Jurisconsulii peccata quibus impares erant, ad vindices Deos remiscent. Illi fatui fati legibus omnia subijciebant, quibus ipse Deus irretitus sit, ut nassae piscis: Juris nostri auctores, ex scientia vel ignorantia humana, quid casus esset, vel non esset, prudenter aestimarunt.^c Illis placebat fetum partem ventris, non animal esse; & posse mulierem non minus fetu, ac alia corporis parte, se privare: Ulpianus embryonem pro nato habet, quoties de ejus commodo agitur, & mulierem in exilium exigendam docet, quae visceribus suis vim intulit, quo partum abigeret.^d Stoicus in sententia permanendum esse existimat, & veritatem potius deferendam, quam sectam: Jurisconsulti variarunt meliora edocti, & posteriores sententiam diviserunt, velut eriscundi, si alii censebant, quod sibi ex parte placuisset.*

Stoicorum dogma erat sapientem rempublicam administraturum, ipsi vero in otio versabantur. Pars illorum magna in lineis mensurandis & angulorum proportionibus erat occupata: alii in futile meditatione argutiarum, nihil ad vitam neque tuendam neque ordinandam promovente, consen-

^a Gellius lib. 12. c. 1. Turnebus lib. 25. *Advers.* c. 23.

^b Hujusmodi multa uno fasce collegit Heinſius de *ſas. Horatiano* pag. 242.

^c L. 28. §. ult. D. de *Judiciis*.

^d L. 8. D. ad L. *Cornel. de Sicar.*

^e Vide Papinianum nostrum c. xv. §. 5.

ſeneſcebant: alii ad ſyllabarum diſtinctiones & conjunctionum proprietates deſcendebant, Grammaticis velut invidentes: alii rurfus diſputationum & captionum dialecticarum laqueis adverſarios irretire ſtudebant: omnes maleferiati, & decretis contrarii, animum retinebant inexercitatum, & illa vere magna, atque mores publicos emendatura omitebant.* At Jurisconſulti vere viri, vere Philoſophi, iſtis operibus oſtenderunt, ad tuendos conſervandosque homines ſe natos eſſe; ideoque civilem ſapientiam, partim ſcientia, partim actione cenſendo; pacis bellique tractarunt artes. iſerunt in forum, ut amicis, civibus, propinquis ingenio & voce prodeſſent. Philoſophi denique ſi duce natura communes quasdam ſententias, de bonis expetendis, de malis fugiendis inveſtigarant, his contenti, mentem ad ulteriora non mittebant: verum herotes noſtri proveſti ſunt longius: quicquid ubivis egregium, quicquid per ſectas diſfuſum erat, collegerunt in ſuum juris corpus; tandemque per varia temporum intervalla, tum alia ex aliis neſcendo, tum experimenta utilitatis inſtituendo, pervenerunt ad illam honeſtarum actionum moderatricem, & omnium virtutum diſciplinam, quæ in publicis ſimul & privatis officiis excellit, atque civitates conſtanter, & fortiter, & perite adminiſtrat. Hæc vera, non ſimulata eſt Jurisconſultorum Philoſophia.

Si quis adhuc dubitat, num Ulpianus, aculeato hoc ſermone, pſeudo-Stoicorum latus fodicaverit, illum ad Sacerdotium juris voco, quod noſter ſibi ſuisque ſociis adſcripſit: *cujus (juris) merito quis nos Sacerdotes appellet.* Olim Philoſophorum, etiam antiquiſſimorum, fuit conſuetudo, ut ſuam contemplationem Deorum vitæ ſimillimam, ſe omnium viſcerum auſpices, omnium Deorum ſacerdotes profiterentur; ſed Stoici, majore arrogantia, ſolum ſapien-

Sſſſ 3

tem

* Plutarchus in libro *de Stoicorum repugn.* eos reprehendit, quod vita decretis non conſentiret; alia etiam carpit Seneca *epiſt.* 71. & 88. juncto Gellio *lib. x. c. 22.* ubi verba Platonis, ex dialogo, qui Gorgias appellatur, lectu ſunt jucunda.

tem suum, jactabant & Poetam, & Rhetorem, & Dialecticum, & Vatem, & Sacerdotem bonum esse, qui notitiam sacrificiorum, expiationum, dedicationum, & ceterorum, quæ diis propria sunt, perfectam habeat. & vere pietatem colat; ceteros omnes, ad stultum & profanum vulgus pertinere.^a Jam vero sciebat Ulpianus, omnium artium commune esse, ut sacra sibi haberent propria, earum antistites sacra se facere prædicarent, earumque docti mystæ, & sacerdotes appellarentur.^b Revocabat in memoriam, Deum esse, qui principia justî in nobis existere voluit; Jovem summum legislatorem & vindicem esse, qui sancta sanctis, prava pravis rependat; ipsam juris vocem Jovi originem suam debere, apud Latinos, cosque Justitiam, Jove progeneratam, inter divas retulisse. Juris ergo, quod artem æqui & boni definiverat, Sacerdotes vocat Jurisconsultos; quia
juris

^a Diogenes Laertius proœm. n. 1. Philosophiæ antistites, *ἱερεὺς τιμὴ καὶ προφήτης, sacerdotes ac Prophetas* appellatos docet. Apulejus in apologia: *Si Persarum lingua Magnus est, qui nostras sacerdos, quod tandem est crimen sacerdotem esse? & rite nosse, atque scire, atque calere leges carimoniarum, fas sacrorum, jus religionum? Siquidem Magia id est, quod Plato interpretatur Διὸς Διωπτικὴ* Et postea: *An hariolis licet jecinora rimari, Philosopho contemplari non licebit? qui se sciat omnium animalium aruspicem, omnium Deum sacerdotem.* De Stoicis Laertius lib. VII. n. 119. *μονὴς ἱερεὺς τῶν σοφῶν*; Stobæus tom. 1. lib. 2. tit. 4. *ἱερεὺς μόνος τῶν σοφῶν, φαντοὶ δὲ πολλοί.* Antoninus de rebus suis lib. III. §. 4. *ἱερεὺς καὶ ὑπουργὸς Διὸς.* Horatius inprimis huc pertinet lib. III. Ode 1. ubi Stoicorum sacris initiatus, ceteros in libro habet:

*Odi profanum vulgus, & arceo:
Favete linguis: carmina non prius
Audita, Musarum Sacerdos,
Virginibus, puerisque canto.*

^b Ovidius III. Amor. eleg. 8. *Ille ego Musarum purus Phœbique sacerdos.* Propert. lib. III. eleg. 1. *Primus ego ingredior puro de fonte sacerdos.* Sic omnes Christiani sacerdotes vocantur 1 Petr. II. vs. 5. Apoc. 1. 6. juncto Esaiæ 61. 6. Augustinus lib. XX. de Civ. Dei c. 13. Adde Casaubon. ad Persii prologum vs. 7.

uris sacris operantur, Justitiam colunt, leges sacratissimas religiose tractant; munus civile tam sancte, ut sacerdotium gerunt; oracula Themidis indies depromunt, & tanquam Jovis ministri, præmiis & pœnis, civium mores emendare conantur.^a Profecto si alibi universæ Philosophiæ descriptio, ad Jurisprudentiam recte ab Ulpiano erat relata: si Jurisconsulti in actu & opere vere Philosophos, rerumque divinarum & humanarum peritos se præstabant: quid veritatem, eis tribuere sacerdotii honorem, ab omnibus pseudo-Philosophis vulgo adoptatum? nam & sacra docebant, & sacris vacabant. sacerdotio in templis Justitiæ, in curia, in foro, in sacro Principis auditorioungebantur. Hi erant, ex quorum ordine olim Reges sacrorum & Pontifices Maximi electi, nunc autem Consistoriani Comites, & sacrarii Augusti assessorum sumebantur. Hi templa, delubra, & sacrificia eodem spiritu, quo rempublicam, curabant: hi sacerdotes simulatos quo ritu, quibus diebus, quibusve hostiis dii placandi essent, docere debebant: quia magna pars juris civilis jure Pontificio & libris ritualibus erat comprehensa, quæ omnia a Jurisconsultis velut mancipio possidebantur. In summa viros omnis juris peritos, prolixa laude cumulandos esse censuit Ulpianus, quo juvenes illorum gloria ad similem ingenii cultum, & virtutes sacerdotio dignas incitaret.^b

Vix

^a Jupiter *δικαιοπλοος* vocatur apud Callimachum *hymno in Jovem* vs. 3. Hæsiotus Justitiam, Jove progeneratam, laudat *Op. & dier.* 236. Templum Justitiæ Deæ consecratum ab Augusto Ovidius 111. *de Ponto* celebravit. Servium Sulpitium *Justitiæ magis, quam juris consultam*, laudat Cicero *Philipp.* 12. Idem *juris antistes* vocatur apud Quintilian. *lib.* 11. c. 1. Symmachus *Impm. justitiæ sacerdotes* orat. *lib.* 2. ep. 61. Corippo Anastasius *Quæstor juris legumque sacerdos* dicitur *lib.* 1. *de laud. Justin.*

^b *L.* 10. §. 2. *D. de Just. & jure.* l. 32. §. 4. *D. de Recep. qui arb.* Porphyrius *lib.* 11. *de abstin.* §. 49. *Vere qui Philosophus est, Deû alissi-*

Vix mihi tempero, quin Epicureis & Stoicis, simulatæ Philosophiæ convictis, addam Cynicos, quod a Stoicis tunica tantum distabant, sed initio, progressu & doctrina iidem. Horum ideam ut mente concipiatis, Auditores, proponite vobis senecionem horrenda bërba, sordibus oppleta & bibenti molesta, nudipedem, totum quantum sordidum & pellibus animalium villosum; hominem, qui quam semel induit togam, non exuit, nisi detritam & laceram; qui hariolorum more in triviis obvias quasvis aras occupat, ibique in summa capita, ad ravim usque declamat: se vero solum sapientem, & Regem omnium regum canina facundia profitetur. Talem, inquam, vobis sistite aretalogum, & mendicum merum, cui dolium regiæ, baculus sceptri loco erat, qui peram diadema, pallium vocabat paludamentum: sed qui pessimos mores, & impuras obscœnitates torvitate vultus, habituque a ceteris dissepiente obtegere studebat. Hujusmodi circumforaneum, nonne impostorem, vernaculum scurram, verum Cumanum asinum, & quidvis potius, quam Philosophum dixissetis? Nonne quod inter causidicos rabula, inter mercatores seplasiarius, id tota Cynicorum natio inter philosophos veros fuisse videtur? Jurisconsultis certe, viris aulicis, & in luce hominum versantibus, non poterant non molesti esse miseri hi circulatores, convivia beatorum frequentantes, atque canum more, in eos, qui stipem negabant, injurii, ceteris vernili adulatione blandientes. Quinimo pueri, lenones & meretriculæ stolidam barbam in publico his vellebant; ipsi vero, stulta dissimulatione, vix sputa & verbera a se defendebant, ut argu-

men-

alissimi sacerdos habetur. Pro Jurisconsultis Salomo Prov. xxi. v. 3. Facere justitiam & judicium, magis placere Domino, quam victimas. Romæ juris civilis interpretatio diu apud collegium Pontificum fuerat, postea viri primarii eam professi sunt, utriusque juris periti, ut docuit Brissonius l. iv. sel. Ant. c. 16. Similiter alibi sacerdotes jura reddidisse Cl. Perizonius observavit ad Æliani xiv. 34.

mentum haberent, in quo ſuam illam admirabilem patientiam oſtenderent.*

Jam ad finem properat oratio, Auditores, & diu nimius fui, in vitiis Philoſophorum conquerendis: ſed quia nonnulli veſtrum forſan cogitabunt, veteres illos homines fuiſſe, non Deos, nec paucorum crimen in omnium odium ab Ulpiano trahendum fuiſſe; idcirco permittite mihi, ut paucis adhuc æmulationem tangam, quæ omni tempore Jurisconſultos inter & Philoſophos magna fuit, ſed maxima a temporibus Marci Antonini. Quemadmodum enim qui prædia contermina habent, de vicinitate facile colliduntur; ſic diſſicillimum erat inter Stoicos & Jurisconſultos, ejusdem moraliſ Philoſophiæ cultores, æmulationem non oriri, quæ nata primum videtur ex conjunctione ſtudioꝝ, aucta inæqualitate præmiorum, exarſit invidia, cujus finis odium fuit & ſimultas. Accedebat animus Stoicorum mordax, & ſtudioꝝ argutiarum, & peritiæ ſophiſmatum, quibus

T t t t

irre-

* In Cynicos, hoc tempore ſcholam non habentes, frequentes tamen, graviffime invectus eſt Martialis lib. 1v. Epigr. 53. Lucianus in *Cynico*, & *Vitarum auſione*. Julianus etiam *orat.* 7. graphice eorum mores deſcribit, & monachos cum illis comparat, quorum inſtitutum *Philophiam* vocat Majorianus in *Novell. de ſanctis*. Salvianus lib. 2. ad *Eccl. Cathol.* aliique apud Cujacium in *Paratitlis ad tit. C. de Episcop. & Cler.* Frenium *Gloſſ. Græc. voce philoſophia*. Ignavia ſectatoꝝ vocantur in l. 26. C. de *Decurion.* Triboniano monachus ſimplicitate *gaudens & deſidia deditus* dicitur, in interpolata l. 25. D. de *Probat.* Quod in tranſcurſu Paganino Gaudenzio de *Philophia* apud *Rom. c.* 72. dictum eſto. Plautus Cynicos *paraſitos*, Seneca *circulatoꝝ*, Suetonius *aretalogos* appellavit. Horatius lib. 1. Sat. 3. ſ. 133. appoſite:

- - vellunt tibi barbam

*Laſcivi pueris quos tu niſi fuſſe coꝛces,
Uꝛgueris turba circum te ſtante, miſerque
Kumperis, & latras magnorum maxime Regum.*

Idem lib. 1. ep. 19. ſ. 12.

*Quod ſi quis vultu torvo ſerus, & pede nudo,
Exiguaque toga SIMULET textore Catonem,
Virtutemne repreſentes moꝛesque Catoniſ?*

irretire studebant Jurisconsultos, rebus magis, quam captio-
nibus intentos. Denique insita mortalibus natura, horum
recentem felicitatem ægris oculis intuebantur, modumque
fortunæ a nullis magis exigebant, quam quos in subscillis
suis nuper discipulos viderant, vel commilitones. Jam in-
de a Ciceronis ævo concertationis hujus vestigia supersunt;
qui licet ipse Philosophiæ mirifice deditus, sub Crassi per-
sona, tale judicium interposuit, ut pro Jurisperitis pronun-
ciarit, & omnibus Philosophiæ sanctuariis, prætulit duo-
decim Tabularum libellum. Locus illustris, & cum Ulpia-
ni verbis omnino conjungendus: ^a *Sive quem, infit, præ-*
potes & gloriosa Philosophia delectat (dicam audacius) hosce
habet fontes omnium disputationum suarum, qui Jure Civili &
legibus continentur. Ex his enim dignitatem maxime expetendam
videmus, cum verus, justus, atque honestus labor honoribus;
præmiis, atque splendore decoratur: vitia autem hominum atque
fraudes, damnis, ignominis, vinculis, verberibus, exiliis, mor-
te multantur: & docemur non infinitis concertationumque plenis
disputationibus, sed auctoritate nutuque legum domitas habere li-
bidines, coercere omnes cupiditates, nostra tueri, ab alienis men-
tes, oculos, manus abstinere. Fremant omnes licet, dicam quod
sento, bibliothecas mehercule omnium Philosophorum, unus mihi
videtur XII. Tabularum libellus, si quis legum fontes & capi-
ta viderit, & auctoritatis pondere, & utilitatis ubertate supe-
rare.

Ecce! idem, sed acerbius fuit Tullii judicium, veram Philo-
sophiam, quæ circa præmia & pœnas versatur, non tam in
Græcorum philosophicis scriptis, quam in duodecim Ta-
bulis, omnis publici ac privati juris fonte, reperiri. Philo-
sopho-

^a Ciceronis sunt verba in primo de Oratore. At Petrus Petitus lib.
iv. Misc. obs. c. 5. egregium hoc Romanæ arrogantiae ac vanitatis ar-
gumentum vocat, & æmulationi tribuit cum Græcis, vel ut personæ,
quam inducit loquentem, serviret. Verum Horatius xi i. Tabulas le-
ges sanctas; Livius fontem omnis publici privatiq; juris; Tacitus fi-
nem æqui juris appellavit.

sophi contra pleraque Decemvirorum humilia, plebeja, & ridicula habebant, præ his, quæ ipsi in scholis suis de Deo, de providentia, de summo hominis bono, de modestia, temperantia, de morum honestate, de officio, maxime vero de vitandis vitiis, etiam illis, quæ sub specie honesti plurimis imponunt, differebant. Animos eorum exulcerabat, quod Jurisconsultos, ad fastigia honorum evehi cernebant; plurimum gratiæ eos consequi apud consultores; latissime eorum manare industriam; atque ea tantum, quæ in ipsis rerum obtinebant argumentis, ab iis tractari. Hinc virus, quod in artem juris nil valiturum erat, in juris auctores summa iniquitate evomebant. Horatius, Stoicorum filius, neque Alpheno pepercit, neque Labeoni, nec Trebatio aut Galbæ; quia ipse legum imperitus ^a Persius Masuri rubricam arrodit, Arrianus Cassii præcepta fugillat, etiam ubi id minime putes. ^b Turpius Seneca, ut simulatos magistros suos tueatur, sub discipuli persona, *acutas Jurisconsultorum*, quas vocat, *ineptias* perstringit: eorumque *responsa valere*, scribit, *etsi ratio non reddatur*. Alibi Jurisconsultos *pallidos, graciles, vix animum habentes*, e tenebris producit: alibi *jurisdictionem insanis committi* criminatur. Majore insolentia alibi: Nos, ait, *nos certe dicimus, & Zenonem & Chrysippum majora egisse, quam si duxissent exercitus,*

T t t 2

gessis-

^a Horat lib. 1. sat. 2. §. 46. & 118. §. 82. 130. lib. 11. sat. 1. §. 7. seqq. juncto Cicerone lib. v. 11. ep. 10. & 22.

^b Persius sat. v. de Sabino: *Excepto si quid Masuri rubricæ notavit.* Arrianus ad Epictetum lib. iv. c. 3. *Hæ sunt illinc missæ leges: hæc edicta: horum interpretem esse decet; his parere; non Masurii & Cassii præceptis.* Menagius c. 43. *Amoenus:* & Bertrandus in *vita Sabini*, hos Jētos, tanquam præstantiores, nominari existimant: Lycklama vii. *Membr. ecl.* 37. Persium ad Masurii librum de turtis respectisse, contendit: At qui novit acutum illud Stoicorum ingenium, & odium adversus Sabinianos, is facile nobiscum faciet. Tantum in explicandis auctoribus refert, scire nationem! Vide etiam Galvanum de *Ufufr.* c. 5.

gessissent honores, leges tulissent, quas non uni civitati, sed toti humano generi tulerunt. Alibi rursus quærit: *An ille præstat, qui inter peregrinos & cives, aut urbanus Prætor aduentibus Affessoris verba pronunciat: quam qui docet, quid sit pietas, quid patientia, quid fortitudo, quid mortis contemptus, quid deorum intellectus, quantum bonum sit conscientia bona?* ^a Hæc Seneca, tempore Neronis: sub Domitiano, togæ Romanæ gloria, Quintilianus, querebatur, Philosophos inferiora omnia præceptis suis ac litteris habere. ^b Et plerique posteriores, cum irrisione audientium, militem gloriosum imitabantur, unde gloriæ animalia dicti. ^c

Verum quia Ulpiani tempore, majus evaserat Jurisprudentiæ lumen, ejusque cultores ad summos quosvis honores adscendebant, illa Philosophorum rumpebantur. Quicquid enim a Græcis sapientibus de republica, de legibus, de finibus bonorum & malorum, ambitiosis disputationibus effusum erat, id nugis excussis, in artem suam trans-tulerunt Jurisconsulti; ut quod antea fuerat otii levamen, nunc indies magis magisque converteretur in semen publicæ utilitatis. Nihil fere egregium in scriptis Græcorum reperiri poterat, quod non paucissimis illis juris præceptis: *Honeste vivere: alterum non lædere: suum cuique tribuere*, comprehensum esset. Philolophi præceptorum suorum ratas sententias jactabant: & Salus populi suprema lex erat nostris: Ignaviam prætendentes audiri volebant; Jura vigilantibus scribi: civilem sapientiam, rem sanctissimam esse ajebant, minime pretio nummario dehonestandam.

Tam

^a Seneca lib. vi. de benef. c. 5. Epist. 94. Ludo de morte Claudii, lib. xi. de Benef. 35. de Otio sapiens. c. 32. de Tranquill. anim. c. 3. Merill. i. Obs. c. 1.

^b Quintil. lib. v. Inst. orat. c. xi.

^c Sic Tertullian. de Anima c. 1. *Nedum Philosophus gloriæ animal, cui nec consolanda est injuria, sed potius insultanda.* Hieronymus, in epist. ad Theophilum Alex. *Philosophus gloriæ animal, & popularis aura vile mancipium.*

Tam pulcras autem doctrinas maxime ornabant facta iis consentanea, decorabat magnitudo animi, quæ nihil ad ostentationem, omnia ad conscientiam referebat, recteque facti non ex populi sermone mercedem, sed ex facto petebat. Possem Auditores, adductis exemplis, & comparatione instituta, ad liquidum perducere, plures Jurisconsultorum veræ Philosophiæ leges tum explevisse, quam Græcæ sapientiæ fictos auctores. Possem ostendere, horum alios Regum adulatores, alios scortorum amoribus, alios impudentiæ addictos fuisse. Possem enumerare sectas eorum innumeras, otium perpetuum, & acerrimas de rebus naucilites; Sed ohe! jam satis est. Omne nimium inhonestum est, & gratiam perdunt natura rei apta, nisi modo quoque temperentur. Sufficit, non facile quenquam ex istis, qui sapientiæ studium habitu corporis olim prætulērunt, cum his viris comparari posse, qui ingenium, laborem & fidem suam patriæ promptam expositamque præbuerunt: qui ita iusti, ita boni viri, ita periti, ac prudentes, ut natura, non disciplina consulti esse videantur.^a

Causa AA. perorata est: Vos nunc iudices surgite, & in consilium ite, veram, an simulatam Philosophiam affectarint Jurisconsulti, & uter ordo propius pervenerit ad summum

Tttt 3

hu-

^a Jurisconsultorum vere philosophantium elogia & exempla dabit Cicero pro Cæcin. c. 27. & Philipp. ix. Valerius Max. lib. vi. c. 4. Tacitus lib. xvi. Annal. c. 7. Plinius lib. 1. ep. 22. Athenæus lib. vi. c. 21. Spartian. Carac. c. 8. De Philosophis oratorie Quintilianus declarat. 268. *Ut omnes in unum Philosophos contraham, non tamen inter eos constare potest, quæ potissimum secta discenda nobis; quibus præceptis parendum sit. Pugnant inter se, atque dissentiunt: & perpetuam hanc per sæcula litem trahunt. - - Quibus credam? quibus accedam? quicquid probavero, plures negaturi sunt, nec quæcumque præcipiuntur, stare possunt. - - Quis usus ipsorum virorum? Militiane utiles, an civilibus officiis? Quid in his deprehendas, præter fictam frontem, & perpetuum otium, & quandam ex arrogantia auctoritatem?*

humanæ sapientiæ culmen. Ut veterum consensu, ^a sic Vestro judicio stabit Ulpiani honos, nec metuet sibi inposterum a calumniis eorum, qui vero fastu fictam ejus arrogantiam calcarunt. Nemo, opinor, Turnebe, tecum amplius vitio vertet virorum principi, quod homines, gloriæ amore tumidos, ac ceteros præ se contemnentes, unico vocabulo notarit; nisi & Prophetas, Apostolos, ipsumque Servatorem nostrum culpandos censeas, quod fucate piis, & personam agentibus alienam restiterunt. ^b Paulus discrete monuit Colossenses, viderent, ne quis eos deciperet per inanem fallaciam, quæ ex simulata Essienorum Philosophia, & præceptis Phariseorum, a Porticu petitis, tum oriebatur. ^c Hunc quoque si quid valetis, Adriani asseclæ, confutate; & falcem morosam in messem non vestram misisse prænitebit. Facebant nuncetiam, quotquot sunt artis nostræ otores, qui cum Eunapio Sophista, cum Zabarella & Piccolomineo, in ridiculam sententiam eunt, Jurisprudentiam simplicem peritiam sine arte, sine ratione esse, quæ Philosophiæ

^a Diserte Plato activam, moralem & πολιτικὴν Philosophiam veram appellat, *epist.* 10. Aristoteles *lib.* 1. *Ethic.* c. 2. Cicero *lib.* xv. *epist.*

⁴ Dionysius Halicarn. *in judicio de Isocrate*, Themistius in oratione, quam βασιλεῖν vocant, notas, symbola & γινωσκόμενα posuit, quorum beneficio verum Philosophum ab adulterino discernere liceat. Quintilianus *lib.* xi. *Inst. orat.* c. 1. *Virum civilem VEREQUE sapientem*, vocat, qui se non otiosis disputationibus, sed administrationi reip. dederit, a qua longissime isti, qui Philosophi vocantur, recesserunt. Lactantius *lib.* iii. de *Falsa sup.* c. 16. *Sapientia*, inquit, nisi in aliquo actu fuerit, quo vim suam exerceat, inanis & falsa est; recteque Tullius civiles viros, qui remp. gubernent; qui urbes, aut novas constituant, aut constitutas æquitate tueantur; qui salutem, libertatemque civium vel bonis legibus, vel salubribus consiliis, vel judiciis gravibus conferunt; Philosophiæ doctores præferit.

^b Jerem. vii. 4. Eccl. xix. 24. Matth. xxi. 5. Marci vii. 2. Luca xvi. 11. 2 Corinth. xi. 31. 2 Tim. iii. 5.

^c Coloss. ii. 8. Hasmoneorum decretum erat: *Maledictus sis, qui ducet filium suum Philosophiam Græcam.*

ſophiæ nomen haud mercatur. Valeant barbari juris Doctores, & ad Anticyras navigent, qui cum Ferrarienſi illo non Philoſopho, ſed *σοφω*, rancidam illam nœniam crepant: *Philofophiam ad jus diſcendum, magis obeſſe, quam prodeſſe.*

Nos vero, Auditores, per omnem vitam philoſophemur, ſenes, juvenes; nulla ætas ſapientiæ immatura eſt. Ut corpori medicina, ſic illa menti ſanandæ inſervit. Plato beatam prædicavit rempublicam, cujus rectores philoſopharentur. Nunquam adeo barbaries inter nos convaleſcat, nunquam ſic contra virtutes & prudentiam civilem conjuretur, ut non veræ Philoſophiæ nomen venerabile & ſacrum maneat; quod tunc fiet, quando ejus ſtudium porro tranquille tractabitur, nec de rebus aut difficillimis, aut non neceſſariis argutiſſimæ diſputationes habebuntur. Inprimis autem æternam illam & veriſſimam ſapientiam quæramus, præ qua omnia luſus, & omnia pulvis, & omnia nihil ſunt. Meum eſt conſilium, illa inquit, & æquitas: mea eſt prudentia, mea fortitudo: per me Reges regnant, & legum conditores juſta decernunt!

Nunc tandem ad Vos mea ſe convertit oratio, cariſſimi Commilitones, qui Jurisprudentiæ fidem dediftis. Vos, inquam, ad veram, non ſimulatam juris naturalis Philoſophiam invito; ſine qua ſtudium veſtrum multorum camelorum onus erit, Siſyphi ſaxum ingens, quod magno labore advolutum relabetur. Quæ enim, per Deum immortalem! veſtra eſſe poteſt juris ſcientia, niſi ad æquitatem naturalem revocetur? Unde autem veræ æquitatis regulas petetis, niſi ab arte æterna æqui & boni? Natura optima humani generis magiſtra eſt; illa ſemina juſti pectoribus Veſtris inſeſcit, quæ ſi negligantur, urenda filix, ſtupor & ruditas iis innafcetur. Cavete Vobis ab ignaviæ patronis, qui, pernicioſo in publicum exemplo, jus illud naturæ, tanquam ce-
rebrinum & nugatorium damnant, atque cum Epicureis, omnes meliores litteras, etiam hanc nobiliſſimam fugere ju-
bent

bent disciplinam, quo ignorantiae suae velificentur.^a Aliter longe veteris ævi sapientes, qui disciplinis suis hoc maxime argumento, quod naturam sequerentur, fidem adstruxerunt. Prisci Jurisconsulti non semel hoc ipsum professi sunt: Jus suum naturam sequi; simplicitatem legibus amicam esse; inde vim vi repellere licere; neminem cum alterius detrimento locupletari debere, aliaque id genus infinita derivarunt. Profecto ratio naturalis a Juris Civilis corpore si divellatur, putridum sine anima supererit cadaver, monstrum ingens, cui lumen ademptum est. Hærebitis ubivis, si æquum ab iniquo separandum, si licitum ab illicito discernendum erit: deerunt Vobis regulæ bonæ interpretationis; summum jus summa injuria fiet; & prætextu juris scientiæ hominum vita & fortunæ insidiis exponentur.

Nolim autem existimetis, me, dum juris naturalis præstantiam laudo, detrahare aliquid velle juri Romano, cujus æstimationem & cultum non nisi cum vita deponam. Ipse indies, juxta cum aliis Clarissimis Collegis meis, ad quatuor Institutionum libros viam Vobis aperiam: nec leges tantum, sed & earum occasionem, ortum, progressum, durationem, ex historiarum monumentis exponam. Verum quemadmodum illi, qui ædificia exstruunt, non necessitatem modo & utilitatem, sed pulchritudinem quoque ante oculos sibi proponunt; sic & sobriæ criticæ atque amœnitatibus erit locus: ut tamen semper memores simus moniti Grotiani, ne cultu verborum nudo ipsam ejus sapientiæ vim infringamus.^b Omnino animus vester, velut vomere,

magis

^a De his, aliisque non veris, sed simulatis artis nostræ alumnis, dicam alio tempore, ne quis illud Catulli objiciat: *sed non videmus mantica quod in tergo est.*

^b Grotius lib. v. Histor. ad A. 1596. *Civile studium Doctorem habuit Hugonem Donellum, qui, Connani & Duareni vestigiis inherens, legum disciplinam in ordinem artisque modum composuit, recisus quæ superioris ævi secunda nimium imperitia turbaret; non tamen ut recentiori inertie accederet, quæ nudo verborum cultu ipsam ejus sapientiæ vim infregit.*

magis proſcindendus erat ſtudiis humanitatis, ac prorogato tempore ſtudiorum, in collegiis *Philosophiæ* rationalis, & moralis, ad ſementem præparandus, antequam ad *Jurisprudentiæ* ſacra accederetis. Illa anſas præbent, quibus reconditos *Jurisconſultorum* ſenſus tenemus; illa ſcalas habent, quibus ad veræ eruditionis, prudentiæ atque honorum culmen aſcenditur. Simulatio & quicquid perſtrinximus vitiſſimum, priſcis gentiliſum *Philosophis*, non *Philosophiæ* imputanda ſunt. Cicero hanc mentis ſanitatē appellavit, & maximum munus, quod generi humano datum eſt.

Ut tertia *Juris Canonici* diſciplina cum jure *Naturali* & *Civili* conjungatur, non modo *Juris utriuſque*, ad quem tantopere adſpiratis, & pars magna feſtinatis, titulus, ſed & ſtudii illius dignitas & utilitas vos commonere debebant. Inſignem quippe uſum jus illud habeat oportet, quod ex *Sacra Scriptura*, ex *Canonibus Eccleſiæ* naſcentis, ex ſententiis *Patrum* doctiſſimis eſt collectum; quod æquitatem & pietatem ſpirat ubivis, conſcientiis medetur, tricas ſpernit, & centum denique annis citius, quam jus *Romanum*, ubivis terrarum eſt receptum. *Marcus Cato* *Sergium Galbam* olim accuſaſſe fertur, quod jus *Pontificium* diſcere nolle: ſed hodie multis accuſatoribus opus foret. Non vos deterreat ſuperſtitio & faſtus *Pontificis Vaticani*, cui ludum valediximus. Veram *Juris Canonici* ſcientiam a ſimulata ſeparabo, ſcorias ab auro; & ſic jucundum erit viſiſſe, quibus artibus canones deſtruxerint ſtatum *Laicorum*, ut ad ſuum molendinum omnia referrentur. Evolvite domi, ſodes, *Bockelmanni* *Differentias juris Civiliſ & Canonici*, quas explicaturus ſum: * is ubivis jus *Canonicum*, quoties vere a jure civili diſſert, moribus receptum eſſe docebit. *Mores noſtri*, generaliter inſit, magis *Canones*

V v v v

ſe-

* Quid de nimio ejus differentiarum ſtudio habendum ſit, quarum æ pars quidem dimidia eſt vera, oſtendam, Deo dante, in *Differtatione, de Spuriis Juris Civ. & Can. differentiis*, volumine ſecundo.

sequuntur, quam leges civiles in multis, ut patet ex decisionibus Curiarum Hollandiæ, Zelandiæ, Westfrisiæ &c. Et hujus tamen juris prorsus imperiti creantur Doctores: O tempora! o mores! Quid ergo superest Commilitones, cur dubitetis, quin ad harum scientiarum, tam utilium, tam pulchrarum, cognitionem adipiscendam, omnis diligentia adhibenda, omnis labor perferendus sit. Proposita habetis tot ac tam illustria ad imitandum exempla; fulti estis adminiculis, ad tantam rem necessariis. Agite ergo, & vosmetipsos sic eruditores ostendite, ut spes Vos pulcherrima foveat, toto legitimo studio absoluto, rempublicam posse, in partibus ejus Vobis credendis, recte gubernari.

Ad te autem, Deus Optime Maxime, qui æterna Sapientia es, exordium & finis nostrarum actionum, ad te, antequam finiamus, supplices devolvimur. Tuere hanc Urbem, hospitium Ecclesiæ tuæ: serva ejus Rectores, patriæ suæ Patres: prospera docentium & discentium in hac Academia conatus: suffice nobis vires tanto muneri necessarias: da animum officii memorem, & cupidum veritatis. O SOL JUSTITIÆ illustra nos, & unicum vitæ atque laboris scopum, nominis tui gloriam, Ecclesiæ commodum, & Reipublicæ incrementum nobis largire.

a pag. 29.

D I X I



605484



INDEX

I N D E X

KERUM ET VERBORUM.

A.

Academici ignorantiae magistri. 581
Ἀκαδημαῖοι 87
 Admonitio fustium. 281
 Advocati Ecclesiarum praesentantur
 Episcopos. 41
 Advocata Ecclesiae Rom. 41. 77
 Advocatorum dolus bonus. 539. &
 malus. 540
 Aegyptiorum odia ex diversis sacris.
 654
 Aestimatio rei quem pariat effe-
 ctum. 327
 Aetas legitima varia apud gentes.
 195
 Affectare vox Philosophica Ulpia-
 no adserta. 677
 Alphenus Varus an Epicureus. 583
 Altitudo aedificiorum Romae. 408
 Altius tollendi servitus & non tol-
 lendi explicata. 408
 Amisso servitutis per non usum
 quomodo contingat. 403
 Ampulla Martini servit ut ungendo
 Henrico IV. 323
 Ampullae Remensis forma ex nummo
 363. origo caelestis primum expli-
 catur. 364. dein rejicitur. 366. scri-
 ptiores de ea in utramque partem.
 363. 365. prudentiores Galii, in-
 ter argumenta praerogativae, eam
 praetermiserunt. 382
Ἀμπύλλαι 83

M. Antoninus Philosophus Stoicus.

Apologorum & parabolarum usus. 571
 Ara Judicum. 559
 Arcadii & Honorii desultoria le-
 gislatio circa nuptias consobri-
 num. 112
 Archiepiscopi Pontifices Maximi
 & Papae dicti. 7
 Aristotelis fortuna apud Rom. 582
 Assuratio Romanis ignota. 325
 Augustus Imp. a Stoicis imbutus.
 571
 Auristamma Francorum Clodoveo
 e caelo non est missa, sed Dio-
 nysii vexillum fuit. 376
 Avulsiones terrarum mirabiles. 316

B.

Baculus insigne Consulum Germa-
 nicorum. 591. praefertur Con-
 sulibus Colonienfibus. 492
 Bataavorum virtus. 464. Reges. 466
 oppidum, an Noviomagus. 466.
 an Batenburgum. 467. Magistra-
 tum nomina. 479. triens sculi
 unde petitus. 434
 Batillus Duumvirorum. 445
 Bavariae Duum jus circa sacra. 636
 Belli tricennalis miseria. 646 seqq.
 Bellorum pro religione gestorum
 antiqua exempla. 645
 Buccellum municipale. 445
 V v v v 2 Mod-

I N D E X

Bodmeria unde dicta 325. differt ab
affecuratione & nautico fœnore.

326

Blanditiæ an obfint testamentis. 548

Burgimagistrorum nomen in Ger-
mania quando exortum. 484. apud

Trajectinos, Leidenses, Gronin-
ganos. 488

Burgus, Burgenfes. 485

C.

C. Romani efferebant per G. 471

Cæſaris titulus inter principes
Imperatoris Majestatis notas. 169

Cajus Stoicus. 599

Calamitas & tempeſtas calamitola.
304

Campani Conſules. 449

Cardinales quando electionem Pa-
parum ſibi adſcripſerint. 23. unde

nomen fortiti. 25. eorum numerus,
dignitas, habitus, tituli. 26. jus-

jurandum. 29

Carolus M. Advocatus Petri. 52.
moderate jure ſuo in ſedem Rom.

est uſus. 51. Patricius Rom. quan-
do factus. 52. jus habuit in Ro-

mam. 53. 55. Imperator ſalutatus.
55. non abſtinuit a titulo Patricia-

tus. 57. haſtam Regum in ſce-
ptum convertit. 378

Carthagine Conſules, Dictatores.

449. Suffetes. 450

Cajus quid ſit. 302. habet ſpecies
innumeras. 303. non exiſtit in ope-

ribus providæ naturæ. 309. divi-
ditur in ſolitum. 311. inſolitum.

312. inſolentiſſimum. 313. cautio-
nes circa ejus præſtationem. 337

Cajum præſtare quid ſit. 320. jure

Naturali nemo tenetur, neque Ro-
mano. 321. nec magis in con-
tractibus ſtriſti juris, quam bonæ

fidei. 323. quatuor ſpecies exci-
piuntur. 324. debet ſolitum & in-

ſolitum, qui caſum recepit. 332.
non vero inſolentiſſimum. 333.

Vid. Præſtatio.

Cato Cenſorius cur Philoſophos Ro-
ma dimittendos ſtatuit. 569. Uti-

cenſis vero eos etiam in caſtra ſe-
cum deduxit. 571

Cautiones Iſtorum degeneres. 532

Cenſor municipalis. 447

Cepſitium tribunal. 347

Xuperia Athenienſium. 18. dedit
occaſionem electioni per inſpira-

tionem. 21

Chriſtiani per vitam, caput & ſa-
lutem Principum, non per genium

eorum jurarunt. 276

Chriſtianiſſimus dicitur Rex Fran-
corum. 380. ex quo tempore. 381.

non ob ampullam Remenſem. 382

Chriſtianorum mutua odia a gen-
tibus olim notata. 645

Civitas Batavorum, Æduorum, &c.

463

Clavium miſſio & vexilli S. Petri
quid ſignificet. 53

Clodoveus, Rex Francorum, in ba-
ptiſmo chriſmate unctus. 363

Coemtio uxorum apud Germanos.

234

Coloniæ effigies parvæ populi Rom.
442. habuerunt Senatū. 444. ci-

ves illarum civibus Rom. adæqua-
ti. 446. Magiſtratus ſuos vocarunt

Prætores, Cenſores, Dictatores.

447

Coloniæ Agrippinæ hodie veſtigia
in-

RERUM ET VERBORUM.

- insignium Consularium. [492](#)
 Commodatarius casum præstat jure
 Hebræorum, Francorum & Ger-
 manorum, non Romanorum. [323](#)
 Compromissarius an se ipsum eli-
 gere possit. [22](#)
 Conclave Cardinalium quando ena-
 tum. [27](#). ejus forma. [28](#). providen-
 tia in eo divina. [29](#). sed major ve-
 nalitatis morbus. [30](#). Scriptores qui
 conclavia descriperunt. [31](#)
 Conjugia Consobrinorum semper
 non sunt sterilia. [101](#)
 Consecratio Principum per pollin-
 ctorem. [347](#)
 Consobrini unde dicti. [82](#). differunt
 a sobrinis. [83](#). sed eorum nomi-
 ne sæpe veniunt. [84](#). fratres & so-
 rores absolute dicuntur, secundum
 idiotismum Hebræorum. [85](#). [89](#).
 jure Naturali possunt conjungi. [94](#).
 & jure Gentium. [96](#). & jure Ro-
 mano antiquo. [103](#). medio. [107](#).
 tempore Jurisconsultorum. [108](#).
 Arcadii & Honorii. [113](#). Justinia-
 ni. [122](#). moribus Belgarum. [133](#)
 Consobrinorum nuptiæ ineptis ra-
 tionibus damnantur jure Can.
 100. a Theodosio prohibita sub i-
 gnis supplicio, ex causis frivolis.
[110](#). Arcadius poenam temperavit.
[113](#). mox sustulit. [114](#). apud Græ-
 cos posteriores prohibita. [126](#).
 apud Gothos ex rescripto petita.
[128](#). legibus Francorum aliorum-
 que Germaniæ populorum vetita.
[130](#). quando jure Can. primum
 daminari ceperint [132](#). moribus
 alibi licita, alibi non item. [133](#)
 Constantinopolitani, primis sex a
 Christo sæculis, Reges suos non
 unxerunt.
 Consul alter Romæ, alter Byzan-
 tii creatus. [121](#)
 Consularius, consulare, consula-
 tio. [490](#)
 Consulatus Clodovei. [475](#)
 Consules apud scriptores mediæ ævi
 sunt Reges, Duces, Episcopi,
 Comites, classium Præfecti. [476](#).
 appellati urbium Senatores. [487](#).
 Proconsulibus minores. [488](#). Tra-
 jectini, Leidenfes, Groningani
 quando primum ita dicti. [488](#).
 hodierni in urbibus Germaniæ dif-
 ferunt numero, & tempore. [490](#).
 eorum symbola & insignia. [491](#)
 Consules in Municipiis & Colonis
 a multis non agnoscuntur. [441](#).
 ab aliis perperam probantur. [454](#).
 Duumviri simulacris ornamentorum
 Consularium gavisii. [445](#). hoc
 nominis adoptarunt Capuæ. [449](#).
 Carthagine. [451](#). Tulculi, Aquile-
 jæ, Pisis, Aufidenæ [452](#). cum
 Consularibus Rom. perperam con-
 fusi. [454](#). minus accurate quæsi-
 ti apud Florum. [457](#). Aufonium.
[458](#). Prudentium. [459](#). dicti Sum-
 mates. [474](#)
 Consules Romani unde dicti. [448](#).
 summa domi auctoritate, & mili-
 tiæ potestate gavisii. [418](#). veniam
 ætatis indulgere non potuerunt.
[455](#). consuluerunt Imperatores. [456](#)
 a Cæsaribus fracti. [459](#). pueri. [460](#).
 per missilia in processibus exhausti.
[460](#). postremus Basilus. [461](#).
 dicti summi Magistratus. [474](#). eo-
 rum symbola & insignia. [491](#)
 Contrabentium dolus bonus. [543](#)
 Corona unguentis immerse. [346](#).
 Vvvv 3 Re-

I N D E X

Regum Francorum primum circuli, deinde in lilia fastigiatae, tandem clausæ. [378](#)
 Corporaliter jurare. [260](#)
Cynicorum proventus unde. [581.](#)
 descriptio graphica. [694.](#) elogia & comparatio cum Monachis. [695](#)
Cæris vox Regem notat. [151. 152.](#)
 quare Imperatorem significare visa sit. [152](#)

D.

Dialectici an Stoici. [590](#)
 Dictator municipalis. [447](#)
 Digitorum elevatio in iurejurando, quam antiqua. [260](#)
Deli vox media apud Græcos & Latinos. [498.](#) mali definitio defensiva. [900.](#) mali clausula. [502.](#) scditas. [503](#)
Dolo bono, uti licet adversus hostes. [502.](#) Rectoribus Rerump. [524.](#) Legislatoribus. [527.](#) Prætori. [529.](#) Jctis. [531.](#) Judicibus. [537.](#) Advocatis. [539.](#) Litigantibus. [431.](#) contrahentibus. [543.](#) mercatoribus. [545.](#) suum tuentibus. [552.](#) erga furiosos & infantes. [554.](#) Medicis. [555.](#) Poëtis. [557.](#) Oratoribus & Historicis. [559](#)
 Dolon. [499](#)
Dolus bonus est solertia. [501.](#) laudatur à Jctis. [503.](#) adhibetur a viro bono. [504.](#) probatus à Stoicis, Socrate, Platone, Xenophonte, Philone Judæo. [505.](#) impugnatur variis argumentis. [507](#) defenditur distinctione inter mendacium & falsiloquium. [508.](#) ex obligatione circa sermonem. [509.](#)

& regulis de collisione legum. [509.](#) ad contraria argumenta respondetur. [510.](#) demonstratur exemplis, petitis ex Vetere Testamento. [512.](#) ex Novo. [513.](#) probatur auctoritate Patrum, Clementis, Chrysostomi, Hieronymi, Cassiani, Ambrosii, Athanasii. [515](#) defenditur auctoritate Theologorum & Jctorum recentiorum, [518](#)
 Ducis Magoi titulus. [143](#)
 Duumvirorum in municipiis fastus. [445. 449.](#) seqq.

E.

Electio Episcoporum priscis temporibus Cleri & Populi suffragio facta. [19.](#) fuit triplex per inspirationem, compromissum & scrutinium. [21.](#) in Oriente pependit ab arbitrio Imperatoris. [43](#)
Elogium facinorosorum, *astutia*, titulus. [284.](#) apud Hebræos, Græcos, Romanos, Gallos, Hispanos usitatum. [285](#)
Epicuri discipulorum turba. [583.](#) doctrinæ Jctis cur displicuerint. [584.](#) Sæctator an Alphenus Varus. [583.](#) arrogantia. [652.](#) dogmata in vita civili nullius usus. [683.](#) secta flagitiorum magistra [684.](#) an simulata Philosophia. [685](#)
 Episcopi cur primis regni negotiis præfecti. [626](#)
 Eucharistia pomum Eridos. [644](#)
Exarchus Ravennatensis quando cœperit, quando desierit. [47.](#) in ejus locum successerunt Reges Francorum. [53](#)
 Excommunicationis descriptio. [628](#)
 F.

RERUE ET VERBORUM.

F.

FActum Principis quando ad casus fortuitos referendum. [307](#)

Fatum fatum Stoicorum. [299](#). fatalia damna. [300](#)

Femine ante annum XII. nupserunt apud Romanos. [196](#). Viri-potentes, non puberes dictæ. [197](#). par ipsis cum viris ad sapientiam an facultas. [203](#). luxus earum apud Romanos. [204](#). infirmitas iudicii communis. [206](#). majorenes, tutore auctore non contrahentes, in integrum an restituantur. [207](#). habuerunt tutores & curatores simul. [214](#). in judicialibus indigent auxilio tutoris. [241](#). hodie in octodecim speciebus extra iudicium sine tutore agunt. [245](#). quibus modis à tutela liberentur. [288](#)

Feminarum tutela duplex, alia ætatis, alia sexus. [198](#). posterior ex variis auctoribus probatur. [199](#). ejus origo ex moribus Rom. [200](#). apud Græcos similis tutela fuit, sed diversa tamen. [202](#). duplex ejus ratio. [204](#). differt a tutela ætatis quod ad auctoritatem. [206](#) & res alienandas. [213](#). quod tutorem habenti tutor dabatur. [214](#). alia legitima fuit, alia prætoria. [219](#). soluta omni capitis deminutione. [225](#). tum jure trium liberorum. [226](#). quando deserit, & quare. [227](#). Vid. *Tutela & Tutor*.

Fictiones juris nec laudandæ, nec vituperandæ. [535](#)

Fides hosti servanda. [523](#)

Formula Concordiæ. [643](#)

Fortuna, Genius, *Tuxa* quomodo

differt. [256](#). Philosophis derivata. [298](#). differt à casu. [299](#)

Fortuna aurea Imperii Rom. symbolum. [357](#)

Franciscus I. cur sibi paraverit Imperiale diadema. [182](#)

Francorum Reges clypeo sublati. [361](#). circulum accipiebant pro corona. [361](#). oleo cœlesti inuncti. [362](#). non vero ante Pippinum. [369](#). Lilia cur in insignibus gerant. [375](#). illorum Auristamma. [367](#). Vid. *Gallie*.

Fridericus I. strenuus jurium Imperii defensor. [72](#)

Fundus liber opponitur servo. [394](#)

Furiosi dolo bono placari possunt. [554](#)

Furtum quando ad casus fortuitos pertineat. [306](#)

G.

Gallia Rex ipso jure succedit in Regnum. [359](#). vocatur immortalis. [360](#). cur eligi dicatur ab AEp. Remensi. [371](#). an & cur Remis ungi debeat. [372](#). unctus aliquando ex ampulla Martini. [374](#). quibus cœrimoniis ungatur & coronetur. [377](#). quando coronam clausam sibi arrogaverit. [378](#). jurat populo, & Episcopis pollicetur tutelam Ecclesiarum. [379](#). ungitur novici. [377](#). Rex Regum vocatus. [163](#). [380](#). & Christianissimus [381](#). absolute imperat & quare. [383](#). sanctius quid habere creditur ceteris. [384](#). est Canonicus in variis Capitulis [384](#). sanati strumas. [385](#). **impubes** subest tutelæ testa-

I N D E X

testamentariæ vel legitimæ, usque
ad initium anni quarti decimi, ex
functione Caroli V. 388. Vid.
Francorum & Undio.
Genius cuilibet rei inanimatæ tri-
butus 263. maxime hominibus.
264. Socratis, Bodini, Scaligeri,
Raymundi. 265. privatorum, ut
naturæ Deus colebatur. 267. dif-
fert à Fortuna. 266
Genius Principis ceteris excellen-
tior. 265. ex decreto Senatus Deus
factus. 267. primum Julii Cæsaris,
deinde ejus successorum. 268. Vid.
Jurjurandum & Pena.
Germani Principem electum ca-
strensi ritu scuto imponebant. 347.
etiam Ostrogothi, & Græci re-
centiores. 348
Germanorum libertas. 633
Graculi. 304
Græcus sermo Romanis, ut nobis
Latinus. 286
Graviones. 482
Griemanni Frisiorum. 482

H

Hasta Regiæ Majestatis symbo-
lum. 362
Henrici Leonis jus circa *facra*. 639
Henricus Auceps cur ungi nolue-
rit. 352
Herbæ pro zizaniis. 308
Hercules Macsfanus unde dictus.
462. Deus Germanorum qualis.
463
Hæreticos ferro delere, quam anti-
quum. 619. bono animo errantes
tolerandos. 656
Hierarchie Papalis tria capita po-

tiora. 12. incommoda. 630. pote-
stas an nimis fracta. 651
Hildebrandi artes. 769. Dictatus.
70. an Papæ nomen unicum fe-
cerit in orbe. 8. machinationes,
quibus Hierarchiam stabilivit. 627
Historicorum dolus bonus. 559
Hoc jure utimur. 424

I

Jacobi stratagema œconomicum. 547
Jaçtatio apud Ulpianum quid. 689
Imperator jus habet circa *facra*. 39.
41. 624. est Advocatus sedis Ro-
manæ 41. olim confirmavit elo-
ctionem Papalem. 57. an per præ-
scriptionem id sit sublatum. 74
Imperatores alii jus circa *facra* exer-
cuerunt 624. seqq. alii illud insu-
per habuerunt & quare. 62. 630.
eruditi. 634 quas partes sacrorum
hodie exercent. 648. laudatissimi
tolerarunt diversas religiones. 655
Imperatores Romani posteriores in
inauguratione in altum sublati. 347
Imperatoria corona clausa. 181
Imperatoris quanti interfit Papam
habere moderatum. 15. jura im-
minuit Carolus Crassus in sacris.
62. magis Hildebrandus. 70. præ-
cedentia quibus fundamentis inni-
tatur. 188
Imperatoris nomen trifariam capi-
tur. 165. initio minus fuit titulo
Regis. 166. hodie majus quidem,
180. sed sine injuria Augusti ad-
dicisci potest. 168. Reges Hispania-
rum id sibi sumserunt. 173. Jaco-
bus

RERUM ET VERBORUM.

bus item Angliæ & Heraldus Da-
niæ Reges. 174
Inaugurationes Regum quare fiant. 341.
apud Perlas quomodo factæ. 345.
Francorum. 361
Incendium quando casibus fortuitis
annumeretur. 305. Romæ fre-
quens. 317
Infantes an fictis sermonibus in-
formandi. 555
Ingenium pro dolo. 499. 502
Inquisitio Hispanica damnatur. 618
Insolentissimi casus exempla. 313.
quando is præstandus. 333
Insoliti casus exempla. 312. quando
præstandus. 331
Inundationum exempla, valde sin-
gularia. 313. 316
Johanna Papissa ad fabulas pertinet.
33
Judicum dolus bonus. 537
Junio singulis feminis data. 264. Au-
gustarum excellentior. 266
Juriconsulti unum Deum credi-
derunt. 579. dicti sapientes. 585.
cur Stoicorum scholas secuti. 585.
586. magni Dialectici. 591. Gram-
matici. 592. Etymologici. 593. se
invicem derident. 597. eriscundi.
598. varia eruditione clari. 668.
deseruerunt ineptas Stoicorum do-
ctrinas. 686. seqq. maximi Philo-
sophiæ cultores. 669. in Epicureos
an obliqui. 685. Sacerdotes juris.
691. seqq. V. *Sacerdotium*.
Æorum principes Stoici. 595. se-
dæ. 597. doctrinæ cum Philoso-
phia Stoico:um comparatæ. 686.
æmulatio cum Stoicis. 695. vero-
rum elogia. 699. dolus bonus. 531.

V. *Philosophiam. Stoici*.
Juris Naturæ commendatio. 701.
Publici pars jus Ecclesiasticum.
609
Jurisprudentiæ definitio. 585 fines
latissimi. 671. laus major, quam
Philosophiæ. 696. 700. dignitas à
Stoicis imminuta. 697. ab Euna-
pio aliisque. 700
Jus circa sacra quinam auctores
illustrant. 610. 619. asseritur sum-
mæ potestati. 613. tibi vindicarunt
reges gentilium. 614. exercent
Principes Christiani. 620. quo mo-
do & sine. 621. Regum Hispani-
æ, Galliæ & Angliæ. 619. Sta-
tum Imperii Romano-Germanici.
636 seqq. est pars præcipua
superioritatis territorialis. 650. res-
trictum in terris Statuum. 651
Jusjurandum metu extortum non
est servandum. 252. nec injustum
vel incautum. 253. an præstare li-
ceat. 257. quare in Rep. necessa-
rium. 258. religio & metus facer
jurantibus injectus. 259. corpora-
le. 260. per Jovem præstitum, in
judiciis Gentilium. 262. per vi-
tam, sceptrum, & solum Regiæ.
271. Regum in inauguratione. 358
Jusjurandum per Genium Principis
ex decreto Senatus enatum.
267. fuit gravissimum domi-
niæque. 269. sanctissimum Prin-
cipatus mysterium. 270. ex Orien-
te ad Romanos translatum. 271.
Christiani id præstare recusant.
275 Carolus M. sustulit. 276. cum
Hebræorum קִשְׁפָּה collatum. 282.
Vid. *Genius & Perjurium*.

Xxxx

L. La-

I N D E X

L.

Labeo cur infanus dictus. 576
 Labes mutatur in tabes. 304
 Lapidis ungendi mos unde. 343
 Lapidum pluvia sunt grandinis immanis lapides. 312
 Latus clavus Duumvirorum. 445
 Legis XII tabb. verba genuina. 416
 Legislatorum dolus bonus. 527
 Lex Claudia cessitiam tutelam sustulit. 223
 Libertas rerum & personarum distincta. 394
 Lictores cum falcibus Duumvirorum. 446
 Lilia quando primum à Francis in regni insignibus usurpata. 375
 Litigantium dolus bonus. 541
 Locustæ. 314 edules. 315. ad calus rarissimos pertinent. 333
 Ludovici Pii pactum excutitur 57
 Ludovici XII. Regis Gall. nomen. 10
 Ludovicus Bavarum jurium Imperii strenuus vindex. 73
 Lutheri elogium. 631

M.

Magdeburgi occupati miseria. 647
 Magister dignitatis nomen, civium rectoribus adscriptum. 483. seqq.
Magistratus summi urbium variis nominibus insigniti. 479. in medio ævo Potestates, Abbates, Capitolini, Scabini, Aldermanni dicti. 477. apud Batavos & Francos Meergrævii, Meieri, Majores & Villici. 480. quando Consulium

nomen adoptarint. 486
 Magistri civium. 483
 Magum Germanis, Gallis & Britannis oppidum notat. 467
 Major, Meier, Maire. 481
 Manus justitiæ Regis Galliæ. 377
 Marcianus Stoicus. 599
 Maritalis tutela uxorum, apud Gallos, Hispanos, Italos, Belgas, & plerisque Germanos usitata. 234. est legitima. 236
 Maritus cur uxoris minorænnis vel furiosæ non potuit esse tutor. 218
 Maximiliani I. literæ, de titulo Imperatoris Rufforum, sub examen vocatæ. 155
 Medicorum dolus bonus. 555
 Medixtuticus. 448
Mendacium punitur à Jctis. 503. in virum bonum non cadit. 504. differt a falsiloquio. 508
 Mentiri & Mendacium dicere differunt. 251
 Mer Princeps. 480
 Mercatorum dolus bonus. 545
 Mercedis remissio ob sterilitatem. 334
 Merum jus est solum. 404
 Metropoles sacræ quando exortæ. 6
 Monachi quantum profuerint Sedi Rom. 631
 Motus arboris. 402
 Mulier in quibus negotiis curatore indigeat, vel non. 241. seqq.
 Mundium, Mundualdus, Mundiurnus unde dictus. 231

N.

Nosce te ipsum. 574
 Noviomagum unde dictum. 467
Naptia.

RERUM ET VERBORUM.

Nuptiarum sacra. 79. vox ambigua. 81. Ratio earum prohibitarum decretoria. 91. in linea recta. 92. in linea obliqua. 93. impedimenta quae remiserit. 116

O.

Observantia Imperii illustrata. 650
Oleum coeleste ampullae Remensis. 362

Oratorum dolus bonus. 559
Orbis doctrinarum. 668
Osculum pedis Papalis. 14
Otho I. pactus cum Leone. 63. Patricius Rom. factus 64. nationi Germanicae æternum jus in Italiam acquisivit. 66. 76
Otho I. an prudenter Imperium Rom. conjunxit cum regno Germanico. 626

P.

Pacis Osnabrugensis elogium. 648.
detestatio Pontificis Rom. 649.
Panætius primus Romæ docuit Philosophiam. 570
PAPÆ nomen unde. 7. auctoritas immensa. 8. in Hispania lex non valet sine Regis consensu. 10. Provinciae avare reguntur. 11. fiscus vorago Europæ est. 12. thraconismus. 13. pedes Reges osculantur. 14. pallium. 35. electi consecratio. & coronatio duplex. 34. mitra a pileo sacerdotali gentilium. 35. Vid. *Pontifex.*
Pæres Franciæ quibus officiis fungantur in inauguratione Regis:

unde dicti, quinam sint. 374. primus eorum Remensis. 375
Patriarchæ in Oriente electi, & remoti ad nutum Imperatoris. 43
Patriæ quantum debeamus. 578
Patriciatus Rom. quæ fuerit dignitas. 52. delatus Carolo M. 52. Othoni I. 64. ejusque successoribus. 68 69
Patruels in l. 1. de L. Pompej. 87
Periculo suscepto quid contineatur. 327

Perjurii vox unde dicta. 250. descriptio. 251. variae species. 252. foeditas. 254. frequentia Romæ. 255. censura ad Pontifices Romæ non pertinet. 279. Jupiter vindex. 280. indices fluvii. 281
Perjurium sub libera Rep. nulla lege notatum. 277. ad Censuram, non ad aliorum notionem pertinet. 278. postea non omne impunitum. 287. non necessarium, aut cum crimine falsi conjunctum. 288. inconsultum & volaticum ad Deum vindicem missum. 289. varie apud Gentes punitum. 291. cur manus vel digitorum amputatione. 293. Vid. *Genius & Jusjurandum.*

Perarum Reges quomodo inaugurati. 345. 352
Petri successores cur senes eligantur. 11
Petri Alexii Russorum Imp. laus. 136. 158. titulus 159. animus excelsus. 190. Vid. *Russorum & Imperatoris.*
Philosophi an Professores. 680. iari qui vere philosophantur. 681. gloriæ animalia. 698. depicti a
Xxxx 2 Quin-

I N D E X

Quintiliano. 699
Philosophiam *Jætorum* Stoicam
 fuisse, quinam ostenderint. 566.
 v. *Juriconsulti*, *simulata*, *vera*.
Philosophorum dissensus. 567. sectæ.
580. contemplativorum elogia.
673. Sophisticorum infamia. 676
Simulatorum multitudo. 679. la-
 laria. 680. habitus. 681. hypocrisis.
686. vitia. 699
Pippinus primus Regum Franco-
 rum in Regem unctus a Bonifa-
 cio. 367. deinde a Stephano Papa.
368. cur bis ungi voluerit. 367
Plebis suffragium in electione Epi-
 scoporum plenum fuit. 20. vox
 Episcopum postulantis apud Græ-
 cos & Latinos. 21. auctoritas in
 electione Papali quando sublata.
24. V. *Electio*.
Pena perjurii per Genium Principi-
 sis admonitio iustitum. 281. gravi-
 or quam perjurii per Deos. 282.
 ejus rationes varix. 283. V. *Per-
 jurium*.
Pœtarum dolus bonus. 557
Pomponius Stoicus. 599
Pontificatus Maximus Imperatorum
 Gentilium & Christianorum. 39
Pontifex Romanus cum barbaris
 Æthiopum Sacerdotibus compa-
 ratus. 627. insolenter habuit Re-
 ges & Principes. 628. expilavit
 eorum terras. 641. quando caput
 extollere coepit, & quare. 5. Deus
 & Servus Servorum vocatus. 2.
 in Imperium multa sibi arrogavit.
15. an collum Friderici I. calcarit.
16. 628. Cæsares odio habet. 17.
 cur nomen mutet. 32. Langobar-
 dorum jugum quare excussit. 49.

sibi soli arrogavit jus ungendi Re-
 ges. 351
Pontificis Rom. electio antiquissima
 multis dissidiis laboravit. 4. num-
 mis fuit extorta. 9. peperit schif-
 mata. 20. præfente Clero & popu-
 lo facta. 20. per adorationem. 21.
 quando ad Cardinales delata. 22.
 quomodo populo denunciatur. 32.
 sæpe per annos & menses dilata.
37. confirmata vel rescissa ab
 Imp. Rom. post ab Herulis. 45.
 dein ab Ostrogothis. 46. ab Exar-
 cho Ravennatensi. 47. ab Impe-
 ratoribus Francicis. 57. Saxonice.
63. quando confirmari defecit. 71.
 Vid. *Papa*.
Pontifex summus Judæorum Regi
 subjectus. 344
Potestates, Magistratus Urbium li-
 berarum. 478
Præconis elogium inter fustium
 ictus. 284. cur Græco sermone
 conceptum. 285
Præscriptio notat exceptionem. 435.
 immemorialis quid sit. 433. Saxo-
 nica & Batavorum unde. 433
Præscriptio servitutis extraordi-
 naria à Prætore introducta. 425.
 ejus quatuor requisita. 425. vocat-
 ur patientia. 426. postulat, tem-
 pus, cujus initii memoria non ex-
 tat. 427. ordinaria à Justiniano in-
 troducta. 428. requirit titulum &
 bonam fidem, non scientiam veri
 Domini. 429. hodie alia est in servitu-
 tibus continuis. 432. alia in dis-
 continuis. 433
Præstatio casus quatuor in specie-
 bus necessaria est. 324. in quibus-
 dam

RERUE ET VERBORUM.

dam negotiis recipitur expresse.
325. in quibusdam tacite. 327. non
omnem casum continet. 329. Vid.

Casus.

Prætexta Duumvirorum. 445

Prætor municipalis. 447

Prætoris dolus bonus. 527

Princeps vectigal recipiens an dam-
num refarciat. 318

Principibus Romanis divini hono-
res tributi. 272. nomina Deorum.

274. Deorum injuriæ Diis curæ
sunt visæ. 279

Providentia divina asseritur. 297.
vocatur eventus, & fortuna. 298.

fatum. 299. quomodo à Jc̃is in-
tellecta. 302

Proculjani Stoicis mage addicti.
597

Propius Sobrino quis. 89

Prunæ batillus Duumvirorum. 445

Puteal Libonis. 260

Pythagoræ quo loco apud Rom.
581. Magiæ infamia laborarunt.
685

R.

Radiata corona. 346

Ratio juris Canonici defendi-
tur. 101. Jc̃torum quando non ac-
curata. 421

Raucae. 308

Reformationis initia. 631. obstacu-
la. 632. justitia. 640. complemen-
tum. 642

Regentes in Gallia quid possint.
388

Reges cur sancti. 354. bema ingre-
diantur. 355. ambas species panis

& vini accipiant. 355. Canonici

sint. 356. Christi vocentur. 357

Reges Papæ stapedis lorum teue-
runt. 13

Reges Judæorum jus habuerunt cir-
ca sacra. 620

Reges Regum quinam dicti. 163.
cur fratres se appellent. 178

Regnum pro corona Papali. 35

Regum filii olim non uncti. 344.
baculus. 491

Religio Christiana non subest im-
perio civili. 617

Religio naturalis qua in re confi-
stat. 613. subjacet imperio civili.
616. ejus violatæ pœna. *ibid.*

Remensis AEp. cur sibi vindicet
officium unctionis, & à quo ac-
ceperit. 370. est Primas Belgicæ

secundæ & Metropolitæ. 371. Re-
gem eligere dicitur. *ibid.*

Renovatio Imperii Rom. 55. 63.
168

Reservationes mentales jurantium.
550

Rhox-Alani Romanos tributarios
habuerunt. 141

Romani sero literas acceperunt.
568. qua occasione primos Philo-
sophos audiverint. 569. quicorum

electivi Philosophi. 582. Epicurei.
583

Romani minus prudenter invitis
adolescentibus curatores non de-
derunt. 196

Roma barbarorum municipium.
461

Turia. 139

Russi Dromitze, Moschi, Tauro-
Scythæ, Ruzi, Rhutheni, Lu-
blinenses dicti. 138. quando Chri-
stiani facti. 144. an à Græcis sub-

acti.

X x x 3

æti. 145. Suprematum Ecclesiæ Rom. non agnoverunt. 150	Scríbonia lex consularis an tribunitia fuerit. 419. ejus rationes. 420
Rússia quando in regnum conversaf. 146 184	Sculterus. 489
<i>Rússorum</i> antiquitas, sedes, & nomina varia. 138. Dux Magnus an Dapifer Imperii. 142. ceremoniæ Græcæ unde. 144. metropolis Kíovíá. 145. regimen Politicum vñum 146. lingua Slavonicæ dialectus. 151	Sectæ Philosophorum. 567. non vocantur hæreses Modestino. 580
<i>Rússorum Principes</i> Magni Duces, & Cacani dicti. 184. regium diademata Papali auctoritate non suscepérunt. 149. ab Anglis, Gal- lis, Germanis, aliisque Imperatores dicti 153. an a Maximiliano I. disquirunt. 155. alios Reges fratres compellarunt. 178. sunt sui juris. 182. Sec IX. jam Imperatores dicti. 184. multa postularunt singularia 185	Sedes stercoraria qualis. 33
Rústica honoratiora urbanis, apud Romanos. 405	Sedis Romanæ incrementa unde. 625
	Semper Augusti nota foli Imperatori Romano Germanico vindicatur. 190. non ultra Domitiani ævum. 191
	Senatores municipales. 444
	SC. Vellejani necessitas & origo. 128
	<i>Serviitutis rerum</i> origo & fontes. 393. amissio per non usum. 403
	<i>Servitus</i> rerum & hominum quomodo differant. 393. urbana quid distet a rústica. 406. affirmativa a negativa. 407. altius tollendi & non tollendi. 408. non usu capitur. 423. male dividitur in continuam & discontinuam. 430
	<i>Simulata Philosophia</i> est contemplativa. 673. physica. 674. mercenaria & sophistica. 675. reprehensa in literis sacris. 700
S.	Simulatum opponitur vero. 672
Sabiniani Stoicis adversi. 597	Sobrini sunt consobrinorum liberi. 83. dicuntur fratres. 87
<i>Sacerdotium</i> Stoicorum. 692.	Societæ contractus antiquitas & etymologia. 326
Jætorum. 693. Poetarum & Christianorum. 692	Soliti casus exempla. 311
Sacrorum libertas a gentilibus indulta. 653. utilis regionibus Principum. 657	Sophisticæ Philosophiæ infamia. 676
Sacrorum varia ratio. 612	Sors cur in electione Episcoporum damnata. 22
Sagibarones. 482	Speculi Saxonici ineptiæ. 242
Salii inter palatina auxilia. 347	Stabgerichte. 492
Salomonis judicium divinum. 537	<i>Statuum Imperii</i> superioritas quando enata. 623. pileus. 635. libertas circa
Saxonix Ducum jus circa sacra. 637	
Sceptrum Rectoris Academici. 492	
Scopelismus. 315	

RERUM ET VERBORUM.

circa sacra. 636. incrementa quibus ex causis promota. 638. reformatio sacrorum. 640. patientia in ferendis abusibus Papalibus. 641. secularisatio bonorum Ecclesiasticorum. 643. partes juris circa sacra holiernæ. 650. *autonomia*. 651
Sterilitatis singularis exempla. 313. cur cauentur remissionem mercedis. 334
Stoici primi apud Rom. Philo-
phi. 569. a Proceribus Rom. maximo honore affecti. 570. pietatem ubivis inculcarunt. 573. præclare de officiis erga seipsum & congeneres senserunt. 574. jurati Principatus ocores. 575. nuptiarum commendatores. 577. & patriæ. 578. per excellentiam sapientiæ Doctores dicti. 585. Remp. administrarunt. 587. munditiam corporis non neglexerunt. 588. summi Dialectici. 590. Grammatici. 591. se vere philosophantes iactabant. 683. Epicurum sugillabant. 684. peccata paria faciunt. 686. incestum probant. 687. eorum sapientes soli omnia. 688. sibi ipsis adversi. 688. 690. probarunt *avvopar*. 689. æmuli Jætorum. 695. sugillarunt Jætos. 697
Stoicorum prima initia apud Rom. 570. progressus. 571. maxima frequentia tempore Antonini. 572. 678. unus Deus. 579. sententia de cultu divino. 580. Dialectica. 589. errores. 573. & paradoxa. 601. doctrinæ ineptæ. 686. seqq. ingens numerus. 684. sectatores Pharisei. 686. Philosophia non satis apta vitæ civili. 688

Stratagemata adversus hostes. 521
Strumarum morbus, quid sit. 385. vis eas sanandi an Regibus Galliæ competat. 384. ex quo tempore. 385. variæ de hac facultate sententiæ. 386. an eadem Regibus Angliæ competat. 386
Stuppæ accendendæ ritus. 35
Suffetes summus Magistratus Per-
norum. 450
Symbola regni cur adhibeantur. 342. quænam apud Romanos & Germanos. 357. fabulosa. 365

T.

Tempestates ritibus Romanis consecratæ. 301
Tempus statutum in usucapione libertatis. 398. decessoris prodest successoris singulari. 400. non est molus finien æ obligationis. 390
Terræ motus singulares. 317
Tintinnabula in humerali Consul-
lum Trajectinorum. 493. an a Romanis. 494. anab Ecclesiasticis & quando petita. 495
Tituli Regum superbi, insolentes & divini. 163. seqq. non temere ipsis sunt tribuendi. 179
Titulus Imperantis a quolibet populo domi suæ mutari potest. 161. exteri Principes prærogativam ei annexam conferre non tenentur. 175. ejus fundamentum consensus expressus vel tacitus. 176. Majestatis titulum quo jure petat Ruforum Monarcha, in aula Imperatoris 187. Vide *Rassorum*.
Tolsteegs porta Trajectina. 470
Tutela juris Civ. est & pectinerad curam

I N D E X

curam Magistratum. 194
 Tutela materna apud Gallos recepta, sed semper fatalis. 387
Tutela perpetua apud Germanos mundium dicta. 230. convenit cum tutela sexus Græcorum, quod viduæ in tutela filiorum. 232. differt ab ea, quod mariti per omnia uxorum tutores. 233. quatuordecim modis differt a tutela & cura Rom. 239. Vid. *femina*.
Tutor feminarum apud Græcos alius, quam apud Romanos. 202. non administravit sed auctoritatem interposuit. 206. sine eo mulieri potuit solvi. 207. necessarius erat, si mulier lege ageret vel iudicio, aut si se obligaret. 208. si nubere aut dorem diceret. 209. testamentum mulier sine eo non condebat. 210. nec manumittebat. 211. nec hereditatem cernebat. 212. nec mancipabat, aut tutelam suscipiebat. 213. ab ipsis mulieribus electus. 215. erat maritus. 217. an ex inquisitione datus. 219. potuit se excusare. 220. tutela abdicare. 221. eam in jure cedere. 222. quando hodie auctoritatem interponere possit. 238. an debeat, si mulier extra iudicium agat. 244. Vid. *Feminarum*.
Trajectum civitas Batavorum antiqua, Outreht. 468. a gentilibus extructum. 469. nomen tulit a trajectu, per sycopem Traiectus, inde Trechtis 40. Triectum. 471. vicus primum ex castris Rom. inde urbs, tandem Frisæ oppidum, & solum regni Frisæ. 472. differt a Wiltenburg. 473. quan-

do ejus Rectores Consules dici cœperint. 488. horum habitus cum tintinnabulis. 493
 Trebatius Testa an Epicureus. 596
 Tribunal in municipiis. 445

V.

*V*estigialium conductores quando parte mercedis levandi. 336
 Vellus aureum quid fuerit 141
Vera Philosophia est activa. 673. moralis. 674. gratuita. 674. prudentia civilis. 675. quænam a Platone & Aristotele sic dicta 700
 Vergobretus Æduorum. 478
Verius est, ad æquitatem refertur. 396
 Vexillum urbis Romæ an diversum a vexillo S. Petri. 54
 Vicus Wyck. 468. pro urbe. 471
 Vihternas unde dictus. 464. 466
 Vilicus. 481
 Vinum Italicum facile coaccit. 308
 Virgines Vestales, jure trium liberorum subnixæ, testari poterunt sine tutore. 226
 Viridia in testis. 409
 Vis major, alia divina, alia naturalis. 300
 Vitium vetustas. 309
Ulpianus Stoicus. 599. criminis non unius accusatus 665. defensus. 666. ejus elogium linguæ. 669. modestissimus 677. quando scripta elucubravir. 678. multa ex Aristotele & Platone fuit mutatus. 685
Unctio

RERUM ET VERBORUM.

Unctio animalium. 342. lapidum. 343. Pontificis & Sacerdotum apud Hebræos. 344. Christianorum. 353
Unctio Regum antiquior Saule. 342 à Judæis per Wambam primum ad Christianos, dein a Pippino ad Francorum Reges transiit. 350. cūr in quatuor tantum Regibus obtinere dicatur. 351. quatenus differt ab unctione Episcoporum. 353. sit chrismate, etiam in capite. 354.

Unctionis origo a Jacobo Patriarcha. 343. effectus apud Hebræos. 344. diversitas apud Christianos. 352

Unctionis Regie effectus Ecclesiastici. 354. civiles. 356. spurii. 358

Unguenti usus apud Romanos. 345. diversitas apud Christianos. 353

Υπατος pro Proconsule. 451. quilibet vir in dignitate constitutus. 453

Urbium in Germania diversitas. 489. Advocati, Præfecti, Scultetti Imperiales. 489.

Ufucapiens libertatem rem possedisse debet, tanquam liberam, bona fide. 399. actum servituti contrarium suscipere debet. 401

Ufucapio libertatis describitur. 395. ejus auctores. 396. rationes.

414. requirit, ut nemo servitute sit usus. 397. per tempus statutum, olim biennii, deinde longæ temporis. 398. differt ab amissionem servitutis per non usum. 403. in quibus servitutibus sit necessaria. 404. a Justiniano non est sublata. 410. moribus obtinet, etiam in iuribus aliis. 412.

Ufucapio servitutum lege XII. tabb. non fuit probata. 416. a mediæ Jurisprudentiæ auctoribus permixta, tam urbanorum, quam rusticorum prædiorum. 417. Tiberii tempore iterum vetita per legem Scriboniam. 419. qua ratione. 421. post Scriboniam in usum non revocata. 422. fundo ufucapto procedit. 424. a Justiniano iterum non admittitur. 428

Usus auctoritas. 416

W.

Wit prudens.

466

Z.

Zibelinæ pelles ex tergis murium Ponticorum. 141

F I N I S.

C O R R I G E N D A.

pag. 19. lin. 5. lege cheirotone. *pag. 69. lin. 23. vel si a Clero. pag. 93. lin. 10. vetare* quidem. *pag. 129. lin. 25. obtrufit. pag. 141. lin. 13. Colchida. pag. 314. lin. 16. contactu. pag. 347. lin. 5. polliniflorum sacerdotum. pag. 351. lin. pen. ΘΕΟΣΤΕΦΕΙΣ. pag. 471. lin. 11. auctore. pag. 508. lin. 10. proximi. lin. seq. Theologicis. pag. 566. lin. 9. historiarum. Hæc aliæque similia, Benevole Lector, condona & emenda.*











